


Yus Papí: Shuarjai
Yus Yamaram Chicham
Najanamu



New Testament in Shuar (EC:jiv:Shuar)

Yus Papí: Shuarjai Yus Yamaram Chicham Najanamu New Testament in Shuar (EC:jiv:Shuar)

copyright © 2012 Wycliffe Bible Translators, Inc.

Language: Shuar

Translation by: Wycliffe Bible Translators, Inc.

Shuar [jiv], Ecuador

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Shuar

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Contents

MATEU	1
MĀRKUS	56
RŪKAS	91
JUAN	151
TŪRAMU	192
RŪMANAM	250
1 KURINTIUNAM	273
2 KURINTIUNAM	296
KARASEANAM	311
IPISIUNAM	320
JIRIPIUSNUM	328
KURUSENAM	334
1 TISARŪNIKIANAM	340
2 TISARŪNIKIANAM	346
1 TIMIUTĒUN	349
2 TIMIUTĒUN	356
TITIUN	361
JIRIMIŪNKAN	364
ISRAERNUM	366
SĀNTIAK	383
1 PĪTIUR	389
2 PĪTIUR	396
1 JUAN	400
2 JUAN	406
3 JUAN	407
JŪTAS	408
APUKARĪPSIS	410

Yúsan Shiir Chichamen MATEU aarmia nu

Jesukrístu weatri (Rúkas 3.23-38)

¹ Jesukrístu weatri ju áiniawai. Tura ashí nankaamas ti uunt weat Tawitcha Apraámsha áiniawai.

² Apraáma uchirí Isak. Tura Isaka uchirí Jakup. Jakupa uchirísha Jutá ni yachíjiai.

³ Tura Jutá uchirín Páresan tura Sarancha Tamar jurermiayi. Páresa uchirísha Esum, nuna uchirísha Aram.

⁴ Nuna uchirísha Aminiatáp. Nuna uchirísha Nasun. Nuna uchirísha Sarmun.

⁵ Sarmunka uchiríncha Púusan Raap jurermiayi. Puusa uchirín Uwitian Ruut jurermiayi. Uwitia uchirísha Isaí.

⁶ Nuna uchirísha uunt akupin Tawit. Uunt akupin Tawitia uchiríncha Sarumúnkan Patsepa jurermiayi. Patsepasha emka Uríasa nuweeyayi.

⁷ Sarumúnka uchirí Rupuam. Nuna uchirísha Apías. Nuna uchirísha Asa.

⁸ Asa uchirísha Jusapát. Nuna uchirísha Juram. Nuna uchirí Usías.

⁹ Usías uchirí Jutam. Nuna uchirí Akas. Nuna uchirí Esekías.

¹⁰ Esekías uchirí Manasés. Nuna uchirí Amun. Nuna uchirí Jusías.

¹¹ Jusías uchirí Jekunías ni yachí armia nujai. Nuj Papirúnianmaya shuar Israer shuaran mesetjai nupetkar Papirúnia nunkanam achirar júkiarmiayi.

¹² Nu ukunmanka Jekunías uchirí Saratiár akiiniamiayi. Tura nuna uchirí Surupapír.

¹³ Surupapíra uchirí Awiut. Nuna uchirí Iriakím. Nuna uchirí Asur.

¹⁴ Asura uchirí Satuk. Nuna uchirí Akim. Nuna uchirí Eriut.

¹⁵ Eriuta uchirí Ereasár. Nuna uchirí Matan. Nuna uchirí Jakup.

¹⁶ Jakupa uchirí Jusé Marí áishriya nu. Marisha Jesusan jurermiayi. Nu Jesuska shuáran uwemtikiartin asa Kristu tu anaikiamuiti.

¹⁷ Tuma asamtai Apraámnumia Tawitnium Jesusa weatri katurse (14) áiniawai. Tawitniumiasha Papirúnianam jukimiumma nuísha katurse weat áiniawai. Papirúnianam jukimiummayasha Krístunam ataksha katurse áiniawai.

Jesukrístu akiiniamu (Rúkas 2.1-7)

¹⁸ Jesukrístu akiiniamu júnis ámiayi. Ni nukurí Marí Jusejai anaj-manairuyayi. Tura tsaníatsain Yusa Wakaní ajaprumtikiamiayi.

¹⁹ Ajaprukmetaisha Jusé Marin iniatsaatsuk nin ajapatniun enentáimpramiayi. Tura ti pénker asa aya iniaisatniun wakerimiayi aents nékainiatsain.

²⁰ Nuna tu enentáimia pujái, mesekranam Yusa suntari tarí chicharuk tímiayi “Juséa, ame weatrum Tawitchakait. Tuma asam Marijiai nuatnaiki-atin ashamkaip. Uchin jurertatna nuka Yusa Wakaníniuiti.

²¹ Uchin áishmankan takustatui tura nuna naari *JESUS* anaikiattame. Ashí ni shuarín ni tunaariya uwemtikiartin asa Jesus anaikiatniuiti” tímiayi.

²² Yus ni etserniurijiai yaunchu timia nu uminkiat tusa nu túrunamiayi. Juna áamtikramiayi:

23 “Nuwa natsa ajapruktatui tura uchin takustatui. Nuna náarisha Emanuér ananiaktatui.” Tu áarmaiti.

Emanuérsha nu chichamnum “Yus iijiaj pujuwiti” tawai.

24 Juresha mesekranmaya shintiar Yusa suntari timia núnisan Marin nu-atkamiayi.

25 Tura uchin júreatsain tsaninchamiayi. Tura jurermatai uchin Jesus anaikiamiayi.

2

Ti neka apach Jesusan eakarmiania nu

1 Jutía nunkanam Piriñ pépru ana nuí Jesus akiiniamiayi. Nuisha nú nunka akupniuri Irutisauyayi. Akiiniamtai ti neka apach nantu tátainmaaniya Jerusaréñ péprunam táarmiayi.

2 Taar inintruiniak “¿Israer shuara úunt akupniuri tui akiiniait? tiarmiayi. Nantu tátainmaani pujaati ni yaari wáinkiamji. Tura tikishmatratai tusar winiaji” tiarmiayi.

3 Irutis nuna antuk nusháa enentáimpramiayi. Tuma asamtai ashí Jerusaréñnumiá shuarsha antukar nusháa enentáimprarmiayi.

4 Irutis nuikia ashí Israer-patri uuntrincha tura yaunchu akupkamun jintinniuncha untsukarmiayi. Tura Kristu akiiniatniurin inintrusmiayi.

5 Tutai chichainiak “Jutía nunkanam Piriñ pepru ana nuí akiiniatniuiti, tiarmiayi. Yaunchu Yúsnan etserin tu áaruiti:

6 “Jutía nunkanam, Piriñ pepru, ishitiápchich ana nuyá nekas uunt akupin winittiwai. Nii ashí Israer shuaran, Wíi shuar ásarmatai, péñker wáinkiattawai,” tawai Yus.” Tu tiarmiayi.

7 Nuna tuíniakui Irutis ti neka apachin úusan, urutía yaa emka wáinkiamarum tusa aniasarmiayi.

8 Nuyá Piriñnum akupeak “Nuí werum uchi péñker inintrusrum wáinkiarum. Tura wáinkiarum ujatkataram. Wisha werin tikishmátuutaj” tímiayi.

9-10 Tutai ti neka apach wearmiayi. Tura yaa, yajaya wáinkiarmania nu, tuke eem wémiayi. Tura yaan wáinkiar ti wararsarmiayi. Tura nú yaa uchi pujumia nuí ejeniarmiayi.

11 Jeá wayawar uchincha ni nukurí Marijiaj wáinkiararmiayi. Tura uchin tikishmatrarmiayi. Nuyá ni kajunríyan kurincha, mirá kunkuinniasha, chíchich kunkuinniasha súsarmiayi.

12 Nuyá mesekranam Yus “Irutisaini weerap” tutai chíchich jintianam waketkiarmiayi.

Ejiptunam pisaamu

13 Ti neka apach waketrantai Yusa suntari mesekranam Jusen ujakmiayi. “Nantakim uchi ni nukuríjiaj Ejiptu nunkanam jukim nuí pujustá. Irutis uchin máataj tusa eaktatui. Tura ukunam ankant ajasmatai ujaktajme” tímiayi.

14 Tutai Jusé kurat shintiar nú káshik uchincha nukuríjiaj Ejiptunam jukimiayi.

15 Irutis jáatsain nuí pujusarmiayi. Ejiptunam pujusmatai Yus yaunchu timia nu uminkiamiayi. Iis, Yúsnan etserin aak tímiayi:

“Ejiptunmayan winia Uchirun untsukmajai.”

Tu áarmiayi.

Irutis uchin máawarat tusa akupkamu

¹⁶ Irutissha ti neka apach nin ananka yaja waketran nekaa ti kajekmiayi. Ti kajek ashí áishmanchin Pirinnumsha tura yantamach pujuarmia nunasha maawaarat tusa akupkamiayi. Ti neka apach ujakmia nuna enentáimias ashí jimiará uwin takakun tura nú uchichin máawarat tusa akupkamiayi.

¹⁷ Nuka Yusnan etserin Jeremías aarmia nu uminkiamiayi. Juna áarmiayi:

¹⁸ “Ramá nunkanam ti útainiak uur ajainiawai. Raker ti uutú asa atsankrachminiaiiti ni uchirí jákarmatai.” Tu áarmiayi.

¹⁹ Tura Irutis jakamtai Yusa suntari mesekranam Jusen ujakmiayi.

²⁰ “Uchin máataj tiarmia nuka jákarai. Yamaikia ataksha uchi ni nukuríjiaj jukim Israer nunkanam waketkitia” tímiayi.

²¹ Tutai Jusé nantaki uchinha nukuríjiaj jukin Ejiptunmaya Israer nunkanam waketkiayi.

²² Túrasha Irutisa uchirí Arkiráu Jutía nunkanam uunt akupin ajasun nekaa nuj wétinian aránkamiayi. Mesekranmasha ujakma asa nuj pujutsuk Kariréa nunkanam wémiayi.

²³ Nu jéa Nasarét péprunam pujusmiayi. “Nasarétnumiá átatui” Yusnan etserin yaunchu tu etserkamu nuja uminkiamiayi.

3

Imiakratin Juan atsamunam etserkamiania nu (Márkus 1.1-8; Rúkás 3.1-9, 15-17; Juan 1.19-28)

¹ Nuyá imiakratin Juan Jutía nunkanam aents atsamunam etserki támiayi.

² “Enentáim yapajíatarum. Tsawant ishichik ajasai Yus ju akupin ajastin.” Tu etserkamiayi.

³ Nú Juan kan yaunchu Yúsnan etserin Isayas juna áarmiayi:

“Shuar atsamunam aents untsümü. Untsumuk “Atumí enentái Uunta jinti iwiarturtarum tura naka awajsatarum” tawai.” Tu áarmiayi.

⁴ Nu Juansha kamiyu ure najantramun entsauyayi. Emenmamkesha nuapeyayi. Tura yutai-títikriátsnasha chinijiaj yúuyayi.

⁵ Tura Jerusaréñ péprunmaya shuarsha tura ashí Jutía nunkanmaya shuarsha Jurtañ entsanam matsamiarmia nú shuarsha mash Juán kan tariarmiayi ni chichamen anturkatai tusar.

⁶ Tura ni tunaarín paant etserkarmatai Juan Jurtañ entsanam imiainiarmiayi.

⁷ Juansha Pariséuncha Satuséuncha imiatti tusa wininian wáiniak tímiayi “Napia áaniutirmincha, ¿ya atumniasha ti asutniátniunmaya uwempratniuncha ujamakmarum? tímiayi. Asutiátin tsawant ishichik ajasai.

⁸ Tuma asantai enentáim yapajíamuitkiuinikia péñker wekaamurmijiaj paant iniakmatarum.

⁹ Atumsha “Iikia Apraám weeitji” tu enentáimtumasairap. Nujai uwemprashtatume. Yus wakerakka ju kayan Apraáman tirañki najankainti, tímiayi.

¹⁰ Numi ajaktinia áintsan kampuwarín jacha atuttsamuiti. Tura numi péñker nereatsna nuka tsupikia jinium apeamu átatui.

¹¹ Wikia aya entsajain imiajume atumi enentái yapajíawakrumin. Antsu winia ukuruj winiana nuka péñker awajtamsataj tusa imiantinia áanis tura jáa áanis Yusa Wakanin enketramprattarme. Wijiaj nankaamantu asantai wikia tsuntsumpruan ni sapatrínkisha atitrachminiaitjai.

¹² Aruusa nerejai túruinia áintsan átatui. Awajtiutairín achikiuiti tura nuja saepen awajtittiwai. Tura neren péñker ikiustatui, antsu saepénka jinium apeattawai. Nu jisha tuke kajinchaiti.” Tu tímiayi Juan.

*Juan Jesusan imiainiu amia nu
(Márkus 1.9-11; Rúkas 3.21-22)*

¹³ Nuyá Jesus Kariréa nunkanmaya winis Jurtañ entsanam támiayi Juan imiatti tusa.

¹⁴ Juansha emka nakitiak Jesusan tímiayi “Ame winia imiatminiatme. Túrutamniaiatmesha ¿urukamtai winia tarutnium?” tímiayi.

¹⁵ Tura Jesus tímiayi “Ántsañ asati yamaikia. Núnisrik ashí Yus akupkamu umirkatniuitji.” Tutai Juan iniaisamiayi.

¹⁶ Tura Jesus imiani entsaya jíinkímtai nayaimpⁱ uranmiayi. Tura Yusa Wakaní yámpitsa ántsañ Jesusan tarimiayi. Niisha wáinkíamiayi.

¹⁷ Túramtai nayaimpinmaya Yus chichaak “Juka winia Uchiruiti. Ti aneamuiti. Ti shiir enentáimtajai” tímiayi.

4

*Uunt iwianch Jesusan anankataj tímiania nu
(Márkus 1.12-13; Rúkas 4.1-13)*

¹ Nu túrunamtai Yusa Wakaní Jesusan iwianchjai nekapmamtiksattsa aents atsamunam jukimiayi.

² Nui kuarenta (40) tsawant, káshisha tsawaisha yurumtsuk pujak tsukarmiayi.

³ Nui uunt iwianch Jesusan nekapsataj tusa tarí tímiayi “Nekas Yusa Uchirinkiumka ju kaya apatuk najanata.”

⁴ Tutai Jesus tímiayi “Yus-Papinium áarmaiti: “Aents aya apatkujain iwiaaku pujuschamniaiti. Antsu Yus táman enentáimtuiniak nekas iwiaaku pujusartatui” tawai” tímiayi.

⁵ Tutai uunt iwianch Jerusarén péprunam jukí Yusa Uunt Jee cháikin iwiak

⁶ tímiayi “Nekas Yusa Uchirinkiumka juya akaikim iniaata. Kame Yus-Papinium áarmaiti:

“Yus ni suntarín akatar akúptúrmaktatui. Nawemin kayanam ajiintsumnin wenkurmaktatui” tawai” tímiayi.

⁷ Tutai Jesus tímiayi “Núnisañ Yus-Papinium áarmaiti:

“Ame Úntrum Yus “Nekapsataj” tiip” tawai” tímiayi.

⁸ Ataksha uunt iwianch naint yakí wájakmanum iwiakmiayi tura nuyá ashí nunkanmaya péprun shiira nuna iniaktusmiayi.

⁹ Tura tímiayi “Winia tikishmatrurakminkia juna mash amastatjai.”

¹⁰ Tutai Jesus tímiayi “Werumta, uunt iwianchi. Yus-Papinium aarma awai: “Ame Úntrum Yúsak tikishmatrata tura Niñki shiir awajsata” tawai” tímiayi.

¹¹ Tutai uunt iwianch Jesusan ikiuak wémiayi. Túramtai Yusa suntarí tariar atsumamurín súsarmiayi.

*Jesus Kariréa nunkanam etserkamiania nu
(Márkus 1.14-15; Rúkas 4.14-15)*

¹² Juan sepunam enketui taman antuk Jesus Kariréa nunkanam wémiayi.

¹³ Tura Nasarét péprunam pujutsuk Kapernáum péprunam we pujusmiayi. Kapernáumsha Kariréa antumianka kánmatkariñ pujumiayi. Ti yaunchusha Jakupu uchirí Sapurúnsha tura Niptarísha nu nunkanak nui pujustaisar achikiaruyayi.

¹⁴ Jesus nuna túramtai yaunchu Yúsnan etserin Isayas aarmia nu uminkiamiayi. Juna áarmiayi:

15 “Sapurúnsha Niptarísha nayaantsanam tíjiuch Jurtañ entsa amainini nunkan achikiarmiayi. Nuka Kariréaiti Israer-shuarcha matsatainia nuí.

16 Nu aents kiritniunam pujuiniayatañ ti tsáapninian wáinkiarimiayi. Jákatniunam pujuiniaí tsáapin tsáapnirmiayi.” Tu áarmaiti.

17 Nuyá Jesus étseruk tímiayi “Tunaarum enentáimturum enentáim yapajíatarum. Ju nunkanam Yus akupkatin tsawant ishichik ajasai.”

Jesus kuaru aents namakan achinian ni unuiniamurí ajasarat tusa achikmiania nu

(Márkus 1.16-20; Rúkas 5.1-11)

18 Jesus Kariréa antumianka kánmatkarin wesa jimiará áentsun nuámtak yáchinniun wáinkiamiayi. Chikichik Antresauyayi, chikichcha Semunkauyayi. Nu Semun núnisañ Pitru náartiniuyayi. Namakan achin ásar namakan nekajai nankiak yujaarmiayi.

19 Nuna Jesus wáinkiar tiarmiayi “Nemartustarum. Túrakrumin shuarsha Yusna arti tusan yamáí namak achíarmena núnisañ shuaran-eau awajsatjarme.”

20 Tutai ni nekarin ikiukiar Nin nemariarmiayi.

21 Nuyá ishichik wésañ ataksha nuámtak yachinniun wáinkiamiayi. Jakupu Juanjai mai Sepetéu uchirí árimiayi. Niisha kanunam enkemsar ni nekarin ni aparíjiai iwiarainiak pujuriarmiayi. Tura Jesus “Nemartusta” tutai

22 nu chichamaik kanuncha tura aparíncha ikiukiar Jesusan nemariarmiayi.

Jesus untsurí shuaran jintintiamiania nu

(Rúkas 6.17-19)

23 Ashí Kariréa nunkanam Jesus Israer-shuar iruntainiam etserki wémiayi. Yus ju nunkanam akupkatin chichaman etserkamiayi. Tura untsurí sunkurjai jáinian ashí tsuárimiayi.

24 Ashí Siria nunkanam Jesus tsuákratman nekaawar ashí nánkamas sunkurjai wáitin armia nuna Jesusan tsuarti tusa itiariarmiayi. Ashí jaancha, najaimiancha, yajauch wakantrukuncha, wáuruncha, tampemaruncha Jesus tsuárimiayi.

25 Tura untsurí shuar Jesusan nemariarmiayi. Kariréa nunkanmayasha, Tekapurisnumiasha, Jerusarén péprunmayasha, Jutía nunkanmayasha, Jurtañ entsa amainiyasha Jesusan nemariarmiayi.

5

Náinnium Jesus etserkamu

1 Jesus untsurí shuar káunkarun wáiniak náinnium waka nuí pujusmiayi. Tura ni unuiniamurísha taar pujusarmiayi.

2 Nuyá Jesus júnis unuiniamiayi.

Warastin ainia nu

(Rúkas 6.20-23)

3 “Ame wakanim atsumamu nekamarum kakaram ajasrum warastarum. Tuma asarum Yus akupeamunam pachiinniuitrume.

4 Kúntuts pujarum nu warastarum. Yus atsantamprattarme.

5 Péejchach enentáimtumarmena nu warastarum. Yus ashí nunkan amastatrume.

6 Eseer wekasataj tusa aya kitiamarum nu warastarum. Yus imiktampratarme.

7 Waitnenkratniutiram warastarum. Yus waitnentrampattarme.

⁸ Pénker enentáimniutiram warastarum. Yus wáinkíáttarme.

⁹ Chícham iwiarin árum nu warastarum. Yusa uchirj turamartatui.

¹⁰ Pénker túrakumin yajauch awajtamainiakui warastarum. Yus akupea-munam pachiiniuitrume.

¹¹ Wíi shuar asakrumin katsekramainiakui sha, itit awajtamainiakui sha, tura ashí tsanumprutmainiakui sha warastarum.

¹² Núnisañ yaunchu Yúsnañ etserin armia nunasha túrawarmiayi. Túramtai shiir enentáimkiuram warastarum. Nayaimpiniam ti péñker akinkíattarme' tímiayi.

Ju nunkanam átum tsáapnia áintsarum tura weeya áintsarum árumé
(Márkus 9.50; Rúkas 14.34-35)

¹³ 'Átumka ju nunkanam wee ana áintsan ketrume. Tura wééaitiat jeakchaitkiunka míchuiti. ¿Nusha itiur yuámniak ati? Antsu ántrai. Tuma asamtai aa najatai tepet tusar ajapashtinkiait' tímiayi.

¹⁴ 'Átumka ju nunkanam shiripkia áintsan ketrume. Náinniumka pepru úumkachminiai.

¹⁵ Núnisañ shiripik ekeemakam kajunnum enkeatsme. Antsu yakí sukúatsmek ashí jeanam ana nu paant atí tusam.

¹⁶ Núnisañ atumsha Yusjai péñker túramu paant atí. Tura ashí aents nuna iisar niisha Yus Apan shiir awajstataui' tímiayi.

Yaunchu akupkamun pachis Jesus unuiniamiania nu

¹⁷ 'Muisais akupkamuncha tura yaunchu Yúsnañ etserin etserkarmia nuna ántar awajstatawai" turutiirap. Antsu nuna Wikia umiktaj tusan táwitjai.

¹⁸ Nekasan tájarne. Ashí túrunatniua nu amúatsain nu akupkamu ishich-isha yapajniáshtatui. Nayaimpisha tura nun kasha tuke amúatsain nu akup-kamusha amuukashtatui.

¹⁹ Nu asamtai shuar chikichik akupkamun, yúpichuch ana nunaksha, umir-chakka tura chikich shuaran umirkashtinian unuiniakka Yus nekas akupin paant ajastatna nu, nú shuar uunt áchattawai. Antsu ashí shuar akupkamun umiana nu tura chikich shuaran umirkatniun unuiniana nusha Yus nekas akupin paant ajastatna nu, nu shuarka uunt átatui.

²⁰ Tuma asamtai Yus akupeamunam pachiinkiataj tákumka Pariséujai nan kaamas tura akupkamu jintinnuijai nan kaamas eseera wekasatniuitrume' tímiayi.

Kajeamun pachis Jesus unuiniamiania nu

(Rúkas 12.57-59)

²¹ 'Yaunchu tiniu armia nu ántichukaitrum: "Man kartuawairap. Man kartana nuka asutniátniuiti" tiniu ármiai.

²² Tura Wisha tájarne: Shuar ni yachin aya kajerakka nusha asutniátniuiti. Ni yachin kátsekea nuka akupniunam junaktiniiai. Tura ni yachin "netsé" tákun ka jinium akupnakminiai.

²³ 'Tuma asamtai Yus susataj tusam wakerakum tura ame yatsum ámin itit enentáimturman enentáimpramka,

²⁴ suamu nu, ikiuakum emka ame yatsum werim niijiai iwiarata. Turam waketkim Yus suam nu susata.'

²⁵ 'Shuar úuntnum júramkuinkia jintian wesam niijiai iwiarata úuntnum ejetamtsain. Túrachakminkia úuntnum surutmaktatui tura niisha suntarnum surutmaktatui tura sepunam enketmattawai.

²⁶ Tura nekas tajai, nu, enkemamka ashí rearchisha akimachkumka jíinkishtatme' tímiayi.

Tsanirmatniun pachis Jesus unuiniamiania nu

²⁷ ‘Yaunchu tiniu armia nu ántichukaitrum: “Tsanirmawaip.”

²⁸ Tura Wissha tájarme: Shuar nuwān tsanirmataj tu iiska nuǵkia ni enentáin tsanirmayi.’

²⁹ ‘Tuma asamtai ame jǵimi tunaanum yajauch awajtamkuǵkia ukuǵkiam yajá ajapata. Ashí ame ayashim jinium esaatsaǵin aya chikichik ayashmi muchitmarǵi emesratin péǵkeraiti.

³⁰ Ame ewejmesha untsuurmetiat tunaanum ajunmakuǵkia tsupikiam yajá ajapata. Ashí ame ayashim jinium esaatsaǵin aya chikichik ayashmi muchitmarǵi emesratin péǵkeraiti.’

Nuwa ajapatniun pachis Jesus unuiniamiania nu

(Mateu 19.9; Márkus 10.11-12; Rúkas 16.18)

³¹ ‘Núnisaǵ yaunchu tiniu ármiai: “Shuar ni nuarǵin ajapatniun wakera nuka papǵ najana susati.”

³² Tura Wissha tájarme: Shuar ni nuarǵin tsanirmachun ájapeakka nuwān tsanirmamtikiaiti. Tura ajapamujǵi nuatnaiyakka nuka tsanirmaiti.’

Jesus aya nekasa nu titinian unuiniamiania nu

³³ ‘Núnisaǵ yaunchu tiniu ármiai: “Yusa naarǵi pachisan turattajai” tákumka nekas takamtsuk umiktiniaitme.”

³⁴⁻³⁷ Tura Wissha tájarme: Áyatik “Ee” tákumka tura “Atsá” tákumka wáitrusuk nuke titiá. Támena nu nekas umiktaj takum ame nú arant pachistiniaitkiumka nuka yajauchiiti, iwianchnumiǵiti. Ti nekas tajai tusam nayaim pachischatniuitme. Nuka Uunt Yus pujutainti. Nunkasha pachischatniuiti Yusa tarimtaiǵi asamtai. Jerusaren péprusha pachischatniuiti Uunt Akupin pujutai nuǵ asamtai. Múukmesha pachischatniuitme. Chikichik intiashkesha pújusha mukusasha awajsachminiaitme. Áyatik nekasa nu páchitsuk titiá.’

Ikkiatniun pachis Jesus unuiniamiania nu

(Rúkas 6.29-30)

³⁸ ‘Yaunchu tiniu armia nu ántichukaitrum: “Shuar máanikiar jǵi apujtukka niisha apujtuktiniaiti. Tura naj akarkasha ni najisha akarkatniuiti.”

³⁹ Tura Wissha tájarme: Yajauch shuar taritairap. Antsu ame yapimin ijiutmamtai áatú yapimsha tsanǵatkata.

⁴⁰ Tura pushirmin jurutramkitiaj tákuisha sakurmesha susata.

⁴¹ Tura káarkancha chikichik kirumitruk jurutkitia túramkui ámeke jimiará kirumitru ejeeta.

⁴² Seatmana nu susata. Ikiatmakuisha páchitsuk ikiasta.’

Nemasri aneetniun Jesus unuiniamiania nu

(Rúkas 6.27-28, 32-36)

⁴³ ‘Núnisaǵ tiniu armia nu ántichukaitrum: “Ame shuarum aneeta tura nemasrumka kajerkata.”

⁴⁴ Tura Wissha tájarme: Nemasrum aneetarum. Yajauch chichartamna nusha shiir awajsata. Nakitramana nusha nawamkata. Tura katsekramainiana nu tura yajauch awajtamainiana nusha Yus áujtusarta.

⁴⁵ Atumsha nu túrakrum atumǵi Aparǵi nayaimpiniam pujana nu túrana áitkiasrumek túrarme. Iista, Yus yajauch shuarumsha péǵker shuarumsha tsápin awajmatkiatsuk. Núnisaǵ yumincha yajauch shuar pujuiniamunmasha péǵker shuar pujuiniamunmasha yútumtiktsuk.

⁴⁶ Aya atumin anenmainia nuke aneakmesha ¿yaki akirmakat? Yajauch shuarsha nuna túrin áiniawai.

⁴⁷ Aya ame yatsumek shiir chichaakmekka ¿warí péñkerak túram? Yus-shuarchasha nuna túrin áiniawai.

⁴⁸ Nu asamtai atumí Aparí Yus nayaimpiniam pujana nujai métek ti péñker átiniaitrome.'

6

Péñker túratniun Jesus unuiniamiania nu

¹ 'Ashí íimiainiañ aya shuar iirsarti tusarum Yusna nu takasairap. Tu takaakrumniñkia Yus Apa nayaimpiniam pujana nu penké akirmakchat-tarme.

² Nu asamtai shuar atsuma nu yaiyakmekka ashí shuar ujakairap. Anankartin ainia nuka iruntainmasha tura pepru jintí wekasasha ashí íimiainiañ shiir túrajai tusar nuna túrin áiniawai. Junasha "péñker túrawai" tu enentáimturarti tiniu ásar Yus akíatsañ aya tu enentáimturmajañ akinkiaruiti, nekas tajai.

³ Antsu átumka atsumainia nu yaiyakmekka penké úukam túrata. Chikichk-isha nu yáinman nekaashti.

⁴ Úukam túrakminkia ame Apa Yus uukman wainia nu, nuna akirmaktatui.'

Yus áujsatniun Jesus unuiniamiania nu (Rúkas 11.2-4)

⁵ 'Atumsha Yus áujeakrumsha ántar chichamtin ainia núnis áujssairap. Nu shuarka iruntainmasha tura pepru jintísha shuar iirsarti tusa wajakiar Yúsan áujin áiniawai. Nekasan tájarme, Yus akíatsañ aya nu iismajañ akinkiaruiti.

⁶ Tura ame Yus áujeakmekka ame kuárturmin wayam waiti epenim nuj amek ame Apa Yus áujzata. Nuna ame Apa Yus uuka túramu waitma asa akirmaktatui.'

⁷ 'Yus áujeakmesha ántaram esaram áujsaip. Yúsan nékainiatsna nuka "Esaram áujeakuinkia Yus anturtuktatui" tu enentáimainiawai.

⁸ Niiñjaj métek ajasairap. Átumka seatsrumniñ Yus Apa átum atsumamun nékawai.

⁹ Nu asamtai Yus áujkuram júnis títiniaitrome:

'Aparu Yus, nayaimpiniam pujamna nu, ii Aparínme. Ame náarmincha shuar ántar pachischarti.

¹⁰ Ashí áentsnum ame akupkatin tsawantrum wari jeati. Ame wakeramuram nayaimpiniam umikma ana núnisan ju nunkanmasha uminkiatí.

¹¹ Aparu, ii yurumkarí ashí tsawant amasta.

¹² Tura winia nemasrun tsankurajna núnismek, Aparu, winia tunaaru tu-mashrishasha tsankurturta.

¹³ Tunáa wakeruktin tsankatrukaip. Antsu ashí tunaanumiá uwemtikrurta. Tuke ashí aents akupkamniaitme. Núnisam Amesha tuke ti kakarmaitme. Tura ti shíraitme. Tuma asakmin seajme. Nuke atí.'

¹⁴ 'Amesha chíkich shuar yajauch awajtamka nu tsankureakminkia Yus Apa nayaimpiniam pujana nu amincha tsankurtamprattawai.

¹⁵ Tura chíkich tsankureachkumniñkia Yus Apasha ame tunaarmincha tsankurtamprashtatui.'

Ijiarmatniun pachis Jesus unuiniamiania nu

¹⁶ 'Ijiarmarum Yus áujkurmesha wake mesekrum susuntrairap. Anankartin shuar chíkich shuar "ijiarmaiti" tu enentáimtursarti tusa tuma áiniawai. Nekasan tájame, Yúska akíatsañ aya nujai akikma áiniawai.

¹⁷ Antsu ámekka ijiarmamsha péñker temashmaram péñker jaupmitia.

18 Shuar ijarmaiti tu enentáimturmasarain. Aya Yus Apak nekaattawai. Tura asa akirmaktatui.'

*Kuítian pachis Jesus unuiniamiania nu
(Rúkas 12.33-34)*

19-20 'Ju nunkanmaya kuit ikiaun_ukatniujai nan_ukaamas nayaimpiniam kuit ikiaun_ukata. Juin_uka kayaa yúchakait tura mash meseatsuk. Tura kasasha wayá kasamtsuk. Antsu nayaimpinman_uka kayaa_usha yuatsui tura mash meseatsui tura kasasha wayá kasamtsui.

21 Kuít_urum ana nu_u enentáimtustatme. Tuma asam nayaimpiniam iki-aun_ukata.'

*Ayash_u tsáapnintr_u
(Rúkas 11.34-36)*

22 'Ame jimij_uai tsáapin ami_uin wayamniaiti. Tuma asamtai ame jimi_u pé_unkeraitkiuin_ukia ami_uin tsáapin wayá tuke tsáapniiti.

23 Antsu ame jimi_u yajauchitkiuin_ukia tsáapin ami_uin wayachmin asamtai tuke kiritin átatui. Núnisa_u yajauchia nu wakerakmeka pé_unker_u nu ame enentáimi_uin wayachmin asamtai tuke kirit ajastatui. Nu kiritcha imiá yajau-chiti.'

*Yussha kuitsha máimtek enentáimtuschamniaiti
(Rúkas 16.13)*

24 'Shuar jimiará úuntr_uin umirkatniun tujintiawai. Chikichan wakerak chikichnaka nakitrattawai. Chikichan umiruk chikichnaka umirkashtatui. Núnisa_u átumka Yussha kuitcha máimtek enentáimtustin tujinkiattarme.'

*Yus ni uchir_uin pé_unker wáinkiaiti
(Rúkas 12.22-31)*

25 'Tuma asamtai tájar_ume: Wariniak yuataj wariniak umartaj tura wariniak entsartaj tusarum nuke enentáimsairap. Yus iwiaaku átinian amasu asa yurumkancha amaschamniakait. Tura ju_u ayashniasha najana asa entsataincha amaschamniakait.

26 Chin_ukisha enentáimpratarum. Yakí nanamainiak yurumkan arakmainiatsui. Tura juuk yurumkan ikiuiniatsui. Tuma ai_u Yus Apa nayaimpiniam pujana nú Yusak áyureatsuk. Atumsha chin_ukia nú nan_ukaamaschakaitrum.

27 Nu arantcha ti enentáimkiumsha ¿nuj_uai tsakartatmek?'

28 'Nuikia ¿urukamtai entsartincha timiá enentáimprum? Iistá, kukujsha takachuitiat tura najanchaitiat

29 ti shíirmach ániawai. Yaunchu uunt akupin Sarumú_u ti shiir iwiarmamniuitiat kukujia tímianchayayi.

30 Iis, nupa yamá tsakaawai tura kashin aents tsupikiar jinium epeenawai. Tuma ai_u Yus ti shiir áentseatsuk. Nuna tura asa atumniasha nú pé_unker waitmakchattawak. ¿Urukamtai Yus nekas enentáimtatsrum?

31-32 Ju_u nunkanam ana nu pachikiairap. Chíkich shuar, Yúsan nékainiatsna nu, warin_u yuattaj_u warin_u umartataj_u warin_u entsartataj_u nuna ti pachiniawai. Tura atumsha tu enentáimsarum weerap. Ame Apa nayaimpiniam pujana nu ame atsumamurmin nékawai.

33 Tuma asamtai Yusj_uai shiir wekasatin tura Yus akupkamu ana nu umiktin emka enentáimsatarum. Túrakrumnin_ukia atsumamurmin Yus suramsattawai.

34 Kashin átatna nuj_uai itiurchat enentáimsairap. Kashinkia nusháa itiurcha-trij_uai tsawarchattawak. Yamái tsawanta juj_uai máakchakait.'

7

*Chíkich sumamtikiawairap**(Rúkas 6.37-38, 41-42)*

¹ ‘Chíkicha tunaari ti enentáimtusairap. Núnisañ Yus atumí tunaari iirtam-sashtatui.

² Chíkich wárik sumamtikiatin enentáimkiumniñkia Yus núnisañ sumamtikramattawai. Tura ame chíkicha túramuri nekapmarmena nú nekapkajain amincha nekapmarmattawai.

³ Tuma asamtai ¿itiurtsuk atumi jiiin numi enketna auk ítskesha atumi yachí jiiin tsuat enketusha iyarum?

⁴ Ame jiiimiiin numi tuke enketajsha ¿itiurtsuk ame yatsumi jiiiya tsuátan jurustajme tame?

⁵ Antar shuará, ame yáintaj tákumka emka ame jiiimiiin numi enketna nu jusata. Nuyá paant iistatme yatsumi jiiin tsuat enketna nu jurustin.’

⁶ ‘Ti shiira nuka yawá súsashtiniaiti. Nuna nakitrar amincha esat-michartimpiash. Kuítrumsha kuchi súsashtiniaiti. Aya najatrachartatuak.’

*Yus seakmin suramsattawai**(Rúkas 11.9-13; 6.31)*

⁷ ‘Yus seakrumin suramsattawai. Eakrumka wainkiattarme. “Winiajai” tákurmin awaintiamattarme.

⁸ Seana núnaka suíniawai. Eana nuka wáiniui. “Winiajai” tuinia núnaka awainiawai.’

⁹ ‘Ame uchiram apatkun seatmakui ¿kayaash súsaintiam?

¹⁰ Tura namakan seatmakui ¿napíash súsaintiam?

¹¹ Nuikia átum yajauchitirmesha atumi uchirí péñker ana nu tuke súuchakaitrum. Nuna nankaamas nuikia seakrumniñkia atumi Aparí nayaimpiniam pujana nu péñker ana nuna suramsashtatuak.’

¹² ‘Júnaka Muisaisha Yúsnan etserniusha akupenawai: “Chíkich ámin túrutatí tusa wakerakmeke amesha núnismek túratá.” Tu akupenawai.’

*Wañkaram jintiasha tura yupikiach jintiasha**(Rúkas 13.24)*

¹³⁻¹⁴ ‘Wañkaram jintia awai. Wayatniusha yúpichuchiiti. Nuisha untsurí wáiniawai. Tura nusha menkakatiunam jeawai. Túrasha chíkich jintia awai. Nusha yupikiach asa itiurchataiti. Wayatniurisha yupikchiiti. Nuí ishichik wáiniawai. Tura nusha iwiaaku pujustinnium jeawai. Tuma asamtai tuke iwiaaku pujustaj tákurmeka yupipitin jintia achiktatum.’

*Nerejai numi nekaatainti**(Rúkas 6.43-44)*

¹⁵ ‘Aneartatum. Wáitruiniak “Wi Yúsnan étserjai” tuinia nu írunui. Pátatek murikiua áinis yúpichuch áiniawai tura ni enentáin nekas úunt-yawa áinis áiniawai. Pátatek shiir chichainiawai tura ni enentáin yajauch piakuiti.

¹⁶ Atumsha túramujai nin nekaatniuitrume. Naranmaya shuiya júukchamniaiti. ¿Tsachiksha kushinñkiapen nerektatuak?

¹⁷ Núnisañ péñker numia nu tuke péñkeran nereatsuk. Tura yajauch numia nu yajauchin nereatsuk.

¹⁸ Péñker numi yajauchin nereatsui. Núnisañ yajauch numi péñkeran nereatsui.

¹⁹ Yajauch numi ajakar tsupirar jinium apeashtinkiait.

²⁰ Tuma asamtai wáittrin ainia nuka túramujai nekanattawai.’

Ashikia Yus akupeana nuĵeachartatui
(Rúkas 13.25-27)

²¹ ‘Aya winia Apar nayaimpiniam pujana nuna wakeramurĵin umirin ainia nuke Yus akupeamunam pachĵinkĵartatui. Chĵikichka “Uuntá, Uuntá” turutainĵayat nayaimpiniam jeachartatui.

²² Amuukatin tsawant jeamtai untsurĵ turutiartatui “Uuntá, Uuntá, ame náaram pachisar ashĵi nuĵkanam etserkachmakajĵ. Ame náarmesha pachisar yajauĵ wakanĵa ĵĵiki akupkamĵi. Tura ame náaram pachisar aentsti tujĵintĵamu túramĵi” turutiartatui.

²³ Nuĵ chichainĵakui “Werumtarum. Penke nékachuitĵiarme. Aya yajau-chitrume” títiatĵai.’

Pénker ukurma tura yajauĵ ukurma
(Rúkas 6.47-49; Márkus 1.22)

²⁴ ‘Shuar winia chichamprun antuk umirkana nu shuar ti pénger enentáimniuiti. Niisha ĵu shuarĵai méteketete. Jeĵ jeamuk kayanam ukurmai.

²⁵ Tura yumi ti yutuk entsa nuĵankruamai tura nase ti kakaram umpuimĵiai. Túmainĵ pukukachmai ni ukurmarĵi kayanam ukuamu asamtai.

²⁶ Tura shuar winia chichamprun antuk umirtukĵana ĵu shuara núnisanĵ enentáimĵhaiti. Jeĵ jeamuk náikminĵiam ukurmai.

²⁷ Tura yumi yutuk entsa nuĵankruamai tura nase ti kakaram umpuimĵiai. Túmakui jeĵ mash saanaki inĵaamai” tímiayi Jesus.

²⁸ Jesus nuna tinia amukmatai ashĵi shuar ti enentáimprarmĵiayi.

²⁹ “Yusa kakarmarĵĵai unuitĵiamtsujik. Israer-shuara ĵintĵinniurĵinkĵia núnis unuĵinĵainĵatsui” tiarmĵiayi.

8

Jesus tunamarun tsuarmĵiania nu
(Márkus 1.40-45; Rúkas 5.12-16)

¹ Jesus muraya támatai untsurĵi shuar Nin nemariarmĵiayi.

² Nuĵ shuar tunamaru Jesusan ĵearĵin tikĵishmatramĵiayi. Tura tímiayi “Uuntá, wakerakmekka tsuáramĵniaitme.”

³ Tutai Jesus uweĵéĵai antĵin “Wakerajai. Pénger ajasta” tímiayi. Tutai tunamaru ni tunamarmarĵi pénger ajasmĵiayi.

⁴ Tura Jesus tímiayi “Pai, penké etserkaip. Áyatik Israer-patrĵi inĵiakmamsam Muisais timia nu susata ashĵi shuar nekaawarti tusam.”

Jesus suntara uchirĵin tsuarmĵiania nu
(Rúkas 7.1-10)

⁵ Jesus Kapernáum péprunam wayamtai apachi suntara kapitiántri Nin tarimĵiayi.

⁶ “Uuntá, tímiayi. Winia uchir tampemaru jeá tepes ti wait ajáa tepawai” tímiayi.

⁷ Jesussha “Ayu, winin tsuartajai” tímiayi.

⁸ Tutai kapitián tímiayi “Uuntá, Ame ti nanĵkaamaku asam winia ĵearuĵ wayaĵhminĵiaitme. Áyatik “Pénger ajásti” tákumin winia uchir pénger aja-trustatui.

⁹ Iista, winiasha akuptuĵiniatsuk tura wiĵha suntaran akupenatsĵak. ĵuna “Wetá” takui wéawai. Tura chikichnasha “Wĵinitía” tutai winiawai. Tura takartinĵian “ĵu túratá” tutai umíawai.”

¹⁰ Kapitián nuna tutai Jesus ti enentáimiuk Nin nemarainĵian tímiayi “Nekasan táĵarme, Israer-shuar Yúsan tímiatrus enentáimtin atsawai.

11 Maa, yajaya untsurí shuar Yus akupeana nuí jeawar Apraámjaisha Isakjaisha Jakupjaisha iruntrar yurumáwartatui.

12 Tura Israer-shuar Yúsnum jeamnia áiniayat aa kiritniunam ajapnawartatui. Nuí ti úutin tura ti wáitsatin átatui.”

13 Nuyá Jesus kapitíánin chicharuk “Jeemiin waketkitia. Nekas enentáimtusú asakmin uchiram péñker ajatramsattawai” tímiayi. Túramtai ni uchirí nu chichamtaik péñker ajatsamiayi.

*Jesus Pitru tsatsarin tsuármiania nu
(Márkus 1.29-31; Rúkas 4.38-39)*

14 Jesus Pitru jeen we Pitru tsatsarin tsuemujai jaa tepan wáinkiamiayi.

15 Tura ni uwejen antiñmatai tsuemun michatramiayi. Tura nuwá nantakin ashí ajamsarmiayi.

*Jesus untsurí jáinian tsuármiania nu
(Márkus 1.32-34; Rúkas 4.40-41)*

16 Kashi ajasmatai yajauch wakantrukarun Jesusan itiararmiayi. Tura nu yajauch wakanin chikichík chichamjai chicharas jiiki akupiarmiayi. Ashí jáiniancha tsuáramiayi.

17 Yúsnan etserin Isayas “Ii pimpirmaríncha ii sunkuríncha jurutramkimi-aji” yaunchu timia nu uminkiatu tusa nu túrunamiayi.

*Jesus nemarsatin
(Rúkas 9.57-62)*

18 Shuar untsurí Jesusan káutkarmatai “Entsa amain katiñtai” tímiayi.

19 Nuí Israer-shuara jintinniurí Jesusan tarí tímiayi “Uuntá, Ámin páchitsuk nemarsatniun wakerajme.”

20 Tutai Jesus tímiayi “Kujanchmasha ni waarín takaktsuk. Chínkisha pasunken takaktsuk. Tura Wi Yúsnumiñtatan tepestiniur atsawai.”

21 Nin nemarniusha tímiayi “Uunta, emka winia aparun iwiarsan ikiuuttajai.”

22 Tura Jesus “Nemartusta, tímiayi. Wakannium jaka ainia nu jakan iwiarsarti” tímiayi.

*Nasesha entsasha Jesusan umirkarmiania nu
(Márkus 4.35-41; Rúkas 8.22-25)*

23 Nuyá Jesus ni unuiniamuríñjai uunt kanunam enkemámiayi.

24 Nuí nase ti kakaram umpuimtai antumiañ ti tamparintin ajasmiai. Tura entsa kanunam yaráná piákmiai. Tuma aiñ Jesus kanunam kanar tepemiayi.

25 Nuyá ni unuiniamurí kurashim Jesusan ishintiarar tiarmiayi “Uuntá, wayaji. Kakaram ajachkumñkia jakattaji.”

26 Jesus tímiayi “¿Urukamtai timiá ashamarum, Yus enentáimtutskesha?” Nuyá wajaki nasença entsancha chicharkamiayi. Tutai mash miaaku ajasmiai.

27 Nuna ísar ni unuiniamurí ti enentáimsarmiayi. Tura tiarmiayi “Júsha ¿warí áentsuit? Nasesha entsasha Nin umirainiatsuk” tiarmiayi.

*Jatara nunkanam Jesus yajauch wakantrukun tsuármiania nu
(Márkus 5.1-20; Rúkas 8.26-39)*

28 Nuyá Jesus entsá amaini katiñ Jatara nunkanam jeamiayi. Nuí jimiará shuar yajauch wakantruku tuke iwiartainium pujú Jesusan tariarmiayi. Mai yajauch wakantruku ásar ti kajen ármiai. Tuma asamtai shuar nu jintianam nankaamachu ármiai.

²⁹ Niisha Jesusan wáinkiar kakantar tiarmiayi “¿Warí pujuram iijjaj, Jesúsá, Yusa Uchirjá. Tsawant jeatsain in amukratkataj tusamek taum?” tiarmiayi.

³⁰ Nuĵ arant kuchi untsurí shushunmak yujaarmiayi.

³¹ Yajauch wakancha Jesusan seainiak “Jĵiki akupkartakmekka kuchíniam wayatín tsanĵkatkartukta” tiarmiayi.

³² Tutai Jesus “Pai, wetarum’ tímiayi. Yajauch wakancha shuara enentáiyá jĵinkiar kuchiniam enĵkemáwarmiayi. Túramtai kuchi wáurkiar arau utsanamíayi. Nuyá entsá iniaĵkar jakerarmiayi.

³³ Kuchí wáinniusha nuna ashamkar péprunam tseĵe wéarmiayi. Nuĵ jeawar ashí túrunamun etserkarmiayi. Yajauch wakantrukun péĵker ajasmancha etserkarmiayi.

³⁴ Nuyá ashí nú peprunmayá shuar Jesusan inĵkiuntai tusar ashinkiararmiayi. Tura inĵkiunĵkar ni nunĵĵeyá waketkiti tusar seawarmiayi.

9

Jesus emearun tsuármiania nu (Márkus 2.1-12; Rúkas 5.17-26)

¹ Nuyá Jesus kanunam enĵkemar antumian amaini katiĵmiayi. Tura nuĵ ni péprurĵn Kapernáumnum jeamiayi.

² Nuĵ jeamtai shuar emearu jaan patak yanakin ejeetiarmiayi. “Tsuártatui” nekas tu enentáimtuinia ásarmatai Jesus jaan tímiayi “Uchirú, kakaram ajasta. Ashí ame tunaarum tsanĵkuramuiti.”

³ Takui Israer-shuara jintinniurĵ yajauch enentáimprar “Jĵka Yúsan ti yajauch chicharui” tiarmiayi.

⁴ Tu enentáimainian Jesus nekáa tiarmiayi “¿Urukamtai imiá yajauch enentáimprum.

⁵ Tua imiá yúpchuchit. Shuara tunaarĵn tsanĵkuratin yúpchuchikíait. Tura emearun “Nantakim wekasata” títin yúpchuchikíait?

⁶ Wi Aents Ajasua núchakaitĵ. Ju nunĵkanam Wi tunaan asakátratniuitĵai. Wátsek, nu nekaatarum tusan juna iniakmastatĵai.” Nuna tinia emearun “Wajaktia, tepetairam ĵukim jeemiĵn wetá” tímiayi.

⁷ Tutai emearu tsuámar nantaki ni jeen wémiayi.

⁸ Tura nuna ashí aents wáinkiar Yus kakarman shuáran susa asamtai ashamkar Yúsan shiir enentáimtusarmiayi.

Jesus nemartusat tusa Mateun achíawai (Márkus 2.13-17; Rúkas 5.27-32)

⁹ Nuyá Jesus wémiayi. Nuĵ wesa Mateun kuit júutainium puĵan wáiniak “Nemartusta” tímiayi. Tutai Mateu nuna ikiuak Jesusan nemarmiayi.

¹⁰ Nú ukunmasha Mateu jeen yurumuk puĵaj yajauch armia nu Israer-shuar untsurĵ káunkar Jesusa unuiniamurĵjĵaj irunar yurumiarmiayi.

¹¹ Pariséusha nuna ísar Jesusa unuiniamurĵn aniasarmiayi “¿Urukamtia atumí Uuntrĵ kuitia achinĵajsha tunaarinniujajsha irunar yuruma?”

¹² Tura Jesus nuna antuk tímiayi “Péĵker ainia nuka tsuákratniun atsumaini-atsui. Antsu jainia nu tsuákratniun atsumainiawai.

¹³ Werum ju aarma unuimiutarum:

“Murik maam Winia surusum nuĵaj “máakete” tátsujai. Antsu wait-
nenĵkartutain wakerajai,” Yus-Papinium tu áarmaiti.

Wikia “péĵkeraitĵai” tuńian untsuktaj tusan táĵhaitĵai. Antsu tunáa shuar ni enentáin yapaĵáawat tusan táwitĵai” tímiayi.

Ijiarmatniun Jesusan aniasarmiania nu
(Márkus 2.18-22; Rúkas 5.33-39)

¹⁴ Nuyá imiakratin Juan̄ka unuiniamuri Jesusan tariar aniasarmiayi. “¿Urukamtai iikia tura Pariséusha ijiarmaji tura ame unuiniamurmeka ijiarmainiatsu?” tiarmiayi.

¹⁵ Jesus ayak tímiayi “Nuatma nampernum ipiaamu ainia nu ¿ajakra uutu wayamniakait? Yamái-nuatu pujakui úutchamin áiniawai. Núnisan̄ Wi pujakui ijiarmashtin áiniawai. Tura tsawant jeattawai nuatua áintsan̄ Wi junaktatjai. Antsu nūkia ijiarmawartatui’ tímiayi.

¹⁶ ‘Mamuru pushí jaanakmatai yamaram tarach anujtukchatniuiti. Túramka nijiam yamaram tarach sumpeak mamushan chin̄kiá nuna nan̄kaamas jaaktatui.

¹⁷ Nijiamanch yamáí nawar nuap najanamun arutnum yaraachminiaiti. Túramka kariak nuap najanamun ijiakratniuiti, nijiamchisha ukaratniuiti, tura nuap najanamusha yajauch ajastiniaiti. Antsu yamaram nijiamanch yamaram nuap najanamunam yaraatniuiti. Nu túramka nijiamchisha nuap najanamusha mai péñker ártatui.”

Jesus Jairu nawantrincha tura chíkich nuwancha tsuármiania nu
(Márkus 5.21-43; Rúkas 8.40-56)

¹⁸ Jesus nuna taī Israer-shuara uuntrī Jesusan tarí tikishmatar tímiayi “Winia nawantur jarutkayi, tura Ame winim ewejmijiaī antintrukakminkia ataksha nantaktiatui.”

¹⁹ Tutaī Jesus ni unuiniamurijiaī wajakiar niijiaī wearmiayi.

²⁰ Tura jintiá weenaī nuwā tuse (12) uwitin numpá ajapeak wáitias pujú asa Jesusa ukurinī amainian̄ ni pushirin̄ antin̄miayi.

²¹ “Áyatik ni pushirin̄ antinnaka péñker ajastatjai” tu enentaimpramiayi.

²² Nuna nekáa Jesus ayantar nuwan̄ tímiayi “Shiir enentáimprata, nawantru. Yus shiir enentáimtusu asam péñker ajasume.” Nu chichamtaik ni jáamuri péñker ajasmiayi.

²³ Nuyá Jesus uunta jeen̄ jeamiayi. Tura nūi charaatum ajainiancha tura jakan iwarsatai tusar péeman umpuiniancha wáiniak

²⁴ tímiayi “Aā jíintratarum. Nuwāchikia jákachai antsu aya kanarai.” Pen̄ké jakan nekayat túratta nuna neka asa “aya kanarai” tímiayi. Takui aents Nin wishikrarmiayi.

²⁵ Tura nuna ashí̄ jiīr Jesus jeá wayá nuwāchin̄ uwejnum achik iniantkimiayi. Túram nantakmiayi.

²⁶ Nu túramu ashí̄ nu nun̄kanam etsernarmiayi.

Jesus kusurun jímíaran tsuármiania nu

²⁷ Nuyá Jesus wéakui jimíará shuar jiī kusuru untsunki weriarmiayi. “Uuntá, ii Uuntrī Tawit ame weatrum asamtai in waitnen̄karturta” tiarmiayi.

²⁸ Jesus jeá wayamtaī jiī kusuru tariarmiayi.

Tura Jesus aniasar “¿Juna túramniaiti túrutrumek?” tímiayi.

Niisha “Ee, Uunta” tiarmiayi.

²⁹ Tuíniakui Jesus ni jiīn antinkiar tímiayi “Átum nekas enentáimtarmena núnisan̄ túrunati.”

³⁰ Nujaī jiī péñker ajasarmiayi. Nuyá Jesus “Etserkairap. Shuar pen̄ké nekáwarain̄” tímiayi.

³¹ Támaitiat jíinkiar Jesus túramun ashí̄ nu nun̄kanam etserkarmiayi.

Jesus chichachun péñker awajsamiania nu

³² Nuyá wenaj shuar yajauch wakantruku chichachun Jesusan itiariarmi-ayi.

³³ Tura Jesus yajauch wakanin jiki awemamtai nu chichachu chichakmi-ayi. Ashí nuna ísar ti enentáimprarmiayi. Tura tiarmiayi “Yáunchusha Israer nunkanam jujai métek túramu penké atsuwiti.”

³⁴ Antsu Pariséuka yajauch enentáimtuiniak tiarmiayi “Nu shuar iwianchi untri kakarmarjiaj yajauch wakanin jiki akupeawai.”

Jesus shuaran waitnentawai

³⁵ Jesus ashí péprunam we ni iruntairin wayá “Yus akupeana nu enkemátarum” tu etsermiayi. Tura ashí nánkamas sunkurjai jániancha tsuármiai.

³⁶ Shuaran ísar murik wáinchatia núnis pimpikiar tura kúntuts pujuinia asamtai waitnentrarmiayi.

³⁷⁻³⁸ Nuyá ni unuiniamurin tímiayi “Ju aents Yus-Chicham ujaktinaitji Yus-shuar ajasarat tusar. Nu takat ti núkap awai tura takarin ishichik áiniawai. Nu takatka júuktinia áintsankete. Júuktin tsawant jeamtai takau táasmatai takamtikin ujaktin átsuk takaun akupkat tusa. Atumsha núnisrumek Yus seatarum ni shuarin akupak áentsun júukarat tusarum.”

10

Jesus tuse (12) unuiniamurin achikmiayi tuke nemarsatniun (Márkus 3.13-19; Rúkas 6.12-16)

¹ Nuyá Jesus tuse (12) unuiniamurin achik Yusa kakarmarin súsarmiayi yajauch wakanin shuara enentáiya jiki akupkatniun. Núnisan ashí sunkurjai jánian tsuártinian susamiayi.

² Ju áiniawai Jesus tuse (12) unuiniamurin achikiarmia nu: Emka Semun núnisan Pitru náartiniuyayi. Nuyá ni yachi Antres. Nuyá nuámtak yáchtintin Jakupusha Juansha, Sepetéu uchiri armia nu.

³ Nuyá Jiripi, Parturumí, Tumas, Mateu. Mateusha kuítian achiniuyayi. Arpeu uchiri Jakupusha. Ripíu núnisan Tateu náartiniuyayi.

⁴ Ásumpi Semunsha nuyá Jútas Iskariúti Jesusan ukunam surukmia nu. Nu tuse (12) achikma ármiai.

Jesus ni unuiniamurin etserkarti tusa akupkarmiania nu (Márkus 6.7-13; Rúkas 9.1-6)

⁵ Nu tuse (12) unuiniamurin Jesus júnis chicharak akupkarmiayi. “Israer-shuarcha matsatmanum weerap. Samaria nunkanam péprunam weerap.

⁶ Antsu Israer-shuar murikiua áinis Yusaiya wáakaru ainia nu weritiarum.

⁷ “Tsawant ishichik ajasai Yus jú nunkanam akupin ajastin” tu etserki wetarum.

⁸ Tunamarusha chíchich sunkurjai jainia nusha tsuatarum. Jakasha iniantkitiarum. Yajauch wakancha shuara enentáiya jiki awematarum. Nu túratin kuítchajai kakaram susamuitrume, tuma asamtai atumsha ashí ánrarmek túratarum.

⁹ ‘Kurisha ashí kuitcha jukiirap.

¹⁰ Uyuncha jukiirap. Sapatcha tura ushukrustincha jukiirap. Antsu chikichik pushí jukitiarum. Takau asakrumin yurumkan ajampramsartin áiniawai.

¹¹ ‘Péprunam jearmesha péker shuar wáinkiarum nu wayarum tuke nuin pujustarum.

¹² Nu jeanam wayamsha “Ju jea shiir atí” titiá.

¹³ Nekas pé_nker shuaraitkiun_ka shiir ajasarti. Antsu nu shuar pé_nker itiarmachku_nká shiir ajascharti.

¹⁴ Tura ná_nkamsa_n atumin awa_intiamainiachku_nkia anturtamainiachku_nkia nuyá jí_nkitiarum. Nu shuar yajauch ásarmatai jí_nkirum atumí naweyá nu_nka japimiarum ikiuktiarum. Ni tunaar_i aents nekaawarat tusarum tú_ratarum.

¹⁵ Nu shuaran nekapsatin tsawant jeamtai Yus asutiáshtatuak. Sutum pé_prunmayá shuara na_nkaamas Kumura pé_prunmayá shuarnasha na_nkaamas Yus asutiáttawai nu shuaran' tí_miayi.

Yajauch awajsatniun ujakmania nu

¹⁶ 'Aneartarum. Wisha murik yawa_num akupkatniua áintsanak akupeajrume. Tuma asamtai shiir nawamkartin áyatr_um aneartarum.

¹⁷ Yajauch shuarj_ai aneartarum. Akupniunam juramkiartatui. Israer-shuar iruntainiam asutiamawartatui.

¹⁸ Wíi shuar asakrumin uuntnumsha tura nuyá akupniunmasha juramkiartatui. Núnisrum akupniuncha tura Israer-shuarchancha winia chichamur ujaktatrum.

¹⁹ Tura akupniunam surutmakakrumnisha wariniak tí_tiaj tu enentáimprairap. Nu_ji uuntj_ai chichaakrumin Yus tí_tinian jintintramattarme.

²⁰ Nu_nkia á_tum enentáimmiaj_ai chichaschattarme antsu atumí Apar_i Yusa Wakan_i atumin chichamtikramsattarme.'

²¹ 'Shuar ni yach_incha máawarti tusa suruktatui. Apasha ni uchir_in surukartatui. Uchisha ni apar_in máawarti tusa surukartatui.

²² Tura Wíi shuar asakrumin mash mu_jramkartatui. Tura tuke katsuntea nu uwemprattawai.

²³ Chikichik pé_prunam yajauch awajtamainiakui chí_kich pé_prunam pisartarum. Wi Aents Ajasuitj_ai. Tuma asan nekasan tá_jarme, á_tum Israer-shuar mashi ujatsrumni_n wantinkiat_taj_ai.'

²⁴ 'Unuiniamuka nin unuiniana nuna na_nkaamaschaiti. Takarniusha ni uuntri_n na_nkaamaschaiti.

²⁵ Unuiniamuka nin unuinia nuj_ai mé_tek ajaska maak. Takarniusha ni ú_untrij_ai mé_tek ajaska maak. Wátsek, Winia atumí ú_untr_in "Iwianchi uuntri_n" tú_rutainiakui atumniasha nuna na_nkaamas yajauch turamtatui.'

Yúsak ashamkatniuiti

(Rúkas 12.2-9)

²⁶ 'Tuma asamtai aentska ashamkairap. Ashí u_ukma nu paant nekanat-tawai.

²⁷ Ishishmasan kiritniunam ujaajrumna nu, tsawá_i kakantrarum et-serkatarum.

²⁸ Aya ayashin main ainia nu ashamkairap. Wakanin máachmin á_iniawai. Antsu wakanniasha ayashniasha mai jinium emesramnia asamtai Yus ashamkatarum.'

²⁹ 'Jimiará chin_ki pen_ké ishichik kuitj_ai surukmin á_iniawai. Tú_maitiat Yus tsan_kateachku_nkia nu_nká jaka iniainiatsui.

³⁰ Ame intiashmisha mash nekapmarmaiti.

³¹ Nu asamtai já_katin ashamkairap. Yusj_ai á_tumka ti untsur_i chin_kij_ai na_nkaamas pé_nkerchakaitrum.'

Jesus natsantrashtiniaiti

(Rúkas 12.8-9)

³² 'Ashí shuar ashí í_miaiaini_n Winia natsantruiniatsna nú_naka Winia Apar yakí nayaimpiniam pujana nu_ji natsantrashtatj_ai.

33 Antsu shuar íimiainiajn Winia natsantra núnaka Wissha yakí nayaimpiniam winia Apar pujana nuí natsantrattajai.'

Jesusa chichamejai shuar akannartatui
(Rúkas 12.51-53; 14.26-27)

34 'Ashí shuar nawamnaikiar shiir pujusarat tusan ju nuñkanam táchaitjai. Nuna túrat tusarum enentáimturairap. Antsu wi tamaajai shuar péñker ajasarmatai yajauch shuar nin nakitrartatui.

35 Shuar ni aparín nakitrattawai. Nuwasha nukurín nakitrattawai. Natáisha tsatsarín nakitrattawai.

36 Tuma asa shuar ni shuaríjjai nemasrintin ártatui.'

37 'Shuar ni aparíncha nukuríncha Wijíai nankaamas aneakka Wíi shuar áchamniaiti. Núnisan ni uchiríncha nawantríncha nankaamas aneakka Wíi shuar áchamniaiti.

38 Tura ashí wáitsatniun surimiatsuk ni krúsrín yanaki jukí nemarkachkunka Wíi shuar áchamniaiti.

39 Aya jú nuñkanam péñker pujustaj tana nu ni iwiaakmarín emesratatawai. Tura Winia anentu asa ju nuñkanam péñker pujustinian páchiatsna nu tuke shiir pujustatui.'

Akinkiatin
(Márkus 9.41)

40 'Atumin itiaarma nuka Winia itiaarui. Tura itiaarea nuka Winia akup-tukmia nunasha itiaawai.

41 Yúsnan etserniuncha Yúsnumia winiá asamtai itiaakka etserin akínkiáttana nujai métek akínkiáttawai. Péñker shuárnasha péñker asamtai itiaakka péñker shuar akínkiáttana nujai métek akínkiáttawai niisha.

42 Uchíncha Wíi shuar asamtai entsá michan shikirak súsanika imiá nekas nusha akínkiáttawai." Tu tímiayi Jesus.

11

Imiakratin Juan Jesusai shuaran akupkamiania nu
(Rúkas 7.18-35)

1 Tura tuse (12) unuiniamurín Jesus tinia akupkar Niisha nú nuñka péprunam we Yus-Chichaman jintíak etserkamiayi.

2 Tura Juan sepunam enkemas Kristu túramun antukmiayi. Antuk ni unuiniamurín jímiaran Jesusai akupkamiayi.

3 Tura Jesusan aniasarmiayi "¿Nekas ame Kristu Yus akupkamu tátinia nukaitiam. Kame chikichak nákastataj?"

4 Tutai Jesus tímiayi "Waketkirum ashí ántarmena nusha wáintrumna nusha Juan ujaktarum.

5 Kusurusha wáinmainiawai. Shutuapsha wekainiawai. Tunamarusha péñker ajainiawai. Empekarusha ántuiniawai. Jákarusha nantainiawai. Tura kuítrínchanmasha uwempratin chicham ujakmaiti. Nu ujaktarum.

6 Túrusha yawetsuk Winia tuke shiir enentáimturna nú shuar shiir átatui." Jesus nuna tutai waketkiarmiayi.

7 Waketkiarmatai shuar káunkarun Jesus Juánkan pachis áujmatmiayi. "Shuar atsamunmasha ¿warí werimiarum? Pintiu nase umpúam atúu we juní we ajana nuka ¿ístai tusarumek wémarum? Kame Juanikka nú shuarchaiti.

8 Nuikia ¿warí werimiarum. Shuar péñker iwiarmampra ístai tusarmek wémarum? Warí, péñker iwiarmampraka uunta jeen pujuiniatsuk.

9 Nuikia ¿warí werimiarum. Yúsnan etserniuk werimiarum? Maa, túrachmashiuram. Túrasha Juan̄kka yaunchu etserniu nan̄kaamas enentáimtustiniaiti.

10 Yaunchu Yus-Papinium áarmaiti:

“Winia akatramurun amiñi emka akupeajai ame jintimin iwiarat tusa.”

Juan̄ nu akatramuiti.

11 Nekasan tájarme, shuar imiakratin Juan̄jai nan̄kaamas uunt atsuwiti. Tuma ain̄ Yus akupeamunam pachiinia nu shuarnaka, nekasmianchancha, Juan̄jai nan̄kaamas shiir enentáimtustiniaiti. Tuma asamtai nūj pachiinkiatin enentáimpratarum.’

12 ‘Kakaram shuarka imiakratin Juan̄ támia nú tsawantnumiã Yus akupeamunam ti pachiinkiatniun wakeruiniak kakarmajai pachiinkiatniun enentáimiainiawai.

13 Juan̄ pujumia nú yaunchu ashí Yúsnan etserin armia nusha tura Muisais akupkamusha Yus akupin ajastinian etserkarmiayi.

14 Yaunchu Yúsnan etserin “Kristu táatsain̄ Erías tátiniaiti” tímiayi. Tura nekaatin wakerakrumka Juan̄ nu Eríasaiti.

15 Antuktin jeakrumka nekaatarum.’

16 ‘Ju áentsnasha ¿warijiaī métek nakumkataj? Uchijiaī métek áiniawai. Ni aijiaī iruntrar nakurustaj táyatañ tuñiawai

17 “Námpera áinis nakurustaitisar peem umpuarji túrasha jantsemáchurme. Nuyá iwiarsatniua áinis nakurustaitisar íwiareakur kantamtai kantamáji túrasha átum úutcharme.”

18 Atumsha núnisaitrume. Kame Juan̄ núkap yurumtsuk nijiamchinchá úmutsuk wekaimiayi. Túmakui átumka “Yajauch wakantrukuiti” tímiarme.

19 Nuyá Wisha Aents Ajasu támajai. Tura yurumeakui tura úmakui “Ti yurumin ti nampenaiti. Ashí yajauch shuaran amikrinti” túrutrume. Wátsek, wi túramujaī Yus nekas nékamu nekanattawai.”

Yajauch péprunmayā shuaran chicharkamiania nu

(Rúkas 10.13-15)

20 Nuyá tujintiamun túramiania nú péprunmayā shuaran pachis Jesus chicharkamiayi. Tuma ain̄ nuyá shuar ni enentáin̄ yapajiácharu asamtai juna chicharkamiayi.

21 “Wáinkiatá, Kurasín péprunmayātiram, Petsaitia péprunmayātirmesha. Nūj aents tujintiamun ti túraitjai. Tiru péprunmasha Setuñ péprunmasha nu tujinti-
amu túramuitkiuin̄kia yaunchu ni enentáin̄ yapajiáwarāayi. Túrawar kúntuts
pujutai pushín entsarar yuñkunim ajakiarāayi.

22 Tura Wisha tájarme, nekapsatin tsawant jeamtai Yus atumin tí asut-
tiamattarme. Tirunmayā shuaran nan̄kaamas tura Setuñnumiã shuaran
nan̄kaamas asuttiamattarme.’

23 ‘Tura atumsha Kapernáum péprunmayātirmesha, ashí nan̄kaamas
nan̄kaamantu ajastin enentáimtumarme. Antsu ashí emestamprartatui.
Atum̄in aents tujintiamun ti túraitjai. Sutuma péprunam nu tujintiamu
túramuitkiuin̄kia nu pepru yamaisha tuke āayi.

24 Tura Wisha tájarme, nekapsatin tsawant jeamtai Yus Sutumanmayā
shuar nan̄kaamas atumin asuttiamattarme.”

“Win̄in ayampratarum” tímiania nu

(Rúkas 10.21-22)

25 Nuyá Jesus tímiayi “Shiir enentáimtajme, Aparu, ashí nayaimpisha
nuñkasha Úuntrinme. Tuma asam Ame túram nu ti unuimiaru

enentáimtumainia nuyá úukuitme antsu uchichia áinis nan̄kaamantu enentáimtumainiatsna nú shuar paant awajtusuitme.

²⁶ Ame, Aparu, núnis wakera asam túraitme.'

²⁷ 'Winia Apar ashí surusuiti. Wisha ni Uchirí asamtai Winia nékarui. Tura chíkich Winia nekas nekarainiatsui. Yus Apancha Wiki nékajai. Tura Wi wakeraj nú shuaran winia Aparun paant awajtajai. Nu shuarsha winia Aparun nékainiawai.

²⁸ Ashí pimpikniutirmesha itiurchat pujarmena nusha Winí winitiarum. Túrakrumniṅkia ayamtikrattajrume.

²⁹ Wi kajechu asan tura péejchach enentáimin asamtai Winí winirum unuimiartarum. Winia chichamur ántakrum umiákrumniṅka atumí wakaní ayamprattawai.

³⁰ Atumin akuptaj nú túratin yúpichuchiiti. Káarkasha Wi súajrumna nu wampuchiiti" tímiayi Jesus.

12

Jesusa unuiniamuri ayampratin tsawantaj trikiu neren pakaarmiania nu (Márkus 2.23-28; Rúkas 6.1-5)

¹ Nuyá Jesus ayampratin tsawantaj ajanman̄ ajapeniṅ nan̄kaamamiayi. Ni unuiniamuriṅsha tsukarar trikiu neren majusar yukí wekasarmiayi.

² Pariséu shuarsha nuna wáinkiar Jesusan aniasarmiayi "Iista, ame unuini-amuram ayampratin tsawantaj túratin surimkiamua nuna túruiniawai."

³ Tutai Jesus tímiayi "Yaunchu uunt akupin Tawitcha tura nemarniusha tsukamainiak túrawarmia nu ántichukaitrum.

⁴ Yusa Uunt Jeen wayá Yus iniaktusma tantan yuámiayi. Nu tantasha aya Israer-patrik yúatin asamtai Tawitniasha tura ni neman̄in ana nunasha suritkiamuyayi. Túmaiṅ yúawarmiayi.

⁵ Muisais akupkamunam aarma nu áujtsachukaitrum. Israer-patrikia ayampratin tsawantaj takainiayatan̄ nusha tunaachuiti.

⁶ Nekas tájarme, yamá Yusa Jeen enentáimtustinia nuna nan̄kaamas Wíniaka Aents Ajasuitjiana nu, nekas enentáimtursatniuitrume.

⁷ Yus-Papinium tawai:

"Murik maam Winia surusum nujai "maakete" tátsujai. Antsu wait-
nen̄kartutain wakerajai."

Nu chicham nekas nékaitkiurmeka yamá túrarmena núnisrum tunáa túrachu ántararum súmamtikiachaintrume.

⁸ Wi Aents Ajasu asan ayampratin tsawantan Úuntriṅtjai."

Shuara uweje jakan Jesus tsuármiania nu (Márkus 3.1-6; Rúkas 6.6-11)

⁹ Jesus nuyá wé Israer-shuar iruntainiam wayamiayi.

¹⁰ Nui shuar ámiayi ni uweje jaka. Tura Jesusan ántar nekapsatai tusa wakeruinia ásar aniiniak "¿Ayampratin tsawantaj jaa shuar tsuarminkiait?" tiarmiayi.

¹¹ Tutai Jesus tímiayi "Atumsha atumí murikr̄i ayampratin tsawantaj waṅnam akaiki iniamtai jusatai tusarum wéchaintrupash.

¹² Antsu shuarka murikjaj nan̄kaamaschakait. Tuma asamtai ayampratin tsawantajsha péṅker ana nu túramniaiti."

¹³ Tinia iniais áishman̄kan uweje jakan tímiayi "Uwejem takuitia." Tutai uweje takuj̄ chíkich uwejējaj̄ métek péṅker ajasmiayi.

¹⁴ Nuna túramtai Pariséu shuarsha aā jíinkiar Jesus itiurak máawaintiaj̄i tusar chichaman najatiarmiayi.

Isayas Jesusnan tímia nu uminkiamiayi

¹⁵ Jesus nin máatniun nekaama nuyá jíinkimiayi tura wéakui untsurí shuar nemariarmiayi. Untsurí jáiniancha tsuámiayi.

¹⁶ Tsuar “etserkairap” tinia akupiarmiayi.

¹⁷ Yaunchu Yúsna etserin Isayas tímia nu uminkiati tusa túrunamiayi. Niisha juna áarmiayi:

¹⁸ “Júiti Wi achikmaj nu. Niisha Wi tájana nuna umin asamtai ti aneakun Niijai waraajai. Winia Wakantru kakarmarín takamtsuk susat-tajai. Túramtai winia uwempratin chichamprun ashí Israercha nunkanmasha etserkattawai.

¹⁹ Jiakchattawai tura kakaram chichaschattawai. Winia anturtukarat tusa péprunam weak untsukchartatui.

²⁰ Akupin ajatsuk shuar pintiu punua núnis pimpiru ainia nuna kúpitsuk yáintatui. Núnisañ shuar ji yama ikiapámu áinis kakarmachu ainia nuna ikiajniatsuk ikiakártatui. Tura ashí nupetak ti péñker kakaram akupin ajastatui.

²¹ Tura Israer-shuarchasha Nin nekas enentáimtusartatui.”

*Jesusan “iwianchi uuntri kakarmarijiai túrawai” tiarmiania nu
(Márkus 3.19-30; Rúkas 11.14-23; 12.10)*

²² Nuyá Jesusan shuar yajauch wakantrukun itiararmiayi. Nu shuar jii kusurusha chichachusha ámiayi. Tura Jesus tsuármatai paant ímsamiayi tura chichakmiayi.

²³ Nuna wáinkiar shuar shiir enentáimprar tiarmiayi “¿Tawitia uchirí pampanku iniañnamu uwemtikkiartin tátinia nuáshit?”

²⁴ Tura Pariséu shuarsha nuna antukar yajauch enentáimtuiniak tiarmiayi “Juka iwianchi kapitántrin Pirsepún umirniuiti. Tuma asa nuna kakarmarijiai yajauch wakanin jiiiki akupeawai.”

²⁵ Jesus tu enentáimainian neka asa tímiayi “Nú nunkanmaya shuar nuamtak kajernaiyakuñkia nú nunka wari meserchattawak. Núnisañ nuamtak shuar ní shuarjai mánainiakka amunaikchartatuak.

²⁶ Núnisañ íwianch nuamtak jiiiki akupnainiakka máanaikiar wárik amuukashtatuak.

²⁷ Kame Wi Pirsepú iwianchi kakarmarijiai iwianchin jiiiki akupeakuñkia atumí uchirísha ¿yana kakarmarijiañ jiiiki akupena? Ni túramurijiai átum awajirma nekamarum.

²⁸ Wi Yusa Wakaní kakarmarijiai yajauch wakanin jiiiki akupea asamtai atumsha Yusa akupeamuri atumiñ jeartamarmena nu nekaatniuitrume.”

²⁹ Tista. Shuar kakaram shuara kuítrin kasarkatin wakerakka emka kakarman jinikiá aya túran ni jeen wayá kasarkamniaiti. Wi iwianchin jiiikmiajai uunt iwianch nupetkamua nu nekaamniaiti.’

³⁰ ‘Wijiai tsaniñ pujatsna nuka winia nemasruiti. Núnisañ Winia yáintsuna nu aya itiurchat nájateawai.’

³¹ ‘Tuma asamtai tájarne, Ashí shuar tunáa túruinia nusha yajauch chichainia nusha tsankuratin awai. Antsu Yusa Wakanin yajauch chicharin ainia nuka tsankurashtiniaiti.

³² Winiasha Aents Ajasuitjiana nuna yajauch chichartuinia nú shuarsha tsankuramniaiti. Tura Yusa Wakanin yajauch áujmataina nuka penké tsankurachminiaiti. Ju nunkanmasha tura ukunmasha tsankurnarchattawai’ tímiayi.

*Ni nerejai numi nekaamniaiti
(Rúkas 6.43-45)*

³³ ‘Yutai numi pé_nkeran nereawai. Tseas numisha yajauchin nereawai. Ni nerejai numi nekaamniaiti. Núniskete atumjai.

³⁴ Tseas wenunniutirmesha, ¿atumsha itiurak imiá yajauchitirmesha pé_nker chichamsha chichastarum? Shuar ni enentáin enentáimna nuna chichaawiti.

³⁵ Pé_nker shuar pé_nker enentáimiu asa shiir chichaawiti. Tura yajauch shuar yajauch enentáimiu asa yajauch chichaawiti.

³⁶ Tura Wisha tájarne, nekapsatin tsawant jeamtai ashí enentáimtsuk chichakma nuna Yúsan paant ujakartatui.

³⁷ Iis, ame chichammijiai nekanattarme. Pé_nker chichakuitkiumka sumamashtatme. Tura pé_nker chichakchaitkiumka sumamattame.”

*Nu shuar yajauch ásar iniakmamun seawarmiania nu
(Márkus 8.12; Rúkas 11.29-32)*

³⁸ Pariséu shuarsha Israer-shuara jintinniurisha Jesusan chicharuk “Uuntá, ame Yúsaiyáitjai tusam nayaimpinmayá kakarmajai iniakmamun túrata, iisha wáinkiatái” tiarmiayi.

³⁹ Tutai Jesus tímiayi “Shuar yajauch tura Yúsan enentáimtachu ásar nayaimpinmayá iniakmamun seainiawai. Tuma asamtai, áyatik yaunchu Junas túrunamu iniakmastiniaiti.

⁴⁰ Junas menaintiu kashi menaintiu tsawantcha namaka ampujen enkemsamiayi. Núnisnak Wi, Aents Ajasu asan, menaintiu kashi menaintiu tsawantcha nunká jakan tepestatjai.

⁴¹ Júnas Níniwi péprunmayá shuaran Yus-Chichaman etserkamtai nu shuar ni tunaarin enentáimtusar ni enentáin yapajíawarmiayi. Tura jui yamáí Junasa nankaamas etserin pujawai. Wiitjai nusha, tura anturkachuitrume. Tuma asamtai nekapsatin tsawant jeamtai Níniwinmayá shuar juyá shuaran súmamtikiawartatui.’

⁴² ‘Yaunchu nuwá yajayá shuaran úunt akupniuriyayi. Nu nuwá Sarumún ti neka asamtai nin anturkataj tusa tarimiayi. Tura jui yamáí Sarumúnjai nankaamas anturkamnia pujawai. Nusha Wiitjai. Tuma asamtai nekapsatin tsawant jeamtai nu nuwá juyá shuaran súmamtikiawartatui’ tímiayi.

*Yajauch wakan jiki akupkamuitiat wáketna nu
(Rúkas 11.24-26)*

⁴³ ‘Shuara enentáiya yajauch wakan jíinkin yumi penké yútatsna nuj wéawai. Tura nuj pé_nker pujustinian wáinkiach ataksha waketkitniun enentáimiu.

⁴⁴ “Wi jíinkimij nuj waketkittiajai” tawai. Tura waketki shuara enentáin pé_nker iwiaramu tura ankantán wáiniak

⁴⁵ ni aín siati (7) iwianchin níijiai nankaamas yajauchin itia shuara enentáin enkemáwartatui. Túrunamtai nu shuar nuiki nuna nankaamas yajauch ajastatui. Núnisan juyá shuar túrunawartatui” tímiayi Jesus.

*Jesusa yachí, Jesusa nukurí
(Márkus 3.31-35; Rúkas 8.19-21)*

⁴⁶ Jesus nu shuarjai tuke chichaak pujai ni nukurísha ni yachísha tariarmiayi. Tura aa wajasar Níijiai chichastaj tiarmiayi.

⁴⁷ Túramtai Jesusan ujakar “Ame nukusha yatsumsha aa wajasar chichastaj turamainiawai” tiarmiayi.

⁴⁸ Chichaman ujakmia nuna Jesus tímiayi “¿Ya ainia winia nukursha winia yatsursha?”

⁴⁹ Nuyá ni unuiniamurin iniakmas tímiayi “Ju áiniawai winia nukur tura winia yatsursha.

⁵⁰ Ashí shuar winia Apar nayaimpiniam pujana nu wakeramun umiiniana nu winia yatsur winia umar winia nukur áiniawai” tímiayi.

13

Untsurí métek-taku chichamjai Jesus unuiniamiania nu

(1) Atsaamin atsaampramiayi

(Márkus 4.1-9; Rúkas 8.4-8)

¹ Nu tsawantaj Jesus ni jeeya jíinkin antumianka kánmatkarin pujusmiayi.

² Tura ti untsurí shuar káunkarmatai kanunam enkemar nuj pujusmiayi. Shuarsha antumianka kánmatkarin pujusarmiyai.

³ Túrunawarmatai untsurí métek-taku chichamjai unuiniamiayi. “Atsaamin atsaamprataj tusa jíinkimiai, tímiayi.

⁴ Atsaamki wesa arakri jintia písunmasha iniaarmai. Tura chiniki tariar yuawarmai.

⁵ Chikichcha kaya írunmanum iniaarmai. Nunka ishichik asamtai wárik tsapainiarmai.

⁶ Tura nantu etsantramtai péñker kankáprúrcharu asa sukuam káararmai.

⁷ Chikichcha janí nupanam iniaarmai. Tura janiki wárik tsakar nupetak ajakramai.

⁸ Chikichcha péñker nunkanam iniaarmai. Nusha péñker nerekar chikich siansha (100) nerekarmai. Tura chikichcha sesenta (60) nerekarmai. Tura chikichcha trainta (30) nerekarmai.

⁹ Kuishim ákuinkia antuktarum” tímiayi.

“¿Urukamtai aya métek-taku chichamjai jintiam?” aniasarmiania nu

(Márkus 4.10-12; Rúkas 8.9-10)

¹⁰ Nuyá ni unuiniamurin Jesusan taruntar aniiniak “¿Urukamtai aya métek-taku chichamjai ju shuar unuiniam?” tiarmiayi.

¹¹ Tutai Jesus tímiayi “Urukuk ju nunkanam Yus akupin ati, nuka yaunchu nekanachmiayi. Tura yamaikia Yus ashí nuna atumin paant iniakturmawai. Antsu chikich nuna nekaachmin áiniawai.

¹² Kame núkap takakna nu shuar nú nukap patatnaktatui tura ti núkap takustatui. Antsu ishichik takakna nuka ishichik takakuk juruktiniaiti. Núnisan Yusna ti nekarum nú nukapka yúpichuch nekaattarme. Tura ishichik nékarum wárik kajinmatkittiarne.

¹³ Tuma asamtai aya métek-taku chichamjai unuiniajai. Nú shuarka íniayatan wáiniániatsui. Ántuiniayatan ántachua núnis nékainiatsui. Túmainiak Winia nekarainiatsui.

¹⁴ Nujai yaunchu Yúsnan etserin Isayas timia nu uminkiaiti. Juna tímiayi: “Ti ántayatrum anturkashtatrume. Wáiniatrumsha nekaashtatrume.

¹⁵ Ju shuara enentái kátsuram ásar péñkera nuna nakitiainiawai. Nu asamtai péñker ántuiniatsui, jíisha pusá áinis áiniawai. Túrachkunka paant nekaawarainti, tura nekas antukarainti, tura enentáijiai enentáimias Winia tsuarat tusa tarutiarainti.”

¹⁶ Tura átumka paant wainkia asarum péñker anta asarum shíraitrume.

¹⁷ Nekasan tájarne, untsurí Yúsnan etserniusha tura péñker shuarsha átum yamá wáintrum nuna wáinkiatniun wakeruiniayatan wáinkicharmiyai. Tura átum yamá ántarme nuna antuktinian wakeruiniayatan antukcharmiaiy’ tímiayi.

Jesus atsaampramu chichaman paant jintintiamiania nu

(Márkus 4.13-20; Rúkas 8.11-15)

¹⁸ ‘Ayu, antuktarum. Atsaampramu chichaman paant jintintiatjarne.

¹⁹ Árak jintia písunam iniaarma nuka shuar Yus-Chichaman ántayatan ni enentáin ikiuiniatsna núiti. Tura íwianch nu Yus-Chicham ni enentáin atsaampramu áinis antukman kajinmatkiawai.

²⁰ Árak kaya írunmanum iniaarma nuka shuar Yus-Chichaman antuk waras umirainia núiti.

²¹ Tura núkap kan̄kaprurcharu ásar katsuiniatsui. Antsu itiurchatan ín̄kiuiniak tura Yus-Chichaman wakeruinia ásarmatai chíkich yajauch áujmatam wárik iniaisar ikiuiniawai.

²² Árak jan̄kí nupanam iniaarma nuka shuar Yus-Chichaman antuk emka umirniua núiti. Tura jū nun̄kanam írunna nuna tuke páchiniak ni kuítríncha ti enentáimtuinia ásarmatai ashí Yus-Chichaman enentáimtamun núpeteawai. Tuma asamtai nu áentsnum Yus-Chicham atsaampramu nereatsui. Yus-Chicham ni enentáin takasma atsawai.

²³ Tura árak péñker nun̄kanam iniaarma nuka shuar Yus-Chichaman antuk péñker umirainia núiti. Tura péñker nerenawai. Chíkich sian̄ (100) nerekarma núnis chíkichcha sesenta (60) nerekarma núnis chíkichcha trainta (30) nerekarma núnis ániawai” tímiayi Jesus.

(2) Yajauch nup̄a tríkiunam atsaamkamu

²⁴ Jesus ataksha jū métek-taku chichaman áujmatsamiayi. “Shuar Yus akupeamunam pachiinkiertin júnisaiti. Shuar péñker arakan, tríkiun ni nun̄ken araamai.

²⁵ Tura ashí kanararmatai nemasr̄i kashi taa trikiu arakmanum yajauch nup̄an aratak ikiukmiai.

²⁶ Trikiu tsapakar nereakui nuyá yajauch nup̄asha nusháa nereku asa ti paant ajasmai.

²⁷ Nuna íisar takainia nu ni úuntr̄in werí tiarmai “Uunta, ¿péñker arak araachmakam. Itiura júsha yajauch nup̄asha tsapakuit?” ’

²⁸ “Tutai nérentin timiai “Winia nemasur arakuíti.” ’

“Takui ni takarniur̄i tiarmai “¿Yajauch nup̄an uwerat tusam wakeramek?” ’

²⁹ “Tutai timiai “Atsá, uwerairap. Yajauch nup̄a uweaj tukamarum trikiu uweniirum.

³⁰ Iniaisatarum. Antsu métek tsakakti. Júuktin tsawant jeamtai winia takartinian emka yajauch nup̄an uwer irumar jinkiawarat tusan akupkartatjai. Tura áesawartatui. Tura trikiu ner̄en júukar péñker ikiusarat tusan akupkartatjai” timiai” tímiayi Jesus.

(3) Mustasa jin̄kiái

(Márkus 4.30-32; Rúkas 13.18-19)

³¹ Jesus ataksha métek-taku chichaman áujmatsamiayi. “Shuar Yus akupeamunam pachiinkiertin mustasa jin̄kiáiya áintsan̄kete. Shuar péñker nun̄ken araamai.

³² Mustasa jin̄kiáikia imiá uchichiitiat tsapái tsakaakka ashí numichij̄iai nan̄kaamas uunt ajawai. Ti uunt asamtai chin̄ki ni kanawen pasun̄mainiawai” tímiayi Jesus.

(4) Karin en̄ketatin

(Rúkas 13.20-21)

³³ Núnisan̄ chíkich métek-taku chichaman áujmatsamiayi. “Shuar Yus akupeamunam pachiinkiertin karinia áintsan̄kete. Nuw̄a nijiamchiniam karinia en̄kea mashí páchimiawai. Tura nu mash karimtikiawai” tímiayi.

Jesus aya métek-taku chichamj̄ain̄ jintintiamiania nu
(Márkus 4.33-34)

³⁴⁻³⁵ Ashí nuna Jesus métek-taku chichamjají áujmatsamiayi. Yaunchu Yúsnan etserin timia nu uminkiatu tusa túramiayi. Etserin juna áarmiayi: “Métek-taku chichamjají áujmattiatjají. Yámankamtaiknumiá nékashtain etserkat-tajají” tu áarmiayi.

Nu asantai aya métek-taku chichamjajín áujmatmiayi Jesus.

Jesus yajauch nupá tríkiunam atsamkamun paant awajsamiania nu

³⁶ Nuyá shuaran ikiukin Jesus jeá támiayi. Túramtai ni unuiniamurí tariar “Yajauch nupá áujmatmena nu paant awajsata” tiarmiayi.

³⁷ Tutají Jesus tímiayi “Wi Aents Ajasuitjají. Wi péñker arakan atsaamkaitjají.

³⁸ Ashí nunka aja áintsaiti. Péñker jiníkiái Yus-shuaran Yus akupea nuna nakumeawai. Yajauch nupá iwianchna ainia nuna nakumeawai.

³⁹ Tura íwianch ii nemasrí asa yajauch nupán arakuiti. Tura nunka amúamunam Yusa suntarí arakan júuktinia áintsan shuaran yaruaktatui.

⁴⁰ Yajauch nupá irur jinium áesatniua áanis nunka amúamunam túrunattawai.

⁴¹⁻⁴² Nují Wi Aents Ajasu asan winia suntarun akupkattajají. Tura ashí tunaan túruinia nunasha tura chikichan tunaanum útsuinia nunasha mash irurar jinium apeawartatui. Nuísha ti úutin ti wáitsatniusha átatui.

⁴³ Antsu péñker túruinia nuka ti shiir wincha ajasar ni Aparí akupeana nují etsa núnis tsáapnin ajasartatui. Wats, kuishim átsuk. Antukta.’

(5) Kuit wáinkiamu

⁴⁴ ‘Shuar Yus akupeamunam pachiinkiatin kuit nunká uukma áintsankete. Shuar nu kuítian wáiniak nuín ataksha uukmai. Tura ti waras waketki nu kuit niiniu atí tusa ashí ni takakman suruk nu nunkan sumakmai.’

(6) Kaya shiirmach ti kuitia nu

⁴⁵ ‘Shuar Yus akupeamunam pachiinkiatin júnisaiti. Shuar kayachin ti shíрман eak wekaana áintsankete.

⁴⁶ Tura kayan ashí nankaamas kuit jeean wáiniak waketki ashí takakna nuna suruk nu kayan niiniu atí tusa súmawai.’

(7) Neka

⁴⁷ ‘Shuar Yus akupeamunam pachiinkiatin júnisaiti. Shuar nekajají namakan achía áintsankete. Nekan nayaantsanam ajuntak niisháa namakaim achíawai.

⁴⁸ Tura nekanam nemarmatai kukar jiiiki, nují péñker namaknasha chaninnium chumpiniawai. Tura yajauch namaknaka ajapenawai.

⁴⁹ Núnisán átatui nunka amúamunam. Yusa suntarí taar Yus-shuaran tura íwianch shuaran akantrattawai.

⁵⁰ Tura íwianch shuarnaka uunt jinium apeattawai. Nuísha ti úutin ti wáitsatin átatui.” Nuna ashí ni unuiniamuríjjají áujmatsamiayi Jesus.

Yamáí nekaamujajisha tura yaunchu nekaamujajisha Yus-shuaran yáintiniaiti

⁵¹ Jesus nuna tinia amuk “¿Jú mash antukurmek?” tímiayi.

Tutají ni unuiniamurí “Ee, Uunta, ashí antukji” tiarmiayi.

⁵² Tuiniakui Jesus tímiayi “Shuar ashí Yúsnan péñker unuimiaruka aents kuítriniua áintsankete. Ni ikiutairiyá yamarmancha yaunchu sumakmancha jusamniaiti. Núnisán nu shuar yamáí nékamujajisha tura yaunchu nékamujajisha Yus-shuaran yáintiniaiti.”

Jesus Nasarétnum waketkimiania nu

(Márkus 6.1-6; Rúkas 4.16-30)

⁵³ Jesus nu métek-taku chichaman áujmatas amuk nuyá wémiayi.

⁵⁴ Tura ni péprurin Nasarétnum jeá Israer-shuar iruntainiam wayá unuini-amiayi. Tura nuyá shuar antukar tí enentaimprarmiayi. Tura “¿Jusha tujimiá unuimiaruit, tiarmiayi. Itiurak aents tujintiamun túramniait?

⁵⁵ Juka karpintíru uchirinchukait. Nukurísha Marichukait. Tura ni yachísha Jakupu, Jusé, Semun, Jútas ániatsuk.

⁵⁶ Tura ni umaísha iijíai írutra pujuiniatsuk. ¿Nuikia itiura mash neka?” tiarmiayi.

⁵⁷ Túrawar Jesusan itiurchat enentáimturarmiayi.

Túramtai Jesus chicharuk “Yúsnan etserniun ashí shuar péñker anturaini-awai, antsu aya nuna nunkeyañka ni shuarinkia nin anturainiatsui” tímiayi.

⁵⁸ Tura nú shuar Jesusan enentáimtuiniachu asamtai aentsti tujintiamun aya ishichik túramiayi.

14

Imiakratin Juan jakamu

(Márkus 6.14-29; Rúkas 9.7-9)

¹ Kariréa nunkanam Erutis akupniuyayi. Tura Jesus túramuncha antukmi-ayi.

² Tura ni írutramurin tímiayi “Nuka imiakratin Juan jakamunmaya nantaki túrawai auka. Tuma asa aents tujintiamun túrawai” tímiayi. Kame Erutis Juan kan maa asa tímiayi.

³⁻⁴ Akupin Erutis ni yachí Jiripi nuwen Jirutíasan akintrukmatai Juan Erutisan “Ame yatsumi nuwé akintrukchatniuitme” tímiayi. Tutai Erutis Juan kan achik jirujai jin kiá sepunam enkeatarum tusa akupkamiayi.

⁵ Niisha Juan kan máataj tukamá aentsun ashamiarmiayi. Ashí aents “Juan Yúsnan etserniuiti” enentáimtuiniakui ashammiai.

⁶ Tura akupin Erutis akiiniamu tsawantri jeamtai nú námpertin Jirutíasa nawantri ashí ipiaamu pujuiniamunam jantsemamiayi. Túramtai Erutis shiir enentáimtak

⁷ “Ame ashí wakeram nu seattia, tímiayi. Nekasan amastatjai, Yussha iirui” tímiayi.

⁸ Tutai nu nuwach emka ni nukurí akatramu asa Erutisan chicharuk “Imiakratin Juan ka muuké tsupikiam amamkunam enkeram surústá” tímiayi.

⁹ Tutai Erutis wake mesekmiayi. Túrasha “nekas Yus iirui” tiniu asa tura ni amikrísha antukaru asamtai umikmiayi.

¹⁰ Ni suntarin sepunmayan Juan ka muuken tsupik itiarti tusa akupkami-ayi.

¹¹ Tura amamkunam itiar nuwachin súsarmiayi. Tura niisha ni nukurí susamiayi.

¹² Nuyá Juan ka írutramurí tariar ayashí jukiar iwiarsarmiayi. Túrawar Jesusan ujauwearmiayi.

Jesus senku mir (5000) áishman kan ayuramiania nu

(Márkus 6.30-44; Rúkas 9.10-17; Juan 6.1-14)

¹³ Jesus nuna antuk Niñki ni unuiniamurijia in kanunam enkemar arant aents atsamunam wémiayi. Túrasha nuna aents nekaawar kukarak weriarmi-ayi Jesusan.

¹⁴ Kanunmaya jíiniaj tukamá untsurí áentsun wáinkiamiayi. Tura wáiniak waitnentrarmiayi. Tura jáiniancha tsuárarmiayi.

¹⁵ Kíakui ni unuiniamurí Nin tariar tiarmiayi “Kíawai, Uunta. Tura shuar tíjiuch pujaaka atsawai. Ju aents akupkarta. Péprunam wear sumak yuuearti” tiarmiayi.

16 Tutai Jesus tímiayi “¿Urukamtaik wearat? Antsu atumek ayuratarum.”

17 Tutai tiarmiayi “Iikia takaktsuji. Aya senku (5) tantachik jimiaichik namakchijiaïn takakji.”

18 Tuíniakui Jesus “Wats, nu itiartitiarum” tímiayi.

19 Tinea aents chírichriniam pujusarti tusa akupkamiayi. Nuyá senku (5) tantancha jímiar namaknasha achik nayaimpiniam ímias Yúsan yu-minsamiayi. Tura puur ni unuiniamurïn aents ayuratarum tusa súsarmiayi.

20 Ashí yurumáwar jémararmiayi. Tura nuyasha puunaruka tuse (12) chan̄kin tiáirmiayi.

21 Nuï yurumáwarmia nusha nuwasha uchisha nekapmatsuk senku mir (5000) aya áishman̄ áirmiayi.

Jesus entsá pátatek wekasamiania nu

(Márkus 6.45-52; Juan̄ 6.16-21)

22 Nuyá Jesus ni unuiniamurïn kanunam en̄kemprarum amain émaa ajatarum tusa akupkarmiayi. Niisha áentsun akupkarmiayi.

23 Akupkarsha naint waka Yúsan áujumiayi. Káshisha nuï Nin̄ki tuke pujumi-ayi.

24 Tura antumian̄ tí wan̄karam asamtai kanu ajapén ajasmatai nase tukumma entsa tamparukmiayi.

25 Tsawaana aï nii tuke wenaj̄ Jesus entsá pátatek wekas pujuiniamunam jeamiayi.

26 Tura ni unuiniamur̄i entsá pátatek wekaan wáinkiar ti sapijmiakarmiayi. Tura ashamainiak “wakanchashit” tiarmiayi.

27 Tuíniakui Jesus tiarmiayi “Kakaram ajastarum. Wiitjai. Asham-prukairap.”

28 Takui Pítiur chicharuk tímiayi “Uunta, Ámetkumka nuï wekasa jecin untsurkata.”

29 Takui Jesus tímiayi “Wats, winitiā.”

Tutai Pítiur kanunmayá akaikin Jesus wajana nuï jeataj tusa entsá pátatek wekasamiayi.

30 Tura ti nasen násentun nekáa ashamkamiayi. Ashama asa entsá wayamiayi. Tura “Uuntá, achirkata” tu unsummiayi.

31 Nu chichamtaik Jesus uwejn̄um achik júak “Maa, Yus imiá ishichik enentáimtuschamek” tímiayi.

32 Tura kanunam en̄kemáwarmatai nasesha men̄kakamiayi.

33 Túramtai kanunam en̄kemarmia nusha Jesusan tikishmatar chicharuk “Nekas ame Yusa Uchir̄inme” tiarmiayi.

Jesus Jinisarítnumiá shuaran tsuármiania nu

(Márkus 6.53-56)

34 Tura amain̄i kat̄inkiar Jinisarít nun̄kanam jearmiayi.

35 Tura nuyá aents Jesusan nekaawar nu nun̄kanam ashí ujanairarmiayi. Túrawar jaancha ni pujamunam itiararmiayi.

36 Ni pushir̄inkisha ant̄int̄ai tusar seawarmiayi.

15

Shuáran yajauch awajeana nuna Jesus jintintiamiania nu

(Márkus 7.1-23)

1 Nuyá Jerusarén̄ péprunmayá Pariséusha yaunchu akupkamu jintinni-ur̄isha Jesusan tariar aniasarmiayi

² “¿Urukamtai ame unuiniamuram ii uuntri yaunchu jintintrarmia nuna uminiatsu? Iis, ikijmiatskesha yurumáiniawai” tiarmiayi.

³ Tuíniakui Jesus aniasarmiayi “¿Urukamtai atumsha Yus akupkamu umirt-suk aya aents akupkamu umiirum?”

⁴ Iis, Yus tíchamkia:

“Ame apa, nukusha shiir enentáimtustarum.” Tura “Shuarsha ni aparíncha nukuríncha katsekka nu shuar jakati” tíchamkia.

⁵⁻⁶ Antsu átumka tárume “Shuar ashí niiniu írúnna nuna mash “Yúsnaiti” takui nuikia nujai ni aparíncha nukuríncha yáinchamniaiti, tárume. Nin yáintinian nakitiak ayatik “Ashí winia áiniana nu Yusna asamtai yáinchamniaitjame” títiniaiti” tárume. Núnisrum tákuram Yus akupkamu iniaisarum aya aents akupkamu umiirume, tímiayi.

⁷ Antra chichamtiniaitrum. Yúsna etserin Isayas yaunchu nekas atumin áartampramiayi juna:

⁸ “Ju aents ni wenejai shiir awajtuiniawai, tura ni enentái jeachat pujuiniawai.

⁹ Tura tukeneasan shiir awajtuiniawai. Aentsu chichamen jintintiainiayat “Yusa chichamente” tuiniawai.” Tu áarmiayi” tímiayi Jesus.

¹⁰ Tinea shuaran untuk tiarmiayi “Ju antukrum pénger nekaatarum.

¹¹ Aents yúana nuka shuáran yajauch awajsashtatui. Antsu wenunmaya jiinia nuka shuáran yajauch awajeawai” tímiayi.

¹² Nuyá ni unuiniamuri Jesusan tariar “Maa, Pariséu ame chichammin antukar ti iturchat enentáimprarai” tiarmiayi.

¹³⁻¹⁴ Tuíniakui Jesus tímiayi “Ikiuktiarum. Kusuru áintsan áiniawai. Tura kusuruncha jintintiainiawai. Mai kusuru ásar mai wáanam akaiki ini-aawartatui. Wats, ajanam nupá áintsan ainiawai. Tura ashí winia Apar nayaimpiniam pujana nu araachmaka takamtsuk uwé ajapamu átatui” tímiayi Jesus.

¹⁵ Takui Pítiur Jesusan tímiayi “Nu métek-taku chicham paant awajsata.”

¹⁶ Tutai Jesus tímiayi “¿Atumsha nekaachurmek.

¹⁷ Enentáimprachurmek? Ashí wenunam wayaana nu wakenam wéatsuk. Tura nuyá iniankastiniaiti.

¹⁸ Antsu wenunmaya jiinia nu enentáinmaya jiiniu asa áentsun yajauch awajeawai.

¹⁹ Enentáinmaya ashí yajauch enentáimsatin jíiniainiawai. Mankartuatniusha, chikicha nuwé kasamkatniusha, tsanirmatniusha, kasamkatniusha, wáitruatniusha, yajauch áujmatsatniusha

²⁰ ashí nu áiniawai nekaska shuáran yajauch awajeana nu. Tura ikijmiatsuk yurumátniuka shuáran ni enentáin yajauch awajeatsui” tímiayi.

*Nuwá Israer-shuarsha Jesusan enentáimtusmiania nu
(Márkus 7.24-30)*

²¹ Jesus nuyá jiinki Tiru péprunmasha Sitiun péprunmasha wémiayi.

²² Tura nu nuñkanmaya nuwá Jesusan tarí tímiayi “Uunta, uunt akupin Tawit ame weatrum asamtai winia waitnentrurta. Nawantur yajauch wakantruku asa ti wáitrutawai” tímiayi.

²³ Tura Jesus áikchamiayi. Tura ni unuiniamuri tariar “Awemata, tiarmiayi. Tuke untsumki apapétmaji” tiarmiayi.

²⁴ Nuyá Jesus tímiayi “Aya Israer-shuarum menkakarú áinia nuna eaktinian Yus akuptukuiti.”

²⁵ Túrasha nuwá tikishmatar tímiayi “Uunta, waitnentrurta.”

²⁶ Tutai Jesus tímiayi “¿Uchí apatkuri jurukir yawá susamniakait?” tímiayi.

²⁷ Tutai nuwá tímiayi “Nekas, Uunta, tame. Tura yawasha ni aentsrj yurumainiakui nunká iniaarun yuúniatsuk.”

²⁸ Takui Jesus tímiayi “Maku, nekas Winia enentáimtursaitme. Ame wak-eram núnisañ atí” tímiayi. Tura nu chichamaik ni nawantrj péñker ajasmiai.

Jesus untsurí jáinian tsuararmiania nu

²⁹ Jesus nuyá jiinki Kariréa antumianka káanmatkarin waketkimiayi. Tura naint waka nuj pujusmiayi.

³⁰ Nuj untsurí aents Nin tariar shutuapnasha kusuruncha chichachuncha tsupirkamuncha chíkich jáiniancha itiararmiayi. Túrawar nawenam aeprusarmiayi. Túram tsuararmiayi.

³¹ Nuna ísar chichachusha chichainiakui, tsupirkamusha péñker ajainiakui, shutuapsha péñker wekainiakui, kusurusha wáinmainiakui, ti shiir enentáimprarmiayi. Yus ni áentsrin Israeran yáinmatai shiir yuminsarmiayi.

*Jesus kuaru mir (4000) áishmankan ayuramiania nu
(Márkus 8.1-10)*

³² Nuyá Jesus ni unuiniamurin untsukar tiarmiayi “Ju aentsun waitnetaiñajai. Warí, menaintiu tsawant Wijiaj yurumtsuk yujainiatsuk. Ayurtsuk ni jeen akupkachminiñitjai. Jintiá pimpiki wáitsartatui.”

³³ Ni unuiniamuri tiarmiayi “Túrasha, Uunta, ¿shuar atsaasha tuyañ yurumak imiá sumaktaj ju aents ayurawartincha?”

³⁴ Jesus aniasarmiayi “¿Urutma tanta takakrum?”

Tutai niisha “Siatí (7) tanta nuyá ishichik namak takakji” tiarmiayi.

³⁵ Nuyá aents nunká pujusarti tusa akupkamiayi.

³⁶ Tura siati tantan achik namaknasha achik nuyá Yúsan yuminsamiayi. Tura puur aents ayuratarum tusa ni unuiniamurin susamiayi.

³⁷ Ashí yurumáwar jémararmiayi. Tura puunaru siati chanñin tiarmiayi.

³⁸ Tura nuj yurumáwaruka nuwasha uchisha nekapmatsuk aya áishmanñkak kuaru mir (4000) ármiai.

³⁹ Nuyá Jesus áentsun akupak kanunam eñkemar Maktara nunñkanam wémiayi.

16

*Pariséusha Satuséusha iniakmamarin Jesusan seawarmiania nu
(Márkus 8.11-13; Rúkas 12.54-56)*

¹ Pariséusha tura Satuséusha Jesusan nekapsatai tusar tariarmiayi. Túrawar “Ame Yúsaiyañtkiumka kakarmarmijiaj nayaimpinnmayá iniakmasta, iisha wáinkiatái,” tiarmiayi.

² Tutai Jesus tímiayi “Átumka “Kapaaku péetar kintiamkui kashin esatrurta-tui” tñiuitrume.

³ Túrasha “Te ajas kapaaku péetar tsawaakui yumi yajauch átatui” tñiuitrume. Tura nekasaiti. Maa, átumka nayaim ísrum ju nunñkanam túrunattana nu nékarme. Antsu Yus yamá jú nunñkanam tura nuka nékatsrume. Ántraitrume.

⁴ Aents yajauch ásar tura Yusan enentáimtachu ásar kakarmajaj iniakmamin wakeruiniawai. Túrasha áyatik Junas túrunamia nuke iniakmastiñaiti” tímiayi. Tinia ikiuak wémiayi.

*Pariséusha Satuséusha jintintiañia nu aneartiniñaiti
(Márkus 8.14-21)*

⁵ Tura entsá amaini katiñkiar ni unuiniamuri tantan júkitniun kajinmatkiarmiayi.

6 Nuyá Jesus tímiayi “Wáinkiatarum, Pariséusha Satuséusha wakaprutai takakainia nújaisha aneartarum.”

7 Tutai ni nuuiniamurí tiarmiayi “Ii tanta itiachakrin tátsuk.”

8 Jesus nuna antuk tímiayi “¿Urukamtai tanta itiachji tunaiyarum. Yusa kakarmari kajinmatkintrumek.

9 Senku tantajai túramiaj nu kajinmatkintrumek. Senku mir (5000) áishmaṅkan ayuramtai untsurí chaṅkin tiármia nu enentáimtsurmek.

10 Tura siati tantajai kuaru mir (4000) áishmaṅkan ayuramtai nuna ishichik chaṅkin tiármia nu kajinmatkintrumek.

11 Itiurak imiá nékatsrum? Wi Pariséu wakaprutairisha Satuséu wakaprutairisha aneartarum tákun penké tantan tátsujai” tímiayi.

12 Nuna Jesus takui ni nuuiniamurisha nekaawarmiayi. Penké tantaa wakaprutairin tíchamiayi antsu Pariséusha Satuséusha unuiniatairin tímiayi.

Pítiur Jesusan Yus anaikiamun paant ujakmiania nu (Márkus 8.27-30; Rúkas 9.18-21)

13 Tura Sesaria-jiripiunam jeawar Jesus ni nuuiniamurin aniasarmiayi “Aents Ajasuitjiana juna ¿yaiti turutainiawa Winia?”

14 Niisha ayak tiarmiayi “Chíkich, imiakratin Juánkaiti turamainiawai. Chíkichka, Eríasaiti turamainiawai. Chikichcha Jeremíasaiti, chikichcha chíkich aents Yúsnan etserniuiti turamainiawai” tiarmiayi.

15 Tutai nincha aniiniak “¿Atumsha yaiti túrutrum?” tímiayi.

16 Semun Pítrusha “Ámetme Kristu, Yus Anaikiamu. Nekas iwiaaku Yusa Uchirínme” tímiayi.

17 Tutai Jesus tímiayi “Shiiraitme Junasa uchirí Semunka. Núnaka aents ujatmakchaiti antsu winia Apar nayaimpiniam pujana nu ujatmakmatai nekaam tame.

18 Tura Wisha tájame, ame Pítruitme, kayach tútam. Nu kayanam jea jeamtinia áintsan Yus-shuaran ekenin tsakatmartatjai. Túramtai jákatniusha tura Yusa nemasrisha nu jeamman pukukchattawai.

19 Yus akupeamu yawincha amastatjai. Ju nunkanam jinwiatniusha atíatniusha amasmaiti. Tuma asamtai ame ju nunkanam suritiam nu nayaimpinmasha suritniaktatui. Tura ju nunkanam tsankateam nu nayaimpinmasha tsankatnaktatui” tímiayi.

20 Nuna tinia Jesus ni nuuiniamurin Kristuitiaj nu etserkairap tinia akupkarmiayi.

Jesus Nin máatniun etsertumakmiania nu (Márkus 8.37-9.1; Rúkas 9.22-27)

21 Nuyá Jesus juna unuiniatan nankammiayi. “Wi Jerusarénum wétinaitjai. Nui Israer-shuara úuntrisha, Israer-patri úuntrisha, Israer-shuara jintinniurisha ti wáitkiarsartatui. Nuyá mantuawartatui túrasha menaintiú tsawantaj nantaktiatjai.”

22 Takui Pítiur arantach jukí chicharuk tímiayi “Uunta, nuka penké áchatniuiti. Áminkia túrutmarcharminiaiti.”

23 Jesus ayanmatar Pítrun tímiayi “Werumta, Satanása. Yajauch awajtame. Ámeke Yus wakeramu enentáimtsume. Antsu jú nunkanam enentáimainia áinis enentáimme.”

24 Nuyá Jesus ashí ni nuuiniamurin tímiayi “Shuar Winia nemartustaj tusa wakerakka ni wakeramurin iniais ni krusi yanaki Winia nemartusti.

25 Shuar áyatik pénger pujustaj tákunka nu shuar uwemtsuk jakattawai. Antsu jákatniuitkuisha pénger pujustinian enentáimtsuna nú shuar nekas iwiaakman wainkiattawai.

26 Wats, shuar ashí jú nunkanam írunna nuna sumakka tura nujai ni wakaní émesek ¿itiurak péñker pujustin? Shuara wakaní emesramu ¿ashí jú nunkanam írunna nujai iwíaramniakait?

27 Wi Aents Ajasu asan, winia Aparu kakarmaríjiaí tura ni suntaríjiaí tana ashí shuáran ni takasmajai métek akiktatjai.

28 Paant tájarme, shuar juí wajainia ju játsuk Wi akupin ajasmatai wáitkiartatui” tímiayi.

17

Jesus nushá iira ajasmiania nu

(Márkus 9.2-13; Rúkas 9.28-36)

1 Nuyá sais (6) tsawant nankaamasar Pítruncha, Jakupuncha, tura ni yachi Juannasha níniak júkiar Jesus náinnium yakí wakamiayi.

2 Nuí Jesus nusháa iira ajattsarmiayi. Ni yapisha etsaya áinis wincha ajasmiai. Ni pushirísha ti puju jítsumir ajasmiai.

3 Nuísha Muisaisnasha Eríasnasha Jesusjai chichainian wáinkiarmai.

4 Nuyá Pítur Jesusan tímiayi “Uunta, ti shiir pujaji juí. Wakerakminkia menaint áakmaktai, Áminiu chikichik tura chíkich Muisaisnasha, tura chikichcha Eríasna.”

5 Tura Pítur tu auju wajaí yurañkim ti puju amuamiayi. Tura nu yurañminmaya chichaman antukarmiayi. “Juka winia aneamu Uchiruiti, tímiayi. Nin ti shiir enentáimtajai. Nii péñker anturkatarum” tímiayi. Tu chichasmiayi Yus.

6 Nuna ni unuiniamurí antukar ti ashamkar pákea ajakiarmiayi.

7 Túrunawarmatai Jesus táriar antiñ “Ashamkairap, nantaktiarum” tiarmiayi.

8 Tura pan kainiar íimiaj tukamá aya Jesusan wáinkiarmai.

9 Nuyá náinniumia akainiak Jesus tiarmiayi “Átum ísurmena nu penké etserkairap. Wi Aents Ajasu asan jakamunmaya nantaatsain etserkairap’ tímiayi.

10 Nuyá ni unuiniamurí Jesusan aniiniak “¿Urukamtai in jintintramin “Kristu táatsain Erías emka tátiniaiti” tuinia?” tiarmiayi.

11 Tuíniakui Jesus áikmai “Nekas Erías tátiniaiti. Tura nii mash iwiarat-tawai.

12 Kame nekas Erías táwiti tura nin nekaacharmai. Antsu aents wakeri-armia nuna túrawar yajauch awajsarmiayi. Núnisan Winiasha, Aents Ajasu ain, wáitkiarsartatui.”

13 Nuna takui ni unuiniamurí imiakratin Juánkan áujmatui, tu enentáimprarmiayi.

Jesus iwianchin jiki akupkamiania nu

(Márkus 9.14-29; Rúkas 9.37-43)

14 Ataksha aents matsatmanum jeawarmatai shuar Jesusan tarí tikishma-tramiayi.

15 Tura tímiayi “Uuntá, winia uchir waitnentrutrata. Wainchi tukum ti wáitniuiti. Jiniumsha patamniuiti. Entsasha iniainaiti.

16 Ame unuiniamurmincha itiarjai túrasha tujinkiarai.”

17 Takui Jesus ashí tímiayi “Maa, Yus penké enentáimtichuitrume. Imiá úmichuitrume. ¿Wi atumin katsuntu ajatniukaitjarum? Wats, uchi itiartiarum’ tímiayi.

18 Itiarim Jesus yajauch wakanin jiki akupkamiayi uchí ayashínia. Túramtai nu chichamaik péñker ajasmiai.

¹⁹ Nuyá urum ni unuiniamurij Jesúsaj níŋki pujusar áujmatainiak “¿Urukam-tai yajauch wakan jíiktin iikia tujinkiamaj?” tiarmiayi.

²⁰ Tuíniakui Jesús tiarmiayi “Yus nekas enentáimtachu asarum tujinkiarne. Túmaitiat nekasaiti mustasa jínkiái timiá uchichitiat ti uunt tsakaatsuk. Núnisan Yus ishichkisha enentáimtakrumka nu naint ékemkata tutai nu naint túrunattawai. Penké tujinkiashtatrumka Yus nekas enentáimtakrumka.

²¹ Kame nu yajauch wakan jíiki akupkatniuka ijiarmam Yus áujsatniuiti.”

Ataksha Jesus ni játniun ujakmiania nu

(Márkus 9.30-32; Rúkas 9.43-45)

²² Jesús ni unuiniamurijiaí Kariréa nunkanam wekas juna ujakarmiayi. “Wi Aents Ajasu asan, aentsnum surunkattajai tura mantamnattajai.

²³ Túrutawarmatai menaintiú tsawantai nantaktiatjai.” Tura ni unuiniamurij nuna antukar ti kúntuts enentáimprarmiayi.

Jesus ankantaitiat akiktinia nuna akikmakmiania nu

²⁴ Jesús ni unuiniamurijiaí Kapernáum péprunam jeawarmiayi. Tura kuítian achin Pítrun tariar aniasarmiayi “¿Atumi uuntri Israer-patrin akiktinia nuna akínkiait?”

²⁵ Tutai Pítiur “Ee” tímiayi.

Tura Pítiur jeá wayá chichaatsain Jesús emka tímiayi “Chíkich nunkanmaya akupin ¿yana kuítrijiaín takainia. Ni shuáriniunkek atantainia. Antsu yajaya shuárnan atantainiatsuk. Nekaschak, Semunká?”

²⁶ Tutai Pítiur “Nekas yajaya shuárnan atantainiawai” tímiayi.

Jesús tímiayi “Nuikia ni shuari ankant áiniawai. Iisha núnisrik nu akiktin ankantaitji.

²⁷ Túrasha itiurchat enentáimpraraín tusar akiktai. Ame tsau jukim entsá wetá. Túram emka namak japikim iwiankam nuí kuit wáinkiatame. Nu jukim Wíniasha áminiusha akikmakta.”

18

“¿Ya imiá nankaamantuit?” tunaiyarmiania nu

(Márkus 9.33-37; Rúkas 9.46-48)

¹ Nu tsawantai ni unuiniamurij tariar Jesusan aniasarmiayi “Yus akupea-munam pachiinia nu ¿ya imiá nankaamantu áminiait?”

² Nuna tuíniakui Jesús uchin untsuk ajapen awajtusar

³ tímiayi “Tí nekasán tájarme, atumí enentáimtai ri yapajiarum uchia áinis ajachkurmeka Yus akupea-munam pachiinkia chminiaitrumka.

⁴ Nu asantai ju uchia áinis péejchach enentáimtumana nuka Yus akupeana nuí nekas nankaamantu ajasminiaiti.

⁵ Nú arantcha Winia anentuk uchin itiaana nú shuar Winiasha itiaareawai’ tímiayi.

Tsumainti yajauch túrumtikiatin

(Márkus 9.42-48; Rúkas 17.1-2)

⁶ ‘Shuar ju uchin Winia umirtana nuna tunaanum ajuarmatainkia nuna túratsain níisha kuntujén kayajai jínkiar nayaantsanam ajapen kunanam ajunmaitkiunka maak ainti, tímiayi.

⁷ Ju nunkanam tunáa iniaatai írunuk tuke itiurchataiti. Antsu shuar chikichan tunaanum ajuarka ti itiurchatan inkiuntatui’ tímiayi.

⁸ ‘Nu asantai ame uwejem tura nawem tunaanum ajunmatniuitkiuinikia tsupikiam ajapata. Kame muntuch pujustin tura ukunam nayaimpiniam wétin péñkeraiti. Antsu kajinkiashtin jinium takamtsuk jeatniuka imiá yajauchiiti.

⁹ Núnisan ame jimi tunaanum ajunmatniuitkiunkia ukuinkiam ajapata. Kame chikichik jijiiai pujusam nayaimpiniam wétin péñkeraiti. Antsu jinium mai jüintiuk wétin imiá yajauchiiti' tímiayi.

Murik menkaaka áujmatsamu

(Rúkas 15.3-7)

¹⁰ 'Uchi ainia nu nakitraitrap. Yusa suntari nin wáinkiatniua nu winia Aparuj tíjuch pujuiniawai.

¹¹ Kame wi Aents Ajasu asan, menkaakarun eaktajtsan táwitjai.'

¹² 'Enentáimpratarum. Shuar sian (100) murikiun takakuitiat chikichik menkakamtai untsurí menkakacharun náinnium matsaak, menkakan eaushtatuak.

¹³ Wáinkiasha untsurí menkakacharua nujai nankaamas waraschattawak.

¹⁴ Núnisan atumi Aparí nayaimpiniam pujana nu, nu uchi chikichikisha menkakacharti tawai' tímiayi.

Yus-shuarti tsankurnairatin

(Rúkas 17.3)

¹⁵ 'Chikich Yus-shuar ámin yajauch túrutmakuunkia nii werim áujtsata. Tura ámechik werim ame yatsumjai chichasta. Anturtamkuunkia ame yátsum yáinkiume.

¹⁶ Tura anturtamchakuunkia nuyá chikichik shuar jimiará shuarsha jukim ataksha weritia. Túram ataksha áujnaisatarum, niisha paant nekaawarat tusam.

¹⁷ Túrasa yatsum tuke ántachkuunkia Yus-shuar iruntainiam iwiainiakta. Túrasa yatsum tuke ántachkuunkia Yus-shuarcha núnisan enentáimtusta nu shuar.'

¹⁸ 'Nekasan tájarme, ju nunkanam suritiam nu nayaimpinmasha suritniaktatui. Tura ju nunkanam tsankateam nu nayaimpinmasha tsankatnaktatui.'

¹⁹ 'Núnisnak tájarme, ju nunkanam pujusrum jimiará Yus-shuarteram métek enentáimprarum winia Apar nayaimpiniam pujana nu seakrumniunkia wak-erarmená nuna suramsattarme.

²⁰ Jimiar menaintiusha Yus-shuar Winia enentáimturuk iruntrarmatai Wisha nu jüiijiiai pujajai" tímiayi Jesus.

²¹ Takui Pítiur werí Jesusan aniasmiayi "Uuntá, winia yatsur yajauch awajtakui çurutma tsankuratniuitiaj. Siátikik tsankuratniuitiaj?"

²² Jesus aiyak "Siátik tátsujme, antsu iniañnatsuk tsankuratniuitme" tímiayi.

Takakmau tsankurachun pachis áujmatsamiania nu

²³ Tuma asa Jesus Yus akupeamunam pachiinkiaru tsankurnairartiniaiti tusa ju métek-taku chichaman áujmatuk tímiayi, "Uunt akupin takarin tumashin akirkarat tusa untsukarmai.

²⁴ Yama náñkamuk tí nukap tumashmakua nuna untsukmai. Akikmakchamnia ti tumashmakuyi.

²⁵ Tura nu takakmau kuitri atsakui uunt akupin "Yajasma áitkiasrum nuartiuk uchirtiuk ashí waririntiuk suruktarum, timiai. Nu kuitjai akirkati" timiai.

²⁶ Tutai nu takakmau uunt akupniun tikishmatar seek timiai "Uunta, waitneasam náñarsatá. Auka, mash akiktatjame."

²⁷ Uunt akupin waitnentar mash tsankur ankant akupkamai.

²⁸ Tura nú chichamaik nú takakmau jinki ni ain inkiunmai. Nú aisha nin ishichik tumashiyi. Tura tsékenki suwenam achik chicharuk timiai "Wari akirkata tumashitmena nu."

²⁹ Tura ni ai nin tikishmatar timiai "Waitneasam náñarsatá. Auka, mash akiktatjame" timiai.

³⁰ Túrasha nakitramai. Antsu tsankurtsuk sepunam enkeamai ashí akírkatí tusa.

³¹ Chíkich takakmau nuna wáinkiar ti kúntuts enentáimtuiniak uunt akupniun ashí etsertukarmai.

³² Nuna antuk uunt akupin untsuk itia timiai “Yajauchiitme. ¿Winia “waitnentrurta” túrutkumin tsankurachmakjam?”

³³ Amesha núnismek ame ajm tsankuratniuitme” timiai.

³⁴ Tinia uunt akupin kajekmai. Tura ashí tumashin akikmatsuk asutniati tusa suntarnum surukmai.”

³⁵ Jesus nuna áujmatas amúak tímiayi “Núnisan winia Apar nayaimpiniam pujana nu atumin túrutmattarme atumi yachi nekas enentáijiai tsankureachkurminkia.”

19

*Jesus nuwá ajapatniun áujmatsamiania nu
(Márkus 10.1-12; Rúkas 16.18)*

¹ Jesus nuna tinia ikiuak Kariréa nunkanmaya wémiayi. Tura Jurtan entsa amain Jutía nunkanam jeamiayi.

² Untsurí aents nemariarmiayi tura jáiniancha péñker awajsamiayi.

³ Nuí Pariséu Jesusan nekapsataj tusar aniasarmiayi “¿Shuar ni nuwen itiurchat akui ajapamniakait?”

⁴ Tutai Jesus tímiayi “¿Átumka Yus-Papí áujkachukaitrum? Yámankamtaik Yuska shuáran áishman kan nuwancha najanamiayi tawai.

⁵ Tuma asamtai áishman ni aparín ni nukurín ikiuki ni nuwejaj tsani chikichik ayashtinia áinis ajasartatui, tu áarmaiti, tímiayi.

⁶ Tuma asa jímiarcha antsu chikichik ayash áiniawai. Tuma asamtai shuar Yus apatkamia nuna, aents akankashtiniaiti’ tímiayi.

⁷ Takui tiarmiayi “Nuikia ¿urukamtaí papí áarar nuwá ajapatniun Muisais tsankatkamia?”

⁸ Tutai Jesus tiarmiayi “Timiá ántichu asakrumin nuwá ajapatniun tsankatkamiayi. Túrasha émkaka núnischauyayi.

⁹ Wi tájarme, shuar ni nuwen chíkichjaj pujuschan ajapeakka tura chikichan nuatkunka tsanirmayi. Chíkich áishmansha nuwá ajapamun nuátkanka nusha tsanirmayi” tímiayi.

¹⁰ Takui ni unuiniamurí tiarmiayi “Nuikia áishman ni nuwé penké ikukchamniaitkiuinikia nuátkachminiaiti.”

¹¹ Jesus tiarmiayi “Nu chichamnaka mash antukchamin áiniawai. Antsu Yus nuna umiktin susamua nuke antukmin áiniawai.

¹² Chíkich chíkich nuatkachmin áiniawai. Chíkich nuátkachmin akiiniawaru áiniawai. Chikichcha aentsjaj nuátkachmin najanaru áiniawai. Chikichcha nuátainiatsui Yus akupeamu takatan takastinian. Juna antuktinian jeáka antukti.”

*Jesus uchin shiir awajsamiania nu
(Márkus 10.13-16; Rúkas 18.15-17)*

¹³ Nuyá Jesusan uchin itiariarmiayi. Nin antin Yúsan áujtusarat tusar wakeriarmiayi. Túruiniakui ni unuiniamurí chicharkarmiayi.

¹⁴ Túruiniakui Jesus tímiayi “Uchi Winí winitin tsankatkatarum. Suritki-airap. Kame ju uchia áintsan péechach áinian nunak Yus akupkamniaiti.”

¹⁵ Tinia uchin miniakas nuyá wémiayi.

*Kuútrintin Jesusjaj chichasmiania nu
(Márkus 10.17-31; Rúkas 18.18-30)*

¹⁶ Shuar natsa Jesusan tarin aniasmiayi “Uuntá, péñkeraitme. Tuma asam turuttia ¿warinia túrakna tuke iwiaaku átataj?” tímiayi.

¹⁷ Tutai Jesus nin enentáimtikrataj tusa tímiayi “¿Urukamtai péñkeraitme túrutam. Shuar péñkerka atsatsuk. Aya Yúskechukait? Wats, tuke iwiaaku pujustaj tákumka akupkamu umírkartá.”

¹⁸ Tutai shuar “¿Tuna nekas umirkatniuitiaj?” tímiayi.

Takui Jesus tímiayi “Mañkartuawaip, tsanirmawaip, kasámkáip, chíkich shuar tsanumpruraip,

¹⁹ ame apa nukusha umírkartá, ame shuárum ame ayashim aneamna nútiksamek aneeta.”

²⁰ Tutai natsa tímiayi “Núnaka úchichik mash umiki tsakaruitjai. Nuyasha ¿warí táatrusa?” tímiayi.

²¹ Takui Jesus tímiayi “Nekas péñker átaj tákumka, weme ame kuítrum kuítrincha ainia nu súsartá. Tura nayaimpiniam kuítrintin ajastatme. Nuyá Winia nemártústá” tímiayi Jesus.

²² Tura natsa nuna antuk kúntuts wémiayi ti kuítrintin asa.

²³ Nuyá Jesus ni unuiniamurín tiarmiayi “Nekasan tájarne, kuítrintin Yus akupeamunam pachiinkiatin ti itiurchataiti.

²⁴ Ataksha tájarne, kamiriuka kawái nankaamas uunt asa auja jín wayachminiaiti. Núnisan kuítrintin Yus akupeamunam pachiinkiatin ti itiurchataiti.”

²⁵ Ni unuiniamurí nuna antukar antúu ajarmiayi. Túrawar aniniainiarmiayi “¿Nuikia yaki uwempramniait?”

²⁶ Tuíniakui Jesus ashí ísar tímiayi “Aents uwempratniun nekas tujintiainiawai antsu Yuska ashí tujintiatsui.”

²⁷ Nuyá Pítiur tímiayi “Uuntá, iikia ashí ikiukchajik Ámin nemarsatai tusar. ¿Warín wáinkiattají iisha?”

²⁸ Jesus tímiayi “Nekasan tájame, ukunmañka ju nuñka yamaram ajastatui. Aents Ajasu asan, Wisha nuj, uunt akupin ajastatjai tura atumsha winia nemartusutirmeka Wijíají métek akupin ajastatrume ashí Israer-shuar akupkatin.

²⁹ Tura shuar ni jeencha, yachincha, umaincha, aparíncha, nukuríncha, nuaríncha, uchiríncha, tura nuñkencha Winia anentu asa ikiukin wekaakka, nu shuar nii ikiukmia núnisan yamaisha ti untsurí wáinkiattawai tura ukunmasha tuke shiir pujustatui Yusjái.

³⁰ Untsurí yamáí penkerí áiniana nu ukunam ukunmaani pujusartatui, tura yapajíáwar yamáí ukunmayá áiniana nu ukunam emka pujusartatui’ tímiayi Jesus.

20

Jesus takarniun pachis áujmatsamiania nu

¹ Yus akupeamunam pachiinkiatin júnisaiti. Nuñka nérentin ni araamurín júuktaj tusa káshik iniartaj tusa jíinkimiayi.

² Chikichík tenariu kuit jean tsawant takamtsuk akiktajrume tusa chichas ni araamun júuktinian akupkarmiayi.

³ Nantu takuntaísha ataksha jíinki shuar yujan wáiniak

⁴ timiai “Atumsha winia arakur júuktin yáintkiatarum. Shiir akiktajrume.” Tutai wearmai.

⁵ Ataksha tutupin aí nuyá áanókúsha jíinki, núnisan tinia akupkarmai.

⁶ Ataksha nantu patamsaj jíinkimiai. Tura shuaran yujan wáiniak “¿Urukamtai takakmatskesha áani pujarum?” timiai.’

⁷ “Warí, iincha iniatmainiatsji” tiarmai.’

“Tuíniakui timiai “Atumsha winia nunkaruj takautarum. Péñker akikta-jrume.”

⁸ ‘Kirit ajátekiái takatrín wáinniun timiai “Takatan takasaru untsukam akikiarta. Kíaraj nan̄kamawaru emka akikiarta. Túram káshik nan̄kamawarujai amuktá” timiai.

⁹ Takui nantu patamsa aḡ nan̄kamawaru wayawarmatai chikichík tenariu kuit jean ashí akikiarmai.

¹⁰ Mash umintramtai nuyá emka nan̄kamawaru wayawar “nuna nan̄kaamas achikchatjiash” tu enentáimsarmai. Tura chikichík tenariu kuit jean achikiarmai.

¹¹ Achikiar nérenniun itiurchat enentáimturarmai.

¹² Tura tiarmai “Iikia ashí tsawant nantujai wáitsachjik. Ju shuarsha nantu patamsa aḡ nan̄kamawaruka pen̄ké ishichik takasaraí. Túrasha iijjai métek akikiarume” tiarmai.

¹³ Tutai nérentin chikichkiniak iniakmas timiai “Umpá, pen̄ké kasartsujme. Káshik chikichík tenariu kuit jeá chichasar iijjai iwiarachjik, timiai.

¹⁴ Pai, ame kuítrum achikume. Nantu patamsaj takasuncha amijjai métek akiktinian wakerajai.

¹⁵ Warí, winia kuítrujai wi wakeramun túrachminkaitiaj. Antsu wi tsan̄ka asamtai ¿yajauch enentáimturmek?” timiai.’

¹⁶ ‘Núnisaiti Yus-shuarnum. Émkaru áinia nu uku ártatui. Tura ukuya áiniana nu, emka ártatui. Untsurí ipiaamu áiniawai tura ishichik achikma áiniawai.” Tu áujmatsamiayi Jesus.

*Jesus ataksha ni jákatniurín etserkamiania nu
(Márkus 10.32-34; Rúkas 18.31-34)*

¹⁷ Jesus Jerusaréñnum jintiá wesa ni unuiniamurín akankin tiarmiayi

¹⁸ “Iistarum, Jerusaréñnum wéaji. Nuisha Israer-patri úuntrín tura ni jintin-niuríncha Winia surutkartatui. Nuisha, wi Aents Ajasu aḡn, “mantamnati” túrutuartatui.

¹⁹ Tura apachniun surutkartatui. Nuḡ katsekrukar, awattiar krúsnum máawarti tusar túrutawartatui. Túrasha jakayatan menaintiú tsawantaj nan-taktiatjai” tímiayi.

*Jakupu tura Juañka nukurí Jesusan seamiayi
(Márkus 10.35-45)*

²⁰ Nuyá Jakupusha Juañsha, mai Sepetéu uchirí, nukuríjjai tariar Jesusan tikishmatrarmiayi. Tura nukurí Jesusan waitnentrutarat tusa seamiayi.

²¹ “¿Warí wakeram?” tímiayi Jesus.

Tutai nuwá tímiayi “Ame uunt akupin ajastatmena nuḡ winia uchir chikichik untsurnumaani chikichcha menaanmaani akupkarti tusam apujsarta.”

²² Takui Jesus tiarmiayi “Atum seatrumna nu nékatsrume. ¿Wi wáitsattajna nuḡ métek túramniakaitrum? Wi wáitsatniun yapá umartinia áinis umartiniaitjai. Núnisan wáitsatniujai imiaitniua áintsan imiantiniaitjai. ¿Nú pininnumiá umarminkiaitrum. Núnisan imianminkiaitrum?”

Tutai “Páchitskea” tiarmiayi.

²³ Tuíniakui Jesus tímiayi “Ayu. Winia pinin̄kruiyá umartatrume. Wi imiantiatjana nuḡ imiantiatrume. Antsu Wijjai tsaniñkia pujustinniaka Wikia íschatniuitjai, antsu winia Apar iwíarturu áinia nuna nuḡ apujsattawai” tímiayi.

²⁴ Chíkich tias (10) unuiniamurí nuna antukar nu jímiaran kajerkarmiayi.

²⁵ Túmainiakui Jesus untsukar tiarmiayi “Jü nékarme, apachniumka kapi-tián ajasar ni shuarin nérenniua áinis ti akupenawai. Ni úntrisha waantu enentáimsar “wíitjai akupniun” tu enentáimtikianiawai.

²⁶ Antsu atumjainkia núnis áchatniuiti. Nankaamaku ajastaj tákunka chikicha yaintri átiniaiti.

²⁷ Ame kapitiantrum ajastaj tákunka ashí shuara yaintri ajástí.

²⁸ Wisha Aents Ajasuitiatan, Winia yáintkiarat tusan táchaitjai antsu shuáran yáintaj tusan táwitjai. Untsurí shuaran tunáa tumashrin akikmatkataj tusan jákatniuitjai. Nuna tarimjai” tímiayi Jesus.

*Jímiar jii kusurun Jesus tsuármiania nu
(Márkus 10.46-52; Rúkas 18.35-43)*

²⁹ Jirikiú péprunmayá wénakui untsurí aents Nin nemariarmiayi.

³⁰ Nuí jintiá yantam jímiar jii kusuru pujuarmiayi. Jesus wéawai taman antukar kakantar untsukarmiayi. “Uuntá, uunt akupin Tawitia Uchirin chukaitiam. Waitnentrurta” tiarmiayi.

³¹ Tuíniakui “Takamatsatarum” tiarmiayi.

Tútaisha nú nankaamas untsukarmiayi. “Uuntá, Tawitia Uchiriá, waitnentrurta” tiarmiayi.

³² Tuíniakui Jesus wajas jii kusurun untsukar aniasarmiayi “¿Warí itiurtukat tusarum wakerutarum?”

³³ “Uuntá, iimtiaí tusar wakeraji” tiarmiayi.

³⁴ Tuíniakui Jesus nin waitnentrar ni jii antin kiarmiayi. Nu chichamaik íimiar niisha Jesusan nemariarmiayi.

21

*Jesus Jerusarénnum wayamiania nu
(Márkus 11.1-11; Rúkas 19.28-40; Juan 12.12-19)*

¹ Jerusarénnum nuntumsar Petpajái péprunam jeawarmiayi. Nusha Uriwiu náinnium ayamchiyayi. Nuí jeawar Jesus ni unuiniamurin jímiar an akupeak tímiayi

² “Tíjuch péprunam wérum umpuuru umpuuruchijiai jinkiamu wáinkiatarme. Nu atiarum itartitiarum.

³ Tura aents “Urukamtaí áitkiarum” túramkurminkia “Uunt wakerawai, tura wárik awainkittiawai” titiarum” tímiayi.

⁴ Tura nusha yaunchu Yúsnan etserin aarmia nu umínkiatí tusa tímiayi. Júnis áarmiayi:

⁵ “Ashí Israer-shuarnum jü etserkatarum:

“Iistarum, atumi Akupniuri, péejchach ajas umpuuruchiniam ekeemak winitramprume. Péejchach asa káarak áintstai umpuuru uchirin ekeemak winitrámtatrume,” titiarum.” Tu áarmaiti.

⁶ Tutai nu jímiar unuiniamuri wear Jesus timia núnisan túrawarmiayi.

⁷ Umpuuruchin nukurtiuk itiararmiayi. Tura ni pushirin áitkiaram Jesus entsamkamiayi.

⁸ Shuar untsurí ásar ni wéamunam pushirin áitkiarmiayi. Chikichcha nuká jurukar ni wéamunam áeprurarmiayi.

⁹ Shuar untsurí eem wearmia nusha tura uku winiarmia nusha kakantar untsumiarmiayi. “Juna weatri uunt akupin Tawit asamtaí nankaamakuiti. Yusa náarijn winiana jü ii Untrinti. Shiir atí. Nayaimpinmasha Yus shiir awajsatai.” Tu untsumiarmiayi.

¹⁰ Jesus Jerusarénnum wayamntai ashí shuar ti enentáimainiak “¿Jusha yait?” tiarmiayi.

11 Chikichcha “Yúsnan etserin Jesusaiti, tiarmiayi. Nasarét pepru Kariréa nunkanmayaiti” tiarmiayi.

Yusa Uunt Jeen suruktinian Jesus surimkiamiania nu
(Márkus 11.15-19; Rúkas 19.45-48; Juan 2.13-22)

12 Nuyá Jesus Yusa Uunt Jeen wayá kuítian súruiniak tura súmainiak pujan akúprámiayi. Kuítian yapajinia misaríncha ayanturmiayi tura yampitsa súruinia kutankríncha núnisan ayanturmiayi.

13 Nuyá tímiayi “Yus-Papinium áarchamukait,
“Yusa Jeenka Yus aujtai jéaiti.” Antsu átumka kasa matsamtajya nútikiarme” tímiayi.

14 Nui Yusa Jeen jii kusurarusha shutuapsha Jesusan tariarmiayi. Túramtai tsuáarmiayi.

15 Tura Israer-shuar pátrisha tura Israer-shuara jintinniurisha aents tujintiamun Jesus túrakui ísar kajerarmiayi. Nu arantcha uchi Yusa Jeen “Juna weatři uunt akupin Tawit asamtai nankaamakuiti” unsumainiakui Jesusan ti kajerarmiayi.

16 Tura tiarmiayi “¿Ju uchi tuinia nu ántamek?”

Tutai Jesus “Ee, ántajai, tímiayi. Átumka Yus-Papí juna tana juka áujshukaitrum. Júnis tawai,
“Uchisha kuírchisha Yusa náarín imiá shiir awajtusarat tusa Yus tsankatkaiti.”
Tu áarmaiti.

17 Nuna tinia ikiuiniak Jerusarénumia jiiinki Petania péprunam we nui kanarmiayi.

Jesus iikiu numin yuminkramiayi
(Márkus 11.12-14, 20-26)

18 Kashin tsawaar Jerusarénum waketas Jesus tsukaarmiayi.

19 Iikiu numi jintiá yantam wajan wáiniak akaktajtsa werimiayi. Tura werí aya núminiak wáinkiamiayi. Túra numin tímiayi “Atakka nerechattame.” Takui nu chichamaik káarmiayi.

20 Nuna wáiniak ni unuiniamurí ti enentáimprar aniasarmiayi “¿Urukaku imiá wárik jaka?”

21 Tuíniakui Jesus tiarmiayi “Nekasan tájarme, Yus nekas enentáimtakrumka, “nekaspash túrat” táchakrum iikiun túrajna nusha túramniaitrum. Tura nu arantcha nu naint “Ékemtam nayaantsanam iniañta” tutai túrunattawai.

22 Ashí Yus áujeakum seamna nu, Yus nekas enentáimtakum seakmeka, wáinkiáttame” tímiayi.

Yusa kakarmarijiai Jesus takasmiania nu
(Márkus 11.27-33; Rúkas 20.1-8)

23 Yusa Uunt Jeen Jesus wayá unuiniamiayi. Turai Israer-patri uuntri tura Israer-shuara úuntriha Jesusan tariar aniasarmiayi “¿Yana chichamejai ju túram. Ya ju túratniuncha akuptamkait?” tiarmiayi.

24 Tutai Jesus tiarmiayi “Wisha aniastaj tusan wakerajrume. Ju áirkakrumniñkia Wisha yana chichamejai túraj nuna ujaktatjarme.

25 Wats, ¿ya imiakratin Juan kan akupkamia. Yusak, aentsuk, ya akupkamia?”

Tutai nuámtak tunainiarmiayi. “Yus akupkamiayi” tákurniñkia “¿urukamtai enentáimtichuitrum?” túramtatji.

26 Kame “shuar akupkaiti” tákurnisha ashí aents mantamattaji. Warí, ashí niisha Juan Yúsnan etserniuyi tuíniatsuk” tiarmiayi.

27 Nuyá Jesusan “Nékatsji” tiarmiayi.

Tutai Jesussha a_íniak “Wátsek, Wisha núnisnak akuptukua nuna ujakchat-tajrume” tímiayi.

Jimiará uchi tiarmia nuna áujmatsamiania nu

²⁸ Jesus unuiniak tiarmiayi “Enentáimpratarum. Shuar uchin jímiaran takakuuyi. Nuna chikichkin chicharuk timiai “Uchirú, arakur júuktin yamáí wetá.”

²⁹ “Tutai uchi “Atsá, nakitiajai” timiai. Tayat urum enentáimiar takaumai.’

³⁰ ‘Nuyá aparí chikichnasha werí núnisañ timiai.’

‘Tutai uchi “Apawa, páchitsuk wetajai” timiai, túrasha wéchamai.’

³¹ ‘¿Túa ni aparí wakeramun umirkama?’ tímiayi Jesus.

Tutai “Emkaa nu” tiarmiayi.

Tu_íniakui Jesus tímiayi “Nekasan tájarme, yajauch shuar ainia nu tura tsanirma ainia nusha átumka pachiiintsrumniñ nii emka Yus akupeamunam pachiiinkiertatui.

³² Iis, imiakratin Juan péñker wekasatniun etserkamiayi, túrasha antukchamarne. Antsu yajauch shuar ainia nu tura tsanirma ainia nu umirkarmiayi. Nusha wáinkiaitiatrum atumi tunaari enentáimturchamarne’ tímiayi.

Yajauch takaun áujmatsamiania nu

(Márkus 12.1-12; Rúkas 20.9-19)

³³ ‘Ju chikich áujmatmasha antuktatum. Nunká nérentin uwa ajan ajammai. Tura wenuimiai. Uwa neketaincha najanamai. Kumpin jeancha najanamai. Tura mash péñker iwiar shuar wáitrukarti tusa apujkimiai. Tura nin_ñkia yajá nunkanam wemai.

³⁴ Tura júuktin tsawant jeamtai juuk nakak akúptúrkartí tusa chikich takarniuri akupkamai.

³⁵ Tura nu_í pujuinia nu, akupkamun achikiar chikichnaka katsumkar, chikichnasha máawar, chikichnasha kayajai tukurar máawarmai.

³⁶ Túrawarmatai nérentin takarniun nuna nan_ñkaamas akupramai. Ataksha nu_í pujuarmia nu núnisañ túrawarmai.

³⁷ Amúamunam ni uchir_ín akupeak “Winia uchir asamtai umirkachartimpiash” timiai.

³⁸ Túrasha nu takau nérenniu uchir_ín wáinkiar “Nuna aparí jakamtai juna mashi júkishtatuak, tiarmai. Maatai, túrar ii nérentin ajastai” tiarmai.

³⁹ Tiar achikiar arant júkiar nu_í máawarmai.”

⁴⁰ Tinia Jesus aniasarmiayi “Nun_ñká nérenniuri taa nu takaun ¿itiurkatiñ?” tímiayi.

⁴¹ Tutai tiarmiayi “Nu shuar ti yajauch ásarmatai waitnentsuk máawartatui. Tura nu ajan chikich takaun neren akanak nin susamnia nuna apujsattawai” tiarmiayi.

⁴² Tu_íniakui Jesus tímiayi “Átumka Yus-Papikia ¿pen_ñkek áujchaitrum? Júnis áarmaiti:

“Jeá jeamin utsan_ñkarmia nú kaya ashí kayajai nan_ñkaamas apujsamuiti. Núnaka ii Uuntri Yus túrait. Iisha ísar ti enentáimtaji.” Tu áarmaiti.

⁴³ Tuma asamtai tájarme, Yusna írunna nu wáinkiatárum tusa suramsamuitiat atumíya junas chikich aents súnastatui. Niisha awan_ñtukiartatui.

⁴⁴ Tura shuar nu kayan tukumainia nuka kupintrartatui. Tura nu kaya shuarnum iniarka tsai tsai awajsattawai auka” tímiayi Jesus.

⁴⁵ Israer-patri uuntrisha Pariséusha Jesus áujmatman antukar “in túramji” tusar achiktaj tiarmiayi.

⁴⁶ Tura ashí aents “Jesus Yúsnan étserui” tuinia ásarmatai nin ashamkarmi-ayi.

22

Métek-taku chichamjái nuatnaiyamun Jesus áujmatsamiania nu

¹ Jesus ataksha áujmatuk juna tímiayi:

² “Yus akupeamunam pachiinkiertin júnis enentáimpramniaiti. Uunt akupin ni uchirí nuáteakui nampermamai.

³ Túrak ni takarniurín ipiaamautarum tusa akupkarmai. Tura ipiaamusha nakitrarmai.

⁴ Ataksha chíkich takarniuncha ipiaamakrum ju titiarum tusa akupkar-mai. ““Mash yurumkan iwiarajai, tawai, titiarum, timiai. “Waakasha máatarum tusan akupkarjai, tawai. Ajaermancha máatarum tusan akupkajai, tawai. Ashí nuatnaiyamunam winiarti,” tawai” titiarum” timiai.

⁵ Támaiatiat nú ipiaamusha nakitrarmai. Chikichik ni nunken wemai. Chikichcha kuítian suruktinian wemai.

⁶ Chikichcha ipiaakratniun achikiar yajauch awajsarmai, tura chikich-naka máawarmai.

⁷ Túramtai uunt akupin ti kajek, ni suntari mash máatarum túrarum ni jee mash ekeemáktárum tusa akupkarmai.

⁸ Nuyá ataksha ni takarniurín akupkamai. “Nuatnaikiatin jísat mash iwiamuiti, timiai. Tura nu ipiaamu winichmin armai.

⁹ Tuma asamtai pepru jintí werum ashí shuar nánkamas wáintrum nu ipiaatarum” timiai.

¹⁰ Takui takarniurí jínkiar pepru jintin wajainian, yajauch shuarnasha pénger shuarnasha, ashí ipiaawarmai. Túramtai jēā piákmai.’

¹¹ ‘Nuyá uunt akupin ipiaamun ísartaj tusa wayamai. Nuí shuaran pénger iwiamamprachun wáinkiamai.

¹² Tura timiai “Umpá, ¿urukamtai nuatnaiyamunam entsatai pushí entsat-suk wayam?” Tutai nu áishman tákamtak pujusmiayi.

¹³ Nuyá uunt akupin yurumka ajaaman timiai “Achikrum nawenmasha uwejnumsha jin_kiarum aā jík_krum kiritniunam ajapatarum. Nuísha ti úutin ti wáitsatin átatui” timiai.

¹⁴ Kame untsurí ipiaamu áiniawai antsu ishichik achikma áiniawai.”

Uunt akupin Sésar akiktinia nu

(Márkus 12.13-17; Rúkas 20.20-26)

¹⁵ Nuyá Pariséu chichaman najatawar uyumtikiatai tusar tiarmiayi.

¹⁶ Túrawar ni shuarincha tura akupin Erutisa nemarniurísha Jesusan akup-tukarmiayi. Kame akupin Erutis uunt akupin Sésara kuitri wáinin asamtai nu apachniasha akupkarmiayi. Niisha jeariar Jesusan tiarmiayi “Uuntá, amesha nekas chicham chichaame. Nu nékaji. Chíkich shuar tuinia nu ántutsuk nekasam Yus-Chicham jintíame. Shuar shiir enentáimturarar tusam jintíatsme, tiarmiayi.

¹⁷ Tuma asamtai ju nekaatai tusar wakeraji. ¿Uunt akupin Sésar akikminkit-ait?” tiarmiayi.

¹⁸ Jesus ni yajauch enentáijjai aníam nekáa tiarmiayi “Aya shiir chicham-tinaitrume. ¿Urukamtai uyumatkiarkatin wakerutarum? tímiayi.

¹⁹ Wats, Sésar akiktinia nú kuit itiertiarum.” Takui chikichik kuítian itiararmiayi.

²⁰ Nuna iis Jesus aniasarmiayi “¿Juí yana yapimpiait tura yana naari áarmait?”

²¹ Tutai “Uunt Sésarna” tiarmiayi.

Tuiniakui Jesus chicharuk tiarmiayi “Nuikia uunt Sésarna nu, Sésar susatarum. Tura Yusna nusha Yus susatarum” tímiayi.

²² Tura nuna antukar ti enentáimprarmiayi. Tura ikiuiniak wearmiayi.

Jesusan jakamunmaya nantaktinian aniasarmiania nu

(Márkus 12.18-27; Rúkas 20.27-40)

²³ Nu tsawantajk Satuséusha Jesusan tariarmiayi. Satuséuka jakamunmaya nantakchatniuiti tuíniawai. Nuna tiniu ásar juna Jesusjai áujmatsarmiayi.

²⁴ “Uuntá, Muisais juna áartampramiayi, “áishman uchin yajutmatsuk jakamtainkia ni yachí nu nuwan nuatak ni yachin yajútmátrati,” tu áarmiayi, tiarmiayi.

²⁵ Ayu, íi shuarnum siati (7) yáchintin áarmiayi. Iwiajri nuatak uchin yajutmatsuk jakamiayi. Tura wajen ni yachin ikiurkimiayi.

²⁶ Tura niisha nuatak uchin yajutmatsuk jakamiayi. Tura chikichcha núnisan jakamiayi. Tura chikichcha siati armia nu ashí nuatkar jákarmiayi.

²⁷ Nuyá nuwasha jakamiayi.

²⁸ Jakamunmaya nantakiar ¿yaki nekas ni aishri ati? Ashí nin nuatkacharmakia” tiarmiayi.

²⁹ Tuíniakui Jesus tímiayi “Yus-Chichamsha nékachkuram tura Yusa kakar-marisha nékachkuram nantaktin atsawai tákuram ti awajiarne.

³⁰ Nekaatarum. Jakamunmaya nantakiaruka nuatkachartatui. Antsu Yusa suntari nayaimpiniam pujuinia núnisar nuartichu pujusartatui.

³¹ Túrasha jakamunmaya nantakiartatna nu nekaatajtsa wakerakrumka ju enentáimsatarum. Muisais aarma nu áujtsachukaitrum. Júnisan áarmiayi:

³² “Wiitjai Apráama Yúsrinjai, Isaka Yúsrinjai, Jakupu Yúsrinjai.” Tu áarmiayi. Watsek, Yuska jaká Yúsrinchuiti. Antsu iwiaaku ana nuna Yúsrinti, tímiayi. Iis, nu shuar imiá yaunchu jákaruitiat Yusjai iwiaaku pujuiniak nantakmin áiniawai” tímiayi.

³³ Ashí aents nuna antukar nu jintintiam ti enentáimprarmiayi.

Yus akupkamu imiá enentáimtustinia nu

(Márkus 12.28-34)

³⁴ Satuséu Jesusan aiktinian tujinkiar matai Pariséu nuna antukar irun-trarmiayi.

³⁵ Tura chikichik Pariséu jintintin asa Jesusan uyuntikiataj tusa aniasmiayi

³⁶ “Uuntá, ¿túa Yus akupkamu imiá nankaamas enentáimtustiniait?”

³⁷ Tutai Jesus tímiayi “Júiti: “Ame Yúsrum ashí enentáimjai aneeta. Ashí ame wakanmijiaisha tura tuke enentáimtusam aneeta.” Tu áarmaiti, tímiayi.

³⁸ Núiti emka ashí akupkamu nankaamas enentáimtustinia nu.

³⁹ Chikichcha jujai métek-taku awai. Nusha tawai: “Ame írutramuram ame ayashim aneamna nútiksamek aneeta.”

⁴⁰ Nu jímiar akupkamu umirkam ashí Muisais akupkamia nusha tura ashí Yúsnan etserin unuiniararmia nusha umirkattame” tímiayi.

Kristu Tawit weeaitiat Yusa Uchirinti

(Márkus 12.35-37; Rúkas 20.41-44)

⁴¹ Tura Pariséu tuke irunar pujuiniakui

⁴² Jesssha aniasarmiayi “Kristu tutai ¿ya weeá átiniait. Warí enentáimtarum atumsha?”

Takui “Tawit weeá átiniaiti” tiarmiayi.

⁴³ Tuíniakui Jesus tiarmiayi “Nuikia ¿urukamtai Tawit, Yusa Wakaní “titia” tutai, Krístun “winia Úuntur” tímia? Iis, Tawit juna tímiayi:

- 44 “Uunt Yus winia Úuntrun juna tímiayi: “Akupin pujutainium, winia untsu-
uruini, pujusam náarsata. Ashí ame nemasrumin nupetkan Ámin
umirtamkarti tusan amastatjai” tímiayi Yus.” Tu tímiayi Tawit.
- 45 Watsek, Tawit Krístun “winia Úuntur” taisha çitiurak ni pampanmarj áti?”
tímiayi Jesus.
- 46 Nuna takui penkesha ájkcharmiayi. Túrawar atakka uyumantikiatai tusar
aniascharmiayi Jesusan.

23

*Jesus Pariséuncha Israer-shuara jintiniurincha “yajauchitrume” timiania nu
(Márkus 12.38-40; Rúkas 11.37-54; 20.45-47)*

- 1 Jesus ni unuiniamurincha tura ashí shuárnasha tiarmiayi
- 2 “Israer-shuara jintinniurisha tura Pariséusha Muisais akupkamun paant
ujatmainiawai.
- 3 Tuma asamtai tuinia nu umirkatarum. Túrasha ni túruinia nu jumamki-
irap. Nu shuar shiir chichainiayat nusháa túrin áiniawai.
- 4 Ti iturchat ana nuna akupeenak ti emeram entsaktinia áintsan áentsun
apujtuiniawai. Túrasha chikichik uwejejaisha ishichkisha takuitniun nakiti-
ainiawai.
- 5 Aya shuar írsarti tusar ashí túruiniawai. Ashí shuar péñker enentáimturarti
tusar Yus-Papin nijiajncha tura kunturjncha ti wan̄karam awajsar anu-
jak yujainiawai. Tura nu arantcha pushirj sasariarman ashí shuarjaj
nan̄kaamas esaram awajas wekainiawai.
- 6 Nampernumsha péñker iwiamunam pujustinian wakeruiniawai.
Iruntainmasha nan̄kaamantu ajasa pujustinian wakeruiniawai.
- 7 Jintiá wekainiaksha ashí aents áujtuiniak “Jintínkiartiniá” turutiarti tusa
wakeruiniawai’ tímiayi.
- 8 ‘Túrasha átumka ashí shuar “Jintínkiartiniá” turutiarti tusa
enentáimsashtiniaitrume. Átumka nuámtak yáchintrume. Átumka chikichik
jintinkiertin ni naarj Kristu takakrume. Nu asamtai “Jintínkiartiniá”
túramcharmin áiniawai.
- 9 Ju nun̄kanmasha shuar “Aparú” tiirap. Chikichik nayaimpiniam pujana
nu atumí Aparínti.
- 10 Atumi uuntrj aya Krístuk asamtai “Uuntrú” túramcharmin áiniawai.
- 11 Antsu átum írutkamunmayá uunta nuka peejchach átiniaiti.
- 12 Shuar nan̄kaamantu ajastaj tákuñkia Yus nin péjchach awajsattawai.
Antsu péjchach ana nuna Yus nin nan̄kaamaku awajsattawai’ tímiayi.
- 13 ‘Maa wáinkiatárum jintinniutirmesha, Pariséutirmesha. Ántrarum shiir
chichamtiniaitrume. Yus akupeamunam wayatin waiti epenniuitrume.
Atumsha wayatsuk chikichcha wayataj tuinia nusha suritniuitrume.’
- 14 ‘Maa wáinkiatárum jintinniutirmesha, Pariséutirmesha. Ántrarum shiir
chichamtiniaitrume. Wajé jee atankiirum aents enentáimturarajjn tusarum
ti esaram Yus áujtiniaitrume. Túrin asarum átum ti asutniátniuitrume.’
- 15 ‘Maa wáinkiatárum jintinniutirmesha, Pariséutirmesha. Ántrarum
shiir chichamtiniaitrume. Nun̄kanmasha nayaantsanmasha yajá
wekainiuitrume chikichik shuar winí nemartusat tusarum. Tura atumi
nemari ajasmatai atumjaj nan̄kaamas tunáa sumamamnia awajearme.’
- 16 ‘Wáinkiatárum átumka. Jintinkiertiniaiatrum nékachu asarum kusurua
áiniuitrume. Ju jintíarme: “Shuar nekasan tajai tusa Yusa Jeeñ páchiakka nii
tana nuna umitsuk ikiukminiaiti. Antsu nekasan tajai tusa Yusa Jeeñ kuri
ana nuna páchiakka ti nekas umiktiniaiti” tñiuitrume.

¹⁷ Nétsetrume. Yúsjaínkia ashí kuri ánrachukait. Antsu Yusa Jēen írunna nuka aya nuñ ikiusma asa Yusna ajasuiti. Tuma asamtai kurijjai nankaamas Yusa Jēe enentáimtustiniaiti. Enentáimcha asarum kusurua áinin wáakuitrume.

¹⁸ Nu arantcha tíniuitrume: “Shuar nekasan tajai tusa naman-maar-Yus-sútain páchiakka nii tana nuna umitsuk ikiukminiaiti. Antsu Yús-sutainiam naman patasman páchiakka ti nekas umiktiniaiti” tíniuitrume.

¹⁹ Nétsetrume. Penké naman Yusjai ánrachukait. Aya Yús-sutainiam patasma asa nu naman enentáimtuschatniukait. Enentáimcha asarum kusurua áinin wáakuitrume.

²⁰ Enentáimpratarum. Shuar nekasan tajai tusa Yús-sutain páchiakka aya sútainiak páchiatsui antsu sutaincha tura nuñ patasmancha máí-metek páchiawai.

²¹ Núnisan shuar Yusa Jēen páchiakka aya nunak páchiatsui antsu Yus nu jeanam pujú asamtai nunasha páchiawai.

²² Núnisan shuar nayaimpin páchiakka Yus pujutainchsetrume. Penké naman Yusjai ánrachukait. Aya Yúa tura Yus nuñ pujana nunasha páchiawai.’

²³ ‘Maa wáinkiatarum jintinniutirmesha, Pariséutirmesha. Ántrarum shiir chichamtiniaitrume. Kumintsu nukesh, anisa nukesh, menta nukesh tias (10) akantram chikichik akankamu Yus súwitrume. Nuka péñkeraiti, ikiukchatniuiti. Túramaitiat nekas péñker túratniua nu túrutsuk ikiuwitrume. Yus nekas enentáimtustincha, waitnentáimturincha tura tuke péñker túratniusha enentáimtsuk ikiuwitrume.

²⁴ Átumka jintinkiertiniaitiatrum nékachu asarum kusuru áiniuitrume. Kutanam yajasmach enketu wáinkiumeka júwitrume. Túrayatrum kamiriu wáinkiumeka kawai nankaamas úunt aiñ takamtsuk kújawitrume.’

²⁵ ‘Maa wáinkiatarum jintinniutirmesha, Pariséutirmesha. Ántrarum shiir chichamtiniaitrume. Átumka tsapasha pininsha initiaani nijiatsuk aya pátatek nijiawitrume. Núnisrum pátatek shiir awajmamniuitrume tura enentáiminkia kasamkatniusha tura chíkichna wakeruktincha nujai piákuitrume.

²⁶ Kusuru áiniuitrume, Pariséutirmeá. Antsu emka initiaani tsapasha pininsha nijiaktarum. Túrakrumninkia pátatesha mai péñker átatui. Núnisrum atumsha atumi enentáin ana nu shiir awajsarum pátatesha shiir átatrume.’

²⁷ ‘Maa wáinkiatarum jintinniutirmesha, Pariséutirmesha. Ántrarum shiir chichamtiniaitrume. Iwiarsamu pújujai yakarar shiir awajsamua áiniuitrume. Aani shiir áiniawai. Tura initkia jaká ukunchijjai piákuiti.

²⁸ Núnisaitrume atumsha. Chíkich shuar ísmaka ti shiira áiniuitrume. Túrasa atumi enentáinkia ashí mujmiai piákuiti.’

²⁹ ‘Maa wáinkiatarum jintinniutirmesha, Pariséutirmesha. Ántrarum shiir chichamtiniaitrume. Yaunchu Yúsnan etserin iwiarsamunam átumka shiir enentáimtakrum jea jeamkairume. Tura péñker shuar yaunchu jákarusha shiir enentáimturtañ tusarum ni iwiarsamu shiir awajearme.

³⁰ Túrakrum ju tíniuitrume: “Íkia yaunchu ii weatrijai pujaitkiurkia Yúsnan etserin máatin yáimkiachaaji.”

³¹ Nujai ti paant chicharme atumsha. “Ti weatri Yúsnan etserniun máawar tunáa túrin ármiai” tárume. Tura “Yáimkiachaaji” táyatrum, atumsha métek túrin asarum “Nijjai méteketji” tárume.

³² Wats, atumi weatri nankamawarmia nu átum amuktatrume’ tímiayi Jesus.

³³ ‘Napia áiniuitrume. Shuar aya yajauch awajniuitrume. Túmatirmesha Yus tunáa shuaran jinium akupkartatna nuyá çitiurak uwempratarum?’

³⁴ Untsurí shuaran akuptuktatjarme. Yúsnan etserniuncha, ti nekancha, jintinkiertinniasha akuptuktatjarme. Tura atumsha chíkich máattarme, chikichcha krúsnum ajintruarum máattarme, chikichcha iruntai jeanam asutiáttarme, tura chikichcha ashí nunkanam áintrattarme.

³⁵ Nu tura asarum péñker shuara numpé puarma nujai átum sumamattarme. Yámankamtaik Apir ti peñker shuáraitiat máamuyayi. Tura ukunam Perekíasa uchirí Sakarías atumi uuntri Yusa Jee ámanum naman-maar-Yúsutai ajapén aténkamunam máawarmiayi. Wats, Apir máamunmaya Sakarías máamunam ashí péñker shuar ti untsurí máamujai sumamattarme.

³⁶ Nekasan tájarme, yamáí pujuinia nú shuar ashí nujai sumamawartatui' tímiayi Jesus.

Jerusarénnumia shuaran Jesus aneak úutmiania nu
(Rúkas 13.34-35)

³⁷ 'Jerusarénnumiatirmeá, Yúsnan etserin máiniaitrume. Yus akatar akupturmakmasha kayajai tukuram máiniaitrume. Túrin árumniñ waitnentajrume. Atash ni uchirín weaana áitkiasnak weartinian wakerimjarme, tura nakitramarme.

³⁸ Iistarum. Ame pépruram ajapamuiti.

³⁹ Tura "Yusa náariñ winiana nu, shiir atí" títiatrumna nu tsawant jeatsain peñké wáitkiashtatrum. Nuna tájarme" tímiayi Jesus.

24

Yusa Uunt Jee saanaktinian Jesus ujakmiania nu
(Márkus 13.1-2; Rúkas 21.5-6)

¹ Jesus Yusa Uunt Jeeñia jiinki weaj ni unuiniamurí nin tariar Jeñan iniaktusar áujmatsarmiayi.

² Tura Jesus tiarmiayi "Nu mash yamáí wáintrume. Tura nekasan tájarme ukunmanka mash saanaktiatui. Chikichík kayaksha ekentramurí atsutawai" tímiayi.

Amúamu tsawant nekaatin
(Márkus 13.3-23; Rúkas 21.7-24; 12.22-24)

³ Nuyá Uriwiu náinnium wear niñki nuñ pujusar ni unuiniamurí Jesusan aniasarmiayi "¿Nusha urutaik túrunatí. Tura ame tátincha tura nunka amuukatin tsawant jeakuisha warijiñ nekaattají? Nu ujatkata" tiarmiayi.

⁴ Tuíniakui Jesus tímiayi "Aneartarum, anankramawairap.

⁵ Untsurí shuar winia náarun pachisar "wi Krístuitjai" tiar untsurí shuaran anankawartatui.

⁶ Ti untsurí meset chicham antuktatrum túrasha sapijmiakairap. Núnisan átiniaiti nunka amúatsain.

⁷ Apachcha chíkich nunkanmaya apachjai máaniawartatui. Tura ti tsukasha átatui. Sunkursha ti pampartatui. Uusha ti uurkartatui. Nuka untsurí nunkanam ashí túrunawartatui.

⁸ Nujai ti wáitsatin aya yama nankamui' tímiayi.

⁹ Nuyá atumniasha yajauch awajsarti tusa surutmakartatui. Tura mantamawartatui. Tura winia naar pachia asakrumin ashí shuar mujramkartatui.

¹⁰ Nu tsawantaj untsurí shuar Yúsán iniaisartatui. Túrawar nuamtak mujniainiak surunairartatui.

¹¹ Untsurí shuar wáitruiniak "wi Yúsnan etserniuitjai" tiartatui. Túrawar untsurí shuáran nusháa enentáimtikartatui.

¹² Tura tunáa ti ákui nuamtak anenaichartatui.

¹³ Tura shuar ashí nuna tuke katsuntra nu uwemprattawai.

¹⁴ Ashí aents nekaawarat tusa Yus-Chicham ashí nunkanam etsernaktatui. Túramtai amuukatin tsawant jeattawai” tímiayi.

¹⁵ Shuar juna áujea nu enentáimprati. Kame Jesus tímiayi “Yúsnan etserin Taniar muijmiamtik tuke emesratin ana nuna yaunchu aar etserkamiayi. Nuka Yusa Jeen wantinkiamtai

¹⁶ ashí shuar Jutía nunkanam írúnna nu, muranam pisararti.

¹⁷⁻¹⁸ Ti wárik pisartin asamtai shuar jea yakí pujaksha tura shuar ajanam wekaakusha jeá waketki warirí jukitiaj tíchati. Antsu nuyañ wárik pisarti.

¹⁹ Nu tsawantaj nuwá ajamtincha tura kuírchin takaku ainia nusha ti wáitsartatui.

²⁰ Ayampratin tsawantajsha tura michá nántutincha nu pisartin tsawant áchati tusarum Yus seatarum.

²¹ Maa, nu tsawantaj ti wáitsatin átatui. Ti yáunchusha núnisan wáitsatin atsuuyayi. Ukunmasha atsuttawai.

²² Nu wáitsatin ti esarmaitkiuñkia chikichkísha uwemprachainti. Tura Yus nu wáitsatniun wárik amumtikiattawai. Shuar Niiniu ajásarat tusa achikma ainia nu uwemprarat tusa wárik amumtikiattawai’ tímiayi.

²³ “Tura atumin “Júiti Kristu,” tuíniakuisha tura “Nui pujawai” tuíniakuisha anturkairap.

²⁴ Untsurí shuar Krístuitjai tusar wantinkiertatui. Untsurísha “Yúsnan etserniuitjai” tiartatui. Tura shuáran anañkataj tusar aents tujintiamun iniakmasartatui. Tura ti kakarman túruiniak Yús-shuarnasha anañkamin ániakuñkia anañkawarainti.

²⁵ Túrunatsajñ nuna emka ujaajrume.

²⁶ Tuma asamtai “Iis, Kristu nui aents atsamunam pujawai” túramainiakuisha nui wéerap. “Jui úumak pujawai” tuíniakuisha anturkairap.

²⁷ Núnisan úumkan táchattajai. Peem péetuk ti wárik ashí nunkanam wáinkiachminkiait. Núnisnak wi Aents Ajasuka winiakun paant wantinkiat-tajai.

²⁸ Wats, jaka tepaana nui chuan káutkachartatuak’ tímiayi.

Kristu tátintri

(Márkus 13.24-37; Rúkas 21.25-33; 17.26-30, 34-36)

²⁹ “Ti wáitsatin nankaamasmatai ti wárik tsawáj nantu kajinkiat-tawai. Tura kashí nantusha etsantrashtatui. Yaasha ashí muchitrattawai. Nayaimpiniam kakaram ainia nusha peantrartatui.

³⁰ Nuñkia Wi Aents Ajasuka, tátiniur paant átatui. Tura ashí nunkanmaya aents Wi winiáj wáitkiar asuttiamattají tusar úutiartatui. Wisha ti kakaram tura Yusa wincharijjaj yurañminiam winiáj wáitkiartatui.

³¹ Yusa suntarin kachu kakaram umpuarterum tinia akupkamtai nu suntar ashí nunkanmaya ashí Yús-shuarn, Yus achikma ásarmatai, irurartatui’ tímiayi.

³² ‘Ikiu numirí nakumea nu nekaatarum. Ni nuken eteakui “esat nantu jeatemayi” tátsurmek.

³³ Núnisan ashí ju wáinkiumeka “amuukatin tsawant nekas jeatemayi” títiniaitrome.

³⁴ Nekasan tájarme, yamá aents pujuinia nu amúatsajñ ashí túrunattawai.

³⁵ Nunkasha nayaimpisha amuukartatui antsu winia chichamur amuukashtatui’ tímiayi.

³⁶ “Tura nu túrunatin tsawant nekanachminiaiti. Yusa suntarisha nékainiatsui. Wisha Yusa Uchiríntiatnak nékatsjai. Antsu aya winia Aparuk nékawai’ tímiayi.

³⁷ ‘Wi tátiniur jeamtai yaunchu Nuai pujumia nú tsawantin túrunamia núnisan átatui.

³⁸ Nu tsawantin, tuke amaartsain, aya júnisan aa asamtai yurumuk umarar pujuarmiayi. Nuatnainiarmiayi. Ni nawantríncha nuatmamikiarmiayi. Tura tumá pujuiniaí Nuai uunt kanunam enkemamtai

³⁹ nu aents tuke nékainiatsain ama amarak mash amuukarmiayi. Núnisan átatui Wi tátin jeamtai.

⁴⁰ Nu tswantaik jimiara shuar ajanam pujuttawai. Chikichik junaktiatui tura chikichkia ikiunkittiwai.

⁴¹ Núnisan jimiara nuwa shana nekeak pujuttawai. Chikichik junaktiatui chikichcha ikiunkittiwai’ tímiayi.

⁴² ‘Nu asamtai atumsha iwiarnarum pujustarum. Nekaachminiaiti uruk áintsuk taritjarum.

⁴³⁻⁴⁴ Tuma asamtai aneara pujustarum. Wi nekaachmanum tátin júnisan enentáimpramniaiti. Shuar ju kashi kasa tátinian nekaanka kánutsuk kasa táawai tusa iwiarnar nákasainti. Núnisrum aneara pujutarum.’

Pénker takamtikniuncha yajauch takamtikniuncha Jesus áujmatsamiania nu (Rúkas 12.41-48)

⁴⁵ ‘Shuar péñker uminian tura péñker enentáimniun áujmatsattajai. Nuna uuntri yaja irauweak “Yurumátin jeamtai winia takartin ayuratarum” tíchanpiash.

⁴⁶ Nu takamtikniuncha ni uuntri taa takatrin tímiatrusan túran tariñkia shiir enentáimtusainti.

⁴⁷ Nekasan tájame, umin asamtai ni uuntri ashí ni waririn wáitrukát tusa takatan susattawai.

⁴⁸⁻⁴⁹ Antsu úuntur wau táchattawai tusa takamtikin ni uuntri yáintrin yajauch awajeak tura takatsuk aya yurumátniun tura nampektinian wararkunka nu takamtikin yajauchiiti.

⁵⁰ Turaj ni uuntri aya aneachma taa nu takamtikniun, yajauch asamtai,

⁵¹ ti kakaram asutiattawai. Yajauch shuar pujuinia nui akupkattawai. Nuisha ti wáitak ti úuttiatui’ tímiayi Jesus.

25

Jesus tias (10) nuwan áujmatsamiania nu

¹ ‘Yus akupeamunam pachiinkiatin júnis átatui. Nuatnaikiatin jisat akui tias nuwa natsa kantiran akaawar nuátkattana nu áishmankan inkiun jeá itiatatui tusar wearmai.

² Senku nuwa enentáimcha armai. Tura chikich senku nuwa enentáimin armai.

³ Enentáimcha arma nú nuwa aya akaamunak juñiak amuukamtai yaraatniun asutin júkicharmai.

⁴ Antsu chikich senku núwaka akaamuncha juñiak tura ataksha amuukamtai yaraatniun asutin júkiarmai.

⁵ Tura jíinkarmatai nuatkatin áishman wari taachkui kari pujakui kanararmai.

⁶ Nuyá kashi ajapén shuar untsukum “Pai nuatkatin winiwai. Werirum inkiuntarum” timiai.

⁷ Tu untsumon antukar nantakiar kantiran akaatai tusar pujursarmai.

⁸ Nuyá senku nuwa enentáimcha arma nu, chikich nuwa enentáimniun tiarmai “Incha atumi asutiri ishichik ajamprusaitia. Ii kantirisha kajiniawai.”

9 ‘Tutai chíkich senku nuwá tiarmai “Atsá, warí íncha jeartamchattaji. Tura atumnia penké jeashtatui. Nekaska surutainium werum sumaka utumtarum” tiarmai.’

10 ‘Tura nuyá senku nuwá enentáimcha arma nu, asuitian sumak utitai tusar wéaraj ukunam nuatkatín áishman tamai. Túramtai enentáimin nuwá arma nuka nuatnaikiatin námpernam nuatkatniujai wayawarmai. Túramtai wáitin epeniarmai.

11 Tura epeniaraj enentáimcha nu táarmai. Tura tiarmai “Úuntá, waiti uratritia.”

12 ‘Tu untsumainiakui nu uunt kakerak chichak “Cha, ¿yátsukaitrum? Penké nékatsjarne” tiarmai.’

13 Jesus nuna áujmatas umik tímiayi “Aents Ajasuitjai tura tátin tsawantrusha tura uruk aiñ tátaj nusha nékatsrume. Tuma asarum tuke iwiarnarum pujustarum’ tímiayi.

Kuit susamun áujmatsamiania nu

14 ‘Núnisan Wi tátin júnisaiti. Shuar chíkich nunkanam wéak_u ni takarniurin untsukar ni kuítrín akanak súsarmai.

15 Chikichkiniak senku mir (5.000) kuítian susamai. Chikichnasha jimiara mir (2.000) kuítian susamai. Tura chikichnasha chikichik mir (1.000) kuítian susamai. Nii takastin jearma nujai métek súsarmai. Tura ikiuak yajá wemai.

16 Takarin senku mir kuítian achikmia nujai takakmas ataksha senku mir kuítian patakmai.

17 Chikichcha núnisan jimiara míran achikmia nujai takakmas ataksha jimiara míran patakmai.

18 Tura chíkich shuar ni uuntri kuítrín chikichik míran achikmia nuna wá taur úukmai.’

19 ‘Nuyá ukunam nu shuara uuntri támai. Tura kuítian súkiarma nujai itiurkarmakit tusa untsukarmai.

20 Emka senku mir kuítian achikmia nu tamai. Nuyá ni uuntri chíkich senku mir patakman suak timiai “Uuntá, senku mir kuit surusmame. Pai, atak senku míran patasmajai.”

21 ‘Takui ni uuntri timiai “Ti penker takakmauwitme. Nekas uminiaitme. Ishichkijiaisha ti penker takakma asakmin ti núkap yamaikia amastatjai. Winí wayam wijiái ti shiir warasta” timiai.’

22 ‘Nuyá chíkich shuar jimiara míran achikmia nu tarí timiai “Uuntá, jimiara mir surusmame. Pai, ataksha jimiara míran patasmajai.”

23 ‘Takui ni uuntri timiai “Ti penker takakmauwitme. Nekas uminiaitme. Ishichkijiaisha ti penker takakma asakmin ti núkap yamaikia amastatjai. Winí wayam wijiái ti shiir warasta” timiai.’

24 ‘Nuyá chíkich shuar chikichik míran achikmia nu tarí timiai “Uuntá, ti kaje asakmin tura araachiatam tura atsaamprachiatam júurtuktarum tiniu asakmin

25 sapijmiakun ame kuítrumniaka nunká táutran úukmajai. Pai, juíti ame surukmiam nu” timiai.’

26 ‘Takui ni uuntri timiai “Ámeka yajauchiitme. Aya nákiitme. Wi araachiatan tura atsaamprachiatan júurtuktarum tiniuitme túrutsumek.

27 Tu enentáimkiumka ¿urukamtai kuit-iruntainiam ikiurtuschamam? Nuikia wi táakun patasan achikiájai” timiai.

28 Nuna tinia nuj wajainian tiarmai “Ju shuar chikichik mir kuit atankirum tias mir kuítian takaka nu susatarum.

29 Kame núkap takakna nú shuar ataksha patatnastatui tura ampiniartatui. Antsu ishichik takakna nusha ishichik takakuitiat jurunkittiwai.

30 Ju umichu shuarsha aa kiritniunam ajapatarum. Nui ti wáitiak ti úuttiatui” timiai”. Tu áujmatsamiayi Jesus.

Akantratin átatna nu

31 Jesus áujmatuk tímiayi ‘Aents Ajasuitjiana nu ashí akupin ajasan Yusa sun-tari éñkekma winittiajai. Tura Uunt Akupin asan shiir pujutairui pujustatjai.

32 Túramtai ashí nunkanmaya aents Winia irunturartatui. Túrunawarmatai akantrartatjai. Murikiu wáinin kachurtinian tura kachurtichujai akanea nútisanak shuáran akantrattajai.

33 Tura kachurtichunka, péñkera nuna, untsuuruini awajsartatjai. Tura kachurtinniaka, yajauchia nuna, menaruini awajsartatjai.

34 Túran nekas Uunt Akupin asan untsuuruini wajainian títiatjai “Atumni-aka winia Apar shiir awajtamsaitrume. Wi akupeajna nui winitiarum. Yus nunkan najanamia tímianaik átum nui warastinian tsankatramkamiarme.

35 Kame Wi tsukamá wekai ayurtuamiarme. Kitima wekaisha umartin surusmiarme. Wait ajá wekaisha itiaararum ajamprusmiarme.

36 Pushir atsaisha átumka surusmiarme. Jaa tepaisha íiráimiarme. Sepunam enketajsha tarum íiráimiarme” títiatjai.

37 Tutai untsuuruini wajainia turutiartatui “Uuntá, ¿urutia tsukamá wekaamnisha ayuramají. Urutiá iisha kitima wekaa wainkiarsha umartincha amasmají.

38 Tura urutia wait ajá wekaamnisha tura pushiram mamurmataisha iisha amasmají.

39 Urutia iisha jaa tepamin tura sepunam enketmin wainkiarsha winitir íimijí?” turutiartatui.’

40 “Turutainiakui Wi Uunt Akupin asan tiartatjai “Nekasan tájarme, ashí ju wí shuar péjchachisha waitnentramarum nu Winia anentakum túraitrume” tiartatjai’ tímiayi.

41 ‘Wi Uunt Akupin asan menaruini wajainian tiartatjai “Atumsha yajá wetarum. Yajauchijjai yuminkramuitrume. Yus uunt iwianchi ni suntarijjai tuke kajinkiashtin jinium apeatniua nui wétatrume atumsha.

42 Átumka Wi tsukamají ayurtuachmarme. Kitiamajsha umartin suruschamarme.

43 Wait ajá wekaisha ikiatrachmarme. Pushirun imiampraisha entsartin suruschamarme. Jaa tepaisha tura sepunam enketajsha íiraichmarme” tiartatjai.’

44 “Tutai niisha turutiartatui “¿Urutia, Uuntá, tsukamakmesha, kitiamakmesha, wait ajaknísha, pushiram imiampramsha, jáakmesha, tura sepunam wait ajá pujamnisha íisha winitir yáinchamají?” turutiartatui.’

45 ‘Wi Uunt Akupin asan tiartatjai “Nekasan tájarme, Ashí Wí shuar, péjchachisha waitnentrachmarum nui Winiasha túrutachuitrume” tiartatjai.

46 Nu shuarka tuke wáitsatniunam weartatui. Tura Yus achikma ainia nusha tuke iwiaaku Yusjai pujustinnium weartatui” tímiayi Jesus.

26

Jesus achiktin chichaman jurusarmiania nu

(Márkus 14.1-2; Rúkas 22.1-2; Juan 11.45-53)

1 Jesus ashí nuna tinia umik ni unuiniamurin tiarmiayi

2 “Atumsha nékarme, Paskua jisat jeatin jimiaichik tsawant ajasai. Nui Wi Aents Ajasu asamtai krúsnum máawarti tusar surutkartatui” tímiayi.

³ Nuyá Israer-patri uuntrisha Israer-shuara jintinniurisha Israer-shuara úuntrisha Kaipiasa jeen áarín iruntrarmiayi. Kaipiassha Israer-patri uuntriyayi.

⁴ Nui anankatin chichamjai Jesus achikiar maatai tusar chichaman jurusarmiayi.

⁵ Tura tiarmiayi “Jístatin túrachminiaiti aents téetet ajarain tusar.”

Nuwa Jesusan kunkuinian ukatramiania nu

(Márkus 14.3-9; Juan 12.1-8)

⁶ Jesus Petania péprunam pujus tunamaru Semunka jeen pujumiayi.

⁷ Nui pujai nuwa ti kuit jeá kunkuinian arapástru tutai kaya najanam nam piakun itiamiayi. Tura Jesus misanam yurumátaj tusa pujan tarí nu kunkuinian ukatramiayi.

⁸ Túramtai ni unuiniamuri nuna ísar kajerkar tiarmiayi “¿Urukamtai au kunkuin imiá kuítniasha áantrasha wasurea?”

⁹ Antsu ti kuitjai suruk shuar kuítrincha ainia nuna yáítskesha” tiarmiayi.

¹⁰ Jesus tuinian anturak tiarmiayi “¿Urukamtai ju nuwa yajauch enentáimtarum? Túrutana ju ti péñkeran túrayi.

¹¹ Kuítrincha tuke atumjai pujushtatuak. Antsu Wikia atumjai tuke pujushtatjai.

¹² Ju nuwa kunkuinjai ukatruraj juka, Wi iwiarnastin asamtai áitkiarayi.

¹³ Nekasan tájarme, ashí nunkanam uwempratin chicham etsernakui tuke ju nuwa pachinias etsernaktatui. Túramtai ni túramuri kajinmankishtatui” tímiayi.

Jútas Jesusan surukmiania nu

(Márkus 14.10-11; Rúkas 22.3-6)

¹⁴ Nuyá Jesus tuse (12) unuiniamunmaya chikichik ni naari Jútas Iskariúti Jesusan suruktaj tusa Israer-patri uuntriin wémiayi.

¹⁵ Tura jeari tímiayi “Jesusan achikia amakui ¿urutmá akirkaintrum?” Takui trainta (30) kuitian akikiarmiayi.

¹⁶ Nu akikiam Jútas itiurak Jesusan súsaraintiaj tu enentáimias wekaimiayi.

Kristu jakamu enentaimtustin námper

(Márkus 14.12-25; Rúkas 22.7-23; Juan 13.21-30; 1 Kurintiunam 11.23-26)

¹⁷ Wakapruachu tantan yurumáinia nú námper yama nan kamkui Jesusa unuiniamuri tariar aniasarmiayi “¿Tui paskua námper iwiaarakrin yurumáttam?” tiarmiayi.

¹⁸ Tuíniakui Jesus tímiayi “Péprunam wetarum. Nui chikichik shuara jeen jearum titiarum “Uunta chichaak “Winia tsawantur ishichik ajasai. Tuma asan paskua namperan winia unuiniamurjai ame jeemiin yurumátjai” tawai” titiarum” tímiayi.

¹⁹ Tutai ni unuiniamuri wear Jesus timia nuna umikiar paskua nampertin yurumátniun iwiararmiayi.

²⁰ Tura kashi ajasái Jesus ni tuse (12) unuiniamurijjai misanam yurumuk pujumiayi.

²¹ Nui yurumáiniaj Jesus tiarmiayi “Nekasan tájarme, átum pujarmena juyá chikichik Winia surutkattawai.”

²² Nuna takui ti kúntuts enentáimprar mai aní awajiararmiayi “Uuntá, ¿wiáshitiaj?”

²³ Mai tu awajenam Jesus tiarmiayi “Wi nú piniñnuman jimiartukan yuajna ju Winia surutkattawai.

²⁴ Wi Aents Ajasu asan Yus Chicham tana nujaj métek túrunattajai. Túrasha shuar Winia surutkattana nuka ti asutniátin asa akiinmainchu ajakuiti” tímiayi.

²⁵ Nuyá Jútas suruktaj tana nu Nin tímiayi “Uuntá nuikia ¿wiáshitiaj?”

Takui Jesus tímiayi “Ee, nekas ámetme.”

²⁶ Tura yurumuk pujuiniaj Jesus yurumkan achik Yúsan yumınsamiayi. Tura puur ni unuiniamurıñ suiniak tímiayi “Ju yuatarum. Juka winia ayashruti.”

²⁷ Nuyá pinıñkian achik Yúsan yumınsamiayi. Tura suiniak tiarmiayi “Jusha ashı umartarum.

²⁸ Juka winia numparuiti. Tura winia numpar puármatai, yamaram chicham nekas uminkıattawai tawai. Tura puármatai untsurı shuara tunaarın tsankurattawai.

²⁹ Tura ataksha átum Yus akupea nuı jeatsrumnıñ ju uwa yumırın umarchattajai. Tura tsawant jeamtai atumjaj Yus akupeana nuı yamarman umartajai” tímiayi Jesus.

Pítiur natsantratniua nuna Jesus ujakmiayi

(Márkus 14.26-31; Rúkas 22.31-34; Juan 13.36-38)

³⁰ Yús-kantan kantamáwar umikiar Uriwiu náinnium wearmiayi.

³¹ Nuı Jesus tímiayi “Ju kashi átum Winia ashı natsantrurtatrome. Kame Yus-Papinium áarmaiti “Murikiu wáinnium mantuattajai túram murik pisarar-tatui.” Tu áarmaiti.

³² Tura nantakin Kariréa nunkanam Wi émkattajai átum wéatsrumın.”

³³ Takui Pítiur tímiayi “Chíkich natsantramainakuisha wikia túrashtajai.”

³⁴ Tutai Jesus tímiayi “Nekasan tájame, ju kashi atash shiniatsajın menaintiú natsantrurtatme.”

³⁵ Pítiur tímiayi “Maa, Ámıjjaj métek mántuiniakuisha penkesha natsantrash-tatjame.” Ashı ni unuiniamurı núnisañ tiarmiayi.

Jesus Jitsemanı ajanam Yúsan áujsamıania nu

(Márkus 14.32-42; Rúkas 22.39-46)

³⁶ Nuyá Jesus ni unuiniamurıjjaj Jitsemanı náartin ajanam jeá tímiayi “Juı pujusrum náarsatarum. Aranta aj wena Yúsan áujsatjai.”

³⁷ Tinia Pıtruncha tura mai Sepetéu uchırı jukı wémiayi. Nuısha ti kúntuts enentámiuk wake mesekmiayi.

³⁸ Nuyá Jesus tímiayi “Ti kúntuts jakamnia enentáımjai. Atumsha juı pujusrum Wıjjaj métek iwiáa pujutarum.”

³⁹ Tinia Jesus arantach we nuı tikishmar tsunsuma Yúsan áujeak tímiayi “Winia Aparú, Wi túrunatniua nu nusháa iwıaramniaitkiuıñkia ju wáitsatniua nu tsankatrukaıp. Tura Wi wakeraj núniska áchatı antsu Ame wakeram núnis atı” áujuk tímiayi.

⁴⁰ Nuyá ni menaintiı unuiniamurı pujuiniamunam waketki kanúu pujuinian jeariar Pıtrun tímiayi “Átumka chikichik úraksha Wıjjaj iwiáa pujutin ¿tujinkıarmek?

⁴¹ Iwiáa pujusrum Yus áujsatarum. Tunáa nupettamkairap. Enentáımin ti wakerınıaitrome túrasha ayashım pımpıruıti.”

⁴² Tinia ataksha we Yúsan áujeak tímiayi “Winia Aparú, Wi imıá nekasın wáitsatniuitkiuıñkia nuıkia Ame wakeramna nu atı.” Tu áujsamıayi.

⁴³ Nuyá ataksha taa ni menaintiı unuiniamurı tarımiayi. Tura karı ti nupeteam ataksha kanúu pujuarmiayi.

44 Túmainiakui nin ikiukin ataksha áujmia núnisan Yúsan áujساتaj tusa waketkimiayi.

45 Áujas umik ni unuiniamuri pujamunman wémiayi. Tura tiarmiayi “Antsu yamaikia kanarum ayampratarum. Ura jeayi. Wi Aents Ajasu ain, tunaar-intin shuarnum surunkatin jeayi.

46 Wari nantaktiarum. Wéartai. Súrutna nu winiawai” tímiayi.

Jesusan achikiarmiania nu

(Márkus 14.43-50; Rúkas 22.47-53; Juan 18.2-11)

47 Jesus tu chichaj Jútas támiayi. Nusha ni unuiniamuriyayi. Nujaisha untsurí shuar puniajaisha tura numijjaisha winiarmiayi. Nu shuaran Israer-patri uuntri sha Israer-shuara úuntri sha akupka ármiayi.

48 Jútas, Jesusan sura, tuke Jesusaj jeatsuk nu shuaran tiarmiayi “Wi miniakkan mukunattajna núiti. Nu achiktaram.”

49 Nu asantai Jesusan tarí “Winiajai Uuntá” tinia mukunamiayi.

50 Takui Jesus tímiayi “Amikrú, ¿warí winitiam?” Nuyá achikiar Jesusan júkiarmiayi.

51 Nui chikichik Jesusa tsaniakmarí ni puniarin ukuiniak shuara kuishin tsupirkamiayi. Nu shuarsha Israer-patri uuntri takarniuriyayi.

52 Túramtai Jesus tímiayi “Puniarum enkeata. Ashí puniajai máanainia nusha puniajai mantamnashatuak.

53 Wi wakeraknaka winia Aparun timiá untsurí suntarin seakui páchitsuk akupturkainti. ¿Nu nékatsmek?

54 Tura nuna túramtainkia Yus-Chichamnum tana nu uminkiachainti” tímiayi.

55 Nuna tinia Jesus nu shuaran tiarmiayi “Átum kasá achiktaj tawa nútiksarum puniajaisha numijjaisha tarutniurme. Kame ashí tsawantaj Yusa Jeen atumjai pujusan Yus-Chichaman etsermiajai. Nuisha achirkachmarme.

56 Antsu yamaikia yaunchu Yúsnan etserin áararmia nu umínkiatí tusarum jútikrarme.” Tu tímiayi Jesus.

Nuyá ni unuiniamuri Jesusan Níniak ikiuiniak pisararmiayi.

Israer-patri uuntriin Jesusan júkiarmiania nu

(Márkus 14.63-65; Rúkas 22.54-55, 63-71; Juan 18.12-14, 19-24)

57 Shuar Jesusan achikiarmia nusha Kaipiasaj júkiarmiayi. Nusha Israer-patri uuntri yayi. Nuisha Israer-shuara jintinniurisha Israer-shuara uuntri armia nusha irunar matsarmiami.

58 Tura Pítiur árantak Jesusan nemarkin uuntri jeen aari jeamiayi. Tura suntarjai tsanin pujusmiayi Jesusan itiurkartin tusa.

59 Tura Israer-patri úuntri sha Israer-shuara úuntri sha tura ashí naamka uunt armia nusha Jesusan wait-chichamjai súmamtikiatai tusar áujmatarmiayi.

60 Untsurí shuar ántar tsanumpruiniakuisha máatin chichaman nekaracharmiayi. Nuyá jimiara shuar tsanumpruiniak

61 tiarmiayi “Ju áishman chichaak “Yusa Uunt Jeen yumpuaran ataksha menaintiú tsawantin jeamminiaitjai,” tu chichamai” tiarmiayi.

62 Nuyá Israer-patri uuntri wajaki Jesusan tímiayi “¿Áimtsmek. Turamainia nusha anturammek?”

63 Túrasha Jesus tuke áimchamiayi. Túmakui Israer-patri uuntri chicharuk “Nekas iwiaaku Yusa náariin tájame nekasa nu táchakminkia Yus írmastatui. ¿Ame Krístukaitiam. Yusa Uchirin kaitiam? Paant etsérkatá” tímiayi.

⁶⁴ Tutai Jesus tímiayi “Ee, ame támena núitjai. Tura ataksha atumin tájarme, wi Aents Ajasu asan ti kakaram Yusa untsuuriní pujai wáitkiáttarme. Tura yuranminiam winiaisha wáitkiáttarme” tímiayi.

⁶⁵ Nuyá Patri uuntri nuna antuk ti kajek ni pushiri jaak tímiayi “Ju áishman ni chichamejai Yúsan nekas yajauch chicharniuiti. Nuyásha ¿warí atsumaji? Atumsha Yúsan yajauch chicharu antukcharumek.

⁶⁶ ¿Waritia enentáimprum?”

Tutai “Sumamayi. Mantamnati” tiarmiayi.

⁶⁷ Tiar usukiawarmiayi yapiniam. Tura awattiararmiayi.

Chikichcha yapiniam awati wishikiainiak tiarmiayi

⁶⁸ “Ame Krístuchukaitiam. ¿Ya awattama? Íitsuk nekaata.” Tu chichariarmiayi.

Pítiur Jesusan natsantramiania nu

(Márkus 14.66-72; Rúkas 22.56-62; Juan 18.15-18, 25-27)

⁶⁹ Nu túmain Pítiur aa pujai nuwa chikichik jeari tímiayi “Amesha ju Kariréanmaya Jesus tutaijai wekaichamkam.”

⁷⁰ Tutai Pítiur ashí ántuiniamunam tímiayi “Nékatsjai. ¿Warittsuk chichaam?”

⁷¹ Nuna tinia jíinkitij tusa wéai chikich shuar wáiniak nujuinian tiarmiayi “Au áishmansha Nasarénumia Jesusjai wekainiuiti.”

⁷² Tutai Pítiur ataksha tímiayi “Nekasan tájarme, ju áishman kan penké nékatsjai.”

⁷³ Árusan nujuarmia nu Pítrun tariar tiarmiayi “Nekas amesha aujai wekaimiame. Warí, chichammijjai páantaiti.”

⁷⁴ Tutai Pítiur “nekas Yus írui” taku tímiayi “Nu áishman kan penké nékatsjai.” Nuna taj atash shiniukmiayi.

⁷⁵ Túramtai Pítiur Jesus nuik tímia nuna enentáimpramiayi. “Atash shiniatsain menaintiú natsantrurtatme” tímiayi Jesus. Pítiur nuna enentáimiar jíinki we ti útmiayi.

27

Piratuí Jesusan júkiarmiania nu

(Márkus 15.1; Rúkas 23.1-2; Juan 18.28-32)

¹ Kashin tsawarmatai Israer-patri uuntrisha Israer-shuara úuntrisha Jesus maatai tiarmiayi.

² Tiar Jesusan jínkiawar apachi uuntrin Punsu Piratuí júkiarmiayi.

Jútas máamamiania nu

³ Jútas Jesusan suruk tura máatai tuínian antuk enentáimiar trainta kuítian Israer-patri uuntrincha Israer-shuara úuntrincha awantukiarmiayi.

⁴ Tura tímiayi “Nu áishman tunaarinchán máatarum tusan surukan wi sumamajai.”

Takui tiarmiayi “Nusha íjjaisha warí urukatin. Nuka amek íischatniukaitiam.”

⁵ Tinia Jútas nu Yusa Uunt Jee kuítian utsan ikiuak nuyá we kajempramiayi.

⁶ Nuyá Israer-patri uuntri nu kuítian júukar tiarmiayi “Ju kuit shuar sumakma asamtai Yusa kuítrijjai irurchamniaiti.”

⁷ Tura nuamtak áujmatsar “nunka sumaktai” tiar Nuwe Najantai nunkan sumakarmiayi yajaya shuar nu iwiarsatniun.

⁸ Shuar sumakma kuitjai sumakma asamtai yamaisha Numpá Nunka tuke tuíniawai.

⁹⁻¹⁰ Nujai yaunchu Yúsnan etserin Jeremías timia nu uminkiamiayi:

“Unt Yus turutmia núnisan túrawarmiayi. Israer-shuar trainta kuítian seawar-matai nuna akantrar nujai Nuwe Najantai nunkan sumakarmiayi.”
Tu áarmiayi.

Piratu Jesusan aníasmiania nu
(*Márkus 15.2-5; Rúkas 23.3-5; Juan 18.33-38*)

¹¹ Jesusan apachi úuntriin ejeniarmatai nii aniasmiayi “¿Nekasmek Israer-shuara uunt akupniuríntiam?”

Tutai Jesus “Ame támena núitjai’ tímiayi.

¹² Nuyá Israer-patri úuntri_{sha} Israer-shuara úuntri_{sha} súmamtikia Jesus pachischamiayi.

¹³ Nuyá Piratu tímiayi “Ashí yajauch chichartamainia nu ¿anturmammek?”

¹⁴ Tútaisha Jesus penké áimkiachmiayi. Túmakui akupin ti enentáimiar títinian nekaachmiayi.

Piratu Jesusan “mantamnati” tímiania nu
(*Márkus 15.6-20; Rúkas 23.13-25; Juan 18.39-19.16*)

¹⁵ Jísat tsawantin apachi uuntri Israer-shuar shiir enentáimprarat tusa sepunam enketun shuar wakeramun jiki ankant akupniuyayi.

¹⁶ Nui sepunam tunáa shuar Parapás náartin pujumiayi. Ashí shuar nékarmiayi.

¹⁷ Tuma asamtai Piratu Israer-shuar iruntrarun aniasmiayi “¿Yana ankant akupkat tusarum wakerarum. Parapásnak akupkattaj; Kristu tutai Jesusnak akupkattaj?” tímiayi.

¹⁸ Kame Israer-shuar ántar kajerainiak ni itiarman nekaamiayi.

¹⁹ Tura Piratu nuna inintrak pujai ni nuarí chichaman akuptukmiayi. “Ju pé_nker áishman súmamtikiatnuijai pachiinkiaip. Mese_kranam nii áitkiatnium nekaan wáitsan tsawarjai” tímiayi.

²⁰ Tú_rasha Israer-patri úuntri_{sha} Israer-shuara úuntri_{sha} “Parapás ankant wetí, tura Jesus mantamnati” titiarum tusar shuáran akatrarmiayi.

²¹ Apachi akupniuri ataksha aniasarmiayi “Ju jimiará áentsun ¿yana ankant akupkat tusarum wakerarum?”

Tutai “Parapás” tiarmiayi.

²² Tutai aniasarmiayi “Jesusnasha. Yusa Anaikiamuri Kristu tuinia nunasha, ¿itiúrkáttaja?”

Tutai ashí “Krúsnum máatá” tiarmiayi.

²³ Tuíniakui Piratu tiarmiayi “¿Warí yajauchinia túrait?”

Tutai kakantar untsukum “Krúsnum máatá” tiarmiayi.

²⁴ Tura Piratu Jesus uwemtikrachminiaitkiui antsu ashí shuar charaatum ajainiakui entsa uturtitiarum tusa seamiayi. Tura ashí íimiainia_{in} ikijmiak tímiayi “Ju pé_nker áishman máatniunam wikia pachiintsujai. Antsu atumek íistarum.”

²⁵ Tutai ashí shuar tiarmiayi “Iik ii shuarij_{ai} ju áishman máatin íistaji.”

²⁶ Nuyá Piratu Parapásan ankant akupkamiayi. Tura Jesus asutiárum krúsnum máatárum tusa akupkamiayi.

²⁷ Nuyá akupin pujutai je_nam akupniu suntari Jesusan júkiar ashí sun-taraim irunturarmiayi.

²⁸ Tura pushiri áitkiar akupin entsatain kapaaku pushin áentsrarmiayi.

²⁹ Múuknúmsha tawaspan jan_{ki} najanamun etsemtikiarmiayi. Tura karisun akupniu numirja áaniun untsuur_{in} ataksarmiayi. Túrawar wishiki-ainiak tikishmatrar tiarmiayi “Israer-shuara uunt akupniur_{in}me.”

³⁰ Tiar usukiarmiayi. Tura karisun jurukiar múuknum awatiarmiayi.

³¹ Tura núkap wishikrar kapaaku pushin áitkiar ni pushirín áentsrarmiayi. Nuyá krúsnum maatai tusar júkiarmiayi.

Jesusan krúsnum máawarmiania nu
(*Márkus 15.21-32; Rúkas 23.26-43; Juan 19.17-27*)

³² Jesusan jukí wésar Serini nunkanmaya shuaran, ni naari Semun, Jesusa krúsirín jurukit tusar achikiarmiayi.

³³ Nuyá Kúrkutanam ejeniarmiayi. Kúrkutaka, shuar chichamjainkia, muuka ukunch tútainti.

³⁴ Nui Jesusan umutai yapájai pachimpra najanamun áartaj tusar súarmiayi. Tura Jesus apas iis umarchamiayi.

³⁵ Krúsnum ajintrurar suntar yáki Jesusa pushirín jukit tusar nakurusar awakmakua nuna súarmiayi. Nújainkia yaunchu Yúsnan etserin áarmia nu uminkiamiayi:

“Winia entsarmarun akantrarmiayi tura nakurusar awakmakua nuna winia pushirun súarmiayi.” Tu áarmiayi.

³⁶ Nuyá wáinkiatái tusar pujursarmiayi.

³⁷ Tura urukamtai máamuit ashí aents nekaawarti tusa áarman muuknu-maani anujtukarmiayi. *JUITI JESUS, ISRAERA UUNT AKUPNIURI*
Tu áarmauyayi.

³⁸ Núnisan Niijjai métek jimiará kasa chikichkin untsuurnumaní tura chikichnasha menaanmaní krúsnum máawarmiayi.

³⁹ Shuar nui nankaamainiak muuke peatar wishikiainiak

⁴⁰ tiarmiayi “Ame Yusa Uunt Jee sáakim maintainiú tsawantin jeamtatjai tíchakaitiam. Nekas Yusa Uchirínkiumka krúsnumia akaikim uwemprata” tiarmiayi.

⁴¹ Núnisan Israer-patri úntrisha, Israer-shuara jintinniurisha, Pariséusha, Israer-shuara úntrisha, Jesusan wishikiainiak nuamtak tiarmiayi

⁴² “Chikichnaka uwemtikrati tura Nínkikia uwemtsui. Israera Uunt Akupniuríntkiunka krúsnumia akaikimtai nekas enentáimtustatji.

⁴³ “Yúsán nekas enentáimtiniaitjai” tawai. Wátsek, Yus nekas Nin aneakka uwemtikrati. “Wi Yusa Uchiríntjai” turamchamkaj” tiarmiayi.

⁴⁴ Kasá shuarsha Niijjai ajintruamu armia nusha Nin wishikrarmiayi.

Jesusa jakamuri
(*Márkus 15.33-41; Rúkas 23.44-49; Juan 19.28-30*)

⁴⁵ Nuyá tutupin ai tee ajasmiayi. Túrunayat ataksha aanku tsáapin ajasmiayi.

⁴⁶ Nuni ai Jesus kakantar untsumkamiayi. “Erí, Erí, rama sapaktani’ tímiayi. Nusha shuar chichamjainkia “Yusrú, Yusrú, ¿urukamtai ajapa ikiurkiniam?” tawai.

⁴⁷ Shuar nui wajarmia nusha nuna enentáimtsuk antukar tiarmiayi “Yaunchu Yúsnan etserniun Eríasan untsuawai.”

⁴⁸ Tura chikichik tsékenki we uruchin itiamiayi. Tura churuinian ajamper sapapjai ijiú mukunati tusa susamiayi.

⁴⁹ Tura chikichcha wíshikeak tiarmiayi “Iniáisatá, Erías tarí uwemtikratpiash.”

⁵⁰ Jesus ataksha kakantar untsamak nuyá jakamiayi.

⁵¹ Nu chichamaik Yusa Uunt Jee tarach ajamu yakiiniya achik nunkaani tseu jaanakmiayi. Nunkasha úurkamiayi. Kayasha jakukarmiayi.

⁵² Núnisan iwiarsamusha uraniarmatai untsurí Yus-shuar jákarusha nantakiarmiayi.

⁵³ Nusha emka Jesus nantakmiatai niisha nantakiar iwiarsamun ikiukiar Yusa péprurín Jerusarénnum wayawarmatai untsurí shuar wáinkiararmiayi.

⁵⁴ Nuyá suntar Jesusan wáinkiarmania nusha tura ni kapitíántrisha nunka úrkamtaí nuyá chikichcha ashammai ajasmatai ti sapijmiakarmiayi. Tura tiarmiayi “Ju áishman nekas Yusa Uchirínti.”

⁵⁵ Nuisha nuwá Jesusan nemariarmia nu, arant wajasar, ii wajaarmiayi. Nusha Kariréanmayá pataatukiar Jesusan yainki ejeniarmiayi.

⁵⁶ Nujai Máktaranmayá Marisha, Sepetéu nuwésha, tura chikich Marisha áirmiayi. Chikich Marikia Jakupuncha tura Jusenchá nukuríyayi.

Jesus iwiarsamu

(Márkus 15.42-47; Rúkas 23.50-56; Juan 19.38-42)

⁵⁷ Kiaraj shuar ti kuítrintin Arimatéu péprunmayá ni naari Jusé támiayi. Nusha Jesusan enentáimtiniuyayi.

⁵⁸ Nii Piratuj we Jesusa ayashin seamiayi. Nin súsarát tusa Piratu akupkamiayi.

⁵⁹ Túram Jusé Jesusa ayashin krusnumiá jusa ti péñker tarachjai penuarmiayi.

⁶⁰ Tura kaya waa táurmanum yamaram amia nu iwiarsamiayi. Ni iwiarsatin táumtikramunam Jusé iwiarsamiayi. Iwiaras kaya uuntjai etektuk ikiuak wémiayi.

⁶¹ Nuisha Máktaranmayá Marísha tura chikich Marísha iwiarsamunam naka ii pujuarmiayi.

Jesus iwiarsamun suntar wáinkiarmania nu

⁶² Nú kíarain ayampratin tsawantna mash iwiarnakui Israer-patri úuntrisha Paríséusha Piratuj wearmiayi.

⁶³ Tura tiarmiayi “Uuntá, nu wáitrin áishman iwiaaku pujus “Menaintiú tsawant jakan nantaktiatjai” tınıuyi.

⁶⁴ Nu asamtaí iwiarsamunam menaintiú tsawant suntar wáinkiarat tusa akuptukta. Ni unuiniamurí kashi tariar tura ni ayashin kasamkar “Pai, nantakni” shuáran tiarain. Jujainkia nuna nankaamas shuáran anankawarainti” tiarmiayi.

⁶⁵ Tutai Piratu tiarmiayi “Nu i suntar takakrume. Werum iwiarsamu urakchamnia péñker wáinkiatárum.”

⁶⁶ Tutai wear iwiarsamun urankashti tusar etektukma inkiunmanum serajai yakarar ni áarmarin anujtukarmiayi. Tura suntarnasha awajtukarmiayi.

28

Jesusa nantakmiari

(Márkus 16.1-8; Rúkas 24.1-12; Juan 20.1-10)

¹ Ayampratin tsawant nankaasmatai tumintin yama tsawaana ai Máktaranmayá Marisha chikich Marijai iwiarsamu iyutai tusar wearmiayi.

² Tumai Yusa suntari nayaimpinmayá iwiarsamun tari kaya atutkamun urak nu pujusmiayi. Túmakui nunka ti úrkamiayi.

³ Yusa suntarisha peemia tímiatrus wíinchauyayi. Pushirisha ti puju áuyayi.

⁴ Tura iwiarsamun wáiniarmia nú suntarsha nuna wáinkiar ashamainiak ti kurankarmiayi. Jaká áinis ajasarmiayi.

⁵ Nuyá nayaimpinmayá suntar nuwan tímiayi “Ashamkairap. Jesus krúsnun máawarmia nu eątsrumek.

⁶ Juinkia pujatsui. Nii timia núnisan nantakniuiti. Pai, áepsarma nu ítiarum.

⁷ Wárik wérum ni unuiniamurì “Jesus jakamunmaya nantakni tura wari Kariréanam wétatui. Nuì werirum wáinkíáttarme” titiarum. Wats, nunak tájai” tímiayi.

⁸ Tutai nu nuwá iwiarsamunmaya wárik jíinkiar ashamainiyat ti warasar tseke waketkiarmiayi ni unuiniamurìn ujaktai tusar.

⁹ Tumaj Jesus wantintiukarmiayi. Tura “pujarmek” takui Jesusan tariar tikishmatrar nawencha miniakrusar shiir awajsarmiayi.

¹⁰ Túram Jesus tiarmiayi “Ashamprukairap. Werum winia yatsur ujatruk-tarum. Kariréanam weartí. Nuì wear wáitkiartatui. Tu ujaktarum” tímiayi.

Suntar etserkarmiania nu

¹¹ Nuwá wéarmatai iwiarsamu wáinin suntarsha péprunam wéar Israer-patri úuntrin ashí túrunamun ujakarmiayi.

¹² Niisha nuna antukar Israer-shuara úuntriíjají áujmatsatai tusar wearmi-ayi. Áujmatsar suntaran ti kuít akikiar

¹³ tiarmiayi “Atumsha étserkuram “Kashi kanararin ni unuiniamurì taar Jesusa ayashin kasamkarmai” titiarum.

¹⁴ Tura akupin átum kanarman nekamtaisha niíjjají ii iwiarattaji atumin yajauch awajtamsajín tusar” tiarmiayi.

¹⁵ Nuyá suntarsha kuítian achikiar tiarmia nuna tímiatrusan titiái tusar wéarmiayi. Tura tuke yamaisha Israer-shuar tu túrunaiti tuíniawai.

Jesus ni unuiniamurìn akatar akupkarmiania nu

(Márkus 16.14-18; Rúkas 24.36-49; Juan 20.19-23)

¹⁶ Nuyá ni auntse (11) unuiniamurì Kariréanam wéarmiayi. Tura Jesus timia nú nainnium jeawar

¹⁷ nuì Jesusan wáinkiar tikishmatrarmiayi. Kame chíkichka Jesusashit tuíniayat Nin wáinkiar tikishmatrarmiayi.

¹⁸ Nuyá Jesus tíjiuch tantá tímiayi “Ashí nayaimpinmasha nuńkasha akup-katniun kakarman surusuiti.

¹⁹ Tuma asamtai ashí nuńkanam werum ashí shuar jintintiarum Wíi shuar awajsatarum. Túrarum Yus Apa náariíjají, Yus Uchi náariíjají, tura Yus Wakani náariíjají imiitiarum.

²⁰ Ashí atumin Wi akatramajrum nu nútiksarmek umiktin unuiniartarum. Tura ju nekaatarum: Tuke tsawantají ikiutsuk atumjají pujuttajai” tímiayi Jesus.

Yúsan Shiir Chichamen MÁRKUS aarmia nu

Imiakratin Juan̄ka etserkamuri

(Mateu 3.1-12; Rúkas 3.1-9, 15-17; Juan̄ 1.19-28)

¹ Juī Jesukristunu shiir chicham nánkameawai. Jesukristu Yusa Uchirinti.

² Yuska imiakratin Juan̄kan pachis ni etserniurin̄ Isayasan ti yaunchu ni Papiriin̄ juna áamtikramiayi:

“Iisiana, ame wéamurm̄in emka wetí tusan winia akatramurun̄ akupeajai. Niisha ame jintimin̄ iwiarattawai.

³ Niisha aents atsamunam̄ untsumuk̄ juna títiatui: “Uunta jintī iwíartur-tarum; naka awajsatarum.”

Nuke áarmaiti.

⁴ Wats, aents atsamunam̄ imiakratin Juan̄ imiaittsā pujus étseruk, “tu-naarun̄ Yus asakatrurat” tusarum, enentáim̄ yapajiárum̄ imiantiarum̄” tímiayi.

⁵ Anturkataī tusar ashí Jutía nun̄kanmayā shuar tura Jerusarén̄ peprun-mayā shuarsha Niin̄ tariarmiayi. Taar, ni tunaar̄in̄ ujakarmatai, Juan̄ Jurtañ̄ entsanam̄ imiainiarmiayi.

⁶ Juansha kamiriu urē najantramun̄ entsauyayi. Emenmamkesha nu-apeyayi. Tura chinijiaī yutai-títikriatsnashā yuuyayi.

⁷ Niisha áentsun̄ ujaak̄ tímiayi “Wíjiāinkiā nan̄kaamas̄ ana nu winia ukurūj winittiwai. Niisha nekas̄ ii Uuntrī asamtai, wikiā tsuntsumpruan̄ ni sapatr̄i jinkiamur̄inkishā atitrachminiaitjai.

⁸ Wikiā entsajain̄ ayā ayashmin̄ imiaajrume, antsu Niñkiā imiantiniā áanis̄ Yusa Wakan̄ī atum̄i enentáin̄ en̄ketramprattarme” tímiayi.

Juan̄ Jesusan̄ imiainiania nu

(Mateu 3.13-17; Rúkas 3.21-22)

⁹ Juan̄ áentsun̄ imiak̄ pujurainiāi, Jesuska Nasarét̄ pepru Kariréā nun̄kanam̄ ana nuyá̄ jiinki Juan̄kan̄ tarimiayi. Tura Juan̄ Jurtañ̄ entsanam̄ Jesusan̄ imiainiayi.

¹⁰ Nuin̄, Jesus entsayā jiniuk, nayaimpin̄ uranniun̄ wáinkiamiayi. Tura Yusa Wakan̄in̄ yámpitsā núnin̄ najanar̄ Niin̄ taarun̄ wáinkiamiayi.

¹¹ Tura nayaimpinmayā chichaamun̄ junā antukmiayi, “Ámeke winia aneamu Uchiruitme. Ámin̄ shiir enentáim̄tajme.”

Uunt̄ iwianch̄ Jesusan̄ anañkataj̄ tímiania nu

(Mateu 4.1-11; Rúkas 4.1-13)

¹² Nuyá̄ wárik̄ Yusa Wakan̄ī Jesusan̄ atsamunam̄ jukimiayi.

¹³ Tura nūj, yajasmā yujamunam̄, kuarentā tsawant̄ pujumiayi. Nūj̄ pujaj̄ uunt̄ iwianch̄ Satanás̄ naartin̄ Jesusan̄ nekapsataj̄ tusā pujurmiayi. Túramtaī Jesusan̄ wáinkiat̄aī tusar̄ nayaimpinmayā suntar̄ tariarmiayi.

Kariréā nun̄kanam̄ ni takatr̄in̄ Jesus̄ nan̄kammiania nu

(Mateu 4.12-17; Rúkas 4.14-15)

¹⁴ Ukunam̄, Juan̄kan̄ sepunam̄ enkeawarmatai, Jesuska Kariréā nun̄kanam̄ Yusā akupeamur̄in̄ pachis̄ shiir chichaman̄ etserkī támiayi.

15 “Tsawant jeayi. Shuarnum Yusa akupeamuri jeatemai. Tuma asamtai, yaunchu enentáimsamuram yapajjárurum, Uwempratin Chicham umirkatarum” tu etserkamiayi.

Jesus namakan achinian ni unuiniamuri ajasat tusa kuaru achikmiania nu (Mateu 4.18-22; Rúkas 5.1-11)

16 Jesus Kariréa antumianka kánmatkariin wekas, namakan achinian Semunnasha ni yachi Antresnasha nekan ajuntuk pujuinian wáinkiamiayi.

17 Wáiniak “Nemartustarum, tímiayi. Namak achiarmena nútiksanak áentsun-eau Yusna arti tusan awajsatjarne” tímiayi.

18 Tura nuyanka ni nekarin ajapa ikiuiniak Jesusan nemarsarmiayi.

19 Nuyasha Jesus ishichik arantach wesa, Sepetéu uchirin Jakupun ni yachin Juánnasha kanunam ni nekarin apáa pujuinian wáinkiararmiayi.

20 Wáiniak, nemartusta tusa untsukarmiayi. Tutai ni aparincha, ni aparitakarniurincha kanunam ikiuiniak Jesusan nemarsarmiayi.

Jesus iwianchin áishmanumia jiiki akupkamiania nu (Rúkas 4.31-37)

21 Nuyá Kapernáum péprunam jeawarmiayi. Nui Israer-shuara ayampratin tsawantri jeakui Jesus Israer-shuar iruntainiam wayá Yus-Chichaman unuiniamiayi.

22 Tura ni jintinniuri jintintiarmita nuna iniankas uunt chichamjai Jesus jintiakui ni chichamen anturkar ti enentáimprarmiayi.

23 Nuisha nu iruntainiam áishman iwianchruku ámiayi. Niisha untsumuk

24 “¿Warí itiurtamkattsamea incha taum, Nasarétnumia Jesusa? Wikia nékajme. Ámetme Tunaartichu Yúsaiya winiamna nu. In emestamprataj tusam táchamek” tímiayi.

25 Tutai, Jesus kakantar chicharuk “Takamátsatá. Ni enentáiya jíinkitia, tájame” tímiayi.

26 Tutai íwianch áishman kan ukurak ajakniñkiar untsamak kakaar aa jíinkimiayi.

27 Nuna wáinkiar, ahamkar nuámtak aniniaisarmiayi. “¿Ausha warinkit. Yamaram chicham warí chichamait? Ju Jesuska timiá kakaram asa ímia iwianchin akupeatsuk. Iisiana umirainiatsuk” tiarmiayi.

28 Tura ti wárik nu túrunamu ashí Kariréa nunkanam antunkamiayi.

Jesus Semunka tsatsarin tsuármiania nu (Mateu 8.14-15; Rúkas 4.38-39)

29 Nuyá Israer-shuara iruntai jeenia jiinki Jesuska Jakupujai Juanjaisha we, Semun ni yachi Antresjai pujuarmia nui jeawarmiayi.

30 Semunka tsatsari tsuer peaknum jaa tepemiayi. Núnaka wárik Jesusan ujakarmiayi.

31 Nuinkia Jesus werí uwejnium achik iniantkimiayi. Tura nu chichamaik michatramiayi. Michatar, péñker ajas, Jesusnasha ni nemarniurincha ayurawarmiayi.

Untsurí jaan Jesus péñker awajsarmiania nu (Mateu 8.16-17; Rúkas 4.40-41)

32 Nu tsawantai kiarai, ashí jáinian, iwianchrukuncha Jesusan itiariarmiayi.

33 Tura ashí nú péprunmaya shuar taar wáitiniam Jesusan káutkarmiayi.

34 Untsurí shuáran chíkich sunkuraim jáinian Jesus tsuararmiayi. Tura iwianchruku armia nuna enentáiyān iwianchin jíirkarmiayi. Jesuska íwianch nékamu asa, winia náarun ántar pachisaraiñ tusa suritkarmiayi.

*Kariréa nunkanam Jesus Yus-Chichaman etserkamiania nu
(Rúkas 4.42-44)*

³⁵ Nuyá kashin káshik tsawaatsain Jesus nantaki Yúsan áujсатаj tusa jiinki atsamunam wémiayi.

³⁶ Tura Semun ni amikrijjai Jesus wemaanum wéarmiayi.

³⁷ Nin wáinkiar “Ashi shuar Ámin eátmainiawai” tiarmiayi.

³⁸ Tutai Jesus chichaak “Chíkich péprunmasha arantach wetai. Nui Yusa chichame etserkatai; nuna túrattsan táwitjai” tímiayi.

³⁹ Nuna ti ashí Kariréa nunkanam Israer-shuar iruntai jeanam etseras wekaimiayi; tura núnisan iwianchniasha jiiki akupkini wekaimiayi.

*Tunamaru shuaran Jesus tsuármiania nu
(Mateu 8.1-4; Rúkas 5.12-16)*

⁴⁰ Túramtai, ti tunamaru shuar Jesusan seatajtsa tarimiayi. Taa tikishmatar tímiayi “Wakerutakmeke tsuaratin tujintratsme.”

⁴¹ Jesus nin waitnentak uwejejai antiñmiayi. Antiñ “Wakerajme. Péñker ajasta” tímiayi.

⁴² Nu chichamaik, Jesus chichakmatai, ni sunkurí menkakamiayi. Tura péñker ajasmiayi.

⁴³ Túrunamtai Jesus kakantar chicharuk

⁴⁴ akupeak “Wáinkiatá, nánkamsam etseraip, tímiayi. Antsu weme, Israer-patrirmin iniakmamsata. Túram ashí aents ame péñker ajasmarumin nekaawarat tusam, Muisais aar akupkamiania nu umikiam súsatin ana nu susata” tímiayi.

⁴⁵ Tura etserkaip támaitiat, jiinki ni túrunamurin mash etseramiayi. Tura nuna etserka asamtai, péprunam, aents írunmanum wétinian Jesus nakitramiayi, antsu aa atsamunam pujumiayi. Tura ashí nunkanmaya Jesusan tariarmiayi.

2

*Jesus emearun péñker awajsamiania nu
(Mateu 9.1-8; Rúkas 5.17-26)*

¹ Kapernáum péprunam Jesus ukunam ataksha wémiayi. Jeamtai, ni jeen pujan nekaawarmiayi.

² Tuma asamtai shuar wárik ti untsurí káutkarmiayi. Ti untsurí asamtai, jea piakmiayi; wáitinmasha ankantchauyayi. Jesuska Yus-Chichaman nu aentsun ujaak pujurmiayi.

³ Nuinkia ni amikrin emearun kuaru shuar tampumpuawar júkiar Jesusan itiariarmiayi.

⁴ Tura jeawar, untsurí shuar írunu ásamtai jeá wayatniun tujinkiarmiayi. Tuma ásar, yakinini wakar jea urakar, áankawar, tampunam ni amikrin Jesus pujamunam awaintiuawar itiararmiayi.

⁵ Tura niisha Jesus nekas tsuártatui tu enentáimmarin Jesus nekáa emearun chicharuk, “Uchirú, ame tunaarumka tsankuramuiti” tímiayi.

⁶ Israer-shuara jintinniurisha nuna antúu pujuarmiayi. Tura ni enentáijjai enentáimsar,

⁷ “¿Jusha urukamtai emearun tu chichara? Yúsan imiá yajauch chicharui. Warí, yaki tunaan asakarminiait; aya Yúsak tunaan asakarchamniakait” tu enentáimsarmiayi.

⁸ Jesuska ni enentáimmarin nekarawar “¿Urukamtia átum tu enentáimprum? tímiayi.

⁹ Emearu, tunaarum tsankuramuiti títinjai, emearu, wajakim tampuram entsakim wekasata títinjai ¿tuá imiá yúpichuchit?

¹⁰ Wats wi, Aents Ajasu asan Yusa kakarmaríjiaí shuara tunaari tsankuramniaitjiana nuna paant iwiaintiuktajrume” tímiayi. Nuna tinia emearun chicharuk

¹¹ “Wajaktia, tájame; túram tampuram jukim jéemijn wetá” tímiayi.

¹² Nu chichamaik emearu wajaki, tampurin jukí, ashí íimiainiaín jíinkimiayi.

Nuna túrunamtai ashí ashamkarmiayi. Tura “jútikiamu penké wáinchaitji” tiar Yusa náarin uunt awajsarmiayi.

Jesus Riwin untsukmiania nu

(Mateu 9.9-13; Rúkas 5.27-32)

¹³ Nuyá ukunam Jesus antumiañnum waketkimiayi. Tura ashí shuar káunkarmatai jintintiawarmiayi.

¹⁴ Tura jintintiawar amuk, akupin akitiai jeanam nankaamak, Arpeu uchirin Riwin pujan wáinkiamiayi. Wáiniak “Nemartusta” tímiayi. Tutai Riwi wajaki Jesusan nemarsamiayi.

¹⁵ Chíkich tsawant, Riwisha Jesusan ni jeen itiaamiayi. Tura untsurí kuítian-juu shuarsha, yajauch shuarsha Jesusjai ni unuiniamuríjiaísha ashí nuim misanam pujuarmiai.

¹⁶ Tura kuítian-juu shuarsha yajauch shuarsha Jesusjai irunar yurumáinian wáinkiar, Pariséu jintinniurísha Israer-shuara jintinniurísha Jesusa unuiniamurín aniasarmiayi. “¿Urukamtai ame úntrum Jesus, kuítian-juu shuarjai tura yajauch shuarjaísha yuruma?” tiarmiayi.

¹⁷ Jesus nuna antuk tímiayi “Jaachu shuar tsuákratniun atsumainiatsui. Antsu jaa ana nu tsuákratniun atsumainiawai. Wats, “pénkeraitjai” tuinia nú shuaran untsuktajtsan táchaitjai; antsu “tunaitjai” tuinia nú shuaran Winia ajasat tusan untsuktajtsan táwitjai” tímiayi.

Yurumtsuk Yus áujatniun Jesusan aniasarmiania nu

(Mateu 9.14-17; Rúkas 5.33-39)

¹⁸ Juanka unuiniamurísha Pariséu unuiniamurísha yurumtsuk Yúsan áujiarmiayi. Túmakui chíkich shuar Jesusan tariar chicharainiak, “Juanka unuiniamurísha, Pariséu unuiniamurísha yurumtsuk Yúsan áujainiatsuk; ¿ame unuiniamurmeka urukamtai yurumtsuk áujainiatsu?” tiarmiayi.

¹⁹ Tutai Jesus chichaak, “¿Nuatma nampernum ipiaamu ainia nu ijiarmawartiniak ainia? Yama nuatu pujakui ní amikri warainiak ijiarmachartin ainiawai. Núnisan winia unuiniamur, Wi pujakui, warainiak yurumtsuk pujuschartin áiniawai.

²⁰ Tura tsawant jeattawai, Winia jurukiartin. Nuñkia winia unuiniamur ijiarmawartatui’ tímiayi Jesus.

²¹ Tura nuyá juna tímiayi ‘Mamuru pushí jaanakmatai yamaram tarach anujtukchatniuiti. Túramka nijiam yamaram tarach sumpeak mamushan chinikiá nuna nankaamas jáaktatui.

²² Nijiamanch yamáí nawar nuap najanamu arutnum yaraachminiaiti. Túramka wakaprua karíak nuap najanamu ijiakratniuiti. Tura nijiamanch ukarattawai. Nuap najanamu yajauch ajastatui. Antsu yamaram nijiamanch yamaram nuap najanamunam yaraatniuiti” tímiayi.

Trikiu neren yuawarmiania nu

(Mateu 12.1-8; Rúkas 6.1-5)

²³ Chíkich ayampratin tsawantai Jesus ajanman ajapén nankaamarmiayi. Tura ni unuiniamurí trikiu neren majukiar wearmiayi.

24 Nuna wáinkiar Pariséu Jesusan chicharainiak “¿Warí, urukamtai ame unuiniamuram ayampratin tsawant takastin surinkiamu aisha takainia?” tiarmiayi.

25 Tutai Jesus tímiayi “Íi uuntri Tawitia túramuri Yús-Papinium áujsachukaitrum. Niisha ni nemarniurisha tsukamainiak, ni yurumkari atsakui, túrawarmia nu áujsachukaitrum.

26 Apiatár Yusnan pujurniu uuntri pujai Uunt Tawit Yusa Jeen wayamiayi. Tura Tawitkia, patri nankaamas uunt asa, pátrichuitiat, iniaktusma tantan, aya patri yútainiak, yuamiayi; tura ni nemarniuríncha ajamsamiayi. Nu áujsachukaitrum, tímiayi.

27 Ayampratin tsawantai túrashtinian umirkashtimpiash tusa Yuska aentsun najanachmiayi. Antsu aents ayamprarat tusa Yus ayampratin tsawantan tesamiayi.

28 Wisha, Aents Ajasu asan imia ayampratin tsawantan Nerenniuríntjai” tímiayi.

3

Uweje jakan Jesus tsuármiania nu (Mateu 12.9-14; Rúkas 6.6-11)

1 Ataksha chíkich tsawantai Israer-shuar iruntainiam Jesus wayamiayi. Nui shuar ámiayi, ni uweje jaka.

2 Tura tunáan túrayi titiai tusar wakeruiniak “ayampratin tsawantai tsuártimpiash” tusar, Pariséu shuarsha Jesusan ii pujuriarmiayi.

3 Nuinkia Jesus uweje jaka shuaran chicharuk “Ajapén wajasta” tímiayi.

4 Nuinkia mamikmaun chicharuk “¿Ayampratin tsawantai péñker túratin yajauch túratniujai tuá imiá péñkerait. Shuar uwentikratin máatniujai tuá imiá péñkerait?” tímiayi.

Nuna takui niisha pachischarmiayi.

5 Tura Jesus kajek nin íiyarmiayi; tura ni enentáin kátsuram ásarmatai kúntuts enentáimsamiayi. Tura shuáran chicharuk “Uwejem iniakmasta” tímiayi. Iniakmarmatai ni uweje jaruku ataksha péñker ajatsamiayi.

6 Nuyá Pariséu shuar jíinkiar, Jesus maami tusar Erutis shuarjai áujmatsarmiayi.

Untsurí shuar Jesusan káutkarmiania nu

7 Nuyá Jesus ni unuiniamuríjjiai antumiannum wémiayi. Kariréa nunkanmaya untsurí shuarsha Jesusan nemariarmiayi.

8 Untsurí nunkanmayasha káunkarmiayi. Jutía nunkanmayasha, Jerusarén péprunmayasha, Itumía nunkanmayasha, Jurtañ entsa amainiasha, Tiru tura Setun pepru pujuinia nú nunkanmayasha, untsurí shuar ni túramurín nekaawar, Jesusan káutkarmiayi.

9 Untsurí káunkar chanuntawarain tusa Jesus ni unuiniamurín kanuram inianáastarum tusa seamiayi.

10 Kame untsurí shuaran Jesus nuik tsuaru asamtai, jaa shuar nui káunkarmiania nu Jesusan antintaj tusar shitianainiakui nuna seamiayi.

11 Tura iwianchrakusha Jesusan wáinkiar tikishmatrarmiayi. Untsumainiak “Ame nekas Yusa Uchirínme” tiarmiayi.

12 Tura nuna etserkairap tusa Jesuska kakantramiayi.

Jesus tuse shuaran anaikiarmiania nu (Mateu 10.1-4; Rúkas 6.12-16)

13 Nuyá Jesus náinnium wakamiayi. Tura anaikiatniun wakerimia nú shuaran untsukmiayi. Tura niisha Jesusan weriarmiayi.

14 Tura Nijjiaj wekasar Yus-Chichaman unuiniartinian tuse shuáran anaikarmiayi.

15 Tura sunkur tsuártinian, iwianchcha jiki akupkatniun ni kakarmarin súarmiayi nú shuaran.

16 Ju shuáran anaikiamu ármiayi: Semun, Jesus chikich naarin Pítur apujtusmiania nu;

17 Sepetú uchirí Jakupu, ni patai Juánsha; ipiamtajaj métek kakaram áarmatai nuna mai “Puanérjis” naari susamiayi. Nusha shuar chichamjainkia “ipiamta nuke” tawai.

18 Nuyá Antressha, Jiripi, Parturumí, Mateu, Tumas, Arpeu uchirí Jakupu, Tateu, ásump Semun,

19 Jútas Iskariúti. Jesusan ukunam surukmia nú Jútasauyayi. Anaik amukmatai jeá waketrarmiayi.

*Yusa Wakanin yajauch chicharna nu
(Mateu 12.22-32; Rúkas 11.14-23; 12.10)*

20 Waketkiarmatai, ti untsurí shuar taarmatai takatrí ti akui, yurumátiniun jeacharmiayi.

21 Jesusa shuarisha nuna nekaawar Jesus ti iturchat pujus wáurtsuash tu enentáimsar jukitiai tusar nu jeanam jeariarmiayi.

22 Nuyá Israer-shuara jintinniuri Jerusarénumia táarmiania nu, Jesusan áujmataniak “Pirsepú enkea asa iwianchrukuiti. Tuma asa uunt iwianchi kakarmarijiaj iwianchin jiki akupeawai” tiarmiayi.

23 Tutai Jesus winitiarum tusa nin untsukmiayi. Tura enentáimtikrataj tusa juna tímiayi: “¿Iwianch Satanáskesha ititur ajapmamatín?”

24 Chikichik nú nunkanmaya shuar nuámtak kajernaiyakuinkia, nu nunka wari meserchattawak.

25 Nuámtak shuar ni shuarijiaj kajernaiyakuinkia nu shuarsha amunaikchartatuak.

26 Núnisan ¿Satanáskesha ni suntarijiaj máaniakka ititurak tuke pujusarat? Amunaikiartatui.

27 Nánkamas shuar kakaram shuara jeen wayá, nérenniun jinkiatsuk ni kuítrin kasarkachminiaiti. Antsu nérenniun jinkiá ni kuítrin kasarkamniaiti.

28 Nekas tájarme, shuar tunáa ashí túruiniana nuka tsankuramniaiti. Winiasha winia Aparnasha yajauch áujmatusha tsankuramniaiti.

29 Antsu Yusa Wakanin yajauch áujmatna nuka tsankurachminiaiti; antsu nu shuar niniki tuke sumamattawai.”

30 “Jesuska iwianchrukuiti” tuíniakui Jesus nuní tímiayi.

*Jesusa yachí Jesusa nukurí
(Mateu 12.46-50; Rúkas 5.19-21)*

31 Nuyá ni yachí ni nukurijiaj taar aa wajasar, Jesusan untsukat tusa akupkarmiayi.

32 Shuar Jesusan téntak pujuarmia nu tiarmiayi “Iis, nukusha, yatsumsha aa wajasar untsurmainiawai.”

33 Tutai Jesus chichaak “Ya ainia winia nukursha yatsursha” tímiayi.

34 Nin téntakar pujuarmia nuna iis “Júiti winia nukurka, yatsurka, tímiayi.

35 Shuar Yusa wakeramurin uminiana nu winia yatsuruiti, winia umaruiti, winia nukuruiti” tímiayi.

4

*Atsaamin atsaampramiania nu
(Mateu 13.1-9; Rúkas 8.4-8)*

¹ Nuyá jiinki antumianka yantamen Jesus ataksha unuiniartinian juarkimiayi. Tura untsurí shuar iruntrarmatai, kanunam enkempramiayi. Shuarsha antumianka káanmatkarin pujuarmiayi.

² Jesuska métek-taku chichamjai ti jintintiarmiayi. Jintintiuk juna tímiayi:

³ “Antuktarum. Atsaamin atsaamprataj tusa jínkimiai.

⁴ Atsaamkui ni arakri jintiá iniararmai. Chínki yakiyá káutkar yuawarmai.

⁵ Chikichcha kaya írunmanum iniararmai, nunka ishichik ámanum. Tura nunka ishichik asamtai wárik tsapainiarmai.

⁶ Tura etsa etsantar sukuám kanape atsá asamtai káararmai.

⁷ Chikichcha janí nupanam iniararmai. Jankisha tsapainiar kankar ajakrarmai; túram nerekcharmai.

⁸ Chikichcha pénger nunkanam iniararmai. Tura tsapainiar nerekarmai, chikich trainta, chikich sesenta, chikich sian nerekarmai.

⁹ Kuíshim ákuinkia antuktarum” tímiayi.

(Mateu 13.10-17; Rúkas 8.9-10)

¹⁰ Untsurí wearmatai, ishichik Nijjai juakarmiania nu, ni tuse unuiniaturijjai aniasarmiayi “¿Ame jintintiamna nusha warimpiait?” tiarmiayi.

¹¹ Tutai Jesus chichaak “Yuska ni akupeamurin atumin paant nekamtikramattsá wakerutmarme. Antsu chikich shuarka aya métek-taku chichamjai jintintiáwartatui.

¹² Íniayatan wáinkiacharat tusa, antukarsha nekaacharat tusa, umirtsuk ni tunaari tsankurnacharat tusa túrattawai’ tímiayi.

(Mateu 13.18-23; Rúkas 8.11-15)

¹³ Tura tímiayi ‘Wi jintintiajrumna nú métek-taku chicham nekaachurmek. Nu nékachkurmeka ¿itiurak chikich métek-taku chichamsha nekaatarum?

¹⁴ Atsaamnua nuka Yus-Chichaman étserna nuna nakumui.

¹⁵ Jínkiái jintiá iniaarua nuna chikich shuar ántuiniamun nakumui. Nu shuar chichaman ántuiniawai. Tura antukarmatai Satanás wárik tarí ni enentáin atsaampramun jurawai.

¹⁶ Chikich shuar ántuiniamu kayanam atsaampramua núniskete. Niisha chichaman antukar wárik warainiak umiktasa wakeruiniawai.

¹⁷ Tura ni kanape atsakui, aya ishichik katsuiniawai. Tura ukunam, Yus-Chichaman wakeruiniakui shuar kajeram tura chikich itiurchatan wáinkiar Yúsaiya kanainiawai.

¹⁸ Chikich ántuiniamuka janí nupanam atsaampramua núniskete. Nu shuar Yus-Chichaman ántuiniawai.

¹⁹ Ántuiniayat ju nunkanam ana nuna ti páchiniawai. Tuma ásar kuítian tura shiirmachin ti takustinian wakeruiniawai. Nú wakeramu ni enentáin Yus-Chicham ana nuna kankar emenkatui. Tuma asamtai nerektinian tujintiainiawai.

²⁰ Tura chikich ántuiniamusha pénger núnkanam atsaampramua núniskete. Nú shuarsha Yus-Chichaman antukar umiiniawai. Tura nerenawai, chikich shuar trainta, chikich shuar sesenta chikich shuar siansha nerenawai.’

*Uukma ana nu paant nekanattawai
(Rúkas 8.16-18)*

21 Nuyá Jesus juna tímiayi ‘¿Shuar shiripkin ekeemak itiá pitiaknum enkeattawak. Peaknum wakenam ikiustatuak? Atsá. Antsu misanam ekentsashtinkiait.

22 Núnisan ashí uukma ana nu ukunam paant nekanattawai. Tura núnisan yamá ishishmasa chichasmasha ukunam paant nekanattawai.

23 Kuíshim ákuinkia antuktarum.’

24 Tura nuyá tímiayi ‘Ántarmena nu esetrarum enentáimsarum antuktarum. Urutá péñkerak enentáimsatarum, núnisan Yuska ámin nekaatniun suramsat-tarme, tura nú núkap patatramsattarme.

25 Tuma asamtai shuar núkap takakna nu patatnastatui. Antsu chíkich shuar ishichik takakuk jurunkittiawai.’

Yusa akupeamuri júnisaiti

26 Nuyá Jesus chichaak juna tímiayi ‘Yusa akupeamuri júnisaiti. Shuar jínkiain atsaampratniua núniskete.

27 Jínkiáin atsaamar, untsurí kanar, tsawar, uruksanpi tusa nákwai. Tura itiura tsapainia núnaka nékatsui.

28 Kame jínkiái nunkanam init aku níñki tsapaatsuk; emka nukareawai, nuyá tuyureawai tura nujamar katsuawai.

29 Túruna káakmatai júuktin tsawant jeayi tusar júniawai.’

(Mateu 13.31-32; Rúkas 13.18-19)

30 Ataksha Jesus tímiayi ‘¿Yusa akupeamuri warijiaink’ nakumkataj. War-
ijiaink’ métek-takuit?

31 Mustasa jínkiái araamua nujai métek-takuiti. Nu jínkiaisha ashí nankaamas ishitiupchichiti.

32 Tura araam tsapái ashí nankaamas uunt ajawai; tura tsenkeakmarisha kámpuram asamtai nui mikintranam chinakisha shiir ayamainiawai.”

(Mateu 13.34-35)

33 Núnisan Jesus untsurí métek-taku chichamjai Yus-Chichaman ujaamiayi. Nii nekaatniun jearmia nunak ujaamiayi.

34 Chíkich shuaran aya métek-taku chichamjai ujaamiayi; antsu ni unuinia-
murijai Nínki pujus ashí paant jintintrarmiayi.

Nasenchá, entsancha Jesus imijiánmia nu

(Mateu 8.23-27; Rúkas 8.22-25)

35 Nu tsawantai etsa akaikimtai Jesus ni unuiniamurín chicharainiak “Entsa amain katiñtai” tímiayi.

36 Tutai kanunam enkemprarmiayi. Chíkich shuarnaka káanmatkanam ikiukiar Jesusan kanunam pujan júkiarmiayi. Chíkich kanunmayasha atam-priarmiayi.

37 Tura nasésa ti nasenkatasa nankammiayi; chíchimi kanunam yarána piáktasa ajamiayi.

38 Jesuska kanú senkarín atamprus kanú tepemiayi. Tura, ni unuinia-
muri Jesusan ishintiak chicharuk “Uunta ii wayajnia júka pachitmatmek”
tiarmiayi.

39 Tutai Jesus nantaki nasén kakantramiayi. Entsancha chicharuk “Taka-
matsata. Miaku ajasta” tímiayi. Tutai nasésa menkakamiayi, entsasha
miaaku ajasmiai.

40 Túrunamtai Jesus ni unuiniamurín chicharainiak “¿Urukamtai
ashamarum? Itiura Yus nekas enentáimtatsrum” tímiayi.

41 Tura imiá ashamainiak “¿Maa jusha yait? Nasesha entsasha nin umi-rainiatsuk” tunaiyarmiayi.

5

*Jataranmayan iwianchrukun Jesus tsuármiania nu
(Mateu 8.28-34; Rúkas 8.26-39)*

1 Nuyá antumian amaini Jatara nunkanam jeawarmiayi.

2 Jesus kanunmaya jiinkimtai áishman iwianchruku, shuar jakáa iwiartainiumiá wárik taa Jesusan inkiunmiayi.

3 Nu shuar iwiartainium tuke pujuyayi. Tura jirujainkia nin jinkiaatniun tujinkiararmiayi.

4 Jirujai nawenmasha, uwejnnumsha tuke jinkiau ármiayi. Túramaitiat jinkiaarman tsuriar tepet-tepet awajmiayi. Tura ti kakaram asamtai nin nupetkachminiuyayi.

5 Tuke tsawaisha káshisha, iwiartainiumsha murasha kayajai ijumak unsumuu wekainiuyayi.

6 Tura yajayan wáiniak Jesusan tseke tarimiayi; tura tikishmatramiayi.

7-8 Túrunamtai Jesus chicharuk “Iwianchiá, ni enentáiya jiinkitia, tájame” tímiayi.

Takui íwianch kakantar chichaak “¿Winiasha urukamtai tarutnium, Uunt Nankaamaku Yusa Uchirj Jesúsá? Yus iirmanum wáitkiarsaip, tájame” tímiayi.

9 Takui Jesus tímiayi “¿Ame náarmesha yait?”

Tutai niisha ayak “Untsurí ásar wikia Untsurí-suntar tu anaikiamuitjai” tímiayi.

10 Nuna ti amik, nu nunkanmaya akuptukain tusa Jesusan ti seamiayi.

11 Nuisha nainnium nuntumas untsurí kuchi shushunmak matsamarmiayi.

12 Tuma asamtai, kuchiniam enkemátin tsankatrukta tusar Jesusan seawarmiayi.

13 Tuiniakui Jesus “ayu” tímiayi. Takui íwianch áishman kainia jiinkiar kuchiniam enkemáwarmiayi. Kuchisha ti untsurí, jimiará mir (2.000) áchiawash. Ashí mash nánatanam iniaawar antumiannum iniankarmiayi. Nuisha entsá kjakar jakerarmiayi.

14 Túrunamtai kuchin wáinin pisarar péprunmasha shuarnumsha nuna etserarmiayi. Tuma asamtai iyutai tusar ashintiukarmiayi.

15 Túrawar Jesusai jeawarmiayi. Jeawar áishman yaunchu iwianchrukun yamaikia pénger ajasun pushirin entsar pujan wáinkiararmiayi. Wáinkiar ashankarmiayi.

16 Tura waketkiar kuchi túrunamuncha iwianchruku pénger ajasmancha mash etserkarmiayi.

17 Tuma asamtai ni nunkeya jiinki wetá tusa seawarmiayi. Jesus kanunam enkemamtai áishman nuik iwianchruku amia nu Jesusan chicharuk

18 “Wi Ámijiai tuke tsaninkian wekasatjai” tímiayi.

19 Tura núnaka Jesus suritkiamiayi. “Antsu ame jeemiin, áminiurmijn weme, ashí Uunt Yus túrutma nu tura waitnentrampra nusha ujakarta” tímiayi.

20 Tutai áishmansha wémiayi. Tura antsu Tekapuris nunkanam Jesus nin pénger awajsamia nuna ashí shuaran ujakmiayi. Nu nunkanmaya shuarka nuna antukar ti enentáimprarmiayi.

*Jimiará jaan Jesus tsuármiania nu
(Mateu 9.18-26; Rúkas 8.40-56)*

21 Ataksha Jesus kanujai katinmatai, aents untsurí Nin irunturarmiayi. Jesuska antumianka káanmatkari wajamiayi.

22 Tura Israer-shuar iruntai jea náampruku, ni naari Jairu, támiayi. Taa, Jesusan wáiniak, piniakum tepersamiayi.

23 Piniakumar ti seak, “Winia nawantur jarutui. Winitiá, túram péñker ajasat tusam uwejmijiai antintrukta. Nuñkia jarutkashtatui” tímiayi.

24 Tu tímiatai Jesus niijiai wémiayi. Tura untsurí shuar wena ásar Nin chánuarmiayi.

25 Nuñ pachitkia nuwa ti jaa wémiayi. Niisha tuse uwí numpan ajapeak wáitias pujuyayi.

26 Ti untsurí tsuakratin nincha iisu armiayi. Tura iyamsha ti wáitias pujuyayi. Tura ni kuítríncha ashí ajapaitiat tsuámarchauyayi; antsu tsuamsha nu arant ajauyayi.

27 Nu nuwasha, Jesus túramun antuku asa, ni ukuurini amainian ni pushirin antinmiayi.

28 “Wi aya ni pushirin antinaka péñkerapi ajasaintjia” tu enentáimiar túramiayi.

29 Tura Jesusa pushirin antin nú chichamaik numpa ájapman menkakamiayi. Péñker ajasman ayashin nekapramiayi.

30 Tura nuñ Jesuska, ni kakarmarijiai tsuarman nekapmampramiayi. Tura nuna nekáa, ayantar chichaak “¿Yaki winia pushirun antintruka?” tímiayi.

31 Tutai ni unuiniamuri tiarmiayi, “Untsurí Ámin antinmainiasha ¿urukam-tai “yaki winia antintkia” tame?”

32 Tura Jesus, yaki túruta tusa ashí ímpramiayi.

33 Nuñkia nuwasha, ni ayashin túruna nuna nekáa, ti ashamak kuraimiayi. Tura Jesusan jeari tikishmatramiayi. Tura ni túrunamurin ashí paant ujakmiayi.

34 Takui Jesus nin chicharuk “Nawantru, Winia nekas enentáimtursa asakmin, péñker awajtamsaitme. Shiir wetá, tura tuke péñker pujusta” tímiayi.

35 Tura Jesus nuna tuke chichas puja, iruntai jea uuntri jeenia tariarmiayi. Tariar chicharainiak “Ame nawantrum jakayi. ¿Urukamtai Unuikiartin tuke itit awajsatam?” tiarmiayi.

36 Tura Jesuska, nii tiarmia nuna ántayat, núnaka pachitsuk, iruntai jea uuntrin chicharuk “Ashamkaip; áyatik nekas enentáimtursata’ tímiayi.

37 Tura Niijiai wétinian aya Pítruncha, Jakupuncha ni yachi Juanjai tsankatkarmiayi.

38 Iruntai jea uuntri jeen jeawar, áentsun charaatum ajainian, útainian unsumuk ajainiancha Jesus wáinkiamiayi.

39 Tura nuwach penké jakan nékayat, wayá nin chicharuk “¿Urukamtai timiá útrum, tura wa wa ajarum? Nuwach jákachai, antsu kanarai” tímiayi.

40 Nuna takui wishikrarmiayi. Tura Jesus ashí jiiir akupkarmiayi. Áyatik nuwachí aparín, nukuríncha tura Niijiai táaruncha nuwachí tepamurin jukimiayi.

41 Tura wayawar Jesuska nuwachí uwejen achik tímiayi “Taritia kumi.” Nusha shuar chichamjainkia “nawantrú nantáktiá” tawai.

42 Nuwach tuse uwí takakuya nu, nú chichamaik nantaki wekasamiayi. Túramtai nuñ pujuarmiania nu ti enentáimprarmiayi.

43 Jesuska chichaak “Atumsha penké etserkairap’ tímiayi. Tura “nuwach ayuratarum” tímiayi.

6

Jesus Nasarétnum pujusma
(Mateu 13.53-58; Rúkas 4.16-30)

¹ Jesus nuyá jiiñki ni nunken waketkimiayi. Ni unuiniamurisha nemariarmiayi.

² Nuisha ayampratin tsawant jeamtai Israer-shuar iruntainiam wayá unuiniamiayi. Tura Jesusan anturkarmiania nu ti enentáimsarmiayi. “¿Jusha tui unuimiaruit. Ni nekaatniuríncha yaki susait. Tura aentsti tujintiajnía nuna Niisha itiurak tura?”

³ Jusha karpintíruchukait; Marí uchirínchukait. Ni yachisha Jakupusha, Jusesha, Jútassha, Semunsha nékatsjik. Tura ni umaisha jui iijiai pujuiniatsuk” tiarmiayi. Túrawar Nin nekas enentáimtustinian tujinkiarmiayi.

⁴ Túrashash Jesus nin chicharuk “Yúsnan etserniun chíkich nunkanmayanka shiir anturainiawai. Antsu ní nunkeyanka, ní shuarsha anturainiatsui” tímiayi.

⁵ Tura nuisha, ni nunkenkikia aentsti tujintiamun túratniun tujinkiamiayi. Antsu jaancha aya ishichik ni uwejejai antin tsuáirmiayi.

⁶ Tura nekas enentáimtacham “¿urukamtai nusha?” tu enentáimsamiayi.

Nuyasha chíkich péprunam wayá, chíkich péprunam wayá Yus-Chichaman unuiniakní wekaimiayi.

Yus-Chicham etserkatarum tusa Jesus ni unuiniamurín akupkarmiania nu
(Mateu 10.5-15; Rúkas 9.1-6)

⁷ Tuse unuiniamurín untsuk jímiarchik jímiarchik werum Yus-Chicham etserkatarum tusa akupkarmiayi. Tura iwianchin nupetkarat tusa ni kakarmarín súarmiayi.

⁸ Tura chicharuk “Jintiá yurumátniusha jukiirap, uyuntrumiíncha kuitcha enkearum jukiirap. Antsu aya áanik mashtun jukiirum wetarum.

⁹ Sapat uwekatarum, tura entsartincha jímiar jukiirap, tímiayi.

¹⁰ Tura jea wayarmena nuin pujustarum; pujá-pujakuarum nuyá chíkich peprunmasha wetarum.

¹¹ Tura nánkamas aents atumin awaintiamainiachkuisha, anturtamainiachkuisha, nuyá jíinkirum, nu shuar yajauch áiniawai tusarum, atumí nawe nunka akakekrum ikiuktiarum. Kame Yus áentsun nekapsattana nú tsawant jeamtai, nu shuarnaka asutiattawai. Sutuma péprunmaya shuarjai tura Kumura péprunmaya shuarjai nankaamas nin asutiattawai” tímiayi Jesus.

¹² Nuyá Jesusa unuiniamurí jíinkiar enentái yapajiar Yúsai enentáimtumartinian etserkarmiayi.

¹³ Tura iwianchruku enentáiya iwianchin jiiirki akupkarmiayi, tura asuitijiai yakarar untsurí jáinian tsuararmiayi.

Juanka jakamurí
(Mateu 14.1-12; Rúkas 9.7-9)

¹⁴ Jesusa náarin tura ni túramurín ashí aents áujmatin ásarmatai, uunt akupin Erutis nuna antukmiayi. Erutiska “Imiakratin Juan jakamunmaya nantakni. Tuma asa ti kakaram takaawai” tímiayi.

¹⁵ Tura chíkich shuar “Eríasaiti” tiarmiayi. Chikichcha “Yúsnan etserniuiti, yaunchu etserniuya núkete” tiarmiayi.

¹⁶ Erutis nuna antuk “Nekas Juánkaiti. Ni muuken tsupiktinian akupkamiaj nu, jakamunmaya nantakniuiti” tímiayi.

17-19 Kame Uunt akupin Erutis, ni yachi Jiripi nuarín nuatkamiayi. Nu nuwá naarí Jirutíasaiti. Juansha uunt akupniun Erutisan chicharuk “Yatsumi nuarí akintrukchatniuitme’ tímiayi. Tutai nuwá Jirutías Juánkan ti kajerkamiayi. Tura Juánkan máataj tusa wakerimiayi. Túrasha uunt akupin Erutis nuna surimkiamiayi. Antsu Juan achikrum sepunam enkeatarum tusa akupkamiayi.

20 Juansha tuke enentájjai Yusa jintin wekainiuyayi. Erutis, ni esetar enentáimniun neka asa Juánkan ashamak Jirutías wakeramurín túrawain tusa suritkiamiayi. Kame Erutis Juan étserman nékachuitiat antuktinian wakerimiayi.

21 Jirutías, itiurak máawaj tu pujai, uunt akupin Erutis, ni akiiniamu tsawantri jeamtai, ni suntaríncha, Kariréa nunkanmaya úuntríncha, kufrintin armia nunasha untsukar, namperan najanamiayi.

22 Nuisha Jirutíasa nawantri wayá jantsemámtai Erutis tura niijjai nampernum matsarmia nusha shiir enentáimsarmiayi. Túramtai uunt akupin nuwáchin chicharuk “Ame wakeram nu seattia. Wi amastatjai.

23 Nekas tájame, ashí ame seatmena núnaka amastatjai. Wats, seatkumniñkia takakjana nuna jímiapetek nakakan, amastatjai” tímiayi.

24 Tutai nuwách jiinki ni nukurín Jirutíasan chicharuk “¿Wariniak seattaj?” tímiayi.

Tutai “Imiakratin Juanka muuke seata” tímiayi.

25 Nu chichamaik nuwách wari wayá Erutisan chicharuk “Yamaikia uunt amamkunam Juanka muuken wakerajai” tímiayi.

26 Nuna takui uunt akupin ti kuntuts enentáimpramiayi. Tura nii tiniu asa ni amikri matsatainia nu antukaru ásarmatai surimkiatniun tujinkiamiayi.

27 Tuma asa uunt akupin Juanka muuke itiata tusa ni suntarín wárikmas akupkamiayi.

28 Túramtai suntar wari we, sepunam Juanka muuken tsupikmiayi. Tsupik, amamkunam itia, nuwan susamiayi. Túram achik ni nukurín susamiayi.

29 Juan maamun antukar ni unuiniamurí ni ayashin iwiarsatai tusar júkiarmiayi.

*Senku mir áishmankan Jesus ayuramiania nu
(Mateu 14.13-21; Rúkas 9.10-17; Juan 6.1-14)*

30 Tura Jesusa unuiniamurí Nii akupkarma nu, ataksha waketki káunak irunturarmiayi. Ashí nii túrawarmia nuna, unuiniararmia nunasha ujakarmiayi.

31 Tura untsurí shuar táiniakui, niisha ankant ajastinniasha yurumátniuncha tujinkiararmiayi. Tuma asamtai Jesus chichaak “Iijjai wemí aents atsuiniamunam; nuí ishichik ayamprarmi” tímiayi.

32 Nuyá Jesus ni unuiniamuríjjai kanunam enkemprar, aents atsuiniamunam jeatai tusar jíinkiararmiayi.

33 Túrasha shuar ni wéenan wáinkiararmiayi. Tura “Jesusaiti” tiarmiayi. Tuma ásar ashí péprunmaya untsurí shuar tseke ashintiukar, ni jeatniunam nákakarmiayi.

34 Jesus kanunmaya jiinki ti untsurí aents iruntrar matsatun wáinkiamiayi. Murik péñker wáinchataiya núnisan matsatu ásarmatai Jesus nin wáitnentrarmiayi. Tura núkap unuiniararmiayi.

35 Nuyá kjakui ni unuiniamurí Jesusan tariar chicharainiak “Atsamunam pujatsjik; tura yamá kíatsuk.

36 Shuar wari akupkarta. Tíjiuch péprunmasha, shuarnumsha wearti, ni yurumkarí sumarmakarati” tiarmiayi.

³⁷ Tutai Jesus chichaak “Atumek ayuratarum” tímiayi.

Tutai “Isha ju shuar ayuratai tusar, ¿jímíará sian kuitjai yurumak sumaktai tusar wétinkiaitiaj?” tiarmiayi.

³⁸ Tura Jesus ni unuiniamurin chicharainiak “Tanta takakrum nu iistarum ¿urutmak aa?” tímiayi.

Tutai nekapmarar chichainiak “Tántaka sénkuchikiiti, tura namaksha jímiarchikiiti” tiarmiayi.

³⁹ Tutai Jesus tímiayi “Ju shuar chírichriniam pujusarti tusar akupkatarum.”

⁴⁰ Ankant ankant sian siansha, senkuenta senkuenta iruntrar matsam-sarmiayi.

⁴¹ Jesuska senku tantancha, jímiar namaknasha jusa, yakí nayaimpin-maaní íimias Yúsan yuminsamiayi. Tura yurumkan púurmiayi. Puur ni unuiniamurin súarmiayi. Namaknasha puur súarmiayi, ashí shuáran ajamsarat tusa.

⁴² Ashí yurumáwar ejemararmatai,

⁴³ puunaruncha, namak ampirmancha achikiar, tuse chaninian áimkiar júkiarmiayi.

⁴⁴ Nu yurumkan ti untsurí yurumáwarmiayi. Aya áishmankak senku mir (5.000) áirmiayi.

*Jesus entsá pátatek wekasamiania nu
(Mateu 14.22-27; Juan 6.16-21)*

⁴⁵ Nuyá Jesus ni unuiniamurin chicharainiak “Kanunam enkemprarum, katinkrum amain émaa ajatarum, Petsaitia péprunam. Wisha ju shuaran áujsan ikiuktijatjai” tímiayi.

⁴⁶ Shuáran áujas ikiuki Yusjai chichastaj tusa náinnium wémiayi.

⁴⁷ Tura kirit ajasmanum kánuka antumiannum ajapén nanammiai. Jesuska niniki juakmiayi.

⁴⁸ Jesusa unuiniamurisha wia-wiantainiakua ti pimpikiarmiayi, nase tukumma ásar. Nuna Jesus wáiniak tsawartin ishichik ajasmatai entsá pátatek wekas nin jeariarmiayi. Tura nankaamaktiasa wea núnisan wémiayi.

⁴⁹ Jesus entsá wekaan ni unuiniamurí wáinkiar, wakanchashit, tu enentáimprarmiayi. Túrawar ti untsumkarmiayi.

⁵⁰ Ashí wáinkiar ti ashamkarmiayi. Tura Jesus wárik nin chicharuk “Kakaram ajastarum, wíitjai Jesus; ashamprukairap” tímiayi.

⁵¹⁻⁵² Nuñkia entsaya kanunam waka enkempramiayi. Túramtai nasesha majaantmiayi. Ni unuiniamurinkia enentái kiritia áintsan áarmatai Jesus yurumkan núkap awajsamia nuna paant nekaatniun tuke tujinkiarmiayi. Tuma ásar yamá túrunamu itiurak aankia tusar ti enentáimprar sapijmi-akarmiayi.

*Jinisarítniumia shuáran Jesus tsuármiania nu
(Mateu 14.34-36)*

⁵³ Nuyanka katinkiar, Jinisarít núnkanam jeawarmiayi. Jeawar kanun ajuñiarmiayi.

⁵⁴ Kanunmaya jíintrarmatai, nu nunkanmaya shuar Jesusan nekaawarmi-ayi.

⁵⁵ Tura “Jesus pujawai” táman antukar, ashí jeanmaya jaan ni peakrintiuk Jesus pujamunam itiaarmiayi.

⁵⁶ Tura Jesus wekaak wémia nujsha, péprunmasha, shuar matsatmanumsha, ishichik matsatkamunmasha jaan itiarar jintiá áeprusarmiayi. Túmainiak Jesusan pushirmin antintaj tusar seawarmiayi. Tura ashí antinikiarmia nuka péñker ajasarmiayi.

7

Jesus Pariséun áujmatsarmiania nu
(Mateu 15.1-20)

¹ Pariséusha, Israer-shuara jintinniurisha Jerusarénumia Jesusan tari-armiayi.

² Tura Jesusa unuiniamurin ikijmiatsuk yurumun wáinkiar “Israer-shuara túrutairin túruiniatsui” tiarmiayi.

³ (Kame Pariséusha, tura ashí Israer-shuarsha, ni uuntri jintintiamurin umikiar ti núkap ikijmiarar yurumin áirmiayi.

⁴ Péprunmaya tari “ikijmiatsuk yurumáshtiniaiti” tiniu áirmiayi. Tura ti untsurí ni uuntri túrutairi núnisan áirmiayi. “Tsapancha, ichinnasha, jiruncha, peaknasha nijiakartiniaiti” tiniu áirmiayi.)

⁵ Tuma asamtai Pariséusha, Israer-shuara jintinniurisha Jesusan chicharainiak “¿Urukamtai ame unuiniamuram ii uuntri jintintramniuitiaj nuna túruiniatsu. Urukamtai ikijmiatskesha yurumáinia?” tiarmiayi.

⁶ Tutai Jesus tímiayi “Ántar chichamtiniaitrume. Isayas yaunchu nekas atumin áartampramiayi juna:

Ju aents ni wenejai Winia “ti pénkeraiti” turutainiawai, tímiayi Yus, tura ni enentáinkia jeachat pujuiniawai.

⁷ Tura tukeneas Winia shiir awajtuiniawai. Aentsu chichame jintiainiyat, “Yus-Chichamaiti” tuíniawai.”

Tu áarmaiti.

⁸ Tura átum Yusa chichame iniaisarum, aentsu jintintiamurí umirkarum, ichinnasha, tsapancha nijiahtin, tura chíkich túrutaisha áintsarmek untsurí túrarme.

⁹ Túrákrum Yus-Chichamka tsukintiaani ikiusurme atumí uuntri chichame umirkatai tusarum.

¹⁰ Kame Muisais yaunchu aar juna tíchamka:

Ame apa nukusha shiir enentáimtustarum.

Tura ataksha áarmiayi:

Shuarsha ni aparín, nukuríncha yajauch chichareakka, nu shuar jákatniuiti.

¹¹⁻¹² Túrasha átumka Pariséutirmeka, antsu ju tárume: “Shuar ni aparín ni nukurín chicharuk “Wi yáintinian takakjana nu Kurpanaiti” takuinkia, atumsha pénkeraiti, aparíncha nukuríncha yáinchatí” tarume. (Kurpan tana nuka, Yus susamu, tawai.)

¹³ Nekaatarum, Pariséutiram. “Í yaunchu uuntri chichame tuke umiki wétiniaitji” tákurum, Yus-Chicham penké ántar chichama núnin awajearme. Núnisrumek chikichcha untsurí túrarme.” Tu timiayi Jesus.

¹⁴ Nuyá ataksha Jesus ashí shuáran untsukar “Mash anturtuktarum, ashí nekaatarum, tímiayi.

¹⁵ Aaya ayashnium wayaana nu, shuáran yajauch awajsachminiaiti; tura antsu ni enentáinia jiihia nu, yajauch awajsattawai.

¹⁶ Shuar nuna ántakka enentáimprati” tímiayi.

¹⁷ Nuyá áentsun ikuiak, jea wayamtai, ni unuiniamurí aniasarmiayi “¿Nu métek-taku chicham warintiua?” tiarmiayi.

¹⁸ Tutai Jesus tímiayi “Atumsha nékatsrumek. Páantchakait; yurumak yúajnia nu, enentáiniam wayachu asa, shuáran yajauch awajsachminiaiti.

¹⁹ Antsu wakenam wayá, nankaamas menkaatsuk” tímiayi. Nuna taku, ashí yurumak páchitsuk yuamniaiti, tímiayi.

²⁰ Nuyá tímiayi “Shuara enentáinia jiihia nu, yajauch awajsamniaiti.

²¹ Shuara enentáinia, initia, yajauch enentáimsatniusha, tsanirmatniusha, natsa tsanirmatniusha, shuar máatniusha,

²² kasamkatniusha, chikichna wakeruktincha, péñkercha túratniusha, anankatniusha, natsantain átincha, yajauch enentáimtustincha, tsanumpratniusha, waantu enentáimtumastincha, netse túratniusha, ashí nuka inítiá wininiatsuk.

²³ Ashí nu tunáa ainia nu, shuara enentáiniá jíiniu asa, shuáran yajauch awajainiawai” tímiayi.

Serupinísianmaya nuwá Jesusan nekas enentáimtusmania nu (Mateu 15.21-28)

²⁴ Tiru pepu, Setún péprusha Serupinísia nunkanam ámiayi. Nuka Israer-shuara nunkenchauyayi. Nu nunkanam Jesus wémiayi. Tura jeá, jeá wayáa pujusmiayi. Tura nuí pujamun nu nunkanmaya shuar nekarawarain tusa nakitmiayi; túrasha uumkatniun tujinkiamiayi.

²⁵ Wárik nu nunkanmaya nuwá Jesus pujan nekaamiayi. Nu núwaka nawantri iwianchrुकuyayi. Tuma asa Jesusan tarí ni nawen piniakum tepersamiayi.

²⁶ Nu nuwá Israer-shuarcha, Serupinísianmayauyayi. Túmaitiat, nawantru enentáiyá iwianchin jíirturkitia tusa Jesusan seamiayi.

²⁷ Tutai Jesus nuwan chicharuk “Uchi emka ejemarartí. Uchi apatkuri atankir yawach súsatin péñkerchaiti” tímiayi.

²⁸ Tutai nuwá ayak “Nekas, Uunta, tame. Tura yawachisha misanam wakenam pujuinia nu, uchi apatkun yurumuk juyumak kákeamun yuíníatsuk” tímiayi.

²⁹ Tutai Jesus tímiayi “Péñker tame. Tuma asam, shiir wetá; ame nawantrumi enentáiyá iwianch jíinkiyi” tímiayi.

³⁰ Takui niisha wémiayi. Tura ni jeen jeá, ni nawantrin íwianch jíinkimtai péñker ajas peaknum tepan wáinkiamiayi.

Jesus empekun tsuármiania nu

³¹ Jesus Tirunmaya jiinki Setún péprunam nankaamarkutak, Tekapuris nunkanmaani nankaamaki, Kariréa antumiannum ataksha jeamiayi.

³² Nuí chichachu ámiayi, kuishin empeku. Nu shuáran Jesusan itiariar, ni uwejejai antiñkiat tusa seawarmiyai.

³³ Shuar matsatmanumia Jesus nin akanki jukí kuishin tsara uwejejai tsutsukruamiayi. Tura usukia, nu shuara iniajin antintkiamiayi.

³⁴ Tura nayaimpinmaaní ímias súkaska mayati “Epata” tímiayi. Nuka, shuar chichamnumka “chinkiatí” tawai.

³⁵ Nu chichamaik ni kuishisha chinikiamiayi, iniaisha séermiyai. Tura paant chichasmiyai.

³⁶ Tura Jesus chicharainiak “Peñké etserkairap” tímiayi. Jesuska surí-suritiamaitiat, nu nankaamas etseriarmiyai.

³⁷ Tura ti enentáimprarmiyai. Enentáimprar, “Ju Jesus aya péñkeran túrawai. Empekuncha ántumtikniaiti, tura chichachun chichamtikniaiti” tiarmiyai.

8

Kuatu mir shuáran Jesus ayuramiania nu (Mateu 15.32-39)

¹ Nu tsawantái shuar timiá untsurí iruntrarmiyai. Yurumkarí atsakui Jesus ni unuiniamurín untsukar juna tímiayi:

² “Ju shuáran waitnentajai. Maintiú tsawant Wijíai pujuinia ásarmatai ni yurumkarí amuukachaik.

³ Tura ni jeen ayurtsuk akupeamka, tsukariin jintiá pimpikiartatui, yajaya káunkaru ásar” tímiayi.

4 Tutai ni unuiniamur_i chichainiak “Túrasha ju_i atsamunam, ju_i aents ejemararat tusar ¿tuyá yurumkak wáinkiat_{taj}?” tiarmiayi.

5 Tutai Jesus nin aniasmia_{yi} “¿Urut_{má} tanta aa?”

Tutai “siati awai” tiarmiayi.

6 Nuin_kia ashí áentsun “nun_{ká} puj_ustarum” tiarmiayi. Tura tantan achik, Yúsan yum_in_samiayi. Tura puuk, áentsun ajamsatarum tusa ni unuiniamur_in susamiayi.

7 Tura uchich namaksha ishichik aan achik, Yúsan yum_in_kias, ni unuiniamur_in chicharuk “Jusha shuar ajamsatarum” tímiayi.

8 Turam ashí yurumáwar ejemararmiayi. Ampirma púunaruncha siati cha_nkinnium áimkiarmiayi.

9 Kuatru mir (4.000) shuar yurumáwarmia_{yi}. Yurumáwar amikiarmatai, Jesus nin áujas akupkarmiayi.

10 Tura ni unuiniamur_ijia_i kanunam en_kemprar Tarmanúta nun_kanam wearmiayi.

Pariséu Jesusan iniakmasta tiarmiania nu

(Mateu 16.1-4; Rúkas 12.54-56)

11 Pariséu Jesusja_i áujmatsatai tusar tariarmiayi. Nekapsatai tusar wakeru-
iniak Nin chicharuk “Nayaimpinmaya kakaram iniakmasta” tiarmiayi.

12 Tuíniakui Jesus kúntuts enentáimias, súkaska mayati “¿Urukantai, yamaiya aentstiram, nayaimpinmaya kakarman iniakmasat tusarum wakerarum? Nuka pen_{ké} sunaschattarme, paant tájar_me” tímiayi.

13 Nuyá nin ikiukiar ataksha kanunam en_kemar amain kati_nmiayi.

Pariséu túramurijia_i aneartarum, tímiayi Jesus

(Mateu 16.5-12)

14 Tura ni unuiniamur_i yurumak jukitiai tukamá kajinmatkiarmiayi. Kanunma_nka aya chikichik tantanak takaku ármiayi.

15 Jessha ni unuiniamur_in enentáimtikiuk tímiayi “Wáinkiatarum; Pariséusha Erutissha wakaprutain takakainia núja_isha aneartarum” tímiayi.

16 Tutai ni unuiniamur_isha tunaiyarmiayi “Tanta kajinmatkin asakrin nuna túramtsuj_iash” tiarmiayi.

17 Tura Jesus nuna nekáa chichaak “¿Urukantai aya yurumkak enentáimtarum? Tuke nékatsrumek. Pen_{ké} enentáimtsurmek. Atumí enentá_i tuke kiritk_iait? tímiayi.

18 Jimi a_isha itiura wáintsurmea. Kuíshim a_isha itiura ántatsrum. Ashí kajinmatkintrumek.

19 Nekaatarum, nuik, se_nku tantan púuran se_nku mir áishma_nkan ayurachmakaj. ¿Tura ampirma urut_{má} cha_nkinnium chumpiamarum?” tímiayi.

Niisha tiarmiayi “Tuse cha_nkinnium chumpiam_ji.”

20 Ataksha Jesus tímiayi “Tura siati tantaja_i kuatru mir shuaran ayuram_tai, ¿ampirmasha urut_{má} cha_nkinnium chumpiamarum?”

Niisha “siati” tiarmiayi.

21 Tuma asam_tai Jesus tímiayi “¿Itiura imiá nékatsrum?”

Jesus kusurun ímtiksamiania nu

22 Nuyá Petsaitia péprunam jeawarmiayi. Jeawarmatai, áishma_n j_ii kusurun Jesusan itiararmiayi. Túrawar anti_nta tusar seawarmiayi.

23 Tuma asam_tai Jesus uwejn_um achik péprunam a_ni en_keki jukí j_in usukij_iai kuérmiayi. Tura uwejéja_i anti_n “¿íimmek?” tímiayi.

24 Tutai kusuru ími tímiayi “Aentsun iijajai, túrasha paantcha. Numi wekainian áaniun iijajai” tímiayi.

²⁵ Nuyá ataksha Jesus ni uwejéjaj kusuru jijn antinmiayi. Tura kusurusha úmamkes iis, péñker ajas, ashí paant ímprimiayi.

²⁶ Jesus chichaak “Jeemjijn weakum péprunam wayawaip tura shuar ujakaip” tímiayi.

*Pítiur Jesusan “Yusa Anaikiamurinme” tímiania nu
(Mateu 16.13-20; Rúkas 9.18-21)*

²⁷ Jesus ni unuiniamurijjaj uunt pepru Sesaria-jiripiunam jeatsuk, tíjjuch uchich péprunam irasarmiayi. Jintiá wésar Jesus ni unuiniamurijn chicharainiak, “¿Yaiti turutainiawa Winia?” tímiayi.

²⁸ Tutai niisha áimkiarmiayi “Chíkich chichainiak, imiakratin Juankaiti, turamainiawai. Chíkichcha, Eríasaiti, tura chíkichkia, yaunchu Yúsnan etserin nantakniua núiti, turamainiawai” tiarmiayi.

²⁹ Tutai Jesus tímiayi “Atumsha, ¿waritrume. Yáitijaj?” tímiayi.

Tutai Pítiur tímiayi “Ámeke Krístuitme; Yúsaiya akupkamuitme.”

³⁰ Tutai Jesus chichaak “Peñké etserkairap” tímiayi.

*Jesus ni jákatniurijn ujakmiania nu
(Mateu 16.21-28; Rúkas 9.22-27)*

³¹ Unuiniak: “Wi Aents Ajasuitjiana ju ti wáitsatniuitjai. Israer-shuarti ii untrisha, Patri úntrisha, ii jintinniurisha Winia nakitrurar mantuawarta-tui. Túrasha menaintiu tsawant nankaamasmatai nantaktinijaj” tímiayi.

³² Nunasha paant ujakmiayi.

Tura Pítrusha Jesusan arantach jukí kakantramiayi. “Tu chichasaip” tímiayi.

³³ Tutai Jesus ayantmatar, ni unuiniamurijn iis, Pítrun kakantar chicharuk “Satanása, werumta. Ámeke Yusna ana nu enentáimtatsme, antsu aya áentsnak enentáimtame” tímiayi.

³⁴ Nuna tuasua amik tura nui matsamarmia nunasha, ni unuiniamurijncha untsuk tímiayi, “Shuar Winia nekas nemartustasa wakerakka ni wakera-murinkia iniaisati; tura ni krusri yanaki nemartustí.

³⁵ Kame shuar ju nunkanam aya niñki anenmamkunka nu shuar ni iwiaakmarin emenakattatui. Antsu Winia anentu asa tura winia chichamprun anea asa, shuar aya péñker pujustinniak enentáimtsuna nu, nekas iwiaakman wáinkiatstawai.

³⁶ Nekaata, shuar ashí ju nunkanam írunna nuna sumaksha túrasha ni wakanj jinium wéakuisha, ¿itiurak péñker pujusaint?

³⁷ Shuarka wakanin uwentikrataj tusa wakerak ¿urutmak akikmakaint?

³⁸ Antuktarum. Yamaiya aents Yúsan nakitjar ajapawaru yajauch ainia nu íimiainiamunam shuar Winia natsantrakuinkia tura winia chichampruncha natsantakuinkia, wi, Aents Ajasuitjiana ju, winia Aparu kakarmarijjaj tura nayaimpinmaya péñker suntarjaj atak taakun, nú shuaran natsantrattajaj Wisha.’ Tu tímiayi Jesus.

9

¹ Ataksha Jesus nin chicharuk, ‘Nekas tájarme, shuar játsuk Yus ni kakarmarijjaj aentsu enentáin akupkattana nú tsawantan wáinkiatstawai nu jui iijjaj pujuiniawai” tímiayi.

*Jesus nusháa iira ajasmiania nu
(Mateu 17.1-13; Rúkas 9.28-36)*

² Nuyá sais tsawant nankaamasmatai, Jesus Pítruncha, Jakupuncha, Juánnasha uunt náinnium júkiarmiayi. Nuisha Jesus nushá iira ajasmiai.

³ Ni pushirisha ti puju jíitsumir ajattsarmiayi. Nujai métek puju awajsatin ju nunkanam atsawai.

⁴ Túruna nui Erías, Muisaisjai wantinkiar Jesusjai chichainian wáinkiarmaiayi.

⁵ Nuyasha Pítiur Jesusan chicharuk “Uuntá, ii jui pujustin ti péñkeraiti. Menaintiú áakmaktai, Áminiu chikichik, Muisaisna chikichik, Eríasnasha chikichik” tímiayi.

⁶ Jesusa unuiniamuri sapijmainiak, Pítiur wariniak titi nekaachmaiayi. Nékachu asa nuna tímiayi.

⁷ Tura yuran kim tara mikintiu awajsamiayi. Yuranminmaya chichaak “Júiti winia aneamu Uchir. Nii anturkatarum” tímiayi.

⁸ Nuyanka ni unuiniamuri ayantmar iiyaj tukamar aya Jesusnak wáinkiarmaiayi. Chíkichkia atsuarmiayi.

⁹ Nuyá náinniumia akainiak Jesus nin chicharuk “Wáinkiarumna nu et-serkairap. Wi, Aents Ajasuitjana ju jakamunmaya nantaatsain nu et-serkairap” tímiayi.

¹⁰ Tutai ni tímian ímiatrusan úukarmiayi. Tura “jakamunmaya nantaatsain tana nu, ¿wariniak ta?” nuamtak tunainiarmaiayi.

¹¹ Tura Jesusan aniasarmiayi “¿Urukamtai Israerti ii jintinniurisha, Erías emka tátiniaiti, tuinia?” tiarmiayi.

¹² Tutai Jesus tímiayi “Nekas Erías ashí iwiarattsa emka tátiniaiti. ¿Tura Aents Ajasunun Yus-Papinium warintiua?

“Ti wáitsattawai; Nin nakitrartatui.” Tu áarmaiti.

¹³ Wi tájarne, Erías nekas táwiti. Támatái, shuar ashí ni wakeriarmia nuna nin túrawarmiayi. Yusa Papiriin Eríasa túrunatniuri aarma amia tímiatrusan túrawarmiayi” tímiayi Jesus.

*Jesus iwianchin jiiki akupkamiania nu
(Mateu 17.14-21; Rúkas 9.37-43)*

¹⁴ Tura ni unuiniamuri matsatmanum atak wáketuk, ti untsuri aents káutkar Israer-shuara jintinniurisha niijjai tunai pujuinian wáinkiamiaiayi.

¹⁵ Tura aencha, Jesusan wáinkiar warainiak, tsékeñki weriar, áujarmiayi.

¹⁶ Túrunawarmatai, Jesus chicharainiak, “Warí tunaiyarum?” tímiayi.

¹⁷ Tutai chikichik ayak “Uuntá, winia uchirun Ámin itiarjame. Iwianchruku asa chichachuiti.

¹⁸ Túmakui íwianch enkemtakun paat ajar áepeawai; túram uchisha saun kaput apak nain kátetete awajeawai. Túram kakaakcha ame unuiniamurmin seamjai, jíirtukti tusan, túrasha tujintrutkarai” tímiayi.

¹⁹ Tutai Jesus tímiayi “Yúsan enentáimtichutirmea urutmá tsawantak pujustaj atumjai. Urutmá katsuntrataj! Uchi itiatarum” tímiayi.

²⁰ Takui uchin Jesusan itiararmiayi. Tura íwianch uchin enkemta Jesusan wáiniak uchin ajakramiaiayi. Uchisha chichiatur nunká iniaan péper-péper ajakin wenunam saun apakmaiayi.

²¹ Túrunamtai Jesus ni aparín aniasmiayi “¿Urutá yaunchu áinkiait?”

Tutai ni aparí tímiayi “Úchichik áinkiaiti.

²² Tuma asa tuke jutikiú pujurniuiti; jiniumsha apeawai, entsá maataj tusa ajuaawai. Yaintrukminiaitkiumka waitneasam yaintrukta” tímiayi.

²³ Tutai Jesus chicharuk “¿Urukamtai, yaintrukminiaitkiumka, tame? Nekaata, shuar Winia nekas enentáimturna nu ashí túramniaiti” tímiayi.

²⁴ Tutai uchi aparí kakantar chichaak, “Uuntá, nekas enentáimtajme. Nekas enentáimtustinian táasjana nu yáintkiata” tímiayi.

25 Tura shuar untsurí káunainian Jesus wáiniak kakantuk “Empeku chichachu awajin iwianchi jíinkitia, tájame. Jíinkim ataksha wayawaipia” tímiayi.

26 Tura íwianch jíiniuk untsamak uchin we-werkasa ajakar chichichiptu áepkimiayi. Túram uchi jaka ímianis tepemiayi. Túrunamtai untsurí shuar “jakayi” tiarmiayi.

27 Támanak Jesus uwejen achik awajkimiayi, tura uchi nantaki wajakmiayi.

28 Tura Jesus jeá wayamtai, níinki pujusar, ni unuiniamurí aniasar “¿Urukamtai iisha jíiktin tujinkiamaj?” tiarmiayi.

29 Tutai Jesus tímiayi “Ju iwianchkia ijiarmar Yus áujkur jíikminiaiti” tímiayi.

Jesus ataksha ni jákatniurin ujakmiania nu

(Mateu 17.22-23; Rúkas 9.43-45)

30 Nuyá jíinkiar Kariréa nunkanmaani nankaamakarmiayi. Ni unuiniamurín unuinia asa nu nankaamamun nekaawarain tusa Jesus nakitmiayi.

31 Unuiniak juna tímiayi: “Wi Aents Ajasuitiaj juna mantamnati tusar achirkar surutkartatui. Tura máamuitiatnak, iwiarsamunmayan menaintiú tsawantaj nantaktiatjai” tímiayi.

32 Tura nu chichaman nekaacharmiayi. Nékainiachiat, anintrustinian arantukarmiayi.

“¿Yaki imiá nankaamantuit?”

(Mateu 18.1-5; Rúkas 9.46-48)

33 Nuyá Kapernáum péprunam jeawarmiayi. Tura Jesus jeá pujus ni unuiniamurín aniniak, “¿Atumsha jintiá winisrum warí áujmatmiarum?” tímiayi.

34 Tura natsarar pachischarmiai. Kame jintiá wésar “íijjai ¿yaki imiá nankaamantu ajasat?” tunainiarmiayi.

35 Ni unuiniamurí pachischarmatai, Jesus pujus ashí tuse unuiniamurín irur chichaak “Shuar nekas nankaamantu ajastajtsa wakerakka, peejchachia nuke enentáimtumar shuara yáintri atí” tímiayi.

36 Tura uchin itiáa miniakas chichaak:

37 “Shuar uchin winia naarui shiir awajeakka Winia shiir awajtawai. Tura Winia akuptukua nunasha shiir awajeawai” tímiayi.

“Shuar in nakitramachkuṅka in páchitkiawai”

(Rúkas 9.49-50; Mateu 10.42)

38 Nuyá Juan Jesusan chicharuk “Untá, shuar ame náarmin pachis iwianchin akupea wainkiamji. Tura íijjai írutkachu asamtai nu túratin suritki-amji” tímiayi.

39 Tutai Jesus tímiayi “Antsu suritkiairap. Shuar winia náarun pachis tujinkiamun túrakka, nu shuar warí tsanumprutratniun tujinkiattawai.

40 Shuar in nakitramachkuṅka, in páchitkiawai, tímiayi.

41 Winia nemarka asakrumin shuar yumiichinkesha ajampramkuka ántar túratsui; akikma átatui’ tímiayi.

(Mateu 18.6-9; Rúkas 17.1-2)

42 Tura shuar ju uchin Winia umirtuinia nuna yajauchin túrumtikiamtainkia, ti asutniattawai. Tuma asamtai uchin yajauchin túrumtiktsain kuntujen kayajai jíinkiar nayaantsanam ajunmaka maak ainti.

43 Ame uwejmek yajauchin túrumtikramamniaitkuinkia tsupikta. Mai uwejtuk wáitsatniunam jeatniujainkia chikichík uwejjai ju nunkanam pujusar tuke iwiaaku pujustinnium jeatin ti shiiraiti. Warí, wáitsatniunmanka ji kajinkiashtin awai,

44 jákaru akarisha jáiniatsui tura jisha tuke kapaawai.

⁴⁵ Nawemsha yajauchin túrumtikramamniaitkuinkia nusha tsupikta. Mai nawentuk wáitsatniunam jeatniujainkia chikichík nawejai ju nunkanam pujusar tuke iwiaaku pujustinnium jeatin ti shiiraiti. Wáitsatniunmanka ji kajinkiashtin awai,

⁴⁶ jákaru akarisha jáiniatsui tura jisha tuke kapaawai.

⁴⁷ Jimisha yajauchin túrumtikramamniaitkuinkia ukuinkiata. Mai jiiintiuk wáitsatniunam jeatniujainkia chikichík jijijai ju nunkanam pujusar Yus akupeana nu jeatin ti shiiraiti;

⁴⁸ wáitsatniunmanka jákaru akarisha jáiniatsui tura jisha tuke kapaawai.

⁴⁹ Namañ Yus susamu weaktinia áintsañ aentstirmesha jijijai nekapnastatrume.

⁵⁰ Weesha ti penkeraitiat michumarka, ¿itiurak jea-jeat átinkⁱ? Wats, wee jeakua áintsarmek atumek shiir enentáimtunaistarum” tímiayi Jesus.

10

Nuwa ajapatniun Jesus áujmatsamiania nu
(Mateu 19.1-12; Rúkas 16.18)

¹ Jesus Kapernáumnumiá jiiinki, Jutía nunkanam nankaamaki, Jurtañ entsa amain jeamiayi. Nuñ pujai, aents ataksha Nin irunturarmiayi. Iruntrarmatai tuke túrin asa ataksha unuiniamiayi.

² Tura Pariséu Jesusan nekapsatai tusar wakeruiniak, Nin chicharainiak “¿Áishman ni nuarí ajapatin tsankamkamukait?” tiarmiayi.

³ Tutai Jesus tímiayi “¿Muisais wariniak timia?”

⁴ Tutai “Papíjjai in ajapatniun tsankatramkamiaji” tiarmiayi.

⁵ Tutai Jesus tímiayi “Atumí enentái kátsuram asamtai nu chichaman atumin tsankatramkamiarme.

⁶ Tura Yus yámankamtaik ashí najanamia nuñ, áishmanasha nuwancha najanamiayi.

⁷ Tuma asamtai áishman ni aparíncha nukuríncha kanaki ikiuki, ni nuaríjjai tsanintiniaiti.

⁸ Warí, áishman nuaríjjai jímiaraitiat chikichik ajasartatui. Tuma asamtai yamáí jímiarhaiti, antsu chikichik ajasuiti.

⁹ Tuma asa, Yus atsaniania nuna, aents akankashtiniaiti” tímiayi.

¹⁰ Tura urum jeá wayawar, Jesusa unuiniamurí nu chichaman ataksha aniasarmiayi.

¹¹ Tuiniakui Jesus tímiayi “Shuar ni nuarín ajapa ikiuak chikichan nuátkanka, emka nuarín yajauch awajas, ikiuak, tsanirmayi.

¹² Nuwasha ni áishri ajapa ikiuak, chikichjai niiniurtukka, niisha tsanirmayi” tímiayi.

Jesus uchin shiir awajsamiania nu
(Mateu 19.13-15; Rúkas 18.15-17)

¹³ Antinkiarat tusar uchin Jesusan itiararmiayi. Túruiniakui Jesusa unuiniamurí “itiairap” tiarmiayi.

¹⁴ Tura Jesus nuna wániak, kajek juna tímiayi “Uchi Winí winitin tsankatruktarum. Suritkiairap. Iis, shuar ju uchía núnisan peejchach enentáimtumainia nu Yusa akupeamurín pachiinkiamniaiti.

¹⁵ Nuní asamtai tájarme, uchi umiana núnisan Yusa akupkamurín shuar umíachkunka nuna pachiinkiachminiaiti.

¹⁶ Nuyá uchin miniakas, “Yus yáinmakarti” tímiayi.

Kuítrintin Jesusan áujsamiania nu
(Mateu 19.16-30; Rúkas 18.18-30)

17 Ukunam, Jesus nuyá weai, shuar tseke Nin tarimiayi. Tarí tikishmatar chicharuk “¿Uuntá, Amesha ti péñkeraitme. Tuma asam, turuttia, ¿warinia túrakna tuke iwiaaku átataj?” tímiayi.

18 Tutai Jesus tímiayi, “¿Urukantai Winia, péñkeraitme, túrutam? Shuarka chikichkisha péñkerka atsawai. Aya Yúsak péñkeraiti.

19 Yus akupkamu nékatsmek. Ju áiniawai: tsanirmawairap, mañkartuawairap, kasamkairap, chíkich shuar tsanumprurairap, anañkartuawairap, apasha nukusha umirkatarum. Nu áiniawai” tímiayi.

20 Tutai kuítrintin chichaak “Uunta, núnaka úchichik mash umiki tsakaruitjai” tímiayi.

21 Tutai Jesus iis waitnenmai tímiayi “Chikichik táasume. Weme ashí áminiu ana nu surukta. Túram nu kuit kuítrincha susarta. Túrakum nayaimpiniam kuítrum ikiaunñkattme. Túram winitia, krus yanaktinia áintsamek itiurchatrum aijn nemartusta” tímiayi.

22 Tura kuítrintin nu chichaman antuk, wake mesek, kúntuts enentáimiar wémiayi, ti kuitrintin asa.

23 Nii wématai, Jesus ashí ni téntakmarin iis, ni unuiniamurin chicharuk, “Kuítrintin ainia nu Yusa akupeamurin pachiinkiatin ti itiurchaiti” tímiayi.

24 Takui ni unuiniamuri nuna antukar niisháa enentáimprarmiyai. Túramtai Jesus tímiayi “Uchiru antuktarum. Shuar kuítriniak enentáimtuinia nuka, Yusa akupeamurin pachiinkiatin penké itiurchataiti.

25 Uunt kamiriu auja jin wayatin ana nú nankaamas, kuítrintin Yusa akupeamurin pachiinkiatin itiurchataiti” tímiayi.

26 Nuna antukar nú arant niisháa enentáimprarmiyai. “¿Nuñkia yaki uwempranniait?” tunaiyarmiayi.

27 Tura Jesus nin iisar chichainiak “Aents ninñki túrachminiaiti, antsu Yus túramniaiti. Yuska ashí túramniaiti” tímiayi.

28 Nuyá Pítiur Nin chicharuk “Iis, iikia ashí ikiukir némartujuk” tímiayi.

29 Tutai Jesussha tímiayi, “Nekas tájarne, shuar Winia nemartak Yus-Chichamnasha ipiampartasa wakerak ni jeencha, yachincha, umaincha, aparincha, nukurincha, nuarincha, uchirincha, nunkencha uyumatsuk ik-iuakka,

30 nu shuar ju nunkanam sian patatnas jeencha, yachincha, umaincha, nukurincha, uchirincha, nunkencha, ju nunkanam wáitiatatui. Tura ukunam, nunka amuukamtaí, nu shuarsha jáchatainiam tuke péñker pujustatui.

31 Tura untsurí shuar yamáí penkerí ainia nu, ukunam ukunmaaní pujusartatui, tura íksañ untsurí shuar yamáí ukunmayá ainia nu, ukunam eem pujusartatui” tímiayi Jesus.

*Jesus ni jákatniuri ataksha ujakmiania nu
(Mateu 20.17-19; Rúkas 18.31-34)*

32 Nuyá arak Jerusarénum wéenak, jintiak wearmiayi. Jesuska émak wémiayi. Ni unuiniamurisha niisháa enentáimprarmiyai. Ashamainiayatán Jesusan nemarsarmiayi. Túmainiaí atak ni nekas unuiniamurin akankiar, ni túrunatniurin ujakmiayi.

33 Ujaak tímiayi “Antuktarum, arak Jerusarénum wéaji. Nuí Winia, Aents Ajasuitjiana juna, Patri uuntriincha, jintinniunmasha surutkartatui. Niisha apachnium mantamnati tusar surutkartatui.

34 Nusha Winia wishikrurar, katsumprukar, usukruawar mantuawartatui. Túramaitatnak menaintiú tsawantaj nantaktiatjai” tímiayi.

*Jakupu Juanjai seawarmiania nu
(Mateu 20.20-28)*

³⁵ Sepetéu uchirí Jakupusha Juansha Jesusan taruntarmiayi. Taruntar “Uuntá, ii seattajnia nu túrak tusar wakeraji” tiarmiayi.

³⁶ Tutai Jesus tímiayi “¿Warí itiurtukat tusam wakerutam?”

³⁷ Tutai “Ame nupetmaktin tsawantrum jeamtai, iisha Ámijiai pujustaitsar wakeraji, wi untsuurumini, winia yatsursha menaarmini. Nu tsankatrukta” tiarmiayi.

³⁸ Tura Jesus tímiayi “Átum seatrumna nu nékatsrume. Wi umartatjana nu umarminkaitrum. Tura Wi imiantiatjana núnisrum imianminkaitrum” tímiayi.

³⁹ Niisha tiarmiayi, “Túramniaitji, páchitskea.”

Tuiniakui Jesus tímiayi “Wats, Wi umartatjana nu umartatrume, tura Wi imiantiatjana núnisrumek imiantiatrume.

⁴⁰ Túrasha winia untsuuruini, menaruinisha átum pujustinian Wikia súsashtiniaitjarme, antsu Yus wakerana nu nuin apujsattawai” tímiayi.

⁴¹ Tura chíkich tias unuiniamuri nuna anturkar Jakupuncha, Juánnasha ti kajerkarmiayi.

⁴² Tura Jesus ni unuiniamuri irur tímiayi “Ju nékarme; Yus-shuarchanum akupniuitjai tuinia nu, waantu enentáimtumas, ni shuarin ti akupeawai; tura uunt ainia nusha ashí shuar ti takamtikiainiawai.

⁴³ Antsu atumjai núnisan atsutniuiti. Átumka, wi unuiniamutiram, uunt ajastaj tusarum wakerakrumka, ashí yáimin ajastiniaitrum.

⁴⁴ Shuar atumí penkeri ajastajtsa wakerakka, takarniua nuke ajas, umir-tamkatí.

⁴⁵ Wisha, Aents Ajasuitjiana ju, shuar takartusarat tusan táchamjai, antsu ashí shuaran yáintaj tusan táwitjai. Wisha jarukan shuaran uwentikratajtsan táwitjai” tímiayi.

*Jesus Partimiásan tsuármiania nu
(Mateu 20.29-34; Rúkas 18.35-43)*

⁴⁶ Jesus ni unuiniamurijiai, tura chíkich untsurí aentsjai Jirikiú péprunam jeawarmiayi. Nuyá Jirikiúnmayasha jíinkiar weenai, Timiasa uchirí Partimiás, kusuru amia nu, jintiá yantam kuítian seamu pujumiayi.

⁴⁷ Niisha, Nasarénumia Jesusaiti táman antuk, untsukum “Uunt Jesusa, amesha Uunt Akupin Tawit weeachukaitiam, Yus anaikiachmakaitiam. Winiaja waitnenturta” tímiayi.

⁴⁸ Tura untsurí nuji matsamarmia nu nin chicharainiak “Takamatsata” tiarmiayi.

Niisha nú nankaamas untsummiayi “Tawit weeá Jesusá, winia waitnenturta.”

⁴⁹ Nuna antuk Jesus wajas, chichaak “Untsuktarum” tímiayi.

Takui shuar kusurun untsuiniak “Kakaram ajasta. Wajaktia; untsur-mawai” tiarmiayi.

⁵⁰ Tuiniakui niisha esekmatairin ajapa ikiuak wajaki Jesusan tseke tarim-iaiyi.

⁵¹ Tura Jesus nin chicharuk “¿Winia itiurtukat tusamea wakerutam?” tímiayi.

Tutai kusuru chicharuk “Uunta, ímtiasan wakerajai” tímiayi.

⁵² Tutai Jesus chichaak “Shiir wetá. Winia nekas enentáimtursa asam penker ajasume” tímiayi. Tura nu chichamaik ímpramiayi. Tura Jesusan nemarki wémiayi.

11

Jesus Jerusarénnu wayamiania nu
(Mateu 21.1-11; Rúkas 19.28-40; Juan 12.12-19)

¹ Wésar Jerusarénnu tura Petpajái péprusha Petania péprusha Uriwiu naint ínkiuasmak ámanum jeawar, Jesus jímíará unuiniamurín ujuikimiayi.

² Ujuiak tímiayi “Aatuniní pépruchiniam werum nuín umpuuru uchich jin_kiamu wáinkíattarme. Nu umpuuruuka tuke entsamprukchamuiti. Nu atiarum utitiarum.

³ Tura “¿Urukamtia áitkiarum?” turamainiakusha, “ii Uuntri wakerawai” titiarum” tímiayi.

⁴ Tutai wearmiayi. Tura umpuurun wáitiniam aani jin_kiamun, jintiá yantannu wajan wáinkiar atiwarmiayi.

⁵ Nu j pujuarmia nu “¿Warí áitkiarum. Urukamtai umpuuru atíarum?” tiarmiayi.

⁶ Takui, niisha Jesus timia nu ujakam suritkiacharmiayi.

⁷ Tura umpuurun Jesusan itiarar pushirín umpuurunam awantkarmiayi. Túram Jesus entsamkamiayi.

⁸ Tura untsurí shuarsha pushirín jintianam ayapar áinkiararmiayi. Chíkíchcha jintiá yantannumián nukan juuk jintianam áintrarmiayi.

⁹ Eem wearmia nusha, uku winiarmia nusha wariniak “Jusanna” untsamkarmiayi. “Yusa náarín winiana nu imiá pé_nkeraiti.

¹⁰ Ii uuntri Tawitia akupeamurí tátatna nu imiá pé_nker atí. Ii Yusrí naari shiir ati.” Tu untsamki wearmiayi.

¹¹ Tura Jesus Jerusarénnu jeamiayi. Jeá, Yusa Uunt Jee_n wayamiayi. Tura ashí iiyasua amik, kintiampraj tusa ni tuse unuiniamurí_jiaí tí_jiuch Petania péprunam wearmiayi.

Jesus iikiu numin yumínkramiania nu
(Mateu 21.18-19)

¹² Kashin tsawar, Petanianmaya jintia wesa, Jesus tsukammiayi.

¹³ Tura arant wajan iikiu numirín núkenniun wáiniak, nereatsuash tusa iyumiayi. Tura nereshtairín asamtai neren pé_nké wáinkíachmiayi.

¹⁴ Nuyá iikiu numin yumínkeak: “Ame nerem pé_nké yunaashti” tímiayi. Ni unuiniamurísha nuna táman antukarmiayi.

Yusa Uunt Jee_n suruktinian Jesus suritkiamiania nu
(Mateu 21.12-17; Rúkas 19.45-48; Juan 2.13-22)

¹⁵ Nuyá atak Jerusarénnu jeawarmiayi. Nu j Jesus Yusa Uunt Jee_n wayá suruktai tusar pujuarmia nuna j_iiki akupkatasa nan_kammiayi. Kuítian yapajín armia nuna misarín tura yampitsan súrín armia nuna kutan_krincha ayanturmiayi.

¹⁶ Tura káarak entsaki Yusa Uunt Jee_n nan_kaamaktinian suritkiarmiayi.

¹⁷ Nuyá “Yus áuj_satai tusar ashí shuar Yusa jee_n wayamnia átatui” tú aarchamukait Yusa Papirín. Antsu átumka Yusa jee kasa matsamtaiya nútikiarme” tímiayi.

¹⁸ Aents nu j matsamarmia nu Jesusa chichamen antukar ti enentáimprarmiayi. Tuma asamtai Israer-patri úuntri_sha, Israer-shuara jintinniurísha, nuna nekaawar, Jesusan ashamainiak mantamnati tusar chichaman jurusarmiayi.

¹⁹ Nuyá kiakui Jesus Jerusarénnu j_iinkimiayi.

Iikiu numin káarun wáinkíarmiania nu
(Mateu 21.20-22)

20 Kashin káshik nan̄kaamainiak iikiu numin kan̄kaptuk jaka wajan wáinkiarmai.

21 Tura Pítiur enentáimias Jesusan tímiayi “Uunta, iista, iikiu Ame yu-min̄kramam nu kan̄kaptuk káarchaik.”

22 Tutai Jesus tímiayi “Yus nekas enentáimtustarum.

23 Iis, nekas tátsujrumek, shuar “Yus nekas túratpiash” tútsuk, tura “wi tájana nuna Yus nekas túrattawai” tu enentáimsar, ju náintian “jiinki nayaantsanam iniánti” tákuinkia, páchitsuk iniantatui, tímiayi.

24 Tuma asamtai tájarme, ashí Yus áujukuram searmena nuna suramsat-tarme. “Wi seajna nuna yamá takakjai” tu enentáimkiurmeka, wáinkiáttarme.

25 Tura Yus áujukuram pujarmena nu, kajernaiyamuram ákuinkia tsan̄kurnáiratarum. Atumí Aparí nayaimpiniam pujana nu atumí tunaarín tsan̄kurturti tusarum túratarum.

26 Atumsha tsan̄kurnáiyachkurminkia, núnisan̄ atumí Aparí nayaimpiniam pujana nu atumí tunaarín tsan̄kurtámprashtatrume” tímiayi Jesus.

Yusa kakarmarijiai Jesus takasmiania nu

(Mateu 21.23-27; Rúkas 20.1-8)

27 Ataksha Jerusarénnum waketkiarmiayi. Jesus Yusa Uunt Jeen wekai, Israer-patri úntrisha, Israer-shuara jintinniurisha, Israer-shuara iruntai-jeen úntrisha Nin káutkarmiayi.

28 Káutkar Jesusan tiarmiayi “¿Yana kakarmarijiai ju túram. Ame túramna nuna ya tsan̄katrama?” tiarmiayi.

29 Tuiniakui Jesus tímiayi, “Chikichkiniak aniasatjarme. Áirkatarum. Túrakrumninkia Wissha winia takastinian tsan̄katrukmi nuna ujaktatjarme.

30 Wats, turutiarum, ¿ya Juan imiaitniun tsan̄katkama? ¿Shuar tsan̄katkamka? ¿Yus tsan̄katkamka? Áirkatarum” tímiayi.

31 Tura niisha enentáimprar “Yus akupkaiti” tákurninkia, “¿urukamtia umirkachuram?” turamchattajik.

32 Antsu “shuar tsan̄katkaiti” tákurkia, ashí shuar ashamaji” tunainiarmi-ayi. Ashí aents Juan nekas Yúsnan etserniuiti, tu enentáimainiakui ashammi-armiayi.

33 Nuyá Jesusan tiarmiayi “Iikia nékatsji.”

Tutai Jesus tímiayi “Wissha núnisnak yana kakarmarijiai takaaj nuna ujakchattajrume.”

12

Yajauch takau armia nu

(Mateu 21.33-46; Rúkas 20.9-19)

1 Jesus ju métek-taku chichaman unuiniamiayi: “Shuar uwa ajan ajam wenuimiai. Nuyá uwa nekeetain najanamai. Tura kumpin jeen najanamai. Najana takartusti tusa shuáran ikiuak ninkia jeachat wémai.

2 Neretai tsawant jeamta, ni takarniurín júukman akankat tusa akupka-mai.

3 Tura ajanam takau arma nu, nu takarniun achik, katsumkar, áyatik awainkarmai.

4 Ataksha chíkich takarniun akupkamai, tura nunasha kayajai tukurar, múuknum katsumkar, katsekar awainkarmai.

5 Tuma ain̄ ataksha chíkichan akupkamai, tura nunasha máawarmai. Ti untsurín akupramai. Chikichnasha katsumkarmai, chikichan máawarmai.

6 Tura niijiai chikichik tuke ámiayi, nuka ni aneamu uchiri. Nu uchinchá ukunam akupkamai. Akupeak “Winia uchirnaka shiir awaj Sartatui” tímiai.

⁷ Tura ni uchirī winian wáinkiar, takau shuar nuámtak chichainiak “Juka ajá nérenniu uchirínti. Wátsek, maatai; túramka ájaka iiniu átatui” tiarmai.

⁸ Túsar achikiar máawarmai. Ayashincha ajanmaya ajapawarmai” tímiayi.

⁹ Tura nuyá aniasmiayi, “¿Wats, warí enentáimsarum; ajá nérenniurī itiurkat-tawa? Jeashtanmayá taa, ajá takainia nú shuaran amuktatui. Ni ajaríncha chikichan ikiastatui.

¹⁰ Ju, Yus-Papinium aarma ana nu áujsachukaitrum:

Kaya pénkernak, jeammin “yajauchiiti” tusar ajapawarmia nu ashí kayajai nankaamas pénker apujsamuiti.

¹¹ Nusha Yús túramuiti. Iisha íisar ti enentáimtaji.

Nuke áarmaiti” tímiayi.

¹² Tura nú metek-taku chichamjai nin áujmatma asa achiktai tusar chichaman jurusarmiayi. Túmainiyat shuáran ashamainiak Jesusan ik-iuniak wearmiayi.

Uunt akupin súsatin tura Yus súsatin

(Mateu 22.15-22; Rúkas 20.20-26)

¹³ Tura wear, imiaamtikiar yajá chichakmatai nújai yajauch títai tusar Pariséu shuarnasha, Erutisa nemanin shuarnasha akatar Jesusan akup-tukarmiayi.

¹⁴ Túram Nin jeariar chicharainiak: “Uuntá, aents nakitiainiajn tuke nekas chicham páchitsuk chichaame, nu nékaji. Aents pátatek iiyatsme, antsu nekas Yusa jintī unuiniame. ¿Waritia enentáimiam, ii kuitrī uunt Sesar súsatin pénkerkait. Susattajik. Suritkiattajik? Nu nekaatai tusar wakeraji” tiarmi-ayi.

¹⁵ Tura Jesus ni yajauch enentáimmiarīn nekara “¿Urukantai Winia yajauch titi tusarum wakerutarum? Kuit itiatarum, Wi íistaj” tímiayi.

¹⁶ Tutai kuítian itiararmiayi.

Jesus nuna iis tímiayi, “¿Juisha yana yapī tura yana naari áarmait?” tímiayi.

Tutai “Uunt Sésarna” tiarmiayi.

¹⁷ Nuyá Jesus tímiayi “Uunt Sésarna ana nu susatarum; túrarum Yúsnaka Yus susatarum” tímiayi. Tura ni áimkiamurīn antukar ti enentáimprarmiayi.

Aents nantaktinian Satuséu anintrusarmiania nu

(Mateu 22.23-33; Rúkas 20.27-40)

¹⁸ Nuisha Satuséu aents, jakamunmaya nantaktin penké atsawai tiniu armia nu, Jesusan tariarmiayi. Taar Jesusan chicharainiak:

¹⁹ “Uuntá, Muisais juna áatrampramiai:

“Áishman ni nuarī júreatsain jakamtainkia, yachin yajutmatratsa, ni yachī nu wajen nuátkatniuiti.”

²⁰ Wats, siati yachi áarmiayi. Iwiairī nuwan nuatak yajutmatsuk jakamiayi.

²¹ Ni yachī wajen akinkiamiayi. Nusha núnisan yajutmatsuk jakamiayi. Nuna yachisha núnisan tura nuna yachisha núnisan túramiayi.

²² Tura ashí siati patainman, patainman nu nuwan nuátkarmiayi. Yajutmat-suk, yajutmatsuk jiniawarmiayi. Tura ukunam nuwasha jakamiayi.

²³ Nuinkia nantaktin tsawantai, nantakiarmatai, ¿yana nuarīn ati? Ashí siati nuátkacharmaka” tiarmiayi.

²⁴ Tutai Jesus tímiayi ““Jakamunmaya nantaktin atsawai” tátsurmek. Yusa chichame tura Yusa kakarmari nékachu asarum awajiarme, tímiayi.

²⁵ Iimiatarum, aents jakamunmaya nantakiarmatai, nuatnaikiatin atsut-tawai, antsu nayaimpinmaya suntara núnisan pujusartatui.

²⁶ Tura jakamunmaya nantaktiniapitia tusarum nu nekaatin nekas wak-erakrumka Muisais aarmia nu enentáimtustarum. Yuska numichinmaya

Muisaisan chicharuk “Wikia Apraáma Isaaka tura Jakupu Yúsrintjai” Yus tímiayi.

²⁷ Yaunchu jákaru ain, Yus nuna taku, ayashnium jakayat iwiaaku pujuinia nuna Yusrintjai, tawai. Nekas jaka ainia nuna Yusrinchuiti. Nantaktin atsawai tau asarum awajirurme” tímiayi Jesus.

*Yus akupkamu imiá péñker ainia nu
(Mateu 22.34-40)*

²⁸ Jesussha Satuséusha áujmatnainian Israer-shuara jintinniuri taa an-turkamiayi. Anturak, Jesus ti penker áimkiui, niisha Jesusan juna aniasmiayi: “¿Yus akupkamu tuá imiá péñkerait?” tímiayi.

²⁹ Tutai Jesus tímiayi “Júiti Yus akupkamu imiá péñker: Antukta Israer shuará. Ii Yusrí úuntaiti, tura Niniki nekas Yúsaiti.

³⁰ Tuma asamtai, tuke enentáimjai ti enentáimsam Uunt Yus aneeta. Túram ame iwiaakmarmesha, kakarmarmesha Yus íktusta. Núiti nekas péñker akupkamu, tímiayi.

³¹ Nuyasha chikichcha awai, “ame ayashim aneamna tímiatrusmek ame írutramemesha aneeta.” Chíkich nu nankaamas péñker akupkamu atsawai’ tímiayi.

³² Tutai jintintin tímiayi “Ee, péñkeraiti, Uunta. Nékasmeke tame. Chikichík Yus awai, chíkichkia atsawai.

³³ Tura tuke enentáijjai ti enentáimsar, ii kakarmarisha Yus íktusar Nin aneakrikia, ii ayashi aneajnia núnik ii írutramurisha aneatniuitji. Nusha ashí Yus sutai ana nujai nankaamas péñkeraiti’ tímiayi.

³⁴ Nuna tiniu asamtai Jesus ni péñker áimkian nekáa “Ameja Yus akupeamunam pachiinkiatin ishichik táasume” tímiayi. Tura nuyá chíkich shuar Jesusan aniastinian arantukarmiayi.

*Kristu tutai ¿yana uchirimpait?
(Mateu 22.41-46; Rúkas 20.41-44)*

³⁵ Jesus Yusa Uunt Jeen unuiniak pujumiayi. Tura chichaak “¿Urukamtai ii jintinniuri “Yus anaikiamu Krístun Tawitia shuari” tuinia?”

³⁶ Tawit, antsu, Yusa Wakaní aarta tutai, Yus-Papinium juna áarmiayi: Uunt winia Úuntrun tímiayi “Ame nemasrumin nupetkatin amuatsain winia untsuuruinini pujusta”.

³⁷ Kame Tawitkia, Krístun áujmatuk, “winia Uuntru” taisha, ¿itiura ní shuarisha átink’?” tímiayi Jesus. Tuma asamtai untsurí shuar nuj matsamarmia nu ti shiir antukarmiayi.

*“Israer-shuaran jintintin ainia nújai aneartarum” Jesus tímiania nu
(Mateu 23.1-36; Rúkas 11.37-54; 20.45-47)*

³⁸ Jesus unuiniak tímiayi, “Israer-shuara jintinniuri ainia nujai aneartarum. Niisha waantu enentáimtumasar, esaram pushin entsarar wekasatajtsar wakeruiniawai. Péprunmasha shuar shiir áujtusarat tusa wakeruiniawai.

³⁹ Israer-shuar iruntainiam penkeri pujutainium pujustinian wakeruiniawai. Nampernumsha penkeri pujutainium pujustinniasha wakeruiniawai.

⁴⁰ Tura waje jeencha atantainiawai. Túrawar aents nekaracharat tusar ti esaram chichamjai Yúsán áujainiawai. Nincha chikichjai nankaamas Yus asutiawartatui” tímiayi.

*Waje kuítrin susamiania nu
(Rúkas 21.1-4)*

⁴¹ Jesus Yusa Uunt J_een kuit enketainiam naka pujus áents kuítr_in chumpian wáinkiamiayi. Untsur_i kúitr_intin núkap enkeawarmiayi.

⁴² Nuyá w_aj_e kuítr_incha taa jimiará uchich kuítian, reara áantsan, enkeamiayi.

⁴³ Jesuska unuiniamur_in untsuk “Nekas tájarme, j_u w_aj_e kuítr_inchaitiat, ashí enkeena nú nankaamas núkap enkeayi.

⁴⁴ Iis, kuítr_inniusha nii ampirma nuna enkeenawai, tura antsu j_u nuw_a kuítr_inchaitiat, ampirmatsuk ni yurumatniur_in takurmakman ashí enkeayi” tímiayi.

13

Yusa Uunt J_een yumpuntratniun Jesus ujakmiania nu (Mateu 24.1-2; Rúkas 21.5-6)

¹ Yusa Uunt J_eeni_a Jesus jiinkimtai, unuiniamur_i Nin tímiayi “Iisia, Uunta, kayasha ti shiir áiniawai. J_easha imiá úuntchakait.”

² Tutai Jesus tímiayi “J_u imiá uunt j_ea wáinmek. Kaya ekentramu au ashí mash yumpuntrartatui” tímiayi.

Amuukatin tsawantin uruku átatna nu (Mateu 24.3-28; Rúkas 21.7-24; 17.22-24)

³ Nuyá Uriwiu náinnium wakar, Yusa Uunt J_ee naka pujusar, Pítrusha, Jakupusha, Juansha, Antressha, nínkimias Jesusan aniiniak

⁴ “Uuntá, tímiam nu, ¿urutiá túrunatta. Nu túrunatin jeakuisha itiura nekaat-tajia? Paant ujatmakta” tiarmiayi.

⁵ Tutai Jesus tímiayi “Aneartarum, anan_kramawairap.

⁶ Nekaatarum, untsur_i winia naarun pachisar winiartatui. Chíkich chíkich “Wiitjai Kristu” taku, untsur_in anan_kawartatui.

⁷ Tura meset chicham ántakrumka, yajaya meset chicham ántakrumsha sapijmiakairap. Nekas túrunashtinkiait. Nuja_isha amuukatin tsawantka tuke jeatsui, tímiayi.

⁸ Shuar chíkich shuarj_ai mesetan najanawartatui; apachcha chíkich apachj_ai núnisaran mesetan najanawartatui. Untsur_i nun_kanam ú_ur_kattawai. Tsukasha ártatui, charaatum ajamusha núnisan átatui. Tura nuj_ai itiurchatka aya yama nan_kamui.’

⁹ “Túmaitkui atumsha aneartarum. Akupin iruntainiumsha surutmakar-tatrume, tura íi shuar iruntainmasha katsumpramkartatrume. Wíi shuar asakrumin, kapitiánnium, akupniunmasha juramkittiarme. Nu_i jearum, Winia chichastatrume.

¹⁰ Nu túruntsa_in ashí áentsnum Yus-Chicham etsernaktiniaiti.

¹¹ Atumin surutmaktasar juramainiakuisha, warintiajak tusarum ti enentáimsairap. Chichastin jeamtai, Yusa Wakan_i jintinramattarmena nu titiarum. Iis, atumí enentáij_ai tíchattarme, antsu Yusa Wakan_i jintintiam títiatrume.

¹² Nu tsawantin shuarsha ni yach_in mantamnati tusa suruktatui. Apasha ni uchir_in suruktatui. Uchisha apar_incha nukur_incha kajerak, jakati tusa suruktatui. Núnisan untsur_i shuar túrawartatui.

¹³ Nu_inkia Wíi shuar asakrumin ashí nakitramprartatui. Tura shuar yawetsuk katsuntra_nka uwemprattawai” tímiayi.

¹⁴ Nuyá Jesus tímiayi “Shuar j_una áujeana nu nekaati. Yúsnan etserin, ni naar_i Taniar, ti yajauch tuke emesin ana nuna yaunchu aar etserkamiayi. Nuka pujushtainiam pujan wáinkiu_rmesha, ashí Jutía nun_kanam pujarmena nu, náinnium pisartarum.

¹⁵ Je̅a yakiin̅i pujana nu akaiki wariri achiktajtsa, je̅en wayashti.

¹⁶ Ajanam pujana nusha ni pushir̅in jukitiajtsa waketkishti.

¹⁷ Tura ajamtin̅ áiniana nusha, kuír̅chin umuntsainia nusha, nu tsawantin timiá ititur̅chatan wáinkiertatui.

¹⁸ Tuma asamtai átum pisaarmena nu̅i yumitin ahati tusarum Yus seatarum.

¹⁹ Nu tsawantinkia ti wáitsatin átatui. Yama nan̅kamtaik Yus nun̅kan najanama nu̅isha, yamaisha ukunmasha timiu wáitsatin pen̅ké atsuttawai.

²⁰ Tura Uunt Yus wáitsatin tsawantan ishichik awajsattajai tíchaitkuin̅kia, uwempratin pen̅ké atsuinti. Tura ni shuar̅in anaikiamia nuna yáin̅tajtsa wakerak, nu tsawantan ishichik awajsattawai.

²¹ Nu tsawantaj̅i “júiti Kristu” túramkuin̅kia anturkairap.

²² Kame “Krístuit̅jai” ántar tuinia nu, tura “Yúsnan etserniuit̅jai” ántar tuinia nusha wantinkiertatui. Wantinkiar Yus anaikiamu shuárnasha anan̅katai tusar wakeruiniak, ni kakarmar̅in iniakmainiak aentsti tujintiamun̅ túrartatui.

²³ Tura átum aneartarum. Aetak, túruntsain̅ ujakchajrumek’ tímiayi Jesus.

Aents Ajasu tutai tátintri

(Mateu 24.29-35, 42-44; Rúkas 21.25-36)

²⁴ Jesus tuke unuiniak juna tímiayi: ‘Tura nu wáitsatin nan̅kaasmatai, etsaasha nantusha etsantrashtatui.

²⁵ Yaasha nayaimpinmaya̅ kakekartatui, tura nayaimpiniam kakaram ainia nu muchitrtatui.

²⁶ Nuyasha ashí aents Winia wáitkiartatui. Wi, Aents Ajasuit̅jiana ju, ti kakaran, ti wincha ajasan, yuran̅miniam winiái wáitkiartatui.

²⁷ Nu̅i nayaimpinmaya̅ suntarun akupkattajai, Wíi shuaran ashí nun̅kanmayan̅ irurarat tusan. Arakaan̅iya̅, nun̅kaaniya̅, ashí nun̅ka nan̅katkamun̅mayan̅ Wíi shuaran irurartatui.’

²⁸ ‘Ikiu numi nakumea nu nekaatarum. Ni chin̅kimpr̅i pun̅kak nuke jeaku̅i, “ju nun̅kanam esat jeatemai” tátsurmek.

²⁹ Núnisrumek Wi tájarmena nu wáinkiumeka, ni tatintri̅ jeatemai tu nekaatarme.

³⁰ Nekas tájarne, yamaí aents pujuinia nu kajin̅ amuuniatsain̅, ashí Wi tájana nu túrunatniuiti.

³¹ Nayaimpisha nun̅kasha amuukatniuiti. Tura winia chichampruka amuukashtiniaiti.

³² Tura tsawantcha nekanachminiaiti. Nayaimpinmaya̅ suntarsha nékainiatsui; Wisha Yusa Uchir̅intiatan nékatsjai. Aya winia Aparuk nékawai.

³³ Atumsha anearum enentáimprarum Yus aujsa pujustarum, tsawant nékachu asarum.’

³⁴ ‘Tura Wikia ju shuar̅jai méteket̅jai. Ju shuarsha jeachat weak, ni je̅en ikiuawai. Ikiuak ni shuar̅in wáitrukartí tusa apujas ikiuak ashí shuaran takatr̅in súawai. Tura wáitin̅ wáinniuun, “ameja pen̅ker wáinkiata” tímiiai.

³⁵ Wikia nu je̅a nérenniua núnisnak, urutai tátataj nékachu asarum anearum pujustarum. Kíaraimpiash, tura ajapkeash, atash shiniukaimpiash, káshikiash tátat̅jai.

³⁶ Nérentin̅ aya aneachmak taa, kanúu tepaj̅i wáitkia̅i tusarum aneartarum.

³⁷ Wi atumin̅ tájana nu, ashí shuáran̅ tajai, anearum pujustarum” tímiayi Jesus.

14

Jesusan chichaman jurusarmiania nu

(Mateu 26.1-5; Rúkas 22.1-2; Juan̅ 11.45-53)

¹ Jímiarchikí tsawant ajasmiayi paskua tutai námper jeatin. Paskua námpertincha wakapruachu tantan yuatin námpernasha métek najanan ármiayi. Israer-patri uuntrisha, Israer-shuara jintinniurisha Jesusan anañkar achikiar maatai tusar wakeriarmiayi.

² Túrasha “Jista tsawantin túrachmi, aents charaatum ajarain tusar” tiarmiayi.

Nuwa kunkuinian Jesusan ukatramiania nu
(Mateu 26.6-13; Juan 12.1-8)

³ Jesussha Petania péprunam tunamaru Semunka jeen misanam pujan, nuwa tarimiayi. Nartu kunkuinian arapástru tutai kaya najanamunam piakun itiamiayi. Nu kunkuin ti kuitiaiti. Mutí chuchuke kupik Jesusa muuken kunkuinian ukatramiayi.

⁴ Tura nuju pujuarmia nu, kajerar tunaiarmiayi “¿Urukamtai ju kunkuinian ántar wasurea?”

⁵ Junasha súrakka, menaintiú sian kuítnium surukminiuyi. Nu kuitcha kuítrinchan súsanaka maak” tiarmiayi. Tusa nuwan kajerkarmiayi.

⁶ Antsu Jesus chicharainiak “Iniaisatarum. ¿Urukamtai au kajerarum? Winia shiir túrutayi, tímiayi.

⁷ Kuítrincha atumjai tuke íruntsuk. Wakerakrumka tuke pénger awajsatniuitrume. Antsu Wikia atumjai tuke pujushtatjai.

⁸ Ju nuwa ashí nii túramnia núnaka umikiai. Wi jákatin jeatsain, iwiarsatin kunkuinian shiir ukatrarai.

⁹ Nekas tájarne, ashí nunkanam Yus-Chicham etsernaktatna nuju, ju nuwa túramurisha etsernaktatui, nin kajinmatkiaiñ tusa” tímiayi.

Jútas Jesusan suruktaj timiania nu
(Mateu 26.14-16; Rúkas 22.3-6)

¹⁰ Nuyá Jútas Iskariúti, Jesusa unuiniamurintiat, Israer-patri uuntrin werimiayi, Jesusan suruktaj tusa.

¹¹ Niisha nuna antukar, warasar “Kuit amastatji” tiarmiayi. Jútassha Jesusan itiurak yúpichuch tsankamkattaj tusa enentáimias wekaimiayi.

Jesusjai iruntrar yurumáwarmia nu
(Mateu 26.17-29; Rúkas 22.7-23; Juan 13.21-30; 1 Kurintiunam 11.23-26)

¹² Wakapruachu tantan yuatin jisat nanakama tsawant tsawarmatai, paskua námpertin yúatin murik máatin jeamtai, Jesusa unuiniamurij ini-asarmiayi “Paskuatin murikiu yúatin iwiaratai tusar ¿túi wétataji. Tui yurumattam?” tiarmiayi.

¹³ Tutai Niisha jimiará unuiniamurin akatar akupeak “Péprunam wetarum. Nuju áishman yumin jukí wéa wáinkiattarme. Nu áishman nemarsatarum.

¹⁴ Wayana nuju jeá nérenniurij títiarum “Uunt túramui, ¿wisha, unuiniamurjai tui yurumáttaj?”

¹⁵ Nu nérentin, yakí písunam uunt tesamunam ashí iwiaramun iniakturmas-tatrume. Nuju jisat ii najanatin iwiaratarum” tímiayi.

¹⁶ Ni unuiniamurij wear, péprunam jeawar, Jesus timia núnisan wáinkiararmiayi. Tuma ásar paskua námperan iwiararmiayi.

¹⁷ Nuyá kíakui Jesus ni tuse unuiniamurijjai wayawarmiayi.

¹⁸ Niisha misanam pekaamak, yurumáiniak pujusar, Jesus tímiayi. “Nekas tájarne, chikichik shuar Wijjai yurumna nu, surutkattawai.”

¹⁹ Nujai kúntuts enentáimprarmiayi. Chikich chikich Jesusan aniasar “wíashitaj” tiarmiayi.

20 Jesus tímiayi “Jū misanam tuse irunar yurumprum nu, chikichik surtkattawai. Wijiaí pininnum yurumkan ayak yuana núiti.

21 Nekas Wi, Aents Ajasuitjiana jū, jákatniunam wéajai, áarturma áintsanak. Tura áishman súrutna nu ti wáitsattawai. Niisha akiinmainchu ajakuiti” tímiayi.

22 Yurumainiak Jesus Yúsan yuminkias, yurumkan achik, puuk, chicharainiak “Achiktarum, jusha winia ayashruiti” tímiayi.

23 Piniñnasha achik, Yúsan yuminkias, ni unuiniamurin súsarmiayi. Ashí umararmiayi.

24 Umararmatai Jesus tímiayi “Júiti winia numpar, untsurin yáintajtsa puártinia nu. Nujai Yamaram Chichaman Yus najanaiti.

25 Nekas tájarme, uwa yumiri ataksha jui umarchattajai. Tura tsawant jeantai, ukunmasha, Yus akupeana nu yamarman umartatjai” tímiayi.

*Pítiur natsantratniua nuna Jesus ujakmiania nu
(Mateu 26.30-35; Rúkas 22.31-34; Juan 13.36-38)*

26 Yus-kantan kantámawar, jíinkiar, Uriwui náinnium wearmiayi.

27 Nuiñkia Jesus nin tíarmiayi “Jū kashi átum natsantrurtatme. “Murikiu wáinnium máattajai, túramtai murik tsakinmakartatui” tu aarchamukait.

28 Tura ukunam Wi nantakin atumin Kariréanam émtuktiajrume” tímiayi.

29 Tutai Pítiur chicharuk “Ámin ashí natsantramainiakuisha, wikia natsantrashtatjame” tímiayi.

30 Tutai Jesus tímiayi “Nekas tájame, jū kashi atash jimiará shiniatsain, natsantrurtatme. “Núnaka nékatsjai” menaintiú turuttiatme” tímiayi.

31 Tutai Pítiur kakaram chichaak “Ámijiai métek máantuiniakuisha, núnaka penké tíchattajai” tímiayi. Ashí ni unuiniamuri núnisan tiarmiayi.

*Jesus Jitsemaní ajanam Yúsan áujsamiania nu
(Mateu 26.36-46; Rúkas 22.39-46)*

32 Nuyá Jitsemaní ajanam wearmiayi. Jeawar Jesus ni unuiniamurin tímiayi “Jui pujustarum, Yúsan áujsatasa pujai”.

33 Pítrun, Jakupuncha, Juáñnasha jukimiayi. Tura Jesuska ti kuntuts enentámiar wake mesek nekapsatasa nankammiayi.

34 Tura nin chicharuk “Wi ti kuntuts enentáimjai, tura jakamnia nekapeajai. Jui iimia pujutarum” tímiayi.

35 Jesussha ishichik arantach we, nunká piniakumar tepes Yúsan aujmiayi. “Jū wáitsatin átatna nu, túrutatniuitkuñkia iniaitiusta” tu seamiai.

36 Tuke áujuk tímiayi “Apawá, ashí tujinchaitme. Piniñnumia ashí umartinia áantsan ti nekapsatajna nú wáitsatniun, jurutkitia. Antsu Wi wakeraj nucha, ame wakeramuram túrunati.”

37 Tura ni unuiniamurin tarin, kanúu tepenan wáinkiamiayi. Pítrun tímiayi “¿Semunka kánamek. Kanutsuk ishichkisha iimia pujustin tujinkiamek?”

38 Anearum Yus áujsatarum, tunaanum iniaaraj tusarum. Atumí wakanjin kakarmaitrume, antsu atumí ayashjin kakarmachuitrume” tímiayi.

39 Ataksha we, nuik Yúsan áujsama núnisan áujsamiayi.

40 Ataksha waketruki, ni unuiniamurin kanúu tepenan tarimiayi. Kari ti pujá asantai, Jesusan áujsatniun tujinkiarimiayi.

41 Jesus ataksha we, tarí tímiayi “Kanarum ayampratarum. Máakete. Jeayi. Wi, Aents Ajasuitjiana jū, tunáa shuarnum surukmaitjai.

42 Nantáktiárum, wemí. Iis, Winia súrutna nu nuntumsai” tímiayi Jesus.

*Jesusan achikiarmiania nu
(Mateu 26.47-56; Rúkas 22.47-53; Juan 18.2-11)*

⁴³ Jesus nuna chicháa pujá unuiniamuri Jútas tarimiayi. Niiijai untsurí aents puniá takaku, tura numincha takaku káutarmiayi. Israer-patri uuntri, Israer-shuara jintinniuri, tura Israer-shuara úuntri akupkarma asa káutkarmiayi.

⁴⁴ Káuntsain Jútas chicharainiak, “Wi mukunattaj áujkin núiti Jesus. Achirum, péñker emetarum jukitiarum” tímiayi.

⁴⁵ Tura Jesusan tarí, mukunuk áujas “Uuntá, Uuntá” tímiayi.

⁴⁶ Túramtai aencha Jesusan achikiar emetawarmiayi.

⁴⁷ Túruiniakui nuí wajatusha puniari úkuitsan, patri uuntri takarniurin awati ni kuishin tsupirkamiayi.

⁴⁸ Túram Jesus áentsun tímiayi “Kasakaitiaj. Puniajai numijiai, kasá nútiksarmek achirkatai tusarum tarutniurme.

⁴⁹ Ashí tsawant atumjai Yusa Uunt Jeen wayan unuiniakun pujuchmakaj. Túmai nuí achirkachmarme. Tura Yus timia nu uminkiat tusa ju túrunayi.”

⁵⁰ Nuiñkia ni unuiniamuri Niniak ikiuniak pisararmiayi.

Natsa pisarmiania nu

⁵¹ Tura áishman nátsaach aya tarachin penumas Jesusan atamprimiayi. Tura natsaach suntar achikiam

⁵² tarachrin ajapa ikiuak misú tsékenkimiayi.

Patri uuntriin Jesusan júkiarmiania nu

(Mateu 26.57-68; Rúkas 22.54-55, 63-71; Juan 18.12-14, 19-24)

⁵³ Patri uuntriin Jesusan ejeniarmiayi. Nuí Patri uuntrisha, Israer-shuara jintinniurisha, Israer-shuara uuntrisha irunturarmiayi.

⁵⁴ Tura Pítiur íkian nemarki Patri jeen aach jeá, Patri suntarijjai jinia anamuk pujumiayi.

⁵⁵ Patri uuntri ashí naamka uunt armia nujai iruntrar maatai tusar wakeruiniak shuar Jesusan tsanumprurat tusar eatkarmiayi. Nu chichamjai mantamnati, tiarmiayi. Túrasha wáinkiacharmiai.

⁵⁶ Túrasha untsurí shuar Jesusan tsanumpruuniayatan yapajjá yapajjá chichainia ásarmatai wáinkiacharmiai.

⁵⁷ Nuyá chíkich wajakiar wáitruiniak juna tiarmiayi

⁵⁸ “Yusa Uunt Jeen, aents jeamarmia nuna yumpuntiatjai. Túran menaintiú tsawantaj, chikichan, aents jeamchamun jeamtatjai” tau antukmaji” tiarmiayi.

⁵⁹ Tura tuke yapajjáwar tiarmiayi.

⁶⁰ Nuisha Patri uuntri ajapén wajaki Jesusan chicharuk “¿Áimsatin penké tujintiamek. Warinia turamainia?” tímiayi.

⁶¹ Tura Jesus takamtak áimtsuk pujumiayi.

Patri uuntri atak chicharuk “¿Ame nekas Yusa Anaikiamurinkaitiam. Ii Yusri Uunt tajinia nuna Uchirinkaitiam?”

⁶² Tutai Jesus tímiayi “Ee, núitjai. Winia, Aents Ajasu tutaintiajna nu Kakaram Yusa untsuurini pujai wáitkiattarme. Tura nayaimpinmaya yuraminiam winiaj wáitkiattarme” tímiayi.

⁶³ Tutai Patri uuntri kajek, ni pushirin jaak tímiayi “¿Chíkich títincha warí atsumaj’?”

⁶⁴ Nii tana nujai Yúsan kátsekeamu antukurme. ¿Warintia enentáimprum?” tímiayi.

Takui “jakamniaiti” ashí tiarmiayi.

⁶⁵ Chíkich chíkich Jesusan usukiáwarmiayi. Jiin epetkar awatiar “¿Ya áitkiarma? etserkata” tiarmiayi. Patri suntarisha yapiniam awatiarmiayi.

*Pítur Jesusan natsantramiania nu
(Mateu 26.69-75; Rúkas 22.56-62; Juan 18.15-18, 25-29)*

⁶⁶ Núnaka túruiniaí Pítru nunká, jeá aani pujan, nuwá Patri uuntri takarni-uríya nu tarimiayi.

⁶⁷ Niisha Pitrun jinia anamu pujan wáinkiamiayi. Wáiniak, “Amesha Nasaretnumia Jesusjai wekaichukaitiam” tímiayi.

⁶⁸ Tutai Pítur chicharuk, “Nékatsjai. Ame támena nuna nékatsjai” tímiayi. Tura aá wáitiainiam jiinkimiayi. Tumai atash shiniukmiayi.

⁶⁹ Nu núwasha Pitrun ataksha wáiniak, shuáran nuí pujuinian tímiayi “Júiti ni shuari.”

⁷⁰ Tura ataksha “atsá” tímiayi.

Ishichik árusan, shuar nuí pujuarmia nu ataksha Pitrun chicharuk “Nekas ni shuarinme. Kariréanmaya shuárchakaitiam. Auya shuara nuní chichaame” tiarmiayi.

⁷¹ Tutai Pítrusha kakantar chichaak, “Ju áishmannaka átum tárumna núnaka nékatsjai. Wáitrakuinkia Yus írsati” tímiayi.

⁷² Nuya ataksha atash shiniukmiayi. Pítrusha, Jesus nuik timian enentáimmiayi. Iis, Jesus nuik tíchamka “Atash jimiar shiniatsain, ame, núnaka nékatsjai, menaintiu turuttiatme” tíchamka. Pítru nuna enentáimias ti úutmiayi.

15

*Jesusan Piratú ejeniarmiania nu
(Mateu 27.1-2, 11-14; Rúkas 23.1-5; Juan 18.28-38)*

¹ Tura kashin káshik Patri uuntri, Israer-shuara úuntriíjai, Israer-shuara jintinniurííjai, ashí naamka armia nujai irunturar, chichaman jurusarmiayi. Túrawar Jesusan jiníamun apach kapitíán Piratúin ejeniarmiayi.

² Ejeniamatai Piratu aniasmiayi “¿Amesha Israer-shuara Uuntriinkáitiam?” Tutai Jesussha “Amek tame” tímiayi.

³ Nuyá Patri uuntri ti tsanumprurarmiayi.

⁴ Ataksha Piratu aniasmiayi “¿Áimsatin penké tujintiamek? Ti untsurí etserturmainiatsuk.”

⁵ Tura Jesus nunasha áikchamiayi. Túmakui Piratu ti enentáimpramiayi.

*Jesusan, mantamnati, tíarmiania nu
(Mateu 27.15-31; Rúkas 23.13-25; Juan 18.38-19.16)*

⁶⁻⁷ Shuar ámiayi, ni naari Parapás. Niisha ni shuariíjai meset ámanum, shuaran maa asamtai sepunam enkeamuyayi. Tura námper tsawantai Piratu sepunmaya chikichík shuarnak jíiki akupniuyayi, aents seawarmia nuna.

⁸ Nuísha untsurí shuar Piratun káutkar tiarmiayi “Ame ju námpertin tuke túramna nu túratá.”

⁹⁻¹⁰ Patri uuntri Jesusan kajeraru ásar surukarmiayi. Piratusha, nuna nekáa chicharainiak “Israer-shuartiram ¿atumí akupniurin jíiki akupkattajak? ¿Nu wakerarmek?” tímiayi.

¹¹ Tutai Patri uuntri áentsun chichainiak ““Antsu Parapás jíikim akúpkatá” titiarum” tiarmiayi.

¹² Tutai Parapásan seawarmatai Piratu ataksha chicharainiak “Jesusnasha, átum ii akupniuri tarumna nuna, ¿itiurkattaja?” tímiayi.

¹³ Ataksha ni kakantar tiarmiayi “Krúsnum mantamnati.”

¹⁴ Piratusha nin tiarmiayi “¿Warí tunaana túriniait?” tímiayi.

Takui niisha nú nankaamas kakantar tíarmiayi “Krúsnum mantamnati.”

15 Tuma asamtai, aents shiir enentáimprartí tusa, Piratu tunáa shuaran, Parapásan jiiki akupkamiayi. Tura Jesusnasha katsumkarum krusnum ajintrutarum tusa suntaran tsankatkamiayi.

16 Tiniu asamtai suntar Jesusan jukiar, kapitiáni jeen awayawarmiayi. Nu jea naari Piritiúriuiti. Túrawar untsurí suntaran untsukarmiayi.

17 Ashí káunkar, pushin kapaanniun Jesusan áentsrarmiayi. Tawasap janki najanamun etsenkrumtikiarmiayi.

18 Nuisha Jesusan áujсар “Shíraitme, Jesúsá, Israer-shuara akupniuriya” wishikiainiak tiarmiayi.

19 Muuknumsha sapapjai awatiarmiayi; nuyá usukiawarmiayi, túrawar ántar tikishmatrarmiayi.

20 Tura Jesusan wishikrar amukar, kapaantin pushin áitkiar, ni pushirin áentsrarmiayi. Túrawar krúsnum ajintrurtai tusar jiikiarmiayi.

Jesusa jakamuri

(Mateu 27.32-44; Rúkas 23.26-43; Juan 19.17-27)

21 Semun Serini núñkanmaya shuárauyayi. Arijantruncha, Rupuncha aparíyayi. Semun kan takatnumia winian suntar emetawarmiayi, Jesusa krusrin yanaki jukiti tusar.

22 Jesusnasha Kúrkuta náinnium júkiarmiayi. Kúrkuta, shuar chichamjainkia, muuka ukunch naint, tutainti.

23 Jeawarmatai, karía, mira kunkuinjai pachimprar áartaj tusa susarmiayi Jesusan. Túrasha umarchamiayi.

24-25 Nantu yakí jatemsamtaí krúsnum ayapar ajintrurar ikiusarmiayi. Túrawar suntar yaki jukit tusar nakurutaijai nakurusar Jesusa pushirin yaruakarmiayi.

26 Urukamtaí máamuit, ashí aents nuna nekaawarat tusa, ni krusrin ju armauyayi: *ISRAER SHUARA AKUPNIURI*

27 Nu náinnium jimiará kasa shuaran Niijai máawarmiayi. Chikichik Jesusa untsuurini krúsnum, chikichik ni menarini krúsnum máawarmiayi.

28 Yus-Papinium aarma ana nujai uminkiauyayi. Nui “tunáa shuarjai nekapmarmauyayi” tu áarmaiti.

29 Shuar nankaamainiak, muuke pearar, Jesusan katsekainiak tiarmiayi “Iisia, amesha, “Yusa Uunt jeen yumpuntiatjai, tura menaintiú tsawantai ataksha jeamkattajai” tíchakaitiam, tiarmiayi.

30 Amek krúsnumia akaikim uwemprata.”

31 Núnisan Patri uuntrisha, Israer-shuara jintinniurisha Jesusan wishikrar chicharnaisarmiayi “Chikichan uwentikraitiat, Niñki uwempratniun tujintiwai.

32 Yusa anaikiamuri Krístuashit, ii akupniuriniashit, tiarmiayi. Wats, yamáí krúsnumia akáikití, iisha nu íisar Yus-shuar ajastai” wishikiainiak ántar nuna tiarmiayi. Jesusjai krúsnum ajintruamusha Nin wishikiarmiayi.

(Mateu 27.45-56; Rúkas 23.44-49; Juan 19.28-30)

33 Tutupin jeamtaí ti kiritin ajasmiai ashí nunkanam. Tura, nantu nunkaach ajasmatai ataksha tsaapnirmiayi.

34 Nuin Jesus kakantar untsumuk tímiayi “Iruí, Iruí, rama sapaktani.” Nuka shuar chichamjainkia, “Yusrú, Yusrú, ¿urukamtaí ajapa ikiurkiniam?” tawai.

35 Shuar nui pujuarmia nu, nu chichaman nékachu ásar, nuna antukar “Eríasan untsúawai” tiarmiayi.

³⁶ Chikichik shuar churuinian uruchjai ajamper, sapapjai ijiú mukunati tusa susamiayi. Tura tímiayi “Wajastarum, Erías Nin jukitiaj tusa winishtimpiash. Iistai” tímiayi.

³⁷ Nuñkia Jesus kakaram untsamak jakamiayi.

³⁸ Túramtai Yusa Uunt Jeen ejamu ninki jaanakmiayi, yakíya nunká.

³⁹ Suntara kapitíántrisha Jesusan ayamtus wajamia nu, Jesus kakaram untsamak jaamun iis tímiayi “Nuka ti nekas Yusa Uchiriyayi.”

⁴⁰ Nuwasha arant ii pujuarmiayi. Nu nuwajai Máktara péprunmaya Marí, chíkich Marisha, Sarumáisha pujuarmiayi. Chíkich Marisha uchich Jakupuncha Jusencha nukuríyayi.

⁴¹ Nu núwaka, Kariréa nunkanam Jesus wekaimia nui, Nin nemarsar yáintaisar wekasarmiayi. Untsurí chíkich nuwasha Jesusjai Jerusarénum wear, nu nuwajai arant ii pujuarmiayi.

Jesusan iwiarsarmiania nu

(Mateu 27.57-61; Rúkas 23.50-56; Juan 19.38-42)

⁴² Kiatemamtai, ayampratin tsawant jeatsain, námper iwiaratin tsawant asamtai,

⁴³ Arimiatíanmaya Jusé arantutsuk, kakaram ajas, Piratuí jeá Jesusa ayashin seatajtsa utuamiayi. Nu Jusencha ashí irunin ainia nu anturin ármiayi. Niisha Yus ju nunkanam akupin ajasat tusa nákasmiayi.

⁴⁴ Tura Jesusa ayashin seam, Piratusha “wárik jaka” tímiayi. Tuma asa suntara kapitíántrin untsurak “¿Nekas jakayik?” tímiayi.

⁴⁵ Tutai kapitíán “Ee” takui, Jesusa ayashin Jusen tsankatkamiayi.

⁴⁶ Juresha puju tarachin pénkeran sumarak, Jesusa ayashin itiar áepas penuarmiayi. Tura yamaram kaya táurmanum ikiusmiayi. Ikius wáitiniam kayan átutmiayi.

⁴⁷ Tura Máktaranmaya Marí, Jusé nukurí Marijjai ni ikiuamun ii wajarmiayi.

16

Jesus nantakmiania nu

(Mateu 28.1-10; Rúkas 24.1-12; Juan 20.1-10)

¹ Tura ayampratin tsawant nankaasmatai, Máktaranmaya Marisha, Jakupu nukurí Marisha, Sarumáisha, kunkuinian Jesusa ayashin kuertai tusar sumakarmiayi.

² Tura kashin Tumintin, ti káshik, nantu yáma jiiniai, iwiarsamunam jeariarmiayi.

³ Wésar chichainiak “Iwiarsamu wáitiri kayancha ¿yaki akanketramkattaj?” tiarmiayi.

⁴ Jear uunt kaya akankekman wáinkiararmiayi.

⁵ Iwiarsamunam wayawar, natsan esaram puju pushin entsar, untsuurnumaani pujan wáinkiar ti ashankarmiayi.

⁶ Túmainiakui natsa tímiayi “Ashamkairap. Nasarénumia Jesus krúsnum jakama nu éarme. Iniantkimiuiti. Juí pujatsui. Wátsek, ju ikiusmanum iistarum.

⁷ Túrarum werum Pítrusha, chíkich unuiniamurisha ju ujaktarum. Kariréanam atumin émkíyi. Turammarumna núnisan túruna wáinkiatarme” tímiayi.

⁸ Niisha ti ashamainiak purushniarar iwiarsamunmaya tseke weararmiayi. Ti ashamainia ásar, chikichkinkesha ujakcharmiayi.

*Máktaranmaya Marin Jesus wantintiúkmania nu
(Juan 20.11-18)*

⁹ Émkaka Tumiñtin ti káshik Jesus nantaki, Máktaranmaya Marin wantintiúkmiayi. Nu María enentáiya siati iwianchin Jesus yaunchu ajapruyayi.

¹⁰⁻¹¹ Marisha Jesusa nemari kúntuts uutu matsatainian werí, “Jesus iwiaakui, imia wi wainkiajai” tímiayi. Támaiati anturkacharmiayi.

*Jesus jimiara shuaran wantintiukmania nu
(Rúkas 24.13-35)*

¹² Tura urum jimia shuar Jerusarénnumia tsaniñ weenan, Jesus nusháa iira ajas tarimiayi.

¹³ Niisha Jesusan wáinkiar waketkiar, unuiniamurin ujakarmiayi, tura ni chichamencha anturkacharmiayi.

*Jesus ni unuiniamurin akupkarmiania nu
(Mateu 28.16-20; Rúkas 24.36-49; Juan 20.19-23)*

¹⁴ Nuyasha Jesusa auntse unuiniamuri misanam pekaamkar pujuinian Jesus tarimiayi. “¿Atumí enentái urukamtaí kátsuram ainia, urukamtaí Winia nekas enentáimtursachuram?” tímiayi. Ni nantakmiarín wáinkiaru chichamen anturkacharu ásarmatai kakantramiayi.

¹⁵ Nuyá chichaak “Ashí nunkanam wetarum. Túrarum ashí shuarnum Yusa shiir chichame etserkatarum.

¹⁶ Shuar anturak imiani uwemprartatui. Shuar antukcharka, tuke sumamawartatui.

¹⁷ Shuar winia náarun pachis, Yúsan nekas enentáimtakka, juna túrawartatui, Yusa kakarmarin iniakmastaj tusa: iwianchin jiki akupkartatui; chikich chichamjai chichasarukamtaí Winia nekas enentáimturtatui;

¹⁸ napincha achiksha, tseasnasha úmaksha, jaa ajaschartatui. Jaa shuaran ni uwejejai antin, nu shuaran péker awajsartatui.” Tu tímiayi.

*Jesus nayaimpiniam wakamiania nu
(Rúkas 24.50-53)*

¹⁹ Jesus chichas amukmatai, Yus nayaimpiniam jukimiayi. Túruna Yusa untsuurini pujusmiayi.

²⁰ Ni unuiniamurisha jinkiar, ashí nunkanam Yus-Chichaman etserkarmiayi. Tura Uunt Yus nin yainmiayi. Tura etserainiakui, ashí aents ni kakarmarin nekaawarat tusa, aentsti tujintiamun túratniun susamiayi. Nuke atí.

Yúsán Shiir Chichamen

RÚKAS aarmia nu

¹ Nekas iiní Jesús túramia nuna “ímiatrusan áartajai” untsurí aents tiarmiayi.

² Yámankamtaikniumiañ ísarmia nú shuar, tura Yus-Chichaman etserkatniun yáinkarmia nusha in unuitiamprarmia nútiksaran áartinian wakeriarmiayi.

³ Wisha núnisnak esetsaran enentáimsan, yámankamtaikniumia nuna nekaamjai. Tuma asan túrunamia nuna ímiatrusnak amincha áatratajtsan wakerimjame, winia úuntur Tiupiru.

⁴ Jintintramawarma nú nankaamas nekaata tusan wakerakun áatjame.

Imiakratin Juan̄ka akiiniatniur̄in ujakmiania nu

⁵ Jutía nunkanam uunt akupin Erutis akupkamia nú tsawantin Israer-shuar Yúsnan pujurin ámiayi, ni naari Sakarías. Niisha Aptías weeayuyai. Ni nuweshia Irisapít Arun̄ weeayuyai. Irisapítia úntrisha Israer-shuar Yúsnan pujurin ármiai.

⁶ Yúsjaisha Sakaríassha Irisapítcha mái-metek péñker ármiai. Yus akupkamia nunasha umirin ármiai. Tuma asamtai péñkesha chíkich nin yajauch chicharkatin atsuarmiayi.

⁷ Yusjai péñker wekainiayat Irisapít júrechuyai. Túrasha mai úuntach ármiai.

⁸⁻⁹ Israer-shuar Yúsnan pujurin chíkich weeanmaya nuyá chíkich weeanam, an̄kant an̄kant Yusa jeen takáu ármiai. Chíkich tsawant, Sakarías weeá takastin amia nui, Sakaríaska kun̄kuinian ekeemaktaj tusa init wayatniuyai.

¹⁰ Init kun̄kuinian ekeemai untsurí aents aani matsamsar Yúsán áujtak pujuarmiayi.

¹¹ Sakarías init pujai kun̄kuin ekeematainiam untsuurnumaani aya aneachma nayaimpinmaya suntar wajamiayi.

¹² Nuna wajan wáiniak Sakaríaska purushnairmiayi.

¹³ Túrasha nayaimpinmaya suntar chicharuk tímiayi “Sapijmiakaip Sakarías. Nekaata. Ame seamna nuna Yus anturtamkayi. Tura ame nuwem Irisapít uchin takustatui. Nii akiiniamtai, “Juan̄” anaikiata.

¹⁴⁻¹⁵ Ame uchiram akiiniattana nuka Yusjaisha nankaamantu átatui. Tuma asamtai akiiniamtai, amesha shiir enentáimsam warastatme. Tura chíkich aents untsurí warasartatui. Ame uchirmesha karía ainia nuna umarchat-tawai. Tura áetak akiinchanak Yusa Wakaní pimiutkattawai, tímiayi.

¹⁶ Tura ni shuarin Israer-shuar áiniana nuna, ii Untr̄i Yusjai ataksha nawamtikiartatui.

¹⁷ Uunt Yúsaiya akatramu átatui. Yaunchu Yúsnan etserin Erías kakaram etserkamia núnisan̄ niisha etserkattawai. Nujai shuaran ni uchir̄ij̄iai nawamtikiartatui. Tura umichu áinia nuna eseer enentáimtikrartatui. Ni Untr̄i taakui ni enentá̄i iwiaramu arti tusa etserkattawai” tímiayi nayaimpinmaya suntar.

¹⁸ Nuna takui Sakarías nayaimpinmaya suntaran tímiayi “¿Nunasha war̄ij̄iain̄ paant nekaataj? Wisha nuar̄jai mái-metek ti úuntchichukaitiaj” tímiayi.

¹⁹ Tutai nayaimpinmaya suntar tímiayi “Wikia Kapriiraitjai, Yusa suntar̄intjai. Nii akatturmatai chichastájam tusan tura nu shiir chichaman ujaktájam tusan tarijme, tímiayi.

20 Túrasha wi tájamna nu “nekasaiti” tu enentáimprachume. Tura asam uchiram akiintsain muut ajastatme. Chichastin penké tujinkiattame. Tura wi tajana nu, tsawant jeantai túrunattawai.”

21 Nuna tumaj Yusa jeen aani pujusar, Sakaríasan nákas pujuarmiayi. “¿Urukamtaik init we imiá menkaka?” tu enentáimprarmiayi.

22 Nuyá Sakarías jiinkimtai, áuj sartaj tukamá tujinkiarmiayi. Sakaríaska, muut ajasu asa, aya úwijmiasan chichamiayi. Túmakui, Sakarías init pujus Yúsai wáimiakun nekaawarmiayi.

23 Yusa jeen takastin tsawantri amuukamtai Sakaríaska ni jeen waketkimiayi.

24 Nuyá ukunam ni nuari Irisapít ajaprukmiayi. Tura senku nantutin aya jean pujusmiayi.

25 Jeá pujus, “Aents wishikruiniakui natsantan jurutkitiaj tusa uchi takustinian Yus tsankatrukai” tu enentáimpramiayi Irisapít.

Jesusa akiiniatniurin nayaimpinmaya suntar etserkamiania nu

26 Nu senku nantu nankaasmatai Yus ni suntarin Kapriiran Nasarét péprunam akupkamiayi. Nu pepru Kariréa nunkanam pujawai.

27 Nasarénumia nuwan, naari Marí, iyuti tusa akuptukmiayi. Nu núwaka áishmanjai pujuchuyayi. Niisha Jusejai nuatnaikiatsa anajmanair pujumiayi. Juseka uunt Tawit weeayuyayi.

28 Wats, nayaimpinmaya suntar Marí pujamunam wayá tímiayi “Yus penker enentáimturma asamtai, ámin winitjiame, Mariya. Yuska ámin nemartamuk ashí nuwá nankaamas penker awajtamui” tímiayi.

29 Tura Marisha nayaimpinmaya suntaran wáiniak, chichaamun nékatsuk “Urukamtaik tu chicháa” tu enentáimpramiayi.

30 Nuyá nayaimpinmaya suntar chicharuk tímiayi “Mariya, sapijmiakaip. Yus shiir enentáimturmawai.

31 Antukta. Amesha ajapruktatme. Túram Uchi takustatme. Nusha “Jesus” anaikiata.

32-33 Niisha uunt átatui. Nincha “Uunt Nankaamaku Yusa Uchiri” tiartatui. Tura Uunt Yuska yaunchu Tawitian uunt akupniuri awajsamia núnisan ame Uchirmin ame shuárumin Israer tutain Uunt akupin awajsettawai. Ni akupeamurisha Yus susamu asa penké amuukashtiniati” tímiayi.

34 Nayaimpinmaya suntar nuna tutai Marí tímiayi “Nusha winia áishur atsaisha, ¿itiurak túrunataj?”

35 Tutai nayaimpinmaya suntar Marín tímiayi “Yusa Wakaní tarutramtatui. Tura yuranmia núnisan Uunt Yusa kakarmari ijirmattawai. Nu tuma asamtai Uchi akiiniattana nu Yúsaiya asamtai, “Yusa Uchirinti” tiartatui, tímiayi.

36 Tura Irisapít ame kaná kaimia nusha núnisan weamtanam ajaprukai. Iis, “júrechuiti” tiarmia nu, yamaikia sais nantu pujawai ajamtin.

37 Yúsjainkia itiurchatka penké atsawai” tímiayi.

38 Tutai Marí tímiayi “Yus wakeramun túriniaitjai wikia. Ame tame nuna Yus wakerana nuna túrutati, tajai” tímiayi. Nuna tímiatai nayaimpinmaya suntarka wémiayi.

Irisapítian Marí iyumiania nu

39-40 Nu tsawant Marí wárikmas muranam Jutía nunkanam ni kaná kain Irisapítian iyutaj tusa wémiayi. Sakaríasai jeá, ni jeen wayá, Irisapítian áuj samiayi.

41 Marí áujeamun antukmatai Irisapítia ampujén uchiri muchitkamiayi. Tumaj Yusa Wakaní ni enentáin pimiutkamiayi.

⁴² Nuin̄kia kakantar chichaak Marin tímiayi “Yus amincha ti shiir awajtam-saiti. Tura Uchiram akiiniattana nusha Yus shiir awajsamuiti.

⁴³ Kairua, ame winia Uuntru nukurí áminiñ, Yus winia ti waitnentra asa, áujtsata tusa ámin akuptamkachaik, tímiayi.

⁴⁴ Warí, wisha ame áujtamna nuna ántakui ampujruj uchi waras mu-chitrutkayi.

⁴⁵ Amesha Yus turámiania nu umikiu asam shiir pujame. Yus tímia nu túrunattawai auka” tímiayi.

⁴⁶ Nuna tinia iniaisamtaí Marí juna tímiayi:

“Wikia tuke enentairjai “Yus timiá úuntaiti” tajai.

⁴⁷ Tura Uunt Yuska winia Uwentikruru asamtaí ti waraajai.

⁴⁸⁻⁴⁹ Wisha péejchach aiñ ni wakeramurñ umiktajtsan wakerakui winia enentáimturayi. Tuma asamtaí ashí aents, “Marincha Yus shiir awajsaiti” tuke turutiartatui. Yuska imiá penker tura imiá kakaram ana nu winia ti uuntan túrutaiti. Tuma asamtaí ashí aents “Marincha Yus shiir awajsaiti” turutiartatui. Núnaka yamáí nan̄kamamunak tuke turutú ajartatui.

⁵⁰ Tura Nin umirkatniun wakerana nunasha Yus tuke waitnentrartatui.

⁵¹ Ti itiuurchatan páchitsuk túraití Nii. “Nan̄kaamantuitjai” tu enentáimtumainia nuna nupetkaiti.

⁵² Ashí akupin ainia nuna awakkaruiti. Tura íksañ péejchach ainia nuna uunt awajsaruiti.

⁵³ Péñker ana nuna kitiamainiakui Yus péñkeran súsaruiti. Tura antsu “ashí takakjai” tuinia nuna aya júñik awajsaruiti.

⁵⁴ Israer-shuar Niiniu ájiniá núnaka waitnentratniun kajinmattsuk yáinmákuítji.

⁵⁵ Yaunchu ii Uuntri Apraáman tura ní shuarnasha “túrattajai” timia nuna ímiatrusañ tuke túraití.” Nuní tímiayi Marí.

⁵⁶ Marikia Irisapítjai menaintiú nantu pujus ni jeñ waketkimiayi.

Imiakratin Juan̄ka akiiniamuri

⁵⁷ Nuyasha ni jurertin tsawantri jeamtaí Irisapítcha uchin áishman̄kan takusmiayi.

⁵⁸ Tura ni shuarisha, ni írutramurisha “Irisapítian Yus ti shiir yáinmiayi” tuíniak, nin iyuwearmiayi. Tura máí-metek warasarmiayi.

⁵⁹ Israer-shuar túrutai júñisaiti: uchi akiiniamurj uchu tsawant jeamtaí, shunichirj nuapen tsupiktin awai, sirkunsisiún tutai. Yus nuna tú tiniu asamtaí tuke túrin ármiai. Wats, Irisapítia uchirj akiiniamuriniá uchu tsawant jeamtaí tsupirkatai tusar ni jeñ jearmiayi. Nuin̄kia ni aparj naari Sakarías anaikiataitsar wakeriarmiayi.

⁶⁰ Tura ni nukurí tímiayi “Atsá. Antsu ni naari Juan̄ átatui.”

⁶¹ Tutai tiarmiayi “¿Nusha urukamtia? Amée shuarumsha nu náartincha áwak’ tiarmiayi.

⁶² Nuin̄kia uchi aparín “¿Warí anaikiatajtsam wakeram?” tusar aya úwejejain̄ iniasarmiayi.

⁶³ Tutai uchí aparísha “Nakash surusta; áartaj tusan wakerajai” tusa aya úwejejain̄ iniakmamiayi. Takui nakash susam, ni naari Juan̄kaiti, tu áarmiayi. Nuna wáinkiar “Ayawā urukakun̄ ta” tu enentáimprarmiayi.

⁶⁴ Nú chichamaik Sakarías chichatsuk pujamun chichakmiayi. Tura nuin̄ Yusa náarincha shiir awajsamiayi.

⁶⁵ Nuin̄kia ni írutramurisha ashamkarmiayi; tura ashí Jutía nun̄ka murá amia nuñ nu túrunamun ujakam ashí nekaawarmiayi.

⁶⁶ Nu túrunamun antukar ti enentáimsarmiayi. Tura “ju uchin Yus nekas pujurtsuk. Tuma asamtai uunt ajas ¿urukuk ati?” tu enentáimprarmiayi.

Sakarías Yus jintintiam tímiania nu

⁶⁷ Uchí aparí Sakarías, Yusa Wakaní pimiutkam tura Yus jintintiam, juna tímiayi:

⁶⁸ “Israer-shuartí ii Yusrj naari shiir awajsatniuitji. Ii Yúsrisha tarutmaitji. Tura uwemtikrampraitji.

⁶⁹ Yaunchu ii uuntri Tawit Yusa wakeramurijjai uunt akupin áchamkia. Tura ni ukurin ti kakaram Uwemtikkiartinian suramsaitji.

⁷⁰⁻⁷² Yuska ii nemasriya tura in nakitramainiajnia nuyá uwemtikrampratniun enentáimsamia nuna, yaunchu ni etserniurin péñker armia nuna ujakmiayi. “Winia ti peñker chichamprun tájana nuna yapajitsuk umirkan tuke wáitnentratajrume” yaunchu ii úuntrin tímiania nunasha ni etserniurin ujakarmiayi. Yaunchu nu ujakma yamá iisha wainji.

⁷³⁻⁷⁵ Nu ujakman Yuska yámankamtaik imiá yaunchu ii uuntri Apráaman tíchamkia. Apráaman ujakmia nu júiti: “Wi wakeraj nútiksaran, Winia umirtukar péñker wekainia nuna ni nemasriya uwemtikrattajai. Sapijmiatsuk winia tuke takartusarat tusan túrattajai” Yus tímiayi Apráaman. Iisha ni shuari asakrin, nuna taku incha túramaji.

⁷⁶ Tura amincha, uchiru, “Uunt Yusna etserniuiti” turamartatui. Amesha ni tátintri iwiarataj tusam Uuntaj émkim wétatme.

⁷⁷ Ni shuari, ni tunaari tsankurnar uwemprarat tusam túrattame.

⁷⁸⁻⁷⁹ Yuska ashí shuaran anea asa, incha wáitnentramak ni pujamunmaya ni tsáapnintrin suramsaitji. Ni enentáin kiritniunam wekainia nuna, mesertinium jeatemá ásarmatai, ni tsáapnintri jeat tusa túraiti. Tura ashí incha ii enentáin imiatkinchanum wekasarmi tusa túraiti.” Nuní tímiayi Sakarías.

⁸⁰ Uchisha tsakarmiayi. Tura Yúsan nekaki-nekaki wémiayi. Israer shuar-num etserkatin tsawantri jeatsainkia atsamunam pujuyayi.

2

Jesusa akiiniamuri

(Mateu 1.18-25)

¹ Wats, Juan akiiniamia nú uwitin uunt akupin Akustu ashí nunkanam áentsun nekapmarartí tu chichakmiayi.

² Nu nekapmartinian yaunchu túrushtain yamá túriarmiayi. Siria nunkanam Seriniu akupin pujái túrawarmiayi.

³ Ni naari áartaj tusa ashí shuar ni nunkenin wétin árimiayi.

⁴ Tuma asamtai Jusé Nasarét péprunmaya Kariréa nunkanam amia nuyá jiinki Pirin péprunam Jutía nunkanam amia nuj wémiayi. Juseka Tawit weenam akiinia asa, ni nekas nunkenka Pirinkauyayi.

⁵ Nu asamtai, ni náarin áartaj tusa Jusé wémiayi Marijjai. Marisha Jusé núweyayi. Tura tsanincharuyayi. Túmaitiat Marisha Yusa Wakaní kakarmarijjai ajamtiniuyayi.

⁶ Tura nuj Pirinnum pujuiniaj Marí takustintri jeamiayi.

⁷ Nu iwiairin uchin áishman kan takusmiayi. Tura uchi penutaijjai penuar, waaka yurumtainiam áepsamiayi. Írar kanutainiam pujustin ankant atsá asamtai túrawarmiayi.

Murikiun wáinnium nayaimpinmaya suntar Yus akatar akuptukmia nu

⁸ Tura Pirinnum tíjuich murikiun wáinin kashi murikrin wáiniuk pujuarmiayi.

⁹ Túmainiaj nayaimpinmaya suntar murikiun wáinin matsatainian wantin-tiukmiayi. Tura Yúsnumia tsáapnin ni matsatainiamunam etsantramiayi. Túrunamtaí murikiun wáinniuka ti ashamkarmiayi.

¹⁰ Túrasha nayaimpinmaya suntar tímiayi “Ashí áentsnum ti warastin atí tusan ti penker chichaman itiarjiarme.

¹¹ Júiti: yamáí tsawantaj uunt Tawitia péprurin Piriñnum yaunchu Yus anaikiamu KRISTU tutai, uwemtikramprataj tusa akiintiurmarme. Nu Uchisha ashí áentsun akupniuiti, tímiayi.

¹² Tura jujaj nekaattarme: uchi penutaijjaj penuarma waaka yurum-tainiam tepá wáinkiattarme. Nu wáinkiarum nekas júiti, tu nekaattarme.”

¹³ Nu chichamaik nayaimpinmaya suntar ti untsurí, nayaimpinmaya káunkarmiayi. Túrawar Yusa naarin shiir awajainiak juna tiarmiayi:

¹⁴ “Nayaimpinmasha Yus nankaamantuiti tu enentáimtusarti. Tura ju nunkanmasha Yusjaj nawamnaikiaru ainia nu imiatkinchanum pujusarti.” Tu tiarmiayi.

¹⁵ Tura Yusa suntari nayaimpiniam waketkiarmataí murikiun wáinin tiarmiayi “Wats, Piriñnum wárik wetái. Nu túrunamu Yus turamajnia nu iyumi” tiarmiayi.

¹⁶ Nuna tiar wárik wearmiayi. Tura Marincha Jusenchá wáinkiarumiayi. Tura uchincha waaka yurumtainiam tepan wáinkiarumiayi.

¹⁷ Wear nuna wáinkiar, nayaimpinmaya suntar uchi túrunamurin timia nuna etserkarmiayi.

¹⁸ Tura murikiun wáinin tiarmia nuna antukaruka ti enentáimtusarmiayi.

¹⁹ Túrasha Marikia ashí túrunamia nuna ni enentáijjainkia enentáimtu pujumiayi.

²⁰ Tura murikiun wáinniuka antukarmia nuna enentáimtusar, tura ísarmia nunasha enentáimtusar “Nayaimpinmaya suntar ujatmakmajnia tímatrusan túrunayi” tiarmiayi. Tuma ásar Yusa náarin shiir awajsar kantampruawar waketkiarmiayi.

Uchin Jesusan Yusa Uunt Jeen itiarmania nu

²¹ Tura uchi akiiniamu uchu tsawant jeamtaí, ni túrutairin túrin ásar, ni shunichirí nuapen tsupirkarmiayi. Túrawar Marí ajapratsain nayaimpinmaya suntar tímia nútiksaj “Jesus” anaikiarumiayi.

²² Tura Muisais akiinatniunam akupkama núnisan, tsawantri jeamtaí, Yusa Uunt Jeen Jerusarénum uchin Yus iiktustai tusar júkiarmiayi.

²³ Kame Yus-Papinium ju aarma awai:

“Ashí uchi iwiairi áishman akiinkiuñka Yusna átatui.”

²⁴ Tuma asamtaí, Marí Yusa Uunt Jeen wáitsuk pujamu wayatniuri jeamtaí, uchin Yus iistí tusa Yusa Uunt Jeen Jerusarénum pujana nu itiarmaniayi. Tura yampitsan jímiaran súsarmiayi. Muisáis akupkamun umiiniak nuna túrawarmiayi.

²⁵ Nu túmaj Semeún naartin áishman Jerusarénum pujumiayi. Semeúnsha Yusa Wakani pujurma asa penker áishmankauyayi. Yusan nekas enentáimtiniuyayi. Yusa anaikiamurijjaj Israer-shuar ankant ajastin jeati tusa nákauyayi.

²⁶ “Winia anaikiamur KRISTU tutai wáintsuk jákashtatme” uunt Yusa Wakani tu jintintiamiayi.

²⁷ Nú Semeún Yusa Wakani “wetá” tutai, Yusa Uunt Jeen wémiayi. Tura nú tsawantaj Muisáis tímia núnisan umirkatai tusar Marisha Jusesha uchin Jesusan Yusa Uunt Jeen itiarmaniayi.

²⁸ Itiararmataí Semeún uchin jusa miniakas Yusan áujuk juna tímiayi:

29 “Yamaikia, Uunta, Amiin wi jeatin aṅkant atí. Turutmiamna nu imiatrusmek umikiumē.

30-31 Ju Uchi ashí aents uwemtikrartá tusam susamna nuna yamáí imia winia jii^{ru}jai wáinkiajai.

32 Israer-shuarcha ainia nu tsáapninium wekasarat tusa akuptukmaiti ju Uchi. Tura Israer-shuar Áminiuram ájinia nuna ashí aents shiir enentáimtikrartí tusam ju Uchi akuptukmaitji. Nuna wáinkian shiir enentáimsan jákatniuitjai.”

33 Tura Semeún Uchiniun tu chicharkui Jusesha Jesusa nukurísha ti enentáimprarmiyai.

34 Semeúnsha chichaak “Yus shiir enentáimturmasartí” nin tímiayi. Nuyasha Marin chicharuk tímiayi “Nekaata. Ju Uchin Israer-shuartisha untsurí naktirar iniarartatji. Tura chíkich Israer-shuartikia ju Uchin shiir enentáimtusar ti wararsartatji. Tura Uchiram Yusa kakarmarín ti paant iniakmastatui. Tuma aiñ untsurí Aun yajauch chichariartatui.

35 Nujai shuar ni enentáin warinia enentáimia nu, paant átatui. Maaj, ashí nu túmakui, ijiumua núnismek ame enentáimin ti wáitsattame, Mariya.” Tu chichasmiayi Semeún.

36 Nuwasha Ana naartin nuⁱ Yusa Uunt Jeen pujumiayi. Niisha Yúsnan etserniuyayi. Ni aparísha Panuíruyayi tura Aser shuarauyayi nu nuwá. Niisha ti úuntchiyayi. Niisha yama nuatnaikiamujai siati uwi ni áishrijiai tsaniñ pujusarmiyai.

37 Tura wajemamiayi. Tura uchenta kuation uwi takakuyayi. Tura niñkia Yusa Uunt Jeeniá jíintsuk káshisha tsawaísha tuke Yúsan áujniuyayi. Tura yurumtsuk Yúsan áujniuyayi.

38 Semeún tuasua amikmatai Anasha taa, Uchin wáiniak Yúsan yu-miñsamiayi. Tura Jerusaréñnum Yus uwemtikrampratai tusa nákarmia nuna áujkunka uchin áujmat wémiayi.

Nasarétnum waketkiarmiania nu

39 Nuyá Yus tímia nuna ashí túrawar amikiar Kariréa nuñkanam, kame nii pujumia nú peprunam Nasarétnum Jusesha Marisha Uchisha waketkiarmiayi.

40 Uchi Jesus tsakaki, kakaram ajaki tura nú nañkaamas nekaki wémiayi. Tura Yus Nin ti shiir awajsamiayi.

Jesus Yusa Uunt Jeen túrunamuri

41 Jusesha, Jesusa nukurísha tuke uwitin paskua námper jeakui Jerusaréñnum weu ármiayi.

42 Ni túrutairi túruiniak, Jerusaréñnum weak Jesusan tuse uwi jeamtaí júkiarmiayi.

43 Námper amuukamtaí ni nukurísha Jusesha nékachmanum Jesuska Jerusaréñnum juákmiayi.

44 Marisha Jusesha “wí shuarjai winiawai” tusa, núnaka eatsuk chíkichík tsawant wekasarmiyai. Nuyá wáinkiataj tukamá, ni shuariin tura ni nékamunam eakarsha,

45 wáinkiacharmiyai. Nuñkia Jerusaréñnum ataksha waketrukiarmiayi, eaktai tusar.

46 Tura menaintiú tsawant eakar Yusa Uunt Jeen Yus akupkamun jintinian anturak anintrú pujan wáinkiararmiayi.

47 Tura nuⁱ ashí Jesusan anturkarmiania nu, niisha ti nékakui tura áimtanash ti péñker áimkiui, ti enentáimturarmiayi.

⁴⁸ Ni aparísha nukurísha tumáa pujan wáinkiar, ti enentáimprarmiyai. Tura ni nukurí chichaak tímiayi “Uchiru, ¿ausha urukamtai itiuurchat enentáimtikrurram? Ame apasha wisha urukayik tusar ti eakjame” tímiayi.

⁴⁹ Tutai Jesus tímiayi “¿Urukamtai eattrum? Winia Aparnan túratniuitjiana nuka nékatsrumek” tímiayi.

⁵⁰ Tura timia núnaka penké nekaacharmiyai.

⁵¹ Nuyá Jesus niijiaí Nasarétnum waketkimiayi. Ninkia tuke umiriarmiyai. Ashí nu túrunamun Marikia tuke enentáimtu pujumiayi.

⁵² Jesuska tsakaki, tura nekaki wémiayi. Yussha tura aencha Nin shiir enentáimtiarmiyai.

3

Imiakratin Juan̄ka etserkamuri

(Mateu 3.1-12; Márkus 1.1-8; Juan̄ 1.19-28)

¹ Tipiriu uunt akupin pujamu kinse uwí jeamtai, Jutía nunkanam Punseu Piratu akupin pujumiayi. Tura Kariréa nunkanam Erutis akupin pujumiayi. Itiurea nunkanmasha Trakuniti nunkanmasha ni yachi Jiripi akupin pujumiayi. Tura Apirinia nunkanam Risánias akupin pujumiayi.

² Tura nu uwitin Anassa Kaipiássa Israer-patri uuntri pujuarmiyai. Nu uwitin Sakaríasa uchirí Juan̄ atsamunam pujan Yúsaiya chichaman antukmiayi.

³ Nuyá Jurtañ entsanam supichik matsamarma nuna Juan̄ wekaatusar juna tímiayi “Winia tunaarun Yus tsankurturat tusarum, enentai yapajiárum imiantiarum.” Tu ujakmiayi.

⁴ Nu ujakman Isayas yaunchu juna áarmiyai: Atsamunam wekaana nu untsunmun ántuiniawai. Nii untsunuk juna tawai: Atumí enentái Uunta jinti iwiarturtarum; naka awajsatarum.

⁵ Jápaaka ainia nusha áimkiamu arti. Naint ainia nusha paka awajsamu arti. Jintia apijiaru ainia nusha naka jüikmia arti. Tura pujutrin ainia nusha métekrak paka awajsamu arti.

⁶ Túrunamtai ashí nunkanmayá aents Yúsaiya uwempratin aan nekaawartatui.

⁷ Untsurí aents imiatit tusar tariarmia nuna Juan̄ chicharainiak tímiayi “Napia áaniutirmincha, ti asutniátin jeatemáttana nuyá uwempratarum tusa ¿ya ujatmakuram? tímiayi.

⁸ “Íikia Apraám weeitji, tuma asakrin Yus shiir enentáimturmají” tu enentáimtumásairap. Antsu enentáim yapajiámuitkiuin̄kia péñker wekaamurmijiaí paant iniakmatarum. Warí, Yus wakerakka, ju kayan Apraáma shuarin páchitsuk najankainti, tímiayi.

⁹ Aneartarum. Numi ajaktinian kampuwarin jacha atuttsamuíti. Numi péñker nereatsna nuka ajakar jinium apeamu ártatui” tímiayi.

¹⁰ Tutai aentska enentáimprar “¿Nuiñkia itiuurkatjik?” tiarmiyai.

¹¹ Tutai Juan̄ tímiayi “Jimiará pushin takakna nu, takaktsuna nuna chikichan súsatniuiti. Yurumkan takakna nusha takaktsuna nuna ajamsatniuiti” tímiayi.

¹² Uunt akupniu kuítrin juu armia nú shuar imiantiaj tusar Juánkan weriar aniasarmiyai. “Uunta, ¿iisha warí itiuurkatjik?” tiarmiyai.

¹³ Tutai Juan̄ tímiayi “Kuit uunt akupin tana nu iniankasrum achikiairap.”

¹⁴ Suntarsha aniasarmiyai “Uunta, ¿iisha warí itiuurkatjik?”

Juan̄sha tímiayi “Ame kakarmarmijiaí chikichna jurukip. Tura nin tsanumpruraip. Tura uunt akupin akirmana nújain̄ warasta” tímiayi.

15 “Ju Juan Yusa anaikiamurinchuashit” tu enentáimsar paant nekaataitsar nákarmiayi.

16 Tumaj Juan tímiayi “Wikia aya ayashmin entsanam imiajrume. Tura wijiaí nankaamas ana nu tátatui. Ni sapatrì jinkiamurinkisha atitrach-miniaitjai. Niisha taa, imiantinia áanis tura jíiya áanis Yusa Wakanin enketramprattarme.

17 Shuar aruasan awajtia núnisan, nusha yajauch ana nuna ajapa aya pénkernak júuktatui. Neren ikiustatui tura yajauchinkia ji tuke kajinchatainiam apeattawai” tímiayi.

18 Juan nu arant shiir chichaman áentsun ti núkap ujakarmiayi.

19 Tura nuyasha akupin Erutisan chicharkamiayi. Ni yachi Jiripi nuarin Jirutiasan kasaraku nuatkui tura chikich yajauchincha túrakui chicharkamiayi.

20 Tura Erutis núnaka ántutsuk chikich yajauchin túramiayi. Juánkan achik sepunam enkeamiayi.

Jesusa imianmiari

(Mateu 3.13-17; Márkus 1.9-11)

21 Nu túruntsain, Juansha ashí nú nunkanmaya áentsun imiak pujurainaj Jesussha imianmiayi. Niisha Yusan áujuk pujaj nayaimpisha uranmiayi.

22 Tura Yusa Wakaní yámpits najanar paant tarurmiayi. Tura Yus nayaimpimaya chicharuk “Amek winia aneamur Uchiruitme; Ámin ti wararjame” tímiayi.

Jesukrístu shuari

(Mateu 1.1-17)

23 Jesus trainta (30) uwí takaku asa ni takatrìn nankamamiayi. “Jusé uchirínti” tiniu armiayi. Jusésha Iría uchiríyayi.

24 Irísha Matata uchiríyayi; Matat Riwí uchiríyayi; Riwí Mirkía uchiríyayi; Mirki Jana uchiríyayi. Jana Jusé uchiríyayi;

25 Jusé Matatíasa uchiríyayi; Matatías Amusa uchiríyayi; Amus Najuma uchiríyayi; Najum Esrí uchiríyayi; Esri Nakai uchiríyayi;

26 Nakai Maata uchiríyayi; Maat Matatíasa uchiríyayi; Matatías Semái uchiríyayi; Semái Jusé uchiríyayi; Jusé Jutáa uchiríyayi;

27 Jutá Juana uchiríyayi; Juana Resa uchiríyayi; Resa Surupapira uchiríyayi; Surupapir Saratiira uchiríyayi; Saratiir Nerí uchiríyayi;

28 Neri Mirkí uchiríyayi; Mirki Atí uchiríyayi; Atí Kusama uchiríyayi; Kusam Irmutama uchiríyayi; Irmutam Ira uchiríyayi;

29 Ir Jusué uchiríyayi; Jusué Irieséra uchiríyayi; Iriesér Jurema uchiríyayi; Jurem Matata uchiríyayi;

30 Matat Riwi uchiríyayi; Riwí Semeúnka uchiríyayi; Semeún Jutáa uchiríyayi; Jutá Jusé uchiríyayi; Jusé Junanka uchiríyayi; Junañ Iriakímia uchiríyayi;

31 Iriakím Mirea uchiríyayi; Mirea Mainiánka uchiríyayi; Mainián Matata uchiríyayi; Matata Natanka uchiríyayi;

32 Natan Tawitia uchiríyayi; Tawit Isaí uchiríyayi; Isaí Upitia uchiríyayi; Upit Puusa uchiríyayi; Puus Saramúnka uchiríyayi; Saramún Naasúnka uchiríyayi;

33 Naasun Aminiatapa uchiríyayi; Aminiatap Arama uchiríyayi; Aram Esruma uchiríyayi; Esrum Paresa uchiríyayi; Páres Jutáa uchiríyayi;

34 Jutá Jakupa uchiríyayi; Jakup Isaka uchiríyayi; Isak Apráama uchiríyayi; Apráam Tarea uchiríyayi; Taré Nakura uchiríyayi;

³⁵ Nakur Seruka uchiríyayi; Seruk Rakaua uchiríyayi; Rakau Pirikia uchiríyayi; Pirik Epera uchiríyayi; Eper Sará uchiríyayi;

³⁶ Sara Kainiánka uchiríyayi; Kainián Arpaksata uchiríyayi; Arpaksat Sema uchiríyayi; Sem Nuaia uchiríyayi; Nuai Ramikia uchiríyayi;

³⁷ Ramik Matusarínkia uchiríyayi; Matusarín Euka uchiríyayi; Euk Jari-tia uchiríyayi; Jarit Maararíira uchiríyayi; Maararír Kainianka uchiríyayi;

³⁸ Kainian Enusa uchiríyayi; Enus Seta uchiríyayi; Set Atańka uchiríyayi; tura Atań Yus najanamuyayi.

4

Jesusa nekapsamuri

(Mateu 4.1-11; Márkus 1.12-13)

¹ Jesusa enentáin Yusa Wakaní pimiutkamiayi. Jesussha Jurtan entsan-maya waketkimtai Yusa Wakaní aents atsamunam jukimiayi.

² Tura nuńsha kuarenta tsawant pujusmiayi. Tura íwianch Nin tunaanum ajuaraintiajtai tusa pujurmiayi. Nu kuarenta tsawantin Jesus yurumtsuk pujá asa ti tsukammiayi.

³ Nuińkia íwianch chicharuk “Amesha nekas Yusa Uchiríntkiumka ju kaya apatuk najanata” tímiayi.

⁴ Tutai Jesus tímiayi “Yus-Papí tawai:

“Aya apatkujain shuar iwiaaku pujuschamniaiti. Antsu ashí Yus-Chicham tana nujai nekas iwiaaku pujusminiaiti,” tawai” tímiayi.

⁵ Tura nuyá íwianch naint yakí wájakmanum jukí, ashí nuńka ainia nuna ju chichamaik iniaktusmiayi.

⁶⁻⁷ Tura chicharuk tímiayi “Ashí ju nuńka wáinmena nu wíniaiti. Tura wi wakerajna nú shuaran súsatniuitjai. Tuma asamtai tikishmatrurakminkia ju nuńkanam ashí akupkatniun susattajme. Tura nuj ni wariri ainia nusha áminiu átatui” tímiayi.

⁸ Tutai Jesus tímiayi “Yus-Papí tawai:

“Aya Nińki Yus ame Úuntrum tikishmatram enentáimtustiniaitme.”

Tau asamtai, werumta, iwianchi” tímiayi.

⁹ Ataksha íwianch Jesusan Jerusaren péprunam jukimiayi. Tura Yusa Uunt Jee yakini iwiak tímiayi:

¹⁰ “Yus-Papí tatsuk:

“Yuska ni suntarin wáinkiatá tusa akupturmaktatui.

¹¹ Kayanam ajintrain tusa wenkurmaktatui.”

Tuma asamtai nekas Yusa Uchiríntkiumka juyá akaikim iniaata” tímiayi.

¹² Tutai Jesus áimiuk tímiayi “Yus-Papí junasha tawai:

Yus ame Úuntrum nekapsataj tiip.”

¹³ Tuma asamtai íwianch penké tujintiak ishichik tsawant Jesusan ini-aisamiayi.

Kariréa nuńkanam Jesus ni takatrin nankamamiania nu

(Mateu 4.12-17; Márkus 1.14-15)

¹⁴ Jesus ni enentáin Yusa Wakaní kakarmari pimiutkamu ajas Kariréa nuńkanam waketkimiayi. Nu nuńkanam nankaamantu túramurin áujmatarmiayi.

¹⁵ Nu nuńkanam ashí péprunam Israer-shuar iruntai jea armia nuj un-uniarmiayi. Tura anturkarmia nuka ni náarin shiir awajsarmiayi.

*Jesus Nasarétnum pujumiania nu
(Mateu 13.53-58; Márkus 6.1-6)*

¹⁶ Ni tsakarmarijn Nasarétnum Jesus wémiayi. Tura Israer-shuar ayampratin tsawantin iruntai jeanam wayamiayi, tuke turin asa. Tura wayá Yus-Papin áujсатаj tusa wajakmiayi.

¹⁷ Nuñkia Yúsnan etserin Isayasa áarmarijn súarmiayi. Nuna urak, nuñ juna áarman wáinkiamiayi:

¹⁸ Yusa Wakaní winí pujurtawai. Shuar warainiachun shiir chichaman ujaktinian anaitiukuiti. Kúntuts enentáimiar wake mesek pujuinian tsuártinian akuptukuiti. Tura jii kusuruncha ímtiktinian, tura yajauch awajsamu ainia nuna péñker awajsatniuncha,

¹⁹ tura Uunt Yus, shuáran yaintin tsawantri jeán etserkatniuncha akuptukuiti.

²⁰ Nu áarman aujsua amik papin nukukmiayi. Tura iruntai jeanam yáimin pujan susa iniais Niñkia etserkataj tusa pujusmiayi. Tura ashí shuar pujuarmia nu émamkes ii pujuarmiayi.

²¹ Jesussha chicharuk tímiayi “Yus-Chicham yamáí antukurmena nu yamáí tsawantin túrunayi.”

²² Jesusan ashí péñker áujmatarmiayi. Tura Jesus ti shiir chichaakui ti enentáimprar “Juka Jusé uchirínchukait” tiarmiayi.

²³ Tu enentáimiainiakui, Jesus chicharuk “Atumsha shuar tuke tuinia núnisrumek, “tsuákratniuitkiumka amek tsuámarta,” turuttiatrume. Kapernáum péprunam aentsti túrachmin túramamna núnismek juñsha túrata tusarum nu turuttiatrume.

²⁴ Túrasha nekas tájarne, Yúsnan etserniun ni nunkenkia nii tana nuna anturainiatsui.

²⁵ Nuyasha tájarne, Irías pujumia nú tsawantin, menaintiú uwí nankaamas yumi yutukcha asamtai ashí Israer núnkanam ti tsuka amia nuñ ti untsurí waje irunmiayi.

²⁶ Tuma aiñ nu wajen yainti tusa Yus Iríasan akuptukchamiayi. Antsu chíkich nunkanmaya wajen Sarepta péprunam pujumia nuna yainti tusa akuptukmiayi. Sarepta pepru Sitiún péprunam tíjiuch pujawai.

²⁷ Núnisan ii nunkesha Iriséu pujumia nu tsawantin ti untsurí tunamaru iruniarmiayi. Tura núnaka tsuácharmiai. Antsu chíkich nunka, Sírianmaya Naaman kan tsuármiai” tímiayi Jesus.

²⁸ Israer-shuarsha iruntai jeen pujuarmia nu, nuna antukar ti kajerarmiayi.

²⁹ Tura wajakkiar Jesusan jiiiki péprunmaya akupkarmiayi. Tura pepru amia nuñ naint yakí nánkatkamunam, nuyá akaki ajuatai tusar júkiarmiayi.

³⁰ Túrasha Jesuska irunar matsatainiamunman etempraktak jiinki wémiayi.

*Iwianchrukun Jesus tsuármiania nu
(Márkus 1.21-28)*

³¹ Nuyá Jesus Kariréa nunkanam Kapernáum pepru amia nuñ wémiayi. Tura Israer-shuara ayampratin tsawantriin tuke etserki wémiayi.

³² Yusa kakarmarijn takaku asa nuñ etserkamiayi. Tuma asamtai “Yusa kakarmarijñai unuitiamtsujik” tiar ti enentáimprarmiayi.

³³ Chíkich tsawantai áishman iwianchruku Israer-shuar iruntai jeanam pujumia nu untsumuk tímiayi,

³⁴ “Inikiartusta. Iikia Áminkia pachistin nakitiaji. ¿Warí, incha amukratkataj tusam táchamek? Wikia nékajme. Ámeka ti péñker Tunaarinja núitme” tímiayi.

³⁵ Tutai Jesus iwianchin kakantar chicharuk “Takamatsata. Ju áishman*̄* ikiuktia” tímiayi.

Tutai nu chichamaik íwianch áishman*̄*numiá jiinki weak nunká ajuant ikiukmiayi. Túrasha nekas yajauch awajtsuk ikiukmiayi.

³⁶ Ashí pujuarmiania nu ti enentáimiar mai tunai ajarmiayi. “Jusha warí chichamait? Ju áishman*̄* Yusa kakarmarijia*̄* iwianchin jiiki awematsuk” tiarmiayi.

³⁷ Tura ashí nú nunkanam Jesusa túramurin áujmatiar*̄*miayi.

Semun̄ Pitru tsatsarín Jesus tsuármiania nu
(Mateu 8.14-15; Márkus 1.29-31)

³⁸ Jesussha Israer-shuara iruntai jeeniá jiinki Semun̄ka jeen wémiayi. Semun̄ka tsatsari*̄* tsuer ti jáamiayi. Ti jaakui Jesusan “tsuárturtá” tiarmiayi.

³⁹ Jesussha jaa tepan tsuntsumprua tsuemun “michatrata” tímiayi. Tutai nú chichamaik nuwasha michatramiayi. Nú chichamaik nantaki nincha ayurawarmiayi.

Untsurí jaan Jesus tsuármiania nu
(Mateu 8.16-17; Márkus 1.32-34)

⁴⁰ Etsa akaikin ai ni shuari nánkamas sunkurjai jaarmia nuna Jesusan ikiaatkarmiayi. Jesussha jáinian chikichkiniak chikichkiniak uwejejai antinkiar tsuárrarmiayi.

⁴¹ Ti untsurí iwianchr*̄*uku armia nunasha iwianchr*̄*in jírkiarmiayi. Jíinkiar íwianchkia untsumainiak “Ámeke Yusa Uchirínme” Jesusan tiarmiayi. Tura niisha “Jesuska Yusa anaikiamurinti” tu nékainiakui Jesus kakantar chicharak itiatmamtikiarmiayi.

Kariréa nunkanam Jesus etserkamiania nu
(Márkus 1.35-39)

⁴² Kashin káshik tsawaak Jesus péprunmaya jiinki atsamunam Nin*̄*ki wémiayi. Tura shuarsha eakiar ni pujamunam jeariarmiayi. Tura iijiai tuke pujusat tusar emetataitsar wakeriarmiayi.

⁴³ Túmain*̄* Jesus tímiayi “Yus ii enentáin akupkatajtsa wakera nú shiir chichaman chikich péprunam matsatainia nunasha ujaktiniaitjai. Nu túrata tusa akupkamuitjai” tímiayi.

⁴⁴ Tuma asantai Kariréa nunkanam Israer-shuar iruntai jeanam Jesus tuke etserki wémiayi.

5

Namakan ti untsurín achikiarmiania nu
(Mateu 4.18-22; Márkus 1.16-20)

¹ Chikich tsawantai Jesus Jinisarít antumianka tutainium káanmatkari*̄* pu-jai ti untsurí shuar, Yusa chichamen antuktai tusar wakeruiniak Jesusai káunkarmiayi. Antuktai tusar wakeruiniak ka*̄*e ajattsarmiayi.

² Tura jimiará kanun antumiankan káanmatkariin tepan wáinkiar*̄*miayi. Ni nérenniurinkia jíinkiar ni nekarin nijiá pujuinia asantai kánuka ankant ármiai.

³ Tuma asantai Jesus Semun̄ka kanurin enkempramiayi. Tura Semun̄kan chicharuk “Ishichik ajapén juruktía” tímiayi. Nuinkia kanunam en*̄*kemas áentsun káanmatkanam pujuinian unuiniamiayi.

⁴ Unuinasua amik Semun̄kan chicharuk “Kanu kunanam jukim neka ai ajunkatarum” tímiayi.

⁵ Tutai Semun̄ tímiayi “Túrasha, Uuntá, káshisha tuke aju-junkuar tsawar̄ji. Túrasha pen̄ké achikchaji. Kame áankisha Ame támajai ajunkatjai” tímiayi.

⁶ Tura ajunkar namakan ti untsur̄in achikiarmiayi. Túram nekasha jaanaki wémiayi.

⁷ Tuma asamtai ni írutkamur̄in chíkich kanunam pujuinian uwejéjai “wini-tia, yáintkiamniuram” tusar untsukarmiayi. Niisha táarmiayi. Túrawar jimiará kanunam métej awajsarmiayi. Tura kanusha init wayastatuk ajamiayi.

⁸ Nuna túramtai Semun̄ Pítiur Jesusan tikishmatar tímiayi “Uuntá, wikia ti tunaitjai. ¿Wíjiaisha ititurak pujustam?”

⁹ Semun̄sha ni írutkamur̄ijiai namakan timiá untsur̄in wáinkiar ashamkarmiayi. Tuma asa Semun̄sha nuní tímiayi.

¹⁰ Tura Sepetéu uchiri Jakupusha Juansha Semun̄jai pujuarmia nusha ashamkarmiayi. Tura Jesus Semun̄kan tímiayi “Ashamkaip. Yamaikia namaka-achinia áintsamek aents-eau ajastatme.”

¹¹ Nuyasha kanur̄in kukar júkiar, ashí takakmar̄incha ikiukiar Jesusan nemarki wearmiayi.

*Tunamaru áishman̄kan Jesus tsuármiania nu
(Mateu 8.1-4; Márkus 1.40-45)*

¹² Ukunam Jesus chíkich péprunam pujai tunamaru áishman̄ taa Jesusan wáiniak tikishmatar nun̄ká shushuma pankái Jesusan tímiayi “Uuntá, wakerutakmeke páchitsuk tsuáramniaitme.”

¹³ Nuna tutai Jesus antin̄ tímiayi “Wakerajai. Tsuaajme.” Tura nú chichamaik tunamarusha pen̄ker ajasmiayi.

¹⁴ Túrasha Jesus chicharuk “Ámeke nu etserkaip, tímiayi. Antsu Israer-shuar Patrij werim ame pen̄ker ajasmanum Muisáis akupkamia núnismek susata. Nujai ashí shuar ame pen̄ker ajasmarmin nekaawartatui” tímiayi.

¹⁵ Tura Jesusa túramur̄i ti etsernamiai. Túmakui untsur̄i aents anturkataj tusar káutkarmiayi. Tura ni sun̄kur̄incha tsuámartaj tusar káutiarmiayi.

¹⁶ Núnisan̄ Jesuska aents atsuiniamunam we ni Apar̄in áujmiayi.

*Emearun Jesus tsuármiania nu
(Mateu 9.1-8; Márkus 2.1-12)*

¹⁷ Chíkich tsawantai Jesus unuiniak pujai Pariséu aents tura Israer-shuara jintinniur̄isha Kariréa péprunmayasha, Jutía péprunmayasha tura Jerusarénnumiasha káunkarmia nu antúu pujuarmiayi. Jaa tsuártinian Yusa kakarmar̄in takakuyayi Jesus.

¹⁸ Nuin̄kia emearun tampumpua kuaru shuar itiararmiayi. Jesus pujamunam init awayattsar wakeriararmiayi.

¹⁹ Tura shuar ti untsur̄i piaku asamtai wayamnia atsumiayi. Túmaitkui yakiini wear jean urakar, aents kaē ajas matsatmanum Jesus pujamunam emearun tampunam nená itiararmiayi.

²⁰ Nin itiarmania nu, Jesus Yusa kakarmar̄in takakui, tú enentáimtamun Jesus nekáa emearun tímiayi “Ame tunaarum tsan̄kuramuitme.”

²¹ Nuin̄kia Israer-shuara jintinniur̄isha, Pariséusha ni enentáin enentáimsar “¿Jusha yait Yúsa náarin yajauch awajtin? Warí, aya Yúsak tunaan tsan̄kurachminkiait” tu enentáimsarmiayi.

²² Tura Jesus ni enentáimsamur̄in nekáa tímiayi “¿Urukantai tú enentáimprarum átum?”

²³ Nuin̄kia ¿warí imiá yúpichuchit, tsuártiniak, ni tunaari tsan̄kuratniuk?

²⁴ Wats, Aents Ajasu tutai Wisha tunaan tsan̄kuratniun Yusa kakarmar̄in takakjai. Jujai nekaatarum tusan wats iturchat tárugna nuna túrattajai.”

Nuyá emearun chicharuk tímiayi “Amesha wajakim, tampuram achikiam ame jeemiin wetá.”

²⁵ Nú chichamaik emearu niisha íimiainiamunman tampurin achik wajak ni jeen Yúsan wararki wémiayi.

²⁶ Túmakui ashí shuar ti enentáimprar Yusa náarin shiir awajsarmiayi. Tura ashamainiak “aentsti tujinkiamu yamá wáinkiaji” tiarmiayi.

Riwin Jesus untsukmiania nu
(Mateu 9.9-13; Márkus 2.13-17)

²⁷ Ukunam Jesus wekas akupniu kuítrin-juu, naari Riwi, ni chíkich naari Mateu, akupin akitiai jeenam pujan wáinkiamiayi. Wáiniak “nemartusta” tímiayi.

²⁸ Tutai Riwi wajak takakmarinkia ikiuak Jesusan nemarsamiayi.

²⁹ Nuyá ukunam Riwi namperan Jesusan najatamiayi. Tura untsurí akupniu kuítrin-juu tura chíkich shuarsha káunkar misanam pujuarmiayi.

³⁰ Tura Pariséusha Israer-shuara jintinniurisha Jesusan tsanumpruiniak Jesusa unuiniamurin tiarmiayi “¿Maaj, urukamtai atumsha akupniu kuítrin-juu ainia nújaisha tura chíkich yajauch shuarjaisha iruntrarum yurumprum?”

³¹ Tutai Jesus áimkiamiayi “Shuar jaachu péñker ainiana nu ¿tsuákratniun atsumainiawak? Antsu jaa ainia nu tsuákratniun atsumainiawai.

³² “Wikia péñkeraitjai” tuinia nuna untsuktajtsan táchaitjai. Antsu yajauch shuar ni enentáin yapajjá Winia ajasat tusan untsuajai” tímiayi.

Yurumtsuk Yus áujsatniun Jesusan aniasarmiania nu
(Mateu 9.14-17; Márkus 2.18-22)

³³ Nuyá Jesusan aniak tiarmiayi “Juanka unuiniamurisha, Pariséu unuiniamurisha yurumtsuk Yúsan áujainiatsuk. Tura ame unuiniamurmeka ¿urukamtai ijiarma Yúsan áujainiatsu?” tiarmiayi.

³⁴ Tutai Jesus tímiayi “Nuatma nampernum, ¿ipiaamu ainia nu ijiarmamniakait, yamá-nuatu pujai?”

³⁵ Atsá. Wats Wisha ukunam junaktiatjai; nuinkia ijiarmatin átatui” tímiayi.

³⁶ Tura junasha nujai métek-taku unuiniamiayi: “¿Yamaram pushí tsupikiar nujai arut pushiniam anujtukminkiait? Nu túramka yamaram pushí yajauch ajasaintiui; túrasha shiir anujkam arut pushijiai mai metek yamaram wáinkiachminiaiiti.

³⁷ Núnisan nijiamanch yamá nawamu nuap najanam arutnum yaraachminiaiiti. Túramka nijiamanch karíak ijiakratniuiti; túmak nijiamchisha nuap najanamusha mai metek menkainiawai.

³⁸ Tuma asantai nijiamanch yamá nawamu yamaram nuap najanam nam yaraatniuiti. Nu túramka mai metek péñker átiniaiiti.

³⁹ Yaunchu nawamu úmana nuka yamarman nakitrattui. “Yaunchu nawamu imiá penkeraiti” tiártatui” tímiayi Jesus.

6

Ayampratin tsawantai trikiu neren achikiarmiania nu
(Mateu 12.1-8; Márkus 2.23-28)

¹ Ayampratin tsawantai Jesussha unuiniamurijiai araamunam wekasar, unuiniamurisha trikiu neren majurkutak wekainiarmiayi; tura tishisar neren yuawarmiayi.

² Nuna túruiniakui Pariséu tiarmiayi “Maaj, atumsha ayampratin tsawantai takaschatniua nu, ¿urukamtai takaarum?”

³ Takui Jesus ayak tímiayi “Yaunchu uunt akupin Tawitcha tura nemarniusha tsukamainiak túrawarmia nu ántichukaitrum.

⁴ Tawit Yusa Jeen wayá, Yus iniaktusma tantan yuámiayi; tura nemarniuncha ajamsamiayi. Tura nu tantancha aya Israer-shuara Pátriri yúatin ármiai. Tuma ain Tawitcha yajauchin túrutsuk achikmiayi, tímiayi.

⁵ Wisha Aents Ajasuitkiun ayampratin tsawantan Nérenniurintjai” tímiayi Jesus.

*Shuara uweje jakaan Jesus tsuármiania nu
(Mateu 12.9-14; Márkus 3.1-6)*

⁶ Chíkich ayampratin tsawantai Israer-shuar iruntai jeenam Jesus wayá ununiartasa nan kamamiayi. Nui shuar uweje untsuurja nu jakaa pujumiayi.

⁷ Tura Israer-shuara jintinniurisha, Pariséusha Jesusan “yajauch túrayi” titiai tusar wakeruiniak, “ju ayampratin tsawantai nu shuaran tsuartimpiash” tusar ii pujuarmiayi.

⁸ Túrasha Jesuska ni enentáimmiarin nekariarmiayi. Túmayat uweje jakaan chicharuk “Juí ajapén wajasta” tímiayi. Tutai áishman ajapén wajasmiai.

⁹ Nuinkia iruniarmiania nuna Jesus tímiayi “Enentáimpratarum. Ayampratin tsawantai yajauch túratin, péñker túratniujai ¿tuá péñkerait? ¿Uwemtikratin, máatniujajisha tuá péñkerait?” tímiayi.

¹⁰ Nuyá téntakarmia nuna iis áishman kan tímiayi “Uwejem takuitia.” Áishmansha uwejen takuimtai nú chichamaik péñker ajasmiai.

¹¹ Tura chíkichkia ti kajer karmiayi. Túrawar “Jesus warí itiurkamniakit” tusar aniniaisarmiayi.

*Tuse unuiniamun Jesus anaikiamiania nu
(Mateu 10.1-4; Márkus 3.13-19)*

¹² Nuyá Jesus Yúsan áujasataj tusa náinnium wakamiayi. Tura nu kashi Yúsan au-ajkua tsawarmiayi.

¹³ Tsawarmatai unuiniamurin ikiankar tuse anaikiamiayi. “Winia akatramuruitrume” tímiayi.

¹⁴ Ju ármiai: Emka, Semun chíkich naari Pítiur apujtusmia nu; tura nuyá ni yachi Antres, Jakupusha, Juansha, Jiripisha, Parturumísha,

¹⁵ Mateusha, Tumassha, Arpeu uchiri Jakupusha, Ásump Semunsha,

¹⁶ Jakupu yachi Jútassha, tura Jútas Iskariúti Jesusan ukunam surukmia nu. Nu tuse achikma ármiai.

*Untsurí shuaran Jesus yáinkiarmaniania nu
(Mateu 4.23-25)*

¹⁷ Niiijai Jesus náinniumia pakanam taawarmiayi. Nui pujusarmiayi. Nujisha untsurí unuiniamurisha, tura Jutía nunkanmaya, tura Jerusarénumia tura nayaantsanam ayamach Tiru, tura Setun péprunmaya ti untsurí aents antuktait sar pujuarmiayi. Jesus tsuarati tusar káunkarmiayi.

¹⁸ Iwianchrukusha tsuámararmiayi.

¹⁹ Jesus tsuártinian tujinkiachu asamtai ashi shuar antintaj tusar wakeriarmiayi.

*Náinnium Jesus etserkamu
(Mateu 5.1-12)*

²⁰ Ni unuiniamurin Jesus iis juna tímiayi: ““Yusan atsumajai” tárugna nu, Yus akupeamunam páchitkaiatrume; tuma asamtai warasminiaitrume.’

²¹ ‘Yamáí tsukarmena nu ukunam ejemartatrume. Tuma asamtai warasminiaitrume. Yamái útrumna nu, ukunmanka wishirtatrume. Tuma asamtai warasminiaitrume.’

22 ‘Atumin nakitramprarmatai, ajapramawarmataisha, tura Winia Aents Ajasu tutaiya nú shuar ajasuiti tusar tsanumprutmak katsekkramkarmataisha warasminiaitrume.’

23 ‘Túramtai nayaimpiniam ti shiir ana nu núkap sunastin átatui tu enentáimsarum ti warastarum. Warí, ju shuara uuntri yaunchu Yúsnan etserniun nútiksaran yajauch awajsacharmakia.’

24 ‘Tura kuítrinniutiram atumsha atumí waratairi aya yamaik waintrume. Ukunmaṅka waraschattarme.’

25 ‘Atsumatsjai, tu enentáimprumna nu, ukunmaṅka atsumattarme. Nuiṅkia waraschattarme. Yamái wishíarmena nu, ukunmaṅka wáitiakrum úttiattrume. Nuiṅkia waraschattarme.’

26 ‘Ashí aents atumin shiir awajtamkurmin aneartarum. Nujaj waraschatniuitrume. Warí nuna uuntri ántar-yusnan etserin armia nuna nútiksaran yaunchu shiir awajsarmiayi.’

Ii nemasri aneatniun Jesus unuiniamiyi

(Mateu 5.38-48; 7.12)

27 ‘Winia anturtarmena nuna juna tájarme: Ame nemasrum aneata, nakitramainia nusha shiir awajsata;

28 yajauch chichartamainia nusha shiir enentáimtusarta; katsekramainia nusha Yus áujtusarta.

29 Ame yapimin ijiutmamtai áatú yapiruisha ijiuti tusam iniaktusta; ame pushirmin jurutramkitiaj tuíniakuisha sákurmencha jukiti tusam iniaisata.

30 Seatmana nu susata, tura áminiun jurutramainiakuisha ataksha awanturkitia tiip.

31 Chíkich winia túrutati tusam wakeramna nútiksamek chikichcha túrata.’

32 ‘Iista, aya atumin anenmainia nuke aneakmesha, ¿nusha warí péṅkera túrarum? Yajauch shuarsha nuna túrin ániawai.

33 Tura atumniasha péṅker awajtamainia nuke péṅker awajkurmesha ¿nusha warí péṅkera túrarum? Yajauch shuarsha nuna túrin ániawai.

34 Awanturkimniaiti tu enentáimtarum nuke íkiakrumsha ¿nusha warí péṅkera túrarum? Yajauch shuar nuamtak yajauch shuarjai awanturkimniaiti tu enentáimsar ikianainiawai.

35 Tura atumsha nemasrum aneatniuitrume, tura péṅker túratniuitrume, tura awanturkittiawai tu enentáimtsuk ikiastiniaitrume. Túrakrumniṅkia Uunt Yus péṅker akirmaktatrume; tura ni uchirintjai tu iniakmastatrume. Yuska, “yumınsajme” ticha nunasha tura yajauch shuarnasha shiir awajeawai.

36 Ii Aparí waitnentrarniua nútiksarmek atumsha waitnentratarum.’

Chikicha túramuri ti enentáimtusairap

(Mateu 7.1-5)

37 ‘Chikicha túramuri ti enentáimtusairap. Núnisan Yuska atumí tunaarın iirtamsashtatui. Chikicha tunaarın “nuke asutniatniuiti” tiirap. Núnisan Yus atumin sumamtikramashtatrume. Tsankurnairatarum. Núnisan Yus tsankurtamprattawai.

38 Chikichcha susata. Núnisan Yus atumin suramsattarme. Niisha péṅker nekapma, tura núkap ati tusa teeka awajas tura patas núkap enkea emetsaj amastatui. Atum chíkich túrarmena nútiksarı atumniasha túrutmattarme.”

39 Tura nuyasha juna métek-taku chichaman ujakarmiayi: “Jii kusurusha ¿itiurak chíkich kusuruncha jukimniait. Mai metek waanam iniaashtatuak?”

40 Unuiniamua nu unuiniana nuna nankaamas áchatniuiti. Túrasha niisha ti unuimiatar unuiniana nujaj métek nekaamniaiti.’

⁴¹ ‘¿Itiurtsuk atumi j̄in numi enketna auk iitskesha atumí yachí j̄in tsuat enketusha iiyarum?’

⁴² Ame j̄im̄in numi tuke enketaisha ¿itiurtsuk ame yatsumi j̄īya tsuátan jurustajme tame? ¡Ántraitrume! Emka ame j̄im̄in numi enketna nu jusata. Nuinkia paant wáinkiatame yatsumi j̄in tsuat enketna nu jurustin.’

Nerejai numi nekaatainti
(Mateu 7.17-20; 12.34-35)

⁴³ ‘Pénker numi yajauchin nereatsui; tura yajauch numi péñkeran nereatsui.

⁴⁴ Numisha ni neren nékanui. Tsachikniumiasha kushin̄kiap júukchamniaiti. Tura naranmaya shuinia júukchamniaiti.

⁴⁵ Núnisan̄ péñker shuar ni enentái péñker asamtai péñkeran chichaawai; tura yajauch shuar, enentái yajauch asamtai yajauchin chichaawai. Páantchakait. Enentáin pimiutkamu ana nuyan̄ ni wenejai chichaawai.’

Jimiará jea ukurtin
(Mateu 7.24-27)

⁴⁶ ‘Wi tájana nu túrachiatrumsha ¿urukamtai Winia, Uunta, túrutrum?’

⁴⁷ Shuar winia chichamprun ántuinia nu jea jeammajai métekete. Winia anturtuk umíana nu jujai métekete:

⁴⁸ Shuar jean jeamuk emka init taur kayanam ukurmai. Tura yumi ti yutuk, entsa nujan̄krua tukummaitiat pukukachmai kayanam ukuamu asa.

⁴⁹ Antsu Winia anturtukiat umiatsna nuka jujai métekete: Shuar jean jeamuk aya naikminiam jeammai. Tura entsa nujan̄krua tukumpram nu jeaka pukukamai. Tura mash sántramai.” Tu unuiniamiyi Jesus.

7

Suntara yáin̄rin Jesus tsuármiania nu
(Mateu 8.5-13)

¹ Jesus áentsun unuiniasua amik Kapernáum péprunam wémiayi.

² Nuí Rúmanmaya suntara kapitián̄ri pujumiayi. Nu kapitián̄i takarniuri, ti aneamuri, jakamnia jaamiayi.

³ Tura Jesusan pachis áujmatainian antuk, ame shuarum Jesusan itiertiti tura winia takarniun tsuárturti tusa Israer-shuara úun̄rin akupkamiayi.

⁴ Niisha Jesusan weriar, umirtukat tusa ti seainiak tiarmiayi “Ju kapitián̄i nekas yáin̄tin péñkeraiti.

⁵ Niisha yajaya apachitiat in shiir enentáim̄tur̄maji. Tura iruntai jean jeamtinniasha niñki chicharkaiti, tura yayawai.”

⁶ Nuyá Jesus niij̄iai wémiayi. Tura ni jeen jeastatuk jatemsam̄tai kapitián̄cha ni amikr̄in akatar ju titiarum tusa Jesusan akuptukarmiayi. Niisha Jesusan chicharuk juna tiarmiayi “Uuntá, ánt̄ram waȳataj tu enentáimsaip. Ame ti nan̄kaamaku asam winia jearūj waȳachmin̄iaitme.

⁷ Tuma asakmin imia wiki Am̄in̄ jeatniun arantukjame. Ayatik “pénker ajastí” tákumin winia takarniusha péñker ajatrustatui.

⁸ Wi nékajai. Winia úuntur winia akuptuiniawai. Tura wisha suntaran akupenajai. Nunasha wi “wetá” takui wéawai. Tura chikichnasha “winitíá” tutai winiawai. Tura winia takartinian “ju túratá” tutai umíawai.” Tu tímiayi.

⁹ Jesus nuna antuk ti enentáim̄ias ni nemarainian tímiayi “Nekas tájarme Israer-shuar Yús̄an tímiatrus enentáim̄tinian wáinchaitjai.”

¹⁰ Tura kapitianī akatramurī jeá waketkiar, takarniurī péñker ajasun wáinkiar̄miayi.

Wajé uchirín Jesus iniantkimiania nu

11 Nuyá ukunam chíkich pepru Naín tutainium ni unuiniamurijjiaí tura chíkich untsurí aentsjají Jesus wémiayi.

12 Tura péprunam nuntumas jakaan iwiarsatai tusar juńnian wáinkiamiayi. Jakáa nukurí wájeyayi, tura uchirí jakamia núchikiyayi. Tura ti untsurí nu peprunmayá nin nemarsarmiaayi.

13 Jesus nu wajen wáiniak tura waitnentar “úutip” tímiayi.

14 Nuńkia Jesus jakaa enkerman tarunt antinmiayi; nuna juńniasha wajasarmiaayi. Nuńkia Jesus jakaan chicharuk “Umpa nantaktia, tájame” tímiayi.

15 Tutai niisha nantaki pujus chichaamiayi. Tura Jesus ni nukurín “Jujú uchiram” tímiayi.

16 Tura matsamiarmia nu, nuna wáinkiar ashamkarmiaayi. Tura Yusa náarin shiir awajsarmiaayi. Tura chichainiak, “Yúsnan etserniuchukait Ni-isha. Ataksha Yúsnan etserin uunt ana nu tarutramji” tiarmiayi. Tura “Israer-shuarti Niiniu ájinia nuna yáinmaktai tusa Yus tarutramji” tiarmiayi.

17 Tura ashí Jutía nunkanmayasha tura ni írutkamu nunka ármia nuyasha Jesus túramia nuna nekaawarmiaayi.

Imiakratin Juan sepunam pujak ni amikrín akatar Jesusan akuptukarmiania nu

(Mateu 11.2-19)

18 Juan ni írutkamurí ujakam Jesus túramun nekaamiayi. Nekáa ni írutkamurín jímiaran untsukmiayi.

19 Tura Jesusaí akupkarmiaayi. “Atumsha Jesus aniastarum. ¿Amesha nekas Kristu Yus akupkamú tátinia núkaitiam. Kame chikichak nákastataj? titiarum. Nu nekáa ikiuutarum’ tímiayi.

20 Tutai niisha Jesusan werí jeariar tiarmiayi “Incha imiakratin Juan akatar akuptamkaji. ¿Amesha nekas tátinia núkaitiam. Chikichak nákastataj? Nu nekaatai tusar wakeraji” tiarmiayi.

21 Wats, nii jeawarmia nuí Jesus untsurí jaan tsuártasa pujurmiayi. Iwianchruncha iwianchrín jjiirki akupkatasa pujurmiayi. Tura kusuruncha ímtikmiayi.

22 Tuma asa Jesus akatramun juna tímiayi: “Waketkirum ashí átum antukurmena nusha, wáinkiarumna nusha ujaktarum. Kusurusha wáinmainiawai; shutuap ainia nu péńker wekainiawai; tunamarusha tsuámainiawai; empekusha ántuiniawai; jakaasha atak iwiaaku ajainiawai; tura kuítrinchandumsha uwempratin chicham ujakmaiti. Juan nu ujaktarum.

23 Yawetsuk Winia tuke shiir enentáimturna nú shuar shiir átatui” tímiayi Jesus.

24 Waketkiarmatai Jesus Juánkan pachis áujmatman antuk shuar matsamarmia nuí juna tímiayi: “Shuar atsamunmasha ¿warí werimiarum. Pintiu nase umpúam atúu we juní we ajana nu iistai tusarmek wémarum? Juan núnischaiti.

25 Nuikia ¿warí werimiarum. Shuar péńker iwiarmampra ístai tusarmek wémarum? Warí, péńker iwiarmampraka uunt akupniu jeen pujuiniatsuk.

26 Nuńkia ¿warí werimiarum. Yúsnan etserniuk werimiarum? Maa, nú nankaamas wáinkiarne.

27 Yaunchu Yus-Chichamnum ju áarmaiti:

“Winia akatramurun amiini emka akupeajai ame jintimin iwiarat tusan.” Juan nu akatramuiti.

28 Nekasan tájarme, Yúsnan etserin imiakratin Juanjaj nankaamas uunt at-suwiti. Túmaitiat Yus akupeamunam páchinia nu shuarka nekas imian-chaitiat, Juanjaj nankaamas átatui” tímiayi.

29 Penké shuarsha, kuítian-juusha, Juan imiaimiujaj imianiarmia nu, Jesus timian antukar Yusa náarín shiir awajsarmiayi.

30 Túrasha Pariséusha Israer-shuara jintinniurisha Yus yáintaj támaitiat Juan imiaamujaj imiancha ásar nakitrarmiayi.

31 Nuñkia Uunt Jesus tímiayi “Yamaiya áentstiram, warijjajin métek árum nuna paant títiatjarme.

32 Uchijjaj métek árum. Ni aijjaj iruntrar nakurustaj tukamá tuíniawai “Námpera áinis nakurustaitсар peem umpuarji, túrasha jantsemáchure. Nuyá iwiansatniua áinis nakurustaitсар íwiareakur kantamtai kantamáaji, túrasha átum úutcharme.” Tu tuíniawai.

33 Atumsha núnisaitrume. Kame Juan núkap yurumtsuk úmutsuk wekaimiayi. Túmakui átumka “iwianchrukuíti” tímiarme.

34 Nuyá Wisha Aents Ajasan támajai. Tura yurumá úmakuisha “ti yurumin tura ti nampenaiti; kame ashí yajauch shuaran tura kuítian-juu amikrinti” túrutrume.

35 Wats, nekas neka ainia nu, Yusa nekatairín iniakmainiawai.” Tu tímiayi.

Pariséu Semuñ náartin Jesusan ni jeen ipiaamiania nu

36 “Winí yurumáitia” tusa Pariséu Jesusan ipiaamiayi. Tutai Jesus ni jeen werí misanam pujusmiayi.

37 Nuñkia nu péprunmaya yajauch nuwá, Jesus Pariséu jeen yurumáttsa weyi táman antuk, kayá mutinium kunkuín asuiti áimkiamun takukí jearmi-ayi.

38 Tura úutki Jesusa nawen pujuras neajkijjaj niijarmiayi. Tura intiashijjaj japirmiayi; nuyá nawenam mukuta kunkuínian ni nawen ukatramiayi.

39 Pariséu Jesusan ipiaamia nu, nuna wáiniak juna enentáimsamiayi: “Ju nekas Yúsnan etserniuitkiunka, ju yajauch nuwá ántiana nuna nekaawainti. Warí, niisha netse nuwáchukait” tu enentáimsamiayi.

40 Nuñkia Jesus Pariséun chicharuk tímiayi “Semuñká, ámin titiaj tusan wakerajai.”

Tutai Pariséu chichaak “Turuttiá, Uuntá” tímiayi.

41 Tutai Jesus tímiayi “Kuítian ikiamniun jimiará áishman tumashmakarmi-ayi. Chíkich kiniantus (500) tura chíkichka aya senkuentak tumashmakmiayi.

42 Akiktin tsawant jeamtai máí-metek takakcha árimiayi. Tuma asamtai kuítian ikiamin ni tumashrín máí-metek asakátrarmiayi. Wats, turuttiá ¿tú áishmanka ikiamniun nekas aneamia?” tímiayi.

43 Tutai Semuñ tímiayi “Enta, núkap tumashrín tsankuramia nu.”

44 Tutai Jesus tímiayi “Nekas tame.” Nuñkia nu nuwan iis Semuñkan tímiayi “Ju nuwá wáintsumek. Ame jeemiin wayamtai winia nawer niijartin entsa suruschamame; antsu ju nuwáka nawerun neajkijjaj niijarturai, tura intiashijjaj japirturai.

45 Mukutam áujtusamame; antsu niñkia nawerun tuke mukutui.

46 Winia muukaruisha asuiti ikiurtusamame; antsu niñkia naweruj kunkuín asuitin ukatrurai.

47 Nu tuma asamtai tájame, niisha Winia ti anentu asamtai ni tunaari untsurí ana nu tsankuramuiti. Tura tunaar ishichik awai tau tsankuramu ana nuka ishichik anenkratniuiti.” Tu tímiayi Jesus.

48 Nuñkia nuwan tímiayi “Ame tunaarum tsankuramuitme.”

⁴⁹ Tura chíkich ipiaamu Jesusjái misanam pujuarmiania nu “¿Jusha ya asañ tunaancha tsankurea?” nuamtak tunainiarmiayi.

⁵⁰ Tura Jesus nuwan chicharuk ““Uwemtikiartiniaiti” tu enentáimturu asam uwempraitme. Shiir wetá” tímiayi.

8

Nuwa Jesusan yáinkarmiania nu

¹ Nuyá untsurí péprunam Jesus wekaráktak Yus akupeana nuna shiir chichaman etserkini wekaimiayi. Tura ni unuiniamurí tuse ármia nu nemarsarmiayi.

² Yaunchu untsurí nuwa jaa armia nuna tura iwianchruku armia nunasha Jesus tsuáarmiayi. Nu nuwasha Nin nemarsarmiayi. Nusha ju ármiai: Maktaranmaya Marí, siati íwianch jíirkimiuyania nusha

³ tura uunt akupin Erutisa takarniurí Chusa nuwé Juancha, tura Susancha; tura chíkich untsurí ni takakmarin súsar Jesusan yáinkarmiayi.

Atsaamin atsaampramun Jesus unuiniamiania nu

(Mateu 13.1-9; Márkus 4.1-9)

⁴ Untsurí péprunmaya Jesusan iistai tusar jíinkarmiayi. Tura untsurí káunkarmatai ju métek-taku chichaman Jesus unuiniamiayi:

⁵ “Atsaamin atsaamprataj tusa jíinkimiayi. Atsaamki wesa jinkiái jintiá iniaararmiayi. Túrunamtai weenak najakarmiayi. Nuyá chiniki tariar yuawarmiayi.

⁶ Chíkich jinkiái kaya írunmanum iniaararmiayi. Nu jinkiái tsapainiar, wárik nantu sukuam káararmiayi.

⁷ Chíkich jinkiái janíiniam iniaararmiayi. Tura janíisha jinkiáisha máimetek tsapainiar, janíi kaníkar ajakramiayi.

⁸ Tura chíkich jinkiáisha péñker nuníkanam iniaararmiayi. Tura tsapainiar, péñker nerekar chíkichkia siansha (100) nerekararmiayi.” Tuasua amik kakan-tar chichaak Jesus tímiayi “Kuishim ákuinkia antuktarum.”

(Mateu 13.10-17; Márkus 4.10-12)

⁹ Nuyá ni unuiniamurí Jesusan aniak tiarmiayi “Ju métek-taku chicham tamena nu ¿warintkumea tame?”

¹⁰ Tutai Jesus tímiayi “Atumnia Yus ni akuptairin nekaachma ana nuna nekamtikramprume. Tura chikichnaka, wáiniainiyat kusurua núnin ártí tusan, tura ántuiniayat nekaacharat tusan aya métek-taku chichamjai jintintiatjai,” tímiayi.

Atsaampramu chichaman Jesus paant jintintiamiania nu

(Mateu 13.18-23; Márkus 4.13-20)

¹¹ Wats, ju nekaatarum, tímiayi. Jinkiáisha Yusa chichamen nakumui.

¹² Jintiá iniaaru tana nuka shuar aya ántana nuna nakumui. Yúsan nekas enentáimtus uwemprechtart tusa íwianch wárik taa nu chichaman ni enentáiyān júawai.

¹³ Kayanam iniaaru tana nuka shuar antuk waras umiana nuna nakumui. Tura nú shuar kaníkapē atsá asamtai, ishichik tsawantiniñ umikiar itiur-chatan wáinkiar wárik kanainiawai.

¹⁴ Janíiniam iniaaru tana nuka tuke enentáijjai umiátsna nuna nakumui. Nu shuarsha ántuiniawai, túrasha ni wakeramuríjjai wekainiawai. Ju nuníkanman ana nuna ti páchiniakui, tura kuítian ti wakeruiniakui, warastiníniak enentáimtuiniakui, Yus-Chicham ni enentáin takaatsui. Nujai kaníkarma ásar nerektinian tujintiainiawai.

¹⁵ Tura jinkiái péñker nunkanam iniaaru tana nuka shuar antuk umiinia nuna nakumui. Niisha antukarmia nuna péñker enentáimtusar, yawetsuk umirkar ti péñker nerenawai.'

Ashí iwiainiakma átatui
(*Márkus 4.21-25*)

¹⁶ '¿Shiripkin ekeemak nukuktinkiait? Peaknum waaptak ikiuschatniuiti. Antsu jeanam wáiniana nu paant wáinkiarat tusa yakí ekentsatniuiti.

¹⁷ Núnisan ashí nekaachma ana nu paant átatui. Tura úukma ana nu nekanattawai. Tura iwiainiakma átatui.

¹⁸ Tuma asamtai anearum péñker antuktarum. Shuar takakna nu patat-samnia átatui. Túrasha takaktsuna nu, takakjai tu enentáimtumana nuka jurunkíttiawai." Tu timiayi.

Jesusa nukurí, Jesusa yachi
(*Mateu 12.46-50; Márkus 3.31-35*)

¹⁹ Jesus pujamunam nukurí ni yachísha tariarmiayi.

²⁰ Turamtai Jesusan tiarmiayi "Ame nukusha yatsumsha aa wajasar untsurmainiawai."

²¹ Tutai Jesus tímiayi "Ee, nukuruiti, yatsuruiti, tura Yus tana nuna antuk umiana nusha winia nukuruiti, winia yatsuruiti."

Nasesha entsasha Jesusan umirkarmiania nu
(*Mateu 8.23-27; Márkus 4.35-41*)

²² Chíkich tsawantai Jesus ni unuiniamurijjai kanunam enkemprar "Antumian amaini wetai" tímiayi.

²³ Entsanam wesar Jesus kanarmiayi. Tura aya aneachma nase ti kakaram násentkui chíchimi tampá tukumar kanun init awayastatuk awajmiayi.

²⁴ Túram nuñkia Jesusan ishintiainiak "Uuntá, iisha entsá wayaaji" tiarmiayi. Nuñkia Jesus nantaki nasencha entsanacha chicharkamiayi. Nú chichamaik nasesha meñkakamiayi, tura entsasha miaaku ajasmiayi.

²⁵ Nuyá ni unuiniamurin chicharuk "¿Urukamtai Winia enentáimtursachuram?" tímiayi.

Tura niisha ashamainiak, ti enentáimprar "¿Ausha warí áishmankait? Nasesha entsasha Nii chicharkam umirainiatsuk" tiarmiayi.

Jatara nunkanam Jesus iwianchrukun tsuármiania nu
(*Mateu 8.28-34; Márkus 5.1-20*)

²⁶ Kariréa nunka amaini Jatara nunkanam jeawarmiayi.

²⁷ Kanunmaya Jesus jiinkimtai nu péprunmaya áishman Nin taruntamiayi. Nu áishmansha yaunchu iwianchrukuyayi. Misú wekas, jeá pujutsuk aents iwiarsamunam pujuyayi.

²⁸⁻²⁹ Íwianchkia nu aishmankan ti kakaram nupet wémiayi. Tura emetatai tusar uwejencha nawencha jirujai jinkiá wearmiayi. Túrasha tujinkiarimiayi. Niisha jiruncha tsurí wémiayi. Tura íwianch aents atsamunam útsuk awemamiayi. Nu aishman Jesusan wáiniak tikishmatar kakantar chicharuk "¿Urukamtai winiisha tarutnium, Uunt Nankaamaku Yusa Uchiri Jesusa? Winia wáitkiarsaip tusan seajme" tímiayi. Íwianch niin pujurun Jesus jiki akupeam tu tímiayi.

³⁰ Jesus nu áishmankan anias "¿yáitiam?" tímiayi.

Tútai nii chichaak "Wikia Untsurintjai" tímiayi. Untsurí íwianch niin pujurma asa nuna tímiayi.

³¹ "In uunt wáanam ii jiinkimiaj nuñ akuptukam amutkaip" íwianch seawarmiayi Jesusan.

³² Nuj ishichik arantach náinnium untsurí kuchi shushunmak yujaarmiayi. Tura íwianch chichainiak, “Antsu kuchiniam wayatin tsankatrukta” tiarmiayi.

Tutai Jesuska “Ayu, wetarum” tímiayi.

³³ Nuna takui íwianch áishmannumia jínkiar kuchiniam wayawarmiayi. Túram kuchisha nánatanam akaiki iniaawar entsanam utsanawarmiayi. Túrunawar jakekarmiayi.

³⁴ Kuchin wáinniusha túrunan wáinkiar, ashamkar, péprunmasha tura arantcha etserkatai tusar tseke wearmiayi.

³⁵ Etserkarmatai, iyutai tusar untsurí shuar wearmiayi. Tura Jesus puja-nunam jeawar, íwianch jíintiukiarmia nú áishman kan péñker ajas pushí entsar Jesusa nawen puja wáinkiar miayi. Tura ashamkar miayi.

³⁶ Íwianchruku áishman tsuárman wáinkiar miia nu yama taan ujakarmiayi.

³⁷ Tura ti ashamainiak Jatara nunkanmaya aents ashí Jesusan “Wetá” tiarmiayi. Tutai Jesus kanunam enkemar wémiayi.

³⁸ Íwianch jíintiukiarmia nú áishman Jesusan, wisha ame wéamunam winitiaj tusa seamiayi. Tutai Jesus nuna suritiak,

³⁹ “Antsu ame jeemiin weme Yus ámin túrutma nu ashí etserkata” tímiayi. Tutai áishman we Jesus nin túramia nuna ashí nu péprunam etserkamiayi.

*Jairu nawantricha tura chikich nuwancha Jesus tsuármiania nu
(Mateu 9.18-26; Márkus 5.21-43)*

⁴⁰ Tura Jesus katiniki Kariréanam tatí tusar nákas pujuarmiayi. Tuma ásar Nii waketki katiniki támatai nu aencha warasar áujsarmiayi.

⁴¹ Tumaj Israer-shuara iruntai jeá uuntrí Jairu naartin támiaiyi. Nii taa, Jesusa nawen tikishmatar “Winia jearui waitneasam winítritiá” tímiayi.

⁴² Ni nawantrí chikichik amia nu, tuse uwí takaku, jakatasa pujakui nuna tímiayi.

Jesus “ayu” tinia weakui ti untsurí aents nemariarmiayi. Tura untsurí shuar kaé ajas weena ásar chanuawarmiayi.

⁴³ Nuj nuwa páchitkia wémiayi. Niisha tuse uwí numpa ajapeak wáitias pujuyayi. Tsuákratnua nuisha ni kuítrin ashí ajapaitiat tsuámarchauyayi.

⁴⁴ Jesusa úkuriini winiá weantuk ni pushirí nánkatramurin antinmiayi. Nuna tura nú chichamaik numpé ajapeamuncha péñker ajasmiayi.

⁴⁵ Nuinkia Jesus chichaak “¿Ya Winia antintkia?” tímiayi.

Tura “penkesha antinchajme” tuíniakui Pítiur ni tsaniakmarijjai Jesusan chicharuk “Uuntá, ti untsurí antinmasha, tura ti untsurí chanunmainiasha ¿itiura “ya Winia antintkia” tame?” tiarmiayi.

⁴⁶ Tútaisha Jesus tímiayi “Nekas Winia antintkiayi. Winia kakarmarjai tsuárajna nuna nékajai” tímiayi.

⁴⁷ Nuyá nu nuwasha, nekarayapi tusa kuraniki taa Jesusa nawen tikishmatramiayi. Tura ashí aents ántuiniamunam urukaku antinkia tura itiura wárik péñker ajasmia nuna ujakmiayi.

⁴⁸ Nuinkia Jesus nuwan tímiayi “Nawantrú, shiir wetá. Winia nekas enentáimtursa asam péñker ajasume.”

⁴⁹ Jesus tuke chichas pujai uunt Jairu jea, ti untsurí antinmasha, turenia taa, Jáirun tímiayi “Ame nawantrum jakayi. Unuikiartin tuke itit awajipia” tímiayi.

⁵⁰ Tura Jesus nuna antuk tímiayi “Ashamkaip. Áyatik Winia nekas enentáimtursata. Túrakmin nawantrum péñker ajastatui” tímiayi.

⁵¹ Jeá jeawar Jesussha Nijjaj untsurí wayatniun surimkiamiayi. Antsu aya Pítrun, Jakupun, Juánnasha tura nuwachi aparín nukuríncha wayatniun tsankatkamiayi.

⁵² Ashí útainiak atakka wáinkiashtatjapi tu útiarmiayi. Túmainiakui Jesus penké jakaan nékayat tímiayi “Útirpa. Nuwachkia jákachai, antsu kanarai” tímiayi.

⁵³ Jakaancha urukaku ta tusar wishikrarmiayi.

⁵⁴ Nuyá Jesus nuwachi uwején achik, kákantar chicharuk “Nawantru nantaktia” tímiayi.

⁵⁵ Túram niisha jakayat atak iwiaaku ajasmiayi. Tura nú chichamaik nantakmiayi; túrunamtaí Jesus “ayuratarum” tímiayi.

⁵⁶ Nuwachi aparí nukurísha ti enentáimprarmiayi. Tura Jesus “Ju túramu penké etserkairap” tímiayi.

9

Jesus ni unuiniamurín etserkati tusa akupkarmiania nu (Mateu 10.5-15; Márkus 6.7-13)

¹ Ni tuse unuiniamurín ikiaanank ni chichamejaj iwianchrukun enentáiyā iwianchin jjiirki akupkatniun tura sunkurjaj jaa tsuártinnisha ni kakarmarín súsararmiayi.

² “Yus akupin ajastin ujaktarum, tura jaa tsuártarum” tinia akupkarmiayi Jesus.

³ Nuyá tímiayi “Wéakrum áyatik wetarum. Ushukrustincha, uyuncha, yurumkasha, kuitcha penké jukiirap. Aya chikichik pushí jukitiarum.

⁴ Nánkamas jeanam jearum wayarmeka nuin pujustarum. Nuin pujusrumek chikich péprunam wéakrum jíinkitiarum, tímiayi.

⁵ Tura atumin awaintiamatniun nakitiana nú péprunmaya jíinkirum nawemiya nunka akakekrum ikiuktiarum. Awaintiamachma paant ati tusarum nu túratarum” tímiayi.

⁶ Nuyá jíinkiar ashí péprunam uwempratin chichaman ujakiar wearmiayi; tura ashí péprunam jáiniancha tsuákiar wearmiayi.

Erutis “Jesusan ístaj” tímiania nu (Mateu 14.1-12; Márkus 6.14-29)

⁷⁻⁸ Uunt akupin Erutis Jesus túramun antukmiayi. Nu túramun chikich shuarka “Juan jakamunmaya nantaki túrawai” tu wearmiayi. Chikichkia, “yaunchu Yúsnan etserin Eriás wantiniak túrawai” tu wearmiayi. Chikichkia, “chikich yaunchu etserin nantaki túrawai” tiarmiayi. Tuma asamtaí Erutis penké nekaachmiayi.

⁹ Tura tímiayi “Wiki, Juanka muuke tsupirkatarum, tíchamkaj. Tuma aisha, ¿ju shuar, ni túramurí ashí shuar chichainia nusha yátsukait?” Tu enentáimiuk “íistaj” tímiayi.

Senku mir áishmankan Jesus ayuramiania nu (Mateu 14.13-21; Márkus 6.30-44; Juan 6.1-14)

¹⁰ Atak Jesusa akatramurí waketki taar ni túramurín Jesusan ujakarmiayi. Nuinkia aents atsamunam Petsaitia péprunam tíjiuch weak nuí júkiarmiayi.

¹¹ Tura penké shuar nuna nekaawar nemariarmiayi. Túram Jesus nin shiir áujsamiayi. Tura Yusa akuptairí pachis unuiniamiayi. Tura jaa armia nuna tsuárarmiayi.

¹² Tura kíakui, tuse unuiniamu Jesusan wé^{ri}ar tiarmiayi “Uuntá, shuar akupkachminiashit. Tíjiuch péprunmasha, shúarnumkesha wear ni yurumátⁿⁱurⁱⁿ sumarmakarti, tura kanartintrⁱⁿ wáink^{ia}rti. Juí pujajnia juⁱⁿkia penké atsawai” tiarmiayi.

¹³ Tutai Jesus tímiayi “Atumsha ayuratarum.”

Tutai chichainiak “Iisha aya senku tanta tura namaksha jímiarchik takakji. Ju shuar ayuratin sumaktai tusar wétiniaitji” tiarmiayi.

¹⁴ Áishmansha ti untsurí senku mir (5000) jeeá ámiayi. Tura Jesus ni unuiniamurⁱⁿ chicharainak ““senkuenta senkuenta kanaarum an^{ka}nt an^{ka}nt pujustarum,” titiarum” tímiayi.

¹⁵ Túrawarmatai ashí pujusarmiayi.

¹⁶ Nuyá senku tantan tura jimiará namaknasha Jesus achik, yakiiní ímias Yúsan yumⁱⁿsamiayi. Nuyá ajamsarat tusa ni unuiniamurⁱⁿ súsarmiayi.

¹⁷ Ashí yurumáwar ejemararmiayi. Tura ampirman tuse cha^{nk}innium áimkiarmiayi.

Jesus Yusa anaikiamurⁱⁿti ujakma amia nu

(Mateu 16.13-19; Márkus 8.27-29)

¹⁸ Jesus ni unuiniamurⁱⁿijiái áentsnumiá kanaki pujuarmiayi. Jesus Yúsan aujsua umik ni unuiniamurⁱⁿ tiarmiayi “¿Yáiti turutainia Winia?”

¹⁹ Niisha áimkiarmiayi, “Chíkich “Imiakratin Juán^{ka}kaiti” turamainiawai; chikichcha “Iríasaiti” tura chíkichkia “yaunchu Yúsnan etserin nantakniua núiti” turamainiawai” tiarmiayi.

²⁰ Tutai “Tura atumsha ¿yáiti túrutrum?” tiarmiayi.

Takui Pítiur chichaak “Ámeka Yusa Anaikiamurⁱⁿ, Kristu tutai, núitme” tímiayi.

²¹ Tutai Jesus “Penké etserkairap” tímiayi.

Ni jákatniurⁱⁿ Jesus ujakmiania nu

(Mateu 16.20-28; Márkus 8.30-9.1)

²² Nuyá Jesus tímiayi “Wi Aents Ajasuitjiana ju ti waitsatniuitjai. Wíi shuara uuntrⁱⁿ, tura ni Pátrirⁱⁿ úuntrⁱⁿisha tura ni jintinniurⁱⁿisha nakitrurar maantuáwartatui. Túrasha iwiartusarmatai menaintiu tsawant jeamtai nantaktiatjai.”

²³ Nuyá ashí áentsun chicharuk juna tímiayi “Shuar Winia nekas nemartustajtsa wakerakka ni wakeramurⁱⁿkia iniaisati. Tuke tsawant ni krusri yanaki nemartusti.

²⁴ Kame shuar ju nun^{ka}nam aya pé^{nk}er pujustaj tákun^{ka} nu shuar uwemt^{suk} jakattawai. Antsu Winia anentu asa pé^{nk}er pujustinniak enentáimtsuna nú shuarka nekas iwiaakman wáink^{ia}tawai.

²⁵ Iimiata, shuar ashí ju nun^{ka}nam ana nuna s^umakui tura jinium wétin ákuisha ¿itiurak pé^{nk}er pujusat?

²⁶ Wi Aents Ajasuitjiana ju Winiasha tura winia chichampruncha shuar natsantraitkuⁱⁿkia, winia wincharujai, winia Aparu wincharⁱⁿijiái tura nayaimpinmaya pé^{nk}er suntara wincharⁱⁿijiái atak táakun shuar natsantrurⁱⁿmia nuna natsantrattajai Wi.

²⁷ Tura shuar Yusa akuptairⁱⁿ wáintsuk jákachartatna nu juí pujuiniawai. Nuna nekas tájarme” tímiayi.

Jesus nusháa iira ajasmiania nu

(Mateu 17.1-8; Márkus 9.2-8)

²⁸ Nuna tuasua amik nuyá chíkich semanatin Yúsan áujsataj tusa Jesus náinnium wakamiayi. Pítiur, Jakupu, Juanjai nemariarmiayi.

²⁹ Jesus auju pujus nusháa iira ajattsarmiayi. Ni pushirisha ti puju jíitsumir ajasmiayi.

³⁰ Nuĩnkia jimíará áishman Niijiaí chicháa wajarmiayi. Nuka Muisáís Eríasjaí árimiayi.

³¹ Níincha wincha jíitsumir téntakarmiayi. Tura Jesus wáitias Jerusarénum jákatniurín amia nuna áujmatarmiayi.

³² Pítur ni tsaniakmaríjiaí kari ti pujainiaín iwiáa pujuarmiayi. Tuma ásar Jesusan tura jimíará áishmanjaí jíitsumir ajas wajainian wáinkarmiayi.

³³ Tura nu áishman Jesusan ikiuki weenaj Pítur Jesusan chicharuk “Uuntá, iisha ti shiir pujatsjik. Menaintiu áakmaktai, Áminiusha, Muisaisnasha, Eríasnasha áakmaktai” tímiayi. Tura Pítrusha enentáimtsuk nuna tímiayi.

³⁴ Nuna chicháa pujaí yurañkim tarí kaput amuawarmiayi. Tura yurañkim amuam ti ashankarmiayi.

³⁵ Nuĩnkia yurañminmaya ju chichaamun antukarmiayi: “Juka winia aneamu Uchiruiti. Nii anturkatarum.”

³⁶ Chichaamun antasua amikiar Jesus niñki wajan wáinkarmiayi. Nuĩnkia takamtak pujuarmiayi. Tura wáinkarmia nuna penké etserkacharmiayi.

*Uchi iwianchrkun Jesus tsuármiania nu
(Mateu 17.14-21; Márkus 9.14-29)*

³⁷ Kashin tsawantaj, náinniumia táarmatai, ti untsurí shuar Jesus inkiuntai tusar wearmiayi.

³⁸ Nu shuarnumia chikichik áishman Jesusan untsuak tímiayi “Uuntá, waitneasam uchir íirtústá. Uchirsha júchikiiti.

³⁹ Íwianch achik núpeteam niisha nánkamas untsumui. Tura chichichiptu ajas wenunmasha saun kaput apaawai. Íwianch nin tuke yajauch awajas ankant awajsatniun nakitiawai.

⁴⁰ Túmakui ame unuiniamurmin iwianchin júirtukit tusan seamjai. Túrasha tujinkirmai” tímiayi.

⁴¹ Tutai Jesus tímiayi “Yus enentáimtichutirmin, tutupnik wekaichatirmin ¿urutmá tsawanttsuk atumjai pujustaj. Urutmá katsuntratjatsuk? Uchiram juí itiatá” tímiayi.

⁴² Tura uchi winiaí íwianch nunká ajuant chichichiptu áepsamiayi. Tura Jesus iwianchin kakantar chicharkamiayi. Tura uchin péñker awajas ni aparín awantuki susamiayi.

⁴³ Tura ashí pujuarmia nu ti enentáimprar “Yuska imiá úuntchakait” tiarmiayi.

*Jesus ni jákatniurín ataksha ujakmiania nu
(Mateu 17.22-23; Márkus 9.30-32)*

Jesus túramun ti enentáimtu pujuiniaí Jesus ni unuiniamurín tímiayi

⁴⁴ “Wi tájarmena ju péñker antuktaram. Winia Aents Ajasu tútain surutkaratui.”

⁴⁵ Tura Nii timia nuna unuiniamurí nekaacharmiayi. Nekaawarain tusa paantcha awajsamuyayi. Tura warinkit tusa anintrustinnisha arantukarmiayi.

*“¿Yaki imiá nankaamantuit?”
(Mateu 18.1-5; Márkus 9.33-37)*

⁴⁶ Nuyá ni unuiniamurí, yaki imiá nankaamaku ati tusa, nuamtak mai tunai ajararmiayi.

⁴⁷ Tura ni enentáimsamurín Jesus nekaamiayi. Tuma asa uchin achik ni pujamunam itiamiayi.

⁴⁸ Itiá tímiayi “Winia anentuk ju uchin shiir awajeana nuka Winiasha shiir awajtawai. Tura Winia shiir awajtana nuka Winia akuptana nunasha shiir awajeawai. Kame átum nan̄kaamantuchu tárumna nu ti nekas nan̄kaamantuiti’ tímiayi.

(Márkus 9.38-40)

⁴⁹ Nuyá Juan̄ tímiayi “Uuntá, shuar ame náarmin pachis iwianchin jiki akupea nu wáinkiamji. Tura in páchitkiachu asamtai nuka suritkiamji.”

⁵⁰ Tutai Jesus tímiayi “Antsu suritkiarap. Shuar in nakitramachkun̄ka in páchitkiawai.”

Jesus Jakupun Juánnasha chicharkarmiania nu

⁵¹ Jesus, nayaimpiniam waketkitniuri jeatemamtai, enentáimmia ímiatrusan̄ Jerusarénum we-wémiayi.

⁵² Wesa, kanartinian wáinkiarat tusa akatar émtikiarmiayi. Tura niisha Samaria péprunam jeawarmiayi.

⁵³ Tura Samarianmaya aentska, Jerusarénum wéenan nekaawaru ásar itiaatniun nakitrarmiayi.

⁵⁴ Jesusa unuiniamuri Jakupusha Juansha nuna nekaawar, Jesusan tiarmiayi “¿Uuntá, Erías yaunchu túramia núnisrik iisha túrat tusam wakeramek. Nayaimpinmaya ji tara Samarianmaya aentsun amukarti, títiatik?”

⁵⁵ Tutai Jesus nin ísar kakantar chicharuk tímiayi “Atumsha atumi enentái urukukit nuka nekamatsume.

⁵⁶ Wi Aents Ajasu áentsun emesratsan táchaitjai. Antsu uwentikratajtsan táwitjai” tímiayi. Nuyá chíkich péprunam wearmiayi.

Jesus nemarsatin

(Mateu 8.19-22)

⁵⁷ Jintiá weenai, chíkich áishman̄ Jesusan chicharuk “Uuntá, tuí wétatam nuisha nemarsatjame” tímiayi.

⁵⁸ Tutai Jesus tímiayi “Kujanchmasha ni wáar̄in takaktsuk. Chinkisha pasun̄ken takaktsuk. Tura Wi Yusa Uchir̄intiian tepesan ayampratniur atsawai.”

⁵⁹ Chíkich áishman̄kan Jesus “Nemartusta” tímiayi.

Tutai nii chichaak “Antsu, Uuntá, winia apar jakamtai, iwiarsa ikiuakun nemarsatjame. Nu tsan̄kátrúktá” tímiayi.

⁶⁰ Tutai Jesus tímiayi “Jakaa ainia nu ni shuar̄in iwiarsatniunka enentáimtusarti. Tura ámeke weme Yus-shuar átin urukukit nu etserkata” tímiayi.

⁶¹ Nuyá chíkich tímiayi “Uuntá, nemarsataj tusan wakerajme. Túrasha wíi shuaran emka áujsan ikiuweartaj tsan̄kátrúktá” tímiayi.

⁶² Tutai Jesus tímiayi “Shuar arayata ukunmaan̄i apajas iimna nu, Yus akupeana nūi takaschamniaiti.”

10

Ni unuiniamur̄in setenta armia nuna Jesus etserkatarum tusa akupkarmiania nu

¹ Nuyá ukunam chíkich unuiniamur̄in setenta anaikiarmiayi Jesus. Tura jím̄iar jím̄iaran apatak émkitiarum tusa ashí péprunam ashí nun̄kanam ni wétin amia nūi akupkamiayi.

² Akupeak tímiayi “Nekas tájarne, Yus-Chicham étserkum, júuktinia núnisan̄, aents Yus-shuar awajsatin ti awai. Tura ¿yaki júukat, aya ishichik takaini-asha? Tuma asamtai ni takarniur̄i akupkat tusarum Nerentin seatarum.

³Wetarum. Átumka murikiua núninaitrume. Uunt yawa yujamua núninnium tsuumai ámunam akupeajrume.

⁴Yurumkasha, kuitcha, sapatcha júkiirap; shuarjai jintiá áujmamsatai tusarum wajasairap.

⁵Jeá wayakrum emka ju titiarum: “Ju jeanam pujuinia nuna Yus shiir awajsarti.”

⁶Nérentin “Ee, nuna wakerajai” tákuinkia túrunattawai. Tura “Atsá, wakeratsjai” tákuinkia, “nuinkia túrunashti” titiarum.

⁷Jeá wayattarmena nú jeanman pujustarum. Tura ajampramsattarmena nu yuatarum. Warí, takaana nu akinkiashtinkiait. Chíkich jeanam nu werum nu werum ajairap.

⁸Awaintiamawartatna nú peprunam jearmeka ajampramsartatna nu yuatarum.

⁹Jaa ainia nu tsuártarum. Túrarum “Yus ju nunkanam akupin ajastin ishichik ajatemsai” nu peprunmaya shuar titiarum.

¹⁰Íksarmek itiaarmachartatna nú peprunam jearum, jintiá wajasrum ju titiarum,

¹¹“Yusna nakitra asakrumin, atumi pépruriniá nunka ii nawen peema japirar akakekji. Túrasha ju paant nekaatarum: Yus ju nunkanam akupkatin ishichik ajatemsai.”

¹²Yusa nekapsatin tsawantri jeantai nu peprunmaya shuaran ti asutiáttawai. Yaunchu Sutumanmaya shuaran asutiámia nujai nankaamas asutiáttawai. Núnaka paant tájarme tímiayi.

(Mateu 11.20-24)

¹³‘Wáinkiatá, Kurasín péprunmayatiram. Wáinkiatá Petsaitia péprunmayatirmesha. Atumí pépruriin aents tujintiamun ti túraitjai. Warí, yaunchu Tiru péprunmasha, Setun péprunmasha nu tujintiamu túramuitkuinkia yaunchu ni enentáin yapajíawaraayi. Túrawar kúntuts pujutai pushin entsarar yunkunim ajakiaaraayi.

¹⁴Tura atumsha aents tujintiamu túramu wáiniatrum yapajíachu asakrumin Tirunmaya tura Setunnumiá aentsjai nankaamas asutniáttarme.

¹⁵Tura atumsha Kapernáumnumiatirmesha, “ti nankaamantu ajarar nayaimpiniam jeattaji” tu enentáimtsurmek. Maaj, antsu jaka matsamtainium jeattarme, auka” tímiayi.

¹⁶Tura Jesus ni unuiniamurin junasha tímiayi: “Atumin anturtamainiakka Winiasha anturtuiniawai; atumin nakitramainiakka Winiasha nakitruiniawai; tura nú arant, Winia nakitrakka Winia akuptukua nunasha nakitiawai.” Tú áujas Jesus nin akupkarmiyai.

Setenta unuiniamu waketki táarmiania nu

¹⁷Ukunam nu setenta unuiniamu warasar waketki táarmiyai. Tura chichainiak “Uuntá, ame náarmiin íwianch jiki akupeam umirtamkamji” tiarmiyai.

¹⁸Tutai Jesus tímiayi “Ee, Wisha nayaimpinmaya peem peetna núnisan, uunt iwianch Satanásan akaiki iniaan wáinkiamjai.

¹⁹Atumniaka winia kakarmarun susamjarme, napi najarmasha titin najarmasha yajauch awajtamsairum tusan; tura ii nemasri kakarmari nu petkatniuncha susamjarme.

²⁰Túrasha íwianch umirtamkui nu enentáimsam warasairap. Antsu atumí naari nayaimpiniam arma aa asantai warastarum” tímiayi Jesus.

Jesus warasmiayi
(Mateu 11.25-27; 13.16-17)

21 Nuiñkia ni enentáin Yusa Wakaní waramtiksam Jesus juna tímiayi: “Aparú, ashí nayaimpijiaí nunka Úntrinme; tuma asam ju túrunamu ti unuimiaru enentáimtumainia nuyá úukuitme; antsu uchichia núnis nankaamantuchu enentáimtumainia nú shuar paant awajtusuitme. Ee, Aparú, núnik wakerichmakum. Tuma asamtai shiir enentáimtajme, Aparú” tímiayi.

22 “Winia Apar ashí surusuiti. Wisha ni Uchiri asamtai Winia nékarui. Tura chíkich Winia nekas nekarainiatsui. Yus Apancha Wiki nékajai. Tura Wi wakeraj nú shuaran winia Aparun paant awajtajai. Nú shuarsha winia Aparun nékainiawai.” Tu tímiayi Jesus.

23-24 Nuyá ni unuiniamurín iis tímiayi “Wi tájarne, untsurí Yúsnan etserniusha tura uunt akupniusha átum yamáí wáintrum nuna wáinkiatniun wakeruiniayatan wáinkiacharmiaí. Tura átum yamáí ántarme nuna antuktinian wakeruiniayatan antukcharmiaí. Tura Yus achirmaku asakrumin, wáintrumna nu ti péñkeraiti” tímiayi.

Samarianmaya áishman katsumkamun yainmia nuna Jesus unuiniamiania nu

25 Nuyá akupkamun jintinkiertin Jesus warintiak chichakat tusa wajatki werimiayi. Werí iniimiayi “Uuntá, wi tuke iwiaaku átaj takun ¿warinia túratniuitiaj?” tímiayi.

26 Tutai Jesus ayak “¿Yús-Papinium Muisáis áarmanum waritia áarmait. Waritia enentáimiam?” tímiayi.

27 Akupkamun jintinkiertin ayak tímiayi “Juna tawai: Ti enentáimsam, tuke enentáimjaj Uunt Yus aneeta. Ame kakarmaram, iwiaakmarmesha Yus íktusta. Tura ame ayashim aneamna núnismek ame írutramurmesha aneeta. Núchakait” tímiayi.

28 Tutai Jesus tímiayi “Péñker áimsame. Nu túrakmeka tuke iwiaaku átatme.”

29 Tutai akupkamun jintinkiertin ni anintramun kíishtumaktajtsa wakerak “Winia írutramursha ¿ya ainia?” tímiayi.

30 Takui Jesus tímiayi “Jerusarénumia jintia Jirikiú péprunam jeana nú jintianam áishman wean, kasa áishman tariar ni warirín, pushiríncha kasarkarmiaí. Tura katsumkar mayáí ashirak ajuantar ikiukiarmiaí.

31 Tura Israer-shuar Patri ukunman winis nu áishmankan wáiniak aya íkian iis ikiukmiaí.

32 Nuyá ukunam Patri yáintrisha nu jintianam wesa, nu áishmankan wáiniak, áyatik iis ikiuak wémiayi.

33 Tura nuyá Samaria nunkanmaya áishmansha nu jintianman wesa, nu áishmankan wáiniak ní shuarinchunak wáitnéntramiaí.

34 Nuyá nu áishmankan weantuk ni numpamnamurín asuitijiaí tura wíniuaj tsuar jaanchjiaí penuarmiaí. Tura ni kawairiín ekenak jukimiaí. Tura írar kanutainiam jukí ejé nu áishmankan péñker wáinkiamiaí.

35 Tura kashin tsawarmatai Samarianmaya áishman weak jimiará kuítian jusa jeá nérenniurín susamiaí. Susa tímiayi “Ju áishman péñker wáitrukta. Tura wi amaajna ju táasmataisha wi wáketkun akiktajme” tímiayi.

36 Ayu, ámijiaísha, nu menaintiu áiniana nu, ¿tuá imiá nekas katsumkamun waitnéntramia?” tímiayi Jesus.

37 Takui akupkamun jintinkiertin chichaak “Entá, katsumkamun wáitnéntramia núa” tímiayi.

Tutai Jesus tímiayi “Amesha weme núnismek túrata.”

Marta ni kaijiaí Marí jeen Jesus pujusmiania nu

³⁸ Nuyá Jesus jintiá wesa chíkich péprunam jeamiayi. Nu péprunmayá nuwá naarí Marta ni jeen itiaamiayi.

³⁹ Marta kaj ámiayi ni naarí Marí. Marisha unuiniamun anturkataj tusa Jesusa nawen pujursamiayi.

⁴⁰ Tura Mártaka ni takatrín ti enentáimtak Jesusan weantuk tímiayi “Uuntá Jesusá, ¿winia kajr takatan winiak íktursainia nuka enentáimtsmek? Winia yáintá turuttia” tímiayi.

⁴¹ Tutai Jesus tímiayi “Maaj Martí, untsurí túratin ana nu ti enentáimsam itit awajtamui.

⁴² Tura aya chikichik nekas túratniuiti. Marikia nekas péñker ana nuna achikiai. Nusha penké jurunkishtatui” tímiayi.

11

*Jesus Yus áujsatniun unuiniamiania nu
(Mateu 6.9-15; 7.7-11)*

¹ Chíkich tsawantaj Jesus Yúsan áujsataj tusa atsamunam pujumiayi. Áujtua amikmatai ni unuiniamurí chikichik Nin tímiayi “Uuntá, imiakratin Juan ni unuiniamurín unuiniamia núnismek Yus áujsatin unuitiurta.”

² Tutai Jesus tímiayi “Yus áujkuram ju titiarum: Aparu Yus, nayaimpiniam pujamna nu, ii Aparínme. Ame náarmincha shuar ántar pachischarti. Ashí áentsnum ame akupkatin tsawantrum wari jeati. Ame wakeramuram nayaimpiniam umikma ana núnisan ju nunkanmasha uminkiatí.

³ Aparú, ii yurumkarí ashí tsawant amasta.

⁴ Tura winia nemasrun tsankurajna núnismek, Aparú, winia tunaaru tumashrisha tsankurturta. Tunáa wakeruktin tsankatrukaip. Antsu ashí tunaanumiá uwentikrurta.”

⁵⁻⁶ Nuyá Jesus juna tímiayi. “Wats, ju titiái. Kashi ajapén amikrum werishtameash. Tura “Winia amikiur yajaya winia jearuí yama tayi. Tura ajamsatniun penké takaktsujai. Tuma asamtai amikru, menaintiu apatuk ajamprustá” tíchatameash.

⁷ Tura nii init pujusan chichaak “Warí, wáitisha epenmiaiti, tura winia uchirsha wijiaí ashí tepeenawai. Itiur nantakniak amastaj. Itit awajtipia” turamchanpiash.

⁸ Wats, paant tájarme, niisha amikrum asa, nantaki ikiatmastinian nakiti-ayat, itit awajtin tusa nantaki ashí wakeramna nuna suramsattawai.

⁹ Tuma asamtai tájarme: Yus seatarum; túrakrumin suramsattarme. Eakrumka wáinkiatarme. “Winiajai” tákurmin awaintiamattarme.

¹⁰ Seana núnaka suíniatsuk. Eana nuka wáintsuk. “Winiajai” tuinia núnaka awainiatsuk.’

¹¹ ‘Wats, átum uchirtintiram, ame uchiram apatkun seatmakui ¿kayaash súsaintiam? Namakan seatmakui ¿napíash súsaintiam?

¹² Nujintian seatmakuisha ¿titiñkiash súsaintiam?

¹³ Warí, átum imiá yajauchitirmesha atumí uchirí péñker ana nu tuke súchakaitrum. Atumí Aparí nayaimpiniam pujana nu, seakrumniñkia nú nankaamas ni Wakanin suramsattawai.” Tu unuiniamiayi.

*Jesusan “iwianchi kakarmarijiaí túrawai” tiarmiayi
(Mateu 12.22-30; Márkus 3.19-27)*

14 Shuar iwianchruku asa chichachu ámiayi. Nuna enentáyan nu iwianchin Jesus jiki akupkamiayi. Íwianch jiinkimtai chichachu chichasmiayi. Túramtai shuar nu pujuarmia nu ti enentáimprarmiayi.

15 Tura chíchich tiarmiayi “Juka iwianchi kapitántri Satanásan, ni chíchich naari Pirsepún umirniuti. Tuma asa nuna kakarmarijiai iwianchin jiki akupeawai.”

16 Tura chíchichkia, nekas Yúsnumia taawashit tusar “Nayaimpinmaya kakaram ana nu iniakmasam aents tujintiamu túrata” Jesusan tiarmiayi.

17 Tura Jesus tu enentáimiainian neka asa tímiayi “Núu nunkanmayan shuar nuamtak kajernaiyakuñkia nú nunka wárik meserchattawak; nuamtak shuarsha ni shuarijiai kajernaiyaksha amunaikchartatuak.

18 Wíniaka “Pirsepú iwianchi kakarmarijiai iwianchin jiki akupeawai” túruttsurmek. Tuma asamtai tájarme, uunt iwianch Satanás naartin, ni sun-tarijiai kajernaiyaksha ¿itiur tuke kakaram átink’?

19 Tura Wi Pirsepú kakarmarijiai iwianchin jiki akupeakuñkia, atumi shuarisha ¿yana kakarmarijiaín iwianchin jiki akupena? Niisha “iwianchi kakarmarijiai túrichuitji” tuiniaisha ¿itiura Winiasha, “iwianchi kakarmarijiai túraiti” turutminiaitrum?

20 Wikia Yusa kakarmarijiai iwianchin jikin akupeajai. Nu nekaarum Yus atumi enentáin akupin ajasuana nu nékarme.’

21 ‘Kakaram áishman kúishtumaktajtsa iwiarnar wajas jeen wáinkui, ni wariri inít ana nusha tímiatrusan ániawai.

22 Antsu nijiai nankaamas kakaram ana nu winiakka nupetkashtatuak. Tura kúishtumaktinian iwiar takakman jurawai. Tura kasamkámun ni amikrin súawai. Kakaram áishman iwianchin nakumeawai. Tura nujai nankaamas kakaram áishman Winia nakumprawai.

23 Iista. Winia nemartatsna nu winia nemasruiti. Núnisan Winia yáintsuna nuka aya iturchat nájateawai.

Iwianch jiki akupkamuitiat wáketna nuna ujakmiania nu (Mateu 12.43-45)

24 Nuyá Jesus juna tímiayi: ‘Shuara enentáiya íwianch jiinki ayamprataj tusa yumi penké yútatsna nu wéawai. Tura ayampratniun wáincha asa ataksha waketkitniun enentáimui. “Wi jíinkimij nuñ waketkitjai” tawai.

25 Tura waketki péñker iwiamun tura ankant aan wáiniui.

26 Nuna wáiniak, ni ain siati iwianchin nijiai nankaamas yajaunchin itia enkemáwartatui. Túrunamtai nu shuar nuiki nuna nankaamas yajauch ajastatui.” Tu tímiayi Jesus.

Nekas warastin

27 Shuar iruniarmia nu Jesus nuna chichaa pujai, nuwa untsukum “Ame nukun Yus ti yáinkiai. Ni ampujén ame pujuschamkam. Ámin amuntstamachmakam” tímiayi.

28 Tutai Jesus tímiayi “Antsu ni chichamen antukar umirainia nuna, nukurjai nankaamas Yus ti yáinkiaru ániawai, tajai” tímiayi.

(Mateu 12.38-42; Márkus 8.12)

29 Shuar untsurí Nijn káunkarmatai Jesus tímiayi “Yamaiya shuarka yajauch ániawai. Yajauch ásar, chichartuiniak “Nekas Yúsnumiaitkiumka aents tujintiamua nu túram Yusa kakarmari iniakmasta” turutainiawai. Túrasha áyatik yaunchu Junas túrunamujai iniakmasmia nujain nekaatin ániawai.

³⁰ Kame Junas túrunamujai Níniwi péprunmaya shuaran yaunchu Yus ni kakarmarin iniakmasmia núnisan yamaisha Aents Ajasu tutainjiana nu Wi túrunamujai Yuska ni kakarmarin iniakturmastatrumé.

³¹ Yaunchu Sarumún uunt akupin pujai Sepa núñkanmaya nuwa akupin Sarumunka chichamen nekaataj tusa ti jeashtanmaya támiayi. Tura yamaikia Sarumunjai nankaamas pujai átumka anturtatsrume. Tuma asamtai Wi tájarne, Yus ashí shuaran nekapsattana nu tsawant jeamtai nu nuwa, akupniun péñker anturka asamtai, Yus ímianum péñker átatui. Antsu atumsha Winia anturtukcha asakrumin Yus ímianum yajauch átatrumé.

³² Tura Yúsnan etserin Junas Níniwi péprunmaya shuarum Yus Chichaman etserkamtai nu shuar ni tunaarin enentáimtusar enentáin yapajjáwarmiayi. Tura jui yamá Junasjai nankaamas etserin pujajai. ¡Tuma asamtai nekapsatin tsawant jeamtai Níniwinmaya shuar yamaiya shuar árumna nuna sumamtikramattarme!

*Ayashi tsáapnintrí
(Mateu 5.15; 6.22-23)*

³³ ¿Shirikip ekeemakar úuktinkiait? Pitiaknumsha enkeashtiniaiti. Antsu shuar jeá wayana nu paant ímsat tusar yakí ekensatniuiti.

³⁴ Ame jímijiai wáinkiam nujai wekasatin nekaattame. Tuma asamtai ame jímijiai péñker ana nu wáinkiumka péñker wekasattame; antsu ame jímijiai yajauch ana nu wáinkiumka, kiritniunam wekasatniua núnisan yajauchiniam wekasattame.

³⁵ Anearta. Enentáimin tsáapin ana nu kiritin ajaschati tusam anearam wekasata.

³⁶ Ame ayashmjin kirit ajatsuk aya tsáapniniatkiuinikia, shirikip paant awajea núnisan ashí paant wáinkiatame” tímiayi.

*Pariséuncha, Israer-shuara jintinniurisha “yajauchiitrumé” tímiayi Jesus
(Mateu 23.1-36; Márkus 12.38-40; Rúkas 20.45-47)*

³⁷ Jesus chichasua amikmatai Pariséu shuar, winia jearui yurumáitia tusa untsukmiayi. Tutai Jesus wayá misanam pujusmiayi.

³⁸ Tura Israer-shuar ikijmiartin ana nuna túrutsuk aya pujakui Pariséusha nuna wáiniak “maa ¿urukamtia tura?” tu enentáimsamiayi.

³⁹ Tura Uunt Jesus tímiayi “Pariséutirmeka atumí yurumtairi aya pátatek nijiaktin ti wakeriniaitrumé. Atumsha nu yurumtaijiai méteketrumé. Pátatek péñker túrarme. Tura atumí enentáinkia kasamkatniusha tura yajauchia nusha piakuiti.

⁴⁰ ¡Enentáimcha! Warí, ashí pátatek wáiniaji nuna Yus najanachmakia; tura init paantcha ana nunasha Yúsak najanachmakia.

⁴¹⁻⁴² Aneartarum, Pariséutirmesha. Aya nuka méntasha, anissha tura aya apatkusha Yus súsatin ti enentáimprume. Nukasha tsuriasrum apatkusha tias ana nuyá chikichik achikrum, Yúsnaiti tátsurmek. Tura antsu nu túratin iniaitsuk péñker wekasatniusha, Yus anenmarmena nusha péñker enentáimsatniuitrumé. Wats init, enentáimin ana nútiksarmek jusam susarta. Nuinkia ashí chamir átatui.’

⁴³ ‘Tura aneartarum Pariséutirmesha. Yus áujtai jeanam penkeri puju-tainium pujustin wakerarme. Tura jintiá aents ímiainiamunam ti shiir áujtusarat tusarum wakerarme.’

⁴⁴ ‘Jintinniutirmesha, Pariséutirmesha máí-metek aneartarum. ¡Antar shiir chichamtinia! Iwiarsamu paantcha núniniaitrumé. Shuar nu nankaamaksha nájamiat nékatsui. Núnisan shuar atumi chichame antukar yajauchia nuna nekartamtsurme.”

⁴⁵ Nuikia Israer-shuara jintinniurī chikichik Jesusan chicharuk tímiayi “Uuntá, nu tákum incha yajauch chichareame.”

⁴⁶ Tutai Jesus tímiayi “Atumsha jintinniutiram aneartarum. Atumj akupka-murijjaj káarak ti kijin entsakchamnia súarme. Tura átumka yáintaj tusarum atumí uwejejaisha penké ántiatsrume.’

⁴⁷ ‘Aneartarum tájarme. Yaunchu atumí uuntri Yúsnan étserniun máawarmia nuna iwiarsamurj átum jeamniutrume nu etserin ti péñker ásarmatai kajinmatkishtin.

⁴⁸ Nu túrakrum atumí uuntri túrawarmia nu, “yajauchichuiti” tarume. Warí, niisha máawarmiayi, tura atumsha máawarai táyatrum nijjaj méteketrume. Warí, Yúsnan etserniu iwiarsamurj in jeamkuram atumek sumamarme.’

⁴⁹ ‘Atumí túramurj nekáa Yus juna yaunchu tímiayi: “Winia etserturniun tura winia akatramurnasha njin akuptukartatjai. Túramtai chikichnaka máawartatui, tura chikichnaka pataatukartatui.”

⁵⁰ Tuma asantai ashí ni etserniurj in maamu ainia nuna, yamaiya áentstirmin Yus sumantikramattarme. Nunka najanamunmaya jukí

⁵¹ yamá ímiyajaj maamu ainia nuna, kame Apir maamunmaya jukí yamá Sakarías maamua tímiyajaj anintrustatui. Namañ maar Yus sutai ámanum tura Yus-jea ámanum ajapén atenkamunam máawarmia nú Sakaríasan tajai. Nu tuma asantai tájarme, ni etserniurj maantamnawarmia nuna yamá matsatrumna nútirmin aninmasartatui.’

⁵² ‘Jintinniutiram aneartarum. Waiti asakatniua núnisrumek nekas nekaatin surimiarme. Atumkesha nékatsrume. Tura nekaataj tana nusha suritiarme” tímiayi.

⁵³⁻⁵⁴ Jesus nuna takui Pariséusha, jintinniusha ti kajerfarmiayi. Tura nii tana nujaj “yajauch túrame” titiai tusar wakeruiniak untsurj anintriarmiayi.

12

¹ Nu tumaj shuar ti untsurj káunkarmiayi. Ti kaunka ásar nawen mainajatnai ajarmiayi. Tura Jesus ni unuiniamurj in tútan juarkimiayi. “Pariséu ántar chichamtin áiniawai. Nuka wakaprutaiya núnisaiti. Wakaprutaikia nijiamanch yumirniun yama enkeam páantchaiti. Tura ukunam nekaamniaiti.

² Núnisan ashí paantcha ana nu iwiainiakma átatui. Uukma ana nusha nekaamu átatui.

³ Nu tuma asantai, kiritniunam tímiarmena nusha tsawái tsáapin ajasmanum antunkattawai. Tura jea inít pujusrum ishishmasrum tímiarmena nusha áa ti paant etsernaktatui.’

Yusak ashamkatniuiti (Mateu 10.28-31)

⁴ ‘Amikrutiram, aya ayashmin main ainia nu ashamkairap, tájarme. Ayashmin maa nú arantka máashtatui.

⁵ Tura ya nekas ashamkatniuitrum, nuna paant jintintiattajrume. Ame ayashmj maa, nuyá ámin jinium akuptamkatniun tujintiatsna nu ashamkatarum. Ee, Yus ashamkatarum, tájarme.’

⁶ ‘Jimiará chinjki ishitiúpchich ishichik kuitjaj surukchatniukait. Túrasha Yussha nu chinjkin penké kajinmatkishtatui.

⁷ Wats, ashamkairap. Untsurj chinjkiyaj nankaamas Yuska atumin enentáimturmarime. Warí, ame intiashmin mash Yus nekapmaruiti.’

(Mateu 10.32-33; 12.32; 10.19-20)

⁸ ‘Ashí shuar ashí ímiainiamunam Winia Aents Ajasu tutain, Winia natsantruiniatsna núnaka, Wisha Yusa suntarj ímiainiamunam natsantrashtatjai;

⁹ antsu shuar íimiainiamunam Winia natsantrana núnaka Wisha Yusa sun-tari íimiainiamunam natsantrattajai.'

¹⁰ 'Winia, Aents Ajasu tutain, shuar yajauch chichartakuinkia nusha tsankuramniaiti, tura Yusa Wakanincha yajauch chicharkuinkia nuka penké tsankurachminiaiti.'

¹¹ 'Wats, Israer-shuar iruntai jeanmasha, tura Israer-shuar kapi-tiánniumsha, uuntnumsha juramainiakui, aninmainiakuisa warintiajak tusam ti enentáimsáip.

¹² Ame áimkiatin jeamtai, Yusa Wakaní ame títiatmena nuna jintinramat-tawai," tu timiayi.

Kuítiak enentáimtuschatniuitji

¹³ Chíkich áishman Jesusan tímiayi "Uuntá, ii aparí ikiurtamkimiaj nuna yatsur winiasha nakak surustí, titia" tímiayi.

¹⁴ Tutai Jesus tímiayi "Áishmanka, atumin nu túratin anaikiamukaitiaj."

¹⁵ Nuyá tímiayi "Pénker enentáimsatarum. Nii takakna nújain shuar iwiaaku, áchatniuiti. Tuma asamtai kuítrintin ajastin aya nuke enentáimsaip."

¹⁶ Nuyá juna métek-taku chichaman unuiniak tímiayi:

"Kuítrintin áishman ni ajariyan arakan ti nukap juukmai.

¹⁷ Tura "¿Ti nukap asamtai tuiñ ikiustaj. Itiurkatjak?" tu enentáimsamiai.

¹⁸ Wats, wi nékajai. Winia ikiutái-jearun ashiran nú nankaamas úuntan najanatjai. Tura nuñ ashí ikiustajai.

¹⁹ Nuñkia untsurí uwitin shiir pujustinian ikiusman takustatjai. Tuma asamtai, ayampran, yurumán, umaran shiir pujustatjai" timiai.'

²⁰ 'Tura Yus nin chicharuk timiai "Netse. Yamái kashi jakattame. Nuñkia imiá nukap ikiusumna nusha ¿yana átata?" timiai" tímiayi.

²¹ Nuyá Jesus tímiayi "Shuar niñki kuítrin ikiauntumna nu, núnisaiti. Túrasha Yusjai íismaka kuítrinchaiti."

*Yus ni uchirín péñker wáinkiaiti
(Mateu 6.25-34)*

²² Nuyá ni unuiniamurin Jesus juna tímiayi: "Warí yuarik pujustaj tura wariñ entsartaj tesarum nuke ti enentáimsairap.

²³ Yus iwiaaku átinian amasu asa yurumkancha amastatui. Tura ju ayashniasha najana asa entsataincha amastatui.

²⁴ Chinikisha enentáimsatarum. Niisha arakmainiatsui. Juuk yurumkan ikiuiniatsui. Tuma aiñ Yuska ni yurumátniurñ tuke súawai. Atumsha chiniksha nú nankaamaschakaitrum.

²⁵ Tura ya shuarak, ti enentáimtana nuñai nú naya ajasminiait.

²⁶ Kame yúpichuch ana nusha túrachminiatiatrumsha, ¿urukamtai chíkich ainia nusha ti enentáimtarum?"

²⁷ 'Íistá, kukujsha takaachitiat tura nájanchitiat ti shírmach áiniawai. Yaunchu akupin Sarumún ti shiir iwiarmamniuitiat kukujia tímianchayuyai.

²⁸ Iis, nupa yamá tsakaawai tura kashin aents tsupikiar jinium apeánáwai. Tuma aiñ Yus ti shiir awajeatsuk. Nuna tura asa atumniasha nú péñker wáitmakchattawak. ¿Urukamtai Yus nekas enentáimtatsrum?

²⁹⁻³⁰ Ju nunkanam ana nu ti pachirap. Chíkich shuar, Yúsan nékainiatsna nu, wariñ yuataj, wariñ umartaj nuna ti pachiniawai. Tura atumsha tu enentáimsairap. Urukatjak, tiirap. Ame Apa nayaimpiniam pujana nu, ashí atsumarmena nuna nékawai.

³¹ Antsu emka Yusna nu enentáimtustarum. Túrakrumniñkia atsumamna nuna Yus suramsattawai.'

*Kuítian pachis Jesus unuiniamiania nu
(Mateu 6.19-21)*

³² ‘Winia murikrutiram ashamkairap. Untsuríchuitrume. Túrasha atumí Aparí ni akuptairiin pachitmaktasa ti wakerutmarme.

³³⁻³⁴ Kuítrum tui aa, nuí tuke enentáimtittiarne. Tume asamtai takakrumna nu surukrum atsumainia nu susatarum. Nuka enketai arut ajatsna nuí enkeatniua núniskete. Túrakrum nayaimpinmaya kuit amuatsna nu íkiauwearme. Nuísha kasa nu kuitian kasamkataj tusa wayachminiaiti, tura kayaasha nu kuitian yúatniun tujintiawai.’

Aneerar wekasatniuitji

³⁵⁻³⁶ ‘Ju enentáimsatarum. Ni uuntri nuatnaikiatin námpernumia taa, “uraitia” takui, takarniuri jinia ekeemakar wárik urattiai tusar nakáa pujuiniawai. Atumsha núnisrumek Wi atumí Uuntri támatai, shiir itiaatai tusarum anearum wekasatarum.

³⁷ Ni uuntri taak iwiáa pujuinian wáinkiarai nuka shiir pujuiniawai. Nu úuntak iwiar, “misanam pujustarum” ni takarniurin títiatui tura yurumkan sústartatui.

³⁸ Kashi ajapén taaksha tura tsawaana aj taaksha ni takarniurin iwiáa pujuinian wáinkiuinka, nu takarin shiir pujuiniawai.

³⁹ Tura jusha nekaatarum. Jeenniuu nu, kasa tátinian nékaitkiunka, iwiáa pujusaayi. Kasa wayá kasamkatniun suritkiaayi.

⁴⁰ Atumsha núnisrumek, anearum pujustarum. Wi Aents Ajasu tutai aya aneachmanum tátatjai” tímiayi.

*Pénker takarin yajauch takarniujai
(Mateu 24.45-51)*

⁴¹ Nuyá Pítiur aniasmiayi “¿Aya ínkik unuiniartaj tusam nu métek-taku chicham támek. Kame ashí nekaawarat tusamek tame?” tímiayi.

⁴² Tutai Jesus tímiayi “Atumsha pénker takatan wáinniuu núnisketrume. Takatan wáinin ni uuntri takatrin takainia nuna, yurumátin jeamtai, ayurkamna núiti ni úuntrin shiir umirna nu, tura pénker enentáimtana nu.

⁴³ Ni uuntri taa, takatrin tímatrusan túran wáinkiuinka nu wáinniusa shiir enentáimsamniaiti.

⁴⁴ Umirin asamtai, ni uuntri ashí ni waririn wáitrukat tusa apujstatawai. Nuna paant tájarne.

⁴⁵ Tura nu takatan wáinniusa “úuntur wau táchattawai” tu enentáimias, ni uuntri takarniurin yajauch awajeakuinka tura niniki ti yurumá, ti umar nampeakuinka,

⁴⁶ nuinka ni uuntri ni nákachmanum aya aneachma taa ti asutiáttawai. Umichu pujuinia nuí akupkattawai.’

⁴⁷ ‘Takaran ni uuntri wakera nuna nékayat, iwiartsuk umitsuk pujakka ti awatramu átatui.

⁴⁸ Túrasha takarin nékachu asa, asutniámnia túrakka, ishichik awatnartatui. Núkap susamu ana núnaka núkap seawartatui. Núkap ataksamu ana núnaka núnisan nankaamas seawartatui.’

*Jesusjai shuar akannartatui
(Mateu 10.34-36)*

⁴⁹ ‘Jijjai nekapsatniua nútiksanak nunkanam jinia ikiapartaj tusan tamajai. Tura túrunat tusan ti wakerajai.

⁵⁰ Imiantinia núnisan itiurchat ukatruktatui. Nusha wárik amuukat tusan ti wakerajai.

⁵¹ “Ashí shuar shiir pujusarat tusa táwiti” tu enentáimturumek. Núchaiti. Antsu shuar tesanairat tusan táwitjai.

⁵² Yamái jukimiutak chikichík shuarnum senku ainia nu akannakartatui; menaintiu shuar ni shuarin jímiarān nakitrartatui. Jímiarsha ni shuarin menaintiun nakitrartatui.

⁵³ Apasha ni uchirin nakitrattawai. Núnisan uchisha ni aparin nakitrattawai. Nukusha ni nawantrin nakitrattawai; nawantrisha nukurin nakitrattawai. Tsatsarisha ni najatin nakitrattawai; najatisha tsatsarin nakitrattawai.”

(Mateu 16.1-4; Márkus 8.11-13)

⁵⁴ Jesus áentsun chicharuk junasha tímiayi “Atumsha nantu akaatainmaani kiar matai “yutuktatui” tátsurmek. Nusha nekas tárume.

⁵⁵ Tura anaarania nase násenkamtai “séejik átatui” tárume. Tura nekas tárume.

⁵⁶ Yuranminmasha nunkanmasha túruna nu nékarme. Túmaitiatrumsha ju tsawantai túrunattana nusha çitiura nékatsrum? ¡Maaj, ántraitrumel!”

Nemasrumjaisha nawamnaikiata

(Mateu 5.25-26)

⁵⁷ “Túrasha penker ana nusha çurukamtai atumek enentáimsarum wáintsuram?

⁵⁸ Irutramuram úuntnum júramkuinkia jintia wésamek “nuamtak iwiarartai” titiá. Túrachkumniinkia akupniunam juramkittieme. Tura niisha suntarnum akuptamkattame. Tura niisha sepunam enketmattawai.

⁵⁹ Tura nekas tajai, nuj enkemamka ashí rearchisha akikmachkumka jíinkishtatme” tímiayi.

13

Ii enentái yapajiátniuitji

¹ Nu tsawantin chícham ujaktai tusar Jesusan tariarmiayi. Kariréa nunkanam Israer-shuar ni waakarin máawar Yus susatai tusar pujuiniaj, Piratu nin maa, nuna numpen waaka numpejai pachimpramun ujakarmiayi.

² Tura Jesus tímiayi “¿Warí enentáimsarum? Kariréanmaya áishman tárumna nu, chíkich Kariréanmaya áishmanjai nankaamas yajauch ásar túrunawarai çtu enentáimprumek?

³ Atsá; atumí enentái yapajiáchkurmeka núnisrumek atumsha jakattarme. Nuna paant tájarme, tímiayi.

⁴ Tura tiasiúchu áishman yakí jea Seruí kupiniak iniaak nekenkarmiania nu, çwarí enentáimtarum? Chíkich Jerusarénnumia shuarjai nankaamas tunáa ásar túrunawarai çtu enentáimprumek?

⁵ Atsá, tájarme. Atumí enentái yapajiáchkurmeka núnisrumek atumsha jakattarme.”

Iikiu numi nereatsna nu

⁶ Junasha Jesus métek-taku chichaman tímiauyi. Júiti:

Shuar ni ajariin iikiu numin araamun takakuyi. Nerekchiash tusa iyumai. Túrasha nere atsumai.

⁷ Nuinkia ni ajarin wáinniun timiai “Antukta, menaintiú uwitin juna nere átai tusan waketrú pujajai; túrasha penké wáinkichjai. Ajakta. ¿Urukamtai ánttrash wajastata?”

⁸ Tutai ajá wáinin timiai “Atsá, uuntá; ju uwitin wajastí. Wajamurin takarsatjai tura penker nunkan matsatkatjai.

⁹ Nujai nerechampiash. Tura tuke nereachkuinkia nuinkia ajakta” timiai”, tímiayi.

Nuwan punuá kaarun Jesus tsuármiania nu

¹⁰ Ayampratin tsawantaj Israer-shuar iruntai jeanam Jesus unuiniak pujumiayi.

¹¹ Nuisha nuwa pujumiayi. Nu nuwasha tiasiúchu uwitin tuke jaa pujumiayi. Íwianch nin yajauch awajas apuna tuke ikiaramiayi. Túramu asa pañkái nakuenkataj tukamá penké tujinmiayi.

¹² Jesus nuna wáiniak, chicharuk “Nawantrú, ame jaamurmiya ankant ajasume” tímiayi.

¹³ Nuna tinia ni uwejejai antiñmiayi. Tura nú chichamaik nuwasha pañkái nakuenkamiayi. Tura Yusa náarin uunt awajsamiayi.

¹⁴ Tura Jesus ayampratin tsawantaj tsuaru asamtai, iruntai jea uuntri kajek iruntrarmia nuna tímiayi “Sais tsawantin takaschatniukai; ayampratin tsawantaj tsuámartaj tusarum táchatniuitrume. Sais tsawant ana nui tátiniaitrume.”

¹⁵ Tura Jesus tímiayi, “¡Ántar chichamtinia! ¿atumi waakarisha atumi umpururisha yumi aartai tusarum ayampratin tsawantin atíarum júatsrumek?”

¹⁶ Tura ju nuwasha, atumi shuari Apraám shuarnumiá akiiniaiti. Nii tiasiúchu uwí Satanás yajauch awajsamujai jinkiamuyayi. Nincha ayampratin tsawant aiñ yajauch awajsamunmayá atíachminkiait” tímiayi.

¹⁷ Jesus nuna takui ni nemasrisha natsaararmiayi. Tura penké shuar ni penker túramurin wáinkiar warasarmiayi.

Mustasa jinkíai

(Mateu 13.31-32; Márkus 4.30-32)

¹⁸ Nuyá Jesus tímiayi “¿Yusa akupeamuri warijjain métek-takuit?”

¹⁹ Mustasa jinkíaijai métek-takuiti. Mustasa jinkiaicha shuar ni ajariin araamiayi. Tsapái, tsakaak, uunt numi ajasmiayi. Ti uunt asamtai chiniki ni kanawen pasunmarmiayi.”

(Mateu 13.33)

²⁰ Tura junasha tímiayi: “¿Yusa akupeamuri warijjain métek-takuit?”

²¹ Tanta wakaprutaia métek-takuiti. Arinia núkap ana nui nuwa wakaprutain ishichik enkeámiayi. Túram ashí wakapruamiayi.” Tu tímiayi.

Yupikiach waiti

(Mateu 7.13-14, 21-23)

²² Jesus Jerusarénum jeattsá weak untsurí peprunam wayá unuiniarkutak wémiayi.

²³ Weai chíkich shuar aniasmiayi “Uuntá, ¿uwemainia nu ishichikiait?”

²⁴ Tutai Jesus tímiayi “Yupikiach wáitiniam wayataj tusam ti wakeritiarum. Kame untsurí wayataj tusar wakeriartatui, túrasha tujinkiertatui, tájarme.

²⁵ Jeá nérenniuri wáitin epenmiatai, atumsha aa wajarum nu, wáitiniam wajasrum untsúakrum “Uuntá, uratritia” títiatrume. Túrasha “Nékatsjarme. ¿Tuyantskaitrum?” turamtatrume.

²⁶ Nuyá átum títiatrume “Túrasha, uuntá, iisha ámijjai yurumámji, ámijjai umarmaji. Tura ii pépruríncha unuiniamame.”

²⁷ Túrasha nii títiatui “Tuyantskaitrum, nékatsjarme, tátsujrumek. Yajauch túrintirmeka winiyanka kanaktiarum.”

²⁸ ‘Nuyá Apraámsha, Isaksha, Jakupsha tura ashí Yúsnan etserin Yus akupeana nui wayawaru wáinkiarum tura aa ajapam pujusrum ti útkuram naim tásarara ajattarme.

²⁹ Tura Yus akupeana nuĭ, nantu tatainmaaniyasha nantu akaatainmaaniyasha, arakiasha, nunkaaniasha taar, imia Israer-shuarchaitiat yurumátai tusar pujusartatui. Tura atumsha, “Apraám shuáraitjai” táyatrum, wayashtatrum.

³⁰ Nuĭsha yamáí ukunmaani ainia nusha emka ártatui; tura yamáí emka ainia nusha nuĭsha ukunmaani ártatui.”

Jerusarénumaani Jesus wémiayi
(Mateu 23.37-39)

³¹ Nu tsawantai Pariséu aents Jesusan tariar tiarmiayi “Erutis manta-mattsa wakerutmawai. Tuma asantai juyanka wetá.”

³² Tutai Jesus tímiayi “Werum nu kujancham ju titiarum: “Íistá. Yamaisha ishichik tsawant iwianchin júkin akupkartajai; túran jaancha tsuáartajai. Tura ukunam amuktatjai.”

³³ Tura Jerusarénumaani ishichik tsawant tuke wétinaitjai. Yúsnan etserin aya Jerusarénuman jákatniuiti.

³⁴ ‘Jerusarénumiatiram, Yúsnan etserin máiniaitrum; tura Yus akatar akupturmakmania nusha kayajai tukurum máiniaitrum! Tuma ain atash ni shiamprin etektana núnisnak Wissha weaktasan wakerimjiarme, túrasha nakitramarme.

³⁵ Iistarum. Atumniasha Yus ajapramaitrum. Tura “Yusa náariin winiana nu, shiir atí” títiatrumna nú tsawant jeatsain penké wáitkiashtatrum. Nuna tájarme” tímiayi Jesus.

14

Áishman eaak-jaan Jesus tsuármiania nu

¹ Ayampratin tsawantai Pariséu uuntri jeen Jesus yurumáttsa wémiayi. Tura chíkich Pariséu wariniak túrat tusar ii pujuarmiayi.

² Nuĭ áishman eaak-jaa Jesus pujamunam naka pujumiayi.

³ Jintinniuncha Pariséuncha Jesus aniasmiayi “¿Warí tárur? ¿Ayampratin tsawantai jaa tsuárminkiait. Tsuárchamniakait?” tímiayi.

⁴ Tura niisha áimtsuk pujuarmiayi. Nuñkia jaan antiñ tsuármiai. Tura “shiir wetá” tímiayi.

⁵ Nuyá Pariséun chicharuk, “Atumí umpuurarisha, waakarisha waa táurmanum akaiki iniamtai, ayampratin tsawant ain nu chichamaik júatsrumek” tímiayi.

⁶ Takui áimkiatniun penké tujinkiarumiayi.

Nuátnaikiatin nampernum ipiaamu ármia nu

⁷ Ipiaamusha penkeri pujutainium pujustaitsar ti wakeruiniakui, Jesus nuna wániak juna jintintramiayi:

⁸ “Nuátnaikiatin nampernum penkeri pujutainium pujusaip. Nuĭ pujakminkia, chíkich ámijiai nankaamas penkeri táchatpiash.”

⁹ “Tura ipiatmania nu chichartamuk “Chíkich iiktusta” turamchatpiash. Nuñkia chíkich nákatkamu pujutainium wéakum natsartatme.

¹⁰ Antsu ipiatmakmin, nákatkamu pujutainium pujustá. Nuñkia ipiatmiania nu chichartamuk “Amikru, ámeke juĭ penkeri pujutainium pujustá” turamartatui. Nujai chíkich ipiaamu ainia nu, “nekas penkerinti” turamartatui.

¹¹ Iimiata, “penkerintjai” tu enentáimtuma nuka péejchach awajnastatui. Tura ímianchach enentáimtúmana nuka waantu ajastiniaiti.”

¹² Nuyá Nin ipiaamua nuna chicharuk tímiayi “Amesha yurumáití tusam untsuktajtsam wakerakmeke, ame amikrumsha, yatsumsha, ame

shuarumsha, írutramuram kuítrintin ainia nusha ipiaawaip. Nii ipiaamka, ataksha íksan ámin ipiatmashtatuak. Nujají akikma átatme.

¹³ Antsu yurumáití tusam untsuktajtsam wakerakmeká, kuítrincha, wekaicha, shutuapsha, kusurusha ipiaawarta.

¹⁴ Niisha akirmaktinian tujintiainiawai. Péñker shuar nantakiartatna nují akinkiattame. Nu tuma asamtai warastatme” tímiayi.

Uunt namperan Jesus nekapmá chichasmiania nu

¹⁵ Nu misanam pujuarmia nuyá, chikichik Jesus chichaamun antuk, Jesusan tímiayi “Yus akupeamunam pachiiniak, yurumkunka ti shiir ainti.”

¹⁶ Nuna takuí Jesus juna jintintiamiayi: “Áishman namperan nájanuk, untsurí shuaran taartí tusa akatar akupkamai.

¹⁷ Yurumátin jeamtai “Winitiarum, yurumátin jeayi” tu tiarta tusa ni takarniurín akupkamai.

¹⁸ Tura winichminiaitji tusar ashí ujakarmá. Chíkich timiai “Nunkan yamá sumarmakjai. Iyutaj tusa wéakun winishtatjai. Tsankurturti” timiai.

¹⁹ Tura chíkich chichaak “Wisha tias waakan sumarmakjai. Nekapsatsan wakerajai. Tuma asan winishtatjai. Tsankurturti” timiai.

²⁰ Tura chíkich chichaak “Yamá nuatnaikijai. Tuma asan winishtatjai” timiai.

²¹ Takarin waketki ni úuntriñ ashí nuna ujakmai. Nuna antuk niisha kajakmiayi. Tura ni takarniurín timiai “Ju péprunam péñker jintianmasha tura uchich jintiachinmasha weme, kuítrincha tura wekaichasha, shutuapsha, kusurusha itiaarta.”

²² Nuyá ukunam ni takarniuri taa chicharuk “Uuntá, ame turutmiamna nútiksanak túramjai; túrasha tuke ankant awai” timiai.’

²³ “Tutai ni uuntri chichaak “Jintianam weme, chíkich jintiachiniam weme, wáinmena nu ashí awayawarta. Winia jearui piakat tusan wakerajai.

²⁴ Emka ipiaawarmajnia nuka penké chikichkíksha winiñkia yurumáchartatui, tajarme’ tímiayi.”

Kristu nemarsatin yúpichuchichuiti

²⁵ Untsurí aents Jesusjai irunki wearmiayi. Niisha nuna apajas iis juna tímiayi:

²⁶ “Shuar ni aparíncha, ni nukuríncha, nuaríncha uchiríncha, yachíncha, umáincha Wijjají nankaamas enentáimtakka, tura shiir pujustinian wakerak Winí winitniun nakitiakka winia unuiniampur ajaschamniaiti.

²⁷ Ni wakeramurín ajakeak ni krusrj yanakí nemartatsna nu winia unuiniampur ajaschamniaiti.’

²⁸ ‘Jea yakí jeamtaj tusam wakerakmeká, kuítian urutmak ajapawaintiaj tusam tura urutmajaink’ amukaintiaj tusam emka enentáimsashtatmek.

²⁹ Túrutsuk aya ukura iniaisam amuktin tujinkiakmiñkia, nuna wáiniainia nu, wishikiainiak juna tiartatui:

³⁰ “Íiskua. Nu shuar jeamtinian nankamamiayi. Túrasha amuktinian tujinkiamiayi.”’

³¹ “Tura uunt kapitián chíkich kapitíanjai mesetan najanatin áchatpiash. Emka, niisha pujus, tias mir (10.000) suntarjai painti mir (20.000) suntar winiana nuna nupetkaintjash tusa enentáimsashtatuak.

³² Tujintiakka, chíkich kapitián jeachat pujaanak, nawamnaikiatai tusa akatar akupkashtatuak.

³³ Wats, “Kristu unuiniamurí ajastinjai, wi takakjana juna warí winia itiurtawa” tu enentáimsatniuitrume. Túrachkurmeka winia unuiniamur ajastin tujinkiarne.’

Wee michumarka yajauchiiti

(Mateu 5.13; Márkus 9.50)

³⁴ ‘Weeka jeaku péñkeraiti. Tura michumarka ¿itiurak atak péñker ati?

³⁵ Wee michumarka araa³⁴matniunmasha yaya³⁵atsui. Tura tsuatnum ikius-masha áñtraiti. Aya ajapatniukete. Kuishim ákuin³⁵kia antuktarum” tímiayi.

15

Jesus murik menkakamu chichaman unuiniamiania nu

(Mateu 18.10-14)

¹ Akupniu kuítr¹in-juu tura yajauch shuarsha Jesusan anturkatai tusar tarú wear¹miayi.

² Tuma asamtai Pariséusha, Israer-shuara jintinniur²isha Jesusan áujmatainiak “J²usha tunáa shuaran itiaawai tura niij²iai yurumáiniawai” tiarmiayi.

³ Nuna tuiniakui Jesus ju métek-taku chichaman jintintiawarmiayi:

⁴ “Shuar sian⁴ (100) murikiun takuschampiash. Nu siánnumi⁴a chikichik menkakam⁴tai nuwintia nuíwinkia ni matsatmar⁴iin ikiuak, menkaka nuna ti eakchattawak. Wáintsuk iniaisashtatui.

⁵ Tura wáiniak yakainium awan⁵kek waras je⁵en wáketui.

⁶ Tura je⁶en jeá ni amikr⁶in, írutramur⁶incha ikiaan⁶ak “Wij⁶iai warastarum. Murikiur menkaka nuna wáinkia⁶jai” tawai.

⁷ Wats, nuwintia nuiwi péñker shuar akui nayaimpiniam warastin awai. Tura antsu chikichik yajauch shuar ni enentáin yapajiámtain⁷kia, nú nan⁷kaamas warastin átatui, tájarne’ tímiayi.

Kuit emenkakman Jesus unuiniamiania nu

⁸ ‘Nuyá chíkich enentáimsatai. Nuwá tias kuítian takakna nuna chíkichik menkakam⁸tai, wáinkiat⁸aj tusa jinia ekeemak, je⁸en japimiak émamkes eakchattawak.

⁹ Tura wáiniak ni amikr⁹in, írutramur⁹incha ikiaan⁹ak, “Wij⁹iai warastarum. Kuit menkakamia nuna wáinkia⁹jai” tawai.

¹⁰ Núnisan¹⁰ yajauch shuar ni enentáin yapajiámtai, Yusa suntari¹⁰ matsatmanum ti warastin awai” tímiayi.

Uchi ni apar¹¹in waketkitniun Jesus unuiniamiania nu

¹¹ Nuyá Jesus juna unuiniamiayi:

“Áishman¹¹ jimiara¹¹ uchin takakuyi.

¹² Tura pá¹²atka uchi ni apar¹²in timiai “Apawá, surustiniaitmena nu yamá¹²i surusta.”

“Tutai ni apar¹²í ni kuítr¹²in jímiapetek nakak mai uchin susamai.

¹³ Ishichik tsawant nan¹³kaamasai pá¹³atka uchi ni warir¹³in irur jukí jeachat chíkich núnkanam wémai. Nu¹³isha ná¹³nkamas yajauchin túrak kuítr¹³in ashí ajapamai.

¹⁴ Ni kuitr¹⁴i ashí amuuka a¹⁴in nu nun¹⁴kanam ti tsuka ámai. Niisha núnisan¹⁴ tsukari¹⁴in wáitsamai.

¹⁵ Túmak takatan eak¹⁵tajtsa nu nun¹⁵kanmaya¹⁵ apach¹⁵in werimiai. Nu áishman¹⁵sha kuchir¹⁵in wáitrukta tusa akupkamai.

¹⁶ Uchi ti tsukamak kuchi ukatramun niisha yuá¹⁶tajtsa ti wakerimiai. Túrasha pen¹⁶ké súcharmai.

17 Tumáa pujus nuinkia enentáimpramai. “Winia aparuí takau shuar péñkeran ti yurumáiniawai. Tura wikia juí tsukaruí wáitijai.

18 Wats, aparuí waketkitjai. Tura aparun chicharkun “Apawá Yúsjaisha ámijjaisha tunaan túrajai, titijai.

19 Ame uchiram áchamnaitjai yamaikia. Ame takarniurmea áantsanak átaj tusan wakerajai” titijai” tu enentáimsamai.

20 Tura wajaki ni aparíin waketkimiai’ tímiayi.

“Tura ni aparísha jeachat winian wáiniak waitnentramai. Aparí tsékenki ínkiun miniakak mukunámai.

21 Nuinkia uchirísha timiai “Apawá, Yúsjaisha ámijjaisha tunáan túrajai. Ame uchiram áchamnaitjai.”’

22 “Túrasha ni aparínkia ni takarniurín chicharuk “Ti penker pushí itiarum áentsratarum, timiai. Tura uwejnun aweetaisha aweemtikiatarum. Tura sapatcha aweemtikiatarum.

23 Túrarum waaka nueram ana nu maatarum. Námper nájankur shiir enentáimsar yurumámi.

24 Warí, ju winia uchir jakaapitia tu enentáimsamjai. Túrasha iwiaakui. Menkakama nuna wáinkijai.” Nuinkia ti warasarmai’ tímiayi.

25 “Tumai iwiái úchikia takatnum pujumai. Tura wáketuk, jeá nuntumas jantsemáiniak túntuiyamun antukmai.

26 Nuinkia yaintri matsatun chikichkiniak untsuk “¿Warimpait?” timiai.’

27 “Tura nii chichaak “Ame yátsum tayi. Túramtai ame apa waaka nueram maatai tawai, ame yatsum péñker tau asamtai” timiai.’

28 “Tura iwiaí uchi kajek wayatniun nakitramai.’

“Tuma asamtai ni aparí jiiintiuki “wayata” timiai.’

29 “Tura uchisha aparín chicharuk “Wisha ámin umirkun untsurí uwitin ame takatrumin túraitjai. Nu nékame. Túrasha winia amikrujai námper najanatin chiipiuksha penké surichuitme.

30 Tura ju ame uchiram nuwajai yajauchin túrak ame kuítrumin wasurkania nu támatai, waaka nueram máachumek” timiai.’

31 “Takui aparí chicharuk “Uchirú, ámeke wijjai tuke pujame. Tura wi takajana nusha ashí áminuiti.

32 Tura ame yatsum jákai tu enentáimsamij nu iwiaakuiti. Menkaka nu yamaikia wáinkijai. Tuma asamtai námper najanar waraschatniukaitij” timiai” tímiayi.

16

Takatan wáinin

1 Ju métek-taku chichamnasha Jesus ni unuiniamu7 “Tura nii chichaak “Ame yátsrín unuiniamiayi.

“Kuítrintin áishmanka takatrín wáinniurí ámai. Tura nérenniun ujainiak “Ame wáinniuram ame kuítrumin nánkamas ajapeawai” tiarmai.’

2 “Nuna antuk ni wáinniurín untsuk “¿Warinia jusha turamainia? timiai. Yamaikia winia wáinniur áhattame. Tuma asamtai winia kuítrujai ititurkamea nu iniaktursata” timiai.’

3 “Tutai takatan wáinin enentáimsamai. “Maaj, wisha ititurkatjak, timiai. Nunka táurtinniasa jeatsjai. “Kuit surusta” títinniasa natsamajai.

4 Winia takatur atsakui yurumkan ajamprusarat tusan túratajna nuna nekajai” tu enentáimsamai.

⁵ Nuyá nérenniun tumashmaku armia nuna ankant ankant untsukarmai. Emka tamia nuna chicharuk “¿Winia úuntur urutma tumashmakuitiam?” timiai.’

⁶ ‘Niisha áimiuk “Asuitin sian taru tumashiitjai” timiai.’

‘Tutai takata wáinin chicharuk “Pai. Papinium tumashrum ana nu juá: wárikmasmek pujusam, nu papí jaakam, chíkich papinium aya senkuentachik aarta” timiai.’

⁷ ‘Nuyá chíkich tumashmaku támatai “¿Amesha urutmá tumashiitiam?” timiai.’

‘Tutai nii chichaak “Shana sian taru tumashiitjai” timiai.’

‘Tutai “Pai. Papinium tumashrum ana nu júiti. Chíkich papinium aya uchentak aarta” timiai.’

⁸ ‘Nuyá takata wáinniu uuntri nuna nekáa “Nii yajauch túriniaitiat imiá enentáimniuiti” timiai’ tímiayi.

Nuyá Jesus tímiayi ‘Yus-shuarjai nankaamas Yus-shuarcha aijjai ni túratniuriniak takainiak imiá enentáimkia áiniawai.’

⁹ ‘Ju nunkanam anankatin átsuk. Tura kuitsha aya ju nunkanmayankete. Tuma asamtai atumsha kuitrumjai “shuaran yaintaj” tu enentáimsatarum. Kuitjai yaintin amuukamtai atumsha amuicha jeanam ipiaamu átaj tusarum túratarum.”

¹⁰ ‘Shuar ishichik takakna nujai péñker túrakka, núkap takakna nujaiisha péñker túrattawai. Tura ishichik takakna nujai péñker túrachkunka, núkap takakna nujaiisha péñker túrashtatui.

¹¹ Tuma asamtai ju nunkanmaya anankartin kuitjai péñker túrachkurmeka, tuke átin ana nujai takastincha ¿itiur takastarumek?

¹² Takakme nuna Yus ikiatmasuiti. Nujai péñker túrachkurminkia, atumnia átinia nuna ¿itiurak suramsat?’

¹³ ‘Takarniuri jimiará úuntrintin ajastinian tujintiawai. Warí, chikichnaka aneak chikichnaka nakitrashta túrattawai. Turya senkuentachik aarta” timi-aituak. Chikichan umiruk chikichnaka umirkashtatui. Yussha kuitcha máimetek enentáimtuschaniaitume” tímiayi Jesus.

¹⁴ Paríséusha kuítian anen armia nu, ashí ni táman antukar Jesusan wishikrarmiayi.

¹⁵ Túmakui Jesus nin tímiayi “Atumsha aents íimmianum péñker awajmam-prume. Túrasha atumí enentáincha Yus péñker nékawai. Kame winia “nankaamantuiti” turutit tusa wakera nuna Yuska nakitiawai.’

Yaunchu etserkamu, yamá etserkamu

¹⁶ ‘Juan étsertsain Muisáis aar akupkamia nunasha tura Yúsnan etserin unuiniarmia nunasha antuktin ármiai. Tura yamaisha tímianiaí ti shiir chicham awai. Yus akupeana nuj urukukit nuka paant etserkamuiti. Tura ashí shuar nuj pachiiinkiataj tusar ni kakarmarjiaín ti takainiawai.’

¹⁷ ‘Túrasha yaunchu akupkamu ashí chicham uminkiatniuiti. Nu chicham uminkiashtinkia nayaimpisha nunkasha amukatnuijai nankaamas itiurchataiti.’ *

¹⁸ ‘Áishman nuarín ajapa chikichan nuátkunka tsanirmawai. Tura nuwa ajapamu niiniurtakka nusha núnisan tsanirmawai.’

Kuítrintin áishman Rásarujai

¹⁹ ‘Áishman kuítrintin ámai. Niisha imiá shiir pushin ti kuit ainia nujai iwiarmamniuyi. Tura tuke tsawant yurumak ti kuit amia nujai namperan najanniuyi.

* **16:17** Mateu 19.1 ya senkuentachik aarta” timiai-12; Márkus 10.1-12

²⁰ Tura kuítríncha ámai ni naari Rásaru. Niisha kuchapruku tunamaruyi. Tuke tsawant kuítrinniu wáitiriin pujuyi.

²¹ Ti tsukamak kuítrinniu misariniá kakekan yuattsá wakerimiai. Tura yawasha ni kuchaprin nukatiarmai.

²² Kuítríncha jakamai. Jakamtai jaka shiir pujutainium, Apraám pujumia nui nayaimpinmaya suntar júkiarmai. Kuítrinniusha jakamai. Jakamtai iwiarsarmai.

²³ Jaka pujutainium wáitias pujus, pankái íimias, Rásarun Apraámjai pujuinian wáinkiamai.

²⁴ Wáiniak untsujuk “Apawá Apraamá wáitnentrurta, timiai. Rásaruka tsara uwejejai entsan uchupir winia iniairun imichturat akupturkata. Wisha jui jinium pujusan ti waitiajai” timiai.’

²⁵ ‘Tutai Apraám timiai “Uchirú enentáimpratá. Ame nunká iwiaaku pujusam ti shiir pujumame. Antsu Rásaruka nui ti yajauch pujumai. Tura niisha yamaikia jui áyamui tura ámeke wáitiamé.

²⁶ Tura nú arant nánata ti uunt awai. Tuma asamtai juyá ai wétinian wakeruiniayat tujintiainiawai. Tura aiyá jui tátinian wakeruinia nusha tujintiainiawai.” ’

²⁷ ‘Nuinkia kuítrintin timiai “Nuinkia apawá Apraamá, juna seajme. Winia aparú jeen Rásaru akupturkata.

²⁸ Nuisha winia yatsur senku matsatainiawai. Niisha ju wáitsatniunam tácharat tusa ujákartí, tájame” timiai.’

²⁹ ‘Tutai Apraám timiai “Muisáis áarman tura Yúsnan etserin áarman takakainiawai. Nuna umikiarti.” ’

³⁰ ‘Tutai kuítrintin áimkiamai “Túrasha apawa Apraamá, antsu jakamunmaya nantaki, shuar we ujakam enentáin yapajíáwarainti.” ’

³¹ ‘Tura Apraám timiai “Muisáis áarman tura Yúsnan etserin áarman anturainiachkunka jaka nantaki we ujakmasha antukchartatui” timiai.” Tu áujmatsamiayi Jesus.

17

Yajauch túrumtikiatin ti tsúumainti
(Mateu 18.6-7, 21-22; Márkus 9.42)

¹ Jesus ni unuiniamurin juna tímiayi, “Aentsun yajauchin túrumtikiattana nu tuke átatui. Tura shuar ni ain tunaan wakerumtikna nu aneartí.

² Ju shuar uchich ainia nuna yajauchinium túrumtikna nuna Yus imiá asutiáttawai. Tuma asamtai nuna túratsain uunt kayajai kuntujnum jinkia nayaantsanam ajunkam maak ainti.

³ Túrasha atumek ímiastarum. Ame yatsum ámin tunáa túrutmamtainkia chicharkata; tura niisha “tsankurturta” túramkuinkia tsankurata.

⁴ Chikichik tsawantiniñ siati túrutmamtai, tura “tsankurturta, atakka túrashtatjai,” siati túramkuinkia, tuke tsankurata.”

Yus nekas enentáimtakrikia tujinkiashtatji

⁵ Jesusa unuiniamuri Nin chicharuk “Yus enentáimtajnia nú nankaamas enentáimtustin yáinmaktá” tiarmiayi.

⁶ Tutai Jesus tímiayi “Mustasa jinkiaí ti ishitiúpchich ana núnisan ishichkisha Yus enentáimtaitkiurmeka, sikiumuru numi wajana nu, “Wajamurmijanka ukuiniakam nayaantsanam wajasta” tákurmin nú numi umirtamkainti.’

Yusa takatri takasar “ti penker túraitji” tíchatniuitji

⁷ ‘Atumí takarniuri arakmasua amik, waakancha iis támatai, ¿nú chichamaik amesha, “Winitia, yurumáitia” tíintmek?

⁸ Atsá. Antsu, “yurumak iwiarturata. Wi yurumátin tura umartincha surusminiam iwiarnarta. Nuyá ame yurumátá.” Nu tíchaintmek.

⁹ Nii túratin ana nunak túratsuk. Tuma asamtai yuminsashtatme.

¹⁰ Atumsha núnisrumek Yus túramna nu ashí umikiam “ti penker túraitjai” tíchatniuitme. Antsu “aya ii túratniuri ana nuke tura asar iikia ántraitji” títiniaitme.” Tu tímiayi Jesus.

Tias áishmankan tunamarun Jesus tsuáarmiania nu

¹¹ Jesus Jerusarénum wesa Kariréa nunka ikiuki Samaria nunkanam nankaamakmiayi.

¹² Tura péprunam jeamtai, tias áishman ripra sunkurjai tunamaru armia nu, arant wajasarmiayi.

¹³ Tura untsumainiak “Uunt Jesusá, waitnentrurta” tiarmiayi.

¹⁴ Jesus nin wáiniak, “Pátrij werirum iniaktumastarum” tímiayi.

Tura wésar pénger ajasarmiayi.

¹⁵ Nuyá chikichik ni tsuamarman nekáa kakantar chichaki Yusa náarin uunt awajki waketki Jesusan tarimiayi.

¹⁶ Yuminsataj tusa Jesusan tikishmatar piniakumar tepesmiayi. Nu áishmanka Samarianmayayuyayi.

¹⁷ Nuna wáiniak Jesus tímiayi “Tsuámaru tiáschakait. ¿Chikich nuiwisha tui pujuinia?”

¹⁸ ¿Ju yajaya áishman nínikik Yusa naari uunt awajsataj tusa waketki tai?”

¹⁹ Nuyá áishmankan tímiayi, “Winia nekas enentáimtursa asam pénger ajasume. Wajakim shiir weta” tímiayi Jesus.

¿Yusa akupeamuri urutaik ati?

(Mateu 24.23-28, 36-41)

²⁰ Pariséu aents Jesusan aniak “¿Yusa akupeamuri urutaik ati?” tiarmiayi.

Tutai Jesus tímiayi, “Yusa akupeamuri paant wáinkiachminiaiti. “Yamai nan kamnaya” tichamniaiti.

²¹ “Jui awai, nuisha awai” tíchamniaiti. Warí, Yusa akupeamurinkia atumjin pujawai” tímiayi.

²² Nuyá ni unuiniamurin chicharuk juna tímiayi: “Tsawant jeattawai atumsha Winia Aents Ajasu tutain “aya chikichik tsawantkesha Nii wáinkiarkea mak” turuttiatrume. Túrasha tujinkiattarme.

²³ Aents Ajasu tutai “jui pujawai, nuisha pujawai” tuíniakui weriirap. Tana nu nemariirap.

²⁴ Wi, Aents Ajasuitjiana nu tátinian tsawantur jeamtai paant wáitkiattarme. Peem péetuk ashí nayaimpin tsáapnin awajna núnisan wi taamu paant átatui.

²⁵ Tura nu túruntsain yamai pujuinia nu Winia nakitruiniakui ti wáitsatniuitjai.

²⁶ Winia atak tátiniur jeamtai, yaunchu Nuái pujumia nú tsawantin túrunamia núnisan túrunattawai.

²⁷ Yurumáwarmiayi, umararmiayi, nuatnaikiarmiayi, ni nawantri nuatnakat tusa surukarmiayi. Tumáa pujuinia Nuái uunt kanunam enkemprantai, amarak nu aentsnasha mash amuukarmiayi.

²⁸ Tura Sutuma péprunmasha Rauta írutramurisha núnisan Yusa asutiátniuri enentáimtutsuk pujuarmiayi. Yurumáwarmiayi, umararmiayi, sumakarmiayi, surukarmiayi, ajancha ajarmarmiayi, jeancha jeammarmiayi.

²⁹ Tura Raut Sutuma péprunmaya jinkimtai asupri tutai kaya keek yútana áintsan nayaimpinmaya kakeetuk nu áentsun mash máawarmiayi.

³⁰ Núnisan winia atak tátiniur jeamtai enentáimtsuk pujusartatui.’

³¹ ‘Nu tsawant jeamtai jea yakiini pujana nú shuar ni waririn achiktaj tusa akaikishti. Jeá wayashti. Tura kampunniunam wekaana nú shuar ni jeen waketkishti.

³² Rauta nuarí túrunamu enentáimpratarum.

³³ Aya ju nunkanmayan enentáimias “iwiaaku átaj” tana nu ni iwiaakmarin emenkáktatui. Tura ju nunkanam ni iwiaakmarin emenkana nu nekas iwiaakma ana nuna wáinkiáttawai.

³⁴ Paant tájarme. Nú káshitin jimiara áishman nuu peaknuman kanuu tepeartatui. Chikichik junaktiatui, chikichkia ikiunkittiwai.

³⁵ Jimiara nuwa mái-metek nekée pujuartatui. Chikichik junaktiatui, chikichkia ikiunkittiwai.

³⁶ Jimiara áishman kampuniunam wekainiartatui. Chikichik junaktiatui, chikichkia ikiunkittiwai.” Tu tímiayi.

³⁷ Nuna antukar “Uunta ¿tují túrunatta?” tiarmiayi.

Tutai ni chichaak “Jaka tepana nuí chuan káutkartatui.”

18

Shuar yawetsuk Yúsan tuke áujatniuiti

¹ Shuar yawetsuk Yúsan tuke áujatniua nuna unuiniartaj tusa Jesus ju métek-taku chichaman tímiayi:

² “Chikich péprunam shuaran akupin amai. Nú áishman Yúsnasha ashamchauyi; shuárnasha pénger enentáimtichuyi.

³ Tura nú péprunam waje amai. Niisha shuáran akupniun chicharuk “Áishman winia yajauch awajtusmania nu írtusta” tusa tuke waketrú pujuyi.

⁴ Yámankamtaikkia nin anturkatniun nakitmiiai. Tura ukunam enentáimias “Wisha Yúsan ashamachiatnak shuárnasha pénger enentáimtichuiatnak ju waje tana nuna túrattajai.

⁵ Warí niisha tuke taa itit awajtatsuk. Tuma asamtai nin kajerkañ tusan wárik túrattajai” timiai” tímiayi.

⁶ Nuyá uunt Jesus tímiayi “Shuaran akupin yajauchiitiat nuna timiai.

⁷ Tura Yus ti pénger asa, ni achikmarin tsawaisha, káshisha untsuamka nú nankaamas anturkashtatuak. ¿Yáitsuk menkakatuak?

⁸ Atsá, wárik yáinkiertatui, tájarme. Tura Wi Aents Ajasuitjiana ju atak támatai, ¿shuaran tuke Winia nekas enentáimturainia nuna wáinkiatjash?” tímiayi Jesus.

Pariséusha, kuítian-juuncha Yúsan áujasarmia nu

⁹ “Péngeraitjai” tu enentáimtumainiak chikichnaka yajauch enentáimtiarmia nuna Jesus nekapmá chichasmiayi. Juna tímiayi:

¹⁰ “Jimiara áishman Yusa Uunt Jeen Yus áujasatai tusar wearmai. Chikichkia Pariséuuyi, chikichkia kuítian-juuyi.

¹¹ Pariséusha wajakí Yúsan áujuk júnis tímiayi: “Yusrú, chikich áishman kasa, yajauch, tsanirmau ainia nujai métekcha asan yuminsajme. Tura ju kuítian-juu wajana jújaisha métekchaitjai.

¹² Warí, Ame akupkamna nuna iniankasan wisha chikichík semanatiniñ jimiara tsawant ijarman áujeajai; tura wi achiajna nuna tiásnumia chikichkiniak Yúsnaiti tusan akankan súajai.” Tu timiai.’

¹³ “Tura kuítian-juusha arant wajas, nayaimpinmaani pankái ímsatniunkesha natsaamak, tsunsuma, ni netsepen awatí “Yusá, ti tunaitjai. Waitnétrurtá” timiai.’

¹⁴ ‘Wats tájarme, nu kuítian-juu shuar Yus ímmianum ni enentái pénger awajnas ni jeen waketkimiai. Tura Pariséuka tamia núnisan waketkimiai.

Nekaatarum. Shuar nan̄kaamantu enentáimtumana nuka péejchach awajnas-tatui. Tura antsu péejchach enentáimtumana nu, nan̄kaamantu awajnas-tatui” tímiayi Jesus.

Uchisha Jesusna áminiaiti

(Mateu 19.13-15; Márkus 10.13-16)

¹⁵ Jesus antin̄kiarat tusar uchin itiararmiayi. Tura Jesusa unuiniamurisha nuna wáinkiar suritkiarmiayi.

¹⁶ Tura Jesus nin untsukar tímiayi “Uchi Winí winitin tsan̄kamkatarum, surimkiairap. Enentáimsatarum. Uchichia áintsan̄ enentáimtumana nú shuárak Yus ni enentáin akupin ajasminiaiti.

¹⁷ Uchi ni úntrin̄ umira núnisan̄ shuar Yúsan umíachkunka Yus ni enentáin akupin ajaschamniaiti.” Tu tímiayi Jesus.

Kuítrintin áishman Jesusjai áujmatsamiania nu

(Mateu 19.16-30; Márkus 10.17-31)

¹⁸ Shuara uuntrī Jesusan tarí áujsamiaiyi. “Uuntá, amesha péñkeraitme. Tuma asam, turuttia, ¿warinia túrakna tuke iwiaaku átataj?” tímiayi.

¹⁹ Tutai Jesus, “¿Urukamtia Winia, péñkeraitme, túrutam? Aents péñkerka atsawai. Aya Yusak péñkeraiti.

²⁰ Tura Yus akupkamu ana nu péñker nékame. Tsanirmawairap, mankar-tuawairap, kasamkairap, tsanumprurairap, ame apasha, nukusha shiir enentáimtustarum. Nusha nékame” tímiayi.

²¹ Tutai áishman̄ tímiayi “Uuntá, úchichik mash umiki tsakaruitjai.”

²² Jesus nuna antuk “Chikichik taatramsai, tímiayi. Ame takakmena nu ashí surukam kuítrin̄cha ainia nu susarta. Nuin̄kia nayaimpiniam kuítrum átatui. Túram nemartustaj tusam winitia.”

²³ Tura nuna antuk, nu áishman̄ ti kuítrintin asa ti kuntuts enentáimpramiayi.

²⁴ Tura kúntuts enentáimprantai Jesus nuna nekáa “Kuítrintin ainia nu Yus akupeamunam pachiinkiatin ti iturchataiti, tímiayi.

²⁵ Kamiriuka, uunt ana nu, auja jin̄ wayatin̄ iturchataiti. Tura shuar kuítrin̄ ti enentáimtana nu Yus akupeamunam pachiinkiatin nú nan̄kaamas iturchataiti.” Tu tímiayi.

²⁶ Tura nuna antukarmia nu tiarmiayi “¿Nuin̄kia yaki uwempramniait?”

²⁷ Tutai Jesus tímiayi “Aents tujintiainia nuna Yuska páchitsuk túramniaiti.”

²⁸ Nuyá Pítiur Nin chicharuk tímiayi “Uuntá, iikia Ámin nemarsataj tusar ii takakmaaka ikiukji.”

²⁹⁻³⁰ Tutai Jesus tímiayi “Shuar Yus akupeana nuna túrataj tusa ni jeen̄ ikiuakka tura núnisan̄ ni aparíncha, nukuríncha, yachin̄kisha, nuwenkesha, uchirínkisha ikiuakka jū nun̄kanmasha núkap wáinkiatatawai nu shuar. Tura tuke iwiaaku pujustinniasha wáinkiatatawai.”

Ataksha ni jákatniurin̄ Jesus ujakmiania nu

(Mateu 20.17-19; Márkus 10.32-34)

³¹ Jesus ni tuse unuiniamurin̄ akanki ikiaan̄ak jin̄a tímiayi:

“Jerusarén̄num jeatemaji. Juisha Jerusarén̄num Winia, Aents Ajasu tutain, túrunatniurun Yúsnan̄ etserin̄ yaunchu áatrurarmia nu uminkiatatawai.

³² Apachnium surutkartatui. Túrawar wishikrurar, katsekrukar usukru-awartatui.

³³ Awatiar mantuáwartatui. Túramaitiatnak menaintiú tsawantaj̄ nantaktiat-jai” tímiayi.

³⁴ Tura Nii tímiania nuna nekas túrunattawai, tícharmiayi. Wariniak ta tusar nekaacharmiayi.

*Jirikiúnmayá áishman̄kan Jesus ímtikmiania nu
(Mateu 20.29-34; Márkus 10.46-52)*

³⁵ Jesus Jirikiú péprunam nuntumsai, nuí áishman̄ jii kusuru, kuítian surusarat tusa jintiá pujumiayi.

³⁶ Untsurí aents nan̄kaamainian antuk “¿wariñkit?” tímiayi.

³⁷ Tutai, “Nasarétnumiá Jesus nan̄kaamawai” tiarmiayi.

³⁸ Kusurusha nuna antuk untsukum “Jesusá, Uunt Kapitián Tawit weeachukaitiam. Tátiniuya núchakaitiam. Winiaja waitnentrurta” tímiayi.

³⁹ Eemak wearmiania nu chicharainiak “takamatsata” tiarmiayi.

Tutaisha nú arant untsukum “Tawit weeachukaitiam; winiaja waitnentrurta” tímiayi.

⁴⁰ Nuñkia Jesus wajas “ítitarum” tímiayi. Tura nii támatai,

⁴¹ “¿Warí itiurtukat tusamea wakerutam?” tímiayi.

Tutai kusuru áimiuk “Uuntá, ímtiasan wakerajai” tímiayi.

⁴² Tutai Jesus chichaak “Ímtia. Winia nekas enentáimtura asam péñker ajasume” tímiayi.

⁴³ Nu chichamaik kusuru ímmiayi. Tura Yusa naari uunt awajki Jesusan nemarmiayi. Tura ashí aents nuna wáinkarmia nusha Yusa náarín uunt awajsarmiayi.

19

Sakíu Jesusjai

¹ Nuyá Jirikiú péprunam wayá nuí wekaikini ajamiayi.

² Nuí kuítrintin áishman̄ ni naari Sakíu pujumiayi. Nu Sakíu kuítian-juu úuntriayi.

³ Aents ti káunkámtai, Sakíu ti sútarach asa, Jesusan ístaj tukamá tujinkiamiayi.

⁴ Tuma asa Jesus nuke nan̄kaamaktin asamtai, eemki tsékin̄ki sikiumuru numi wajamunam wakamiayi iistaj tusa.

⁵ Jesus nuí nan̄kaamak pañkái ímias chicharuk “Sakíu wárik akáikitiá. Ame jeem̄in yamá kanartiniaitjai” tímiayi.

⁶ Tutai Sakíusha wárik akaiki, shiir enentáimias Jesusan itiaamiayi.

⁷ Ashí aents nuna wáinkiar “Maaj, Jesus tunáa áishman̄ka jeen pujawai” tusa mai tunaim ajarmiayi.

⁸ Nuyá Sakíu wajaki Jesusan chicharuk “Ístá Uuntá, wi takakjana juna jímiapetek nakakan kuítrincha ainia nuna susartatjai. Tura wáitruan chikichan kasarkaitkiuncha menaintiu patatsan awaiñkittiajai” tímiayi.

⁹ Tutai Jesus tímiayi “Ju áishman̄ Apraáma shuárintiat yamá niisha níniuujai uwempra asa nekas Apraáma shuari ajasuiti.

¹⁰ Wisha Aents Ajasu asan men̄kakarú ainia nuna eakan uwemtikrartaj tusan táwitjai.” Tu tímiayi.

Kuítian nekapmá chichasmiayi

¹¹ Nu aents Jesusan anturkarmia nu “Jerusarénum jeawakrin Nii, Yus anaikiamu asa, wárik akupin ajastatui” tu enentáimsarmiayi. Tuma asamtai wésar Jerusarénum nuntumsarai, nuna enentáimsarain̄ tusa Jesus juna métek-takun chichasmiayi:

¹² “Áishman̄ pen̄keri amai. Nu áishmansha jeachat chíkich núñkanam kapi-tián náamkan tátaj tusa wemai.

13 Tura wétsuk ni takarniur_{in} tias armia nuna untsukarmai. Tura an_{kant} kuit kurij_{ai} nan_{ka}amas pé_ñker armia nuna su_ñiak “Ju kuit_{jai} wi táats_{aiñ} takakmá ajatarum” timiai.’

14 “Tura ni nun_{ké}ni_ã shuarka nakitiarmai. Túmainiak “nu áishman_ñ ii kapi_{tián}tri_ñ ajas_{aiñ} tusar nakitia_{jai}” nu titiá tusar áishman_{kan} akatrar akuptukarmai.’

15 “Tuma a_{in} kapitián náamak ni nun_{ké}n waketki tamai. Taa “winia kuítruj_{ai} warí túrarum” títi_j tusa ni takarniur_{in} kuitia sú_sarmia nuna untsukarmai.’

16 ‘Ni takarniur_i emka chikichik taa “ame kuítrum_{jai} takakmasan tias patasan achikmajai” timiai.’

17 “Tutai kapitián chichaak “Pé_ñker túrame. Ishichik susamjamna nú_{jaiñ}k_i wi tí_{mi}ajna tí_{mi}atrusmek túrame. Tuma asakmin tias pé_{prun} akupin awajsattajme” timiai.’

18 ‘Chíkich taa “Íistá Uuntá, ame kuítrum_{jai} takakmasan se_ñku patasan achik_{jai}” timiai.’

19 ‘Nunasha chicharuk “Amincha se_ñku pé_{prun} akupin awajsattajme” timiai.’

20 ‘Nuyá chíkich taa “Uuntá, ame kuítrumin panii_{jai} ijian ikiusmajai.

21 Amesha kakaram chichau asakmin, ikiuschiatam achin asakmin tura arakmachiatam juu asakmin ashamkamjame” timiai.’

22 “Tutai kapitián timiai “Maaj, amesha ti yajauchiitme. Ame támena nuke makurmawai. Wi kakaram chichau a_{isha}, ikiuschiatan achin a_{isha} tura araknasha arakmachiatan juu a_{isha},

23 nu_{in}kia ¿urukamtia kuit-ikiutainiam ikiuschamam? Nu_{in}kia wi atak táakun patasan achiki_ãajna” timiai.

24 Tura nu_i wajarmia nuna chicharuk “Kuítian takakmar_i juruktiarum; túrarum tias takakna nú shuar susatarum” timiai.’

25 “Tura niisha chichainiak “túrasha Uuntá, tias takakja” tiarmai.’

26 “Tutai kapitián chichaak “Takakna nujai takaaku_{in}kia patatnastatui tájarme. Tura takakna nuj_{ai} takaachku_{in}kia ishichik takakkuisha jurunkit_iawai.

27 Tura winia nemasur kapitián ajas_{aiñ} tusar nakitrurarmania nu itatarum. Tura wisha í_{mi}ai_ñ máatárum” timiai.” Tu tí_{mi}ayi Jesus.

Jerusaré_ñnum Jesus wayamiayi

(Mateu 21.1-11; Márkus 11.1-11; Juan 12.12-19)

28 Nuna tuasua amik Jesus Jerusaré_ñnumaan_i wé_{mi}ayi.

29 Petpajái pepru tura Petania pé_{prusha} Uriwiu ná_{in}nium tí_{ji}uchi_{yi}; nu_i jeastatuk ajatemas ni unuiniamur_{in} jí_{mi}aran chicharuk,

30 “Tí_{ji}uch pé_{prun}am wetarum. Túrarum nu_i umpuuruch ekemtukchamu j_{in}kiamu wajá wá_{in}kiattarme. Nu atí_{arum} itiatarum.

31 Tura “¿urukamtai atí_{arum}?” turamainiakuisha, “ii uuntri_ñ wakerawai” tí_{ti}arum” tí_{mi}ayi.

32 Tutai unuiniamur_i wear, Jesus timia í_{mi}atrusa_ñ wá_{in}kiarmiayi

33 Tura umpuuruchin atí_{akui} né_{rentin} chichainiak “¿Urukamtai umpuuruchsha atí_{arum}?” tiarmiayi.

34 Tutai unuiniamusha “Ii uuntri_ñ wakerawai” tiarmiayi.

35 Tura umpuuruchin Jesusan itiararmiayi. Túrawar ni pushir_{in} umpuuruchiniam awantkar Jesusan ekenkarmiayi.

36 Tura Jesus wétinnium ni pushir_{in} jintianam ayaparar á_{in}trarmiayi.

³⁷ Tura Uriwiu naint awankénamunam tíjiuch ajasarmatai untsurí aents Jesusan nemariarmia nu warainiak kakantar untsumainiak aents tujintiamun untsurí túran wáinkiaru ásar Yusa náarin uunt awajsarmiayi.

³⁸ “Yusa náarin winiana ju ii uunt Akupniuiti. Nincha Yus shiir awajsati. Nayaimpiniam pujuinia nu shiir enentáimsar Yusa náarin uunt awajsarti” tiarmiayi.

³⁹ Tura Pariséu aents nuí páchitra pujuarmia nu Jesusan chicharainiak “Uuntá, nemartamainia nu “takamatsata” tiarta” tiarmiayi.

⁴⁰ Tutai Jesus tímiayi “Nuinkia ju takamatsarmatainkia, kayasha untsumkarainti. Nuna paant tájarme” tímiayi.

⁴¹ Jerusarénum tíjiuch ajatemas péprun wáiniak útuk júnis tímiayi:

⁴² “Jerusarénumia shuártiram, ju tsawantinkesha shiir pujustintrum nekaarmeka maak. Túrasha yamaikia nekaatin nankaamasai.

⁴³ Kame ti itiurchat tsawant jeartamtatrome. Atumí nemasri nunkejai aa-tanishan tanishmarar téntatramkattarme. Mesetan najatramattarme, tura áatusha junisha mash árenmaktatrome.

⁴⁴ Túrutma nunká ajunmartatrome. Tura atumiin pujuinia nuna máawartatui. Tura ashí emesrarmatai ishichkisha kaya irumpramusha penké atsuttawai. Wi Yusa anaikiamurin tarijrumna nu nekaachu asakrumin túrutmattarme.” Tu tímiayi.

Yusa Uunt Jeen suruktinian Jesus surinkiamiania nu (Mateu 21.12-17; Márkus 11.15-19; Juan 2.13-22)

⁴⁵ Nuyá Jesus Yusa Uunt Jeen wayá suruktasa pujuarmia nuna sumaktasa pujuarmia nunasha jiki awemarmiayi.

⁴⁶ Túrak juna tímiayi:

“Yús-Papinium yaunchu aarma awai: “Winia jearka Yus áujsatin jeaiti” tu áarmaiti. Túrasha átumka kasáa matsamtaiya nútikiarme” tímiayi.

⁴⁷ Tuke tsawantin Yusa Uunt Jeen Jesus uwempratin chichaman uniniak pujai Israer-patri úntrisha, Israer-shuara jintinniurisha, tura pepru úntrisha, itiur máamniakit tusan ti enentáimsarmiayi.

⁴⁸ Túrasha ashí aents émamkes anturainiakui máatniun tujinkiarimiayi.

20

Yusa kakarmarijiai Jesus takasmiania nu (Mateu 21.23-27; Márkus 11.27-33)

¹ Yusa Uunt Jeen Jesus uwempratin chichaman uniniak pujai Israer-patri úntrisha, Israer-shuara jintinniurisha, Israer-shuara úntrisha táarmiayi.

² Taar Jesusan chicharainiak “¿Yana chichamejai ju túram? ¿Ya ju túratniuncha akuptamkait?” tiarmiayi.

³ Tutai Jesus tímiayi “Wisha aniaastajrum tusan wakerajrume.

⁴ ¿Ya Juánnasha imiakrattia tusa akupkamia? ¿Yusak? ¿Aentsuk? Turut-tiarum” tímiayi.

⁵ Tútaisha niisha nuamtak warintiajik mai tunai ajarmiayi. ““Yus akupkaiti” tákurninkia, “¿urukantai enentáimtuscharum?” turamtatji.

⁶ Túrasha “aents akupkaiti” tákurnisha ashí aents kayajai tukurmar manta-mattaji. Warí “Juan Yúsnan etserniuiti” tuíniatsuk” tiarmiayi.

⁷ Nuinkia Jesusan áiniak “Iisha nékatsji, Juan imiakratinniasha yátsuk akupkamia” tiarmiayi.

⁸ Tutai Jesus tímiayi “Wisha núnisnak winia akuptukua nuna tíchattajrume” tímiayi.

*Pénker-takachu armia nu
(Mateu 21.33-44; Márkus 12.1-11)*

⁹ Nuyá Jesus ju métek-taku chichamjai aentsun jintintiamiayi:

“Áishman ni ajariin uwa araa amuk, shuaran takartusti tusa ikiukmiai. Tura niñkia wau táchataj tusa jeachat wémai.

¹⁰ Tura júuktin tsawant jeamtai juukman akanak jurumkit tusa takarniurin takau shuariin akuptukmai. Tura takarniurincha katsumkar áyatik awainkiarmai.

¹¹ Nuyá nérentin chíchik takarniurin akupkamai; tura nunasha núnisan katsekar, awatiar, sútsuk akupkarmai.

¹² Nuyá ataksha chikichan akupkamai. Tura nunasha takau shuar katsumkar akupkarmai.’

¹³ ‘Nuyá ukunam ajá nérenniuri “Itiurkatjak, timiai. Winia aneamu uchirun akupkattajai. Nin wáinkiar shiir enentáimtuschartimpiash” timiai.’

¹⁴ ‘Túrasha takau shuar nuna wáinkiar, nuamtak chichainiak “Juka ajá nérenniuri ajastatui. Maatai. Nuikia aja iiniu átatui” tiarmai.

¹⁵ Nuna tuíniak ajanmaya jiki máawarmai.’

Nuyá Jesus aniasmiayi ‘Wats ¿warí enentáimsarum, ajá nérenniuri itiurkat-tawa?’

¹⁶ Niisha taa, nu takau shuáran máawartatui. Tura núnkanka chikichan susattawai” tímiayi.

Nuna anturkar “Yus núnaka tsankatkashti” tiarmiayi.

¹⁷ Tura Jesus nin émamkes ísar tímiayi “¿Nuikia Yus-Papinium áarma nu warintiu? Ju áarmaiti:

Kayan pénkernak jea jeamin “yajauchiiti” tusar ajapawarmia nu ashí kayajai nankaamas pénger apujsamuiti.

¹⁸ Nu kayan tukumainia nuka kupintrattawai. Tura nu kaya shuarnum iniarka nu shuaran tsai tsai awajsattawai. Tu áarmaiti.

*Pariséu achiktai tusar wakeriarmiania nu
(Mateu 21.45-46; 22.15-22; Márkus 12.12-17)*

¹⁹ Israer-patri uuntri tura Israer-shuara jintinniurisha “nu métek-taku chichamjai in túramji” tu nekaawar nuiki Jesusan achikiar emetatai tusar wakeriarmiayi. Tura untsurí shuar Jesusan wakeruiniakui, ashamainiak túracharmiayi.

²⁰ Tura Kapitiánnium suruktai tusar wakeruiniak mamikmau shuaran Jesusan akuptukarmiayi. Nu shuar pénger shuara núnisan jeariar, Jesus nékatsuk yajauch chichakat tusar, aniaataj tusar wearmiayi. Ni chichakmarijiai uuntnum suruktai tusar túrawarmiayi.

²¹ Tu enentáimsar tíarmiayi “Uuntá, ame tuke nekas chicham chichaame, nu nékaji. Aents pátatek íiyatsme, antsu nekas Yusa jinti jintintiame.

²² Wats turuttia, ¿Rúmanmaya uunt akupin ii kuitri akiktin péngerkait? ¿Akiktinkiait? ¿Suritkiatniukait? Nu nekaatai tusar wakeraji” tiarmiayi.

²³ Tura Jesuska ni yajauch enentáimsamurin nekáa chicharainiak,

²⁴ “Kuit itiatarum. ¿Yana yapi tura yana naari jui áarmait?” tímiayi.

Tutai nii tiarmiayi “uunt akupniunu.”

²⁵ Tutai Jesus tímiayi “uunt akupniunu átinia nu uunt akupin susatarum. Tura Yusna átinia nu, Yus susatarum.”

²⁶ Aents ántamunam ni chichakmarijiai achiktinian penké tujinkiararmiayi. Antsu aya ímprarmiayi tura takamtak pujusarmiayi.

*Satuséusha achiktai tusar wakeriarmiania nu
(Mateu 22.23-33; Márkus 12.18-27)*

27 Nuyá Satuséu “jakamunmaya penké nantakchamniaiti” tuinia nu, Jesu-
san aniaistai tusar tariarmiayi.

28 Aniiniak tiarmiayi “Uuntá, Muisáis juna áartampramiai: “Áishman ni nuarí
júreatsain jakamtainkia ni yachi nu wajen nuátkatí, yachin yajutmatratsa.”
Tu áarmaiti, tiarmiayi.

29 Wats, siati yachi áрмаi, tiarmiayi. Iwiairi nuwan nuatak yajutmatsuk
jakamai.

30 Ni yachi wajen akintiak, nuatak, niisha yajutmatsuk jakamai.

31 Nuna yachisha núnisan nu wajen nuátkamai; tura núnisan ashí siati nuna
pataink' nuátkarmai. Yajutmatsuk yajutmatsuk kajinkiarmai.

32 Tura ukunam nuwasha jakamai.

33 Nantaktin tsawantaj, nantakiarmatai, ¿yana nuarin ati? Ashí siati
nuátkacharmaka” tiarmiayi.

34 Tutai Jesus tímiayi “Ju nunkanman uatnaikiatin awai.

35 Tura nantakiar atak iwiaaku ámin ainia nuka uatnaikiachartatui.

36 Warí, jákashtin ániatsuk. Nayaimpinmaya suntara áintsan ajasartatui.
Tura nantakiaru ásar Yusa uchirí ajasartatui.

37 Tura jákaru nantakiartin ainia nuna imia Muisáis jintíamiayi. Warí,
numichiniam ji wajái keamunan Yus niijiai chichaamun, Yus-Papinium
Muisaiska áarmiayi. Nú áarmanum Uunt Yus Apráama, Isaka tura Jakupu
Yúsrinti, tímiayi. Nú áishman yaunchu jákaru ain “ni Yúsrinti” tímiayi. Nuna
taku nantaktin awai tu jintíamiayi.

38 Kame jaka menkakatniunam pujuinia nuna Yúsrinchuiti. Tuma asamtai
jakáa Yúsrinti tíchamniaiti. Antsu iwiaaku ainia nuna Yúsrinti. Ashi Niiniun
iwiaarkainiawai” tímiayi.

39 Nuna antukar Israer-shuara jintinniuri “pénker tame, Uuntá” tiarmiayi.

40 Tura nuyánka aniastinian arantukarmiayi.

¿Kristu tutai yana uchirimpiait?

(Mateu 22.41-46; Márkus 12.35-37)

41 Nuyá Jesus tímiayi “Yus anaikiamu Kristu tutaisha, ¿itiura “Aya Tawit
weeaiti” tárúm?

42 Warí, Sarmu papinium Tawit niniki juna tátsuk:

“Uunt winia Úuntrun “Akupin pujutainium Winia untsuuruini pujustá,
tímiayi.

43 Ame nemasrumin núpeteatsain nuí pujustá” tímiayi.” Tú áarmaiti.

44 Kame Tawitkia, Krístun chicharuk, “winia Úuntur” taisha, ¿itiurak Kristu
tutai Tawitia pampanmarí átinik’?” Tú tímiayi Jesus.

Israer-shuaran jintintin ainia nuyá aneartarum

(Mateu 23.1-36; Márkus 12.38-40; Rúkas 11.37-54)

45 Ashí aents Nin anturkatasa pujuiniaí ni unuiniamurin Jesus juna tímiayi:

46 “Israer-shuaran jintintin ainia nuyá aneartarum. Niisha esaram
pushin entsarar wekasataitsar wakeruiniawai. Tura jintiá ti shiir áujtusarat
tusar wakeruiniawai; tura iruntai jeenam penkeri pujutainium pujustinian
wakeruiniawai. Tura nampernumsha uunt pujutainium pujustaj tusa
wakeruiniawai.

47 Túrasha wajé jeencha atantainiawai. Túrawar aents nekaracharat tusar
ti esaram chichamjai Yúsan áujainiawai. Nincha chíchichjai nankaamas Yus
asutiáwartatui.”

21

*Waje ni kuítrín susamia nu
(Márkus 12.41-44)*

¹ Yusa Uunt Jeen kuítrintin kuit enketainiam kuítian enkeenan Jesus wáinkiamiayi.

² Tura waje kuítríncha jimiará uchich kuítian, reara áaniun, enkean wáinkiamiayi.

³ Wáiniak tímiayi “Nekas tájarme, ju waje kuítrinchatiat, ashí enkeena nú nankaamas núkap enkeayi.

⁴ Warí, chikichcha ampirma nuna enkeenawai. Tura niisha aya núchiniak takurmakman ampirmatsuk ashí enkeayi.”

*Yusa Uunt Jeen saanaktinian Jesus ujakmiania nu
(Mateu 24.1-2; Márkus 13.1-2)*

⁵ Yusa Uunt Jeen kaya shíirmach armia nuna tura chíkich shíirmach susamu armia nunasha chíkich shuar áujmatuk pujuarmiayi. Nuyá Jesus tímiayi:

⁶ “Átum yamá shiir wáintrumna nu ashí emesnartatui. Kaya ekentramusha mash yumpuntrartatui” tímiayi.

*Amuukatin tsawantin uruku átata nu nekaatin
(Mateu 24.3-28; Márkus 13.3-23)*

⁷ Nuyá Jesusan chicharainiak “Uuntá, nusha ¿urutaik túrunat? ¿Kame ju túrunatin jeatemamtaisha warijjain nekaattaj?” tiarmiayi.

⁸ Tutai Jesus tímiayi “Aneartarum; anannawairap. Nekaatarum. Winia náarun pachisar, “wi Krístuitjai” tau ti untsurí jíntrartatui. “Nunka amuukatin jeayi” tu etserkartatui. Tuíniakui anturkarum nemariirap.

⁹ Tura meset chichamsha, kapitían mesetan nájanmasha antukrum sapijmiakairap. Nusha emka túrunatniuiti. Túrasha nú chichamaik amuukatin tsawant jeashtatui.’

¹⁰ Nuyá tuke chicharuk tímiayi ‘Shuar chíkich nunkanmaya shuarjai mesetnum ti nekas maaniawartatui.

¹¹ Ti uurrkattawai; untsurí nunkanam tsukasha, sunkursha ti átatui. Nayaimpinmasha ti ashammai nánkamas túrunattawai. Nujai Yus ni kakarmarín iniakmastatui.’

¹² ‘Tura ju túruntsain atumin pataaturmakar achirmakartatui. Iruntai jeanmasha makurmartai tusar juramkiartatui. Sepunmasha enketmattarme. Tura winia naar páchia asakrumin, akupniunmasha, úuntnumsha juramkiartatui.

¹³ Nuinkia atumin túrutmakrumin wi túramu etserkatin arutmattarme.

¹⁴⁻¹⁵ Tura atumi nemasri nakitramainiak “wáitaiiti” titinian tujinkiarat tusan, winia nekatairjai chichastinian amastatjarme. Tuma asamtai “Jurakuisha warinia tiniak kíishtumaktaj tusan áetak enentáimsashtatjai” titiarum.’

¹⁶ ‘Tura imia atumí aparisha surutmakartatui. Atumí yachisha, atumí shuarisha amikrumsha núnisaran surutmakartatui. Tura máamunka máawartatui.

¹⁷ Tura Winia ajasaru asakrumin ashí aents nakitramprartatui.

¹⁸ Tura penké ishichkisha yajauch awajtamsachartatui.

¹⁹ Katsuntrarmeka iwiaaku átin wáinkiattarme.’

²⁰ ‘Ju pepru Jerusarénka aa tanishriin suntar téntakar matsatu wáinkiumeka, emesratin jeá nekaattarme.

²¹ Nuikia juí Jutía nunkanam pujuinia nu, náinnium pisartin áiniawai; tura juí Jerusarénum pujuinia nusha juyañka jiinki wétin ainiawai. Tura ajanam pujuinia nusha, péprunam waketkishtin áiniawai.

²² Nu tsawantincha Yus asutiámun wáinkiertatui. Yús-Papinium nu túrunatin yaunchu aarma nu uminkiattawai nu tsawantin.

²³ Nunkanam ti wáitsatin átatui. Tura ju aents ti asutniawartatui. Tuma asamtai nuwá ajamtin ainia nusha, tura uchi kuírchin takakainia nusha imiá itiurchatan wáinkiertatui.

²⁴ Tura juyá aents mesetnum jákartatui. Tura chikichnaka ashí nunkanam misaawar júkíartatui; tura yajaya apach, Yúsnan enentáimtuiniatsna nu, juí Jerusarénum wayawar najakartatui. Nu túratniunka Yus tsan^ñkatkana nu^ñ túrawartatui.

Aents Ajasu tutai tátintri

(Mateu 24.29-35, 42-44; Márkus 13.24-37)

²⁵ ‘Nuiñkia etsanmasha, nantunmasha, yáanmasha Yuska ni kakarmarín iniakmak nusháa túrattawai. Nunkanmasha ashí aents páchim enentáimprartatui. Tura nayaantsanam chíchimi ti aku tantáa ajakui ti ashamkartatui.

²⁶ Tura túrunatin ana nuna enentáimsar mayái ashinkiertatui. Warí, nayaimpiniam kakaram ainia nusha peantrartatui.

²⁷ Nuyá Winia, Aents Ajasu tutain, yurañminiam ti shiir ajasan winiaí wáitkíartatui.

²⁸ Nu túrunatin nánkamkui uwempratin jeatemayi tusarum kakaarum shiir enentáimsatarum.’

²⁹ Tura ju chichamnasha nekapmamiayi. ‘Ikiu numi tura nánkamas numisha enentáimsatarum.

³⁰ Ju nunkanam ni nuké yama pun^ñkakmatai “esat jeatemayi” tát^ñsurmek.

³¹ Núnisan Wi tájana nu wáinkíurmeka, Wi ju nunkanam akupin ajastin jeatema nu nekaatarum.’

³² ‘Tura aents yamaí pujuinia nu jáatsain nusha ashí túrunattawai. Núnaka paant tájarne.

³³ Nayaimpisha nun^ñkasha amuukartatui. Tura winia chichampruka amuukachminiaiti.

³⁴⁻³⁵ Nu tsawant aya aneachma jeattawai. Ashí aents ju nunkanam pujuinia nu, nuna enentáimtsuk pujuiniaí jeattawai. Tuma asamtai atumsha anearum wekasatarum. Yajauchiniam emetnarum, aya yurumátniuk, aya umartiniak enentáimtusurum, ju nunkanam ana nu ti wakerakrumniñkia péñker enentáimsatin tujinkíattarme. Nu atsutí tusarum tura nu tsawant aya áwaktamkají tusarum péñker wekasatarum.

³⁶ Anearum wekasatarum. Túrunattana nu^ñ katsuntrataj tusarum Yus aujsa pujustarum. Túrarum Aents Ajasu tutai íimmianum péñker átaj tusarum túratarum.”

³⁷ Tuke tsawant tsawaísha Yusa Uunt Jeen Jesus unuiniamiayi. Tura káshikia Uriwiu náinnium we-wémiayi.

³⁸ Tura tuke tsawant Yusa Uunt Jeen Jesus chichaamun anturkatai tusar káshik tariarmiayi.

22

Jesus achiktin chichaman jurusarmiania nu

(Mateu 26.1-5, 14-16; Márkus 14.1-2, 10-11; Juan 11.45-53)

¹ Wakaprutai en^ñketaachma tanta yuatin námper, paskua tutai, jeatemamiayi.

² Israer-shuara Pátririshá Israer-shuara jintinniurishá áentsun ashamainia ásar, itiurak máawaintiajⁱ tusar ti enentáimsarmiayi.

³ Nuin^hkia Iskariúti Jútsan enentáin íwianch wáintiamiayi. Nú Jútaska Jesusa unuiniamuriⁱⁿ páchitkiauyayi.

⁴ Israer-patri úuntrⁱⁿ tura Yusa Uunt Jee kapitián pujuarmia nuna werimiayi. Tura Jesusan tu surukminiaiti tusa niijiaⁱ chichasarmiayi.

⁵ Niisha nuna antukar warasar “kuit amastatji” Jútsan tiarmiayi.

⁶ Niisha “ayu” tinia, aents nékachmanum suruktaj tu enentáimsamiayi.

Kristu jakamu enentáimtustin námper

(Mateu 26.17-29; Márkus 14.12-25; Juan 13.21-30; 1 Kurintiunam 11.23-26)

⁷ Wats, wakaprutai enketaachma tanta yúatin námper jeamiayi. Paskua tutainium murikchin máatin ármiai.

⁸ Tura Jesus Pitruncha, Juánⁿnasha akupeak “Paskua tutai námper iwiaratarum” tímiayi.

⁹ Tutai niisha chichainiak “¿Tu^í iwiarat tusamea wakeram?” tiarmiayi.

¹⁰ Tutai Jesus juna tímiayi “Péprunam wetarum. Jearum áishmaⁿ yumin takaku wekáa wáinkiatarme. Nú áishmaⁿ nemarsatarum. Tura jeá waya^aakui,

¹¹ nú jeá nérenniurⁱ chichareakrum “Uunt chichartamuk unuiniamurj^ai paskua yurumátin ¿tuⁱ aa? turamui” titiarum, tímiayi.

¹² Tákurmin nu nérentin yakí písunam uunt kuártun ashí iwiamun iniak-turmastatrum. Nuⁱ ii yurumátin iwiaratarum” tímiayi.

¹³ Tutai niisha wear Jesus tímiania tímiatrusaⁿ wáinkiararmiayi. Tura paskua namperan nuⁱ iwiararmiayi.

¹⁴ Yurumátin jeantai ni unuiniamurij^ai Jesus misanam pujusarmiayi.

¹⁵ Pujusarmatai, Jesus chichaak “Wisha játsuk atumj^ai ju paskua najanatniun ti wakerimjai,

¹⁶ atakka ju nunⁿkanam atumj^ai najanashtin asan. Tura antsu Yus akupeana nuⁱ jear atak najanattaji” tímiayi.

¹⁷ Nuyá piniⁿkian achik, Yúsⁿ yuminkias, ni unuiniamurⁱⁿ tímiayi “Ju piniⁿ achikrum sunaisatarum.

¹⁸ Atakka ju nunⁿkanam uwa yumirⁱⁿ atumj^ai umarchattajai, tajarme. Tura antsu Yus akupin ajastin jeantai atak iij^ai umartatji” tímiayi.

¹⁹ Nuyasha yurumkan achik, Yúsⁿ yuminkias puuk susarmiayi. Tura chicharainiak “Juka winia ayashruti. Winia ayashur atum péⁿker pujustinium surunkattana núiti. Winia enentáimtursarum yuatarum” tímiayi.

²⁰ Tura yurumsua amikiarmatai piniⁿkian achik, “Ju piniⁿ winia numparun nakumea asa uwempratin yamaram chicham najanamun nakumeawai. Winia numpar atumnian puartamprattawai” tímiayi.

²¹ Tú^rrasha winia surutkattana nu Wij^ai métek ju misanam pujawai.

²² Kame Wi, Aents Ajasuitjiana ju, Yus iwiamua nútiksanak jakattajai. Tú^rrasha Winia surutkana nu nekaatí. Ti asutniattawai” tímiayi.

²³ Nuna antukar “Wíashitiaj, yákit” tunaim ajarmiayi.

Nanⁿkaamantu ana nu

²⁴ “¿Iij^ai yaki imiá nanⁿkaamantu aint?” tunaim ajarmiayi.

²⁵ Tura Jesus tímiayi “Ju nunⁿkanam akupin ainia nu, waantu enentáimtumasar akupenawai. Tura akupenakui “péⁿker tú^rin áiniawai” tu^íniawai.

²⁶ Tura atumj^ainkia nuka atsutí. Antsu nanⁿkaamantu ana nu, uchichia núnik ajastiniaiti; akupeana nusha takarniua núnik ajastiniaiti.

27 Enentáimsatarum. Misanam pujus yurumna nu, yurumkan ajamana nujai ¿tuá imiá nekas nankaamantuit? ¿Yurumna nu nekas nankaamantuchukait? Tura Wisha atumin yurumkan ajamna núnisnak pujajai.'

28 'Winia itiurchatrun wáinmiaj nuí atumsha Wijiai tuke pujumarme.

29 Tuma asakrumin akupin ajastinian winia Apar surusu asamtai Wisha nútiksanak akupkatniun súajrume. Wi akupkatjana nuí atumsha Wijiai yurumáttarme, tura Wijiai umartatrume, tájarme.

30 Tura akupin pujutainium pujusrum, Israer-shuar tuse írutkamu akupkat-tarme tajai." Tu tímiayi.

*Pítiur "atsá nékatsjai" títinian Jesus ujakmiania nu
(Mateu 26.31-35; Márkus 14.27-31; Juan 13.36-38)*

31 Nuyá Uunt Jesus tímiayi, "Nekaata, Semunká. Trikiu neré tsatsamátniua áintsan Satanás atumi enentáin páchim enentáimtikramprataj tusa seayi.

32 Tuma aiñ Yus enentáimtustinian kajinmatkiñ tusan Wisha Yúsan seamjai. Tura Yúsnun waketkim ame yatsum ikiakárarta" tímiayi.

33 Tutai Semun tímiayi "Uuntá, sepunam enketmainiakuisha wisha ne-marsatajme. Tura mantamainiakuisha métek jakatjai" tímiayi.

34 Tutai Jesus tímiayi "Pitru, nekas tájame, yamaik atash shiniatsañ ame menaintiú natsantrurtatme" tímiayi.

Itiurchat winiawai

35 Nuyá Jesus tímiayi "Wisha yurumkajainchu, kuítjainchu, sapatjainchu akupkamjarmena nuí ¿táatramsamkarum?"

Niisha "Atsá penké táatramsachmaji" tiarmiayi.

36 Tutai Nii tímiayi "Antsu yamaikia yurumkan takakkunka takustí, kuítniasha núnisan; tura puniancha takakchakka ni pushirín suruk punian sumakti.

37 Nekaatarum. Yus-Papinium yaunchu aarma ana nu wi túrunamujai uminkiattawai. Juiti aarma:

Yajauch shuarnum pachikiarmiayi.

Warí, Yus-Papinium ashí Winia aarma ana nu uminkiatniuiti."

38 Tutai ni unuiniamurí tiarmiayi "Uuntá, jui jimiará puniá awai."

Tutai Niisha "Asati" tímiayi.

*Jitsemaní ajanam Jesus Yúsan áujsamiania nu
(Mateu 26.36-46; Márkus 14.32-42)*

39 Nuyá Jesus jíinkimiayi. Tura tuke túrin asa Uriwiu náinnium wémiayi. Ni unuiniamurísha nemariarmiayi.

40 Ai jeá nin chicharuk "Itiurchat winiakui iniaraj tusarum Yus áujsataram" tímiayi.

41 Tuasua amik arantach, kaya nankimiam jeana núnik Jesus wémiayi. Tura Yúsan áujsatat tusa tikishmarmiayi.

42 Tikishmar juna tímiayi "Apawá, pininnum yapá umartinia ántsan Wi wáitsattajna nu wakerakmeka jurutkitia. Tura Wi wakerajna nucha antsu Ame wakeramna nu atí, tajai" tímiayi.

43 Nuyá, ikiakártaj tusa Yusa suntari nayaimpinmaya tarimiayi.

44 Tura Jesus imiá wáitias pujak nú kakaram Yúsan áujsamiai. Tura ni searmarísha numpá ántsan nunká kitiawarmiayi.

45 Yúsan aujsua amik wajaki ni unuiniamurín werimiayi. Tura kúntuts enentáimmiaríjiai ti pimpiki kanúu tepenan tarimiayi.

⁴⁶ Nuinkia chicharainiak “¿Urukamtai kanúu teparum? Itiurchat winiakui iniaraj̄ tusarum nantakrum Yus áujsatarum’ tímiayi.

Jesusan achikiarmiania nu

(*Mateu 26.47-56; Márkus 14.43-50; Juan 18.2-11*)

⁴⁷ Jesus tuke chichaa pujaj̄, untsurí shuar táarmiayi. Tura nuní eemka Jesusa unuiniamurí Jútas naartin winimiayi. Tura Jesusan mukunatajtsa tarunmiayi.

⁴⁸ Támatai Jesus chicharuk “Jútasá, ¿Aents Ajasu tutai mukunamek surutkat-tam?” tímiayi.

⁴⁹ Jesusjaj̄ pujuarmia nu, túmamun wáinkiar “¿Uunt puniajaj̄ íjuuartatjik?” tiarmiayi.

⁵⁰ Tura chikichik Patri uuntri takarniurí kuishin untsuurin tsupirkamiayi.

⁵¹ Tura Jesus tímiayi “Iniaisatarum.” Nuna tinia ni kuishin antin tsuarmiayi.

⁵² Nuyá Israer-patri úuntrin, Yus-jea úuntrincha, tura pepru úuntrincha, Nin achiktaj tusa tariarmia nuna chicharuk “¿Wisha kasakaítiaj. Urukamtai puniajaisha numijiaisha tarutniuram?”

⁵³ Nuik Yusa Uunt Jeen tuke tsawant atumjaj̄ pujumaj̄ nu achirkach-marme. Túrasha átum kiritniumia kakarmajaj̄ nupetkatin yamá tsawantin tsankatkamuitrume” tímiayi Jesus.

Pítiur “Jesunaka nékatsjai” tímiania nu

(*Mateu 26.57-58, 69-75; Márkus 14.53-54, 66-72; Juan 18.12-18, 25-27*)

⁵⁴ Nuinkia Jesusan achikiar emetawar Israer-patri uuntri jeen júkiarmiayi. Tura Pítrusha íkian nemarki wémiayi.

⁵⁵ Tura aach jinia ikiapáramiayi. Túrawar anamuk pujuarmiayi. Pítrusha niijaj̄ pujusmiayi.

⁵⁶ Tura nuwa, Patri takarniurí amia nu, Pítiur jinia anamuk pujan wáiniak “Ju áishmansha Niijaj̄ pujumiayi” tímiayi.

⁵⁷ Tutai Pítiur chichaak “Nuwá, Nin nékatsjai” tímiayi.

⁵⁸ Tura árusan chikich nin wáiniak “Amesha Niin páchitkaiatme” tímiayi.

Tutai Pítiur tímiayi “Atsá. Wikia áinkia páchitkiatsjai” tímiayi.

⁵⁹ Chikichik ura nankaasmatai chikich apach chichaak “Nekas ju áishmansha Niijaj̄ pujumiayi. Warí, niisha Kariréanmayanchakait” tímiayi.

⁶⁰ Tutai Pítiur chichaak “Ame támena núnaka nékatsjai” tímiayi. Nú chichamaik Pítiur chicháa pujaink̄ atash shiniukmiayi.

⁶¹ Tura nuinkia Uunt Jesus Pítrun apajas íismiayi. Túra “atah shiniatsain ame menaintiu natsantrurtatme” Uunt Jesus timia nuna enentáimpramiayi.

⁶² Nuyá Pítiur jiinki ti útmiayi.

Jesusan wishikrarmiayi

(*Mateu 26.67-68; Márkus 14.65*)

⁶³ Áishman Jesusan wáiniarmiania nu ti wishikiainiak awattiararmiayi.

⁶⁴ Jiin epetkar yapiniam awattiar chicharainiak “Nekamata, ya awatama” tiarmiayi.

⁶⁵ Tura katsekainiak ti untsurí chikichnasha nánkamas tiarmiayi.

Uunt Iruntainiam Jesusan ejeniarmiania nu

(*Mateu 26.59-66; Márkus 14.55-64; Juan 18.19-24*)

⁶⁶ Tsawarmatai, Israer-shuara úuntrisha, Israer-patri úuntrisha, Israer-shuara jintinniurisha iruntrar ni iruntairiin ejeniarmiayi. Nu chicharainiak

⁶⁷ “Paant titiá. ¿Yus anaikiamu Kristu tutaia núkaiatme?” tiarmiayi.

Tutai Jesus tímiayi “Wi “ee” tákuisha, “nekasaiti” tíchattarme.

⁶⁸ Tura Wi aníamsha áirkashtatrome, túrasha akuptukchattarme.

⁶⁹ Tura wárik Wisha Aents Ajasuitjiana nu, ashí nan̄kaamaku ajasan, Yusa untsuurin̄i pujustatjai” tímiayi.

⁷⁰ Tutai niisha tiarmiayi “¿Nuiñkia amesha Yusa Uchirínkaitiam?”

Tutai Jesus tímiayi “Ee, Wítjai, átum Winia túrutrum núnisnak.”

⁷¹ Tutai niisha tiarmiayi “Warí, ¿iisha chíkich ujatkat tusar atsumajik? Imia niñki chichaamu antukchajik” tiarmiayi.

23

Piratuí Jesusan júkiarmiania nu

(Mateu 27.1-2, 11-14; Márkus 15.1-5; Juan 18.28-38)

¹ Nuyá ashí Uunt iruntrarmia nu wajatkiar Rúmanmaya akupin Piratuí Jesusan júkiarmiayi.

² Nui jeawar, Piratun chicharainiak “Ju áishman íi shuaran awajimtikiar enentáimtikiania nu nekaamji. Rúmanmaya uunt akupin Sésaran kuit akik-tinian suritramaji. Tura nu arant Niñki, akupin Kristu tutaintjai, tawai” tiarmiayi.

³ Tutai Piratu Jesusan chicharuk “¿Ame Israer-shuara akupniurínkaitiam?” tímiayi.

Tutai Jesus tímiayi “Ee, núitjai, ame támena núnisnak.”

⁴ Nuyá Israer-patri úuntrincha tura aents nui iruntrarmia nunasha Piratu chicharainiak “Ju áishman tunaan túran penké wáinkichuitjai, tajai” tímiayi.

⁵ Túrasha niisha nú kakantar chicharainiak “Antsu nekas ashí Jutía nunkanmaya aentsun ni unuiniana nujai akajenawai. Kariréa nunkanmaya nan̄kaamas ímiajajisha tayi” tímiayi.

⁶ Piratusha nuna antuk “Nu áishman ¿Kariréanmayan̄kait?” tímiayi.

⁷ “Ee” tuiniakui, Erutisan akuptukarmiayi. Erutiska Kariréanmaya aentsun akupniuyayi. Túmaitiat nu tsawantin Jerusarénum ishichik tsawant pujus-miayi.

⁸ Erutiska Jesusan íistaj tusa ti wakerimiayi. Jesusa túramurín áujmatman ti antukmiayi. Tuma asa, “Wi íimiai aents tujintiamun túrashtimpiash” tusa Jesusan wáiniak warasmiayi.

⁹ Jesusan ti nukap aniasmiayi; túramsha penké áimkiachmiayi.

¹⁰ Nui sha Israer-patri úuntrisha, tura Israer-shuara jintinniurisha ya-jauchiiti tusar charaatum awajiarimiayi.

¹¹ Tura Erutissha ni suntaríjiai Jesusan yajauch enentáimtuiniak Nin wishikiainiak ti penker pushin, akupniu entsatairíya ánniun, áentsrarmiayi. Nuyasha Erutis ataksha Piratuín akupkamiayi.

¹² Túram nu tsawant Piratu Erutisjai nawamnaikiarmiayi. Kame yáunchuka nemasnaikiau ármiai.

Jesusan “mantamnati” tiarmiania nu

(Mateu 27.15-26; Márkus 15.6-15; Juan 18.39-19.16)

¹³ Nuyá Israer-patri úuntrin aentsu úuntríjiai tura penké aentsjai Piratu ikiaanak tímiayi

¹⁴ “Ju áishman aentsu awajimtikui tusarum itiartintrume. Túrasha átum íimprumniñ anintrusan yajauch átum tárugna nuna penké nekarachjai.

¹⁵ Erutissha núnisan yajauchin nekaachai. Warí, jui awainkíchimaka. Nuikia páantchakait jú áishman jakamnia tunaanka túrichuiti” tímiayi.

16-17 Túraitiat tuke túrutai asamtai, jísat jeakui sepunmaya chikichík áishmaṅkan Piratu ankant akupkatin ámiayi. Tuma asamtai, nii chichaak “juna asutián awematjai” tímiayi.

18 Tura aencha iruntrar ti unsumainiak “Atsá; jucha. Ju nakitiaji. Antsu Parapás akupkata” tiarmiayi.

19 Nu Parapássha akupniun nakitiak mesetan najana asa tura maṅkartin asa sepunam enkeamuyayi.

20 Piratuka Jesusan akupkattsa wakerak ataksha aentsun áujsarmiayi.

21 Túrasha nú arant unsumainiak “Atsá. Krúsnum mantamnati” tiarmiayi.

22 Tura ataksha Piratu chicharainiak “¿Urukamtai. Warí tunaan túrait? Jakamnia tunaan túrachias tusan, aniasan penké nekarachjai. Asutián akupkatjai” tímiayi.

23 Tura niisha kakaram unsumainiak “Jesus mantamnati” tiarmiayi. Kame aencha tura Patri úntrisha ti unsumaina ásarmatai ni wakeramurj tsan̄katnakarmiayi.

24 Nii wakeriarmia nuna Piratu “túrattajai” tímiayi.

25 Tuma asa Parapásan, mesetan najanin tura maṅkartin amia nuna akupkamiayi. Tura Jesusnaka ni wakeramun túrawarti tusa íktusarmiayi.

Jesusan krúsnum ajintrurarmiania nu

(Mateu 27.32-44; Márkus 15.21-32; Juan 19.17-27)

26 Jesusan jukitiasa pujuiniaj Serini nunkanmaya Semun ni pépruriya Jerusarénum yama jeamiayi. Nin achikiar, Jesusa krusrj ayantkar “ni ukurj wetá” tiarmiayi.

27 Untsurj aents Jesusan nemariarmiayi. Tura untsurj nuwasha ti kuntuts enentáimiainiak úutkiar tura wa-wa ajakiar wearmiayi.

28 Túmainiakui Jesus nin iis, “Jerusarénumia nuwätiram Winia enentáimtursarum úuttiirap. Antsu atumniak tura atumj uchirj enentáimtusarum úuttiarum.

29 Warí, ti iturchat tsawant jeawartatui. Tuma asamtai “Uchirtichu ainia nu, ajaprukchana nu tura amuntsachu ainia nu, chikich aentsjai nan̄kaamas penker pujuiniawai” tiartatui.

30 Nu tsawantaj aents chicharainiak “Náint in nekentmak yuturmaartai” tiartatui.

31 Warí, numi sameka áinis yajauch aya náṅkamna ajnsha ju itiurchat átsuk. Tura numi kukaru ainkiamtai itiurak nú yajauch túrunachatⁱ. Tu timiayi Jesus.

32 Tura Jesusjai krúsnum maatai tusar jímiar yajauch áishmaṅkan júkiarmiayi.

33 Karawír nain tutainium jeawar Jesusan krúsnum ajintrurarmiayi. Tura Jesusa untsurinj chikichík yajauch áishmaṅkan tura ni menaarinj chikich yajauch áishmaṅkan núnisaṅ krúsnum ajintrurarmiayi.

34 Tura Jesus krúsnum ajintraku pujoram, chichaak “Apawá, tsan̄kurarta. Nii áitkiainia nuna nékainiatsui” tímiayi.

Tura suntar pujuarmiania nu, yaki Jesusa pushirj jukit tusar nakurusarmiayi.

35 Péprunmaya aents ii wajatiarmiayi. Tura uunt armia nusha Nin wishikiainiak “Chikichnaka uwemtikniuiti. Wats, yamá nekas Yusa anaikiamurj Kristu tútainkiun̄ka imia Niṅki uwémpratí” tiarmiayi.

36 Suntarsha Nin wishikrarmiayi. Tariar churuínian aartai tusar awajjarmiayi.

37 Tura chicharainiak “Amesha nekas Israer-shuara uunt akupniurinkiumka amek uwemprata” tiarmiayi.

38 Tura muuknumaani, Kriaku chichamjaj, Rúmanmaya apach chichamjaisha tura Israer chichamjaisha ju áarar anujkamu ámiayi: *JÚITI ISRAER-SHÚARA UUNT AKUPIN*

39 Chikichík yajauch áishman nuj ajintruamu amia nu kátsekeak chicharuk “Amesha nekas Yusa anaikiamurintkiumka amek uwemprata tura incha uwemtikramprata” tímiayi.

40 Tura chíkich ni tsaniakmarin kakantar chicharuk “¿Amesha Niijaj métek asutniátasa pujayatam, Yus ashamatsmek? tímiayi.

41 Iikia yajauch asar wáitsatniuitji; ii tunaari akikmakur wáitijai. Antsu ju áishmanka yajauchin túrichuiti” tímiayi.

42 Nuyá Jesusan chicharuk “Amesha akupin ajasam winiasha enentáimtursata” tímiayi.

43 Tutai Jesus chicharuk “Nekas tájame, jakar shiir pujutainium yamáí tsawant Wijjaj pujustatme” tímiayi.

Jesusa jakamuri

(Mateu 27.45-56; Márkus 15.33-41; Juan 19.28-30)

44 Tutupin aj ashí nunkanam ti kirit ajasmiayi. Tura menaintiú ura nankaamasu ain, nantu nunkaach ajassha tuke kirit ámiayi.

45 Tsawái nantusha mushatmarmiayi. Tura Jerusarennum Yusa Uunt Jeencha tarach ajamu aa jímiapetek nakaakamiayi.

46 Nuyá Jesus untsukum “Apawá, winia wakantrun Amiin ikiuajai” tímiayi. Nuna tinia jakamiayi.

47 Suntara kapitiantri nu túrunamun wániak, Yusa náarin shiir awajeak “Jusha imiá nekas péñker áishmankuyi” tímiayi.

48 Tura untsurí aents pujuarmia nu, nu túrunamun wáinkiar ti kuntuts enentáimiainiak ni netsepen paat awatiar waketkiarmiayi.

49 Tura Jesusa amikrisha tura nuwá Kariréanmaya Nin nemariarmia nusha íkian wajasar ii wajarmiayi.

Jesusan iwiarsarmiania nu

(Mateu 27.57-61; Márkus 15.42-47; Juan 19.38-42)

50 Naka enentáimin péñker áishman ámiayi ni naari Jusé. Arimatéa pepru Jutía núnkanam ana nuyayuyayi. Israer-shuara Uunt Iruntairin páchitkiauyayi.

51 Yus ju nunkanam akupin ajasat tusa Jusé nakas pujumiayi. Tuma asa Uunt Iruntainium Jesusan túrawarmia nuna nakitmiayi.

52 Tuma asamtai Piratuí we Jesusa ayashin seamiayi.

53 Piratu “ayu” takui, Jesusa ayashin krúsnumia jusa tarachjai penuar kaya táurmanum iwiarsamiayi. Nu táurmanum chíkich iwiarsachmauyayi.

54 Iwiaratin tsawantaj, ayampratin tsawant tsawastatuk ajasmatai túrunamiayi.

55 Tura nuwá Kariréanmaya jukiniutak Jesusan nemarsarmia nusha iwiarsamunam weriar, Jesusa ayashi itieur ikiusmait nuna iisarmiayi.

56 Iisar ikiuak ni jeen waketkiarmiayi. Tura Jesusa ayashi mejeenin tusar kunkuinian iwiararmiayi. Tura ayampratin tsawantaj, Israer-shuar akupkamun umikiar ayamprarmiayi.

24

Jesus nantakmiania nu

(Mateu 28.1-10; Márkus 16.1-8; Juan 20.1-10)

1 Tumintin káshik kunkuinian iwiaramun júkiar nu nuwá Jesus iwiarsamunam weriararmiayi. Tura chíkich nuwasha atampriarmiayi.

2 Tura iwiarsamu kaya atutkamu urani aan wáinkiar^{miayi}.

3 Tura wayawar uunt Jesusa ayashin wáinkiachar^{miayi}.

4 Wáinkiachu ásar ashamkarmia^{yi}. Tura “itiurkatjik” tiarmi^{ayi}. Tumaj jimi-ará áishmankan pushin wincharpatniun entsaru nin ayaamach wajainian wáinkiar^{miayi}.

5 Nuna wáinkiar ti sapijmiainiak tsuntsumawarmia^{yi}. Túmakui nu áishman chicharainiak “¿Iwiaakusha urukantai jakaanumsha earum? tiarmi^{ayi}.”

6 Jui pujatsui. Antsu nantakni. Nékatsumek. Niisha Kariréanam tuke pujus

7 “Wi, Aents Ajasuitjana nu, yajauch aentsnum surunkattajai. Túran krúsnum mantamnattajai. Tura menaintiú tsawantaj nantaktiatjai” turamchamkarum” tími^{ayi}.

8 Nuna takui Jesus timian enentáimprarmia^{yi}.

9 Tura iwiarsamunmayá waketki taar, Jesusa unuiniamurin auntse armia nuna tura chikichnasha ashí nu túrunamun ujakarmia^{yi}.

10 Jesusa unuiniamurin ujakarmia nu ju ániawai: Maktaranmayá Marí, Juánasha, Jakupu nukurí Marisha, tura chíkich nuwajai.

11 Tura Jesusa unuiniamurisha nuwá tuíniakuisha nekasaiti tu enentáimtsuk “wáuruk tuíniawai” tiarmi^{ayi}.

12 Túrasha Pítrusha jiinki Jesus iwiarsamunam tsékenki werimi^{ayi}. Jeá, init iis, aya tárachik tepenan wáinkiamia^{yi}. Tura túrunamia nuna ti enentáimiar ni jeen waketkimi^{ayi}.

*Emaús wetai jintianmaani túrunamia nu
(Márkus 16.12-13)*

13 Nu tsawantajk Jesusa nemarniuri jímjar Emaús péprunam wéarmi^{ayi}. Emaúska Jerusarénumia auntse kirumitru jeá pujawai.

14 Túrunamia nuna chichaki wearmi^{ayi}.

15 “Itiurkit” tu aujmatki weenaj imia Jesus taa nu páchiniak niijjai wearmi^{ayi}.

16 Tura wáinkiar^{iat} nekaashtin asantai yait nekaacharmia^{yi}.

17 We-wénakua Jesus chicharainiak “Jintiasha ¿warí áujmatkirum wéarum? ¿Urukantai kúntuts enentáimprum?” tími^{ayi}.

18 Chikichik, Kreupas náartin chicharuk “Jerusarénum túruna nuna ashí nékainiawai. ¿Ámeke amekék túrunamia nu nékachu páchitkiam?” tími^{ayi}.

19 Tutai Jesus tími^{ayi} “¿Warí urukait?”

Tutai tiarmi^{ayi} “Entá, Nasarénumia Jesusa túrunamuri taji. Niisha Yúsnan etserin asa Yusa kakarmarijia^{yi} chichasmia^{yi} tura nuna kakarmarijia^{yi} takasmia^{yi}. Núnaka ashí aents nékainiawai.

20 Tura ii Pátriri uuntri tura ii pépruri uuntri “tunáa jakamnia túrayi” tusar “krúsnum mantamnati” tiarmi^{ayi}.

21 Tura ii Israer-aentstin uwentikrampratin tu enentáimsamji. Tura ni maamusha menaintiú tsawant nankaamasai.

22-23 Túrasha ii nuwá ni iwiarsamunam yamaí káshik weriar ni ayashin wáinkiacharmai. Tura “Yusa suntari wáinkiaji tura “Jesus iwiaakuiti” túramji” tiarmai. Nuna tu ujatmakakrin ti enentáimpraji.

24 Nuyá íi shuar iwiarsamun weriar, nuwá tiarmia tímiatrusan wáinkiar^{miayi}. Tura Jesusnaka wáinkiacharmai.” Tu ujakarmai Jesusan.

25 Nuyá Jesus nin chicharainiak “Enentáimchaitrume. Ashí Yúsnan etserin tiarmia nu wau enentáimtatsrume.

26 ¿Yusa anaikiamuri, Kristu tutai, shiir awajnatsuk ti wáitsashtinkiait?” tími^{ayi}.

27 Tura nuyá Yus-Papinium Muisáis aarmia nuyá jukin ashí Yúsnan etserin ni túrunatniurin áararmia nuna jintintiatasa nan̄kamamiayi.

28 Ayu, nii wearmia nú peprunam jeawarmiayi. Tura Jesuska nuj nan̄kaamaki wétaj tau ajamiayi.

29 Tura niisha chicharainiak “Weep. Iijiai pujustá. Warí, nantu akaikiyi, kirit ajatemsai” tiarmiayi.

Tutai Jesus niijiai pujustaj tusa wayamiayi.

30 Tura niijiai irunar misanam pujus, yurumkan achik, Yúsan yuminkias nincha puuk súsarmiayi.

31 Nu chichamaik, ni jii urannia núnikiarmatai Jesusan nekaawarmiayi. Tura Niisha nú chichamaik men̄kakamiayi.

32 Tura nu shuarsha mai tunai ajainiak “Jintia winis Niisha Yus-Papin jintinramuk nekas ii enentáin shiir enentáimtikramprachmakaj” tiarmiayi.

33 Nuyá, Emaúsnumia wárik jíinkiar Jerusarénnum waketkiarmiayi. Nuj Jesusa unuiniamurin auntse armia nuna tura chíkich shuar Jesusan nemari-armia nunasha iruntrar pujuinian wáinkiararmiayi.

34 Auntse armia nusha tiarmiayi “Uunt Jesus nekas nantakni. Semun Nin wáinkiaiti.”

35 Tutai niisha jintiá túrunamun ujakarmiayi. “Jesus yurumkan ajaamakui nuj nekaamji” tiarmiayi.

*Ni unuiniamurin Jesus wantintiukmiania nu
(Mateu 28.16-20; Márkus 16.14-18; Juan 20.19-23)*

36 Nuna áujmatuk pujuiniai Jesus aya aneachma ajapén wajas “Shiir enentáimsatarum” tímiayi.

37 Nuna antukar, ti sapijmiakar, wakanchashit, enentáimsarmiayi.

38 Tura Jesus chicharainiak “¿Urukantai sapijmiakrum wakanchashit, tu enentáimsarum?”

39 Winia uwejrusha, nawersha írtustarum. Wíkiitjai. Takarsa írsatarum. Warí, wakancha ayashtinkiait, ukunchtinkiait” tímiayi.

40 Nuna tinia ni uwejéncha nawéncha iniaktusarmiayi.

41 Warainiayat sapijmiainia ásar, Niimpiashit tu enentáimtusarmiayi. Tuma asamtai, nin chicharainiak “¿yurumak takakrumek?” tímiayi.

42 Takui, namaknasha, míshkincha súsarmiayi.

43 Tura Jesus nuna achik niisha ímiainiamunman yuamiayi.

44 Tura nin tiarmiayi “Winia túrutawarma nuna, Wi atumjai nuik pujusan tímiajrum. Nekas uminkiatniuyayi. Iis, wi túrunatniurun Muisáis aarmia nusha, Yúsnan etserin aarmia nusha, tura Sarmu papinium aarma ana nusha ashí uminkiatniuyayi” tímiayi.

45 Nuyá Yus-Papinium aarman jintintiawarmiayi.

46 Jintintiuk juna tímiayi: “Yusa anaikiamurj Kristu tutai jaka menaintiú tsawantaj jakamunmaya nantaktinia nu yáunchuk áarmauyayi. Tura Wi nú Krístuchukaitaj.

47 Winia náarun pachisar, Jerusarénnumia nan̄kama ashí nun̄kanam nu chicham etsernaktinia nu áarmauyayi. Shuar ni tunaari tsan̄kurnarat tusar enentáin yapajiátniuiti. Tura tu etserkatniua nusha yaunchu áarmauyayi.

48 Tura wi túrunamu neka asarum etserkatniuitrume, tímiayi.

49 Tura winia Apar, winia Wakantrun susartatjai, turammarumna nuna akuptuktatjarume. Tura nayaimpinmaya táatsain jui Jerusarén péprunam pujústárum. Taa ni kakarmarin suramsattarme.” Tu tímiayi.

Jesus nayaimpiniam wakamiania nu
(Márkus 16.19-20)

⁵⁰ Nuyá Jesus Jerusarén péprunmaya júkiar Petania péprunam ejeniarmiayi. Tura nuí ni uweje takuí, “Yus yáinmakarti” tímiayi.

⁵¹ Nuna tu pujus, niya kanakmiayi. Tura nayaimpiniam junakmiayi.

⁵² Ni unuiniamurisha Nin imiá shiir enentáimtusarmiayi. Tura nuyá ti warasar Jerusarénnum waketkiarmiayi.

⁵³ Tura Yusa Uunt Jeen pujusar Yusa náarin shiir awajú pujuarmiayi. Áukete.

Yúsan Shiir Chichamen JUAN aarmia nu

Chícham aents ajasmiania nu

¹ Ashí nan̄kamamia nú yaunchu Yusa Uchirí tuke pujuyayi. Niisha Yúsan ti paant awajeakui, Chícham tíminiaiti. Chichamsha Yusjaj̄i pujuyayi. Chichamsha Yúsauyayi.

² Yáman̄kamtaik Niisha pujuyayi Yusjaj̄i.

³ Ashí najanamú ainia nu Nijjaj̄i najanamuiti. Nii najanachmaka pen̄ké atsawai.

⁴ Niisha iwiaaku átinia nérenniuti. Nu iwiaaku atincha tsáapninia áinis Yusna ana nuna ashí shuaran paant nekamtikiamniaiti.

⁵ Nu tsáapnin kiritniunam tsáapniawai. Tura kiritniusha tsáapninian ikiajni-aktinian tujinkiaiti.

⁶ Áishman̄ ámiayi, Yus akupkamu, ni naari Juan̄.

⁷ Niisha tsáapnin chichaman etserkatajtsa támiayi. Nuna étseruk ashí umirkarat tusa támiayi.

⁸ Juan̄sha nu tsáapninchauryayi. Áyatik akupkamuyayi tsáapnin chichaman etserkat tusa.

⁹ Nu tsáapninkia nekas tsaapniniaiti. Ju nun̄kanam taa ashí shuaran enentáin tsáapniartiniaiti.

¹⁰ Chichamsha tamiayi ju nun̄kanam. Tura nun̄kasha ni najanamú ain̄, nun̄kaya aents Nin nekaacharmiayi.

¹¹ Támiayi ni nun̄kén tura ni shuarsha ni enentáin itiaacharmiayi.

¹² Tuma ain̄ chikich shuar Nin enentáimtuiniak ni enentáin itiaawarua nuna Yusa uchirí ajastinian Yus tsan̄katkamiayi.

¹³ Niisha Yusa uchirí ajasar ataksha númpentin ayashímkiacharmai. Áentsnúmiã akiiniachu áiniawai niisha. Áishman̄ wakeramujaj̄isha akiiniacharmai. Antsu Yúsnumiã akiiniawaru ásar Yusa uchirí áiniawai.

¹⁴ Nú Chichamsha ayash̄tin ajas iijjaj̄i núkap tsawant pujumiayi. Yusa anen̄kratairijjaj̄i piakuyi. Aya nekas nunak chichaamiayi. Núnisañ ni pen̄kerin̄, aya Yusa Uchirí chikichkia nu takusminia nuna iniakmamiayi. Nusha iisha paant wáinkiaitji.

¹⁵ Juan̄sha Nin neka asa, étseruk tímiayi “Júiti wi tímiaj nu: “Winia ukuruinj̄i winittiana nu wíjjain̄kia émkaiti. Maa, wi atsaisha tuke pujuyayi” tiniujai.” Tu etserkamiayi.

¹⁶ Chichamsha ti anen̄kartin asa ashí pen̄ker ana nuna iniaitsuk súramji.

¹⁷ Yusa akupeamurin̄ Muisais yaunchu jintintraiti, antsu aneatniuncha tura ashí nekas ana nunasha Jesukristu jintintraiti.

¹⁸ Chikichkisha Yúsan pen̄ké wáinkiachuiti. Tura ni Uchirí chikichkia nu tuke Nijjaj̄i tsaníaku asa Yúsan paant awajturmasuitji.

Imiakratin Juan̄ Jesukristunun etserkamiania nu

(Mateu 3.11-12; Márkus 1.7-8; Rúkas 3.15-17)

¹⁹ Jerusaréñnumiã Israer-shuar ni Pátririn̄cha Riwi-shuarjaj̄i Juan̄kaj̄i akupkarmiayi yákit tusar.

²⁰ Inintruiniakui paant ujakmiayi. “Wikia Krístuchuitjai” tímiayi.

21 Takui ataksha aniasarmiayi “¿Nuikia yáitiam. Yúsnan etserin yaunchu amia nú Eríaskaitiam?” tiarmiayi.

Juaṅsha “Atsá, núchaitjai” tímiayi.

Nuyá ataksha aniasarmiayi “Nuikia ¿Yúsnan etserin tátinia núkáitiam?” tiarmiayi.

Niisha “Atsá” tímiayi.

22 Takui “¿Nu arantcha yáitiam. In akuptamkajnia nusha warí títiataj. Warintia enentáimiam?” tiarmiayi.

23 Juaṅsha tímiayi “Yúsnan etserin Isayas yaunchu timia núitjai. Niisha áarmiayi “Aents atsamu nuṅkanam shuar untsumui “Ii uuntri jintí naka awajsatarum,” tu untsumui.” Núnaka Isayas áaruiti. Tura wikia untsumna nú shuaraitjai” tímiayi.

24 Juaṅjai chichainiakka Pariséu akupkarma áarmiayi.

25 Niisha tiarmiayi “Nuikia Krístuchuitiatmesha, Eríaschaitiatmesha, Yúsnan etserin tátinia núchaitiatmesha ¿urukantai imiakratam?” tiarmiayi.

26 Juaṅsha tímiayi “Wikia entsajain imiakratjai. Tura átum írutramunam shuar átum nékatsrumna nu wajaawai.

27 Niisha winia ukuruinj winiyat wíjiainkia ti naṅkaamantuiti. Nii ti péñker asantai wisha ni sapatrj jinkiamuríncha atitrachminiaitjai” tímiayi.

28 Nuka Petapara peprunam túrunamiayi. Petaparasha Juan imiakratmia nuj Jurtaṅ entsa amain amai.

Jesus Yusa Murikrinti

29 Nuyá kashin Juan Jesusan winian wáiniak tímiayi “Iistarum. Núiti Yusa Murikrj ashí aentsu tunaarín júana nu.

30 Núiti wi timiaj nu, “Winia ukuruj winiana nu wíjiainkia naṅkaamantuiti. Tura wi atsaisha tuke pujuyayi” tímiajai.

31 Wisha Nin nekaachmajai. Tura ashí Israer-shuar Nin nekaawarat tusan imiakin támajai” tímiayi.

32 Nuyá tímiayi “Yusa Wakanin yámpitsa núnin nayaimpinmayan táarun wáinkiámjai. Tura ekemsamai.

33 Nu túruntsain tuke Nin nekaachmajai. Tura Yuska winia imiakrattinian akuptak turutmiai “Chikichik shuarnum Yusa Wakanj tara ekemsa wáinkiam, nujai nekaattame. Yusa Péñker Wakanjiaj imiakratniua núiti” túrutmiayi. Tura nujai Nin nekaamjai.

34 Yamaikia wainkia asan ti paant nékajai tí nekas Yusa Uchirinti” tímiayi Juan.

Jesusa unuiniamurj emka armia nu

35 Kashincha ataksha Juan nuj wajasmiayi ni unuiniamurj jímiarjai.

36 Jesussha nuj naṅkaamakui Juan tímiayi “Iistarum, Yusa Murikrj áuwiti.”

37 Juaṅka unuiniamurj nuna antukar mai Jesusan pataatukarmiayi.

38 Jesussha úkumur ímias nu jímiar wininian wáinkiámiayi.

Tura tímiayi “¿Ya eṅarum?”

Niisha “Uuntá, ¿tuṅ pujam?” tiarmiayi.

39 Jesussha tímiayi “Wats, iitiarum.”

Niisha wear ni pujutairín wáinkiarimiayi. Tura áaṅkú ajasmatai nu tsawan-taj nuj kintiamprarmiayi.

40 Juaṅka chichamen antukar Jesusan pataatukaruka jímiar áarmiayi. Chikichik Antresauyayi. Niisha Semuṅ Pitru yachiiyayi.

⁴¹ Antressha wárik ni yachí Semunkan eaktajtsa wémiayi. Tura wáiniak “Misías wáinkiaji” tímiayi. Misíaska ni chichamen “Kristu” tawai. Krístuka Israer-shuaran yainkiarat tusa Yus anaikiamuiti.

⁴² Nuyá Antres ni yachí Semunkan Jesus pujamunam jukimiayi. Jesussha wáiniak tímiayi “Ámetme Semun, Junasa uchirí. Túrasha Sépas átatme.” Sépaska Israer-shuar chichamnum kaya tawai. Tura Kriaku chichamnum nuka Pítruiti.

Jesus Jiripijai tura Natanaérjai chichasmiania nu

⁴³ Kashincha Jesus Kariréa nunkanam wétajtsa pujumiayi. Tura Jiripin wáiniak “Nemartusta” tímiayi.

⁴⁴ Jiripisha Petsaitia péprunmayayuyayi. Antressha Pítrusha nu péprunmayayuyayi.

⁴⁵ Nuyá Jiripi Natanaéran eakmiayi.

Tura wáiniak tímiayi “Muisais Yus akupkamu papinium “Anaikiamu tátatui” tu áarchamkia. Yaunchu Yúsnan etserniusha ujakcharmakia. Nu shuar wáinkiaji. Jesusaiti, Jusé uchirí. Nasarét péprunmayaiti.”

⁴⁶ Natanaérsha tímiayi “¿Nasarétnumiá péñker shuar áminkiait?”

Jiripisha “Winim ítiá” tímiayi.

⁴⁷ Jesussha Natanaéran tíjiuch winian wáiniak tímiayi “Ju shuar iistarum. Ti péñker Israer-shuaraiti. Penké anañkartichuiti.”

⁴⁸ Natanaérsha tímiayi “¿Itiur nékaram?”

Jesussha tímiayi “Jiripi tuke untsurmatsain wáinkiajme iku numirin ejamkam wajamin.”

⁴⁹ Natanaér nuikia tímiayi, “Uunta, nekas Yusa Uchirínme. Israer-shuar akupniuitme” tímiayi.

⁵⁰ Tura Jesus tímiayi “¿Aya wi “Iku numirin ajamkam wajamin wáinkiajme” takui Winia enentáimturamek? Antsu nuna nankaamas nekaachmin ana nusha wáinkiaítame” tímiayi.

⁵¹ Nuyasha Jesus tímiayi “Wi nekas tájarme, Aents Ajasu asan atumsha nayaim uranmianum Yusa suntari Winin tara waka ajainia wáinkiaítarme.” Tu tímiayi.

2

Nuatnaikiatin jísat Kaná péprunam ámiania nu

¹ Menaintiu tsawant nankaasmatai nuatnaikiatin jísat Kaná péprunam ámiayi. Kaná péprusha Kariréa nunkanmauyayi. Jesusa nukurísha nuí pujumiayi.

² Jesussha ni unuiniamurísha nu nuatnaiyamunam ipiaamu ámiayi.

³ Umutai amuukamtaí Jesusa nukurí tímiayi “Umutai amuukai. Penké takakainiatsui.”

⁴ Tura Jesus tímiayi “Nukuá, ¿urukamtaí Winia túrutam? Iniáitiústá. Winia kakarmar iniakmastin jeaatsui.”

⁵ Nuyá umutain wáinmainia nuna ni nukurí tímiayi “Ashí ni tana nu umiktárum.”

⁶ Nuí kayajai najanamu yumi-yaraatai sais (6) ámiayi. Nu yaraatainmayá Israer-shuar ni ewejéncha ni nawéncha nijiamau ámiayi Yus shiir enentáimtursatí tusar. Chíkich chíkich yaraatainnum uchenta (80) rítrusha, siañ (100) rítrusha yumi wayamniauyayi.

⁷ Nuyá Jesus umutain wáinmaun “Ju yaraatai áimpratarum” tímiayi. Takui mete áimprarmiyayi.

⁸ Áimprarmatai Jesus tímiayi “Pai, ishichik shikikrum námper chicharu suutarum.” Tutai nútiksān túrawarmiayi.

⁹ Jista chicharusha nu umutai ajasun nekáprámiayi. Yaraatainmaya yumi jusamun nekaachmai niisha tura umutai ajamau jusaru ásar nékarmai. Jista chicharusha nuwatun untsuk

¹⁰ tímiayi “Jístanmanka péñker umutain emka suíniatsuk. Tura jémararmatainkia tímianchan suiniatsuk. Túrasha ámeke péñker umutai ikiusam yamá jíkchamek” tímiayi.

¹¹ Jesus túramu Kananum Kariréa nunkanam túrunamiayi. Nújainkia Jesus emka ni kakarmarín paant iniaktusmiayi. Nuna ísar ni unuiniamurísha Nin enentáimtusarmiayi.

¹² Nuyá Kapernáum péprunam wémiayi. Ni nukurísha ni yachísha ni unuiniamurísha nemariarmiayi. Nuísha untsurí tsawant pujusarmiayi.

*Yusa Uunt Jeen suruktinian Jesus surimkiamiania nu
(Mateu 21.12-13; Márkus 11.15-18; Rúkas 19.45-46)*

¹³ Israer-shuara namperi, paskua tutai, ishichik ajasmatai Jesus Jerusarénum wémiayi.

¹⁴ Nui jeá Yusa Uunt Jeen súruinian wáinkíamiayi. Turuncha murikniasha yampitsnasha súrin ármiai. Chikichcha ni misarín pujusar kuítian yapajíniancha wáinkíamiayi.

¹⁵ Nuna wáiniak yaranken chapikmar asutkiartutain najana nujai ashí waakartiuk murikrintiuk aa jírmiai. Kuítian yapajniu misaríncha ayantar ni kuítrin nunká utsankarmiayi.

¹⁶ Yampitsan súrinniasha tímiayi “Nuka juyá jíítiarum. Winia Aparu Jeen surutai jea najanawairap” tímiayi.

¹⁷ Nuna ísar ni unuiniamurí yaunchu Yus-Papinium áarman enentáimprarmiayi. Ju áarmaiti:
“Ame Jeem shiir atí tusan ti wakerukuitjai.”

¹⁸ Nuikia Israer-shuara uuntri Jesusan aniasarmiayi “Juna túramniaitjai tusan ¿warí kakarmak iniakmastatam?”

¹⁹ Jesussha tímiayi “Ju Jeā sáakiakrumin menaintiú tsawantaí iniantaittiajai Wikia.”

²⁰ Israer-shuarsha tiarmiayi “Kuarentisáis (46) uwitin juna jeamtinian pujusarmiayi. Amesha menaintiú tsawantai jeamtámeash.”

²¹ Kame Jesus “Jeā” chichayat ni ayashin tímiayi.

²² Tuma asantai Jesus ukunam jakamunmaya nantakmiatai ni unuiniamurí ni timian enentáimprar ni chichamencha tura yaunchu Yus-Papinium áarmancha “Nekasaiti” tu enentáimtusarmiayi.

Jesus ashí shuara enentáin nékawai

²³ Paskua námpertin ti untsurí Jerusarénum pujuarmia nu, Jesus aents tujintiamun túramtai, nuna wáinkiar Nin nekas enentáimtusarmiayi.

²⁴ Tuma ain Jesus ashí neka asa ninkia enentáimtuscharmiai.

²⁵ Niñki ashí shuara enentáin neka asa chíkich ujatkat tusa atsumchamiayi.

3

Jesus Nikiutémujaí

¹ Shuar ámiayi ni naari Nikiutému. Niisha Pariséu asa nii tuinia áintsan Yúsnan takauyayi. Niisha Israer-shuara uuntriyaí.

² Niisha kashi Jesusai irastajtsa wé tímiayi “Uuntá, shuáran unuiniarat tusa Yus akúptámkaiti. Nu paant nékaji. Yúsaiyanchuitkiumka aentsti tujintiamu túramna nu tujinkiaintme’ tímiayi.

³ Jesussha tímiayi “Tí nekas tájame. Atak yamaram akiiniachuka Yus akupeamunam pachiinkiashtatui.”

⁴ Tutai Nikiutému aniasmiayi “¿Itiurak shuar uunta nu ataksha akiiniat. Ataksha ni nukurí ampujén enkempramniakait atak akiiniatniuna?”

⁵ Ataksha Jesus tímiayi “Ti nekas tájame. Shuar entsayasha tura Wakanniu-miasha akiiniachuka Yus akupeamunam penké pachiinkiashtatui.

⁶ Ayashniumiã akiinia nuka ayashchakait. Núnisañ Wakanniúmiã akiinia nuka wakanchakait.

⁷ Wi “atak yamaram akiiniatniuiti” takui itiurchat enentáimpraip.

⁸ Nase enentáimpratá. Nase nánkamsañ umpúawai. Amesha ántame tura tuyañ winiá túrasha tuin weti nékatsme. Núniskete ashí Wakanniúmiã akiinia nu.”

⁹ Tuma asantai Nikiuté musha atak anias “¿Jusha itiurak áminiat?” tímiayi.

¹⁰ Jesus áikmiayi “Ame Israer-shuara jintinniurintiatmesha ¿itiura nékatsmea?”

¹¹ Ti nekasán tájame. Nekas nékatur chichajai. Íismajnia nusha ujaaji. Tuma ain ii chichame ántatsrume.

¹² Aya ju nunkanmayã túramu ujaam ántachkurmeka ¿itiurak nayaimpin-mayã túramusha antuktaram?”

¹³ ‘Shuar chikichiksha nayaimpiniam waka atsawai. Aya Wiki, nayaimpin-mayã taran Aents Ajasu asan, túraitjai. Tura Wikia nayaimpinmayaitjai.

¹⁴ Tura Winiasha, Aents Ajasu ain, mantuawartatui. Iis, yaunchu Israer-shuar atsamunam wekainiak napijiai ti jáiniakui tuke tsuamarti tusa Muisais napin jirú najana yakí numiniam awajaimiayi. Núnisnak Wisha awajnitniuitjai.

¹⁵ Nújainkia ashí Winia enentáimturna nuka jinium wétsuk Yusai tuke iwiaaku pujustatui.”

Yuska ashí shuaran ti aneawai

¹⁶ Yuska ashí shuaran ti anea asa, ni Uchirín chikichik ana nuna shuáran uwemtikrarat tusa tsankatkamiayi. Ashí shuar Nin enentáimtana nu, jinium wécharat tusa, antsu Yúsnum tuke iwiaaku pujusarat tusa ni Uchirín akúpturmakmaji.

¹⁷ Yus áentsun kakerak jinium surukat tusa ni Uchirín akupkachmiayi. Antsu uwemtikrarat tusa akupkamiayi.

¹⁸ Yusa Uchirín enentáimtana nuka jinium penké surunkashtiniaiti. Tura Nin enentáimtatsna nuka, Yusa Uchirín chikichik ana nuna enentáimtachu asa, páchitsuk jinium surukmaiti.

¹⁹ Yusa Uchirí tsáapninia áintsañ ii tunaari paant awajturmajai. Nu tsáapnisha ju nunkanam táraiti. Shuar tunáa ti tura ásar tsáapninian nakitrar kiritniun wakeriarmai. Nuna tura ásar jinium surunkaruiti.

²⁰ Ashí tunaan túruinia nuka tsáapninian muíjainiawai. Túrawar yupitiaini-awai ni tunáa túramu paant ajasai tusa.

²¹ Antsu ashí nekas túratniun umiiniana nuka tsáapninian weantainiawai. Yus ni enentái pujuram tsáapninium takainiawai. Nuka ti paantaiti.

Imiakratin Juan ataksha Jesusnan chichasmiania nu

²² Nuyá Jesussha ni unuiniamurijiaisha Jutía nunkanam wear nuí pujusar imiakratiarmiayi.

²³ Juansha Enun nunkanam, Sarim tíjiuchia nuí, imiakratuk pujumiayi entsa nuí núkap aa asamtai. Tura aents táarmatai imiainiarmiayi.

²⁴ Nusha Juánkan sepunam enkenatsain túrunamiayi.

²⁵ Tura Juanka unuiniamurí Israer-shuarjai jianaiktinian nan kamawarmiayi. “¿Ya imiakratma imiá péñkerait?” tusar áujmatarmiayi.

²⁶ Juánkai initrustai tusar wéarmiayi. “Uunta, ame nuik Jurtañ entsa amain pujakum shuar nuí pujá “núiti Yusa Murikri” tíchamkum. Yamaikia imiakratui tura ashí shuar Nin nemarainiawai” tiarmiayi.

²⁷ Tutai Juan tímiayi “Ashí kakarmaka aya Yúsaiyañchakait.

²⁸ Wisha paant tímiajai “Wikia Krístuchuitjai antsu ni jintin iwiarat tusan emka akupkamuitjai.” Nusha antukmarme.

²⁹ Kame shuar nuwan nuatna nuna áishrinti. Nuatnaiyak áishman nuwejai áujnainiakui, ni amikrishana nuna antuk ti waraatsuk. Wisha núnisnak aents Jesusai wénakui ti waraajai.

³⁰ Niisha tuke nan kaamaku uunt ajastiniaiti antsu wikia tuke tímiancha ajastiniaitjai.” Juan tu chichasmiayi.

Nayaimpinmaya tara nu

³¹ Nayaimpinmaya tara nuka ashí nan kaamakuiti. Nun kaya nuka, nun kaya asa jú nun kanmayanak áujmatui. Nayaimpinmaya tara nuka ashí nan kaamakuiti

³² tura nuí antukmancha íismancha áujmatui. Túrasha ni chichamen ántuiniatsui.

³³ Antsu ni chichamen ántana nuka “Yusa chichame imiá nekasaiti” tawai.

³⁴ Yus akupkamuka Yusa chichamen étserei. Yuska ni Wakanin ementut-suk susa asamtai tu étserei.

³⁵ Yus Apa ni Uchirín anea asa ashí ana nuna iistí tusa ataksaiti.

³⁶ Shuar Yusa Uchirín enentáimta nuka yamaram iwiaakmanum akiinia asa tuke Yusai shiir pujustiniaiti. Antsu Yusa Uchirín enentáimtatsna nuka nu iwiaakmanum akiiniachuiti antsu Yus tuke nin kajerkaiti.

4

Jesus Samaria nunkanmaya nuwajai chichasmiana nu

¹ “Jesus untsurí shuaran ni nemanin awajeawai; kame Juanjai nan kaamas untsurí imiaawai” taman Pariseu shuar antukarmiayi.

² Nekaska Jesus imiakratchamiayi, antsu ni unuiniamurí túrawarmiayi.

³ Pariséu nu chichaman antukarman Jesussha nekáa Jutía nun kanmaya jiinki Kariréa nun kanam waketkimiayi.

⁴ Wáketuk Samaria nun kanmaaní nan kaamaktiniuyayi.

⁵ Samaria nun kanam wéak Sekar péprunam jeamiayi. Nu pepru jeastatuk Jakupa nun ke ámiayi. Jakupsha nu nun kan ni uchirín Jusén tí yaunchu susamiayi.

⁶ Nuísha yumirmat ámiayi. Jakup taurma asamtai “Jakupa yumirmatri” tiarmiayi. Tutupin jeamtai Jesussha pimpiki winis yumirmat ayamach pujusmiayi.

⁷ Nuí pujai Samarianmaya nuwá yumí shikiktajtsa támiayi. Tura Jesus “Entsa surusta” tímiayi.

⁸ Jesusa unuiniamurísha yurumkan péprunam sumaktajtsa wéaru asamtai aya Jesusak pujumiayi.

⁹ Samarianmaya nuwá Jesusan tímiayi “¿Itiura Israer-shuaraitiatmesha Samarianmaya nuwá aisha entsa seatam?” Kame Israer-shuar Samarianmaya shuarjainkia penké chichachu ásar nuna tímiayi.

¹⁰ Jesussha tímiayi “Yus súamu nékameka tura entsa surusta tájam nusha nékameka ame antsu seattínme tura Wikia iwiaaku entsan amasaintjai.”

¹¹ Nuwasha tímiayi “Uunta, entsasha ti initiaiti tura shikiktincha takaktsume. ¿Tuyaḅ iwiaaku entsasha surustam?”

¹² Ii uuntri Jakup ju yumirmatan taur juyanak niisha ni uchirisha ni waakarisha umararmiayi. Nuyá ikiurtamkimiaji. ¿Amesha Jakupjai nankaamas kakarmakaitiam?”

¹³ Jesussha tímiayi “Ashí shuar ju entsan umarka ataksha kitiamtiatui.

¹⁴ Antsu Wi súajna nú entsan umarka penké kitiamchattawai. Antsu nu entsa Wi susamuka ni enentáin púkunia áintsan tuke pajamtiatui nujai tuke iwaaku pujustí tusa.

¹⁵ Tutai nuwa tímiayi “Uuntá, winiasha nu entsa surusta. Wisha kitiamcha átaj. Tura ju entsan cha shikiktinian táchataj” tímiayi.

¹⁶ Nuyasha Jesus tímiayi “Áishrum untsukam utitia, turam juu tatá.”

¹⁷ Nuwasha “Winia áishur atsawai” tímiayi.

Tutai Jesus tímiayi “Maa, nekas tame. Áishrum atsawai.

¹⁸ Kame ame áishrum senku (5) takusuitme. Yamái takakmena nusha ame áishrumchaiti. Nekas tame.”

¹⁹ Nuna antuk nuwasha tímiayi “Uunta, ame Yúsnan etserniuchukaitiam.

²⁰ Ii úntrinḅia tuke Samaritanam pujuarmia nu ju nainnium Yúsan tikishmatrarmiayi. Antsu átum Israer-shuar árumna nu aya Jerusarénum Yus tikishmátratniuiti tárume.”

²¹ Jesus tímiayi “Nuwá, enentáimsata. Tsawant jeattawai átum ju nainniumsha tátsuk tura Jerusarénumsha wétsuk Yus Apa tikishmatratin.

²² Átum tikishmatrum nuka nékatsrume. Iikia tikishmatrajnia nu nékaji. Israer-shuarnumia Uwemtikkiartin winiakui nékaji.

²³ Tsawant winittiana nu yamá jeayi. Ashí shuar Yus Apan nekas tikishmatainiakka tuke wakanjai tuke enentáijjaisha awajitsuk tikishmatrartatui. Núnisan tikishmatrurat tusa wakerawai Yus Apa.

²⁴ Yuska Wakaniiti tura ashí Nin tikishmatainia nuka tuke wakanjia tura tuke enentáijjaisha awajitsuk tikishmatratin ániawai.”

²⁵ Nuwasha tímiayi “Anaikiamua nu tátiniaiti. Nusha Krístuiti. Niisha taa ashí jintinramattaji.”

²⁶ Jesus tímiayi “Wiitjai. Ámin chichajmena nú Kristuitjai.”

²⁷ Nuin ni unuiniamuri táarmiayi tura nuwajai chichaa pujan wáinkiar ti enentáimprurarmiayi. Tumaitiat “¿Warí wakerakmea nuwajai chicham?” títinian arantukarmiayi.

²⁸ Nuyanka nuwa ni yumirin ikiuki péprunam we ashí áentsun tímiayi

²⁹ “Winiirum ítiarum, shuar ashí wi túramun túruta nu. ¿Juka Krístuittiya?”

³⁰ Tutai péprunmaya jíinkiar Jesus pujamunam weararmiayi.

³¹ Jeainiatsain ni unuiniamuri seak tiarmiayi “Uunta, yurumáta.”

³² Tura Jesus tímiayi “Wi yúatniunka takakjai átum nékachman.”

³³ Ni uniuniamurisha nuámtak anniasarmiayi “¿Chíkich shuar yurumak itiarim tátsuash?” tiarmiayi.

³⁴ Tura Jesus tímiayi “Winia akuptukua nuna wakeramuri túrakun tura ni takatrin takaakun Wíjjainkia yurumátniua áintsan ikiakáatui.

³⁵ Átumka “Tuke kuatru nantu árak júuktin taasai” tátsurmek. Túrashá Wi tájarne, shuar wininia nu iistarum. Yus-Chicham ni enentáin araamuiti. Tura júuktin tsawant jeayi.

³⁶ Arakan júaka akinkiatniuiti. Júukmataisha nu shuar uwemprar tuke iwiaaku pujusartatui. Núnisan arakan araana nusha júana nusha mai metek warasartatui.

³⁷ Tiniu armia nuka nekasaiti: “Chikichik araawai chíkichcha júawai.”

³⁸ Iis, chíkich arakmamu júuktinian akupkaitjarme. Átum araachiatrumek chíkich takasmanum atumsha pachiintiukuitrume” tímiayi.

³⁹ Tura núwaka péprunam jeá “Ashí wi túramun ujat kayi” takui untsurí shuar Jesusan ti shiir enentáimtusarmiayi. Niisha Samarianmaya shuar ármiayi.

⁴⁰ Nu asamtai ashí Jesusai taar niijai pujusát tusa seawarmiayi. Tutai Jesus jimiara tsawant nuj pujusmiayi.

⁴¹ Nú shuar untsurí ni chichamen antukar Jesusan ti shiir enentáimturarmiayi.

⁴² Nuyá nuwan tiarmiayi “Yamaikia aya ame chichammijain Jesus enentáimtatsji antsu imia iisha ni chichamen anturkaji. Tura nékaji nekas Krístuiti, ashí shuaran Uwemtikin.”

Jesus akupniu takarniuri uchirin tsuármiania nu

⁴³ Jimiara tsawant nankaasmatai Jesus Samaria nunkanmaya jiinki Kariréa nunkanam wémiayi.

⁴⁴ Kariréasha Jesusa nunke asamtai, ainsa Jesus timia áintsan ámiayi: “Yúsnan etserniun ashí shuar pénger anturainiawai antsu nuna nunkeyanka nin anturainiatsui.”

⁴⁵ Tuma ain Kariréa nunkanam jeamtai auya shuarsha Jerusarénum paskua námpernum wearu ásar tura ashí ni túramun nuj wainkia ásar ti shiir awajsarmiayi.

⁴⁶ Nuyá Jesus Kaná péprunam atak támiayi. Nu péprunmasha nuik Jesus yumin umutai awajsamiayi. Jesussha nuj pujai yajá péprunam Kapernáumnum akupniu takarin ámiayi. Ni uchirisha jaa tepemiayi.

⁴⁷ Niisha Jesus Jutíanmaya Kariréa nunkanam taman antuk Jesusai wémiayi. Tura ni uchirí jakatin tepakui ni jeen we ni uchirín tsuarat tusa Jesusan seamiayi.

⁴⁸ Jesussha tímiayi “Aya aents túrachminian túrakui ísrum aya nújain Winia enentáimtarme.”

⁴⁹ Tura takarin tímiayi “Uunta, winia uchir jáatsain wari winitia.”

⁵⁰ Nuinka Jesus tímiayi “Jeemijn waketkitia. Yamaikia ame uchiram pénger ajasai.” Tutai nú aishman Jesus táman antuk wémiayi.

⁵¹ Ni jeen jeátemámtai ni takarniuri inkiun tiarmiayi “Yamaikia uchiram pénger ajasai.”

⁵² Apasha inintrusmiayi nantu urukaim pénger ajasma.

Niisha tiarmiayi “Yau, nantu pukuntamta, tsuemun michatramai” tiarmiayi.

Nuna antuk uchi aparisha enentáimsamai.

⁵³ Nantu pukunta ai Jesus “Ame uchiram pénger ajasai” timia nuní ain michatrait. Tuma asamtai niisha ashí ni shuarisha Jesusan nekas enentáimturarmiayi.

⁵⁴ Jesus nu túramujai ni kakarmarin jimiara iniakmasmiayi. Nunasha Jutíanmaya jiinki Kariréa nunkanam jeá túramiayi.

5

Petesta amia nuj tampemaran Jesus tsuármiania nu

¹ Nu nankaasmatai, Israer-shuar namperan najanainiakui Jesus ataksha Jerusarénum waketkimiayi.

² Jerusarén yama wayamunam murik wayatin waiti tíjiuch amia nuí entsa pajamtai jeammauyayi. Nu pajamtain Petesta tiarmiayi. Nuna wáitirisha senku (5) ármiai.

³ Nuí untsurí jáiniak nunkanam tepearmai. Kusurusha shutuapsha tampemakusha tepesar entsa miartukat tusa nákasarmiayi.

⁴ Kame ni tátaj taku Yusa suntari táuyayi entsan umuchkiattsá. Nuyanka emka shuar entsá wayá nu ni jáamuriya tsuámarmiayi.

⁵ Áishman traintiúchu (38) uwi jaa tepá nuí ámiayi.

⁶ Jesussha nu shuaran nuí tepan wáinkiamiayi. Tura untsurí uwitin jaa tepan nekáa aniasmiayi “¿Shiir ajastiniak wakeram?”

⁷ Tutai jaasha tímiayi “Uunta, entsa muchitkiui ¿winia yaki enkétát? Kame wi enkemátaj tai chíkich emka enkemáiniawai.”

⁸ Nuyá Jesus tímiayi “Nantaktia. Ame peakrum jukim wetá.”

⁹ Nu chichamtaik áishman shiir ajasmiai. Tura ni peakrin jukí wémiayi. Nusha ayampratin tsawantaj túrunamiayi.

¹⁰ Tuma asamtai Israer-shuar shiir ajasun tiarmiayi “Yamá ayampratin tsawantaiti. Peakrum júkishtiniaitme” tiarmiayi.

¹¹ Áishmansha tímiayi “Winia tsuara nu “Peakrum jukim wetá” turutni” tímiayi.

¹² Nuinkia aniasarmiayi “¿Ya “Peakrum jukim wetá” túramam?” tiarmiayi.

¹³ Tura áishmansha Nin tsuárun nékachmiayi. Untsurí shuar nuí aa asamtai tura Jesus weu asamtai nin nekaachmiayi.

¹⁴ Atak Jesus Yusa Uunt Jeen áishman kan wáiniak tímiayi “Antukta. Yamaikia shiir ajasume. Atak tunáa túrawaip; nu arant ajasáim” tímiayi.

¹⁵ Nuinkia áishman Jesus nin tsuármán nekáa Israer-shuaran ujakmiayi.

¹⁶ Tuma asamtai ayampratin tsawantaj túramtai Israer-shuar Jesusan maatai tusar áintrarmiayi.

¹⁷ Tura Jesus tímiayi “Wina Apar tuke yamaisha takawiti. Núnisnak Wisha takaajai.”

¹⁸ Tutai Israer-shuar nuna nankaamas maatai tusa wakeriarmiayi. Ayampratin tsawantaj takaakui kajerarmiayi. Tura nu arantcha “Yus winia Aparuiti” takui Yusjaj métek enentáimtumawai tusar nu arant kajerarmiayi.

Yusa Uchirí túramnia nu

¹⁹ Nuyá Jesus tímiayi “Ti nekas tájarme, Yusa Uchirínkia ni enentájjain takaatsui. Antsu aya winia Apar takaana nuna ísan métek takaajai. Ashí winia Apar túramun Wisha ni Uchirí asan métek takaajai.

²⁰ Ni Uchirí asamtai winia Apar anentui tura ashí tura nuna iniakturui. Tura nuna nankaamas tujinkiamnian iniaktursattawai Wisha túratniun. Tura nuna túrakui ashankattarme.

²¹ Winia Apar jakamunmayan iwiaaku ajasat tusa Ni wakerana nuna iniantesatsuk. Núnisnak, ni Uchirí asan, Wi wakeraj nuna iwiaaku awájsámniaitjai.

²² Winia Aparka súmamtiksui antsu shuar súmamtikiatniun ni Uchirín súsaiti.

²³ Tuma asamtai ashí shuar Yus Apan shiir awajainia áintsan ni Uchiríncha métek shiir awajatsin áiniawai. Yus Apa ni Uchirín akupka asamtai, Uchin shiir awajeatsna nuka Yus Apancha shiir awajeatsui’ tímiayi.

²⁴ ‘Ti nekasaiti. Winia chichamprun ántana nú shuarka Winia Akuptukun enentáimtak ni iwiaakmarin tuke amuukashtinian takakui. Nu shuarsha ayashí iwiaakuitiat jákauyi antsu yamá nekas iwiaakuiti. Tuma asa sumamashtatui.

²⁵ Ti nekasaiti. Tsawant winittiana nu jeayi. Nu tsawant jaka ainia nu Wi untsumman antukar umirkarka iwiaaku ajasartatui.

²⁶ Iis, winia Apar iwiaaku awajsatniun takakui. Tura Winiasha, ni Uchirí asamtai, iwiaaku awajsatniun surusuiti.

²⁷ Nu arantcha wi Aents Ajasu asamtai, shuaran súmamtikiatniun surusuiti.

²⁸ “Ju chicham iturchataiti” enentáimprairap. Atak tsawantaj wi untsumman ashí jákaru ainia nu antukartatui.

²⁹ Tura ashí iwiarsamunmaya jíinkiartatui. Péñker túrawarusha nantakiar tuke iwiaaku pujusartatui. Antsu tunáa túrawarusha nantakiar jinium surunkartatui’ tímiayi.

“Jesus nekas Yúsaiyáiti” tu áujmatainia nu

³⁰ Imia Wiki takaatsjai. Antsu Yus tana núnisnak súmamtikeajai. Wi wakeraj nuna enentáimtsuk antsu winia Apar wakera nuna wakerukan, Nii akupta asamtai, awajitsuk súmamtikjai.

³¹ Aya Wiki “Yúsaiyáitjai” tákunka winia chichamur ántar ainti.

³² Chikichcha awai. Niisha “Yúsaiyáiti” túrutui. Ni chichamesha imiá nekasaiti.

³³ Atumsha Juankej wi túramu inintrusmarme tura nii timia nu nekasaiti.

³⁴ Tuma aiñ aents táman atsumatsjai. Antsu Juanca chichame enentáimkiuram uwempratarum tusan tájarme.

³⁵ Juansha jiya núnis keemai. Atumsha ishichik tsawantin nú tsáapninnium warastin enentáimpramarme.

³⁶ Tura Winia “Yúsaiyáiti” túrutna nu, Juanjai nankaamas péñkeran takakjai. Wi takasma núiti. Winia Apar takastinian surusma nuna takaakun nujaj páantaiti Yus Apa akupkamuitjai.

³⁷ Winia Aparsha, akuptuku asa, ayamprutui. Túrasha átumka ni chichamesha antukchaitrume tura wáintiash wáinkiachuitrume.

³⁸ Yus Apa akuptukuiti. Tuma asamtai Winia enentáimturchakrum winia Aparu chichamesha atumi enentáin wayachuiti.

³⁹ Átumka Yus-Chicham yaunchu aarma nuj iwiaaku átinian wáinkiatatui tusarum ti unuimiaruitrume. Nu chichamsha Wíinian áujmatui.

⁴⁰ Tuma aiñ nekas iwiaaku átaj tusarum Winí tátin nakitiarme” tímiayi.

⁴¹ “Shuar Winia “shíiraiti” túrutainiakuisha nuna páchiatsjai.

⁴² Maa, Wi nékajrume. Átumka Yus aneatsrume.

⁴³ Winia Apar akuptukmatai táwitjai túrasha nakitrarme. Antsu chíkichka ní enentáijjain jeartamkuinkia nuka átum wakerarme.

⁴⁴ Átumka nuámtak “Shiir enentáimtursatí” tu enentáimtunaiyarme. Tura Yus enentáimturma nuka páchiatsrume. Nújainkia ¿itiurak Yus enentáimtustam?

⁴⁵ “Íi tunaarín Yusaj etserturmaktatji” turutiirap. “Muisais akupkamun umirkan uwemprattajai” tátsurmek. Antsu Muisais aarma nujaj atumí tunaarij etsernaktatui.

⁴⁶ Iis, Muisais Winia áatrurmiayi. Atumsha ni timia enentáimtakrumka Winiasha enentáimturaintrume.

⁴⁷ Tura ni aarma enentáimtachkurmeka ¿itiurak wi tama enentáimtustarum?” tímiayi Jesus.

6

*Jesus senku mir (5.000) áishmankan ayurawarmiania nu
(Mateu 14.13-21; Márkus 6.30-44; Rúkas 9.10-17)*

¹ Nu nankaasmatai Jesus Kariréa antumiannum amain katiñmiayi. Nu antumiansha Tipirias antumian tuiniawai. Jimiará náartiniaiti.

² Untsurí shuar Jesus ti jáinian timiá wárik tsuan wáinkiaru ásar Nin nemari-armiayi.

³⁻⁴ Israer-shuara paskuanamperi ishichik ajasmatai Jesussha ni unuiniamurijiai náinnium waka nui pujusmiayi.

⁵ Jesussha untsurí aents wininian wáiniak Jiripin tímiayi “Timiá untsurí shuar ayuratniusha ¿tuyan yurumak sumaktaj?” tímiayi.

⁶ Kame Jesuska Nii túrattana nuna neka asa Jiripi warittin tusa tímiayi.

⁷ Jiripisha nuyá tímiayi “Timiá nukap kuitjai tanta sumakmesha ashí ishichik susamsha jeachaintjia” tímiayi.

⁸ Nuyá chíkich unuiniamurí Antres, Pitru yachi, tímiayi

⁹ “Uchi juí senku (5) tantan jimiará namakjai takakui. Ausha timiá untsurínmasha jeatpiash” tímiayi.

¹⁰ Nuyanka ““Ashí pujustarum” titiarum” tímiayi Jesus.

Áishmansha nuwasha uchisha irunmiayi. Tura chírichri núkap aa asamtai nuísha senku mir (5.000) áishman pujusarmiayi.

¹¹ Jesussha nu tantan achik Yúsan yuminkias ni unuiniamurín susamiayi. Niisha ashí nui pujuinian súsarmiayi. Namaknasha núnisañ ashí ni wakeri-armiania nuna súsarmiayi.

¹² Jémararmataisha Jesus ni unuiniamurín tímiayi “Ampirma júukrum chañkinnium chumpiatarum. Wasúrnákain.”

¹³ Niisha senku (5) tantanmaya ampirman júukar tuse (12) chañkinnium áimkiarmiayi.

¹⁴ Nu shuarsha Jesus túramun ísar tiarmiayi “Ju nekas Yúsnan etserin tátinia núchakait.”

¹⁵ Shuar Jesusan uunt akupin awajsataj tutai Jesus nekáa Niniki náinnium wémiayi.

*Jesus entsá pátatek nanamas wekasamiania nu
(Mateu 14.22-27; Márkus 6.45-52)*

¹⁶ Kíakui Jesusa unuiniamurí antumiañnum wearmiayi.

¹⁷ Káshisha Jesus tuke táchamtai uunt kanunam enkemáwar Kapernáum péprunam wéenak jíinkiarimiayi.

¹⁸ Tura nase ti umpúakui chíchimi ti wajaimiayi.

¹⁹ Ajapén ajarar Jesus entsá pátatek nanamas tíjiuch winian wáinkiar ashamkarmiayi.

²⁰ Tura Jesus “Wiitjai. Ashamprukairap” tímiayi.

²¹ Nújainkia ti shiir warasar kanunam itiaawarmiayi. Tura nu chicham-taik ni wéamunam jeawarmiayi.

Shuar Jesusan eak wekainiawai

²² Kashincha chíkich shuar amain ayuramunam kanararu nekaawar-mai. Jesusa unuiniamurí Jesusjainchu chikichik kanu amia nujai wéarun nekaawarmai.

²³ Nui chichak matsatai Tipirias péprunmaya chíkich kanu táarmiayi. Yau Jesus Yúsan yuminkias tantan ayuramunam tíjiuch táarmatai

²⁴ nu shuar, Jesussha ni unuiniamurísha nui atsuiniakui, nu kanunam enkemáwar Kapernáum péprunam Jesusan éaktajtsa wearmiayi.

Jesus apatkua áintsankete

²⁵ Entsa amain Jesusan wáinkiar aniasarmiayi “Uunta, ¿urutía juísha táman?”

²⁶ Jesussha tímiayi “Ti nekas tájarne. Aents tujintiamu nekáa asarum éatsume. Antsu tanta yuarum jémaru asarum éatrume.

²⁷ Juyá yurumak amuukatin asamtai ti pachisairap. Antsu amuukashtin yurumak tuke iwiaaku pujustinian amaana nu takarsatniuiti. Nú yurumkanka Wi, Aents Ajasu asan, susattajrume. Yus Apa nuna túratniun surus “Juka shuáran Yáinkíartiniaiti” túrutui” tímiayi.

²⁸ Tutai inintrusarmiayi “¿Warí túratniuitiaji Yus wakerana nu umiktin?”

²⁹ Jesussha tímiayi “Yus akupta asa Winia enentáimtursarat tusa wakerawai.”

³⁰ Tutai aniasarmiayi “¿Aentsti tujintiamuka warí túrattam ii ísar Ámin nekas enentáimtustin? Chikichcha túratá.

³¹ Yaunchu ii uuntri aents atsamunam maná yurumkan nayaimpinmaya susamun yurumáwarmiayi. Yus-Chichamnum núnik áarmaiti: “Nayaimpinmaya yurumkan Yus susamiayi.” Tu áarmaiti” tiarmiayi.

³² Jesussha tímiayi “Wi tájana nu nekasaiti. Muisais atumí úuntriñ nayaimpinmaya yurumkan súsachmiayi. Antsu winia Apar yamá nekas apatkun nayaimpinmaya súramui.

³³ Iis, Yusaiya apatkunka, nayaimpinmaya tára nu súramui tura nekas apatuk asa ashí shuaran nekas iwiaakman súawai.”

³⁴ Tutai “Uunta, nu apatuk tuke amasta” tiarmiayi.

³⁵ Tura Jesussha tímiayi “Wiitjai nu apatuk nekas iwiaakman súana nu. Winí winiana nú shuar penké tsukamashtatui, tura Winia enentáimturna nusha tuke kitiaarchattawai.

³⁶ Túrasha wi túramu wáinkiumesha winia chichamur enentáimtatsrume.

³⁷ Ashí shuaran winia Apar tsankatrukarmiania nu, Wíi shuar ajasartatui. Winin winiana núnaka penké nakitrashtatjai.

³⁸ Wi wakeraj nuna túratniun táchaitjai antsu Winia akuptukmia nuna umirkatniun táwitjai.

³⁹ Winia Apar akuptukuiti tura juna wakerawai. Ashí winia tsankatrukman emenkátsuk amuukatin tsawantaj iniantkiarat tusa wakerawai.

⁴⁰ Yus Apa wakerana nu júiti. Ashí shuar Winia “Yusa Uchirinti” tu enentáimturkui yamaram iwiaakman tuke takusat tusa wakerawai. Nú shuarnaka amuukatin tsawantaj iniantkittiajai” tímiayi Jesus.

⁴¹ Tura Jesus “Wiitjai, nayaimpinmaya apatuk akupkamu” takui Israer-shuar Jesusan áujmatiarmai.

⁴² Tura tiarmiayi “Ju Jesuschakait, Jusé uchiríya nu. Iikia ni aparísha nukurísha nékatsjik. ¿Itiurak “Nayaimpinmaya táraitjai” ta?” tiarmiayi.

⁴³ Jesussha tímiayi “Tu áujmatrukairap.

⁴⁴ Shuáran winia Apar akúpturkachuitkiuinkia penké weanturkachainti. Tura Winia akupturna nuna amuukatin tsawantaj iniántkittiajai.

⁴⁵ Yúsnan etserniu áarmarín tawai “Ashí Yus jintintiamu ártatui”. Núnisaj ashí Yusa chichamen antukar unuimiatainiakka Winí táiniawai” tímiayi.

⁴⁶ ‘Aya Wiki Yúsaiya tau asan Yúsan wáinkiaitjai. Chikichka penké wáinkiachuiti.

⁴⁷ Ti nekas tájarme. Winia enentáimturna nú shuarka yamaram iwiaakman amuukashtinian takakui.

⁴⁸ Wikia iwiaakman súana nú apatkuitjai.

⁴⁹ Iis, atumí uuntri aents atsamunam maná yurumkan yúawariatcha ashí jákarmiayi.

⁵⁰ Antsu Wi tájana nú apatkun shuar yúakka jákachartatui.

⁵¹ Wikia nayaimpinmaya iwiaaku apatkuitjai. Nu apatkun shuar yuakka tuke iwiaaku átiniaiti. Nu apatkun Wi susattaj nusha winia ayashruiti. Ashí shuar Yusaj iwiaaku pujusarti tusan winia ayashrun susattajai” tímiayi Jesus.

⁵² Nuyá nuámtak áujmattsar tiarmiayi “¿Itiurak ni ayashinkesha ayurtamat-taj?” tiarmiayi.

⁵³ Jesussha tímiayi “Ti nekas tájarme, Wi Aents Ajasu asamtai winia ayashur yúatniuitrume. Winia ayashur yúachmeka tura winia numpar umarchamka nekas iwiaaku pujatsrume.

⁵⁴ Winia ayashrun yúana nuka tura winia numparun úmakka yamaram iwiaakman amuukashtinian takakui. Tura nu shuaran amuukatin tsawan-taj iniántkíttiajai.

⁵⁵ Winia ayashruka nekas yurumkaiti tura winia numparsha nekas umu-tainti.

⁵⁶ Winia ayashruncha yúaka tura winia numparnasha úmaka Wijiaj tsanin pujawai tura Wisha nu shuarjaj tsaninkian pujajai.

⁵⁷ Yus Apa, Winia akuptukuka, nu iwiaakma nérenniuiti. Tuma asamtai ni iwiaakmariin iwiaaku pujajai. Núnisan Winia yurakka winia iwiaakmaruj iwiaaku pujustatui.

⁵⁸ Nayaimpinmaya apatkun tajai. Ju apatuk maná yurumka áintsachuiti. Atumí uuntri maná yurumkan yuawarsha ashí jákarmiayi. Antsu ju apatkun shuar yúakka tuke iwiaaku pujustatui” tímiayi Jesus.

⁵⁹ Núnaka Jesus Israer-shuar iruntainiam unuiniarmiayi.

Iwiaaku chicham

⁶⁰ Nu chichaman antukar Jesusa unuiniamurj chicharainiak “Nii tana nu ti itiurchat asamtai ¿yaki antukminiait?” tiarmiayi.

⁶¹ Jesussha ni áujmatman nekáa tímiayi “Átum “ju chicham itiurchataiti” tárumek.

⁶² Wátsek, Wi nayaimpiniam pujumiaj nuj waketkimtaisha ¿urukawain-trumek?

⁶³ Warí, aya wakanik iwiaakman súwaiti. Ayashkia penké áantraiti nekas iwiaaku awajsatniun. Wi tájana nujaj imiá nekas wakankia iwiaaku awajsamniaiti” tímiayi Jesus.

⁶⁴ Tura Jesus Nin enentáimtachun tura Nin suruktatna nunasha yaunchu neka asa ni unuiniamurj in tímiayi “Atumíncha winia chichamprun enentáimtachu tuke awai.

⁶⁵ Nu asamtai tímiajrume “Shuáran winia Apar akupturkachmaitkiuinjka penké weanturkachainti” tímiajai” tímiayi Jesus.

⁶⁶ Nuyasha ni nemarniurj untsurj armia nu Jesusan ikiukiar atakka Nijijai wekasacharmiayi.

⁶⁷ Nuyá Jesus ni tuse (12) unuiniamurj in chicharainiak “¿Atumsha wétin wakerarmek?” tímiayi.

⁶⁸ Semun Pítrusha áikmiayi “Uunta, ¿yáinin wetaj? Ame chichammijjain nekas iwiaaku áminiaiti.

⁶⁹ Ame Kristu asam nekas iwiaaku Yusa Uchirínme. Nuka enentáimtusar ti paant nékaji” tímiayi.

⁷⁰ Jesussha tímiayi “Ashí tuse (12) árumna nu achikiuitjarme nekas Wí shuar ajastin. Tuma ain atumín chikichik iwianchiiti” tímiayi.

⁷¹ Nuna taku Jútás Iskariútin, Semunka uchirín, enentáimtus tímiayi. Jútassha ni unuiniamurj iniat Jesusan ukunam surukmiayi.

7

Jesusa yachisha Nin enentáimtuscharmiaj

¹ Nu nankaamasmatai Jesus Kariréa nunkanam wekaimiayi. Jutía nunkanam wéchamiayi Israer-shuara uuntri nuj máataj tutai.

² Tura Israer-shuar aak aakmatai namperi jeatemamtai

³ Jesusa yach_i wishikiainiak tiarmiayi “¿Urukamtai ju_isha pujam? Jutía nun_{kanam} wetá, a_{isha} ame unuiniamuram túram nuna ísarat.

⁴ Ashí shuar nekaawarat tákumka ú_{ukam} túrawaip. Ti tujintiamu túriniaitkiumka ashí shuar ímmianum túratá” tiarmiayi.

⁵ Ni yach_isha ishichkisha Nin enentáimtachu ásar tiarmiayi.

⁶ Tura Jesus tímiayi “Winia tsawantur nampernum wétin jeatsui. Atumjain_{kia} ná_{nkamas} tsawant wétin pé_{nkeraiti}.

⁷ Ju nun_{kanmaya} aents atumniaka kajertamatsrume. Antsu ni tunaar_{in} etsertin asamtai Wíniaka kajertuiniawai.

⁸ Átumka nampernum wetarum. Wikia tsawantur jeachkui wéatsjai.”

⁹ Juna tinia Jesuska Kariréa nun_{kanam} juákmiayi.

Aak aakmatai nampernum Jesus timia nu

¹⁰ Ni yach_i wearmatai Jesussha nampernum wémiayi. Tura nekarawarain tusa ú_{umak} wémiayi.

¹¹ Israer-shuara úuntri_{sha} námper irunturmanum eakar “Nu aishman_{sha} ¿tu_{in} pujá?” tiarmiayi.

¹² Ashí shuarsha Nin áujmatiar_{miayi}. Chíkich “pé_{nkeraiti}” tiarmiayi. Tura chikichcha “Pé_{nkerchaiti}. Aya anan_{kartawai}” tiarmiayi.

¹³ Tura Israer-shuara úuntri_n ashamainiak u_{uk} áujmatiar_{miayi}.

¹⁴ Nampersha ajapén ajasmatai Jesus Yusa Uunt Je_{en} wayá shuáran unuiniamiayi.

¹⁵ Israer-shuara úuntri_{sha} nuna ísar ti enentáimsar chichaak “J_{usha} unuimiátrachiatcha ¿itiurak imiá neka?” tiarmiayi.

¹⁶ Jesussha tímiayi “Wi unuiniajna nu winia chichampruchuiti antsu Winia akuptukua Núnan unuiniajai.

¹⁷ Yus wakerana nuna shuar nekas umiktinian wakerakka winia chichamprun nekaattawai. Nekas Yúsna_{itkiuin_{kia}}, nuna nekaattawai. Aya wi enentáim_{miajai_n} chichaakuisha, nuna nekaattawai.

¹⁸ Ni enentáim_{miajai_n} chichaana nuka ashí shiir enentáimtursarti tusa chichaawai. Antsu nin akupka nuna shiir awajsarti tusa wakerak, nekas wáitratsuk tawai.

¹⁹ Muisais Yusa akupkamur_{in} atumí uuntri_n amaschamka. Tuma ai_n nu umitsuk mantuatin wakerutarme” tímiayi Jesus.

²⁰ Nu shuarsha tiarmiayi “Wáurtsmek. ¿Ya mantamataj tusa wakera?”

²¹ Jesussha tímiayi “Ayampratin tsawantaj chikichkí túramtai ti enentáim_{turmek}.

²² Muisais ashí tsupirnaktinian akupkachmiayi. Antsu ni uuntri_{n_{kia}} nuna akupka áiniawai. Tuma ai_n átumka Muisais akupkamu umiktai tusarum ayampratin tsawanta_{isha} uchi áishman _{tsúpirnaitrume}.

²³ Wátsek, Muisais akupkamu uminkiat_i tusarum ayampratin tsawanta_{isha} uchi áishman _{tsúpirkurmekaka} ¿urukamtai Wi ayampratin tsawantaj áishman_{ka} ayash_i takamtsuk tsuármatai kajertarum?

²⁴ Shuar túrana nu ísam wárik súmamtikiawaip. Antsu inintrúsam paant nekaam, nekasa nu enentáimtusta” tímiayi Jesus.

Jesus Yúsnumi_a akupkamuiti

²⁵ Nuyá Jerusaré_{nnumi_a} shuar tiarmiayi “Maatai tuinia núchakait.

²⁶ Tura nu_i ashí ántamunam étserui tura suntar páchiniatsui. ¿Ii uuntri_{sha} “Nekas Krístuiti” tu enentáim_{tuiniawash}?

²⁷ Antsu nekas Kristu taa tuya_n winiá nekanashtatui tura ju_i pujamuka ashí nékaji” tiarmiayi.

²⁸ Jesus nuna antuk, Yusa Uunt Jēen waja kakaram chichaak tímiayi “Winia nekararum tuyá winiaj nu nékarme. Kame núnisrum enentáimprume. Tura winia enentáirjai táchaitjai antsu winia Apar akuptukuiti. Niisha ti nekas akupniusha átumka nékatsrume.

²⁹ Antsu Winia akuptukuitiui aiyá tau asan Wikia nékajai” tímiayi.

³⁰ Nuyá sepunam enkeataj táyat achikcharmiayi ni tsawantri jeachu asamtai.

³¹ Tura untsurí shuar Nin enentáimtusar “Kristu ta ¿nuna nankaamas aentsti tujintiamun túratpiash?” tiarmiayi.

“Eátkáttarme tura wáitkiashtatrume” tímiayi Jesus

³² Pariséusha Israer-patri úuntriha Jesusnan timian antukar suntaran akupkarmiayi Jesusan achikiar sepunam enkeawarat tusar.

³³ Nuyá Jesussha tímiayi “Aya ishichik tsawant atumjai pujustatjai. Nuyá ataksha Winia akuptuku pujana nu waketkittijai.

³⁴ Átumka eátkáttarme tura Wi wéajna nu wéchamnaitkiuram wáitkiashtatrume.”

³⁵ Israer-shuarsha nuamtak aniniaisarmiayi “¿Jusha tuj wéakuin iisha wáinkiashtataj. Israer-shuar apachnium pujuinia nu we apachin unuiniar-tatuak.

³⁶ Nii timia nu itiurkit. “Átumka eátkáttarme tura Wi wéajna nu wéchamnaitkiuram wáitkiashtatrume” tana nu itiurkit?” tiarmiayi.

Yamaram iwiaakman súana nú entsa

³⁷ Jista amúamunam ti shiir najanawarmia nu tsawantaj Jesus wajaki kakaram chichaak tímiayi “Shuar ni enentáin kitiamakka Winin taa umar kitiakén imíkráti.

³⁸ Winia enentáimturna nuka ni enentáiyá entsa wa áintsan yamaram iwiaakman súana nú entsa jiinkittiwai.”

³⁹ Nuna taku Jesus “Ashí Yúsan enentáimtusarun Yusa Shiir Wakaní súatniuiti” tímiayi. Tura núnisan Yus-Papiniumsha áarmaiti. Antsu Jesus tuke nayaimpiniam wéatsain Yusa Wakaní shuar súsachmauyayi.

Shuarsha niisháa niisháa enentáimprarmiania nu

⁴⁰ Chíkich shuarsha nuna antukar “Ju nekas Yúsnan etserin tátinia núiti” tiarmiayi.

⁴¹ Chíkichcha “Juka nekas Krístuiti” tiarmiayi. Tura chíkichkia Jesus Kariréanmayaiti tu enentáimiainiak tiarmiayi “Warí, ¿Kariréa nunkanmaya Kristu áminkiait?

⁴² Yus-Papinium paant tawai “Krístuka yaunchu uunt akupin Tawit weeanmaya akiiniatniuiti, tawai. Tura Tawitia pépruriya Pirinnumia átiniaiti” tawai” tiarmiayi.

⁴³ Tuma asamtai shuar niisháa niisháa enentáimprar kanakiarmiayi.

⁴⁴ Chíkich aiyá nuka “sepunam enkeatai” tiarmiayi túrasha túracharmiayi.

Israer-shuara uuntri Jesusan enentáimtuscharmiania nu

⁴⁵ Suntarsha waketkiarmiayi. Tura Pariséusha Israer-patri uuntriha “¿Urukamtai itiachuram?” tiarmiayi.

⁴⁶ Suntarsha tiarmiayi “Chíkichkisha ju áishman chichaa áanis chichaschaiti” tiarmiayi.

⁴⁷ Nuyá Pariséu tiarmiayi “Atumsha anannarume.

⁴⁸ Pariséutisha uuntcha nuna enentáimtuiniawash.

⁴⁹ Penké shuarka yaunchu akupkamun nékachua nuka yajauchiniam yuminramu áiniawai” tiarmiayi.

⁵⁰ Nikiutémusha, kashi Jesusan tarimia nu, Pariséuitiat tímiayi

⁵¹ “Ii shuartikia, shuar ni túramun etserkamu ántutsuk súmamtikiachminiaiti” tímiayi.

⁵² Nuĩnkia niisha tiarmiayi “Wats, amesha Kariréanmayanchuashitiam. Yus-Chicham áujсам nekaattame. Kariréanmaya Yúsnan etserin penké táiniatsui” tiarmiayi.

Nuwa wáinmakman Jesusan itiararmiania nu

⁵³ Nuyá ashí ni jeen waketkiarmiayi.

8

¹ Tura Jesuska Uriwiu náinnium wémiayi.

² Tura kashin tsawar Yusa Uunt Jeen atak támatai ashí shuar Nin káutkarmiayi. Túrawarmatai Jesus pujus unuiniarmiayi.

³ Nuyá Israer-shuara jintinniurisha Pariséusha nuwan wáinmakman Jesusan itiararmiayi. Tura ashí iruntramunam ajapén awajsarmiayi.

⁴ Tura Jesusan tiarmiayi “Uunta, ju nuwa tsanirma pujá achinkiyai.

⁵ Muisais akupkamunmasha nuna túraka “kayajai tukurar máatniuiti” tawai. ¿Amesha warintmea?” tiarmiayi.

⁶ Aya mamikmar nekapsatai tusar tiarmiayi. Nin sumamtikiatniun wakeriarmiayi.

Nuyá Jesus tsuntsumá ni uwejéjai nunká áarmiayi.

⁷ Tura tuke iníam wajaki tímiayi “Ayu, atumijya tunáa túrichu ákunka kayan achik nin emka tukuti” tímiayi.

⁸ Tura nuna ti, ataksha tsuntsumá nunká áimiayi.

⁹ Tura ni chichamen antukar ni enentáin sumamawar úuntnumia júkí chikichik chikichik jiinki wéarmiayi.

Ashí wéarmatai Jesus Niñki nuwájai juákmiayi.

¹⁰ Jesussha wajaki aya nuwanak wáiniak tímiayi “¿Ámin súmamtikramainia nusha tuiñ pujuinia. Chikichkisha áwak?” tímiayi.

¹¹ Niisha “Atsá, Uunta. Chikichkisha atsawai” tímiayi.

Nuyá Jesus tímiayi. “Ayu. Wisha súmamtikiatsjame. Yamaikia weme atakka tunáa túrawaip” tímiayi.

Jesus tsáapnia áintsankete

¹² Ataksha Jesus Yusa Uunt Jeen iruntrarun tímiayi “Ju nunkanam Wi tsáapnia áintsan shuara enentáin tsáapniajai. Ashí Wijiai tsanin wekaana nú shuar ni enentáin kiritniunam wekasashtatui antsu tsáapnin yamaram iwiaakman súana nujai wekasattawai.”

¹³ Pariséu nuikia tiarmiayi “Ame péñkerum tau asam támena nu áantraiiti.”

¹⁴ Jesus tímiayi “Tuyá winiaj tura tui weaj nu nékatsrume, tura Wikia nékajai. Tuma asan winia péñkerun táyatnak tájana nu péñkeraiti.

¹⁵ Ju nunkanmaya aents enentáimmiajai enentáimtakrum ti súmamtikrume. Tura Wikia chikichkinkesha súmamtiksujai.

¹⁶ Tura súmamtikiunka awajitsuk túrajai. Iis, Wiki shuar túramun péñkerashit tusan enentáimtsujai antsu winia Apar Winia akuptukua nusha Wijiai métek shuar túramun nékawai.

¹⁷ Atumí akupkamuriin áarmaiti: “Jimiará shuar mai nú chichamnak tákuinkia nu chicham nekasaiti.”

¹⁸ Wátsek Wisha winia Aparsha mai métek taji. Winia Aparsha akuptukuiti” tímiayi.

¹⁹ Tutai “¿Ame apasha tui pujá?” tiarmiayi.

Jesussha tímiayi “Átumka Winiasha winia Aparsha nékatsrume. Winia nékarkurmeka winia Aparsha nekaawaintrume.”

²⁰ Nuna Yusa Uunt Jeen Yusa kuítrín suinia nuí tímiayi. Tuma aín sepunam enkeatniun achikcharmiayi ni tsawantrí jeachu asamtai.

“Wi wéajna nuí wéchamniaitrume’ tímiayi Jesus

²¹ Jesus ataksha tímiayi “Wikia wéajai. Atumsha eátkáttarme tura wi wéamunam wéchamniaitkiuram atumí tunaaríjjai jakattarme.”

²² Israer-shuarsha tiarmiayi “Wi wéamunam wéchamniaitrume” tutai, nuínkia máamatpiash” tiarmiayi.

²³ Nuínkia Jesus tímiayi “Átumka nun kayaitrume antsu Wikia nayaimpin-mayaitjai. Ju nun kayaitrume tura Wikia juyanchuitjai.

²⁴ Tuma asamtai tájarme “Atumi tunaaríjjai jakattarme.” Nekas Wi tájana núitjai. Tura nu enentáimtachkurmeka atumí tunaaríjjai jakattarme” tímiayi.

²⁵ Niisha aniasarmiayi “¿Amesha yáitiam?”

Jesussha tímiayi “Yaunchu tájarme.

²⁶ Nu arantcha atumin súmamtikiatjarum tusan ti tímíniaitjai. Winia Apar akuptukua nuka tuke nekasa nuna tawai. Tura aya ni taman antukan ashí shuaran nunak tajai” tímiayi.

²⁷ Tuma aín ni Aparín áujmatman penké nekaacharmiayi.

²⁸ Tuma asamtai tímiayi “Aents Ajasuitjiana ju, numíniám ajintruarum yakí takuriakrumín nújainkia nekarattarme. Wi tájana núitjai tura winia enentáirjain takatsuk aya winia Apar unuitiurmanak tájai.

²⁹ Winia akuptukua nuka tuke Wíjjain pujawai. Winia Apar wakeramun tuke shiir túrakui ikiurkichuiti” tímiayi.

³⁰ Tutai untsurí shuar Nin nekas enentáimtusarmiayi.

Yus-shuarsha tura tunaanum emetamusha

³¹ Israer-shuaran Nin shiir enentáimtusarmia nuna Jesus tímiayi “Wi tájarmena nu yawetsuk túrakrumka nekas winia unuiniámur átatrume.

³² Nújajsha timiá nekas ana nu nekaattarme tura nekas ankant ajastatrume” tímiayi.

³³ Niisha tiarmiayi “Iisha Apraám weeitji. Chikicha takarniur átai tusar penké emetachmaitji. ¿Urukamtai “Ankant ajastatrume” tame?” tiarmiayi.

³⁴ Jesus tímiayi “Timiá nekasaiti, ashí shuar tunaan túruinia nuka nu tunaajai emetamuiti. Tuma asa takarniua núnisan ajasuiti.

³⁵ Takarniusha ajapnamnia asamtai Yus atumin ajapramamniaitrume. Tura Akupniu Uchirínkia ni Aparíjjai tuke pujawai.

³⁶ Tuma asamtai Akupniu Uchirí ankant awajtamsamtainkia imiá nekas ankant pujustatrume.

³⁷ Átum Apraám weeitrume nékajai. Túmaitiatrum winia chichamur ántachu asarum mantuataj tárume.

³⁸ Winia Apar iniaktursamun áujmatjai. Átumka atumí uuntri timia túrarme” tímiayi.

³⁹ Tutai niisha tiarmiayi “Iikia Israer-shuar asakrin ii úuntrinikia Apraámaiti” tiarmiayi.

Tura Jesus tímiayi “Nekas enentáimin Apraám weeitkiurmeka níya núnis túrawaintrume.

⁴⁰ Nekas ana nuna Yus iniaktursamtai nuna ujakjarme, tuma aín mantuataj tarume. Apraámka nuní túrachmiayi.

⁴¹ Antsu atumí uuntri túrana áintsarum túrarme” tímiayi.

Tutai niisha tiarmiayi “Warí, tsanirnumiã akiiniachuitji. Ii uuntri Yúskete. Niisha ii Aparínti.”

⁴² Tura Jesus tímiayi “Yus nekas atumi Aparíntkiuĩkia Winiasha anentíntrume Yúsnumiã tau asamtai. Wisha winia enentáimmiarjaj jui táchaitjai antsu Yus akuptukuiti.

⁴³ ¿Urukamtai Wi tájana nu imiá nékatsrum? Wi tájana nu nakitia asarum winia chichamur ántatsrume.

⁴⁴ Atumí aparĩnkia úunt iwianchiiti. Tura niiniu asarum nii wakera nu túrarme. Yámankamtaiksha úunt iwianchkia tuke mankartiniaiti. Nekas ana nunasha nakitiawai tuke wáitrin asa. Wáitraksha níniunak chichaawai. Iis, waitia uuntri asa tuke wáitriniaiti.

⁴⁵ Tura Wikia nekas takui átum enentáimturtsurme.

⁴⁶ ¿Yaki chikichkí tunaajaj súmamtikruamniat? Nuikia Wi nekasa nuna tau aisha ¿urukamtai enentáimturtsuram?

⁴⁷ Yús-shuarka Yus timian ántawai tura átum Yúsnachu asarum Wi tájana nu nakitiarme” tímiayi.

Apraám akiintsain Jesus pujumiayi

⁴⁸ Nuikia Israer-shuar tiarmiayi “Maa, ti nekas tátsujik “Ame Samarianmaya shuáraitme. Tuke yajauch ániawai nusha. Nu arantcha iwianchrukuitme amesha” nekas taji” tiarmiayi.

⁴⁹ Jesussha tímiayi “Iwianchrukchaitjai. Áyatik winia Aparun shiir enentáimtikiajai. Tura átumka yajauch chichartarme.

⁵⁰ Wikia “shiir enentáimturarti” tátsujai túrasha Yuska ashí shuar Winia shiir enentáimturat tusa wakerawai. Niisha Yus asa ashí shuar túramun penkerashit tusa nekaattawai.

⁵¹ Ti nekasaiti. Wi tájana nuna enentáimta nú shuarka penké jákashtiniaiti” tímiayi.

⁵² Nuĩnkia Israer-shuar tiarmiayi “Pai, yamaikia ti paant íwianch takakme. Apraámsha ashí Yúsnan etserniusha jákaruiti tura Ame “Wi tájana nuna enentáimtaka penké jákashtiniaiti” tátsumek tiarmiayi.

⁵³ ¿Nuĩnkia ii uuntri Apraám nankaamaskaitiam. Niisha tura Yúsnan etserniusha jákacharuk áinia. Itiurak imiá nankaamantu enentáimtumam?” tiarmiayi.

⁵⁴ Jesussha tímiayi “Wiki shiir enentáimtumaknaka penké áantrai. Antsu Winia shiir enentáimturna nu winia Aparuiti. Nusha átumka “winia Yúsruiti” tárumna núiti.

⁵⁵ Nusha táyatrum Nin nékatsrume. Wikia Nin nékajai. “Nin nékatsjai” tákunka atumjaj métek wáitrin áintjai. Tura Nin neka asan Nii tana nuna tuke túriniaitjai.

⁵⁶ Apraámka, atumí uuntri, imiá yaunchu jákaitiat Wi ju nunkanam tátinian wararas nákasmiayi. Tura wáitiak ti shiir warartusmiayi” tímiayi.

⁵⁷ Nuyá Israer-shuar Jesusan tiarmiayi “Warí, senkuenta (50) uwí takaktsume túmaitiatam Apraáman wáinkiamjai tame.”

⁵⁸ Jesussha tímiayi “Ti nekas tájarme, Apraámka pujatsain Wikia pujajai” tímiayi Jesus.

⁵⁹ Nuna takui kayan achikiar “Jesusan tukutai” tiarmiayi. Tura Jesus úumak ni matsatmanum ajapénin weak Yusa Uunt Jeenia jiinki wémiayi.

9

Kusuru akiinian Jesus tsuármiania nu

¹ Jesus ni unuiniamurijjai wesa áishmankan kusuru akiinian wáinkiamiayi.

2 Ni unuiniamurisha aniasarmiayi “Uunta, jusha ¿urukamtai kusuru akiiniawit. Yana tunaarjijain kusuru akiiniait. Niiniujajimpiash, aparíniujajimpiash túrunawit?” tiarmiayi.

3 Jesus tímiayi “Ni tunaarjijainchusha ni aparíniujainchusha túrunaiti. Antsu Yus ni ayashín túratniua nu paant atí tusa túrunaiti.

4 Tsawaikia takastiniaiti. Yamaikia Winia akuptukua nuna takatrín túratniuitjai. Kashi ajasmatai takastin atsuttawai.

5 Jú nunkanam pujakun shuara enentáin tsáapnimitkratniuitjai” tímiayi.

6 Nuna chichas nunká usukmi nunkejai pachimiar kusuru jijn yakarmiayi.

7 Nuyá chichaak “Siruí pajamtai entsanam nijiamauta” tímiayi. Siruísha nu chichamnum “akupkamu” tawai. Kusurusha we nijiamar péñker ímiar támiayi.

8 Nuyá ni írutkamurisha nuik wáinin ármia nusha tiarmiayi “Juka pujus tuke kuítian seamniuya núchakait.”

9 Chíkich “Ee, núkete” tiarmiayi. Chikichcha “Atsá, núchaiti; kame nuash tumainti” tiarmiayi.

Tura nínki “Ee, wiitjai” tímiayi.

10 Tutai aniiniak “¿Itiurak yamaikia ímiam?” tiarmiayi.

11 Niisha tímiayi “Áishman Jesusa nu tsakusan jirun yakartur “Siruí pajamtai entsanam nijiamauta” turutmai. Takui wena nijiamaran paant iimpramjai” tímiayi.

12 Tutai “Nu áishmansha tuiñ pujá” tiarmiayi.

Niisha “Cha, nékatsjai” tímiayi.

Pariséu kusuru tsuárman inintrusarmiania nu

13 Nuyá kusuru tsuárman Pariséunam júkiarmiayi.

14 Kame Jesus kusurun tsuarmia nuj ayampratin tsawantauiyayi.

15 Tuma asamtai Pariséusha itiurak ímniun tusar aniasarmiayi.

Niisha tímiayi “Jiiruin tsakusan yakaarámtai, nijiamaran paant iimjaii.”

16 Nuyá chíkich Pariséu shuarnumia nuamtak tunaiyar “Juna tsuárka Yúsaiyanchuiti. Kame ayampratin tsawantai túrait” tiarmiayi.

Tura chikichcha “Tunáa shuaraitkiuinikia júnisan túratniun tujinkiaayi” tiarmiayi. Nujai akannaikiarmiayi.

17 Tsuármancha ataksha aniasarmiayi “Ámin tsuármarua nu ¿warí enentáimtam?” tiarmiayi.

Tutai “Wikia “Yúsnan etserniuiti” tajai” tímiayi.

18 Tura Israer-shuar nekas kusuruitiat yamá ímiui tu enentáimtuscharmiayi Pariseu. Tuma ásar ni aparíncha untsukar

19 inintrusarmiayi “¿Ame uchiram kusuru akiinia tárugna nukait. Itiurak yamaikia iimia?” tiarmiayi.

20 Ni aparísha tiarmiayi “I uchirínkia kusuru akiiniam nu nékaji.

21 Tura iisha nékatsji itiurak yamaikia iimia. ¿Yátsuk péñker tsuáruit? Niisha úuntchakait, nii aniastarum. Nínki ujatmakarti” tiarmiayi.

22 Sapijmiak tiarmiayi. Israer-shuara úuntrinikia “Jesus Yus akupkamu asa nekas Krístuiti” tuinia núnaka Israer-shuara íruntainmaya jiki akupnakti tiniu ásarmatai tsuarma aparí ashankarmiayi.

23 Nu asamtai ni aparí “Niisha úuntchakait, nii aniastarum” tiarmiayi.

24 Nuínkia Israer-shuara uuntri kusuru tsuárman ataksha untsuk tiarmiayi “Yus ímmianum nekasa nu titiá, ju áishmanikka tunaarinniuiti nékaji” tiarmiayi.

25 Tutai tímiayi “Kame tunaarinchashit. Nékatsjai. Antsu junak nékajai. Yaunchu kusuruitiatan yamaikia íimjiai.”

26 Ataksha aniiniak “¿Itiurtámkama. Itiur íimtikrammia?” tiarmiayi.

27 Niisha tímiayi “Yaunchu tájarne tura anturtatsrume. ¿Urukamtai ataksha titi tusa wakerarum. Niiniu ajastin enentáimprurmek?” tímiayi.

28 Nuin̄kia katsekkar “Ámeke ní shuarin̄me. Tura iikia Muisaisa shuarint̄ji, tiarmiayi.

29 Yus Muisaisan akupkaiti iikia nékaji antsu nu áishman̄ nékatsji. ¿Tuyantskait?” tiarmiayi.

30 Áishman̄ tsuarma tímiayi “¿Ausha itiurtsuk áiniiat? Winia íimtikrurma nu átumka nékatsrume tuyan̄kit.

31 Paant nékaji tunaarinniun Yus anturtsui. Tikishmatar ni wakeramun túruinia nunak anturui.

32 Yáunchusha kusuru akiinian tsuáruka tuke atsuwaiti.

33 Ju áishman̄ Yúsaiyan̄chuitkiun̄ka pen̄ké túrachaȳi” tímiayi.

34 Nuin̄kia tiarmiayi “Ámeke tunaarintin akiiniaiatmesha ¿in̄ jintintin átaj tamek?” Nuna tiar j̄iki awemarmiayi.

Wakan̄in̄ kusurua nu

35 Kusuru tsuárman̄ j̄iki awemarma nuna Jesus nekaamiayi. Tura wáiniak “Yusa Uchir̄ja nu enentáimtamek” tímiayi.

36 Tsuarma tímiayi “Uunta, turuttia wisha nekaan enentáimtustaj.”

37 Jesussha tímiayi “Wainme. Wiitjai ámij̄iāi chichaājna nu.”

38 Tutai, tikishmatar “Uunta, enentáimtajme” Jesusan tímiayi.

39 Nuyá Jesus tímiayi “Shuara enentáin̄ nekaan, akantratajtsan táwitjai. Ni enentáin̄ kusuru āin̄ iimtiktinian tura anan̄mamuk “Yusnan nekaan paant iimjiai” tana nuna ukusturtinian táwitjai” tímiayi.

40 Tutai Pariséu shuar nūi pujuarmia nu nuna antukar “¿Nuin̄kia iikia kusurukaitiāi?” tiarmiayi.

41 Jesussha tímiayi “Átum kusuruitkiurmeka atumí tunaarī wáinchakrum sumamachu áintrume. Tura “paant iimjiai” tau asarum sumamaitrume” tímiayi.

10

Iikia murikiua áintsar āji

1 Jesus tímiayi “Wi tájana nu ti nekasaiti. Shuar murikiun takakna nu ni murikr̄in̄ wenuimiunam kashi ikuawai. Tura murik wenuimiunam pujuiniakui yajauch shuar murikiun kasamkatniun wakerakka wáitiniam wayachmin̄ asa tanishnum waruk yajá wayawainti.

2 Antsu murikiu wáinniuka wáitiniam wayawawai.

3 Waiti wáinniuka nekas murikiun wáinniun wáitin̄ uratui. Muriksha ni wáinniurī chichamen̄ nékainiawai. Niisha ashí ni murikr̄in̄ chikichik chikichik nár̄in̄ anaitius untsúawai. Tura tsawāikia ni murikr̄in̄ j̄iki ayurtainiam yarumui.

4 Tura ashí ni murikr̄in̄ j̄ir̄ émtuki wéawai. Muriksha ni chichamen̄ ántuiniak untsuam nemarainiawai.

5 Chíkich shuárnaka nékachu ásar nemarainiatsui. Antsu ni chichamen̄ nékainiachu ásar pisainiawai.”

6 Nu métek-taku chichamnaka Jesus áujmatsamiayi tura shuar antukar nekaacharmiayi.

Pénker wáinniuka Jesusaiti

⁷ Nuyá Jesus tímiayi “Ti nekasán tájarme. Wenuimiu wáitirí murik wainia nuka Wiitjai. Shuarsha murikiu áintsar Winí wayamin áiniawai.

⁸ Wi táatsain ashí táaruka kasa áiniak winia shuarun kasamkatai tusa wake-riarmiayi. Tura winia murikiur Wíi shuar áiniak nu shuaran anturkacharmi-ayi.

⁹ Wikia wáititjai. Ashí Winin wayaaka uwemprattawai. Tura murikiua áintsan wenuimiunmaya jiinki péñker yurumáttawai tura atak wayá ayam-prattawai’ tímiayi.

¹⁰ ‘Kásaka aya kasamkatniuncha máatniuncha emesratniuncha wakerawai. Antsu Wikia yamaram iwiaakman tuke shiir atsumtsuk takusarti tusan táwitjai.

¹¹ Wikia péñker wáinniuitjai. Péñker wáinniuka ni murikrín uwemtikrartaj tusa jakattawai.

¹² Antsu aya kuitjai takauka ni murikrichu áiniakui tura nekas wáinniuchu asa péñker wáintsui. Kame uunt yawá winiakui murikiun ikiuki pisaawai. Uunt yawasha murikiun achik tsakiñmawai.

¹³ Nu shuarsha akikiam takáa asa murikiun enentáimtatsui. Nu asamtai aya pisaawai’ tímiayi.

¹⁴⁻¹⁵ ‘Wikia péñker wáinniuitjai. Winia Aparsha nékarui. Wisha Aparun nékajai. Núnisnak murikrun nékajai tura winia murikrusha nékarui. Wisha murikiun uwemtikrataj tusan jakattajai.

¹⁶ Chíkich muriknasha takakjai. Nusha ju wenuimiunmayanchu áiniawai. Nunasha itiattajai. Nu muriksha Winia umirtukar ashí métek matsamsar chikichik wenuimiunmaya ajasartatui tura chikichik wáinin átatui’ tímiayi.

¹⁷ ‘Winia murikrun uwemtikrataj tusan jakattajai turan atak nantaktiatjai. Nu asamtai winia Apar anentui.

¹⁸ Wi wakerakun jakattajai. Wi wakerachkuinkia chíkichkia mantuach-miniaiti. Jákatniuncha tura nantaktinniasha winia Apar surusuiti” tímiayi Jesus.

¹⁹ Israer-shuarsha nuna antukar niisháa enentáimprar kanakiarmiayi.

²⁰ Untsurí tiarmiayi “¿Urukamtai ántarum wáuruk tausha. Yajauch wakanin takaksuk?”

²¹ Tura chikichcha tiarmiayi “¿Yajauch wakantrinniusha núnisan chichas-minkiait. Yajauch wakantrinniusha kusurun ímtikramniashit?” tiarmiayi.

Israer-shuaraka Jesusan nakitiarmiania nu

²² Micha nantutin Israer-shuar Jerusarénum namperan najanainiawai. Nu nampernumsha Yusa Uunt Jee atak jeamman enentáimtuiniawai.

²³ Jesussha Yusa Uunt Jee áachiniam wekasamiayi Sarumúnka wáitiría nui.

²⁴ Israer-shuarsha Nin téntakar tiarmiayi “¿Ame nekas Krístukaitiam? Ju chichamaik etserkata. ¿Urukamtia nekas paant tátsum?” tiarmiayi.

²⁵ Tutai Jesus tímiayi “Yaunchu tiniu ain enentáimturachmarme. Winia Apar akupkamun takaajna nu ti paant awajtawai.

²⁶ Tura átumka winia murikruchu asarum enentáimturtsurme.

²⁷ Wisha winia murikrun untsuam anturtuiniak nemartuiniawai. Wisha wínianak mash nékajai.

²⁸ Tura yamaram iwiaakman tuke jákashtinian súajai. Nu asamtai niisha menkakachartatui antsu Wi wainkia asamtai ¿yaki jurutkit?

²⁹ Winia Apar murikiun surusuiti. Niisha ashí nankaamas kakaram asamtai ¿yaki uwejéyan atankit?

³⁰ Wisha winia Aparjai iisha aya chikichkiitji” tímiayi Jesus.

³¹ Tutai Israer-shuarsha atak kayan achikiar tukutaj tiarmiayi.

³² Jesussha tímiayi “Winia Aparu kakarmarijiai ti untsurí péñkera nuna takasuitjai. ¿Tújajimpia mantuattarum?”

³³ Israer-shuarsha Nin tiarmiayi “Péñker túra asakmin máataj tátsuji antsu Yus yajauch chicharkumin túrattaji. Ámeka shuáraitatam Yusa nuke enentáimtumame” tiarmiayi.

³⁴ Nuyá Jesussha tímiayi “Atumí akupeamuriin Yus timia nu áarmaiti: “Átum yúsaitrume” tawai.

³⁵ Kame Yus-Papinium aarma nu tuke nekaschakait. Tuma asamtai ni chichamen antukarun Yuska “yúsaitrume” takui nuikia ti nekaschakait.

³⁶ Niisha yúsaitkiuinikia nuikia Yus Apa anaikia ju nunkanam akupkamu asan ti nekas Yúschakaitiaj. Nújainkia wi “Yusa Uchiríntjai” takui ¿itiurak “Yusan yajauch chicharui” túrutrum?

³⁷ Winia Apar túramu túrachkuinikia enentáimtursairap.

³⁸ Tura nekas túrakuinikia enentáimtursatarum. Tura Winia nakitrakrumsha nuikia wi túramu enentáimtustarum. Nujainkia winia Apar Winin pujamu ashí nekaattarme. Núnisnak Wisha Niin pujajai. Iisha chikichkiitji.”

³⁹ Tutai ataksha sepunam enkeatai tiarmiayi. Túrasha Jesus uwempramiayi.

⁴⁰ Nuyá Jesus Jurtañ entsa amain wé yaunchu Juan imiakrattainium pujusmiayi.

⁴¹ Ti untsurí shuar iyuwar tiarmiayi “Nekas Juanka aentsti tujintiamun túrachiat ashí Jesusnan tímia nu nekasaiti” tu tiarmiayi.

⁴² Nujisha untsurí Jesusan enentáimtusarmiayi.

11

Rásaru jakamu

¹ Petania péprunam áishman, ni naari Rásaru, jaa pujumiayi. Nu péprunam Marí ni kajijai Mártajai pujumiayi.

² Niisha Rásaru umai áarmiayi. Nu Marisha ukunmanka kunkuinian sumak Jesusan kuer ni intiashíjiai japirmiayi.

³ Tura Rásaru jaakuí ni umai Jesusan chichaman akuptuiniak tiarmiayi “Uunta, ame amikrum jaawai.”

⁴ Jesussha nuna antuk tímiayi “Tuke jakataj tusa jaatsui. Antsu Yusa kakarmarisha tura ni Uchirí kakarmarisha jú sunkur tsuármanum paant atí tusa jaawai.”

⁵ Jesus Mártañcha ni kajincha tura ni umai Rásaruncha nekas aneemiayi.

⁶ Túmaitiat Rásaru jaawai taman antukiat ni pujamunam jimiará tsawant pujusmiayi.

⁷ Nuyá ni unuiniamuriñ “Ataksha Jutía nunkanam wetái” tímiayi.

⁸ Tura ni unuiniamuriñ tiarmiayi “Uunta, nuiksha Israer-shuar kayajai tukurmar mantamatai tícharmaka. ¿Nui ataksha wétai támek?”

⁹ Jesussha ju métek-taku chichaman tímiayi “Tsawaikia páantchakait. Tsawai wekaana nu paant asamtai tukumkashtatui.

¹⁰ Tura kashi wekaana nusha kirit asamtai tukumkátawai. Núnisan Wíi tuke pujakun winia takatrun takastiniaitjai. Túraknasha itiurchatan wáinkiashtatjai.”

¹¹ Nuyásha Jesus atak tímiayi “Ii amikri Rásaru kanarai. Wi ishintiartatjai.”

¹² Tutai ni unuiniamuriñ tiarmiayi “Uunta, aya kanarka nuinikia péñker ajastatui.”

¹³ Jesuska Rásaru jakamu nékayat “kanarai” tímiayi. Tura ni unuiniamuriñ Rásaru kajinmakua áintsañ kanarai enentáimprarmiayi.

14 Jesus nuikia ti paant tímiayi “Rásaru yamaikia jakayi.

15 Tura nuĵi pujuscha asan kúntuts pujatsjai. Jean túrattajna nu ísrum ti nekas enentáimtursattarme. Nuna nekaan shiir enentáimjai. Wátsek, iyutai.”

16 Nuyá Jimiampramu Tumas chíkich unuiniamurĵi nuĵi armia nuna “Isha weri Niĵĵiai métek jakatai” tímiayi.

Iwiaaku átinniasha jaka nantaktinniasha Jesus nérenniuiti

17 Nuĵi taa, Rásarun kuartru tsawant ikiusman wáinkiamiayi.

18 Petania pépruka Jerusarénumiaĵ menaintiú kirumitru áinis tíĵĵuchiiti.

19 Tuma asamtai untsurĵi Israer-shuar Mártasha Marísha, ni umajĵi jakamtai uutkuĵi atsankrataj tusa weriarmiayi.

20 Mártasha Jesus tíĵĵuch ajasun nekáa inĵkiunĵajtsa wémiayi. Antsu Marikia jeá pujumiayi.

21 Tura Marta Jesusan inĵkiunĵi tímiayi “Uunta, Ame pujakminkia winia umar jákachaayi.

22 Tura tuke nékajai ashí Yus seamna nuna súramui.”

23 Jesussha tímiayi “Ame umaimisha nantaktiatui.”

24 Mártasha tímiayi “Nekas, ashí amuamunam jákaru nantaktin tsawantajĵi nantaktiatui. Nuna nékajai.”

25 Nuyá Jesus tímiayi “Iwiaaku átinia nérentin asan Wikia iniantkartiniaitjai. Winia enentáimturna nuka jakasha nantaktiatui.

26 Tura ashí iwiaaku pujana nusha Winia enentáimturaka penĵke jákashtatui. ¿Nu nekasaiti tu enentáimtamek?”

27 Niisha “Ee, Uunta, ame Yusa Uchirínme. Krístuitme, uwemtikkiartin jú nunĵkanam tátinia nu” tímiayi.

Jesus Rásaru iwiarsamunam taa úutmiania nu

28 Mártasha nuna ti, ni kajĵi Marin untsuk úukanĵi tímiayi “Uunt juĵi taa untsurmawai.”

29 Marisha nuna antuk wárik wajaki Jesusa iyuttsa wémiayi.

30 Jesussha péprunam jeatsuk Marta inĵkiunĵmanum pujumiayi.

31 Marí wari wajaki wématai Israer-shuar nu jeanam atsankrattsa pujuiniasha nuna ísar weriarmiayi. Iwiarsamunam úuttiasa wéatsuash tusa weriarmiayi.

32 Marisha Jesus pujamunam jeá tikishmatar tímiayi “Uunta, Ame pujakminkia winia umar jákachaayi.”

33 Jesussha Marincha tura niĵĵiai úutuncha wáiniak wáitnentaimta asa ti kúntuts pujusmiayi.

34 Tura “Tui iwiarsamarum” tímiayi.

Niisha “Uunta, iitia” tiarmiayi.

35 Jesussha úutmiai.

36 Israer-shuarsha “Ti aneatsuk” tiarmiayi.

37 Tura chíkich “Kusuru tsuáruchukait. Nii pujakuisha Rásaru jákaampiash” tiarmiayi.

Rásaru iniantkimiu

38 Jesussha ti kúntuts enentáimiar iwiarsamunam weankámiayi. Náinnium asa paka taurma áuyayi. Tura kaya atutkamuyayi.

39 Tura Jesus “Kaya jurustarum” tímiayi.

Rásaru umajĵi Marta tímiayi “Uunta, kuartru tsawant jákaiti. Mejeatsuk’ tímiayi.

40 Tura Jesus tímiayi “Yus enentáimtakmeke Yusa kakarmarĵi wáinkiattame tíchamkajam.”

⁴¹ Nuikia kayarín uratiarmatai Jesus nayaimpin iis tímiayi “Aparu, Winia anturtakmin yuminsajme.

⁴² Winiasha tuke anturtame tura ju shuaran péñker enentáimtikrataj tusan tajai. Ame akuptukuitmena nuna nekarmawarti.”

⁴³ Nuna tinia kakaram untsuak “Rásaru jíinkitia” tímiayi.

⁴⁴ Nujainkia penuarmartiuk jiinkimiayi. Yapinmasha jaanchjiai ijia-muyayi. Tura Jesus “Atirtarum. Wéti” tímiayi.

Jesusan achiktin chichaman jurusarmiania nu
(Mateu 26.1-5; Márkus 14.1-2; Rúkas 22.1-2)

⁴⁵ Untsurí Israer-shuar Marin nemariaru Jesus túramun ísar enentáimtusarmiayi.

⁴⁶ Tura chíkichkia Pariséunam wear Jesus túramun ujakarmiayi.

⁴⁷ Nuna antukar Pariséusha Israer-patri úuntriasha ashí naamka uunt armia nujai iruntrar tiarmiayi “¿Warí itiurkamniat? Nu shuarka aentsti tujintiamun ti túratsuk.

⁴⁸ Aya júnik iniaiyakrinkia ashí shuar Nin enentáimtuschartatuak. Nuyá Rúmanmaya apach taar mesetan najanawartatui tura in amutmakar Yusa Uunt Jeencha emesrartatui.”

⁴⁹ Nu uwitin Kaipias Israer-patri uuntriyaayi. Niisha tímiayi “Átumka nékatsrume.

⁵⁰ ¿Ashí Israer-shuar mesertin péñkerkait. Antsu aya chikichik shuar jákatin péñkerchakait?” tímiayi.

⁵¹ Kaipiaska aya ni enentáimmiyajain tíchamiayi. Antsu nu uwitin Israer-patri uuntri asamtai Yus nuna enentáimtikramiayi. Nújainkia Israer-shuar Jesus jaruktinian ujakmiayi.

⁵² Tura aya Israer-shuarnakcha antsu niijiaisha ashí nunkanam Yus-shuar ajasarun irurtajsa jákatniuyi.

⁵³ Tuma asamtai nu tsawantiniñ Israer-shuara uuntri Jesus máatai tusar áujmatsarmiayi.

⁵⁴ Nu asamtai Jesus paant wantiniak Israer-shuarnum wekaichmiayi. Antsu Jutía nunkanmaya jiinki atsamu nunkanam Eprain pepru tíjiuch wémiayi. Tura nuí pujusmiayi ni unuiniamurijjai.

⁵⁵ Israer-shuara namperi paskua ishichik jatemsamtai untsurí shuar yajá péprunmaya Jerusarénum káunkarmiayi. Kame paskua jeatsain Muisais timia núnisan ni ayashísha enentáisha iwiarnarat tusa wakeriarmiayi.

⁵⁶ Jesusnasha eak yujarmiayi. Tura Yusa Uunt Jeen pujusar nuamtak aniniaisar “¿Warí enentáimiam. Jístanam tatimpiash?” tiarmiayi.

⁵⁷ Pariséusha Israer-patri uuntriasha akupainiak “Jesus pujá nekaamka uatkata” tiarmiayi. Jesusan sepunam enkeatai tusar tiarmiayi.

12

Marí Jesusan kunkuinian kuérmiania nu
(Mateu 26.6-13; Márkus 14.3-9)

¹ Paskua jisat jeatin sais tsawant ajasmatai Jesus Petania péprunam wémiayi. Jesus jakamunmaya iniantkimia nú Rásaru nuin pujumiayi.

² Jesus jeamtaí ayurawarmiayi. Rásarusha niijiai yurumámiayi. Mártasha yurumkan iwiasmakmiayi.

³ Tura Marikia kunkuinian ti kuitjai ritru ajapén sumak itiamiayi. Tura Jesusa nawen kuer ni intiashijiai japirmiayi. Jeasha nu kunkuinjai ti shiir kunkuñmiayi.

⁴ Jútás Iskariúti, Semun̄ka uchirí, nūj pujumiayi. Niisha Jesusa unuinia-mur̄intiat ukunam Jesusan surukmiayi máawarat tusa. Niisha tímiayi

⁵ “¿Urukantai nu kun̄kuinian ti kuit̄jai surukchama kuítrinchan súsatniun?”

⁶ Kame kuítrinchan enentáimtak tíchamiayi. Antsu unuiniamu kuítrin wainkia asa yúpichuch kasamkamniuyayi. Tuma asa nuna tímiayi.

⁷ Tura Jesus tímiayi “Iniaisata. Wi iwiarnakui kuératniun sumak ikiur-tusuiti.

⁸ Kuítrincha tuke atum̄jai íruntsuk. Antsu Wikia atum̄jai tuke pujuschatta-jai” tímiayi.

Rásaruncha máataj tiarmiania nu

⁹ Israer-shuarsha Jesus Petania péprunam pujan antukar Jesus ístaitсар weriarmiayi. Rásaruncha Jesus jakamunmaya iniantkimiua nusha iyutai tusar wearmiayi.

¹⁰ Túramtai Israer-patri uuntrin̄kia chichaman jurusarmiayi Rásaru maatai tusar.

¹¹ Untsurí Israer-shuar Rásaru iniantkimiun nekaawar Israer-patrin ikiukiar Jesusan enentáimtusarmiayi. Túrawarmatai Rásaruncha máatniun wakerukarmiayi.

Jesus Jerusarénum shiir wayamiania nu

(Mateu 21.1-11; Márkus 11.1-11; Rúkas 19.28-40)

¹² Paskua namperan pachiintiuktajtsa ti untsurí shuar Jerusarénum wearmiayi. Kashin tsawar Jesus nú peprunam tátinian nekaawarmiayi.

¹³ Niisha tintiuki nuké áinis nukan júurar Jesusan in̄kiuntai tusar jíinkiarimiayi. Túrawar untsumainiak “Shiir tati, tiarmiayi. Yusa kakarmarīj̄jai winiana nu tí pen̄keraiti. Israer-shuara uuntri asa shiir atí” tu untsumiarmiayi.

¹⁴ Jesussha umpuurun wáiniak entsamkamai. Núnisan̄ áarmaiti Yus-Chichamnum:

¹⁵ “Seun̄ péprunmaya shuara, ashankairap. Atumí Akupniur̄j̄ umpuurunam entsamak winiawai.”

¹⁶ Nu chichamaik Jesusa unuiniamur̄j̄ nu túrunamun nekaacharmiayi. Tura ukunam Jesus nayaimpiniam shiir waketkimtai enentáimprarmiayi. Ashí Jesusna aarma núnisan̄ túrunamiayi.

¹⁷ Jesus Rásarun iwiarsamunmaya iniantkimiun wáinkiarua nú shuar nuna áujmatiarimiayi.

¹⁸ Tuma asamtai shuar Jesus nu tujintiamun túramtai nekaawar Jesusan in̄kiun̄ktaj tusar jíinkiarimiayi.

¹⁹ Tura Pariséusha nuamtak tiarmiayi “Iis, pen̄ké tujinkiaji. Maa iista, ashí shuar Nin nemarainiatsuk.”

Kriaku apach Jesusjai chichastinian wakeriarmiania nu

²⁰ Paskua nampernum Yus shiir awajsatniun Jerusarénum weriaruka untsurí nun̄kanmaya shuar ármiayi. Kriaku apachcha ármiayi.

²¹ Niisha Jiripin weantukarmiayi. Kame nu Jiripi Petsaitia péprunmaya uyayi. Petsaitia péprusha Kariréa nun̄kanam awai. Nincha Kriaku apach seainiak “Uunta, Jesusjai chichastaitсар wakeraji” tiarmiayi.

²² Jiripisha Antresan werí ujakmiayi. Nuyá niīj̄jai métek tsanin̄kiar Jesusan weriar ujakarmiayi.

²³ Jesussha tímiayi “Wi Aents Ajasuitjiana ju tsawantur jeayi. Túramtai shiir awájnástajai.

²⁴ Wi tájana nu ti nekasaiti. Jinkiaia ántsanketjai. Araachmaka nin̄ki pujatsuk. Antsu araamka tsapain jinkiaichir̄j̄ kaushmariat nerek ti untsurí

ajatsuk. Núnisnak Wi jakamtai ti untsurí shuar yamaram iwiaakman takusartatui.

²⁵ Shuarsha jinkiaia nuke aya ju nunkanam pénger pujustinian enentáimkiunka ántar pujak nekas iwiaakmarin emen^ukaktatui. Tura ju nunkanam pénger pujustinian enentáimtsuk jákatniuncha ashamchaa nú shuarka nekas iwiaakman wáiniak tuke iwiaaku átatui.

²⁶ Shuar winia átaj takun^uka nemartusti. Túran^uka Wi pujajna nuí Wí shuar tuke átatui. Núnisan^u Wí shuar winia takatrun takáa nuna winia Aparsha shiir enentáimtustatui' tímiayi.

Jesus ni jákatniun étserui

²⁷ 'Yamaikia enentáirui ti itiurchat pujajai. ¿Warittiajak. "Aparu, ju túrunatniunmaya uwemtikrurta" titiajash? Antsu jú túrunatniun táwitjai.

²⁸ Aparu, wi túramujai ashí shuar ame náarmin shiir enentáimturarti" tímiayi Jesus.

Tutai nayaimpinmaya chichaman antukarmiayi. "Winia náarun shiir awajsaitjai tura ataksha shiir awajsattajai" tímiayi.

²⁹ Shuarsha nui pujuinia "ipiamtachuashit" tiarmiayi. Tura chikichcha "Nayaimpinmaya suntar Nin chichasai" tiarmiayi.

³⁰ Jesussha tímiayi "Wi antuktinian chichaschayi antsu átum nekaatarum tusa chichasai.

³¹ Yamaikia nunkanam makumatin jeayi. Tura íwianch ju nunkanam akupniua nu nupetnak ajapnattawai.

³² Tura numiniam awajnaintai ashí nunkanmayan^uka shuar enentáimturartatui" tímiayi.

³³ Juna taku krúsnum jákatniun ujakmiayi.

³⁴ Shuarsha awajirar tiarmiayi "Yaunchu Yus akupkamu papiniumia áujsar nékaji. Kristu tutai tuke jáatsuk iwiaaku pujustiniaiti. ¿Itiurak nuikia "Aents Ajasu numiniam awajnitniuiti" tame? Aents Ajasuka Krístuchukait, Yus anaikiamu. Núchaitkiuin^uka Aents Ajasuka yait?" tiarmiayi.

³⁵ Nuin^uka Jesus tímiayi "Wi tsáapninia áintsan^uketjai. Tsáapnisha atum^uin aya ishichik tsawantin tsáapniartatui. Tsáapin ana juik wekasatarum kirit ajatsain^u. Kame kiritniunam wekaana nusha nékatsui itiuranimpia wea.

³⁶ Tsáapnin wáinkuram nin enentáimtustarum. Túrakrum winia tsáapnintrui wekasattarme." Jesussha nuna ti wémiayi uumak pujustaj tusa.

Untsurí Israer-shuar Jesusan enentáimtuscharmiania nu

³⁷ Jesus aentsti tujintiamun ti untsurí túramtaisha Nin enentáimtuscharmiaiyi.

³⁸ Yúsnan etserin Isayas yaunchu aarma uminkiatniuyi:

"Unta, ¿ya ii ujam antukuit. Yusa kakarmarisha yana iniaktusuit?" tu áarmaiti.

³⁹ Nuna uminiak Jesusan enentáimtuscharmiaiyi. Tura nu arantcha Isayas áarmiayi:

⁴⁰ "Yus nin kusuru awajsaiti tura ni enentáin^ucha kátsuram awajsaiti. Ni jii^ujia^u íimsain^u tusa tura ni enentáijia^u nekaawa^uin tusa túrait^u. Kame ni tunaari^u iisar enentáimtuiniakui Yus nin tsuárain^uti" tu áarmaiti.

⁴¹ Isayas yaunchu Jesusan nayaimpiniam ti shiir pujan wáiniak nuna tímiayi.

⁴² Tuma ain^u untsurí Israer-shuarsha tura ni uuntrin^umayasha Jesusan nekas enentáimtusarmiayi. Tura niisha Pariséun ashamainiak paant tícharmiaiyi. Israer-shuara iruntairiya jii^uki awetamaj^u tusa ashammiarmiayi.

⁴³ Yus shiir enentáimtursati tutsuk antsu shuar shiir enentáimtursati tusar túrawarmiayi.

Shuaran sumamtikiatniun táchaitjai antsu uwentikratniun táwitjai, timiania nu

⁴⁴ Jesus kakantar untsujuk tímiayi “Winia enentáimturuk aya Winiak enentáimturtsui antsu winia Aparun Winia akuptukua nunasha enentáimtawai.

⁴⁵ Winia wáitkiusha Winia Aparnasha wáinui.

⁴⁶ Wikia tsáapnin asan Winia enentáimturainia nuka kiritniunam wekasain tusan ju nunkanam táwitjai.

⁴⁷ Shuaran sumamtikiatniun táchaitjai antsu uwentikratniun táwitjai. Tuma asantai shuar winia chichamprun antuk umíachkuṅka sumamaiti. Tura Wikia sumamtikiachuitjai.

⁴⁸ Winia nakitrur chichampruncha enentáimtachuka sumamtikiamuiti. Wi timiaj nuka amuukatin tsawantaj nin sumamtikiattawai.

⁴⁹ Wi enentáimmiyajain chichaatsjai. Winia Apar akattur akuptukuiti. Tura chichastinia nuna surusuiti.

⁵⁰ Wisha nékajai, ashí winia Apar akupeamuka yamaram iwiaakman tuke amuukashtinian súawai. Tuma asantai winia Apar túrutmia núnisnak tajai” tímiayi Jesus.

13

Jesus ni unuiniamuri nawen nijiatramiania nu

¹ Paskua jísat jeatin chikichík tsawant ajasmatai Jesusa tsawantri jeatemayi. Túramtai ju nunkan ikiuki ni Apariin wétiniuyi. Jesussha nuna nekaamiayi. Ashí Níiniun ju nunkanam pujuinian tuke anea asa amúamunmasha yapajitsuk tuke aneemiayi.

² Nu tsawantajsha murikiun yúatin ármiai. Tura yurumáin jeatsain, uunt iwianch Semunṅka uchirí Jútas Iskariúti enentáin Jesusan surukat tusa enentáimtikramiai.

³ Tura Jesus Yusaiya tau asa waketkitniuyi. Tura Yus Apa ashí mash susamiayi akupin atí tusa. Jesussha nuna nekáa

⁴ chíkich yurumuk pujuiniaj wajakmiayi. Tura pushirín ámiak awaṅkémán emenmamamiayi.

⁵ Nuyá nijiaamatainiam entsan yará ni unuiniamuri nawen nijiatramiai. Tura awaṅkémjai japirmiayi.

⁶ Semun Pítrunam jeamtai Pítur tímiayi “Uunta, ¿Winia nawer nijiertaj tamek?”

⁷ Jesussha tímiayi “Wi túrajna nu yamáí nékatsme tura ukunam nekaattame.”

⁸ Tura Pítur tímiayi “Peṅké winia nawer nijiarhattame.”

Jesussha tímiayi “Wi nijiaachkuṅkia Wijiaj tsanṅkia pujuschamniaitme.”

⁹ Tutai Semun Pítur tímiayi “Nuṅkia, Uunta, aya nawerkechu antsu uwejrusha tura muukarsha nijiatrurta.”

¹⁰ Tura Jesus tímiayi “Yamáí mainkia ayashí shiir asantai aya nawenij nijiamártiniaiti. Atumí enentáin ashí péṅkeraitrume. Túrusha ashí shuarcha” tímiayi.

¹¹ Kame Jútas Nin suruktinian nekáa “ashí shuarcha” tímiayi.

¹² Jesussha nijiar umik ni pushirín entsarmiai. Tura atak pujus tímiayi “¿Atumsha Wi túrajna nu nekaarmek?”

¹³ Wi atumí Uuntrj asantai nekas “Uunta” túrutrume. Nusha péṅkeraiti.

¹⁴ Tura Jintinniuitiatan tura Úuntaitiatan atumí nawen nijiarhajak. Atumsha núnisrumek nuamtak nówem nijiatnairatarum.

¹⁵ Atumin nekapruatsan túramjai. Atumsha núnisrumek túratarum.

¹⁶Ti nekasán tajai. Takarniuka ni uuntri nan_{ka}amaschaiti. Akupkamusha akupea nuna nan_{ka}amaschaiti.

¹⁷Nu nekaarum túrakrumka shiir átatrume.

¹⁸“Tura tájana nuna ashí tátsujrume. Anaikiaitiaj núnaka Wi nékajai. Tura Yus-Chicham uminkiatniuiti, nékajai. Ju aarmaiti:

“Wijiaj yurumna nu winia nemasur ajasai.”

¹⁹Nuka túmatsain_u ujaajrume. Nuyá túrunamtaí Yusa Uchiríntjai nusha paant nekaattarme.

²⁰Wi tájana nu nekasaiti. Shuar Wi akupeaj nuna shiir itiaakka Winiasha shiir itiaarui. Tura Winia shiir itiaarna nusha Winia Akuptukuncha itiaawai” tímiayi.

Jesus Jútas Nin suruktinian étserui

(Mateu 26.20-25; Márkus 14.17-21; Rúkas 22.21-23)

²¹Nuna ti, Jesus ni enentáin ti itiurchat enentáimpramiayi. Tura paant tímiayi “Nekas tajai, chikichik juj atumjai pujana nu Winia surutkattawai.”

²²Tutai ni unuiniamurj nuamtak íniaisar “¿Yanak ta?” tiarmiayi.

²³Chikichík unuiniamurj, Jesus ti aneamu, Nijiaj tsani_n yurumuk pujumiayi.

²⁴Tuma asamtaí Semu_n Pítiur ni uwejéjai iniakmas “Aniasta, ¿yanak áujmata?” tímiayi.

²⁵Tutai Jesusan áyanmatsan aniasmiayi. “¿Yait, Uunta?” tímiayi.

²⁶Jesussha ayak “Tantan túumnium ajun_{ka} susattaj núiti” tímiayi. Nújain_u tantan túumnium ajun Semun_{ka} uchirín Jútas Iskariútin susamiayi.

²⁷Tura wárik Jútas tantan achikmataí íwianch ni enentáin wayamiayi. Nuyá Jesus tímiayi “Túratamna nu wárik túrata.”

²⁸Tura ashí nuj yurumainiak pujuarmia nusha wariniak ta tusa nekaacharmiayi.

²⁹“Kuítríncha kuit súsarta” tátsuash tu enentáimprarmiayi. Tura chikichcha “nampernum yurumátin atsumajnia nu sumakta” tátsuash, tu enentáimprarmiayi. Jútas kuítian wáinin asamtaí tu enentáimprarmiayi.

³⁰Jútas tantan yua kashi ajasmanum jíinkimiayi.

Yamaram akupkamu

³¹Jútas jíinkimtai Jesus tímiayi “Wi Aents Ajasu asamtaí winia kakarmar yamaikia paant átatui. Tura wi túramujaj Yusa kakarmarisha ti paant átatui.

³²Wi Yusa kakarmarín paant awajeakui Wisha ni Uchirí asamtaí winia kakarmarnasha Yuska wárik paant awajsattawai.

³³Uchichiru, atumjai ti untsurj tsawant pujuschattajai yamaikia. Wi Israer-shuaran tímiaj nútiksanak atumin tájarne. Atumsha Winia éátkáttarme tura wi wéamunam winishtatrume.

³⁴Ju yamaram akupeamun amaajai nuamtak mai anenai ajatarum tusan. Wi atumin aneajrumna núnisrumek atumsha nuamtak mai anenai ajatniuitrume.

³⁵Anenaiyakrumni_nkia nujaj ashí shuar “Kristu unuiniamurj ániawai” túramartatui.

Pítiur Nin natsantratniun Jesus ujakmiania nu

(Mateu 26.31-35; Márkus 14.27-31; Rúkas 22.33-34)

³⁶Semu_n Pítiur Jesusan aniasmiayi “Uunta, ¿tua wéam?”

Jesussha tímiayi “Wi wéajna nuj yamaikia winichminiaitrame. Tura ukunam winittiarne.”

³⁷Nuyá Pítiur tímiayi “Uunta, ¿urukamtaí yamaikia winichminiaitiaj? Ámin yáintajtsan jakataj tajai.”

³⁸ Jesussha tímiayi “¿Nekasmek táme? Ti nekas tájame, atash shiniatsain Winia menáintiú natsantrurtatme” tímiayi.

14

Jesus Yus-jintiaiti

¹ “Kúntuts pujusairap. Yus enentáimtustarum, Winiasha enentáimtursatarum.

² Winia Aparuí átum pujustin ti ankant awai. Tura nuna iwiarataj tusan Aparuí wéajai, nekasaiti. Nekaschaitkiuinkia ¿itiurak ujakaajrum?

³ Tura iwiaaran amukan ataksha tátatjai. Tura tana yaruaktatjarme, wi pujamunam atumsha pujusúk tusan.

⁴ Wi wéaj nu nékarme tura jintiasha nékarme” tímiayi Jesus.

⁵ Tumas tímiayi “Uunta, Ame weam nu nékatsji. ¿jintiasha itiurak nekaat-taj?”

⁶ Jesussha tímiayi “Wi nekas jintiaitjai. Wijjainchu wekaana nuka winia Aparuí jeatniun penké tujintiawai. Tura Wisha tuke nekas tiniu asan nekas ana nuna shuáran nékamtikijai. Wisha shuáran yamaram iwiaakman tuke amuukashtinian súwitjai.

⁷ Winia nékarkurmeka winia Aparsha nekaawaintrume. Yamaisha Nii wáinkia asarum nékarme” tímiayi.

⁸ Nuinkia Jiripisha tímiayi “Uunta, Apasha wáinkiarka maak.”

⁹ Jesussha tímiayi “Jiripi, atumjai ti pujusu aisha ¿tuke nékartsumek? Winia wáitkia nuka Winia Aparnasha wáinkiaiti. ¿Itiurak, nuikia, “Apasha wáinkiarka maak” tame?

¹⁰ Winia Aparjai tsaniñkian pujakun tura winia Aparsha Wijjai pujakui tuke chikichkiitji. ¿Nu nékatsrumek? Wi tájarmena nu Winia chichampruchuiti. Yus Apa Winí pujak ni wakeramun takaawai.

¹¹ Nekaatarum. Wisha winia Aparjai tsaniñkia pujakur nekas chikichkiitji. “Nu chicham itiurchataiti” enentáimkiurmeka wi túramu nuikia enentáimpratarum. Wi túramujai chikichik ájinia nu páantchakait.

¹² Wi tájarmena nu ti nekasaiti. Winia enentáimturna nu Wi túrajna nuna túrattawai. Tura winia Aparuí wéakui nuna nankaamas tujintiamun túrattawai.

¹³ Ashí Winia enentáimtursarum seatrumna nuna amastatjai. Nújainkia winia Apar shiir awajnastatui.

¹⁴ Winia enentáimtursarum seakrumninkia ashí túrattajai’ tímiayi.

Jesus Yusa Wakanín akupkattawai

¹⁵ ‘Atumsha anentkurmeka winia chichamur umiktarum.

¹⁶ Tura wéakun winia Aparun chikichan akupturmakti tusan seattajai. Niisha atumjai tuke pujak atsanamprartatui.

¹⁷ Nusha Yusa Wakaníinti. Yus-shuarcha Nin nekaachmin ániawai. Tuma asamtai ni enentáin wayachminiaiti. Antsu átumka atumi enentáin pujakui Nii nékarme. Niisha atumí enentáin tuke pujustatui.

¹⁸ Mitiakia áitkiasnak ikiukchattajrume. Atumíin atak tátatjai.

¹⁹ Ishichik tsawant nankaasmatai chikich shuar irunna nu wáitkiachartatui. Tura Wi iwiaaku asamtai átumka nu iwiaakmajai pujustatrume. Tuma asarum wáitkiattarme.

²⁰ Tura nu tsawantai ju nekaattarme. Wisha winia Aparjai tsaniñkia pujakur chikichkiitji. Núnisnak Wisha atumjai tsaniñkian pujajai. Tura atumsha Wijjai tsaniñkia pujarme.

21 Shuar Winia anentuka wi akupkamun nekáa umíawai. Nú shuarnaka winia Aparsha aneawai. Wisha nin aneajai tura nekarati tusan iniaktustatjai.” Jesus nuna tímiayi.

22 Chíkich Jútas, Iskariútichu, tímiayi “Uunta, ¿urukamtai ashí shuarnum iniaktutskesha aya in iniaktustatam?”

23 Jesus tímiayi “Winia anentuka tájana nuna enentáimtawai. Winia Aparsha nu shuaran aneattawai. Tura Wisha winia Aparnum nu shuarjai tsaniñkia pujustatji.

24 Antsu Winia anentchaka tájana nuna enentáimtatsui. Átum ántarmena nú chichamka wíniachuiti, antsu Yus Apa Winia akuptukua Núnaiti’ tímiayi.

25 ‘Atumjai tuke pujakun nuna tájarne.

26 Yus Apa ni Shiir Wakanin atumin yáinmak atsanamprarat tusa akupturmaktatrume. Wi seam túrattawai. Nu Wakancha ashí Wí ujakjarmena nuna atak enentáimtikramprar ashí unuitiamprartatui’ tímiayi.

27 ‘Imiatkinchanum pujustarum. Imiatkinchanum pujajna núnisrumek pujustarum tusan amaajai. Jú nunkanmanka warastin wáinkiashtatrume. Antsu iturchatnum pujayatrunkesha Wijjai imiatkinchanum pujustrume. Ashamtsuk pujustarum. Iturchat enentáimprairap.

28 Nuik timiaj nu antukmarme. Aparuí wena atak atumiín tátatjai. Winia Aparka Wijjai nankaamas úuntaiti. Tuma asamtai ti nekas anentkurmeka “Aparuí wéajai” takui ashí warasaarme.

29 Nuka túmatsain ujaajrume. Túrunamtai nuyá Winia enentáimtursattarme” tímiayi.

30 Jú nunkanmayan akupin winiakui atumjai núkap chichaschattajai yamaikia. Wíniaka nupettukchamniaiti.

31 Tura Wikia winia Aparun aneajai tura Nii akupturkama nuna tuke túrajai. Ashí shuar nuna nekaawarti tusa ashí túrunatniuiti. Wajaktiarum. Juyá wetái’ tímiayi.

15

Numi arakma áintsanketjai

1 ‘Winia iwiaakmarun amaakun numi arakma áintsanketjai. Wikia kampuintjai atumsha kanawentrume. Winia Aparsha arakan wáiniua núnisaiti.

2 Winia kanawernasha nereatsna núnaka tsupik ájapeawai. Tura nereana núnaka puruawai nú nukap nerekat tusa.

3 Wi ujakjarmena nujai puruarmaitrume.

4 Numí kanawesha kampuin áchitkiachkunka niñki nerechamniaiti. Núnisrumek atumsha Winí áchitkiachkurmeka nerechamniaitrume. Wi atumjai áchitkij núnisrumek atumsha Winí tuke áchitkia atarum’ tímiayi.

5 ‘Wikia kampuintjai atumsha kanawentrume. Kampuinñkia kanawen áchitkia núnisnak achiakjarne. Tura kanawe ni kampuinin áchitkia núnisrum Winí áchitkia atarum. Túrakrumka núkap nerektatrume. Antsu Wíjjainchuka penker túratin penké tujintiarne.

6 Winí áchitkiachuka ajapam kukartatui. Kanawesha kukarmatai shuar irumkar áesawartatui’ tímiayi.

7 ‘Tuke Winí áchitkiaitkiurmeka tura winia chichamprusha kajinmattsuk emetarmeka átum wakerarmena nu seakrumin amastatjai.

8 Átum núkap nereakrumniñkia ashí shuar “Nekas Jesusa unuiniamurinti” túramartatui tura winia Aparnasha shiir awajsartatui.

9 Winia Apar anenna nútiksanak Wisha atumin aneajrume. Winia aneamur tuke atarum.

¹⁰ Winia Aparu akupkamurin umiakun tuke ni aneamurintjai. Núnisrumek winia akupkamur umiakrumka tuke winia aneamur átatrume' tímiayi.

¹¹ 'Wi waraajna áintsarmek warastarum tusan nuna tájarme. Tura ti shiir warastatrume.

¹² Wi akupkamu júiti: "Wi aneajrumna nútiksarmek ashí anenaitiarum."

¹³ Shuar ni amikrin yáintaj tusa jakaŋka ti aneŋkartichukait.

¹⁴ Wi akupeamu takaakrumka atumsha winia amikruitrume.

¹⁵ Takarniuka ni uuntrij takaana nuna nékatsui. Tuma asamtai "winia takarniuruitrume" tátsujrume. Antsu ashí winia Apar táman ujaku asan "winia amikruitrume" tájarme.

¹⁶ Aya atumí enentáimsamurijain Wíi shuar ajaschamarme. Antsu akatramur ajastarum tusan atumniaka achikjarme Wi. Winia takatur takastiniaittrume. Túrarum penker túratniuitrume nerektinia áintsarmek. Tura nu nere amuutsuk tuke átiniaiti. Tuma asamtai winia Apar searmena nuna amastatui.

¹⁷ Júnaka akupeajrume: Nuamtak mai anenai ajatarum' tímiayi.

Yus-shuarcha Jesusnasha Níniuncha nakitiainiawai

¹⁸ 'Ju nuŋkanmaya shuar Winia emka nakitrurar atumniasha nakitramarme.

¹⁹ Atumsha ju nuŋkanmaya shuaraitkiurminkia niiniua nútiksan anenmaintrume. Antsu Wíi shuar ajastarum tusan ju nuŋkanmaya achikmajrume. Túramtai nekas ju nuŋkanmayanchuitrume yamaikia. Nu asamtai nu shuar nakitramainiawai.

²⁰ "Takarniuka ni uuntrij naŋkaamaschaiti" tíchamkajrum. Shuar Winia yajauch awajtusaru ásar atumniasha yajauch awajtamstartatui. Chikichcha umirtukaru ásar atumniasha umirtamkartatui.

²¹ Winia Akuptukun nékachu ásar Winia enentáimturkurmin yajauch awajtamstartatui' tímiayi.

²² 'Wi tana Yus-Chichaman nin ujakchamtaiŋka tunaanum sumamacharaayi. Antsu ujakma ásar "Nékachkun túraitjai" tíchamin áiniawai.

²³ Winia nakitruinia nuka winia Aparnasha nakitiainiawai.

²⁴ Aents penke túrachman túrachuitkiuinka tunaanum sumamacharainti. Antsu wi túramun wáinkiaru áiniayat Winiasha tura winia Aparnasha nakitiainiawai.

²⁵ Yaunchu Yus akupkamunam áarmaiti:

"Penke ántar nakitrurarmai."

Nu chicham uminkiatu tusa túrunaiti' tímiayi.

²⁶ 'Tura atsantamprattsa yáinmana nuna winia Aparuiyá akuptuktatjarme. Niisha tuke nekas tiniu Wakaniiti. Niisha Yusajyá taa atumin nekamtikramprattarme.

²⁷ Atumsha yaunchu Wijijai pujusu asarum nekamtikiattarme' tímiayi.

16

¹ 'Átum kanartukairum tusan júnaka tájarme.

² Israer-shuar iruntainiumiá jijiki akuptamkattarme. Nu arantcha mantamainiaksha "Yúsan shiir awajtsatsan túrajai" tíartatui.

³ Nu shuar Winiasha tura winia Aparnasha nékachu ásar túrutmawartatui.

⁴ Núnaka yamá*i* tájame. Tura túrunamtai "núnisan átiniaiti" timiaj nu nekaarum itiurchat enentáimprairap' tímiayi.

Yusa Wakaní túrana nu

'Atumjai tuke pujá asan núnaka yaunchu ujakchamajrume.

⁵ Antsu yamaikia wáketjai winia Akuptukmia nujai pujustaj tusan. Tuma áin wéajna nu inintratsrume.

⁶ Antsu nuna takui ti kuntuts enentáimprarme.

⁷ Tura Wi wématai atumjainkia nuna nankaamas péñker átatui. Iis, Wi wéaknaka atumin yainmaktinia nuna akupkattajai tura wéachkuinkia táchattawai. Nuka ti nekasaiti.

⁸ Yusa Wakaní taa ashí jú nunkanmaya aentsun ju menaintiun nekamtikiatawai. Ni tunaari aan nekamtikiatawai. Péñker tunaajainchu wekasam-niana nunasha nekamtikiatawai. Tura Yus tunaanum súmamtikiamniana nunasha nekamtikiatawai.

⁹ Winia enentáimturainiachu tunáarintin áiniawai.

¹⁰ Winia Aparuí wáketkui wáitkiashtatrume. Tuma asamtai ashí shuar wi péñker tunaajainchu wekaamun nekaawartatui.

¹¹ Tura ju nunkanam akupniunka Yus tunaanum súmamtikia asa shuar-nasha súmamtikiamniati. Nuna paant nekaawartatui' tímiayi.

¹² 'Nu arantcha núkap tíntjiarme túrasha átumka nekaachaintrume.

¹³ Yusa Wakaní ashí nekas tiniu asa ashí nekasa nuna unuitiamprattarme. Ni enentáimmiajai táchattawai antsu winia Aparuí antukma nuna ujatmaktatui. Ukunam átatna nunasha ujatmaktatui.

¹⁴ Ashí Wínian ujatmak Winia shiir awajtustatui.

¹⁵ Ashí winia Apar takakna nusha Wíniati. Nu asamtai "ashí Wínian ujatmaktatui" tajai' tímiayi.

Kúntuts pujuiniayat ukunam warasartatui

¹⁶ 'Ishichik pujusrum Winia wáitkiashtatrume. Nuyá ataksha ishichik pujusrum ataksha wáitkiattarme. Wisha winia Aparuí wéajai" tímiayi.

¹⁷ Nuyá ni unuiniamuri nuamtak aniniaisarmiayi "¿Jú chichamsha warimpait? "Ishichik pujusrum wáitkiashtatrume tura ataksha ishichik pujusrum wáitkiattarme tura Aparuí wéajai" tátsuk.

¹⁸ "Ishichik pujusrum" tana nusha ¿warimpait? Nii tana nu ántatsji" tiarmiayi.

¹⁹ Jesussha nin aniaistai táman nekáa tímiayi "Ishichik pujusrum wáitkiashtatrume nuyá ataksha ishichik pujusrum wáitkiattarme" tímiajai. ¿Núchakait átum inintrustin wakerarmena nu?

²⁰ Ti nekas tájarme: Átumka kúntuts pujusrum úttiatrume tura Yus-shuarcha warásártatui. Tuma ajnk' átum kúntuts pujayatrume ukunam warastatrume.

²¹ Iis, nuwasha jurertin tsawant jeamtai najaimiak wáitiatsuk. Tura uchin jurerka ti waraak wáitsamunka enentáimsui.

²² Atumsha núnisrumek yamaik kúntuts pujarme. Tura atak íitjiarum tusan winiakui ti shiir atumí enentáin warastatrume. Nu warastinian jurutram-kichminia áiniawai.

²³ 'Nu tsawantinkia penké ininsashtatrume. Ti nekas tájarme Winia enentáimtursarum winia Apar searum nuna ashí amastatui.

²⁴ Yamaisha Winia enentáimtursarum winia Apar seachurme. Seakrumninkia amastatui ti shiir warasaruk tusa' tímiayi.

Jesus jú nunkanmayan nupetkaiti

²⁵ 'Métek-taku chichamjai nakumkan nuna tímiajai. Tura ukunmanka nujai chichatsuk winia Aparnan paant ujaktatjarme.

²⁶⁻²⁷ Nu tsawantaj átumka Winia enentáimtursarum winia Apar seattarme. Winia Aparsha atumin anea asamtai Wi Nin áujsatin atumashtatrume. Winia anentu asarum tura winia Aparuíya taman enentáimtakrumin Niisha anenmawai.

²⁸ Winia Aparuíya jíinkin jú nunkanam táwitjai. Yamaikia jú nunkanmaya jíinkin ataksha Aparuí wáketjai” tímiayi.

²⁹ Nuyá ni unuiniamuri tiarmiayi “Yamaikia métek-taku chichamjainchu chichaame.

³⁰ Mash nékaitme. Shuar Ámin ininmatsainñ péñker áimkiatin nékame. Nu nekaar Ame nekas Yúsnumiaitme tu enentáimtaji” tiarmiayi.

³¹ Tura Jesus tímiayi “¿Nekasash enentáimtarum?

³² Ti warik átumka ashamkarum niisháa tsakinmaktatrum tura Winiak ikiurkittiarme. Antsu winia Apar pujakui Wiki pujatsjai.

³³ Winia enentáimturkuram imiatkinchanum pujusarat tusan tájarme. Jú nunkanam ti wáitsattarme. Tura Wi jú nunkanmayan nupetka asamtai warastarum” tímiayi Jesus.

17

Jesus ni unuiniamurin Yúsán áujtawai

¹ Nuna ti Jesus nayaimpinmaani íimias tímiayi “Aparu, yamáí jeayi ame Uchiram shiir awajsatin. Núnisañ ame Uchirmisha péñker awajtamsattawai.

² Ashí shuara Akupniuri najataitme. Nujainkia Winia surusumna nú shuaran yamaram iwiaakman tuke amuukashtinian súsaitjai.

³ Aparu, chíkich atsawai. Amek nekas Yúsaitme. Wisha Jesuskrístuitjai Ame akuptukmamna nu. Nu asamtai ashí shuar nuna enentáimtak yamaram iwiaakman tuke amuukashtinian takakui.’

⁴ ‘Ashí túratniun akuptukmamna nuna amukuitjai. Túran ju nunkanam shiir awajsaitjame.

⁵ Nuna túramtai, Aparu, ti yaunchu jú nunka atsaísha Ámijiai pujakui shiir awajtusmamna núnismek yamaisha shiir awajtusta.’

⁶ ‘Ashí jú nunkanmaya surusmamna nú shuaran Ámin nekantikiamjai. Áminiu áiniakui surusmame. Niisha ame chichammin umirtámkaruiti.

⁷ Ashí Wi takaajna nu Amek surusuitme. Niisha nuna nékainiawai.

⁸ Ame chichamem surusmam nuna ujakam niisha umirtámkaruiti. Ame akuptukakmin Amiiníya táwitjai. Nu nekasaiti tu enentáimtuiniawai.’

⁹ ‘Nin yainkiarta tusan seajme. Jú nunkanmaya shuaran Ámin enentáimturmainiatsna nuna seattsujai. Antsu Ame surusmam nuna, Áminiu ajasarmatai, yainkiarta tusan seajme.

¹⁰ Ashí Winia ainia nuka Áminiuiti. Tura ashí Áminiu ainia nuka Winia áiniawai. Winia péñkerusha ni túramunam paant awajsaiti.’

¹¹ ‘Wikia yamaikia jú nunkanam pujuschattajai. Tura nu shuarka jui pujuartatui. Antsu Ámijiai pujustajtsan winiakui ashí surusumna nuka, Aparu, ti shiir asam ame kakarmarmijiai wáinkiata. Wisha Ámijiai chikichik ájinia núnisañ niisha ashí iruntrar chikichik ajasarti.

¹² Jui niijiai pujakun ame kakarmarmijiai ti péñker wáinkiamjai. Antsu Yus-Chichamnum aarma uminkiati tusa aya chikichik menkakaiti. Niisha tuke emesnartinia núiti.’

¹³ ‘Yamaikia Amijini winiajai. Tura jui tuke pujakun juna tájame. Niisha Wi waraajna núnisar ti shiir warasarat tusan tajai.

¹⁴ Wi jú nunkanmayanchuitjai. Niisha núnisañ jú nunkanmayanchu áiniawai. Tuma asamtai ame chichammin Wi susamtai jú nunkanmaya shuarka nin nakitiainiawai.

¹⁵ Jú nunkanmaya jííki tusan seatsjame. Antsu íwianch nin nupetkañ tusan seajme.

¹⁶ Wi juyanchuitiaj áintsan niisha juyanchu áiniawai.

17 Ame chichammin ti nekasa nuna ántuiniakui péñker awajsata.

18 Juyá shuarnum akuptukmam áintsan Wisha nin chíkich shuarnum aku-peajai.

19 Aya Áminiunak takastaj tusan enentáimtimjai. Túra asamtai niisha aya Áminiunak takastinian enentáimpratin ániawai' áujtak tímiayi.

20 'Aya níniunkeka seatsjame antsu ashí ni chichamen antukar Winia enentáimtursartatna nusha ame yáñkiarta tusan seajme.

21 Ashí niisha chikichkiniak enentáimtusarti tusan seajme. Wisha Amesha, Aparu, chikichik ájinia núnisan niisha Iijai iruntrar chikichik ajastai tusan seajme. Wíi shuar chikichik najanata tusan seajme. Nuyá ju nunkanmaya shuar akuptukuitmena nuna nekaawartatui.

22 Ame shiir awajtursamna núnisnak Wisha nin shiir awajsaitjai. Iikia chikichik ájinia núnisan niisha chikichik ajasarti tusan túraitjai.

23 Wi ni enentáin pujakui Amesha Winin pujakmin penké chikichik ajasarti. Túramtai ashí shuar juna nekaawartatui: Ame akuptukuitme, tura Winia anenmena áintsam nu shuarsha aneame. Wíi shuar chikichik ajasmajai ashí shuar nuna nekaawartatui.'

24 'Aparu, shuar surusmam nu, Wi pujustajana nuj pujusarti tusan seajme. Tura ti shiir awajtusmamna nuna ísarti tusan nuna seajme. Ju nunka najanchamunman tuke anentin asam ti shiir awajtusitme.

25 Aparu, ti péñker áminin ju nunkanmaya shuar nekarmainiatsui. Antsu Wi nékajme. Ju shuarsha ame akuptukman nékainiawai.

26 Nú shuaran Ámin nekarmawarti tusan jintintiaitjai. Tura nu arantcha jintintiattajai. Nújainkia Wisha ni enentáin pujurkui Winia anenmena áintsan niisha anenkratin ajasartatui" áujtak tímiayi Jesus.

18

Suntar Jesusan achikiarmiania nu

(Mateu 26.47-56; Márkus 14.43-50; Rúkas 22.47-53)

1 Jesussha nuna tinia amuk ni unuiniamurijjai Setrun entsá katin numi arakmanum wémiayi.

2 Jútassha Nin suruktajtsa pujumia nuka nu ajan nekaamiayi. Untsurí tsawant Jesus ni unuiniamurijjai nuj iruntramtai Jútas Jesusan nuj wáinkiatniun enentáimpramiayi.

3 Tura untsurí suntarjaisha Jesusan tariarmiayi. Pariséusha Israer-shuar Patri uuntrisha suntarnasha Yusa Jeen wáiniuncha Jesusan achikiarat tusa akupkarmiayi. Niisha machitniasha nankincha rámparancha jiniasha júkiar weriarmiayi.

4 Jesussha ashí átinia nuna neka asa jiintiuki "¿Ya eaarum?" tímiayi.

5 Niisha "Nasarénumia Jesus" tiarmiayi.

Jesussha "Wiitjai" tímiayi.

Jútassha Jesusan surukua nu nijjai pujuarmiayi.

6 Tura Jesus "Wiitjai" takui ti ashamkar úkumur waketainiak iniaararmiayi.

7 Ataksha Jesus "¿Ya eaarum?" tímiayi.

Niisha "Nasarénumia Jesus" tiarmiayi.

8 Nuinkia Jesus tímiayi "Wiitjai, tájarme. Winia eatkurmeka Wíi shuar ainia juka waketkiarti" tímiayi.

9 Jesus nuik aujuk "Winia Apar surusma nu menkakacharai" timia nu uminkiat tusa Jesus "waketkiarti" tímiayi.

10 Nuyá Semun Pítiur machitian jusa Marku kuishin untsuurnumaani tsupirkamiayi. Markusha Israer-patri uuntri takarniuriyayi.

11 Túramtai Jesus Pítrun tímiayi “Machitrumka awainkia ikiusta. Winia Apar wáitsatniun surakuinkia ¿wáitsashtinkaitiaj?”

Israer-patri úuntriñiam júkiarmiania nu
(Mateu 26.57-58; Márkus 14.53-54; Rúkas 22.54)

12 Nuinkia apach suntarsha ni kapitíantriñsha Yusa Jeen wainniusha Jesusan achikiar jinkiwarmiayi.

13 Nuyá Anasa jeen júkiarmiayi. Anassa Kaipiasa wearíyayi. Tura Kaipias nu uwitin Israer-patri uuntriñyayi.

14 Kaipiasa nuik “¿Ashí Israer-shuar mesertin péñkerkait. Antsu aya chikichik shuar jákatin péñkerchakait?” timia núiti.

Pítiur Jesusan natsantramiania nu
(Mateu 26.69-70; Márkus 14.66-68; Rúkas 22.55-57)

15 Semun Pítiur chíkich unuiniamujaj Jesusa uku weriarmiayi. Israer-patri uuntri nú unuiniamunka nékauyayi. Tuma asamtai ni jeen jeawar, suntar Jesusjaj aa tanishnum wáiniakui niisha wayamiayi.

16 Tura Pítiur aa wáitiniam wajaamiayi. Túramtai chíkich unuiniamu jiinki wáitin wáinia nú nuwajaj chichas Pítrun awayámiayi. Nui nékanu asa yúpichuch awayámiayi.

17 Waiti wáinniusha Pítrun aniasmiayi “¿Amesha nuna unuiniamurinchukaitiam?”

Pítrusha “Atsá, núchaitjai” tímiayi.

18 Tsetsek asamtai suntarsha tura nui takarniusha jinia ikiapárar ni nawen anaak pujuarmiayi. Pítrusha nui pachíiniak anamuk pujumiayi.

Kaipias Jesusan aniasmiania nu
(Mateu 26.59-66; Márkus 14.55-64; Rúkas 22.66-71)

19 Israer-patri uuntri Jesusan aniasmiayi “Ame unuiniamurmesha ¿ya ainia. Tura warí nin jintintiaitiam?”

20 Jesussha tímiayi “Ashí íimiainiañ tuke etserniuitjai. Israer-shuar iruntainmasha Yusa Uunt Jeencha Israer-shuar irunainia nui arantutsuk tuke etserkaitjai.

21 ¿Urukamtai Winia inintiam? Winia chichamprun antukua nu anias-tarum. Wi timian nii ujatmakarti. Wi timiancha niisha nékainiatsuk.”

22 Jesus nuna takui Yusa Jeen wáiniua nu nui pujá Jesusan yapiniam awati tímiayi “¿Núnisan nekas úuntnum chichastinkait?”

23 Jesussha tímiayi “¿Warinmampa yajauch aa? Turuttia. Tura tájana nu péñkeraitkiuinkia ¿urukamtai awattiniam?”

24 Nuyá Anas Jesusan jinkiá Kaipias takaamunam akupkamiayi Kaipias Patri uuntri asamtai.

Pítiur ataksha Jesusan natsantramiania nu
(Mateu 26.71-75; Márkus 14.69-72; Rúkas 22.58-62)

25 Tuke Anasa jeen chichainiañ Pítiur jinia anamuk puján shuar aniak “¿Amesha Jesusa unuiniamurinchukaitiam?” tiarmiayi.

Pítrusha “Atsá, wíchaitjai” tímiayi.

26 Chíkich takarin, Marku shuari, nui pujumiayi. Pítiur Marku kuíshin tsupirkamia nuna shuari asa tímiayi “¿Ajanam Jesusjaj wekaamin wáinkiachmakajam?”

27 Pítrusha ataksha “atsá” taiñ atash shiniukmiayi.

Piratu Jesusan aniasmiania nu
(Mateu 27.1-2, 11-14; Márkus 15.1-5; Rúkas 23.1-5)

²⁸ Nuyá Kaipiasajya Jesusan júkiar tsawant tsawaamunam apach kapitián Piratu takatai jeanam ejeniarmiayi. Israer-shuarsha ni uuntri akupkama nunisar wapik ajasaj tusar nu jeanam wayacharmiayi. Wayawarka paskua nampernum yurumáchmin ármiai.

²⁹ Nu asamtai Piratu niijiai chichastaj tusa jíinki tímiayi “¿Jú áishmansha warí tunáa túrait?”

³⁰ Niisha “Tunaarinchaitkiuinikia amiini itiachaaji” tiarmiayi.

³¹ Tutai Piratu tímiayi “Atumek júkirum atumí akuptammarijiai ni tunaari nekaatarum.”

Israer-shuarsha tiarmiayi “Antsu iikia Israer-shuartikia tunáa shuarsha máachminiaitji.”

³² Yaunchu Jesus ni jákatniurin enentáimtus “Wi awajnaitniuitjai” tímiayi. Niisha krúsnum awajnain asamtai apach máataijiai Nii timia nu uminkiami-ayi.

³³ Piratusha atak jeá wayá Jesusan untsuk “¿Ámeke Israera Uunt Akupniurinkaitiam?” tímiayi.

³⁴ Jesussha tímiayi “¿Amekek nu inintram. Kame chíkich túramainiatsuash?”

³⁵ Piratusha tímiayi “¿Wi Israer-shuarkaitiaj? Ameer shuarak Israer-patri uuntrijiai winin itiarmarai. ¿Warí tunáa túraitiam?”

³⁶ Nuinkia Jesus tímiayi “Wi jú nunkanam akupniuchuitjai. Juyaitkiuinikia Winia nemartuiniana nu máanaikiarayai. Túrawarmatai Israer-shuarnum surutkachaayai. Antsu júyan akupniuchuitjai.”

³⁷ Piratusha “¿Nuikia ame nekas uunt akupniukaitiam?” tímiayi.

Jesussha tímiayi “Ee, ame támena nu nekasaiti. Jú nunkanam akiinian ashí shuaran nekas ana nuna ujaktinian táwitjai. Ashí shuar nekas ana nuna umirniuka Wi táman ántawai.”

³⁸ Tura Piratu “¿Nekasa nusha warimpiait?” tímiayi.

*Piratu Jesusan mantamnatniun tímiania nu
(Mateu 27.15-31; Márkus 15.6-20; Rúkas 23.13-25)*

Piratusha nuna ti, atak Israer-shuarjai chichastajtsa jiinki tímiayi “Jú aishmanka tunaarin penké wáittsujai.

³⁹ Tura ashí uwitin paskua nampernum sepunmaya shuar ankant akupkatniuiti. Núnisrum tuke searme. Tuma asamtai, ¿yamaikia Israera Uunt Akupniurin ankant akupkattajak?” tímiayi.

⁴⁰ Nuinkia ashí kakantar untsumainiak “Ju akupkaip; antsu Parapás akupkatá” tiarmiayi. Nu Parapássha kásauyayi.

19

¹ Nuyá Piratu suntaran akupkamiayi Jesusan asutiáwarat tusa.

² Suntarsha Jesusan wishikrar tawasap janke najanamun etsenkrumtikiarmiayi. Yamakai pushincha uunt akupniua áintsan áentsrarmiayi.

³ Nuyá “Israera Uuntria, kakaram ajasta” tiar yapiniam awatiarmiayi.

⁴ Nuyá Piratu atak jiinki tímiayi “Átum wáinkiarum nekaatarum tusan Jesusan jíiktiaitjai. Wikia tunaarinkia penké wáittsujai.”

⁵ Tímiatai Jesussha janke etsenkruku tura pushin yamakairman entsaru jíinkimiayi. Tura Piratu nu káunkarun tiarmiayi “Pai júiti, íistarum.”

⁶ Israer-patri uuntrisha suntarsha Jesusan íisar ataksha ataksha kakantar untsumainiak “Krúsnum jakati” tiarmiayi.

Piratusha “Átum júkiirum máatarum. Ni tunaarin penké wáittsujai” tímiayi.

⁷ Tura Israer-shuar tiarmiayi “Nu shuar “Yusa Uchiríntjai” takui jákatniuiti. Iiniu akupeamu aarma nuí núniskete” tiarmiayi.

⁸ Nuna antuk Piratusha nu nankaamas ashankamiayi.

⁹ Ataksha init wayá Jesusan aniasmiayi “¿Tuyampaitiam?” Tura Jesussha penké áikchamiayi.

¹⁰ Nuyá Piratu tímiayi “¿Urukamtia winia airtsum. Wi jeajna nu nékatsmek? Wakeraknaka krúsnum máatniuncha tura ankant akupkatniuncha jeajai.”

¹¹ Tutai Jesussha tímiayi “Yus nuna amaschaitkiuinikia penké tujinki-aintme. Nu asamtai amijn surutka nu ámin nankaamas tunaarinniuiti.”

¹² Piratusha nú chichamtaik Jesusan ankant akupkattsa wakerimiayi. Antsu Israer-shuar unsumainiak tiarmiayi “Ju ankant iníakmeka ame úunt akupniu amikrinchuitme. Juka “úunt akupniuitjai” taku atumí uunt akupniuri nemasrinti” tu unsumkarmiayi.

¹³ Piratusha taman antuk akupin pujutainium pujus Jesusan untsukmiayi. Nuí kaya ukatkamu asamtai Israer-shuara chichamen Kapata anaikiarmiayi.

¹⁴ Paskua jisat jeatsain nantu tutupin ajatsain Piratu Israer-shuara tímiayi “Uunt akupniuram ístarum.”

¹⁵ Tura ashí “Jakati, jakati, krúsnum máatá” tu unsumkarmiayi.

Tura Piratu “¿Atumí uunt akupniurin krúsnum máattajak?” tímiayi.

Tura Israer-patri uuntri tiarmiayi “Atumí uunt kapitiantrumek in akup-tamji. Chíkichka atsawai.”

¹⁶ Tutai Piratu Jesusan krusnum mantamnati tusa tsankatkarmiayi. Tutai niisha Jesusan júkiar wearmiayi.

Jesusan krúsnum máawarmiania nu

(Mateu 27.32-34; Márkus 15.21-32; Rúkas 23.26-43)

¹⁷ Jesussha ni krusri yanaki Kúrkuta náinnium wémiayi. Kúrkuta naarisha Israer-shuara chichamen “muuka ukunch” tawai.

¹⁸ Nuí krúsnum ajintrurar awajainiarmiayi. Tura mai pae jimiará shuara chikichik chikichik awajainiarmiayi. Tura Jesus ajapén ámiayi.

¹⁹ Piratusha Jesusa krúsrin uunt áarman anujkamiayi. **NASARETNUMIA JESUS, ISRAERA UUNT AKUPNIURI**

Tu áarmauyayi.

²⁰ Israer chichamjaisha Kriaku chichamjaisha Rúmanmaya chichamjaisha áarmauyayi. Menaintiu chichamnum aarma asamtai tura Jesusarén pepru tíjiuch asamtai Israer-shuar ti untsurí áujiarmiayi.

²¹ Nu asamtai Israer-patri uuntri Piratun jeariar “Israera Uunt Akupniuri” áaraip. Antsu “Israera Uunt Akupniurintjai tawai” tu aarta” tiarmiayi.

²² Tura Piratu nincha áikiar “Wi áaraj nuke átatui” tímiayi.

²³ Suntarsha Jesusan krúsnum awajainiar ni entsarmarin kuátru akankar ankant ankant júkiarmiayi. Tura ni pushirin apatsuk najanamu asamtai jáaktinian nakitrarmiayi. Kame yakíya nunkaaní apaiyiachma takamt-sukuyi.

²⁴ Tuma asamtai suntar tiarmiayi “Juka jáakchatai. Antsu nakurakrin yának ati nu jukiti.” Nújainkia yaunchu Yus-Chichamnum aarma nu uminkiamiayi:

“Winia entsarmarun akantrarmiayi tura nakurusar awakmakua nuna winia pushirun súsarmiayi” áarmaiti.

²⁵ Krúsnumsha Jesusa nukurísha Kriúpasa nuarí Marisha tura Máktaranmaya Marisha wajaarmiayi.

²⁶ Jesus ni nukuríncha tura ni ti aneamu unuiniamuríncha nuí wajan wáiniak ni nukurín tímiayi “Nukuru, ju ame uchirmea áintsan atí.”

²⁷ Nuyá ni unuiniamuríncha tímiayi “Ju ame nukua áintsan atí.” Nu tsawan-taik nu unuiniamurí ni jeen jukí awayámiayi.

Jesusa jakamurí

(Mateu 27.45-56; Márkus 15.33-41; Rúkas 23.44-49)

²⁸ Nuyá ashí uminkiamtai Jesus nuna nekáa yaunchu Yus-Papinium aarma uminkiatu tusa “kitiamajai” tímiayi.

²⁹ Nuísha piniñnum churuín ámiayi. Tura shuar nuna uruchjai ejampar sapapjai ijiu mukunaati tusa susamiayi.

³⁰ Jesussha churuínian najekaa “ashí túrunatniua nu mash uminkiai” tímiayi. Nuna ti, muuken nená jakamiayi.

Suntar Jesusan paenam nankijai ijiumiania nu

³¹ Nu tsawantai, kashinkia paskua námper uunt tsawantri asamtai tura ayampratin tsawant aa asamtai, Israer-shuar jaka ayashí nuí paant ain tusa nakitrarmiayi. Nu asamtai Piratun seainiak “Krúsnum ajintrurma ainia nuna kankejain suntar kupirkarti. Nuyá wari jákarmatai krúsnumia júkiarti” tiarmiayi.

³² Nuyá suntarsha weriar emka krúsnum amia nuna kankejain kupirkarmi-ayi. Nuyá chikichnasha Jesusjai atsankiar ajintrurma nuna kankejaincha kupirkarmiayi.

³³ Tura Jesusan weantuk yaunchu jákaiti tusa kankejain kupirtsuk

³⁴ suntar aya paenam ijiumiayi. Ijiumtaisha nu chichamtaik numpa yumijjai puarmiayi.

³⁵ Wi, Juan, nuna wainkia asan nekas tajai. Atumsha Yus enentáimtustarum tusan tí nekas tajai. Wi áarajna nu nekasaiti nékajai.

³⁶ Yaunchu Yus-Chichamnum aarma uminkiatu tusa túrunaiti: “Ni ukunchin kupirkachartatui” tu áarmaiti.

³⁷ Tura chikichcha: “Ijiuarmiania nuna wáinkiertatui” tu áarmaiti.

Jesus iwiarsamu amiania nu

(Mateu 27.57-61; Márkus 15.42-47; Rúkas 23.50-56)

³⁸ Nuyá Arimatéanmayá Jusé Jesusa ayashin jukitaj tusa Piratun seami-ayi. Nu Jusé Jesusan enentáimtaiat Israer-shuara úuntrin ashamak paant nemarsachmiayi. Niisha seamtai Piratu “Jukitia” tímiayi. Tutai Jusé Jesusa ayashin jukimiayi.

³⁹ Nikiuté musha Jesusjai chichastaj tusa kashi tarimia nu jimiará kunkuin pachimpramun ti nukap sumak itiamiayi. Mira kunkuinniasha aruí kunkuinniasha sumakmiayi.

⁴⁰ Nuyá Jusé Nikiuté mujai Jesusa ayashin júkiar kunkuinian kuérar jaanch esarmajai penuararmiayi. Israer-shuar tuke nunisar ikiúu árimiayi.

⁴¹ Jesus krúsnum maamua nuí aja tíjiuch ámiayi. Nu ajanmasha waa náinnium paka taurma ámiayi. Nusha yama taurma asamtai jaka nuí ik-iuschamuyayi.

⁴² Nu waa sha tíjiuch asamtai tura Israer-shuara ayampratin tsawantri jeatemamtai Jesusa ayashin nuí iwiarsarmiayi.

20

Jesus nantakmiania nu

(Mateu 28.1-10; Márkus 16.1-8; Rúkas 24.1-12)

¹ Tumintincha káshik kirit aín Máktaranmaya Marí Jesus iwiarsamunam ístajtsa wémiayi. Jesusan iwiarsar kaya uuntjai waan atutkarmiayi. Tura Marí nui jeá nu kaya uraimiun wáinkiamiayi.

² Nuna wáiniak Semun Pítiur pujamunam tsékenki wémiayi. Chíkich unuiniamurí Jesus ti anemia nusha nuísha pujumiayi. Tura Marí tímiayi “Iwiarsamunmaya ii Úuntrin júkiarai. Tura ¿tuíntsuk ikiusara?”

³ Pítrusha chíkich unuiniamuríjjai jíinkiar iwiarsamunam iyuwarmiayi.

⁴ Mai métek tsékenkiar Pítiur jeatsain chíkich unuiniamurí iwiarsamunam emka jeamiayi.

⁵ Niisha wayatsuk tsuntsumá iis penuarmarínkia nui tepan wáinkiamiayi.

⁶ Nuyá Semun Pítiur ukunam jeá iwiarsamunam wayá penuarmarí nui tepan wáinkiamiayi.

⁷ Chíkich jaanchcha Jesusa muuken penuarma nusha nanerma niisháa tepan wáinkiamiayi.

⁸ Nuyá chíkich unuiniamurí emka tamia nusha iwiarsamunam wayamiayi. Niisha túruna wáiniak “Jesus nekas nantakni” tu enentáimpramiayi.

⁹ Nuna wáintsuk Yus-Chichamnum “Jesus jakamunmaya nantaktiniaiti” áarman áujariat nekaacharmiayi.

¹⁰ Nuyá mai ni jeen waketkiarmiayi.

*Máktaranmaya Maríncha Jesus wantintiukmiania nu
(Márkus 16.9-11)*

¹¹ Tura Marikia iwiarsamunam juak úutu pujumiayi. Niisha úutiatan tsuntsumá iwiarsamunam ímsamiayi.

¹² Tura Jesusa ayashí nuik tepesmanum nayaimpinmaya suntar puju entsaru jímiar pujan wáinkiamiayi. Chikichik múuknumaaní tura chíkíchka nawenmaaní pujumiayi.

¹³ Nayaimpinmaya suntarsha “¿Urukamtai úutam?” tiarmiayi.

Marísha tímiayi “Winia Úuntrin jurutkiarai tura ¿tuíntsuk ikiusara?”

¹⁴ Nuna tí ayanmar Jesusan wáiniak Nin nekaachmiayi.

¹⁵ Jesus aniak “¿Urukamtai úutam. Ya eeam?” tímiayi.

Marisha ajan wáinnua nuiti tusa tímiayi “Uunta, ame ni ayashí jukimkia, tui ikiusmam ujakkata wi jurumkitiaj” tímiayi.

¹⁶ Nuyá Jesus “Mariya” tímiayi.

Tutai niisha ayanmar “Rapuni” tímiayi. Nusha Israer-chichamnum “Untá” tawai.

¹⁷ Jesussha tímiayi “Emetruawaip. Winia Aparuí wáatsjai. Antsu weme Wíi shuar titiá “Winia Aparuí nayaimpiniam wéajai. Niisha atumí Aparínti. Winia Yúsruiti tura atumí Yúsrinti” tawai titiá” tímiayi.

¹⁸ Nuyá Máktaranmaya Marisha Jesusa unuiniamurín wáiniak “Wi Úuntan wáinkiajai, tímiayi. Niisha juna mash túrutui” tu ujakarmiayi.

*Jesus ni unuiniamurín wantintiukmiania nu
(Mateu 28.16-20; Márkus 16.14-18; Rúkas 24.36-49)*

¹⁹ Nu tsawantai, tumintin, ni unuiniamurí Israer-shuara úuntrin ashamainiak kashi iruntrar waiti epeni pujuarmiayi. Túrasha Jesus áyatik wayamiayi. Tura ajapén wajas “shiir pujustarum” tímiayi.

²⁰ Nuna tí, nuyá ni uwejen ajintruamuncha ni paen ijiununcha iniakmasmiayi. Ni unuiniamurísha Úuntrin wáinkiar shiir warasarmiayi.

²¹ Ataksha Jesus “Shiir pujustarum, tímiayi. Winia Apar akatar akuptukma núnisnak Wisha akatran akupeajrume” tímiayi.

²² Nuyá ni matsatmanumaanĭ umpuı́ tímiayi “Yusa Shiir Wakanĭ atumí enentáin wayati.

²³ Shuara tunaarĭnkia átum “asakártí” tákurminkia tsanĭkurnartatui. Tura nu shuar “sumamati” tákurminkia take sumama pujawai” tímiayi Jesus.

Tumas Jesus nantakniun wáinkiamiania nu

²⁴ Tura chikichik unuiniamu, Jímiampramu Tumas, Jesus tamia nuĭ pujuchmiayi.

²⁵ Tura ukunam chikich unuiniamurĭ ujainiak “Ii Uuntri wáinkiaji” tiarmiayi.

Tura Tumas tímiayi “Ajintruamurĭ wáinkian uweĭrun awaintiuatniuitjai. Tura paenumsha awaintiuatniuitjai. Penké jaka asamtai aya nujai iniantkimiun enentáimtustatjai” tímiayi.

²⁶ Chíkich tumiñtin ataksha Jesusa unuiniamurĭ iruntrarmiayi. Nuiñkia Tumasha niijjai pujuarmiayi. Tura waiti epenmianumanĭ Jesus wayá ajapén wajas “Shiir pujustarum” tímiayi.

²⁷ Nuyá Tumasán tímiayi “Winia uweĭjur ísam ame uweĭjem awaintiuata. Núnismek winia paeruĭ uweĭjem awaintiuam ístá. Tura arantutsuk nekas enentáimtursata.”

²⁸ Nuyá Tumas “Winia Úuntruá, nekas winia Yúsruitme” tímiayi.

²⁹ Jesussha tímiayi “Winia wáitkiam nuin enentáimtursame. Antsu Winia wáittsuk enentáimturaru nekas shiir áiniawai” tímiayi.

Shuar Yusa Uchirĭn enentáimtusarti tusa ju papí áarmaiti

³⁰ Aentsti tujintiamuncha Jesus túramu ti untsurĭ ju papinium áarchamu áiniawai. Tura ni unuiniamurĭ mash wáinkiarmai.

³¹ Antsu Jesuska Kristu asa Yusa Uchirĭnti tu enentáimtusarum tusan júnaka áarmajai. Tura enentáimtakmin Jesus ni iwiaakmarĭn yamarma nuna amastatui.

21

Entsá yantamnum Jesus siati (7) unuiniamurĭn wantintiukmiania nu

¹ Tipirias antumianĭka káanmatkarĭn Jesus ni unuiniamurĭn wantintiukmiayi. Júnisan ámiayi.

² Semun Pítrusha Jímiampramu Tumasha Kananmaya Natanaérsha Sepetéu uchirĭsha tura chíkich jímiar unuiniamurĭsha métek iruntrar pujuarmiayi.

³ Semun Pítrusha “Namakan nekajai nanĭkiattsan wéajai” tímiayi.

Chíkich mash “Iisha winittiaji” tiarmiayi.

Wéar uunt kanunam enĭkemprar nu kashi achitsuk tsawararmiayi.

⁴ Káshik aĭn Jesus entsá káanmatkarĭn wantinkiamiayi tura ni unuiniamurĭsha Jesusan nekaacharmiayi.

⁵ Jesussha tímiayi “Uchiru, ¿namak achikiurmek?”

Niisha “Atsá” tiarmiayi.

⁶ Tutai Jesus tímiayi “Neka untsuurnumaanĭ ajunkatarum. Nuĭ achiktatrume.”

Nii timia núnisan túrawar namakan ti achikiar nekan júsatniun tujinkiar miayi.

⁷ Nújainĭkia Jesusa unuiniamurĭ Jesus ti aneemia nu Pítrun tímiayi “Ii Úuntriñti.” Takui Pítrusha áimiaku asa ni pushirĭn entsar entsá inianmiayi yukuak jeataj tusa.

⁸ Chíkich unuiniamurĭsha jeachat pujuiniachuk nekan japiki kanujai káanmatkanam jeawarmiayi.

⁹ Káanmatkanam jeawar ji kaiir ámanum namakan jiámun wáinkiar^{mi}ayi. Tantan^{cha} wáinkiar^{mi}ayi.

¹⁰ Jesussha “Átum achikiurmena nuyá jiátin itiatarum” tímiayi.

¹¹ Tutai Semuñ Pítiur kanunam we nekan nekartiuk káanmatak japiki itiamiayi. Itiar namaknasha sian^{tu} sen^kuenta nuyá tres (153) nekapmararmiayi. Ti untsurí áyat nekasha jáankachmiayi.

¹² Nuyá Jesussha “Yurumáitiarum” tímiayi. Ni unuiniamurisha “aya ii Untrí áminiaiti” tusar inintrustinian natsantiarmiayi.

¹³ Nuyá Jesus wajaki tantan jukí súsar^{mi}ayi. Núnisan^ñ namaknasha súsar^{mi}ayi.

¹⁴ Jesus jakamunmaya nantaki jujai menaintiu ni unuiniamurⁱⁿ wantintiukarmiayi.

Jesus Semuñ Pítrujai chichasmiania nu

¹⁵ Nuyá yurumáwar Jesus Semuñ Pítrun aniasmiayi “Junasa uchirí Semuñka, ¿ju shuar nan^{ka}amas anentmek?”

Pítrusha tímiayi “Ee, Uunta, wi wakerajam nu Ame nékame.”

Jesussha “Nuñkia winia murikiur ayuratniua áintsam Winia enentáimturainia nu yain^{tá}” tímiayi.

¹⁶ Ataksha aniasmiayi “Junasa uchirí Semuñka, ¿winia anentmek?”

Pítrusha “Ee, Uunta, wi wakerajam nu Ame nékame” tímiayi.

Jesussha “Winia murikiur wáinkiatá” tímiayi.

¹⁷ Nú ataksha aniasmiayi “Junasa uchirí Semuñka, ¿winia wakerutamek?”

Pítrusha menaintiu iníam kúntuts enentáimiar tímiayi “Uunta, ashí nékame. Wi wakerajam nu Ame nékame.”

Jesussha tímiayi “Winia murikiur ayurata.

¹⁸ Maa, nekas tájame. Natsa asamka iwiarmampram ame wakeramunam wéuyame. Tura úuntach ajasmeka ame kunturam ayaparakmin chíkich aentstamprattawai tura ame wétin nakitiam nu^j juramkiartatui.”

¹⁹ Jesus nújain^{ka} Pítiur máatniun ujakmiayi. Tura núnisan^ñ jakamtai shuar Yúsan shiir awajsatniun ujakmiayi. Nuyá Pítrun “Nemartusta” tímiayi.

Juan túrunatniun Pítiur Jesusan aniasmiania nu

²⁰ Pítrusha ayanmar chíkich unuiniamurⁱⁿ Jesus ti anea nuna némarun wáinkiamiayi. Kame nu unuiniamuka nuik Jesus jáatsain^ñ yurumáiniakui “Uunta, ¿ya surutmaktata?” timia núiti.

²¹ Nincha Pítiur wáiniak Jesusan aniasmiayi “Uunta, ¿jusha warí urukatiuit?”

²² Jesussha ayak “Wi wakeraknaka iwiaaku pujain^ñ tátatjai tíminiaitjai. Nuna tákuisha ¿warí itiurtama? Ámeka nemartusta” tímiayi.

²³ Nújain^{ka} “Nu unuiniamurí jákashtatui’ tusa Yus-shuarnum áujmiamiayi. Túrasha Jesus “jákashtatui’ tíchamiayi antsu áyatik “Wi wakeraknaka iwiaaku pujain^ñ tátatjai takuisha ¿warí itiurtama?” tímiayi.

²⁴ Wikia nú unuiniamurⁱⁿtjai. Ju papincha aaru asan “mash nekasaiti’ tajai. Ashí shuarsha núnisan^ñ tuíniawai.

²⁵ Nu arantcha juí áarchamusha ti awai. Kame ashí áamka ti untsurí papí asa ashí nun^{kan}am ikiuschamnia ainti. Nuke atí.

Jesusa Akatramurí Yusa Wakaníjiai TÚRAMU

Yusa Wakanín nákasarmiania nu

¹ Amikiur Tiúpiru:

Nuik akupkamiaj nú papinium ashí Jesus túramia nuna áatramiajme. Tura unuitiampramiaj nunasha áatramiajme. Yámankamtaiknumia,

² nayaimpiniam wétsuk, ashí Nii túramia nuna tímiajme. Jesuska, nayaimpiniam wakettsuk Yusa Wakaní kakarmarijiaj túratniua nuna ni akatramurín jintintiawarmiaj.

³ Tura jaka nantaki, Jesus tímiajaik wantintiukmiaj ni akatramurín. Tura kuarenta (40) tsawant nin wantintiukarmiaj. Nuna tura nekas iwiaakjai tusa iniakmasmiaj, nekaawarat tusa. Tura Yusa akupeamurí urukukit nuna mash ujakmiaj.

⁴ Jesuska ni akatramurijiaj tuke pujus, nin chicharuk “Jerusarénumia wéerap, tímiaj. Winia Apar “amastatjai” tímia nuna, paant ujakchamkajrum. Nu túrunat tusarum Jerusarénum nákastarum, tímiaj.

⁵ Tuke enentáimsatarum. Juan entsajai atumí ayashin imiatmimiarme. Túrasha wárik Yusa Wakanísha atumniasha tarutmar, atumí enentáin enkemprutmattarme. Nusha enentái imiantin áintsankete” tímiaj.

Jesus nayaimpiniam wakamiania nu

⁶ Tura Jesusjai irunar matsamas anintriarmiaj “Uunta, Israer-shuar ájinia nu, ankant ajasakrin iiniuk Akupin atak naamkatin yamaí jeayash” tiarmiaj.

⁷ Jesus áimiuk tímiaj “Winia Apar túrattana nu warí tsawantinik túrunatí nu nekaatniusha atumniachuiti. Apar Niñki neka asa ni kakarmarijiaj túrattawai.

⁸ Tura atumsha Yusa Wakaní kakarmarín sunastatrume. Nii taa enkemprutmamtaí kakaram ajasrum, Wíi túramu etserkattarme. Emka juí Jerusaréñ péprunam etserkattarme. Nuyá ashí Jutía núnkanam, tura arant Samaria nunkanmasha, tura nú arant ashí núnkanam werum, Wíi túramu etserkattarme” tímiaj Jesus.

⁹ Nuyá chichas amir, ashí ni akatramurí ii wajainiaj, Jesus nayaimpinmaanj junakmiaj. Wéa-wéakui yurankim mash Nin amuámiaj. Tuma asamtaí ni akatramurí Nin wáinkiacharmiaj.

¹⁰ Tura Jesus waakkui ni akatramurísha yakí ii wajainiaj, jimiará áishman puju entsaru nuí wantintiukarmiaj. Tura ayamach wajattsarmiaj.

¹¹ Nu áishmansha Jesusa akatramurín tiarmiaj “Kariréanmaya áishmanka, ¿urukamtaí nayaimpinmaanj imiá ímprum? Ju Jesusak atumíya nayaimpiniam wea wáinkiarumna núnisan ataksha winittiawai” tiarmiaj.

Matíasan anaikiarmiania nu

¹² Tuasua amikmataí Jesusa akatramurí Uriwiu náinniumia akaikiar Jerusarénum waketkiarmiaj. Uriwiu naincha Jerusarénumsha tíjuchiiti, chikichík kirumitrua núnisan.

¹³ Tura Jerusarénum jeawarmiaj. Nuí jeawar, jeá wayawar yakí wákararmiaj. Nuí Pítrusha, Jakupusha, Juansha, Antressha, Jiripisha, Tumassha, Parturumísha, Mateusha, tura Arpeu uchirí Jakupusha, nuyá ásump Semunsha, Jakupu yachí Jútassha, tímian wayawarmiaj.

14 Jusha mash tuke iruniarmiayi Jesusa yachijjai. Tura Jesusa nukurí Maríjiai, nuyá chíkich nuwajaisha tuke iruniarmiayi, Yus áujsatai tusar.

15 Nui siántu painti (120) aents iruntrarmia nui Pítur chichastaj tusa wajakmiayi.

16 Pítur juna tímiayi “Yatsurtírmesha, umarutírmesha antuktatum. Yuska yaunchu ni Papiriin Jutasnan áamtikramiayi. Jútas akiintsain Tawitkia, Yusa Wakaní jintintiam Jutasnan áarmiayi. Jesusan achik surukarmia nú shuaran nekapruamia núiti. Kame Tawitia áarmari Yus-Chicham asa tímianak uminki-atniuyi.

17 Nú Jutaska ii írutramuítat, ii takaamurín páchitkaiítat,

18 tunáa tura nujai kuítian achik nunkan sumakmiayi. Tura piniakum iniaañ tantane páttimiayi.

19 Tuma asamtai ashí Jerusarénum pujuarmia nu, nuna nekaawar nú nunkan “Numpa Nunka” anaikiarmiayi.

20 Kame Sarmu papinium Tawitkia juna áarchamkia:

“Ni jeesha itiarak atí.

Nu jeanmanka penké pujuschartí.” Tura

“Ni takatři chíkich atankiti.”

Tu aarmaíti’ tímiayi.

21 “Tuma asamtai yamaikia chíkich anaikiatniuitji. Tura nánkamas achikchatniuitji. Antsu ii nemartamkau atí. Uunt Jesus iijjai pujumia nui tuke Nin nemarsamia nu atí.

22 Juan Jesusan imiaimiania nú tsawantnumiá jukí, Jesus nayaimpiniam wémiania nú tsawantan tímianu ejé tuke Niijjai wekaimia nu atí. Nu shuar enentáimtusar, chikichik achiktaí. Iisha iruntrar Jesusa nantakmiari et-serkamí tusar túramí” tímiayi Pítur.

23 Tura nuyá jimiara shuaran anaikiarmiayi. Matíasan anaikiarmiayi. Tura chikichnasha Jusen, ni chíkich naarí Parsapas, tura apach náariníka Justu, nunasha anaikiarmiayi.

24-25 Tura nuyá Yus-shuar Yúsan áujainiak juna tiarmiayi “Ii Uuntri, Amesha ashí shuara enentái nékame. Jui awai jimiara áishman. Jútas tunáa túrak jákatniunam wéak akatramu takatan ikiukmiayi. Yamaikia Jútas takatři achikiat tusam, ¿tuá achikum, Uunta? Paant iniakmasta.” Tu aujsarmiayi.

26 Tura Israer-shuara túrutairi núnisan, wats yaki nupetmakat tusar túrawarmiayi. Tura Matías nupetmakmiayi. Túrunamtai Matíasnak pachikiarmiayi.

2

Yusa Wakaní taramiania nu

1 Pintikiustís náartin jísat jeamtai, chikichík jeanman nuin Yus-shuar tuakarmiayi.

2 Tumaj aya aneachma nayaimpinmaya nasea áintsan téter ajaki winian antukarmiayi. Ashí mash jeá pujuarmia nuka antukarmiayi.

3 Tura nui pujuinai ji wajaí kea áaniun wáinkarmiayi. Túruna ankant ankant puunak tarurarmiayi.

4 Tuma asamtai Yusa Wakaní ashí ni enentáin pimiutkarmiayi. Túram chichasarat tusa Yusa Wakaní ni nekatairi súsarmiayi. Tuma asamtai nujai niisha chíkich chichaman chichasarmiayi.

5 Nui Jerusarénum Yus táman umirin Israer-aents áarmiayi. Ashí nunkanmaya Jerusarénum taar matsamarmiayi.

6 Tura túrunamia nuna antukar káunkarmiayi. Tura ashí shuar ni chichamejain chichaamun antukarmiayi. Tuma ásar, warinkit, tu enentáimsarmiayi.

7 Nekaachar ashamkarmiayi. “Warinkit, tunaim ajarmiayi. Ju aents chíkich chíkich chichaman chichainia nu, ashí Kariréanmayanchukait, tiarmiayi.

8 Tura iisha ankant ankant ii chichamenka ántatsjik. Ausha urukainiakua, nunak chichainiawa, tiarmiayi.

9 Jui ashí nunkanmaya aents pujuiniatsjik. Partianmaya, Eramnumiasha, Misiuputamianmayaasha, Puntanmayaasha, tura Asia nunkanmayaasha,

10 Príjianmayaasha, Pampirianmayaasha, Ejiptunmaya tura Áprikiannya Serinia nú nankaamasnumiasha pujuiniatsjik, tiarmiayi. Nuyasha ii shuarsha Ruma péprunmaya yaunchu taar jui matsatainiawai. Chikichcha tuke Israer-shuar áiniawai. Tura chikichcha Israer-shuar ajastaj tusa Israer túrutairin mash túruiniawai.

11 Kritianmayaasha Arapiannya pujuiniji. Tura ashí mash ii chichamejaisha Yusa pénger túramuri ántaji” tiarmiayi.

12 Ashí aents nuna nékachu ásar ashamkarmiayi. Tura nuámtak aniniaisarmiayi “¿Warinminiait ju?”

13 Tura chikichcha wishikiarmiayi. “Nampeku ániatsuash” tiarmiayi.

Pítiur ujakmia nu

14 Nuiñkia Pítiur, chíkich áuntse Jesusa akatramurijjai wajaki, kakantar chichasmiayi. Chichaak tímiayi “Jutíannya shuartiram, Jerusarénnumiatiirmesha antuktarum. Wi títiatjana nu antukrum pénger enentáimpratarum.

15 Ju áishman, nampekarai, tárugna nu, nampekcharai. Warí, nantu imiá ishichik takuni. ¿Aisha ititurak?

16 Antsu Yúsnan etserin, ni naari Juér, yaunchu áarmia nu, yamá túrunayi, tímiayi.

17 Juna áarmiayi: “Yus tawai “Jú nunka amuukatin jeatemamtai, winia Wakantrun ashí áentsnum akupkattajai, yumi yaraanua áintsan. Atumí uchirí, atumí nawantrisha Yusa chichamen áujmariatatui. Tura nátsaka íimiarartatui. Tura uuntka mesekramiartatui.

18 Tura áishmansha nuwasha winia takartin ainia núnaka winia Wakantrun akuptukartatjai. Túram niisha Wíi túramun áujmariatatui.

19 Yakí nayaimpiniam, aents túrachminian iniakmastatjai. Tura nunkanmasha winia kakarmarun iniakmastaj tusan numpancha, jiniasha, mukuintiuncha yurañmia áintsan akupkattajai.

20 Tura tsawái nantusha kajinkiattawai. Tura nantusha mushatmar numpa núniktatui. Uunt tsawant achikmiajna nu jeatsain, túrunattawai. Nú tsawantcha imiá nekas uunt átatui.

21 Nuiñkia ashí shuar nekas winia kakarmarun seana nuka uwemprartatui” tímiayi Yus.”

Núnis Juér áarmiayi’ tímiayi Pítiur.

22 Tuke chichaak: ‘Israernumiá shuartiram, wi títiatjana nu antuktarum. Nasarénumiá Jesusnan tajai. Nú Jesusan Yus shiir enentáimtawai. Yuska, átum ti enentáimprarum ni kakarmarın paant nekaatarum tusa, nú Jesusan ti ikiakármiai. Tura Jesusjai aentsti túrachminian Yuska túramiayi, átum íimmianum. Nuka ti paant nékarme, tímiayi.

23 Tura Jesus surunkamia nuna Yuska yaunchu, túruntsain, paant nekaamiayi. Túrasha Yus enentáimmia nujai métek túrawarmiayi. Tura atumek

emetarum Jesus jukimiarme. Nú arant, krúsnum máatarum, tunáa shuar tímiarme.

²⁴ Túramunak Yus Jesusan jákatniun nupetmamtik iniantkimiayi, tuke jákachmin asamtai.

²⁵ Iimiata, ii uuntri Tawit Jesusnan kantamprua juna áarmiayi:

Úuntan tuke pujurtan wáinmiajai. Winia pujurtakui awajkamú áchattajai.

²⁶ Tuma asamtai winia enentáirjaisha Nin shiir enentáimtusmiajai. Tura wenurjaisha shiir chichaman chichamiajai. Jáaknasha shiir enentáimsan jakattajai, aneantiniapitjia tusan.

²⁷ Winia wakaniur, Yusru, jákatniunam ikiurtuschattame. Wi ame Uchirmetjajai, Tunaaríncha. Túmaitkui anentu asam ayashur káurtin tsankatrúchattame.

²⁸ Tura iwiaaku átin jintia jintintrutamame. Tura tuke pujurtakum waramtikrustatme.

Tu áarmiayi Tawit' tímiayi.

²⁹ Pítiur tuke chichaak: 'Páantchakait. Ii uuntri Tawit yaunchu jákaiti. Tura iwiarsamuiti. Ni iwiarsamuri iini pujatsuk.

³⁰ Túrasha Tawitkia Yúsnan etserniuyayi. Tuma asa Yus tímia nuna nekaamiayi. Yus Tawitian chicharuk tímiayi "Ame akupniuitme. Nekas tájame, ukunam ame iniañnamurminian Kristu akiiniattawai. Niisha Akupin anainiaktatui, amea áintsan." Nuna Yus táman Tawit nekaamiayi.

³¹ Neka asa, túruntsain Tawit, wainkia nútiksán, Kristu nantaktintrin áarmiayi. Kristu túrunatniurin chicharuk tímiayi "ni wakaníncha jákatniunam ikiukchatniuyi. Ayashíncha káurtinian tsankatkashtiniuyi."

³² Au Krístun tímia nu Jesusaiti. Nu Jesusnak Yus iniantkimiayi. Nuka iisha neka asar étsereaji.

³³ Yuska, Jesus nankaamantuiti tusa ni untsuurin apujsaiti. Tura ni Wakanín Jesusan súsaiti, Nii yaunchu tímia nútiksán. Tuma asamtai jusha átum antukurmena nuna, tura íisurmena nunasha Yus suramsaiti.

³⁴ Tawitkia ayashtiuk nayaimpiniam wákachmiayi. Tura nú Tawitiak juna áarmiayi:

"Uunt Yus winia Úuntrun tímiayi "akupin pujutainium, winia untsuuruin pujustá.

³⁵ Ame nemasrumin nupetkattajai. Nu túruntsain jui pujustá' tímiayi."

Nuní áarmaiti Jesusnan, tímiayi.

³⁶ Tura ii, Israer áentsti, Jesus krúsnum maaitji, tímiayi. Jú Jesus máamjinia nuna Yuska Uunt Akupin anaikiamiayi. Túrasha Jesussha in uwentikkiartin Krístuiti. Ashí áentstíram nu péñker nekaatarum" tímiayi Pítiur.

³⁷ Nuna antukar wake mesekarmiayi. Tura Pitruncha chíkich akatramuncha aniasarmiayi "Yatsuru, ¿nuiñkia itiurkatjik?" tiarmiayi.

³⁸ Tutai Pítrusha chichaak "Atumí tunaari ikiuktiaj tusarum Yus nekas enentáimtustarum. Tura ashí shuartiram Jesukrístu naari pachisrum imiantiarum. Nuiñkia atumí tunaarin Yus tsankurtamprattarme. Túrunawakrumin Yuska ni Wakanín suramsattarme, tímiayi.

³⁹ Yus tímia nuka atumin túramprume. Atumí uchiríncha tura ashí arant matsatainia nunasha tawai. Kame ii Yusri áentsun untsuktaj tusa wakerana nuna tawai" tímiayi.

⁴⁰ Nú chichamjai tura nuyasha Pítiur tuke jintintiuk tímiayi "Yajauch shuara asutiátniuri átatna nuyá uwempratarum" tímiayi.

⁴¹ Tuma asamtai nuna antukarmia nuka imianiarmiayi. Nú tsawantaj menaintiú mir (3000) aents Yus-shuar ajasarmiayi.

⁴² Ashí nu shuar Jesusa akatramurí jintintiarmia nuna tímiatrusan̄ an-tukarmiayi. Tura irunar shiir enentáímtunaisar yurumin ármiai. Túrawar, Kristu enentáímtustin namperin najanin ármiai. Túrawar Yúsan áujiarmiayi.

Yus-shuar pampararmiana nu

⁴³ Tura Yuska aentsti túrachminian Jesusa akatramuríjjai túramiayi ni kakarmarin iniakmastaj tusa. Tuma asamtai ashí aents nuna wáinkiar ashamkarmiayi.

⁴⁴ Yúsan umirkaruka ashí métekrak pujuarmiayi. Tura ashí niiniu armia nuna sunaisarmiayi.

⁴⁵ Ni nunken surukar, ni takakmarincha surukar, atsumainia nuna súarmiayi.

⁴⁶ Tuke tsawantak Yusa Uunt Jeen káuniarmiayi. Tura ni jeencha iruntrar warainiak Kristu enentáímtustin námper najanin ármiai. Tura nankaamantu enentáímtumatsuk, yurumkan ajamnainiarmiayi.

⁴⁷ Túrawar, Yuska ti úuntaiti, tu wearmiayi. Tura ashí aents nin shiir enentáímtiarmiayi. Tura Uunt Yus tuke tsawant shuaran uwentikiar Yus-shuar írunmanum íkiaun̄ki wémiayi.

3

Wekaicha wekasamiana nu

¹ Chíkich tsawantai, nantu nunkaach ajasmatai, Pítiur Juanjai, Yusa Uunt Jeen Yus áujstai tusar wearmiayi, Israer-shuar tuke turin armia nútiksaran̄.

² Tura áishman̄, ni akiiniamuriniá wekaicha amia nu, nuí aa wáitiniam tuke tsawant pujumiayi. Nu áishman̄nasha ni shuari entsakí júkiar nú wáitiniam apujin ármiai, nuí shuar wayan̄ kuítian seat tusar. Nú wáitisha, Shiir Waiti, tutajyayi.

³ Tura nú shutuapsha Pitrun Juanjai wayan̄ wáinkiamiayi. Wáiniak kuítian seamiai.

⁴ Tura Pítiur Juanjai apajas ísarmiayi. Tura nú áishman̄nasha chicharuk “íirsata” tímiayi.

⁵ Aishman̄sha, surustatuapi, tu enentáimias, íimsamiayi.

⁶ Nuyá Pítiur chichaak “Kuítrusha atsawai, tímiayi. Kurisha atsawai. Antsu kuítjai nankaamas takakjana nuna amastajai. Wats, Nasarétnumiá Jesukristu kakarmaríjjai wajakim wekasata” tímiayi.

⁷ Tinia iniais, Pítiur ni untsuurin̄i achik awajkimiai. Túram ni nawesha, wanusesha kakaram ajasmiayi.

⁸ Tura niisha wajaki nantent ajakmiayi. Nuyasha wekasamiayi. Tura Pítrujai sha Juánjaisha Yusa Uunt Jeen wayawarmiayi. Nuik shutuapka wayá nantent nantent ajak Yusa náarin̄ shiir pachimiayi.

⁹ Ashí aents pujuarmia nu, nin wekaan wáinkiararmiayi. Tura ni chichamen anturkarmiayi.

¹⁰ Tura chichainiak “Nuik Yusa Uunt Jeen wáitirin̄, Shiir Waiti tutainium, nu áishman̄ tuke pujuuya núchakait” tiarmiayi. Tura ni túrunamurin̄ nekaawar, ti ashamkar nusháa enentáimsarmiayi.

Pítiur ujakmiana nu

¹¹ Shutuapka péñker ajasu asa Pítrujai Juánjaisha penké tsurachmiayi. Tura aents nuí pujuarmia nu, warinkit tusar, jeáshkirí tsékenki wearmiayi. Nuka Sarumún̄na tiniu ármiai.

¹² Aents káunkarun Pítiur wáiniak, chicharuk “Israer-shuartiram, ¿urukamtai winiasha imiá írum? tiarmiayi. ¿Isha péñker asarik’ tsuarmaj’? ¿I kakar-maríjjaiñkik’ ewekamsamaj’?

¹³ Atsá. Antsu Yuska ni Uchirín Jesusan ashí nankaamantu awajsaiti. Ii uuntri Apraamsha, Isaksha tura Jakupsha enentáimtin armia nú Yusan tajai. Átumka Jesus nakitrarum kapitián Piratuí surukmarme. Tura Piratu akupkataj tau atumsha suritkiamarme.

¹⁴ Jesus péñker nákak enentáimniuyana nu “akupnakchati” tímiarme. Antsu shuáran main akupnakat tusarum wakerimiarme.

¹⁵ Túrarum iwiaaku átinian Amaana nu maamarme. Tuma aiñ Yuska Nin jakamunmaya iniantkimiayi. Nuka iisha neka asar étsereaji.

¹⁶ Tura ju aishman juí wajaana ju tura nékarmena ju, Yusa Uchirí naari enentáimta asa kakaram ajasuiti. Jesus enentáimtusu asa nekas péñker ajasuiti. Nusha wáinniu asarum nékarme’ tímiayi.

¹⁷ ‘Wats, yatsurtiram, wi nékajai. Atumsha atumí úuntriñjai Jesusan túramarmena nu nékatsuk túramarme.

¹⁸ Tura nu túramurmíjjai Yus yaunchu tímia nu tímianak umikiurme. Ni Krísturí wáitsatniuya nuna Yuska ashí ni etserniurín áamtikramiayi.

¹⁹⁻²⁰ Wats, yamaikia tunaaruminiá kanaktiarum. Túrarum Yúsnumaani ayantártarum, tunaarun asakárat tusarum. Túrunawakrumniñkia, atumin uwemtikramprarat tusa Yus yaunchu anaikiamia nuna akupturmaktatrume. Nusha Jesukristuiti. Tura Níjjai enentáimin ayampratin átatui.

²¹ Tura yamaikia Jesukrístu nayaimpiniam pujustiniaiti, ashí iwiarnatsaiñ. Yuska ukunam ataksha nunkan shiir awajsattawai. Nuna ni etserniurín tsáapin enentái takaku armia nuna yaunchu áamtikramiayi.

²² Tuma asa Muisais ii aparín tímiayi:
“Atumi Uunt Yusrí ukunam etserniun akupturmaktatrume, winia akuptukmia núnisañ. Nuámtaktirminiá achik akupturmaktatrume. Tura nii títiatna nu umirkatarum” tímiayi.

²³ Nánkamas aents nu etserniun chichamen umíachkuñka emesnartatui. Tura Israer-shuarnum páchitkia áhattawai. Núnisañ áarmiayi Muisaissha’ tímiayi.

²⁴ Pítiur tuke chichaak ‘Iimiata, Yúsnan etserin Samuer ju tsawantin túratniurí etserkamiayi. Nuyá ashí Yúsnan etserniusha tuke nuna etseriarmiayi.

²⁵ Etseriarmia nuka atumin túramprume. Tuma asa átum péñker pujustinian Yuska ii uuntri Apraáman ju chichaman susamiayi. “Nekas tájame, ame shuarum akiiniattana nujai ashí áentsnasha shiir awajsattajai’ tímiayi. Tura ii úuntriñ tímia núnaka incha túramji, tímiayi.

²⁶ Iimiata, Yus ni Uchirín iniantkimia nuí, atumin emka akupturmaktarmiarme. Atumsha, atumí tunaariya kanaktiarum tusa, tura atumin shiir awajtamsatniun wakerak túramiayi.” Nunak tímiayi Pítiur.

4

Pitruncha Juánnasha kajerkarmiania nu

¹⁻² Pítrusha Juanjai Yusa chichamen áentsun jintintiainiak pujuarmiayi. Jesus nantakin asamtai aencha nantaktin áiniawai, tiarmiayi. Tura chichaak pujuiniaí Israer-patri táarmiayi. Tura Yusa Uunt Jeen wainniu úuntriñsha Satuséu aentcha táarmiayi. Taar Pitruncha Juánnasha kajerkarmiayi, niisha Jesusa nantakmiari chichaman jintintinia asamtai.

³ Yamaikia kíawai, kashin iismí tusar achik sepunam enkea iniaisarmiayi.

⁴ Tura Pitrun nuik anturkarmia nú aents untsurí Yus-shuar ajasarmiayi. Nuik Yus-shuaraim tura yamaiyaim iruram ti untsurí ajasarmiayi. Aya áishman̄kak, sen̄ku mir (5000) aents áirmiayi.

⁵ Kashin tsawarmatai Israer-shuara akupniuri, ni úntrisha, tura ni jintin-niurisha Jerusarénnum iruntrarmiayi.

⁶ Nuisha Anassha, Israer-patri uuntri anaikiamu amia nu, tura Kaipiassha, Juansha, Arejantrusha, tura Israer-patri kapitiántri shuarisha tímian iruntrarmiayi.

⁷ Iruntrar Pitruncha Juán̄nasha utitiarum tusar akupkarmiayi. Tura itiar-matai, ajapén awajsarmiayi. Tura aniasarmiayi “Kame ¿yana kakarmarij̄j̄i, yana chichamej̄j̄i túrarum?” tiarmiayi.

⁸ Tutai nuyá Pítiur, ni enentáin Yusa Wakaní pimiutkamu asa tímiayi “Akup-niutiram, tura úuntirmesha antuktaram.

⁹ Ju áishman̄ nuik shutuap amia nu péñker ajasmar̄i anintrarme. Kame itiurak péñker ajasuit tátsurmek.

¹⁰ Urukamtia úuktataj. Anintrakrumin iisha paant títiat̄ji, Israernumia shuar ashí nekaawarat tusar. Ju áishman̄ Jesukrístu kakarmarij̄j̄i péñker ajasuiti. Nasarétnumia Jesukrístun, átum máamurmena nuna, tura Yus jaka-munmaya iniantkimiania nuna tajai, tímiayi.

¹¹ Nú Jesuska kayaa áintsan̄kete. Atumsha jeamniutiram, nú kaya yajauchi-iti, tímiarme Jesusna. Túrasha túramaitian̄ Niisha jeanam emka apujsamua núnisan̄ ajasuiti, tímiayi.

¹² Tura chíkichj̄i uwempratin pen̄ké atsawai. Ju nun̄kanam ii chikicha naari pachisar uwempratin atsaji. Jesuskete ii uwentikrampratniun Yus suramsam̄aj nu” tímiayi Pítiur.

¹³ Pítrusha Juansha nán̄kamas shuara áintsan̄ áirmiayi. Núkap unuimiarcharu áirmiayi. Tura unuimiarchaitiat, arantutsuk etseriarmiayi. Aentsu uuntri núnaka nekaawar “Nékachuitiat, itiura sapijmiatskesha chichainia” tiarmiayi. Tura, jusha Jesusa nemarkin ármia núiti tiar nekaawarmiayi.

¹⁴ Nuyasha áishman̄ péñker ajasmia nu niij̄j̄i nuí wajamiayi. Tuma asamtai, niisha ai wajakuí, Israer-shuara úntr̄n̄kia, péñker ajaschaiti títiat̄i tukamá tujinkiar̄miayi.

¹⁵ Tuma ásar, iik nuamtak áujmatsatai tusar, Pítrusha Juansha shutuapsha aa awemartai, tiarmiayi.

¹⁶ Tura áujmataniak tiarmiayi “Ju Pítrusha ju Juansha itiurkatjik. Ju uunt túrunamun Jerusarénnum matsatainia nu ashí nékainiatsuk. Wáitaiti titin tujintiaji, tiarmiayi.

¹⁷ Tura, ashí aents nekaawar̄in̄ tusar yamaik jiaktai. “Ju Jesusa naari pachisrum pen̄ké jintintiawarairap,” titiat̄i” tiarmiayi.

¹⁸ Tura árusan̄ Pitruncha Juán̄nasha shutuapnasha ataksha untsukarmiayi. Tura chicharkarmiayi. “Jesusa naari pen̄ké áujmatsairap. Tura Jesusa túramuri pen̄ké jintintiairap” tiarmiayi.

¹⁹ Tutai Pítiur Juan̄j̄i áimkiarmiayi “Enentáimpratarum. ¿Yus warinia wak-era? ¿Iikia Yus umirtsuk atumí chichameñ umirkatniukaitiaj’? tiarmiayi.

²⁰ Nekaatarum. Iisha íisj̄inia nu, tura antukj̄inia nusha ii etsertsuk pujustin tujintiaji.” Tu áimkiarmiayi.

²¹⁻²² Shutuap péñker ajasmia nu kuarenta (40) uwí nan̄kaamas takakuyayi. Ni péñker ajasmar̄in̄ aents nekaawar, “juka aentsti túrachminiaitji” tusar Yusa naar̄in̄ uunt awajsarmiayi. Tuma asamtai aentsu uuntri Pitruncha, Juán̄nasha asutiátai tukamá aentsun ashamainiak áyatik chicharkar iniais-armiayi.

Yus-shuar Yusa kakarmarín seawarmiania nu

²³ Pítiur Juanjaj ankant ajasar ni írutramuriin waketkiarmiayi. Tura jeawar Israer-patri uuntri tura aentsu úuntri sha nin tiarmia nuna mash etserkarmiayi.

²⁴ Nu ujakam antukar métekrak Yúsan áujuk tiarmiayi “Winia Uunt Yusru, Amesha nayaimpisha nun kasha najanaitme. Nayaantsasha tura juí írunna nusha najanamiamé, tiarmiayi.

²⁵ Tura Tawit ámin umirtamin amia nu ju áamtikramiamé:

“¿Urukamtai ashí nun kanmaya aents charaatum ajainia? ¿Tura Israer-shuarsha urukamtai ántar chichaman enentáimiainia?

²⁶ Uunt kapitían ármia nuka chichaman jurusarmiayi Uunt Yúsan.

Tura pepru úuntri sha iruntrar Uunt Yúsan kajerarmiayi. Ni anaikiamurín Krístun nútiksañ kajerarmiayi.”

²⁷ Tu áarmaiti, Uunta, tura nekasaiti. Erutis apachi kapitíantri Punsiu Piratujaj jú péprunam iruntrarmiayi. Niisha yajaya shuarjaj tura Israerniá shuaraim nuim iruntrarmiayi. Ame Uchirmin Jesusan tunaarinchan kajerarmiayi. Jesuska Ame anaikiamiamé, winia takatrun túrat tusam.

²⁸ Tura ame enentáimjaj iwiaramamna nu uminkiatniuiti. Tura apachcha Jesusan kajerainia ásar, Ame iwiaramamna tímianak umikiarmiayi.

²⁹ Uunta, iisia kajertamainiaj nu. Jes, Áminiu asakrin áujmatramtsujik. Túmaitkuisha ame chichamem ii ashamtsuk etserkatin ame kakarmaram amasta.

³⁰ Tura ame kakarmarmijaj jaasha tsuártin amasta. Ame Uchiram Jesus tunaarincha nujaj ii aentsti túrachmin túratniusha amasta. Aents Yusa kakarmarín nekaawarat tusam túrata” tiarmiayi.

³¹ Tura Yúsan tú áujas umikmatai nuin irunar pujuiniajn úurkamiayi. Túrunamtai ashí shuara enentáin Yusa Wakaní pimiutkarmiayi. Túmaitkiui ashamtsuk Yusa chichamem etserkarmiayi.

Wíniakete, tícharmiania nu

³² Yus-shuar ajasarmia nu, ti untsuritiat, ashí chikichík enentainiak enentáimainiak, ni takaku armia nuna, aya wíniakete tútsuk, jusha ashí iiniu ainiawai, tiarmiayi.

³³ Tura Jesusa akatramurísha, Yus ti yayamu ásar, Yusa kakarmaríjjaj Uunt Jesusa nantakmiarín tuke etseras pujuarmiayi.

³⁴ Tura ashí Yus-shuarka nun kan takakusha jean takaku armia nusha, núnaka surukar kuítian itiararmiayi.

³⁵ Tura itiaar Jesusa akatramurín súarmiayi. Akatramusha susam, niisha atsumainia nuna súarmiayi. Tuma asamtai shuar atsumaka penké atsuarmiayi.

³⁶ Chikichík shuar, ni naari Jusé, nun kan takakuyayi. Jesusa akatramurísha Jusén chíkich náarín apujtusarmiayi, Pirnapín. Nu náarísha, shiir enentáimtikkiartin tawai. Tura Pirnapísha Riwí áentsuyayi. Tura ni akiinia murí núnkenka Chípriiyayi.

³⁷ Niisha ni nunken surukmiayi. Tura nu kuítian itia Jesús akatramurín súarmiayi.

5*Ananíasa tunaari*

¹ Tura chíkich áishman, ni naari Ananías, ni nuwe Sapirjai ni nunken surukarmiayi.

² Niisha nunkan suruk kuítian emeenak akanak jukí Jesusa akatramurin werí takamtsukea nútikias susamiayi. Ni nuwēsha, Sapir, nuna túran nekaamiayi.

³ Túramtai Pítur chichaak “Ananíasa, ¿urukamtai uunt iwianch enentáimin enkemturmatai, Yusa Wakanín anañkataj tusam nunka surukam kuit achikiumna nu akankam ikiurmasam? tímiayi.

⁴ Entá, nuñkia nunka áminiuchukait. Surukumna nu kuitcha áminiuchukait. Nusha, ¿urukataj tusamea tu enentaímpram? Amēsha aya áentsnum wáitruachume. Antsu Yusnumsha wáitruame” tímiayi Pítur.

⁵ Tutai Ananías nuna antuk nú chichamaik jakamiayi. Tura ashí shuar nuna antuk nekaawar ti ashamkarmiayi.

⁶ Nú turunamtai áishmañ tariar Ananías jakan penuararmiayi. Túrawar iwíarsatai tusar júkiarmiayi.

⁷ Tura Ananíasa nuwē arur, menaintiú ura nankaamasaj támiayi. Túrasha ni áishri jakanka nekaachmiayi.

⁸ Támtai Pítur nuwān tímiayi “Turuttia. Átum nunka surukurmena nu, ¿kuit itiarumna núnikik surukuram?” tímiayi. Tutai nuwā tímiayi “Ee, núnik surukji.”

⁹ Tutai Pítur tímiayi “¿Urukamtai atumsha Uunt Yusa Wakaní nekapkamsatai tusarum imiá enentáimprarum? Pai, iisiá. Ame áishrumin iwíarsatai tusar júkiaria nu wininiawai. Tura yamaikia amincha juramkiartatui” tímiayi.

¹⁰ Tutai nu chichamaik niisha imia Pitru wajamunam jaka iniaantmiayi. Aishmañ wayaj tukamá jaka tepan wáinkarmiayi. Túramtai júkiar ni áishrinin ayamach iwíarsarmiayi.

¹¹ Tura ashí Yus-shuar armia nu tura ashí aencha nuna antukarmia nu ti ashamkarmiayi.

Yusa kakarmarijiai túrawarmiania nu

¹²⁻¹⁴ Tura ashí Yus-shuar Yusa Uunt Jeen shikirijn irunin ármiai. Nu shikirisha, Sarumúna, tu anaikiamuít. Tura chíchichmamtinkia nuim iruntratniun ashamiarmiayi. Túmainiyatan, ti péñker áiniawai, tu wearmiayi. Tura Yus-shuar Yusa kakarmarin iniakmasarmiayi. Túra asamtai imiá untsurí aents Yus-shuar ajasarmiayi.

¹⁵ Tura chíchich aents ni shuari jainia nuna jintiá amamtikiarmiayi. Peakjai júkiar, tampunmasha enkeawar júkiar jintiá ayamach áepsarmiayi. Pítur nankaamak ni wakanínsha enkemprutmawainti tusar nu shuar túrawarmiayi.

¹⁶ Núnisañ arantiā shuarsha ti untsurí ni shuari jáinian tura iwianchrukuncha nu Jerusarénum itiarumiayi. Tura ashí nu táaruka tsuámararmiayi.

¹⁷ Israer-patri uuntri, tura Satuséu aencha niijjai pujuarmia nu suiir iiniak

¹⁸ Jesusa akatramurin achikiar enkeawarmiayi.

¹⁹ Túrasha kashi Uunt Yusa suntari nayaimpinmaya tara sepú wáitirin uraimiayi. Tura Jesusa akatramurin aa júkiarmiayi.

²⁰ Tura tímiayi “Wetarum. Tura Yusa Uunt Jeen wajasrum Yusjai tuke iwiaaku átinia nu etserkatarum” tímiayi.

²¹ Nuna antukar kashin tsawar káshik Yusa Uunt Jeen wayawar jintintiawarmiayi.

Nu túmainiai Israer-patri uuntri, tura niijjai pujuarmia nusha iruntrarmiayi. Tura Israer-shuara uuntri, naamka armia nuna iruntrami tusa untsukarmiayi. Ashí iruntrar akatar akupkarmiayi, Jesusa akatramuri sepunmaya itiatarum tusar.

22 Tura suntarsha sepunam jeariar Jesusa akatramur_{in} wáinkiacharmiayi. Atsawai tukam táarmiayi.

23 Taar chichainiak “Sepú waiti asakamua tímianisa_n aa wáinkiaji, tiarmiayi. Tura suntar wáitin iimpru wajainia wáinkiaji. Tura waiti urair wayaj_i tukamar atsá wáinkiaji” tiarmiayi.

24 Israer-patri uuntri_i, tura Yusa Uunt Jee_n wainniu úuntri_{sha}, nu chichaman antukar, “tsej ausha zurutiak nunasha iniaisarat?” tiarmiayi.

25 Nu chichamaik áishma_n taa tímiayi “Aishma_n átum sepunam enkeamarmena nu, Yusa Uunt Jee_n wajasar áentsun jintintiuk pujuiniawai” tímiayi.

26 Túrunamtai Yusa Uunt Jee_n wainniu uuntri_i ni suntar_{ijjai} wear achik itiar_{miayi}. Túrasha penké aents kayaj_{ai} tukurmar_{aj} tusar, yajauch awajtsuk itiar_{miayi}.

27 Tura achik itiaar Israer-shuar naamka pujamunam naka awajsarmiayi.

28 Tura Israer-patri uuntri_i tímiayi “Iisha atumin chicháa chicharu awajsar, Jesusa naari_i pachisrum etserkairap tusar akupkachmakajrum. Túrasha, ¿antukurmek? Atsá. Mash Jerusare_nnum átum etserkamu pampankai. Jes, átum, Jesusan máawarai, in tátsumek. Nusha in makuutai tusarum tárume” tiarmiayi.

29 Nuyá tutai Pítur chíkich Jesusa akatramur_{ijjai} chichainiak “Iikia aentsjainkia iniankasar Yus emka umirkatniuitji, tiarmiayi.

30 Jesus atumek krúsnum máamurmena nuna ii iwiaaku Yusri_i Nin ini-antkimiayi.

31 Yus ni kakarmar_{ijjai} Nin nankaamantu awajsamiayi. Tura nekas Akupniuiti tusa ni untsuur_{in} apujsamiai. Tura áentsun Uwemtikniuiti. Israer-shuar enentái yapaj_{áwar} tunaar_{in}ia uwemprarat tusa Yus túraiti.

32 Nu tuma asamtai iisha nu nekaar étseereaji. Tura Yusa Wakan_{ísha} nuna étseereawai. Túrasha aya Yusa umirkarua nunak ni Wakan_{in} súsaruiti” tímiayi Pítur.

33 Tutai nuna antukar ti kajerkarmiayi. Túrawar, maatai tusar wakeriarmiayi.

34 Tura nu_i Israer-shuara uuntri_i pujumiayi, ni naari_i Kamarír. Niisha Pariséunam páchitkiauyayi. Tura akupeamun jintinniuriyayi. Túmakui ashí aents nin shiir enentáimtin ármiai. Tura niisha wajaki tímiayi “Ju áishma_n aa ishichik wajasarti” tímiayi.

35 Nuyásha irunar matsamarmia nuna chicharuk “Israer shuartiram, ju áishma_n tú túratai tu enentáimsarumna nu aneartarum.

36 Enentáimsatarum. Nuik áishma_n Tiútas wantinkiachmakia. Niisha kapi-tiániitjai takui, kuaru siá_{ntu} (400) shuar nemarkarmiayi. Tura ukunam nin maawarmatai, ni némarkamur_{isha} pisararmiayi. Túrunawar nuní amuukamiayi.

37 Ukunmasha, iruntrar nekapmartin tsawantincha Kariréan_{maya} Jútas wantinkiachmaka. Tura nincha nútiksa_n ti untsur_i nemarkarmiayi. Túman máawarmiayi. Nu túrunamtai nútiksa_n ni némarkamur_{isha} pisararmiayi.

38 Jes, tuma asamtai nu áishma_n aa wajainia nu iniaisatarum. Auka pachisairap. Au tumainia nu aya áentsnaketkuin_{kia} amuukattawai.

39 Tura antsu Yúsnaikui_nkia atumsha amuktai tukamarum tujinkiatarme. Aneartarum. Iniaiyachkurmeka nu tumá pujusrum Yusjai máanikchattarmeash” tímiayi Kamarír.

⁴⁰ Tú tutai tímianak umikiarmiayi. Túrasha Jesusa akatramurin untsukar asutiáwarmiayi. Tura chicharuk “Jesusa naari pachisrum penké ishichkisha etserkairap” tiarmiayi. Tú tiar akupkarmiayi.

⁴¹ Jesusa akatramurisha Israer-shuara uuntri pujamunmaya jíinkarmiayi. Tura wáitsamniaitrume tusa Yuska Jesusa naari pachia asakrin ii natsantin wáitsatniun tsankatramkaitji tusar ti shiir enentáimsar wearmiayi.

⁴² Tura Jesukrístunun áujmatsatniun penké iniaisacharmiayi. Antsu tuke tsawant Yusa Uunt Jeencha tura chíkich jeanmasha páchitsuk etseriarmiayi.

6

Yus-shuaran yainian siati anaikiarmiania nu

¹ Nú tsawantin Yusan umirkaru ti kawenkar ármiayi. Tura tuke tsawant yurumak súsatin ámiayi. Túmakui Yus-shuar Kriaku chichaman chicharmia nu, Israer-shuaran kajeriarmiayi. “Tuke tsawantin yurumak súarmena nuj atumí waje ti nukap súarme. Tura íniuka ishichik súarme” tiarmiayi.

² Túruinia Jesusa tuse akatramuri ashí Yus-shuaran irurar tiarmiayi “Iisha Yus-Chicham etserkatin iniaisar yurumak súsachminiaitji.

³ Tuma asamtai yatsurtiram, atumíniá siati áishman eáktárum yurumkan súarat tusarum. Pénker wekainia nu, tura neka shuar, Yusa Wakaní pimiutkamu ainia nu achiktarum.

⁴ Iikia antsu Yus áujkir unuiniakratkir Yusa chichame etserkir wétatji” tiarmiayi.

⁵ Akatramu tiarmia nuna ashí aents enentáimsar pujuarmiayi. Túmainiak Estepan kan anaikiarmiayi. Estepan sha Yúsan tuke enentáimtiniuyayi. Tura Yusa Wakanísha pimiutkamuyayi. Chíkich áishman kan anaikiarmiayi, niisha Jiripi, tura nuyá Purukuru, Nikianúrsha, nuyá Temun, Parmenasha, Nikiurásha. Nikiurásha Antiukía nun kanmayaitiat Israernancha ashí umirniuyayi.

⁶ Tura nu siati áishman kan Jesusa akatramurin itiararmiayi. Táarmatai, akatramusha, Yus áujtusar, anaikaji tusar múuknumsha ni uwejen awantsarmiayi.

⁷ Túrasha Yusa chichamenka tuke pampanki wémiayi. Nuj Jerusarennumsha Yus-shuar ti kawenkarmiayi. Tura imia Israer-patrisha untsurí Yus-Chichaman umiriarmiayi.

Estepan kan Israer-shuara uuntriin júkiarmiania nu

⁸ Estepan sha Yusa waitnenkartutairi pimiutkamuyayi. Tura Yusa kakarmarisha pimiutkamuyayi. Tuma asa aentsti túrachminian shuar írunmanum túramiayi. Nu shuar Yusa kakarmarin nekaawarat tusa túramiayi.

⁹ Israer-shuar iruntai jea, ni naari Ankantín, ámiayi. Nuyá áishmansha tura Serini nun kanmaya áishmansha, tura chíkich nunka Arijiantrianmayasha, Serisianmayasha, Ásianmayasha, tímian Estepanjai áujmatsatai tusar káutkarmiayi.

¹⁰ Estepan Yusa Wakaní nekatairijiai tímianak chicháa asamtai, nu áishman Estepanjai inkiunaikiar nupetkataj tukamá tujinkarmiayi.

¹¹ Tuma asamtai suiir enentáimtuiniak chíkich áentsun Estepan kan tsanumpruraratusar eá karmiayi. Estepan Muisaisnasha Yúsnasha yajauch áujmatui, titiarum tusar akikiarmiayi.

¹² Penké áentsun, tura uunt ainia nunasha, jintintin ármia nujajisha chichaman júsar yajauch enentáimtikrarmiayi. Tura Estepan kan jintiá akirtuawar achikiarmiayi. Túrawar Israer-shuar naamka matsamarmia nuj júkiarmiayi.

¹³ Tura wait chichamtinian itiar^umiayi. Niisha taar chicharainiak “Yusa Uunt Jeen ti péⁿker ana nu, tura Yusa akupkamurⁱncha ju Estepaⁿ tuke yajauch chicharuⁱ, tiar^umiayi.

¹⁴ Nú arantcha ju Estepaⁿ tí^mia nu antukji, tiar^umiayi. Estepaⁿ chichaak “Nasaréⁿnumia Jesuska Yusa Uunt Jeen sá^aktiatuⁱ, tura nuyá Muisais in ikiur-tamkimiaj nunasha yapajiá^ttawai” tí^mia^yi. Nusha Estepaⁿ tí^mia nu antukji” tiar^umiayi. Tura nunasha pen^{ké} áⁿtar tsanumprurarmia^yi.

¹⁵ Nuyasha ashí Israer-shuar naamka iruntramunam pujuarmia nu Estepaⁿkan iiyaj tukamá ni yapin nayaimpinmaya suntara yapiya nuní í^ran wáⁱnkia^rmiayi.

7

Estepaⁿ etserkamiania nu

¹ Tuma wáⁱniak Israer-patri uuntri Estepaⁿkan aniasmiayi “¿Ju tuinia nu nekaskait?” tí^mia^yi.

² Tutai niisha áⁱmkiamia^yi “Winia úⁿtrutirmesha, yatsurtirmesha anturtuk-tarum. Ii Waantu Yus^ri ii úⁿtrín Apraá^aman wantintiukmiayi. Apraá^amka Misiuputámia-Kartea nun^kanam pujaⁱ, Aran nun^kanam wéatsaⁱn, nuⁱ wantintiukmiayi.

³ Tura wantintiuk tí^mia^yi “Ame nun^kemsha áⁱniurmesha ikiukim nun^ka Wi iniaktustatjamena nuⁱ wetá” tí^mia^yi Yus.

⁴ Tutai Apraá^am Misiuputámia-Kartea nun^kan ikiuki Aran nun^kanam pujus-taj tusa wé^mia^yi. Nuyá ni aparⁱ jakamtai “Arant wetá” tí^mia^yi Yus. Nuna taku ju nun^kan ii pujajnia juⁱ pujsamia^yi.

⁵ Túrayat nun^kan ishichkisha sú^sachmia^yi ju nun^kanam. Antsu “Ukunam amastatjai. Ame jakakmin ame uchirmin susattajai” tí^mia^yi. Tura Apraama uchirⁱ pen^{ké} atsan nuní tí^mia^yi Yus.

⁶ Nuyasha Yus tí^mia^yi “Ame uchirmesha í^rara núⁿisaraⁿ chí^kich nun^kanam pujusartatui. Nuⁱsha emetamu itit awajtai pujuartatui. Kuaru siáⁿtu (400) uwí, tí^mianu uwí wáⁱtsartatui, tí^mia^yi.

⁷ Tú^rasha, Wi asutiá^ttajai ame shuá^rumin wáⁱtkia núⁿaka, tí^mia^yi. Tú^ram nuyá núⁿun^kanmaya shiá^kartatui. Tura Winia enentáⁱmtursartatui júⁱ nun^kanam’ tí^mia^yi.

⁸ Yus tuke Apraá^amnasha chicharuk ‘Yamaikia Wíⁱ-shuar asarum tsupirnak-tiniaitrome. Tuma asam amesha uchiram áⁱshmaⁿkach akiiniamtai, Wi tí^miajna núⁿismek, sirkunsisiúⁿ tutai, shunichirⁱ nuape tsupirkata, tí^mia^yi. Tura chí^ham Wi yamaikia á^mijiaⁱ najanaj nu nekas uminkatniuiti tusam nusha tú^rata” tí^mia^yi Yus. Tuma asamtai ni uchirⁱ Isak akiiniamtai, uchu tsawant nan^kaasmatai, Apraá^am nin tsupirkamia^yi. Tura Isaksha ukunam ni tuse (12) uchirⁱn ii uuntri armia nunasha nú^tiksaⁿ tú^ramia^yi.

⁹ Tura niisha ni yachⁱn Jusen suiir í^yarmia^yi. Tú^mainiak Ejiptu nun^kanam jú^kiarat tusar surukarmia^yi. Tú^rasha Yus né^markauyayi.

¹⁰ Tuma asa, ashí ni itiurchatriⁱnia uwemtikramia^yi. Tura waitnenkartu-tairⁱncha nekatairⁱncha susamia^yi. Tuma asamtai Ejiptunam uunt akupin Paraún Ejiptu nun^kaa akupniurⁱ ajasat tura ni jeen wáⁱnniurⁱ ajasat tusa anaikiamia^yi.”

¹¹ “Tí^miatam tsuka tura itiurchatcha á^mia^yi Ejiptu núⁿkanam. Tura juⁱ Kanaaⁿ nun^kanmasha núⁿisaⁿ á^mia^yi. Tuma asamtai ii uuntri yurumkan pen^{ké} wáⁱncharmia^yi.

¹² Tura Jakup, Ejiptunam yurumak ikiusma awai taman antuk ni uchirⁱn akupkarmia^yi. Tú^rasha wekaicha wearmia^yi. Wats, ii úⁿtriniun ujaajrume.

13 Tura ii uuntri atak Ejiptunam wéenak Jusesha, wíitjai takui ni yachi Jusen nekaawarmiayi. Tura Jusé “Yatsur áiniawai” takui Paraun, antuk “au shuarapitia” tímiayi.

14 Nuyanka Jusé ni yachin chicharuk “Apar itiatarum uchirtuk” tímiayi. Nu shuarsha untsurí, setenta senku (75) matsamarmiayi.

15 Nuní tutai Jakupsha ni shuarijiai Ejiptunam pujustai tusar weararmiayi. Tura ukunam nú nunkanman jakamiayi. Tura ni uchirisha ii uuntri ainia nu, núnisanu nú nunkanman jákarmiayi.

16 Tura atak ukunam ni shuari Sikiam nunkanam ni ukunchin júkiar iwiarsarmiayi. Kame Sikiam nunkanam Apraámka yaunchu játsuk Amura uchirí nunken sumakmiayi. Túramtai nui iwiarsarmiayi’ tímiayi.

17 ‘Yus, Apraáman chicharuk “Nekas wi susattajme” tímiania nú tsawant jeatemamtai, Ejiptu nunkanam Israer-aents pampanki ti kawenkarmiayi.

18 Nu tsawantincha Ejiptunam chíkich akupin naamka ámiayi, tura Jusen nekaachmiayi nii.

19 Nu akupin ii yaunchu úuntrin anankawar yajauch awajiararmiayi. “Atumí uchirí kuírchich ana nu ajapa ikiuktiarum” tu wémiayi. Pampankarain tusa tímiayi.

20 Tiri iniaisamunam Muisais akiiniamiayi. Muisaisnaka Yus shiir enentáimtimiai. Tura ni nukurí menaintiu nantu takusmiayi.

21 Tura nuyá ajapa ikiuktin jeamtai entsá apujsamiai. Uunt Paraunka nawantri Muisaisan wainiak jukimiayi. Achik, ni uchirinia tímatrusan jukí tsakatmarmiayi.

22 Tuma asa Muisais unuimiátrauyayi ashí Ejiptu aents nékarmia nuna. Túramurisha chichamesha kakarmauyayi.’

23 Estepan tuke étseruk juna tímiayi: ‘Nuyá Muisais kuarenta (40) uwí takaku asa Israer áentsun iyutaj tusa wakerimiayi, ni shuari asamtai.

24 Nuyá we Ejiptunmaya áishman ni shuarin máatasa pujurun wáinkiamiayi. Tura Muisais ni shuarin ayamprak Ejiptunmaya áishmankan máamiayi.

25 Wíi turamujai Yuska Israer-aentsun uwemtikrattawai, tu nekaamiayi Muisais, Yus timia asamtai. Tura Israer-aencha áintsaran nékainiawai tu enentáimsamiayi. Túrasha ninikia nekaacharmiayi.

26 Kashin tsawar Muisais ni shuari jímiar maani pujuinian wáinkiamiayi. Tura nawamnaikiarat tusa “¿Urukamtai nuamtak yatsumjaisha yajauch awajiarum?” tímiayi.

27 Tutai emka nankaama nu Muisaisan kárut shitiá “¿Ya amincha ii akup-tamin tura ii chichartamin anaitiamkamam?”

28 ¿Winiasha maantuátaj tusam wakeramek, yaú Ejiptunmaya áishman máamamna nútiksamkea?” tímiayi.

29 Nuna antuk Muisaiska Matian nunkanam pisar, nú nunkanam kuarenta (40) uwí yajaya áintsan pujumiayi. Nú nunkanam pujus, nuatak, jimiará uchin yajutmarmiayi.’

30 ‘Kuarenta uwí nankaamas, nu atsamu nunkanam Senai náinnium tíjiuch Yusa suntari nayaimpinmaya taa Muisaisan wantintiukmiayi. Numi uchich ukat-ukatin keamunam wantinkiamiayi.

31 Muisais, nuna kean wainiak ashamkamiayi. Tura weantuk iistaj tukamá Uunt Yusa chichamen antukmiayi.

32 Yus tímiayi “Wíitjai Yus. Ame úuntrumí Apraáma Isaka, Jakupa Yúsríntjai” tímiayi. Tutai antuk Muisaiska ti kuraimiayi sapijin. Tura ístinian tujinmiayi.

33 Nuyá Uunt Yus tímiayi “Úuntron shiir awajsataj tusam, ame sapatrum ukuinkiam ikiuktia, wajamna nui Wi pujakui.

34 Nuyá nekaata, tímiayi. Wíi-aents Ejiptunam wáitias pujuinia nuna wáinkiajai. Tura útainia nunasha antukjai. Tuma asamtai uwentikrataj tusan tarajai. Wats, akupkatjame ámin. Ejiptunam waketkitia” Yus tímiayi Muisaisan.’

35 Estepañ tuke étseruk: ‘Ju Muisaisan ni shuari “¿Ya amincha ii akuptamin tura ii chichartamin átinniasha anaitiamkamam?” tiarmia nuna Yuska akupniun anaik uwentikrarat tusa awainki akupkamiayi. Numiniam ni suntari wantintiukmia nuna chichamejai Yuska Muisaisan akupkamiayi, tímiayi.

36 Muisaisaiti Israer-aentsun Ejiptunmayan uwentikramia nu. Yusa kakarmarın nekaawarat tusa, aentsti túrachminian untsurın túramiayi Ejiptu nunkanam. Nuyá Kapaantin Nayaantsanmasha, tura nuyá kuarenta (40) uwitin atsamunam pujuiniaisha ti kakarman iniaktusmiayi.

37 Jú Muisaisak Israer-shuaran chicharuk “Atumíniyanak etserniun Yus ukunam anaikiattawai, winia anaitiukma áintsan. Tuma asamtai nu shuarsha umirkamniuram” tímiayi.

38 Jú Muisais Israer-aentsjai atsamunam pujumiayi. Senái nainnium Yusa suntari níjiaisha pujumiayi. Tura Muisaiska ii úntrijiai pujumiayi. Níiyaiti iwiaaku pujustin chichaman sunasmia nu. In ujamaktinian sunasmiai.’

39 “Túrasha ii yaunchu uuntri Muisaisan umirkatniun nakitiarmiayi. Áaniuk imiá umirtaint tusar Ejiptunam waketkitniun wakeriarmiayi.

40 Túmainiak Muisais Yusjai chichastajtsa murá wématai nu shuar Muisaisa yachin Arunkan tiarmiayi “Ii yusrı najanató, ii nemarsatin. Áaniusha Muisaissha Ejiptunmaya in juramkiyatcha tútsuk weruma” tiarmiayi.

41 Nuyá wáakachia áaniun najanawarmiayi. Túrawar, júiti ii yusrı tusar, kuntinian maantuawarmiayi, nu susatai tusar. Tura ni uwejejai najanamun íisar ti wararsarmiayi.

42 Nuna túruinian wáiniak Yus, iniaisajai taku, niya kanakmiayi. Nii wakerak yaan tikishmatrarti, tímiayi. Tuma asamtai, yaunchu Yusa etserniuri junı áarmiayi:

“‘Israer-aentsu, kuarenta (40) uwitin atsamunam wekaimiarmena nui, ¿Winiak kuntin maanturtuamarum? Winia surustai tusarum penké túrachurme, tímiayi Yus.

43 Antsu, Muruk naartin ántar-yusa pujamurın jukimiarme. Tura chíkich ántar-yussha, ni naari Rempañ, yaa áanin najanarum nusha jukimiarme. Júkin asakrumin atumı nunkeya jukin, tímiai Papirúnia nunkan nankaiki akupkatjarme” tímiayi Yus.”

Nunı áarmaiti’ tímiayi.

44 Estepañ tuke étseruk: ‘Yus Muisaisan tímiayi “Wi akupeamu chicham ikiunsatin jeá áaniun Wi iniaktusjamna tímiatrusmek atsamunam najánató” tímiayi. Tutai Muisais Yus tímianak umikmiayi. Nu jean ii uuntri yaunchu takaku áarmiayi.

45 Nu jean ni uchiri akintkiar akintkiar wearmiayi. Ukunam, jú nunka achiktin jeamtai, Yuska kapitían Jusuejai jú nunkanmaya aentsun jiiki akupkarmiayi. Tura ii uuntri kapitían Jusuejai winiarmia nu, nu jeancha jú nunkanam itiararmiayi. Tura Tawit uunt akupin náamtsain, ii úntrisha nu jean takaku áarmiayi.

46 Kame Yus Tawitian yájau enentáimtichmiayi. Tuma asamtai Tawit Yus shiir pujustinian jean jeamtinian seamiayi.

47 Túrasha antsu Tawitia uchiri Sarumún Yusa jeen jeammiayi.

48 Túrasha aents jeammanuman Uunt Yus pujuschamniaiti. Jes, yaunchu Yusa etserniuri Yus tímia nuna áarchamkia.

⁴⁹ Juna áarmiayi:
 “Nayaimpikia winia pujutairuiti. Nunkanmasha nawer tarimiui.
 ¿Warí jea najatruatai tusarme tarum? tímiayi Uunt Yus.
 Tura Wi ayampratniusha, ¿tují aa?

⁵⁰ Wiki winia uwejrújain ashí najanachmakiaj” tímiayi.’

⁵¹ Estepañ tuke étseruk: “Tura átumka Israer-shuartirmeka atumí enentájijiai tuke umichuitrume. Atumí kuishisha weaktsui tura Yus nékachua núniniaitrume. Yusa Wakaníjiaisha tuke nemasnaikiaitrume. Tura atumí yaunchu úuntrijiai métek túrarme’ tímiayi.

⁵² ‘Iisia, atumí úuntrisha Yusa etserniurín tuke kajerin áarmiayi, tímiayi. Tura nú arant atumí úuntrisha Tunaarincha tátatui tu etseru wekaan, máacharmakia. Jes, nútiksarmek yamaisha, Tunaarincha támania nusha atumek anankarum máachmakuram, tímiayi.

⁵³ Tura Yusa suntari nayaimpinmaya Yusa chichamen susamuitiatrum atumsha penké umikchamarme” tímiayi Estepañ.

Estepañka jakamuri

⁵⁴ Israer-aencha Estepañ tu chichaamu antukar imiá kajerkar nain kátetete awajarmiayi.

⁵⁵ Tura Estepañsha imiá Yusa Wakaní pimiutkamuyayi. Tuma asa nayaimpinmaani íimias, Yusa wincharín, tura Yusa untsuuríniní Jesusan wajan wáinkiamiayi.

⁵⁶ Tumá wáiniak Israer-áentsun tímiayi “Núá ískua, nayaimp uranniun wáinjai. Tura Jesusan, Aents Ajasu tutaiya nuna Yusa untsuuríniní wajan wáinjai” tímiayi.

⁵⁷ Támaitiat niisha kuishín akiriarmiayi, tura achiktai tusar charáa tiar ashí wajatkiarmiayi.

⁵⁸ Túrawar, péprunmaya arant júkiarmiayi. Tura antuk etserkarmia nu pushirín áikiar, natsa Sauru wajamunam au iisti tusar áeprusarmiayi. Tura máawartai tusar kayajai tukurarmiayi Estepañkan.

⁵⁹ Tura Estepañka tukamaitiat Yúsan áuj samiayi. Tura áujuk “Uuntru Jesúsá, winia wakantrusha jurutkitia” tímiayi.

⁶⁰ Tura tikishmar áujuk “Uunta, jú winia túrutainiana jú makuip” tímiayi. Tura nuna tí iniais, jakamiayi.

8

Sauru Yus-shuaran kajerkarmiania nu

¹⁻² Estepañkan máawarmatai Sauru, péñkeraiti, tímiayi. Tura áishman Yúsan péñker enentáimta armiania nu, Estepañka ayashíncha iwiarsarmiayi, tura aneenak ti uutiarmiayi. Tura nú tsawantai Yus-shuaran Jerusarénum pujuarmia nuna ti kajerkatin nan kamnamiayi.

³ Sáuruka Yus-shuaran kajerak ti pataat wémiayi. Túmak nú jeá wayá, nú wayá áishman nasha nu wancha wáinkianka japíki júki sepunam enkeataj tusa túrimiayi. Tumakui Yus-shuar Jerusarénumia pisarar Jutía nunkanam, tura Samaria nunkanmasha jeawarmiayi. Jesusa akatramurínkia antsu Jerusarénumañ juakarmiayi.

Samaria nunkanam etserkarmiania nu

⁴ Túrasha Jerusarénumia aents pisararmia nu, arant wénaksha tuke Yusa chichamen etserkini yujarmiayi.

⁵ Tura Jiripi Jerusarénumia we tura chíkich péprunam Samaria núnkanam ámiania nú jeá, chichaak “Yus anaikiamu ana nu Jesusaiti” tu etsermiayi.

⁶ Túrakui aents iruntrar chikichík enentájjai Jiripi étsereamun titiú pujusar antukarmiayi. Yusa kakarmarın nekaawarat tusa aentsti túrachminian túrimia nunasha wáiniarmiayi.

⁷ Ti untsurí aents iwianchruku ármia nuna Jiripi nu iwianchin jjiirki akup-tiarmiayi. Tura íwianch jíiniainiak kakantar charáa tiar jíiniarmiayi. Tura ti untsurí emearusha shutuapsha péñker ajasarmiayi.

⁸ Tuma asamtai nú péprunmayan̄ka ashí shuar ti warasar pujuarmiayi.

⁹ Tura nú nunkanam uwishin Semun̄ pujumiayi. Nuikkia wi ímianaitjai tusa Samarianmayā aentsun ananniuyayi.

¹⁰ Tuma asamtai ashí aents úmamkesar uchichisha, uuntcha, nin anturi-armiayi. Tura tiarmiayi “Ju Semun̄sha Yusa kakarmarijjai áitkiawai.”

¹¹ Tura ti untsurí uwí wawekratmarijjai anankarta asamtai, umirkarmiayi nu aents.

¹² Túrash Jiripi Yusa akupeamurın, tura Jesukrístununcha shiir chichaman etserkamiayi. Tura, nuna antukar nuwasha áishman̄sha umikiar imian wearmiayi.

¹³ Semun̄sha imia uwishniuitiat Yus-Chichaman enentáimtus imianmiayi. Tura Jiripijjai tsaniñ wekaimiayi. Yusa kakarmarın shuar nekaawarat tusa Jiripikia aentsti túrachminian túrimiayi. Nuna wáiniak Semun̄ ti enentáimsamiayi.

¹⁴ Tura Jesusa akatramurisha Jerusaréñnum pujuarmia nui Samarianmayā aents Yusa chichamen umirainiawai taman nekaawarmiayi. Tuma asamtai Pitruncha Juán̄nasha nekáa ikiuutarum tusa akupkarmiayi.

¹⁵⁻¹⁶ Tura Samarianmayā Yus-shuarsha aya Uunt Jesusa náariin imianarmiayi. Yusa Wakan̄kia tárachmiayi. Tuma asamtai Pítrusha Juan̄jai nui jeawar Samarianmayā Yus-shuara enentáin Yusa Wakan̄i pimiutkarat tusan Yusan áujtusarmiayi.

¹⁷ Tura áujtua umikiar Pítiur Juan̄jai ni uwejeñ nú Yus-shuaran awantsarmiayi. Nuinkia Yusa Wakan̄i taramiayi.

¹⁸ Jesusa akatramurí uweje awasmanum Yusa Wakan̄i taramtai, Semun̄sha nuna wáiniak, kuitjai nu kakarman sumaktaj, tímiayi.

¹⁹ Tura Jesusa akatramurın chicharuk tímiayi “Winiasha kuitjai surustarum nu kakaram. Wisha nútiksanak nánkamas aentsnum winia uwejur awantsam Yusa Wakan̄i tarurat tusan tajai” tímiayi.

²⁰ Tutai Pítiur tímiayi Semun̄kan “Ámeka kuítrumjai métek men̄kakatniuitme. Warí, Yus amaana nu ¿kuitjai sumaktinkiait?

²¹ Yus esetram enentáimtachu asam nu túramu pachistincha pen̄ké tujinkiname, tímiayi.

²² Enentáimprata. Túram Yus seata. Enentáimtamna nuna Yus tsankurtamprashtimpiash.

²³ Nékaime, tsaan̄kea áintsan̄ yapá enentáimin pimiutramkaiti. Tura tunaarmiin̄ jinkiámua núniniaitme” tímiayi.

²⁴ Tutai Semun̄ áimkiamiayi “Uunt Yus aujtursatarum. Túrutrumna nuna túrunawaj̄ tusan tajai” tímiayi.

²⁵ Nuyasha Jesusa akatramurí Jesusa túramurın nú áentsun ujakarmiayi. Tura wésar Samaria nunkanam pepru ámunman̄ka Yus-Chichaman nui etserkiar, nui etserkiar Jerusaréñnum waketkiarmiayi.

Jiripi Yus-Chichaman etserkamiania nu

²⁶ Tura Yus ni suntarın nayaimpinmayan̄ Jiripincha akuptukmiayi. Niisha chicharuk tímiayi “Wátskea. Juyā jiiinkim Jerusaréñnumiā jintia En̄kasa

péprunam wea nuní weme, anaraanĭ wetá. Nú jĭntiaka atsamu nunĭkanam nanĭkaamawai' tímiayi.

²⁷ Tutai Jiripisha wémiayi. Jintiá wesa Itiupianmaya áishmanĭkan wáinkiamiayi. Nú áishmanĭsha Itiupia nunĭka akupniurĭn, ni naarĭ Kantasen takarniuyayi. Kantaseka núwayuyayi. Tura nu áishmanĭ ti neka asa nuna kuĭtrĭn írniuyayi. Nú áishmanĭsha Yúsan áujſataj tusa Jerusarénnum wéu wáketmiayi.

²⁸ Karetanam enĭkemar wesa, Yusa etserniurĭ Isayas aarmia nuna aujki wémiayi.

²⁹ Wats, Jiripi nú jintianam wéakui, Yusa Wakanĭ nin tímiayi “Nú kareta amayánta.”

³⁰ Tura Jiripisha amayán, Yusa etserniurĭ Isayasa áarmarĭn áujun antuk, chicharuk “¿Aujeamna nu nékamek?” tímiayi.

³¹ Tutai nú áishmanĭ tímiayi “¿Itiurak nekaataj? ¿Yaki jintintruat?” tímiayi. Tura antsu iijĭaj wetá tusa, Jiripincha enĭker jukimiayi karetanam.

³² Nu papí áarman áujmia nu júuyayi: “Murikiua áitkiasanĭ jákatniunam júkiarmiayi. Tura uchich murik, ure tsúpiram chichaatsna núnisanĭ niisha chichakchamiayi.

³³ Nincha iniatsáarmiai. Túrasha penĭké chichamnaka tútsuk tsanĭkamakmiayi. Niisha nunĭkanam iwiaaku pujá maamu asamtai, ¿yaki nuna áujmatkat'?” Nuní aarma ámiayi.

³⁴ Kantase takarniurĭ Jiripin aniasmiayi “Waitneasam turuttia, tu aarma nusha, ¿yana ta? ¿Yusa etserniurĭ nínikik túmama? ¿Chikichnash ta?” tímiayi.

³⁵ Nuyá Jiripi nu aarman áujtus “Juka Jesusnan tawai” tímiayi. Tura nú arantcha Yus-Chichaman ujakmiayi.

³⁶ Nuyá entsa ámanum nanĭkaamak áishmanĭ Jiripin chicharuk “Juĭ entsá jeaji. Wikia juĭ imianchamniakaitaj” tímiayi.

³⁷ Tutai Jiripisha tímiayi “Tuke enentáimĭaj Jesus nekas enentáimtakminkia túramniaitjame.”

Tutai áishmanĭ chichaak “Ee nekasaiti, Jesukrístuka Yusa Uchirĭnti tajai” tímiayi.

³⁸ Tura, karetan awajas mai jíinkiar entsá wearmiayi. Nui Jiripikia Kantase takarniurĭn imiaimiayi.

³⁹ Tura kukar jíinkiar matai Uunt Yusa Wakanĭ Jiripinkia jukimiayi. Tuma asamtai Kantase takarniurĭsha Jiripin wáinkiachmiayi. Túrasha nínkia waras wémiayi.

⁴⁰ Jiripisha jeachat Asutu péprunam wantinkiamiayi. Tura nuyá jiinki péprunam núĭ wayá, núĭ wayá Yus-Chichaman etserki we, Sesaria peprunam jeamiayi.

9

Sauru Jesusan umirkamiayi (Túramurĭ 22.6-16; 26.12-18)

¹ Nuna tumaj, Jerusarénnum Uunt Jesusan umirkarmia nuna máataj tusa áujmattan Sáuruka penĭké iniaichamiayi. Tuma asa Israer-patri uuntriĭ iyutaj tusa werimiayi.

² Tura jeari tímiayi “Papí ame naarmĭjĭaj áaram surusta. Wi nuna papí jukin timiaĭ Tamasku péprunam jean, Israer-shuar iruntainiam wayattajai. Túran nú papĭjĭaj Jesusan umirkaru ainia nuna, nánkamsan achikiartatjai. Túran áishmanĭnasha nuwanĭcha achikian jinkian, juĭ Jerusarénnum enĭkeataj tusan ikiaankattajai” tímiayi.

³ Tura papí susam Sauru jintiá wéaj, Tamasku péprunam nuntumsaj nuí aya aneachma nayaimpinmaya tsáapin jítsumir téntakmiayi nin.

⁴ Túrunamtai Sauru nunká iniaarmiayi. Tura nayaimpinmaya chichaa-mun antukmiayi. “Sauru, Sauru, ¿Urukamtai yajauch awajtustaj tusam imiá pataaturam?” tímiayi.

⁵ Táman antuk “¿Amesha, yáitiam, uunta?” tímiayi Sauru. Tutai ataksha áimkiamiayi “Wikia Jesusaitjai. Ame pataaturmena núitjai, tímiayi. Wí aents pataatamna nuí, amek enentáimin yajauch awajmamsame, waaka sankanmiak numin ijiuma núnismek” tímiayi.

⁶ Nuyanka Sauru sapijin kuranki tímiayi “Nuinkia Uunta, ¿wi warinia itiurkat tusamea wakeram?” tímiayi.

Tutai Uunt chichaak “Wajakim weme péprunam wayatá, tímiayi. Nuí jeawakmin ame túratamna nuna turamiartatui” tímiayi.

⁷ Tura Sáurujai irunar wearmia nu, chichaamun antukarmiayi. Tura áentsnaka penké wáinkiacharmia. Tuma ásar ti ashankarmiayi.

⁸ Nuyá Sauru nunká tepá nantakmiayi. Tura wáinmaktaj tukamá wáinmakchamiayi. Tuma asamtai chíkich shuar uwejnum enkekjar júkiarmiayi Tamaskunam.

⁹ Nuí jeá menaintiu tsawant íimtsuk tura yurumtsuk penké úmutsuk pujumiayi.

¹⁰ Nuí Tamaskunam Yus-shuar Ananías ámiayi. Nin mesekranam Uunt Jesus tímiayi “Ananías.”

Tutai “¿Warí wakeram, Uunta?” tímiayi.

¹¹ Nuyá Uunt Jesus tímiayi “Wajakim jintia, Naka tutaiya nuí wetá. Nuísha Jutasa jeen jeam, Társunmaya Sáurun eaktaj tusan winijiai, titiá, tímiayi. Niísha Yúsan áujuk pujawai.

¹² Tura juna mesekranam ipiatkamjai Sáurun. Aishman wayá ni uwejéjai ántiawai, ataksha íimit tusa. Nú áishmanka ámetme, Ananías” tímiayi Jesus.

¹³ Táman antuk Ananías chichaak “Túrasha Uunta, ju áishman ame áentsrumin Jerusarénum ti yajauch awajchakait. Ni yajauch túramurín ti untsurí aents ujatainiawai, tímiayi.

¹⁴ Tura yamaisha Israer-patri chicharniun papirín takakui. Tura nujai ame náarmin páchiaj nuna achik jukitiaj tusa tímiajaisha tarutramji” tímiayi Ananías.

¹⁵ Tutai Uunt Jesus tímiayi “Áankisha wetá. Ju áishmankan winia etserniur atí tusan achikjai Wi. Niísha Israer-shuarchancha tura kapitiánniasha tura Israer-shuarnasha wínian etserin átatui, tímiayi.

¹⁶ Tura Sauru winia náarun páchia asa ti wáitsattana núnaka nin iniaktustatjai” tímiayi Jesus.

¹⁷ Tura Jesus táman umirak Ananías Sauru pujamunam wémiayi. Tura jeari wayá uwején awantas tímiayi “Yatsuru Sauru, Uunt Jesus jintiá wantintiurmakmamna nusha ame ataksha íimiat tusa, tura Yusa Wakanísha enentáimin pimiutramkat tusa winia akuptukai” tímiayi.

¹⁸ Nu chichamaik ni jiiya namaká saepeya áanin iniaarmiayi. Túrunamtai ataksha íimmiayi. Túruna wajakim we imianmiayi.

¹⁹ Nuyasha yurumámiayi. Tura yurumásha kakaram ajasmia. Tura Yus-shuarjai Tamaskunam wárumchik tsawant pujusmiayi.

Sáuruka Tamasku péprunam Yus-Chichaman etserkamiania nu

²⁰ Nuyanka Sauru Israer-shuara iruntairín wayá Jesusa túramurín etserkamiayi. Etseruk tímiayi “Nekasaiti, ju Jesus Yusa Uchirínti” tímiayi.

21 Nuna ashí anturú pujuiniaka “¿Ausha urukakua aania? tiarmiayi. Entá ju áishmansha Jerusarénum Jesusan enentáimtuinian ti pataatimia núchakait. Tura tímiajaisha nuna achik Israer-patri akupniuriin jukitiaj tusa tamia núchakait” tiarmiayi.

22 Tura Sáurusha sapijmiatsuk etsermiayi. “Ju Jesus nekas áentsun Uwemtikniuiti” tu etsermiayi. Tura ti paant étserkui, Tamaskunmaya Israer-aents, nekaschaiti titiaj tukamá tujinkiarimiayi.

23 Tura ukunam, Israer-aents Sáurun maatai tusar chichaman jurusarmiayi.

24 Tura Sáurusha nu chicham jurusman nekamamiayi. Israer-aents pepru jínmanum tuke tsawaisha, káshisha achikiar maatai tusar jintian akirtiarimiayi.

25 Nuna antukar Yus-shuar Sáurun chiiknium kashi enkeawar itiararmiayi. Pepru tanishnum itiarar awemarmiayi.

Sáuruka Tamaskunmaya Jerusarénum wémiania nu

26 Tura Sauru Jerusarénum jeá Yus-shuarjai iruntrattsá wakerimiayi túrasha nínkia ashamiarmiayi. Sáurusha nekas Yus-shuar ajaschaiti tusar ashamiarmiayi.

27 Túmainiaj Pirnapí Jesusa akatramuri matsatmanum jukimiayi Sáurun. Tura nuí ejé tímiayi “Ju Sauru jintiá wesa Uunt Jesusan wáinkiaiti. Tura Yus chicharkaiti. Tuma asa Sauru Tamaskunam sapijmiatsuk Jesusa náarin etserkaiti” tímiayi.

28 Tura Sauru Jerusarénum juákmiayi. Tura Yus-shuarjai irunar pujumiayi.

29 Nuyasha Yus, etserkata tutai, sapijmiatsuk Jesusa túramuri etsermiayi. Tura Israer-shuar Kriaku chichaman chichau ármia nu, nuí pujuarmiayi. Sáurusha nu shuarjai áujmatsarmiayi. Túrasha nu shuar Sáurun itiur máatjik tusar chichaman juriarmiayi.

30 Tura Yusaj yachi ármia nu, chicham jurusman nekaawarmiayi. Neka ásar Sáurun Sesaria peprunam júkiarmiayi. Tura nuyasha Tarsu péprunam akupkarmiayi.

31 Tura Jútianmaya, Kariréanmayasha, Samarianmayasha Yus-shuar shiir tímiajnisan ajasar kakaram ajasarmiayi. Yúsan ashamainia ásar, tura Yusa Wakaní yayamu ásar kawenki kawenki wearmiayi.

Pítur Eneasan yáimiania nu

32 Tura Pítur Yusaj yachi armiania nuí iráa wekaimiayi. Wekaak Yus-shuar Rítianam matsamarmia nuísha iraumiayi.

33 Nuísha Rítianam jeá áishmankan Eneas náartinian wáinkiamiayi. Niisha emearu asa wekaicha uchu uwí aya tépenuyayi.

34 Tura Pítur chicharuk “Eneasa, Jesukrístu tsuármawai. Nantaktia. Tura esekmatairam iwiarata” tímiayi. Tutai Eneas nu chichamaik nantakmiayi.

35 Nuna túman wáinkiar Rítianmaya aents tura Sarunmaya aencha enentáimprar Uunt Yusan nemarsarmiayi.

Nuwa Túrkas nantakmiania nu

36 Túrasha Jupe péprunam nuwa Yus-shuar pujuyayi, ni naari Tapitia. Tura nusha Kriaku chichamjainkia Túrkas tuiniawai. Nu nuwasha nuí pujus tuke pénger túriniuyayi. Tura niisha nútiksaj yaj wémiayi.

37 Nu tsawantinik Túrkas sunkuran jateemak jakamiayi. Túrunamtai ayashin nijiarar yakí tesaamunam áepsarmiayi.

³⁸ Jupe péprusha Rítianmaya tíjjuch ámiayi. Júpenmaya Yus-shuar Rítianam Pítiur pujan nekaawar jimiará áishmankan akatrar akupkarmiayi, Júpenam wari winití tusar.

³⁹ Nui tutai Pítiur niijjai wémiayi. Tura támatai jaka tepemia nui awayáwarmiayi. Nui wayamtai waje pujuarmia nu úutkiar Pítrun téntakarmiayi. Túrawar pushirin, Túrkas iwiaaku pujus najankamia nuna iniaktusarmiayi.

⁴⁰ Nuyaŋka Pítiur aa akupkarmiayi ashí. Tura niisha ninki tikishmar Yúsan áujsamiayi. Nuyasha nuwan jaka tepaan iis tímiayi “Tapitia nantaktia.” Tutai niisha ími Pítiur wajaan wáiniak nantaki pujusmiayi.

⁴¹ Tura Pítrusha nuwan uwejnum achik awajkimiayi. Tura iniais Yus-shuar ármia nuna tura wajencha untsukar Túrkas iwiaaku ajasun iniaktusarmiayi.

⁴² Nu túrunamun ashí aents Jupe péprunmaya nekaawarmiayi. Túrawar untsuri aents Uunt Jesusan umirkarmiayi.

⁴³ Tura Pítruka Jupe péprunam untsuri tsawant nuapen-iwiarin Semunka jeen pujusmiayi.

10

Pítiur Kurniriujai

¹ Sesaria péprunam Kurniriu naartin suntara kapitiántri pujumiayi. Ni suntari Itiaria nunkanmaya ármiayi.

² Nu kapitián Kurniriu ni shuarijjai, Yuska nankaamantuiti, tu enentáimtiarmiayi. Tuma ásar Yúsan enentáimtin ármiayi. Tura nútiksan kuítniasha takakchan yáintaj tusa Israer-shuaran súuyayi. Tura tuke tsawant Yúsan áujtiniuyayi.

³ Chíkich tsawantai, nantu aanku ajasai Kurniriu ímiarmiayi. Yusa suntari Yus nayaimpinmaya akupkamu, ni pujamunam utuá “Kurniriuá” tímiayi.

⁴ Kurniriuá tutai, Yusa suntarin ashamak ímia pujumiayi. Tura “¿Warimpiait, Uunta?” tímiayi.

Tutai Yusa suntari tímiayi “Ame seamun Yus anturtamkai. Tura at-sumainia nu yayakmin Yus shiir enentáimturmawai’ tímiayi.

⁵ Tura Yusa suntari Kurniriuun tuke chicharuk “Wats, áminiuram Júpenam akupkata. Semun, chíkich naari Pítiur, tatí tusam akuptukta, tímiayi.

⁶ Nu Semunsha chíkich Semunjai pujawai. Nuka nuapen-iwiarin Semunkaiti. Tura ni jeesha nayaantsanam ayaamach pujawai, tímiayi. Nui jeawakmin, ame túratamna nuna Semun Pítiur turamtatui” tinia ikiukmiayi.

⁷ Tura Yusa suntari waketkimtai, Kurniriuka ni takarniurin jímiaran itiamiayi. Tura suntaran chikichkiniak nemarsat tusa itiamiayi. Nu suntar ni írutramuriyayi. Tura Yúsan enentáimtiniuyayi.

⁸ Kurniriusha ni túrunamurin ashí ujáa-já awajas Jupe péprunam akupkarmiayi.

⁹ Kashin tsawantai Kurniriu suntari Júpenam nuntumsarai, tutupin ai Pítiur jea yakí wáakunam Yúsan áujsatajtsa wakamiayi.

¹⁰ Pítrusha ti tsukamak yurumátaj tusa wakerimiayi. Túrasha yurumkan iniarainiai Pítiur íkiajtiusmak,

¹¹ nayaimp uranmianum wankakaram tarachia áanin tura nuna tsakarin jinkiakman tárun wáinkiamiayi.

¹² Nu tarachnium yajasma irunmiayi. Wekainiusha, nanamtincha, tura napisha enkemiarmiayi.

¹³ Tumai Yus Pitrun chicharuk “Pitru, wajakim maam yuata” tímiayi.

14 Tutai Pítíur tímiayi “Atsá Uunta. Ii Israer-shuartikia yajauch yajasma áinia nu tura yúatin surinkiamu ana nuka penké yúchaitji. Tuma asamtai júna wikia yuashtatjai” tímiayi.

15 Túrasha Pitrun atak Yus chicharuk “Wi, péñkeraiti, tájana nu, yajauchiiti, tiip” tímiayi.

16 Nuka menaintiú túrunamiayi. Tura nuyasha tarach ataksha nayaimpiniam wakamiayi.

17 Nuna túrunan wáiniak Pitiur wariniak áaniuncha wáinkiaj tusa enentáimia pujaj kapitián Kurniriu ayakma armia nu, anintruiniak jeawariayi.

18 Tura jeawar kakantar unsummiar “¿Semun, Pítíur, juin pujá?” tiarmiayi.

19 Tura Pítruka ímiarmarin tuke enentáimia pujaj Yusa Wakaní chichaak “Menaintiu áishman untsurmainiawai, tímiayi.

20 Wajakim akaikim arantutsuk au nemariarta, Wi akupkamu asamtai” tímiayi.

21 Nuna antuk Pítíur taramiayi. Tura áishmankan Kurniriu akupkama nuna wajainian wáiniak “Wiitjai Pítíur. Átum eátrumna núitjai. ¿Warí tarin-trum?” tímiayi.

22 Tutai niisha tiarmiayi “Iisha kapitián Kurniriu akupkamu taji. Kurniriu áishman péñkeraiti. Yúsan enentáimtiniaiti. Tura Israer-aencha nin shiir enentáimtuiniawai. Niya winiaji, tiarmiayi. Kame nuik, Yusa suntari, nayaimpinmaya akupkamu, ii kapitiántrin tímiayi “Pitrun untsukát akupkata. Nii tatí. Tura nii títiatna nu péñker anturkata” tímiayi. Nuna ii kapitiántrin takui iisha winiji” tiarmiayi.

23 Tutai Pítíur jeá awayámiayi. Tura nu kashi nu kanararmiayi.

Kashin tsawarar Pítíur niijaj wearmiayi. Túrasha Júpenmaya Yus-shuarsha nin nemariarmiayi.

24 Nuyá tsawarar Sesaria péprunam, Kurniriu nákamun jeariarmiayi. Kurniriu ni shuarin tura ni nekas amikrin, nekaatarum tusa untsuk ikiaankamiayi.

25 Tura Pítrusha jeamtai Kurniriu aá jiiintiuki Pitrun tikishmatramiayi.

26 Túrasha Pítíur awajki tímiayi “Wajaktia. Wisha aya áentsketjai. Ámea núnisketjai” tímiayi.

27 Tura chichasar jeá wayawarmiayi. Tura wayá, untsurí aents matsatun wáinkiamiayi.

28 Nuyá Pítíur chichaak tímiayi “Amikrua, atumsha nékarme. In Israer áentstinkia, chích áentsjai pachiniarchatniuitrume, tura ni jeencha wayashtiniaitrome in jintintraamin turamainiaji, tímiayi. Túrasha Yuska ni enentáimsamurin wíniaka paant iniaktursayi. Túmaitkiui wikia nánkamas áentsun yajauchiiti, tura auka wapikiaiti, tíchamniaitjai, tímiayi.

29 Tuma asamtai, untsurkurmin, páchitsuk winimjai. Túmaitkiui nekaataj tusan wakerajai. ¿Urukamtai untsurkamarum?” tímiayi.

30 Tutai Kurniriu tímiayi “Kuatru tsawant nankaamasaj tura nantusha juni aj, wikia yurumtsuk Yúsan áujsamjai, kjaraj áujsatina ana nuna. Túran chichaj, áishman, ni entsatairi wincharpatniun, naka wajatran wáinkiamjai, tímiayi.

31 Niisha chichartak turutmiaiyi “Kurniriu, Yus ame áujman anturtamkayai. Tura shuar atsumainia yáinmamna nunasha nekarmayi, turutmiai, tímiayi.

32 Tuma asamtai, Jupe péprunam akatramuram akupkata. Semun Pitrun itiatí. Nu Semun Pítrusha, chích Semunjaj pujawai. Nuapen-iwiarin Semunkaiti nuka. Tura ni jeesha nayaantsanam ayamach pujawai. Niisha taa ámin chichartamkattawai” turutmiai, tímiayi.

³³ Túrutkui, wi umikian áentsun wárikmasan ámin akuptukjame utitia tusan. Tura nékaseñ taume. Tuma asamtai iisha juí Yus ímmianum pujuiniaji. Tuma asamtai, ashí Uunt Yus ámin au ujakarta túramna nu, iisha antuktai tusar pujaji” tímiayi Kurniriu.

Kurniriu jeen Pítiur etserkamia nu

³⁴ Nuyá Pítiur chichaak “Ayu. Yus ímmianum ashí aents métekrak ániawai nekas nékajai, tímiayi.

³⁵ Antsu ashí nunkanam nánkamas aents Yúsan umirak péñker tura nuna, Yus nú aentsun shiir enentáimtawai, tímiayi.

³⁶ Yuska shiir chichaman Israer-aentsun akuptukmiayi. Nui chichaak “shuar Jesukrístu naarín páchiakka, Yusjai nawamnaikiatin átiniaiti, tímiayi. Nú Jesukristu ashí shuara Úntrinti’ tímiayi Yus.

³⁷ Túrasha Kariréa nunkanam nanmakamak ashí Israer nunkanam túrunamia nu paant nékarme. Imiakratin Juan imiaak etserak amukmia nú tsawantin nanmakamiayi.

³⁸ Tura jusha nékatsrumek, tímiayi. Nasarénumia Jesus, Yus Anaikiamu asa, Yusa Wakaní kakarmaríjiai péñker túriniuyayi. Iwianchruku wáitias pujuarmia nuna péñker awajsamiayi. Yus Niin pujurma asa ashí nuna túriniuyayi.

³⁹ Tura Israer-aents matsatkamunam tura imia Jerusarén péprunmasha Jesus túramia nu, iisu asar, iisha étsereaji. Tura ayu, Nin achikiar krúsnum máacharmakia, tímiayi.

⁴⁰ Tura menainti tsawant jeamtaí Yus Nin iniantkimiayi. Tura ataksha iwiaintiurtamkachmakají, tímiayi.

⁴¹ Ashí áentsnumka wantinkiachmiayi. Antsu íniak nuik, etserin atarum tusa Yus achirmakmiaj nú áentstiniak wantinturmakmijai, tímiayi. Au nekas jakamunmaya nantakmiatai iisha Niijiai tsaninkiar yurumámji, tímiayi.

⁴² Tura Jesussha in akuptamkaitji. Jesuska “Wiitjai Yus Anaikiamun, tímiayi. Ashí áentsun, júka makuumawai, túrasha júka makuumatsui, Wiki títiniaitjai. Kame ashí áentsun, jaka áinia nuna tura iwiaaku áinia nunasha, Wíkiitjai nuna títinian” tímiayi Jesus. Nusha átum werum ujatruktarum, Jesus turammaji, tímiayi.

⁴³ Ya shuarak Jesusa náarín pachia nú shuarnaka tunaarín tsankurattawai, nuna ashí Yúsnan etserniusha yaunchu etseriarmiayi” tímiayi.

Israer-shuarchan Yusa Wakaní tarurarmiania nu

⁴⁴ Tura Pítiur tuke chichaak pujai, tura chikichcha antúu pujuiniaí Yusa Wakaní tarurarmiayi.

⁴⁵⁻⁴⁶ Tuma ásar ankant ankant chíkich chichamjai chichasarmiayi. Túmainiak, Yus ti péñkeraiti, tiarmiayi. Tura Israer-shuar, Yus-shuar armia nuka Pítrujai táarmia nu, nuna antukar ti enentáimsarmiayi. Maa, Yusa Wakanísha Israer-shuarcha ainia nunasha tarurcharaik, tu enentáimsarmiayi

⁴⁷ Túmakui Pítiur chichaak “¿Yaki surimkiat ju aents imiantinian? Warí nincha ínia áintsan Yusa Wakaní tarurcharaik” tímiayi.

⁴⁸ Nuyá Pítiur, Jesukrístu náariin imiantiarum tusa akupkarmiayi. Tura nuyasha Pitrunka, niijiai ishichik tsawant pujustinian seawarmiayi.

11

Ni túrunamurín Pítiur ujakmiania nu

¹ Israer-shuarchasha Yusa chichamen umirkarai táman Jesusa akatramurisha tura Jutíanmaya Yus-shuarsha antukarmiayi.

² Túmainiak Pítur Jerusarénnum jeamtai, Israer-shuar Yus-shuar ármia nu chichainiak

³ “¿Urukamtia Israer-aents ániachusha iyumam? ¿Tura aujai tsaninkiam urukamtai yurumámum?” tiarmiayi.

⁴ Tutai Pítur ashí yámankamtaiknumiá túrunamun ujakmiayi.

⁵ Chichaak tímiayi “Wikia Jupe péprunam pujumjai. Tura nuí Yusan auju pujusan ímiarmajai. Tura wan̄karam tarachia áanin kuaru tsakar̄in jin̄kiakma, nayaimpinmaya táarun wáinkiamjai. Tura wi pujamunam jeartimiai, tímiayi.

⁶ Tura nuí iyaj tukaman in̄it yajasman, napincha, nanamtinnisha en̄ketainian wáinkiamjai, tímiayi.

⁷ Tura chichaman antukmajai “Pitru wajakim maam yuata” túrutun antukmajai, tímiayi.

⁸ Túrutkui “Atsá, Uunta, áanin wapiknaka, Israer-aents yuatin surimkiamu ana núnaka tuke yúchaitjai” tímiyai, tímiayi.

⁹ Atak nuyá túrutuk “Wi, péñkeraiti, tájana nu, ámeke, yajauchiiti, tiip” turutmiai, tímiayi.

¹⁰ Nunasha menaintiú túrunan wáinkiamjai. Túruna nayaimpiniam mash waketkimiai, tímiayi.

¹¹ Nuí túruna pujai menaintiú áishman̄ Sesarianmaya akupkamu, winia ētainiak wi pujamunam tarutiarmiai, tímiayi.

¹² Tura nuí Yusa Wakaní chichartak “Arantutsuk aujai wetá” túrutkui, wémajai. Tura jū sais Yus-shuarjai wi wémajai. Túrunar ashin̄kiar Kurniriū jeen wayam̄ji, tímiayi.

¹³ Niisha chichaak “Jearuī Yusa suntarī nayaimpinmaya taa wajan wáinkiamjai, tímiayi. Tura niisha chichartak “Jupe péprunam Semun̄ Pítur tatí tusam áishman̄ akatram akupkata.

¹⁴ Pítrusha taa, itiura amesha tura áminiurmesha tunaarminiá uwemprattam nuna turamtatui.” Yusa suntarī nuní turutmiai” tu ujatkamiayi Kurniriu’ tímiayi.

¹⁵ “Wi chichastasan júaraī, Yusa Wakaní tarurarmiayi, yámankamtaik in tarutrampram̄iaj nútiksan̄, tímiayi.

¹⁶ Nuin̄kia Uunt Jesus timian enentáimpram̄jai. Niisha tíchamka “Juan̄ entsajain̄ imiakratmiayi. Tura antsu Yusa Wakanín̄kia imiantinia áintsan̄ atumí enentáin en̄kemprutmattarme.” Nu timian enentáimpram̄jai, tímiayi.

¹⁷ Atumsha enentáimpratarum. Uunt Jesukrístu umirkam̄iaj nuí, incha Yuska ni Wakanín̄ suramsam̄iaji. Tura in suramsam̄iaj núnisan̄ Yus nincha ni Wakanín̄ súsarmiayi. Nuna tura asamtai, wikia, túrashtiniaiti, Yusan títinkiaitiaj” tímiayi Pítur.

¹⁸ Tura Pítur taman antukar mitiat wáinkiar “Nekasaiti, Israer-shuarchancha ni enentáin yapajíawarmatai tuke iwiaaku átinian Yuska nin súsaruiti” tiarmiayi. Tusar Yusa náarin̄ ti shiir awajsarmiayi.

Yus-Shuar Antiukía péprunam wearmania nu

¹⁹ Estepan̄kan máawarmia nuí, chíkich Yus-shuarnasha maatai tusar pataa-tiarmiayi. Túram chíkichkia pisarar Pinisia nun̄kanam, Chipri nun̄kanmasha, tura Antiukía péprunmasha wearmiayi. Tura nuí jeawar Yus-Chichaman chikichnaka ujatsuk aya Israer-aentsnak ujakarmiayi.

²⁰ Tura niijjaī Chipri nun̄kanmaya pisararmia nu Serini nun̄kanmayasha Yus-shuar ármiai. Nuka Antiukíanam jeawar Israer-shuarchan Uunt Jesusa túramur̄in ujakarmiayi.

²¹ Tura Uunt Jesus ikiakárma ásar, nú nun̄kanmaya aents ti untsurí yaunchu túrutair̄in iniaisar Jesusan enentáimtuiniak Yus-shuar ajasarmiayi.

²² Tura nu chichaman antukar, Jerusaré_nnumiá Yús-shuar, ame iyutá tusar, Pirnapín Antiukíanam akupkarmiayi.

²³⁻²⁴ Pirnapísha jeá, Yús nú shuaran uwemtikrarma nuna wáiniak warasmiayi. Pirnapísha pé_nker áishma_nkauyayi. Yusa Wakanísha pimiutkamuyayi. Tura Yúsan nekas umirkauyayi. Tuma asamtai nu shuaran mash jintintiainiak chicharuk “Tuke enentáim_{jai} umirkarum Yús nemarsatarum.” Tu chicharak ikiukmiayi. Tura nuísha nú arant untsurí aents Yusá_j kawen_kkarmiayi.

²⁵ Nuna turasua amik Pirnapí Tarsu pé_runam wémiayi Sáurun wáinkiatat tusa. Tura wáiniak Antiukía pé_runam jukimiayi.

²⁶ Tura nu_j jeawar, nú pé_runmaya Yús-shuar_{jai} iruntrar chikichík uwí pujusarmiayi. Yús-Chichaman untsurí shuáran ujaak pujuarmiayi. Tura nu_j Antiukía pé_runma_nka Yús-shuaran émkaka, Kristu shuar_i, tiarmiayi.

²⁷ Nuyá Yusnan etserin Jerusaré_nnumiá táarmiayi Antiukíanam.

²⁸⁻³⁰ Túmaini_{jai} chikichík etserin, ni naari Akaapu, Yús-shuar matsatmanum ajapén wajaki chichasmiayi. Tura Yusa Wakaní nekatair_{jai} chichaak “Ti tsuka ashí nún_kanam átatui” tímiayi. Tuma asamtai Antiukíanmaya Yús-shuar chichainiak “Jutía nun_kanmaya Yús-shuar ainia nu yáintai” tiarmiayi. An_kant an_kant ni wakeriarmia nún_k súsarmiayi. Tura nú kuít_niasha Jutíanmaya Yús-shuara úuntri_n akuptukarmiayi. Pirnapísha Sáurusha nú kuítian júkiarmiayi. Tura Akaapu tímia núnisa_n túrunamiayi, akupin Krautiu pujai.

12

Pitrun sepunam en_keawarmiania nu

¹ Nu tsawant_{jai} akupin Erutis Yús-shuaran máataj tusa chichaman jurus áentsri_n ishiakmiayi.

² Tura Ju_anka yach_n Jakupun suen tsupirkar máawarmiayi.

³ Nuna tura máawarmatai Israer-aents wáinkiar “júka pé_nkeraiti” tiarmiayi. Erutissha nuna antuk, Pítrusha achikrum itiatarum tusa akupkarmiayi. Núnaka wakapruachu tanta yuatin nampertin túrawarmiayi.

⁴ Pítruncha achik itiar_matai, Erutis sepunam en_keata tusa akupkamiayi. Tura sepunam suntarsha an_kant an_kant, kuaru kuaru, ashikia tiasisáis (16) irunar Pitrun téntakarmiayi. Tura, ju_j jísat nan_kaasmatai, mantamnatí tusan j_iikt_iat_{jai} aents iruntramunam, tu enentáimsamiayi Erutis.

⁵ Túramu asa Pítruka sepunam pujumiayi. Tura suntarsha mijiatrutsuk iiyarmiayi. Túramunak Yús-shuarka, Pitrun yáin_kiat tusar iniaitsuk Yúsan ti áujiarmiayi.

Yusa suntari Pitrun uwemtikramiania nu

⁶ Wats, Erutis, kashin j_iikt_iajai takui, nú kashi Pítruka jimiará suntar wajamunam etema tepes kanarmiayi. Tura jimiará jiru_{jai} jin_kiamuyayi. Tura chíkich suntarka jin_nmanum ii wajarmiayi.

⁷ Tum_{jai} aya aneachma Yusa suntari naya_impinmaya_j taa ajapén wajasmiayi. Túrunamtai je_anma_nka tsáapin ajasmiayi. Tura Yusa suntarisha Pitrun páenum anti_n ishintiarmiayi. Tura jirusha Pítru uwe_jé_ya sayat atiniamiayi.

⁸ Tura Yusa suntari_j tímiayi “Kaki emenmamata. Túram sapatrumsha aweekata” tímiayi. Tutai Pítiur túramiayi. Nuyá chichaak “Pushiram entsarta. Túram nemartusta” tímiayi.

⁹ Tutai Pítiur nemarsamiayi. Túrusha Pítruka, mesekranmaapi júniaja, tu enentáimsamiayi.

¹⁰ Túrasha emka suntar ímia wajan nan̄kaikiarmiayi. Tura nuyasha chíkich suntar ímia wajan nunasha nan̄kaikiarmiayi. Tura nuyasha jíintiainium jiru waiti ámanum jeawarmatai, nú wáitisha ímia-nin̄ki kuat uranmiayi. Túrunamtaí jíinkiarimiayi. Tura jintiá ishichik wésan̄, Yusa suntarī Pitrun níniak ikiukmiayi.

¹¹ Túram Pítiur enentáimiar tímiayi “Yamaikia nékajai. Mesebranmachuiti. Antsu Uunt Yus ni suntarīn nekas akupturkayi. Erutis mantuataj tusan pujurtana nuyá Yusa suntarī winia uwentikrurai. Tura Israer-aents túrutatajtsa wakeriarmia nuyasha uwentikrurai” tímiayi.

¹² Nuna tu enentáimias nekáa, Marí jeen wémiayi. Nú Marisha Juan Márkusan nukuríyayi. Nú jeanam untsurí aents irunar Yúsan auju matsatainai Pítiur jeamiayi.

¹³ Tura jeá aa wáitin tuntuimiayi, wayataj tusa. Túmakui nuwá uchich, ni naarī Ruti, yákit tusa iyumiayi.

¹⁴ Tura jeari, Pitru chichamen anturak ti shiir enentáimsamiayi. Túmak wáitin urattsuk ikiuki, inít matsatainian werí “Pítiur taa wáitiniam wajaawai” tímiayi.

¹⁵ Tutai “Wáurtsumek” tiarmiayi.

Tútaisha núwaka “Atsá nekasaiti” tímiayi.

Tútaisha nú arant “Níichuiti. Antsu ni wakaní túratsuash” tiarmiayi.

¹⁶ Tu chichainiāin̄ Pítruka tuke tuntuí wajamiayi. Tura wáitin uraj tukamá Pitrun wáinkiar ashamkarmiayi.

¹⁷ Ashamak chichainiakui Pítiur, uweje takuí itiatmamtkiarmiayi. Tura nuyá Uunt Yus sepunmayan̄ uwentikramun ujakmiayi. Tura “Ju chicham Jakupu tura chíkich Yus-shuarsha ujaktarum” tímiayi. Nuna t̄i iniais jíinki arant wémiayi.

¹⁸ Kashin tsawar suntarsha Pitrun atsá wáinkiar “Chuwa urukakua men̄kaka. Áyawā urukattajia” tiarmiayi. Pítiur túrunamun nékachu ásar nuna tiarmiayi.

¹⁹⁻²⁰ Túrunamtaí Erutis chichaak Pítiur eaktarum tusa akupkarmiayi, túrasha wáinkiacharmiaiyi. Túrunamtaí Erutis suntaran untsukar, Pítrun ísarmia nuna aniasarmiayi “¿Pítiur ititura men̄kakama?” tímiayi. Niisha áimiainiachkui, nu suntaran mantámnatí tusa akupkamiayi.

Erutis jakamiania nu

Erutissha Tirunmayā tura Setúnmayā áentsjaisha nemasnaikiarmiayi. Túmayatan̄ Jutiá nun̄kan ikiuki Sesaria péprunam pujustaj tusa Erutis wémiayi. Sesaria péprusha Tiru péprunam tíjiuchiiti. Setúnmayā aents Tirunmayā áentsjaī Erutisa nun̄keyan yurumkan súmainia ásar, Erutisjaī nawamnaikiatniun wakeriarmiayi. Tuma asamtaí métekrak enentáimsar, Erutisa takarniurī pen̄kerī, ni naarī Parastu, níijiāi emka amikmawar nuyá Erutisan weriar shiir matsamsatniun seawarmiayi.

²¹ Tuma asamtaí tsawant jeamtaí Erutissha akupin entsatai pushin entsarmiayi. Tura akupin pujutainium pujus áentsun ikiaan̄ak áujmatmiayi.

²² Nūj pujus chichaakui aents untsumainiak tiarmiayi “Ju chichaa pujana júka áenchaiti. Antsu nekaska yúsaiti” tiarmiayi.

²³ Tumaj̄ nuyaj̄k Yusa suntarī nayaimpinmayā tarí Erutisan jaa awajsamiayi. Tuma asamtaí nusha aka yuam jakamiayi. Erutissha Yusan waantu awajtsuk nin̄ki waantu enentáimtuma asa túruna jakamiayi.

²⁴ Túrunamtaisha Yusa chichamenka nú arant pampan̄ki wémiayi. Túmaki ashí nún̄kanam anturamiayi.

25 Tura Pirnapísha Sáurusha ni takatrín amukar Jerusarénumiá Antiukíanam waketainiak Juan Márkusan júkiarmiayi.

13

Yus-Shuar Pirnapíncha Sáuruncha Yus-Chichaman etserkarat tusar akupkarmiania nu

¹ Antiukíanmaya Yus-shuarnum Yusnan etserin páchitra ármiai. Nútiksán Yus-Chichaman jintinniurísha ármiai. Pirnapísha tura Mukusa Semunsha, nuyá chíkich, Serinianmaya Rúsiusha tura akupin Erutisa tsakatkesha, ni naari Manaen, Sáurusha tímianu ármiai.

² Tura chíkich tsawantai niisha yurumtsuk Yúsan áujeak pujuiniai Yusa Wakaní tímiayi “Pirnapísha, Sáurusha akanturkitiarum, tímiayi. Wi takatan súsaitjiana nuna takasarat tusarum túratarum” tímiayi.

³ Tutai ijiarma Yusan aujsua amikiar, shiir wetarum tusar ni uwején Sáurun Pirnapíncha awantkarmiayi. Túrawar Antiukíanmaya akupkarmiayi.

Chipri nunkanam jeawarmiayi

⁴ Tura nuyanka Yusa Wakaní akupkam Pirnapísha Sáurusha jíinkiar Serusia péprunam jeawarmiayi. Tura nuyá uunt kanunam enkemprar Chipri nunkanam jeawarmiayi.

⁵ Juansha yáintaj tusa némarkauyayi. Nui Saraminia péprunam jeawar Israer-shuar iruntai jeanam wayawar Yus-Chichaman etseriarmiayi.

⁶ Tura Chipri nunkanam pepru ainia nui wáirkutak Pápus péprunam jeawarmiayi. Nui jeawar Israer-aents uwishin ni naari Parjesúsan wáinkiarmai. Ni chíkich náarinkia Erimiasauyayi. Niisha uwishniuitiat, Yúsnan étsereajai, tíniuyayi.

⁷ Akupin Serjiu Páurujai pujuyayi. Nu akupniusha ti péñker enentáimniuyayi. Tura Pirnapín Sáuruncha chichaman akuptukmiayi, taarti tusa. Kame Yus-Chichaman antuktaj tusa wakerak untsukmiayi.

⁸ Tura uwishin Erimias nuna nakitiak “Auka péñkerchaiti” tímiayi. Akupniusha Yúsan umirkajin tusa nuna tímiayi.

⁹ Nuyanka Sauru, ni chíkich naari Papru, Yusa Wakaní pimiutkamu asa, nu uwishniun úmamkemas iis tímiayi

¹⁰ “Ámeke wáitaitme. Anankartiniaitme. Yajauchiitme. Maaj, iwianchitme. Tura ashí péñker ana nuka imiá nakitniuitme. Tsej, ¿urukantai Yusa jinti naka ana nu emeskim weam?”

¹¹ Paj, yamaikia Uunt Yus asutiámattawai. Yamaikia amesha jiiimi kusurmatai untsurí tsawant tsáapnin penké íschattame” tímiayi. Tura nú chichamaik jii kusurmatai kirit ímiuk chikichan eamiayi enkeki jurukit tusa.

¹² Nu túrunamtai akupin nuna wáinak, ti enentáimpramiayi. Túruna Uunt Yusa chichamen enentáimtur umikmiayi.

Chíkich Antiukíanam etserkarmiania nu

¹³ Nuyá Juan waketki Jerusarénum wémiayi. Tura antsu Pápruka ni tsaniakmarijiai kanunam enkemprar Pápus péprunka ikiukiar Pirji péprunam jeawarmiayi. Nusha amaini Pampiria nunkanam pujawai.

¹⁴ Nuyá Pirji péprun nankaikiar Antiukía péprunam jeawarmiayi. Nú Antiukíasha Pisitia nunkanam pujawai. Nui jeawar Israer-shuar ayampratin tsawantin, nuka sáwartin, Israer-shuar iruntai jeanam wayawar pujusarmiayi.

15 Tura nuj Yus-Papinium yaunchu áarman áujas aminkiamtai, Israer-shuar iruntai jeanam írniuri Páprun tiarmiayi “Yatsuru, jintíatin chicham takakkurmeka yamaik titiarum. Antukarmí” tiarmiayi.

16 Tutai Papru wajaki uweje takuimiayi. Tura chichaak “Israer-shuartiram, tura Yúsan umirkataj tusa wakerarmena nu antuktarum, tímiayi.

17 Ii Yusrj ii yaunchu uuntrin Israer-shuartin achikmiayi. Tura niisha írara núnik Ejiptunam matsatainiaí Yuska nin páchiniak uunt awajsarmiayi. Yus ni kakarmarijiaí nú nunkanmaya ii yaunchu uuntrin uwentikrarmiayi.

18 Túrasha atsamu nunkanam ii uuntrin kuarenta (40) uwitin Yuska aya kátsuntramiayi.

19 Tura nuyanka siati áentsun mátsatkainian, Kanaan nunkanam mat-samarmia nuna amukarmiayi. Nú nunkan ii yaunchu úuntrin susataj tusa Yus túramiayi.

20 Nuyanka ii uuntri akupniurin, juís tútain, anaikiamiayi. Tura chikichan ukunam anaiki anaiki wémiayi. Nuna tura túraakua kuaru siántu senkuenta (450) uwí ejemiayi. Samuersha Yúsnan etserin náamtsáin nuna túrimiayi Yus.

21 Tura nuyanka áencha juísan nakitiainiak, uunt akupin náamkat tusar Yúsan seawarmiayi. Tuíniakui Yuska Sesa uchirín Saúran anaikiamiayi. Nú Saúra úuntrin kua Pinjamínkiauyayi. Tura Saúrsha kuarenta (40) uwí nú áentsun akupkat tusa Yus tsankatkamiayi.

22 Tura Saúr náamkan ataksha Yus awainkimiayi. Tura nuyá iiksan nú nunkanam uunt akupin atí tusa Tawitian anaikiamiayi. Tura Yuska juna Tawitnian tímiayi “Isaí uchirín Tawitian winia enentáir jeamtai achirmakjai. Tura Winia umirtin átatui” tímiayi.

23 Wats, Tawit weeanmaya Jesusaiti. Tura Yuska Israer-aentsun Uwentikrartinian Jesusan anaítiukmiayi, yaunchu timiarin uminkiat tusa.

24 Jesuska táatsain Juan ashí Israer-shuaran tunaariniá enentáimtumar imiantinian ujakmiayi.

25 Tura Juansha ni jákatniuri jeatemamtai, chichaak “Átum enentáimtarmena núchaitjai. Wikia Yusa anaikiamurj, Kristu tutai, nákarmena núchaitjai. Antsu Ninkia winia ukunmaruj winittiwai. Tura Niisha wíjiainkia ti nankaamantu asamtai wikia sapatrincha atitrataj tíchamniaitjai” tímiayi.

26 ‘Pai, yatsurtiram, Apraám weeatiram, tura ashí Yus ashamkarum umirkaitrumna nu, antuktarum. Ju uwempratin chichamka íniuiti, tímiayi.

27 Iis, Jesusa túrunatniurin Yuska yaunchu ni etserniurin áamtikrachmakia. Tura ukunam Jerusarénumia shuar ni akupniurijiaí tuke sáwartin nuna áujeatskesha penké nekaacharmiayi. Tuma ásar Jesuska Yusa Uchirinti tícharmiayi. Tura, jakatí, tiarmia nuj, Jesusa túrunatniurin, Yus yaunchu chichakmia nuna, tímiatrusaran umikiarmiayi, tímiayi.

28 Jesuska penké tunaamkachunak yamaikia mantamnatí tusar Piratun seawarmiayi, tímiayi.

29 Tura Yusa Papiirin ashí Jesusnan tímia nuna tímiannak umikiarmiayi. Tura nuyá krúsnumia ítiarar iwiarsarmiayi.

30 Túramunak Yus jakamunmayan iniantkimiayi.

31 Jesuska jakamunmaya nantaki, yaunchu Kariréanmaya Jerusarénum Nijiaí irutka wéarmia nuna núkap tsawantin pujus wantintiukmiayi. Nú shuaraiti yamaikia Jesusa túrunamurin etserainia nu’ tímiayi.

32 ‘Iisha núnisrik shiir chichaman Yus yaunchu ii apachrín tiarmia nu étsereaji.

³³ Iisha Israer-weeá asakrin, Yuska Jesusan iniantkimia nujai ii apachrin anajmatramia nuna yamáí uminkiaiti. Kame Sarmu Jímiar papinium ju áarmaiti:

“Ámeke winia Uchiruitme.

Túmaitkiui yamaikia winia iwiaakmar susamuitme.”

³⁴ Tura Yuska Jesusa nantakmiarín jintintiak, tura ni ayashi káurchatniun jintintiak, chíkich Sarmu papinium juna áamtikramiayi:

“Nekas péñkeran Tawitian anajmatramaj nuna atumin amastatjai.”

³⁵ Tura nú arant, nú paant atí tusa, chíkich Sarmu papinium ju aarma awai:

“Yusa, ame Uchiram aneamna nuna ayashi káurtincha tsankatkashtatme.”

³⁶ ‘Nekaatarum, yatsurtiram, Yuska Tawitia ayashin tíchamiayi nuna. Tawitkia Yus tímian amuk jakamiayi. Túrasha ni ayashinkia káurmiayi.

³⁷ Tura antsu Yus iniantkimia nuna ayashinkia penké káurchamiayi.

³⁸ Tuma asamtai, yatsurtiram nekaatarum. Jesusjainkete tunáa asakártin.

³⁹ Tura Muisais yaunchu akupkamia nujai tunáa tsankurnarchamnia nu, yamaikia Jesusjai tsankurnartiniati.

⁴⁰⁻⁴¹ Yúsnan etserin juna áarmiayi:

“Enentáimpratarum wishikkiartintiram. Ashamkatarum. Túrarum menkatumpratarum. Wi Yus asan, átum pujarmena nuj, aents túrachminian túratajna nusha penkesh nekaashtatrum, chíkich ujatmainiakuisha.” Tu áarmaiti.

Tuma asamtai yatsurtiram, aneartarum atumin nuna túrutmawairum, Yusnan etserin aarma tana nútiksan.” Nuna chichaak amukmiayi Papru.

⁴² Tura nuyá Papru Pirnapíjjai jiinki wéenakui aents chichainiak “Chíkich sáwartincha jútiksarmek etserkatarum” tiarmiayi.

⁴³ Tura nuyá iruntsua tsenkeenak Israer-shuarsha, tura chíkichkia Israer ajararusha, Yúsan umirkatajtsa wakeriarmia nuka, Páprun Pirnapíncha nemarsarmiayi. Niisha nu áentsun chicharuk “Yusa anenkrattairi enentáimtusum kakartarum” tiarmiayi.

⁴⁴ Tura chíkich sáwartinkia nu péprunmaya ti untsurí aents Yus-Chicham antuktai tusar tuakarmiayi.

⁴⁵ Tura Israer-shuarka ti untsurí áentsun tuakarun wáinkiar, suir iiniak, ti kajerarmiayi. Tuma asamtai Páprun katsekkar “Ju chichaana júka ántar tawai” tiarmiayi.

⁴⁶ Támaitiat Pápruka Pirnapíjjai arantutsuk chichainiak tiarmiayi “Israer-aentstirmin, atumin emka Yus-Chicham ujaktiniuji. Túrasha átum támaitiatrum nakitramarme. Tura atumsha nakitia asarum, Yúsnun tuke iwiaaku pujuschamnia ajarurme, tímiayi. Tuma asamtai iikia yamaikia Israer-aencha ujaktai tusar weraji, tiarmiayi.

⁴⁷ Nu túratarum tusa, Uunt Yus akuptamtsujik. Jes, ni Papiriin juna tawai: “Israer-shuarcha Winia nekarawarat tusan anaitiukjame. Tura ashí nunkanmaya aents uwemprarat tusan akuptajme.”

Tu áarmaiti” tímiayi.

⁴⁸ Nú chichaman antukar Israer-shuarcha ti wararsar “Uunt Yus tana nuka imiá péñkeraiti” tiarmiayi. Tura, tuke iwiaaku pujusmin armia nu Yus-shuar ajararmiayi.

⁴⁹ Tú tumakí Yus-Chicham nú nunkanam ashí jamarmiayi.

⁵⁰ Túrasha nuwan, Yúsan péñker enentáimtuinian tura péñker wekainian, Israer-shuarka yajauch enentáimtikrarmiayi. Áishman penkeri ármia nunasha, yajauch enentáimtikrarmiayi. Túram Páprun Pirnapíncha katsekkar, chichaman irunturar najatawarmiayi. Tú-turukiar ni nunkeya jiki awemarmiayi.

⁵¹ Túram Papru Pirnapíjjai, ju aentska yajauchiiti tusar, wéenak naweyan nunkan akakekiar ikiukiarmiayi. Túrawar Ikiuniu péprunam wearmiayi.

⁵² Yusa Wakanísha pimiútkamu ásar Yus-shuarka ti warasarmiayi.

14

Ikiuniu Péprunam túrunamia nu

¹ Ikiuniu péprunam Papru Pirnapíjjai jeawar Israer-shuar iruntai jeanam wayawarmiayi. Túrunawar Yus-Chichaman etserkarmiayi. Túram ti untsurí Israer-shuar ármia nu, Israer-shuarcha ármia nusha Yúsan umirkarmiayi.

² Tura chíkich Israer-shuar, Yúsan umirkacharu ármia nu, Yus-shuwaran kajerkarat tusar Israer-shuarchan yajauch enentámtikrarmiayi.

³ Tuma asamtai Papru Pirnapíjjai nú núnkanam ti nukap tsawant pujusarmiayi. Tura Uunt Yúsan enentáimtuinia ásar, arantutsuk Yusa waitnenkratairin etserkarmiayi. Tura, etserinia nu winia kakarmarjainti tusa, Yuska aents túrachminian najanmamtekiawarmiayi.

⁴ Tura Ikiuniunmaya aentska jímiar kanakarmiayi. Chíkichkia Israer-shuar tuinia nu nekasaiti, tiarmiayi tura chíkichkia Jesusa akatramurí tuinia nu nekasaiti, tiarmiayi.

⁵ Tura nuyá Israer-shuarchajai Israer-shuarka chichasar pepru uuntríjjai chichasarmiayi. Tura Papru Pirnapíjjai katsekkar tura kayajai tukurar, yajauch awajsatniun nankamawarmiayi.

⁶ Túrasha Papru Pirnapíjjai nuna anturmamkar, Ristra péprunam wearmiayi. Nuyasha Tirpi péprunam wearmiayi. Nu péprusha mai Rikiaunia nunkanam pujuiniawai.

⁷ Tura Yus-Chichaman etserkarmiayi.

Ristra péprunam Páprun kayajai tukurarmiania nu

⁸ Ristra péprunam tunamaru áishman pujumiayi. Ni akiiniamuriya tuke wekaichauyayi.

⁹ Nú áishman Papru chichaamun antúu pujumiayi. Túman Papru úmamkemas nin íismiayi. Niisha, Yusa kakarmaríjjai tsuamartatjai, tu enentáimiun Papru nekaamiayi.

¹⁰ Tura Pápruka kakantar chicharuk “Wajakim wewe ajasam wajasta” tímiayi. Tutai áishman wiut kutsuar wajaki wekaimiayi.

¹¹ Papru túramia nuna aents wáinkiar Rikiaunia chichamjai untsumainiak “Yuska áishmanka áanin ajasaru in tarutramarji” tiarmiayi.

¹² Pirnapínkia, Júpitir náartin yúsaiti, tiarmiayi. Tura Páprunka, Mirkiuriu náartin yúsaiti, tiarmiayi. Pápruka chichau asamtai tu anaikiarmiayi.

¹³ Nú pepru jeamunam Júpitir náartin yusa jeen pujumiayi. Tura Júpitir náartin yusa pátriri kukujiin iwiarkamun, wáakajai itiamiayi. Tura niisha ni áentsríjjai wáakan maatai tusar pujuarmiayi. Tura tikishmatrar ajamsatai, tiarmiayi.

¹⁴ Tura Jesusa akatramurí Pirnapísha Páprusha nuna nekaawar, auka naki-tiaji tusar, ni pushirin jaararmiayi. Túrawar aents írunmanum pachiniawarmiayi.

¹⁵ Tura tiarmiayi “Shuara, ¿urukamtai áitkiarum? Iisha yúschaitji. Atumea áankiitji, tiarmiayi. Penké ántrarum túrarmena nu ikiukrum, nekas Yus nemarsatarum tusar iisha taji. Nekas Yuska nayaimpincha, nunkancha, nayaantsancho, tura ashí nu írunna nunasha najanaiti, tiarmiayi.

¹⁶ Jes, aents ni enentáimmaríjjain wekasarat tusa Yuska yaunchu tsankatkamiayi.

¹⁷ Tuma aín shuaran péñker awajsamujai Wiitjai Nekas Yus tusa paant awajmamsamiayi. Kame yumi yutuktinian nayaimpinmaya akupturmaji. Tura ejemarrar warasarmí tusa yurumak nerektinniasha súramji” tímiayi.

¹⁸ Túrasha Pápruka tímianu támaitiat, nuna anturtsuk wáakan maawar nin tik-ishmatrar ajamsataitsa wakeriarma nuna suritkiachminiak suritkiarmiayi nu áentsun.

¹⁹ Tura nuyá Antiukíanmaya Ikiuniunmayasha Israer-shuar táarmiayi. Taar nuyá áentsun Páprun yajauch awajsatniun enentáimtikrarmiayi. Tú tutai Páprun kayajai tukurarmiayi. Tura jakayi tiar péprunmaya japiki júkiar arant áepsarmiayi.

²⁰ Túrasha Yus-shuar Páprun tariar téntakarmiayi. Túram nuñkia Papru wajaki wé ataksha péprunam wayamiayi. Tura kashin tsawarar Papru Pirnapíjiai Tirpi péprunam wearmiayi.

²¹ Tírpinium pujusar uwempratin chichaman etserkarmatai untsurí shuar Yúsan umirkarmiayi. Nú shuaran Yus-Chichaman jintintia amuukar Rístranam, Ikiuniunam, Antiukíanmasha waketkiarmiayi.

²² Waketainiak “ashí Yus tana nu tímiatrusrumek tuke umirkatarum” tuíniak Yus-shuaran ikiakáramiayi. Tura nin tiarmiayi, “Yusa akupeamuriin pachinkiatat takurkia ti wáitsatniuitji.”

²³ Tura Yus-shuar írunmanum Yus-shuaran wáinniun anaikiarmiayi. Yurumtsuk Yúsan áujсар chicharainiak, “umirkarumna nú Yus iirmasarti” tiar ikiukiarmiayi.

Yaunchu jíinkiarmla nú Antiukíanam waketkiarmiayi

²⁴ Nuyá Pisitia nunkanam nankaamaklar Pampiria nunkanam jeawarmiayi.

²⁵ Nui jeawar Pirji péprunam Yus-Chichaman etserkar nuyá Ataria péprunam wearmiayi.

²⁶ Nui kanunam enkemprar, yaunchu jíinkiarmla nú Antiukía péprunam waketkiarmiayi. Páprusha Pirnapísha tuke jíintsain nú Antiukíanmaya Yus-shuar chichainiak, Yusa takatrl túrattarmena nuna Yus waitnentramak yáinmakarti, tiar akupkarmiayi nuikⁱ.

²⁷ Nú Antiukíanam jeawar, Yus-shuaran irurar, ashí Yus nin yáinkiarmla nuna ujakarmiayi. Tura nútiksar Israer-shuarchan Uunt Yus uwemtikrataj tusa untsukmla nunasha ujakarmiayi.

²⁸ Tura nuyá Yus-shuarjai Papru Pirnapíjiai núkap tsawant pujusarmiayi.

15

Jerusarénnum Yus-shuara úuntrijiai iruntrarmlania nu

¹ Nu tsawantin áishman Israer nunkanmaya wear, Antiukíanam jeawar Yus-shuaran jintintiainiak “Muisais tímla nútiksarmek tsupirnaktin ana nu túrachkurmeka uwemprashtatrumé” tiarmiayi.

² Tuma asamtai Papru Pirnapíjiai, núchaiti tusar, nú áishmanjai ti kakaram chicharnaikiarmiayi. Túrasha nuu enentáiniak enentáimsatniun tujinkiarmlai. Tuma asamtai Antiukíanmaya Yus-shuar Páprun Pirnapíncha, atumsha chíkich áentsjai Jerusarénnum wétarum tusar akupkarmiayi. “Tura nui Jesusa akatramurísha Yus-shuaran wáinniusha iniasrum itiumainkit tusarum péñker nekaatarum” tiarmiayi.

³ Papru Pirnapísha akupkamu ásar wéenak Pinisia nunkanam, Samaria nunkanmasha nankaamainiak Israer-shuarcha Yus-shuar ajasman Yus-shuaran ujakarmiayi. Tura Yus-shuarsha nuna antukar ti warasarmiayi.

4 Tura Páprusha Pirnapísha Jerusarénum jeawarmatai Jesusa akatramurísha Yus-shuara wáinniurísha tura penké Yus-shuarsha itiawarmiayi. Tura niisha túrunamia nuna mash etserkarmiayi.

5 Túrasha Pariséu aencha, Yus-shuar ajasarmiania nu, wajakiar chichainiak “Muisais tsupirnaktinian akupkamia nuna tura nú arant ashí Muisais tímia nunasha Israer-shuarchasha umirkatin áiniawai” tiarmiayi.

6 Nuyasha Jesusa akatramurísha Yus-shuaran wáinniusha nu chichaman nekaatai tusar iruntrarmiayi.

7 Chichasua umikiarmatai Pítiur wajaki tímiai, “Yatsurtiram, Yus nuik winia chichartak “Israer-shuarchasha winia chichamprun antukar umikiarat ujakarta” tu anaitiukmia nu nékarme.

8 Tura Yus Niñki ashí aentsu enentáin neka asa, Wíi shuar ajasmin áiniawai tusa, ni Wakanin Israer-shuarchan cha susamiayi, in suramsamijá nútiksán.

9 Yus incha aushatka awajtamsachmaji, tímiai. Antsu métekraketji. Tuma asamtai niisha Yúsan enentáimtuiniakui, Yuska enentáiyán ni tunaarin japi-rarmai, tímiai.

10-11 Tura iikia nékaji niiya áantsarik Jesukrístu waitnenkartutairíjiaj uwempraitji. Nuñkia çurukamtia Yus uwempraru áiniawai taisha, átum Muisais yaunchu akupkamia nu umikiarat tusarum wakerarum? Nu túrakrumka Yus túrana nu jeatsui tarume. Tura nuka kaarka áintsanchakait. Warí, ii úuntrísha tura iisha ashí Muisais tímia nu umiktin tujinkiamji. Tuma asamtai, çurukamtai nú káarkasha Israer-shuarchasha áentskatin wakerarum?” tímiai Pítiur.

12 Pítiur nuna tutai Pirnapísha Páprusha chichainiak, “Israer-shuarchasha ni kakarmarin nekaawarat tusa aentsti túrachminian túratniun Yuska ti yáinmakmaji” tú ujuam mitiat wáinkiar antúu pujuarmiayi.

13 Nuna ujasua amikmatai, Jakupusha tímiai “Yatsurú, antuktarum.

14 Nuik túrachman Yus túramia nuna ii yachi Semun Pítiur ujatmakji. Júiti: Yuska Israer-shuarcha waitnentak Winia ajasarat tusa chikishtarchiniak achikiuiti” tímiai.

15 Jusha Yúsan etserin yaunchu áarmia nu tímatrusán túrunayi. Júiti aarma:

16 “Israer-aents meserar, jea sáanakniua áintsán áiniawai. Tura ukunam ataksha tana, Tawitia jeen sáanaki ana nuna, ataksha najanattajai. Juakai nuna achikian ataksha awajrattajai.

17 Ashí nunkanmaya aents, Israer-shuarcha ainia nu, winia náarun pachinia nu, Winia eátkarat tusan túrattajai.

18 Uunt Yus nuna yaunchu ujakmiayi.”

Tu áarmaiti’ tímiai.

19 ‘Tuma asamtai, yatsurtiram, wi tájarme: Israer-shuarcha Yus-shuar ajasaru áiniana nu, imiatik awajsachmi.

20-21 Iimiatarum, ashí péprunam Israer-shuar iruntainiam yáunchuyan tuke sáwartin Muisaisa áarmarin jintintiainiatsuk. Tuma asamtai, áyatik áatratai ju “Ántar-yus susamu ana nu iniaisatarum. Ántar-yusan susamu asamtai yajauchiiti. Tura tsanirmawairap. Tura kajemtikramua nu yuawairap. Tura numpasha umarairap.” Tu áatratai’ tímiai Jakupu.

22 Nuyá Jesusa akatramurísha Yus-shuaran wáinniusha nuyá ashí Yus-shuaraim enentáimsarmiayi. “Papru Pirnapíjiaj wéakui, shuar niijiaj nenakar Antiukíanam akupkatai” tiarmiayi. Tuma ásar Jútas Parsapasan, Sérasnasha anaikiarmiayi. Niisha mai uunt Yus-shuar áarmiayi.

23 Tura niijiaj ju papin árman akupkarmiayi:

“Iisha Jesusa akatramurī tura Yus-shuara wainniurī tura ashí Yus-shuaraitjinia nu, atumin Israer-shuarcha árumna nu, Antiukíanam, Sírianam, tura Sirisianmasha, ju papí akupeaji.

²⁴ Juyá aents ii chichamejainchu atumiin jeartamarai. Túrawar, tsupirnaktin ana nu, tura ashí Muisais akupkamia nu túratarum, turammiarne. Nunasha ni chichamejain turamarmayi. Nu chicham atumsha antukrum nushá enentáimprarum “entá nuyanka itiurkatjik” tárume.

²⁵ Tuma asantai nu nekaar, iisha métekrak enentáimsar, jimiará áishman akupkatin anaikiamji. Ju áishman ii aneamu yachi Páprujai Pirnapíjiaisha atumin írmasarat tusar akupeaji.

²⁶ Papru tura Pirnapísha ii Uuntri Jesukrístunam surumakarmiayi, ni takatrisha tsuumai ain túrami tusar.

²⁷ Niijjai Jútassha tura Sérassha akupeaji. Ii chichaaajnia nuna niisha ni wenejai atumin ujatmakartatui.

²⁸⁻²⁹ Kame túratin asantai iisha Yusa Wakaníjjai ju áartin enentáimsaji. Namān ántar-yus susamu ana nu yuawairap. Tura numpasha umarairap. Kajemtikramu ana nusha yuawairap. Tura penké tsanirmawairap. Nuyasha chíkichkia nú nankaamas tíchattaji. Tura antsu nu iniaisarmeka, penker átatrume. Ayu, Yus wáitmakarti.” Tu áarman akupkarmiayi.

³⁰ Tura Antiukíanam akupkam wearmiayi. Nui jeawar Yus-shuaran irurar, papin súsarmiayi.

³¹ Tura Antiukíanmaya Yus-shuarsha nu papin áujсар, penker jintíamu chichaman áarman wáinkiar, ti shiir enentáimsarmiayi.

³² Tura Jútassha, Sérassha, ímia niisha Yus-Chichaman etserin ásar, Yus-Chichaman núkap jintintiawar, Yus-shuaran ikiakármayi.

³³ Tura nuí ishichik tsawant pujusarmatai, Yus-shuarka, penker waketki-tiarum, tiar akupkarmiayi.

³⁴ Tura Séras juáktinian wakerukmiayi.

³⁵ Páprusha Pirnapíjjai juakarmiayi Antiukíanam. Niisha chíkich aentsjai Yus-Chichaman étseruk pujuarmiayi.

Papru atak Yus-Chichaman ipiampártasa wémiania nu

³⁶ Nuyá ukunam Papru tímiayi Pirnapín “Ashí péprunam iisha Yus-Chicham etserkamaj nuí Yusai ii yachi ainia nusha urukák pujuinia iyutai” tímiayi.

³⁷ Pirnapíkia Juan Márkusān iijjai winiti tusa wakerimiayi.

³⁸ Tura Pampiria nunkanam Juan Márkussha niisháa weu asantai tura Yusa takatrin iniaisa asantai, Pápruka ayatniun nakitramiayi.

³⁹ Papru Pirnapíjjai ti kakannairar kanakarmiayi. Tura Pirnapíkia Márkusān ayaki Chípriniam wémiai.

⁴⁰ Pápruka Sérasan ayaki wéakui Yús-shuar Yus yáinmakarti tinia akupkarmiayi.

⁴¹ Tura Siria nunkanmaani wekaráktak, Yus-shuaran ikiakárkutak Sirisianam jeamiayi.

16

Páprusha Sérasjai Timiutéun júkiarmiania nu

¹ Papru Sérasjai Tirpi pepru írkutak Ristra péprunam jeawarmiayi. Tura nuí Rístranam Yus-shuaran wáinkiararmiayi, ni naari Timiutéu. Ni nukurínkia Israer-shuar Yus-shuarauyayi. Tura ni aparínkia Kriaku áentsuyayi.

² Tura Ristra péprunmaya Ikiuniu péprunmayasha Yus-shuar ármia nu, Timiutéu penker wekaawai, tiarmiayi.

³ Kame Pápruka Timiutéun uyuuntusat tusa wakera asa, Timiutéu aparí Kriaku-apachin nekaawarmatai Israer-shuar nuí pujuarmia nu yajauch enentáimpraraín tusa tsupirmamtikiamiayi.

⁴ Tura nuyá Papru Timiutéujai ashí péprunam nuí sétur nuí sétur wéenak Jesusa akatramurísha Yus-shuaran wáinniusha Jerusarénum nuik jintintian umiktarum tusa ujarkutak wearmiayi.

⁵ Tu ujamu ásar Yus-shuar nú arant Yúsan enentáimturar kakararmiayi. Tura ashí tsawant kawenki wearmiayi.

Papru iimiarmia nu

⁶ Tura Yusa Wakaníkia Páprun Yus-Chichaman Asia nunkanam ujakinian tsankatkachmiayi. Tuma asantai Pirijia nunkanam tura Karasea nunkanam airkutak,

⁷ Misia nunka jeatniunam jeawarmiayi. Túrunawar “Pitinia nunkanam wetai” tiarmiayi. Túrasha Yusa Wakaní nuísha wétinian suritkiarmiayi.

⁸ Tuma asantai Misia nunkanam menantki Truas péprunam pachiniawarmiayi.

⁹ Nuíjewar Papru kashi iimiarmiayi. Masetúnia nunkanmaya áishmankan wajan wáinmiayi. Nu áishman Páprun chicharuk “Winitritia. Yáintkiamnium” tímiayi.

¹⁰ Nuyanka tu iimiarmatai, wisha Páprujai wetai tusar iwiarnarmiaji. Tura Yus incha nú nunkanam ni chichame etserkat tusa ti nekas untsurmakrin wéaji, tímiaji.

Jiripius Péprunam túrunamia nu

¹¹ Tura nuyanka kanunam enkemprar Truas péprunmaya jíinkir Samutrásia nunkanam jeamiaji. Tura kashin tsawar nuyanka katjarar Niápuris péprunam jeamiaji.

¹² Tura Niápurisnumia náwek Jiripiusnum jeamiaji. Nuí Jiripius péprunmanka Rúmanmaya aents matsamsa ármiayi. Tura nú péprusha Masetúnia nunkanam nekas uunt pepruyayi. Tura nuísha seturmaji.

¹³ Nuyá sáwartin tsawarmatai pepru ikiukir entsá supichik wémiaji. Yus áujsatniun iruntrarmia nuí pujusar, nuwá iruntrarmia nu Yus-Chicham ujakarmiaji.

¹⁴ Nuí Tiatira péprunmaya nuwá, ni naari Ritia wáinkiamiaji. Niisha tarach yamakain pénkeran súriniuyayi. Yúsnasha shiir awajniuyayi. Yus-Chichaman Papru etserkama nuna niisha pénker anturkamiayi. Túman, Uunt Yus Papru chichaamun umirkat tusa ni enentáin takasmiayi.

¹⁵ Túruna nú nuwá níniurijiai imianmiayi. Tura nuyasha chichaak “Yus-shuar nekas ajasai túrutkurmeka winia jearuí winitiarum” tímiayi. Tura nuí jeawakrin setumtikrampramiaji.

¹⁶ Tura nuyá ukunam Yus aujsatai tusar wekaamar nuwach nekaamin-iwianch enkemtuanu inkiunmakmiaji. Nu nuwachikia misatkauyayi. Niisha nékamkui nérenniurisha ti kuitriniawarmiayi.

¹⁷ Tura nú nuwach incha Pápruncha pataaturmamiaji. Tura kakantar untsumuk “Ju áishmansha nekas Uunt Yúsan umirkaru áiniawai. Tuma asa niisha atumin uwempratin chichaman ujatmarme” tímiayi.

¹⁸ Tura nú nuwachisha ti núkap tsawant tu wekaimiaji. Titmakui, Papru ayanmar iwianchin chicharuk “Jesukristu naarijiai tájame: jíinkitiá ni enentáiyá” tímiayi. Tutai íwianchkia nú chichamaik jíinkimiayi.

¹⁹ Tura nuwachi nérenniurisha, íwianch jíiki awematniun nekaawar, Páprun Sérasnasha kajerak achikiar pepru uuntri íisarar tusar ajapén júkiarmiayi.

20 Tura pepru úuntriin ejeniar tiarmiayi “Ju áishman Israer-shuar áiniawai. Tura in páchim enentáimtikramainiaji.

21 Tura iisha Rúmanmaya aents árin, ii túrachminian, iikia asumprachman jintintramainiaji” tiarmiayi.

22 Tura nuyanka ashí aents Páprun Sérasnasha kakerkarmiayi. Túramtai pepru uuntri chichainiak “Pushiri áitkiarum numijiai asutiátarum” tiarmiayi.

23 Tura nuyá ti asutsua amikiar sepunam enkeawarmiayi. Tura sepú-iinian chicharuk “Ti péñker iistá pizararain” tiarmiayi.

24 Nu chichaman antuk, sepú-iin ti inít awayámiayi, tura nawen numi najanamujai tee chanuntamiayi. Tú tura ikiukmiayi.

25 Tura kashi ajapén Papru Sérasjai Yusan áujainiak kantampriarmiayi. Tura chíkich enkeamusha nuna antúu pujuarmiayi.

26 Tu pujuiniaji aya aneachma ti kakantar uurkarmiayi. Tura sepusha muchitramiayi. Túrunamtai sepú wáitirisha ashí urantrarmiayi. Tura aents jirujai enkekar jinkiamusha mash atiniakarmiayi.

27 Túrunamtai sepú-iin shintiarmiayi. Tura wáitisha mash uranar aan wáiniak, enkeamusha jiiniar shiákchariash tusa ni puniariniak ukuiniak máamattsa pujumiayi.

28 Tura Papru untsuak “Amek yajauch awajmamsaip. Ashí pujuiniaji” tímiayi.

29 Tutai sepú-iincha jinia ekeemak tsékenki wayamiayi. Tura Papru Sérasjai pujamunam kuranki jearmiayi.

30 Tura aa jiki aniasmiayi “Uunta, ¿warí ititurkattaj uwemprataj tusana?” tímiayi.

31 Tutai niisha tiarmiayi “Uunt Jesukrístu nekas enentáimtustá. Túrakmeka amesha, tura áminiurmesha uwemprattarme” tiarmiayi.

32 Tura nuyá ashí ni jeen pujuarmia nunasha Yus-Chichaman ujakarmiayi.

33 Tura tsawant irankai sepú-iincha Páprun Sérasjai numpamnamurin ni-jiararmiayi. Túramtai nuyasha sepú-iincha nuarijiai uchirijiai imianiarmiayi.

34 Túramtai nuyasha ni jeen júkiarmiayi. Tura nuisha ayurawarmiayi. Tura sepú-iincha niiniurijiai Yus-shuar ajasu ásar ti shiir warasarmiayi.

35 Kashin tsawar pepru uuntri, Páprun Sérasjai akupkata tusar suntaran sepú-iinian akuptukarmiayi.

36 Tura nuyanka sepú-iin Páprun tímiayi “Yamaikia pepru uuntri chichaman akupturmakai, átum wétinian. Tuma asamtai yamaikia péñkerak jíinkitarum” tímiayi.

37 Túrasha Papru suntaran chicharuk tímiayi “Warí, iisha Ruma aents árinin, niisha chichaman iwiartsuk ashí shuar íimiainiajin asutiámamji. Túrawar sepunam enketmamji. Tura ¿urukamtai yamaikia uk akuptamkataj tusa wakeruinia? Atsá. Antsu uuntcha niniki taar jirmaktiai” tímiayi.

38 Tutai suntarsha waketkiar nuna ujakarmiayi pepru úuntrin. Tutai niisha ti ashamkarmiayi Ruma aentsun nekaawar.

39 Túmak ashamainiak Páprun Sérasan weriarmiayi tsankurturtarum titiai tusar. Nuyasha sepunmaya jíikiar “Yamaikia wáitneasrum wetarum” tiarmiayi.

40 Papru Sérasjai nuyá jíinkiar Ritia jeen wearmiayi. Tura Yus-shuaran ikiakárar ikiukiarmiayi.

17

1 Papru Sérassha wéenak Ampipuris péprunam Apurunia péprunmasha nan̄kaamakutak Tisarúnikia péprunam jeawarmiayi. Nuḷ Israer-shuara iruntai jee ámiayi.

2 Tura Pápruka nuna tuke túrin asa nu jeanam wémiayi. Tura nuḷsha menaintiu sáwartin Yus-Chichaman paant etsermiayi.

3 Tura Páprusha Yus-Chicham tana tímiatrusan̄ jintintiarmiayi. Tura Krístusha wáitias jákatniuyi, tura nuyasha jakayat nantaktiniuyi, tímiayi. Tura nuyasha chicharuk “Wi Jesusnan atumin ujaajrumna nusha Yusa anaikia-mur̄in Kristu tútain tájarme” tímiayi Papru.

4 Nuna takui Israer-aents chikishtarchik umikiarmiayi. Túrawar Paprujaj Sérasjajsha tsaniñkiarmiayi. Tura Kriaku aencha ti untsur̄í Yúsan umirkarmiayi. Tura nuwá penker̄i armia nusha nútiksaran̄ umikiarmiayi.

5 Tura Israer-shuarka Yus-shuar ajascharmia nu, Páprun Sérasnasha suiir ísarmiayi. Túrawar chíkich yajauch áishman̄ naki yujáu armia nujaj chichasar nu peprunam charáa charáa ajarmiayi. Tura Páprun Sérasnasha achikiar aentsu úuntriñ suruktai tusar Jasun̄ka jeeñ árenkarmiayi.

6 Túrasha Páprun Sérasnasha awetrar, Jasun̄kan tura chíkich Yus-shuarnasha achikiar japirkutak júkiarmiayi. Tura pepru úuntriñ juñiak tiarmiayi “Ju áishman̄sha ashí nun̄kanam charaatum ajá wekarmia nu yamaikia tímiajaj tarutramarji.

7 Tura ju Jasun̄ ni jeeñ itiaarmiayi. Tura niisha ashí mash Rúmanmaya uunt akupniu chichamen nakitiainiawai, tiarmiayi. Tura jes, chíkich akupin awai, tuiniawai. Niisha Jesusaiti, turamainiaji” tiarmiayi.

8 Nu chichaman antukar, aents nuḷ pujuarmia nu, úuntrimiak charaatum ajarmiayi.

9 Tura Jasun̄ chíkich Yus-shuarjaj Papru nekas awemattaji tusar, paj, kuit ikuijaj, tiarmiayi. Nuna takui pepru uuntriñ nin akupkarmiayi.

Piríanam

10 Nuñkia nú kashi Yus-shuar Páprun Sérasnasha Piría péprunam akupkarmiayi. Tura nuḷ jeawar Israer-shuar iruntai jeanam wearmiayi.

11 Piríanmaya aentska Tisarúnikianmaya áentsjain̄kia nan̄kaamas péñker enentáimkia ármiai. Tuke enentáijjaj Yus-Chichaman ántiarmiayi. Túrawar tuke tsawant imia niñkisha Papru tana nuna nekasashit tusar Yusa papir̄in ii wearmiayi.

12 Tuma ásar untsur̄í shuar Yus-shuar ajasarmiayi. Tura Kriaku aents nuwá penker̄i armia nusha áishman̄sha umikiarmiayi.

13 Túrasha Tisarúnikianmaya Israer-shuarka Papru Yus-Chichaman Piría péprunam étserun antukar nuḷ weriar charaatum awajarmiayi.

14 Túmainiakui Yus-shuar Páprun árutsuk nayaantsanam akupkarmiayi. Tura Séraska Timiutéujaj nuiñ Piríanam juakarmiayi.

15 Tura Páprun nemariarmia nu Atenas péprunam nin ejeyarmiayi. Tura niisha waketainiakui, Papru chichaman akatar akupkamiayi, Sérassha Timiutéusha wárik winiartí tusa.

Atenasnum

16 Tura Papru Atenas péprunam pujus Sérasnasha Timiutéuncha nákamiayi. Nuḷ nú péprunam ántar-yus ti írunkui Páprusha kúntuts enentáimmiayi.

17 Tuma asa Israer-shuar iruntai jeanam Israer-shuarjaj tura chíkich aents Yúsan enentáimtiarmia nujaj chichasmiayi. Tura tuke tsawant pepru ajapén aentsjaj in̄kiunaikiar chichasarmiayi.

18 Nuyá chichaman jintin chíkich naari, ipikiuriu, armia nu, tura chikichcha, ni naari, estuikiu, armia nusha Páprun áujmatsarmiayi. Chikichcha

tiarmiayi “Imiá chichamtincha jusha waritramtajik.” Tura chikichcha tiarmiayi “Yajaya yusnan etserniuchuashit.” Páprusha Jesusa túrunamurin tura aents jakamunmaya nantaktinian étserkui nuna tiarmiayi.

¹⁹ Nuyanka aents iruntainiam, naari Ariupaku támanum Páprun júkiarmiayi. Nuisha tuke irunin ármiayi. Nuí Páprun aniasarmiayi “Tisha ame yamaram támena nu nekaatai tusar wakeraji, tiarmiayi.

²⁰ Amesha nusháa chicham jintiniaitme. Túmaitkiui ju chichamsha warintuak tusar nekaatai tusar wakeraji” tiarmiayi.

²¹ (Atenasnumia aencha tura chikich nunkanmaya shuar nuí pujuarmia nusha aya yamaram chicham amia nunak ántiarmiayi. Tura aya nunak áujmatarmiayi.)

²² Nuyanka Papru Ariupakunam ajapén wajaki tímiayi “Atenasnumia áishmanṭiram, wi nékajai, atumsha atumi yusrí ainia nuyá tsurakchamni-aitrume, tímiayi.

²³ Kame wi nuik atumí yusrí enentáimṭutainiam ístaj tukaman nuí jeachin iwiamun, JU NEKAACHMA YUSNAITI, tu áarman wáinkiamjai. Wátsek, ju Yus átum nékachiatrum tikishmatrumna nuna ujaktajrume’ tímiayi.

²⁴ Nekaatarum, nu Uunt Yuska ashí nunkan tura nuí írunna nuna najanaiti. Tura Niisha nayaimpin nunkancha nérenniurinti. Tura aents najanamu jeanam nú Yuska pujuchuiti.

²⁵ Niisha aents yáinkiat tusa atsumatsui. Warí, imia-ninṭi Niisha ii iwiaakmarin, ii mayattairincha tura ashí írunna nunasha súramtsujik, tímiayi.

²⁶ Nekaatarum. Nu numpanmayanak ashí áentsun najanamiayi ashí nunkanam matsamsarat tusa. Tura Yuska ii tsawantrin nekapmaiti; ii pujustinniasha nútiksāṇ nakakmiayi.

²⁷ Winia eátkar wáitkiarat tusa Yus nuna túrayi. Túrasha Yus jeashtaka pujurtamtsuji, tímiayi.

²⁸ Jes, iisha Yusjai iwiaakji. Yusjai muchitiaji. Tura Yusjai ii kakarmari takakji. Nútiksāṇ atumí papí-aintri tíchamka “Ashí incha Yus najatmaitji.”

²⁹ Tura iisha Yus najatma asakrin kuri najanamusha, yúsaiti, tu enentáimsashtiniaitji, tímiayi. Tura kuit-yussha, kaya-yussha aents enentáimsar najanamuka, yúsaiti tu enentáimsashtiniaitji, tímiayi.

³⁰ Aents Yúsan nékainiachuk túrawarmiania nuna Yuska yáunchuka pachischamiayi. Túrasha yamaikia Yus ashí aentsun chicharuk “Tunaaruminiā enentáimpratarum” túramji, tímiayi.

³¹ Yuska áishmanṭan anaikiaiiti. Nú áishman ashí aentsti, yáki péṇkeran túriniait, yáki yajauchin túriniait núnaka nekarmattaji. Nú áishman Yus akupkamun tuke enentáimtakui Yus nin anaikiaiiti. Tura tsawant nú túrunatin átatna nuna Yus Ninṭi achikiuiti. Túrasha nekas anaikiajai tusa, tura ashí áentstiram nekaatarum tusa nú áishmanṭan jakamunmaya iniantkimiayi” tímiayi Papru.

³² Tura nuna jakamunmaya nantaktinian áujmatun antukar chikichcha wishikiarmiayi. Tura chikich “Yamaikia máakete. Antsu chikich tsawantin antukmí” tiarmiayi.

³³ Tutai Papru iniaisamiayi.

³⁴ Tura chikich aentska Papru táman umikiar nin nemarsarmiayi. Nuisha Tiuníseu páchitkiauyayi. Niisha Ariupaku áentsuyayi. Tura nuyasha nuwā, ni naari Támaris, tura chikich aencha nútiksāṇ nemariarmiayi Páprun.

1 Nuyanka Papru Atenas péprun ikiuki Kurintiu péprunam wémiayi.

2 Tura nuí Israer-shuaran ni naari Akiran wáinkiamiayi. Akiraka Puntu nunkanam akiiniauyayi. Tura ukunam Itiaria nunkanam pujai uunt akupin Krautiu ashí Israer-shuaran Ruma péprunmaya awemarmiai. Rúmaka Itiaria nunkanmaiti. Nuí awemamu ásar Akira Kurintiunam nuik támiayi nuwe Pírisírajai. Tura Pápruka Akiran chichastaj tusa werimiayi.

3 Akirasha Páprusha mai juna takau ármiayi, tarach ti núparman jea najantain najanin ármiayi. Tuma asamtai Papru Akiraj seturmiayi nu takat túrawartai tusa.

4 Tura tuke sáwartin Papru Israer-shuar iruntai jean wéuyayi. Nuísha Israer-aentsun Kriaku-aentsnasha nútiksaran Yus-Chichaman ujakar enentáimtikrarmiayi.

5 Tura nuyá Séras Timiutéujai Masetúnianmaya táarmatai Pápruka mijiatrutsuk Yus-Chichaman étseruk “Yusa anaikiamuri Kristu, atum nákarmenta nu Jesusaiti” tímiayi.

6 Tura támaitiat nú chichaman nakitiarmiayi. Túmainiak Páprun katsekkarmiayi. Tuma asamtai Papru, nuínkia ikiuajrume tusa, ni pushirin pear tímiayi “Atumek makuumarme. Tura wikia Yusaj makuumatsjai. Yamaikia Israer-shuarcha ainia nuna Yus-Chichaman ujakartaj tusan werajai” tímiayi.

7 Tura nuyanka Israer-shuar iruntai jeanmaya jiinki, Yúsan enentáimtin áishman Justu jeen wémiayi. Ni jeenka Israer-shuara iruntai jeen ayamach pujumiayi.

8 Israer-shuar iruntai jea chicharniuri, Krispu, Uunt Jesusan nekas enentáimturmiayi. Túruna nuaríjjai uchiríjjajsha Yúsan umirkamiayi. Tura chíkich aencha Kurintiunmaya armia nu nútiksaran Yus-Chichaman antukar, Jesusan enentáimtusar imianiarmiayi.

9-10 Nuyá Uunt Yus Páprun mesekran ipiatkamiayi. Chicharuk “Penké ímiatik awajtamsachartatui Wi ámíjjai pujakui. Ju péprunmasha untsurí aents Winia ajasartin írunui. Tuma asamtai ashamtsuk winia chichamur tuke etserkata” tímiayi Yus.

11 Tura nuí Kurintiu peprunam jimiará uwí ejesattuk Yus-Chichaman étseruk pujumiayi.

12 Tura Kariun, Akaya nunka akupniuri anaikiamu ai, Israer-aents Páprun kajerkarmiayi. Tura kajerainiak akupniunam irunturarmiayi. Túrawar Páprun júkiar ejeniarmiayi.

13 Tu túrawar akupniun chicharainiak “Ju áishman Yúsan umirkatniun Mui-sais akupkamia núnaka íkias ausháa jintíawai” tiarmiayi.

14 Tura Páprusha chichastaj táunak, Kariunka Israer-shuaran tímiayi “Jusha nekas tunáa túrakuinikia, tura akupniun umirchakuinikia, tárumna nuna an-turkaintjarne.

15 Túrasha aya chichamnak tura aya náariniak atumí uuntri akupkamia nunak tau asamtai, atumek nuámtak ístarum tájarne. Wikia nu chichamnum pachinkiatniun nakitiajai” tímiayi.

16 Taku aa jíikmiayi.

17 Tura nuyanka Kriaku aents Israer-shuar iruntai jea úuntrin Sústinisian achikiar awatiarmiayi akupniusha íimmianuman. Túrasha akupin Kariunka túranak penké pachischamiayi.

Papru Antiukíanam waketki, nuyá atak Yus-Chichaman ipiampartasa wémiania nu

¹⁸ Tura ni jeen waketkiarmatai, Papru nu péprunam untsurí tsawant pujusmiayi. Tura nuyasha ukunam Yusai yachi ármiania nuna áujas ikiuak Pirisírajai ni aishri Akirajai Senkrea péprunam wearmiayi. Nui Israer-shuar túrutain umiak Papru ni intiashin awampramiayi, nuik Yúsan tímiaj nuna yamá umíajai tusa. Nuñkia kanunam enkemprarmiayi Siria nunkanam waketkitiai tusar.

¹⁹ Tura nuyá Ipisiu péprunam jeawar Pápruka Pirisíran tura Akiran ikiukmiayi. Tura Israer-shuar iruntai jeanam wayá Israer-shuar irunar pujuarmia nujai chichasmiayi.

²⁰ Tura niisha Páprun juin pujustá tusar seawarmiayi. Túrasha támaitiat, tujintiajai, tímiayi.

²¹ Nuyanka áujas ikiuak “Wisha Jerusarénum námper átatna nuna pachiiintiuktiniaitjai. Tura Yus akuptakuñkia atak tatajai atumin íistaj tusan” tímiayi. Tura kanunam enkemar Ipisiunmaya jíinkimiayi.

²² Nuyá Pápruka Sesaria péprunam jeá, nuyanka Jerusarénum wémiayi, Yus-shuaran nuí áujasataj tusa. Tura nuyá Antiukíanam wémiayi.

²³ Tura Antiukíanam ishichik pujus ataksha weak Karasea nunkanam tura Pirijia nunkanmaani wekaráktak wémiayi. Tura weak Yus-shuar mat-sarmia nuna chicharak ikiakármiai.

²⁴ Tumáa pujai Arijiántria péprunmaya Israer-aents Apurus Ipisiu péprunam jeamiayi. Niisha Yusa yaunchu papirin ti penker nekaamiayi. Etserkatniuncha ti nékauyayi.

²⁵ Uunt Yus tímia nunasha unuimiátrauyayi. Tura tuke enentáijjai chichasmiayi. Jesusa túramurin penker jintinniuyayi. Túrasha aya Juan imiakratmanak nekaamiayi.

²⁶ Ju Apurus arantutsuk Israer-shuar iruntai jeanam chichamiayi. Tura Pirisíra Akirajai ni étserman anturkar, nincha akanki júkiar Yusa chichamen ni nekaachmia nuna núkap jintintrarmiayi.

²⁷ Nuyá ukunam Apurus, Akaya nunkanam wétaj takui, Ipisiunmaya Yus-shuar yáinkiar papí áarar atakas akupkarmiayi. Nú áentsnum penkerak jeat tusar túrawarmiayi. Tura Akayanam jeá, nú áentsun Yusa waitnenkratairijjai uwempraru ármia nuna ti yáinkiararmiayi.

²⁸ Tura Apurus Israer-aentsjai paant chichasmiayi. Túrasha Yusa Papirijjai, Jesussha nekas Yusa anaikiamurinti tusa paant jintiák nincha nupetkamiayi.

19

Papru Ipisiunam jeamiayi

¹ Tura Apuruska Kurintiunam pujai Pápruka náinniumaani wekaráktak, Ipi-siunam jeamiayi. Tura nuisha Yus-shuaran wáinkiamiayi.

² Tura aniasmiayi “Atumsha Yus-shuar ajasmarmena nuí, ¿Yusa Wakaní atumí enentáin enkemturmakaitrum?”

Tutai niisha tiarmiayi “Atsá. Iikia nuka penke áyatkisha ántichuitji Yusa Wakaní awai támaka” tiarmiayi.

³ Tutai Papru aniasmiayi “Entá, ¿nuikia atumsha warí enentáimsarme imianmiarum?” tímiayi.

Tutai niisha tiarmiayi “Juan jintintramamij nu iisha enentáimsar imianmijai” tiarmiayi.

⁴ Tutai Papru tímiayi “Juansha, tunaarminia enentáimprarum imiantiarum, tíchamka. Nuyá tíchamka, winia ukuruí winittiana nu nekas enentáimtustarum. Niisha Jesus Yusa anaikiamurinti, tu ujatmakchamka” tímiayi Papru.

⁵ Nuna antukar niisha Uunt Jesusa náarin enentáimtusar ataksháa imia-niarmiayi.

⁶ Tura Papru ni uwejejai nin antinmatai Yusa Wakaní tarurarmiayi. Túram chíkich chichamjai chichasarmiayi. Túrunawar Yus-Chichaman etseriarmi-ayi.

⁷ Nusha tuse (12) áishman ármiayi.

⁸ Tura nuisha menaintiu nantutin Papru Israer-shuar iruntai jeanam werí Yusa akupeamurin pachis arantutsuk etsermiayi. Túrak nú áentsun ujaak Yúsna nekasaiti tu enentáimtikrarmiayi.

⁹ Tura chíkichka ni enentáin ti ikiatsuárarmiayi. Túrunawar umiktinian penké nakitiainia ásar aents ántamunam Yusa jintin penké yajauch chicharkarmiayi. Tuma asamtai Papru Yus-shuarnaka akanki yaruak Tiranu iskuirariin tuke tsawant Yus-Chichaman ujaarmiayi.

¹⁰ Nuna túruki jimiará uwí etserkamiayi. Túramu asamtai ashí Asia nunkanmaya aents Israer-shuar tura Israer-shuarcha Uunt Jesusa túramurin antukarmiayi.

¹¹ Tura aentsti túrachminian túrat tusa Yuska ni kakarmarin Páprun susami-ayi.

¹² Jáanchniasha pushincha Papru antinman júkiar, nánkamasa jaa shuaran ejetim, nú jaa shuarsha nuna antinkiar penker ajaarmiayi. Iwianchrukusha nuna antinkiar, íwianch jíinkimtai ankant ajaarmiayi.

¹³ Tura chíkich Israer-aents uwishin ármiayi. Tura niisha chíkich chíkich péprunam wear iwianchrukun iwianchrin jírki akuptin ármiayi. Tuma asa niisha Jesusa náarijai iwianchin jíiktiai tusar, iwianchin chichartuiniak “Nu Jesus Papru ujaana nuna náarijai jíinkitiarum tájarme” tiarmiayi.

¹⁴ Tura Israer Patri uuntri Esewia náartin, siati uchiri ármiya nu, nuna túriarmiayi.

¹⁵ Túrusha Jesusa náarijai jíinkitia, tuiniakui, iwianchcha tímiayi “Jesusnaka nékajai. Tura Pápruncha nékajai. Tura atumsha, zyátsukaitrum?” tímiayi.

¹⁶ Nuna tinia iwianchruku áishman tsékenki nú áishmankan kakaram katsumak nupetkarmiayi. Túram ti katsumam niisha misú tura numpamawar jíinkiar pisararmiayi.

¹⁷ Nusha Ipisiu péprunam túrunamiayi. Túrunamtai Ipisiu péprunmaya Israer-shuarsha tura Israer-shuarchasha nuna túrunamun nekaawar ti ashamkarmiayi. Tura Uunt Jesusa náarin shiir awajsarmiayi.

¹⁸ Túmainiai untsurí shuar Yúsana umirkaru Yus-shuar ajatsuk tunáa túrawarmia nuna paant ujakarmiayi.

¹⁹ Tura untsurí uwishniunawarmia nu, wawekratai papí ármiya nuna itiarmiayi. Itiar, júka iniaiyaji tusar, ashí íimiainiain áesawarmiayi. Nú papí áesawarmia nuna kuítrisha senkuenta mir (50.000) nankaamasauyayi.

²⁰ Tu túrunamtai Uunt Yusa chichamepampanki tura nupetmaki wémiayi.

²¹ Tuma asamtai nuyasha Pápruka Masetúnia nunkanam Akaya nunkanmasha irautjai tu enentáimsamiayi. Tura nuyasha Jerusarennum waketkitjai, tímiayi. Tura nuyá ukunam Ruma péprunmasha wetajai, tu enentáimsamiayi.

²² Masetúnia wétin asa Papru ni tsaniakmarin Masetúnia nunkanam emka akupkamiayi. Timiutéun Erastujai akupkarmiayi. Tura ninkia Asia nunkanam seturmiayi.

Ipisiunam ti charaatum ámiania nu

²³ Pápruka tuke Ipisiunam pujai, nuyá aents Yus-Chichaman nakitiainiak charaatum ajarmiayi.

²⁴ Iis, nuĵi Ipiſiunam kaya-yusa jee ámiayi. Nu yus núwauyayi, Tiana naartin. Tura áishman, Timitriu naartin, nú jean nakumak uchichin najanniuyayi kuitjai. Tura niisha nú takatjai ti kuítrintin ajarmiayi. Tura chíkich áishman nú takatan takarmia nunasha ti kuítrintin awajsarmiayi.

²⁵ Timitriusha niijiai takarmia nuna ikiaanak, chikichnasha niijiai métek-taku takarmia nunasha ikiaanak niijiai charaatum ajarmiayi. Timitriusha tímiayi “Winia írutramutiram antuktarum. Iisha ju takat takaajnia jujai ti kuit achíatsjik.

²⁶ Tura atumsha ju Papru wáintrumna nu tura ántarmena nu chichaak “Ashí aents najanam yuska ántar áiniawai” tatsuk. Nuna tau asa, juĵi Ipiſiunam, tura arant ashí Asia nunkanam, ni yúsrin iniaisarar tusa enentáimtikrarai. Tuma asamtai untsurí aents, ii yusrí Tiánan ikiuiniak, Papru tana nuna umirainiatsuk.

²⁷ Papru tu étserkui, iisha itiurcharat pujuschattajik. Kuit ii achiaj nuka menkakashtatuak. Tura nú arantcha ii yusrí Tiana jee shuar iniaisachartatuak. Tura nuyá Asia nunkanmayasha tura ashí nunkanmaya aencha, ii yusrí Tiana shiir awajainia nuna yapajíáwar aun nakitrachartatuak” tímiayi Timitriu.

²⁸ Nuna antukar aencha ti kajekar charaatum ajarmiayi. Túmainiak “Ipiſiu shuartikia, aya Tianak wakeraji” tu untsummiarmiayi.

²⁹ Nuinkia aents páchim enentáimprarmiayi. Túmainiak Masetúnianmaya Kayuncha Aristárkuncha Páprun nemarin ármia nuna achikiar japirkutak iruntai jeanam júkiarmiayi.

³⁰ Tura Pápruka iruntai jeanam wayá chichastaj taun, nuyá Yus-shuar ármia nu, nuna suritkiarmiayi.

³¹ Tura Asia nunkanmaya uuntri, Páprun amikri ásar, ainkia wayawain tusar chichaman akuptukarmiayi.

³² Túrasha irunar pujuarmia nu, páchim enentáimprar, chíkichka nusháa untsummiarmiayi. Tura chikichcha nútiksaran ausháa untsummiarmiayi. Tura chíkichka ti untsurí, nekaachar “wariniak irunturara” tiarmiayi.

³³ Chíkich nuĵi wajarmia nu charaatum amia nuna Israer-shuaran Arejántrun jintintrar eem shitiawarmiayi. Arejántrusha Kayun tura Aristárkuncha ayampruktinian wakerak takamatsatarum tusa uwején takuimiayi.

³⁴ Túrasha aents iruntrarmia nu, juĵa Israer-shuaraiti tusa nekaawar, nú arant charaatum ajainiak “Ipiſiu shuartikia aya Tianak wakeraji” ímia-imiatainiakua tí nukap pujursarmiayi.

³⁵ Ipiſiu pepru papí-aintrisha áentsun itiatmamtik tímiayi “Ipiſiu shuártiram antuktarum. Ii uunt yusrí Tiana jee íistinia íichukaitiajⁱ. Tura ni nakumkamurisha nayaimpinmaya iniarmiania nusha íischatniukaitiajⁱ. Tura nunasha ashí aents paant nékainiatsuk, tímiayi.

³⁶ Warí, núnaka ashí aents nékainia asamtai atumsha itiatkatarum. Túrarum enentáimtsuk yajauch túrawairap, tímiayi.

³⁷ Ímiatarum. Ju áishman átum itiarumna nu, ii yúsrin yajauch chicharkacharai. Tura ni jee yajauch awajsacharai.

³⁸ Wats, Timitriu tura niijiai takainiana nu tunáa túramun ujaktai tusar wakeruiniakka pepru penkerin werishtinkiait. Nuinkia máimtek iwiainiakartí.

³⁹ Tura chíkich chicham ákuinkia pénger iruntrarum iwiaratarum.

⁴⁰ Kame ju yamá túrunamun nekaawar Rúmanmaya kapitíán “Ii uunt kapitíántri yajauch awajsatai tusarum túrachurmeash” turamchatjiash. Warí, ni-

isha “¿Urukamtai charaatum ajarum?” takuisha, áimkiatin penké tujinkiattaji” tímiayi.

⁴¹ Tura papí-aint nuna tuasua amik “Áukete. Wétarum” tímiayi.

20

Papru Masetúnia nunkanam Krisia nunkanmasha wémiania nu

¹ Charaatum ajasua amikiarmatai Papru Yus-shuaran untsuk Yusnan jintintrataj tusa ikiaankarmiayi. Tura áujas ikiuki Masetúnianam wémiayi.

² Nú nunkanam wekaráktak, Yus-shuaran jintintrar ikiakármiai. Tura nuyasha Krisia nunkanam jeamiayi.

³ Nuj menaintiu nántuk pujusmiayi. Tura nuyanka kanujají Siria nunkanam wétasa pujus Israer-shuar chícham jurusman anturmamak “antsu nunkan Masetúnianmaani wetajai” tímiayi.

⁴ Tura Piríanmaya áishman Súpater naartin Páprun atamprimiayi. Tura Tisarúnikianmaya Aristárkusha Sekuntusha Tírpimaya Kayusha Timiutéusha Asianmaya Tíkikiusha, Trújimiusha ashí nu shuar Jiripius peprunam Páprun atampriarmiayi.

⁵ Túrawar niisha emki wear Trúas péprunam jeawarmiayi.

⁶ Tura iisha wakapruachu tanta yutai jisat amuukamtai, iisha Jiripius péprunmaya jíinkir, kanunam enkemprar Masetúnia nunkanmaya jíinkimji. Tura senku tsawant nankaamasmanum emki wearmia nu amaiyankarmiaji Trúasnum. Tura nuisha siati tsawant pujusarmiaji.

Trúas péprunam túrunamia nu

⁷ Tura tumintin kíarai Jesukrístu enentáimtusar yurumátai tusar iruntrarmiaji. Tura Papru Yus-shuaran jintintramiayi. Kame Pápruka kashinkia wétin asa chichaa-chichaakua kashi ajapén ejemiayi.

⁸ Tura yakí menaintiu pátaranam, tesaamu ámia nuj iruntrarmiaji. Nuisha ji ekemarma untsurí irunmiayi.

⁹ Tura nuisha natsa Eutikiu, áankamunam ayamás pujusmiayi. Tura Papru ti esaram chichaakui nu nátsasha kari pujumiayi. Tumáa pujus kanaki yakí pátanmaya akaiki iniaamiayi. Tura penké jakan júsarmiayi.

¹⁰ Tura Papru akaatuki tsuntsumprua miniakkamiayi. Tura Yus-shuaran chicharainiak “Ashamkairap. Ataksha iwiaakui” tímiayi.

¹¹ Nuyá ataksha Papru wakamiayi. Tura tantan puukar yurumáwarmatai, tuke chichaa-chichaakua tsawantmarmiayi Papru.

¹² Eutikiuncha iwiaakun ni jeen júkiarmiayi. Tura ashí aents shiir enentáimsarmiayi.

Miritiunam wearmiayi

¹³ Wats, Papru Asun péprunam nunkan we jeatajtsa wakerimiayi. Tura incha, átumka kanunam wétarum, turamkurin, iikia emkir wémaji Asunnum.

¹⁴ Nuj Asunnum inkiunaikiar, Páprusha kanunam enkemprantai, Miritiniam jeamji.

¹⁵ Tura nuyá jíinkir, kashin tsawarar Sámus péprunam jeamji. Tura nuyanka Trujiriunam jear ayampramji. Nuyasha kashin tsawarar Miritiunam jeamji.

¹⁶ Pápruka Jerusarénum wari wétajtsa wakerimiayi, pintikiustís naartin jístatin pachiinkiatat tusa. Tuma asamtai, Asia nunkanam ti núkap pujus-tinian nakitiak “Ipsiunam wéchattajai” tímai.

Papru Ipsiunmaya úuntrin áujsamiania nu

¹⁷ Túrasha Papru tuke Miritiunam pujus, Ipsiunmaya Yus-shuara úuntrin winitiarum tusa untsukarmiayi.

¹⁸ Ni taarmatai Papru tímiayi “Atumsha wi Asia nunkanam pujusan itiura túraj nu nékarme.

¹⁹ Atumjaj*u* tuke tsawant pujumaj nu*u*, nankaamantuchu enentáimtumasan, úutchim winia Úuntrun takatr*in* takasmiajai. Tura Israer-shuar yajauch awajtustinian wakerutainia*in* tuke takasmiajai.

²⁰ Ashí pé*n*ker ana nu nekaatarum tusan mijiatrutsuk jintintiamjarme. Iruntramarmena nu*u* tura an*k*ant an*k*ant atumí je*e*n pujumarmena nu*u*sha Yus-Chichaman ujakmajrume, tímiayi.

²¹ Tura Israer-shuarnasha Israer-shuarchancha nútiksanak, enentai yapaj*á*rum Uunt Jesukrístu umirkatarum, tímiajrume.

²² Tura yamá*u* Jerusaré*n*num wéajai, Yusa Wakaní túrutkui. Nu*u*sha túrunatana nunasha nekamatsuk wéajai.

²³ Tura Yusa Wakaní iniakturkui juna nékajai, ashí pepru wi jeattajna nu*u* enketá*t*ai tusar nákarainiawai. Tura ti wáitsatniun nekapsattajai.

²⁴ Kame wikia jákashtajash. Túrasha warí winia itiurtawa. Wikia Yusa jinti*in* warasan wekasataj tusan wakerajai. Yusaj*u* wea-wéakuan jáakun iniaisataj tajai. Tura nuyá takatan Uunt Jesus surusmia nuna pé*n*ker amuktaj tusan wakerajai. Jes, Jesus chichartak “Yus wáitnenkartana nú chicham etserkata” turutchamka’ tímiayi.

²⁵ ‘Tura, yatsurtiram, ashí Yús*n*an atumin paant ujakjarme. Yamaikia wíniaka atakka wáitkiashtatrume.

²⁶⁻²⁷ Nekaatarum, ashí Yusa wakeramur*in* wisha pen*ké* úurtsuk ujakjarme. Tuma asamtai atumin títiajtsan wakerajrume, chikichík shuara wakaní jinium wéakuisha wikia pen*ké* makuumashtatjai.

²⁸ Tuma asamtai emka atumek ímiastarum. Túrarum nuyá chíkich Yus-shuar íistarum. Yus-shuaran wáinin ajastarum tusa, Yusa Wakaní achirmakurme. Yus-shuar ainia núnaka ni numpej*ai* Uunt Jesus sumakchakait.

²⁹ Kame wi wématai, chíkich táartatui. Núnaka nékajai. Tura niisha, Yus-shuaran amukartajtsa wakeriartatui, uunt yawasha murikiun amuinia áintsan.

³⁰ Túrasha nemartusarat tusar wakeruiniak atumi*in*ia*u* wait chichaman unuikiartin wantinkartatui.

³¹ Tuma asamtai yatsurtiram, aneartarum. Wisha menaintiú uwitin tsawaisha káshisha úutchim an*k*ant an*k*ant unuiniamajrumna nu kajinmatki-irap’ tímiayi.

³² ‘Pai, yamaikia, yatsuru, Yus yáinmakarti. Yusa anenkrattair*i* nékaitrumna nú chichamsha kakarmaiti. Nú chicham átum katsu*ar*ar kakaram wekasatniun yainmakarti. Kame nú chicham atumí enentá*in* pujakui, Yus ni shuarin matsamsatniun anajmatramia nu*u* pachiinkiatarme.

³³ Wats, wisha chikichkí shuara kuítr*in* warir*in*cha wakerutkachuitjai.

³⁴ Antsu winia uwejrujaj*u* takasan wi atsummiaj nuna sumarmakmajai. Tura winia írutkamuru atsumamur*in*cha wiki sumakmiajai. Nuka paant nékarme.

³⁵ Kame átum takasrum, atsumainia nusha yáintarum tusan jintintiajrume. Wats, Uunt Jesusa chichame enentáimsami. “Achána nujaink*ia* nankaamas, súana nuka shiir waraawai” tíchamka” tímiayi.

³⁶ Nuna tuasua amik Papru tikishmarmiayi. Tura ashí nijijaj*u* iruntrarmia nú shuar Yús*an* áuj*s*armiayi.

³⁷⁻³⁸ Tura Papru nuik chichaak “Atakka wáitkiashtatrume” tiniu asamtai, ti kúntuts pujuiniak, úutchim Páprun miniaksarmiayi. Túrawar kanunam ejeniarmiayi.

21

Papru Jerusarénum wémiania nu

¹ Tura nuyá Yus-shuar aujsa ikiukir kanunam enkempramji. Tura ínkiuasmak Kus péprunam jeamji. Tura kashin tsawarar Rútas péprunam jeamji. Tura nuyanka Patara péprunam jeamji.

² Tura nuí Pataranam pujusar, chíkich kanu Pinisia péprunam wea wáinkiamji. Túmakui nuí enkemprar wémaji.

³ Nuí wésar Chipri nuńkaka wáinkiamji. Chíprikia menanmaani aa ikiuakur Sírianam jeamji. Kánuka Tiru péprunam jeá pujustiniuyi, káarak núkap ikiuktin akui. Tuma asamtai iisha Tírunam jear kanunmaya jíinkir péprunam wayamji.

⁴ Nuí Yus-shuar wáinkiar nuín siati tsawant pujusmaji. Tura Yus-shuaran Yusa Wakaní ujakam Páprun chicharainiak “Jerusarénumka wéchatniuitme” tiarmiayi.

⁵ Tura siati tsawant nankaasmatai jíinkimji. Ashí Yus-shuar ármia nu núwentuk uchirtiuk nemartamkamji, péprunam iniankatmaktiai tusar. Káanmatkanam jear tikishmarar Yus áujsamji.

⁶ Tura nu amikiar nuínkia áujnaisar ikiukiarmaji. Tura iikia kanunam enkemprakrin nińkia ni jeen waketkiarmiayi.

⁷ Iisha Tirunmaya entsak wea-wéakuar Turumáitianam nuín jíinframji. Tura nuí jearsha Yusai yachi ármia nu chichasar nuín chikichkí tsawant pujusmaji.

⁸ Kashin tsawarar nuyá jíinkir nuńkan weri Sesaria péprunam jeamji. Nuí Jiripi jeen jear pujusmaji. Jiripikia Yus-Chichaman etserniuyayi. Nuik Jerusarénum siati áishmankan Yusa takatrín wáinkiarat tusar anaikiarmia nú Jiripiiti.

⁹ Jiripisha kuaru nawantrín yarumkauyayi nuatnakchan. Niisha Yusa chichamen etserin ármiai.

¹⁰ Tura iisha Jiripi jeen wárum tsawantak pujarin Jutía nuńkanmaya aents Yusa etserniurí, Akapu náartin támiayi.

¹¹ Niisha taa Papru emenmamkarín achikmiayi. Tura achik nińki ni nawen tura uwejéncha jínkiamamiayi. Nuna tura tímiayi “Yusa Wakaní tawai, juna emenmamka nérenniurín Israer-aents jútikia jínkiáwar Israer-shuarchanum surukartatui, tawai” tímiayi.

¹² Iisha nu antukar Papru tímiayi “¿Urukamtaí útkuram winia enentáiruj kúntuts awatarum? tímiayi. Wí Jesusna asamtai Jerusarénum jínkiatainiakuisha mántuiniakuisha ashamatsjai” tímiayi.

¹³ Tutai Papru tímiayi “¿Urukamtaí útkuram winia enentáiruj kúntuts awatarum? tímiayi. Wí Jesusna asamtai Jerusarénum jínkiatainiakuisha mántuiniakuisha ashamatsjai” tímiayi.

¹⁴ Tura iisha Papru emetatai tukamar tujinkiar “wats, nuínkia Uunt Yus wakera nu tímianak atí” tiarmaji.

¹⁵ Nu tiri iniaisar iwiarnarar Jerusarénum wémaji.

¹⁶ Chíprinmaya yaunchu Yus-shuar Manasun ni jeen Jerusarénum takakuya nuna ikiatmastinian wakerimiayi. Tuma asamtai Sesarianmaya ishichik Yus-shuar nemartamainiak Manasunnasha júkiarmiayi.

Papru Jakupu jeen irastajtsa wémiania nu

¹⁷ Tura iisha Jerusarénum jeawakrin, nuí warasar Yus-shuar ti shiir áujtamsarmiaji.

¹⁸ Tura kashin tsawar Papru íimiak Jakupu jeen wémiai. Nuisha Yus-shuara uuntri matsamarmiayi.

19 Páprusha áujas amik, Israer-shuarchanum ni étsermajaj Yús túramia nuna yámankamtaikniumia jukí chikichkimas ujakar ujakar awajsamiayi.

20 Papru taman antukar “Yús ti péñkerchakait” tiarmiayi. Tura Páprun ju chichaman tiarmiayi “Támena nu péñkeraiti, yatsurú, túrasha Israer-shuar timiá untsurí Yús-shuar ajasu áiniayat, “ashí Muisais akupkamia nu umiktini-aitji” tuiniawai.

21 Nú arant yajaya aents taar, chichartamainiak “Pápruka nusháa jintintui, turamainiawai. Israer-shuar chíkich nunkanam pujuinia nuna Muisais akupkamurí umirkashtin Pápruka jintintui, turamainiawai. Israer-shuarti tsupirnaktin ana nu túrashtinian tura ashí Israer-shuar túrutai iniaisatniun Papru imia Israer-shuaran jintintui, turamainiawai.”

22 Wátsek, yatsuru, nuñkia itiurmainkit. Ame tátintrumin aents nekaawarka juí kajertamainiak káutrakachartatuak.

23 Wats, antsu nuñkia, ju túrata yatsuru. Juí kuaru áishmañ Yúsan yaunchu tiarmia nuna umiktasa pujuiniawai.

24 Nii júkiarta. Túram niisha Muisais akupkamia nuna umikiar nijiaa-mainiakui, amesha nijiaamarta. Núnismek kuítniasha ni susatin ana nu amesha akikmatkarta. Niisha ashí umikiarmatai, ni intiashin awampratin áhattawak. Nu áishmañka intiashin awampran Israer-aents wáinkiar, antur-tamkarainia nu, nekaschaiti, turamartatui. Antsu, Pápruka Muisais akupkamia tímianak túrawai, turamartatui.

25 Túrasha yatsuru, nekaata, Israer-shuarcha Yús-shuarka papí yaunchu akuptukmiaji. Israer-shuarti túratin ana nu ashí mash túratarum tátsuji, tu áatramji. Tura antsu namañken máawar ántar-yusan susamu yúashtiniaitrome, tímiaji. Tura numpasha umarchatniuitrome, kajemtikramusha yúashtiniaitrome. Tura tsanirmashtiniaitrome. Tu áatramji” tiarmiayi.

Páprun achikiarmiania nu

26 Nuyá tiniu asamtai Papru nú kuaru áishmañkan júkiarmiayi. Tura kashin tsawarar nímiak nijiaamararmiayi, Muisais timia nútiksarañ. Tura Yúsan tiarmia nuna wárik umiktinian tura Muisais timia nuna Yús súsatniun ujaktajtsa Papru Yusa Uunt Jeen wayamiayi.

27 Túrasha nu siati tsawant amusattuk ajatemsaj, Ásianmaya Israer-aents Paprun Yusa Uunt Jeen pujan wáinkiararmiayi. Túrawar charaatum ajakiar Páprun achikiarmiayi.

28 Achikiar unsumainiak “Israer-shuártiram in yáinmaktarum. Ashí nunkanam Muisais akupkamuríncha Israer-shuarti túrutairíncha, ju Yusa Uunt Jeencha yajauch chicharea nu achikji, tiarmiayi. Warí, Kriaku áentsun awayáshtinia nuna awayá nujaj yamá ju Jeencha yajauch awajturmají” tiarmiayi.

29 Jes, nuik Ipsiunmaya Trúpimiu Páprujaj péprunam wekaan wáinkiaruyi. Wáinkiaru ásar, Yusa Uunt Jeen wayayi, tu enentáimsar tiarmiayi.

30 Tuiniakui aents ashí mash charaatum ajakiar tseke táarmiayi. Túrawar Páprun achikiar japirkutak Yusa Uunt Jeeya júkiarmiayi. Túrawar wáitíncha nú chichamaik epentrarmiayi.

31 Tura maatai tusar matsamtuiniaj suntara kapitíantri Jerusaréñnumia aents ashí charaatum ajainian antukmiayi.

32 Kapitíancha ni suntarín tura sarjentuncha irur tseke weriarmiayi aents pujuarmia nuí. Aencha suntaran tura kapitíanin wáinkiar, Páprun asutíniayat iniaisarmiayi.

³³ Kapitiánka Páprun jeari achikmiayi. Tura jimiará jirujai jin_ukiamiayi. Nuyasha aniasmiayi “¿Niisha yait? ¿Warinia túrait?” tímiayi.

³⁴ Túrasha aencha untsurí chichaman untsummiarmiayi. Túmainiakui kapitiáncha penké nekaachmiayi. Tuma asamtai Páprunka suntar pujamunam júkiarmiayi.

³⁵ Tura suntar pujamunam wáitiniam jeawar Páprun entsaki júkiarmiayi aents imiá kajerainia asamtai.

³⁶ Tura aencha ukunmaan_i pataakar, mantamnatí, tu untsummiarmiayi.

Papru chichastinian seamiania nu

³⁷ Tura Papru suntarnum awayám, Páprusha kapitiánin Kriaku chichamjai chichaak “Wi ishichik chichasaintjame” tímiayi.

Tutai kapitián chichaak “Warí, ¿amesha Kriaku chicham chichastin nékamek? tímiayi.

³⁸ Nuñkia amesha ¿Ejiptunmaya shuárchakaitiam? ¿Nuik kuaru mir (4000) aents, man_ukartin tutai atsamunam yaruakchamkam? ¿Kapitiánjai meset najanataj tusa túrachmakum?” tímiayi.

³⁹ Tutai Papru tímiayi “Núchaitjai. Antsu wikia Israer áentsuitjai. Sirisia nun_ukanam uunt pepru Tarsu náartin ana nu_i akiiniaitjai. Tura waitneasam ju aents chichastin tsan_ukatrukta” tímiayi.

⁴⁰ Tura kapitián, ayu, tutai, Papru watainiam wajas, mitiat pujustarum tusa uwejen_u takuimiayi. Tura aents itiatkarmatai Israer-chichamjai chichasmiayi.

22

Papru áentsun timia nu

¹ Papru chichaak ju_{na} tímiayi: “Yatsurtiram, tura úuntur árumna nu antuktarum. Wikia Pápruitjai. Kíishtumaktaj tusan títiatjana nu waitneasrum anturtuktarum” tímiayi.

² Tura Papru Israer chichaman chichaakui, aents nuna antukar nú nan_ukaamas itiatkarmiayi.

³ Nu_i Papru chichaak “Wikia Israer-shuaraitjai. Tarsu pepru Sirisia nun_ukanam ana nu_i akiiniaitjai. Túmaitiatnak ju_i Jerusaré_{nu}num tsakaruitjai. Tura unuikiartin Kamaríran chichamen unuimiaruitjai. Tuma asan ii uuntri_u akupkarmia nuna ashí umirkaitjai. Tura átum yamá túrarmena nuna wisha nútiksanak Yusna ana nuna tuke enentáijjai wakerukuitjai.

⁴ Tura Jesusan umirkaru ármia nuna máataj tusan pataatukni wekaimiajai. Túran áishman_ukan nuwan_ucha achikian sepunam en_ukeataj tusan túrimiajai.

⁵ Israer-patri uuntrisha Israer-shuara uuntrisha Tamaskunam í-shuar susatá tusar papin ataktusar akuptukarmia nuna nin_ukia nékainiawai. Jesusan umirkarun achikia ikiaankan ju_i Jerusaré_{nu}num asutniáwarat tusan werim_ujai’ tímiayi.

(Túramuri 9.1-19; 26.12-18)

⁶ “Tura wi jintiá wéai Tamaskunam jeastatuk ajasai nantu tutupin ai aya aneachma nayaimpinmaya newaat wajantruntmiayi.

⁷ Túrunamtai wisha nun_uká iniaarmajai. Nuyanka chichaamun antukmajai. Chichartak “Sauru, Sauru, ¿urukamtia imiá pataaturam?” turutmiai.

⁸ Takui wi aniasmajai “¿Amesha yáitiam, Uunta?”

Tutai “Wikia Nasaré_{nu}mia Jesusaitjai. Ame pataaturmena nútjai” turutmiai.

⁹ Wíjjaj pujuarmia nu, newaat wajantun wáinkiar ti ashamkarmai. Túrasha nínkia túrutun antukcharmai.

¹⁰ Tura wi tímiyajai “¿Nuinkia, Uunta, warí itiurkattaj?” tímiyajai.

Tutai Uunt chichartak “Wajakim Tamaskunam wetá. Nuisha ame túrattamna nuna ujatmakartatui” turutmiai, tímiayi.

¹¹ Kame wikia nú newaat ajakun íisan jjiiru kusurmai. Tuma asamtai winia tsaniakmar enkeki jurukiar Tamaskunam ejetiarmai’ tímiayi.

¹² Papru tuke aujmatki wéawai. “Tura nuí Tamaskunam áishman Ananías pujumai. Niisha Yúsan aneak, Muisais akupkamia nuna umirkauyi. Tura nú péprunmaya Israer-shuar ármia nu nin pénker enentáimtiarmiai.

¹³ Nú Ananías winia írsataj tusa támai. Taa turutmai “Yatsuru Sauru, pénker iimtia.” Túrutkui nú chichamaik pénker ímmiyajai. Túrunan Ananíasnasha wáinkiamjai.

¹⁴ Tura Ananías chichaak “Iwiaaku Yus, winia wakeramurun nekartuat tusa winia Uchirnasha, tunaarinchaa nuna, ísat tusa, winia chichampruncha antukat tusa ámin yaunchu Yus anaitiamkaiti.

¹⁵ Amesha Papru, Yusna ana nu ísumna nusha antukumna nusha ashí aents ujakartatme.

¹⁶ Tuma asamtai yamaisha ¿warí nákam? Tunaarun asakátrurat tusam Uunt Jesus enentáimtusam weme ni náari pachisam imiantia” turutmai.’

¹⁷ “Tura Jerusarénum waketkin Yusa Uunt Jeen wémajai Yúsan áujsataj tusan. Nuí ímiarmajai.

¹⁸ Nuí Jesus chichartak “Juí Jesusarénum Wíi túramur etserkattamna nuna antukchartatui. Tuma asamtai warí jíinkim wetá” turutmiai.’

¹⁹ “Túrutkui wi tímiyajai “Túrasha Uunta, juyá aents wi Israer-shuara iruntai jeen wayan Ámin umirtamkarmia nuna nuí matsatun achikian awatin sepunam enkeawarmia nuna nékainiawai.

²⁰ Tura nuyá Áminiu etserniun Estepankan máiniakuisha wisha wajamjai. Túruiniakui, “pénkeraiti” tímiyajai. Nú arantcha ni pushirín írsamjai” tímiyajai.’

²¹ “Túrasha Uunt Jesus winia turutmai “Wetá. Israer-shuarcha matsatainia nuí akupkatjame” turutmai” tímiayi Papru.

Suntara kapitániin túrunamia nu

²² Nuí matsamarmia nu, núnaka antukarka untsumtan juáriarmiayi. “Juka mantamnatí. ¿Urukamtaik iwiaakusha pujusat?” tiarmiayi.

²³ Tura aentska Paprun kajerainiak, ti untsumainiak pushirín tujaat ajapawar nunkancha nanqimkiamaikea ajarmiayi.

²⁴ Tura kapitáni nuna wáiniak Páprun suntar pujamunam awayámiayi. Tura suntaran chicharuk “Átum asutiárum áimtikiatarum. ¿Urukamtaik aents nin kajerainiak imiá untsumainia? Nekaatarum” tímiayi.

²⁵ Tura Páprun asutiátai tusar jinjiárar awajsam Pápruka kapitániin chicharuk “¿Rúmanmaya aents áyatik asutiámniakait, ni túramuri nekartsuk?” tímiayi.

²⁶ Nuna táman antuk kapitániin uunt kapitániin ujaktaj tusa werí chichaak “Maaj, túrataj tamena nu anearta. Ju áishman Rúmanam pachitkaiti” tímiayi.

²⁷ Nuna antuk uunt kapitáni Páprun werí aniasmiayi “¿Amesha nekasmek Rumanam pachitkaitiam?” tímiayi.

Tutai Papru “Ee” tímiayi.

²⁸ Tutai “Wikia ti kuítian akikmakmiyajai Rúmanam pachiiinkiatniun” uunt kapitáni tímiayi.

Tutai Papru tímiayi “Túrasha winia aparka Rúmanam pachitkia asamtai, wisha Rúmanam pachiinkian akiiniaitjai” tímiayi.

²⁹ Nuna takui Páprun asutiátaj tiarmia nuna wárik iniaisar jíiniar wearmiayi. Tura imia uunt kapitiáncha Rúmanam pachitkian jin_kiá asa ashankamiayi.

³⁰ Tuma asa kashin tsawar uunt kapitián, urukamtaik Páprun imiá kajerania, nekaataj tusa wakerak Paprun werí jin_kiámun atirmiayi. Tura Israer-patri uuntrin chíkich naamka armia nújaisha ikiaankamiayi. Tura nuin_kia ni matsatmanum Páprun itiar ajapén awajsamiayi.

23

Israer-aentsu Úuntrin Papru timiania nu

¹ Papru Israer-patri naamkarin úmamkes iis “Wíi shuartiram antuktarum. Úchichik tuke yamaisha Yus ímmianum penker wekainuitjai” tímiayi.

² Papru nuna takui Israer-patri uuntri Ananías, ni suntarin Papru ayamas pujuarmia nuna “Wenunam awatiarum” tímiayi.

³ Tutai Papru tímiayi “Tsej, jimiará chichamtinia ímiatá, Yus amincha asutiámattawai. Muisais akupeana nuna umiatsui tusam yajauch turutattsam pujame. Entá, ¿nuin_kia urukamtia Muisais tímia nuka iniaisam ame suntarum winia asutiátarum tame?” tímiayi.

⁴ Tura nuna takui nuj wajarmia nu Páprun tiarmiayi “¿Maaj, amesha Patri uuntri imiá yajauchisha chichaream?”

⁵ Tutai Papru tímiayi “Yatsuru, wisha Patri uuntri áutskaitia tíchamjai. Nékaitkiunka núnaka tíchajjai. Kame wisha nékajai, Yus-Chichamnum tawai “Atumí uuntri yajauch chicharkairap” tawai” tímiayi.

⁶⁻⁸ Israer-aentsu úuntriya jimiará írutka ármiai. Satuséu aents tura nuyá Pariséu aents nusháa írutkan Pápruka nekaamiayi. Kame Satuséu aentska, jakamunmaya nantaktincha Yusa suntarisha aentsu wakanísha tura iwianchcha atsawai, tiniu ármiai. Antsu Pariséu aentska, nuka ashí awai, tiniu ármiai. Nuna nekáa Papru kakantar chichaak “Wikia Pariséu áentsuitjai. Wíi shuarsha Pariséu áiniawai. Wikia ashí shuar jakamunmaya ukunam nantaktin átatui tu jintiamun, nekaatai tusar itiararmiayi” tímiayi. Tura Papru nuna takui Pariséu aents tura Satuséu aencha nuámtak kajernaikiarmiayi. Túrunawar kánasaran nusháa nusháa enentáimprarmiayi.

⁹ Nuin_kia ashí aents charaatum ajarmiayi. Tura Israer-shuara jintinniuri Pariséunam írutka armia nu wajakiar tiarmiayi “Ju áishman tunaan penké túrichuiti. Yusa suntari chíkich wakancha nin nekas chichaschamashi. ¿Ya neka?” tiarmiayi.

¹⁰ Ti charaatum ajainiakui suntara kapitiántri Páprun achiarchartimpiash tusa suntaran untsuk, “Jiiktiarum, túrarum suntar pujamunam awayátarum” tímiayi.

¹¹ Nuyá kashi Papru Uuntri mesekra ipiatuk “Kakaram ajasta, Papru. Jui Jerusarénum winia ujakarumna núnismek Rúmanmasha ujaktatme” tímiayi.

Páprun máatniun wakeriarmiania nu

¹² Nuyá kashin tsawarmatai Israer-aents Páprun maatai tusar chichaman jurusarmiayi. “Papru máachkurkia yurumtsuk tura penké úmutsuk matsam-sattaji. Máachrikia yajauchiniam yuminkramu atai” tiarmiayi.

¹³ Nuna tiarmia nuka kuarenta (40) nan_kaamas ármiai.

14 Tura Israer-patri úuntriñ tura Israer-aentsu úuntriñcha weriar “Papru máachkurkia penké yurumtsuk pujustatji. Máachrikia yajauchiniam yuminfram uatai” taji.

15 Tuma asamtai ashí Israer-patri naamkarijjai suntara kapitiántri seatarum, Papru tatí tusarum. “Kashin Papru itiata, titiarum. Papru tana nu iisha nekas nekaatai tusar wakeraji” titiarum. Túrawakrumin iisha maatai tusar ninikia táatsain náakattaji” tiarmiayi.

16 Tura Papru awe nú chichaman antuk suntar pujamunam taa Páprun ujakmiayi.

17 Tuma asamtai Pápruka suntara kapitiántriñ untsuk “Ju uchi uunt kapitiánnum jukitia. Niisha chichaman takakui” tímiayi.

18 Kapitiáncha uchin uunt kapitiánnum ejé tímiayi “Papru enkeamu pujana nu winia untsurak “Ju uchi uunt kapitiánnum jukitia. Chichaman takakui” túrutui” tímiayi.

19 Uunt kapitiáncha nú uchin enkeki arantach jukí chicharuk “¿Warí turuttiaj tame?” tímiayi.

20 Tutai uchi tímiayi “Israer-aents Páprun chichaman jurusarai. “Papru túramuri ti paant nekaatai tusar kashin Israer-shuara uuntriñ ejetarum” turamartatui.

21 Tura amesha nuna takui anturkaip. Kuarenta (40) nankaamas jintiá akirtua pujurainiawai. Tura “Papru máachkurkia yurumtsuk tura úmutsuk matsamsattaji” tuiniawai. Tuma asamtai yamaisha ámin tití tusa nákarmainiawai” tímiayi uchi.

22 Tura uunt kapitiáncha uchin chicharuk “Ame túrutmena nu chíkich aents penké ujakaraip’ tímiayi. Nuna ti, uchin akupkamiayi.

Akupin Piriksai ejetiarmiania nu

23 Nuyanka uunt kapitiáncha chíkich kapitiánin jímiaran itia chichaak “Urum, kashi ajapén ajastatuk aj, untsurí suntar ikiaankarta. Jimiará sián (200) aya náwek, setenta (70) kawainium eketka, nuyá chíkich jimiará sián (200) nánkijaiñ Sesaria nunkanam wétin iwiarata.

24 Páprusha kawainium ekemkatin iwiarturta. Túrarum péñkerak ejetarum akupin Piriksai” tímiayi.

25 Tura niijiai ju chichaman áatrar akuptukmiayi:

26 “Ti péñker akupin Píriks, wikia Krautiu Rísias ju papin áatjame.

27 Israer-aents ju áishman kan maatai tusar wakeruiniak achikiarmiayi. Tura niisha Rúmanmaya áentsuitkui wikia nuna nekaan suntarjai werin jukimjai.

28 Wikia ¿urukamtaik achikiaruit? tusan Israer-patri naamkarin jukimjai nin.

29 Páprunka ii uuntri akupkamurin umiatsui tusar nin kajeriarmiayi. Pápruka yajauch túrachu asa mantamnachminiuyayi. Sepunmasha enkemachminiuyayi.

30 Tura wisha Israer-aents nin máatniun chichaman jurusman nekaan amijn akuptajme. Nuyasha nin kajerainia nunasha tajai “Atumsha Piriksai werum átum warinma kajerarum nu títiarum” tajai. Ayu. Júchiniak tájame.” Nuna tu áatar akuptukmiayi.

31 Tura suntarsha ni uunt kapitiántri tímia nútiksaran Páprun kashi júkiarmiayi Antipatris péprunam.

32 Kashin tsawarar suntar aya náwek wearmia nuka waketrarmiayi. Tura kawainium eketrainiaka Páprujai wearmiayi.

33 Sesaria péprunam jeawar papin Piriksai súsarmiayi. Tura Páprunka nu ejeniarmiayi.

³⁴ Akupniusha papí aujsua amik Páprun aniasmiayi “Amesha, ¿tuí akiini-aitiam?”

Tutai “Sirisia nunkanmayaitjai” tímiayi.

³⁵ Nuna takui akupin tímiayi “Wátskea kajertamainia nu taar turamainiakui anturkatjame” tímiayi. Tura nuyanka uunt akupin Erutisa jeen awayá apujsamiaiyi, suntar íisarát tusa.

24

Papru Píriksjai áujmatsamiania nu

¹ Tura senku tsawant nankaamasai Israer-patri uuntri, ni naari Ananías, Sesarianam támiayi. Tura Israer-aentsu uuntri tura ti unuimiaru chichamtincha, ni naari Térturu nujai táarmiayi. Ju aents Páprun kajerainia ásar akupniunam wearmiayi.

² Nui Páprun itiar matai Térturu chichatan juarmiayi. “Uunt akupin Píriks, amesha yaimiu asakmin iisha shiir matsatainijai. Tura imiá neka asakmin ashí aents tímiatrusrik matsatainijai.

³ Tuma asakmin iisha ashí matsatmanum tuke tsawant ti shiir yu-miñsamajme, uunta.

⁴ Tura amesha ti núkap chicham antuktin nakitiatspash. Tuma asamtai antsu ishichik waitneasam anturtukta, tímiayi.

⁵ Ju áishman Papru, sunkura utsukratniua núniniaiti. Niisha ashí nunkanam mesetan najanatniun Israer áentsun ikiakáiniaiti. Tura Jesusa aentsri, Nasarénu tuinia nuna úuntriinti.

⁶ Nú arantcha Yusa Uunt Jeen yajauch awajsataj tusa pujuru wáinkiar achikmaji. Ii uuntri tana nujai métek asutiátai tusar wakerimji.

⁷ Túrarin nuyanka kapitíán Rísias taa tapit achik jurutramkimijai.

⁸ Tura atumek akupin Píriksjai werum nui aujmatkatarum, turamaji, tímiayi. Tuma asamtai amesha Píriks, Papru aniasta. Nuñkia ii tájinia nu nekasaiti, nu nekaattame” tímiayi Térturu.

⁹ Tura Israer-aents pujuarmia nu “Nekasaiti ashí ni tana nu” tiarmiayi.

¹⁰ Nuyá Píriks, uwejejai, Papru chichasat tusa iniaktusmiayi. Túram Papru tímiayi “Amesha uunta, ju aentsu akupniurj ti untsurj uwitin pujusuitme. Tuma asamtai nuikia shiir enentáimsan páchitsuk chichastatjai.

¹¹ Wats, wi túramur nekartuata. Yúsan áujmataj tusan Jerusarénum wi wémajna nu tuse (12) tsawant nankaamasai.

¹² Nuisha yajauch áujmatki weai wáitkiacharmai. Yusa Uunt Jeencha tura Israer-shuara aujtai jeencha tura pepu jíntianmasha áentsnum charáa charáa ajá wekaai penké wáitkiacharmai, tímiayi.

¹³ Ju aents juj matsatainia nu wíniaka penké turutchamnia áiniawai.

¹⁴ Túrasha juna paant ujaajme. Jesus yamarman jintiana nuna umíajai. Kame Israer-aentska wáitiaiti tuinia nuna wikia umíajai. Túrasha nuna túran ii uuntri Yusri akupkama nunak umiktasan pujajai. Jes, ashí Muisais aar akupkama nuna tura ashí Yúsnan yaunchu etserin aar akupkarmia nunasha umíaitjai.

¹⁵ Tura jakaasha nantaktin átatui, tajai. Warí, penker aents nútiksaj yajauch aencha nantakiartatui imia Israer-shuar tuiniatsuk. Tura wisha nútiksanak túrunatniuiti tajai.

¹⁶ Tura wisha tiniu asan, wikia winia enentáiruj Yus íimmianum makuumatsuk wekasataj tajai. Tura áentsnumsha nútiksanak penké makuumatsuk wekaajai’ tímiayi.

17 ‘Tura, uunta, untsurí uwitin chíkich chíkich nunkanam wekaasuan amikian winia shuaruj támajai. Kuítrinchán kuítian susataj tusan tura Yusa kuítríncha nin susataj tusan támajai.

18 Túran wisha, Muisais jintinmia nútiksanak nijiaamaran, Yusa Uunt Jeeñ pujumiajai. Untsurí aents charaatum ajainiasha atsumiayi. Nuí wiki pujái Ásianmayá Israer-aents wáitkiarmiayi.

19 Tura wi yajauch túraitkuíñkia winia wáitkiarainia nu táchatniukait ámin ujatmaktasa.

20 Túrachkuíñkia juí pujuinia nu, Israer-patri naamkarí matsatmanum wi pujumajna nuí yajauch túramun nékainiakka turutiarti.

21 Kame, “‘jakamunmayá nantakminiaiti” tau asamtai makuurtiajtsarum pujarme” matsatmanum tímiaj nujái turutchartimpiash. Nú arantka yajauch túramun penké nekartuacharmai” tímiayi Papru.

22 Táman antuk Píriks, Kristu shuarí túramun paant nekáa, áanik iniaisamiayi. “Antsu kapitián Risias támatai nuíñkia nu chichaman nekaatjai” tímiayi.

23 Tura nuyá suntara kapitíántrín chichaak “Ju Pápruka tuke emetnati. Tura ishichikia ankant apujusatarum. Tura nuyá ni amikri taa yáintaj takui suritkiairap” tímiayi.

24 Tura nuyá chíkich tsawantaj ataksha Píriks ni nuwejai Tursirajai támiayi. Núwenka Israer-shuarauyayi. Pírikska “Papru itiatarum’ tímiayi. Papru Jesukrístunún étserkui antimiayi.

25 Tura Pápruka yajauchiniam wekasashtincha naka wekasatniuncha, tura ukunam Yus tunáa áentsnaka asutiátniuiti takui Pírikska ashamak tímiayi “Antsu yamaikia máakete. Tura ataksha wi ankant pujakun untsukmijiam” tímiayi.

26 Tura, ankant ajastaj tusa Papru kuítian akirkashtimpiash, tu enentáimias, Píriks tuke untsúu wémiayi, chichastai tusa.

27 Tura nuyanka jimiará uwí nankaamasmatai Píriks akupin náamkamu ajapnamiayi. Tura chíkich aents, ni naari Pursiu Jistu akupin náamkamiayi. Tura Pírikska, Israer-aents penker enentáimtursarat tusa wakerak, Páprun sepunam tuke ikiukmiayi.

25

Papru Jístujai áujmatsamiania nu

1 Jístusha akupkatin takatan nankaamataj tusa Sesaria péprunam támiayi. Tura menaintiú tsawant nankaamasmatai nuyá we Jerusaréñnum jeamiayi.

2 Nuisha Israer-patri uuntri tura Israer-aentsu penkerisha Páprun tsanumprurtai tusar Jístun weriarmiayi.

3 Tura tiarmiayi “Waitneasam Páprusha Jerusaréñnum akupkata” tiarmiayi. Jintiá maatai tusar wakeruiniak nuna tiarmiayi.

4 Tutai Jistu tímiayi “Atsá. Páprusha Sesaria péprunam sepunam enkeamu pujawai. Tura wikia nuí wárik waketkittiajai” tímiayi.

5 Nuyá nin tímiayi “Atumsha penkeri árumna nu, wijjai Sesarianam wétiniaitrome. Tura nú áishmanka tunaari ákuíñkia nuisha títiniaitrome” tímiayi.

6 Jístuka Jerusaréñnum ishichik tsawant pujusmiayi. Kame uchu tsawant tura tias tsawantcha pujuschiawash. Nuyá ataksha Sesarianam waketkimiayi. Tura nuí jeá kashin tsawar, akupin pujutainium pujus “Papru itiatarum” tímiayi.

7 Tura Papru wayamtai, Israer-aents Jerusarénumiā taarmia nu káunkarmiayi. Túrawar ti nukap chichainiak “Tunáa túraiti Pápruka” tu tiarmiayi. Túrasha penké uyumamtikiacharmiayi.

8 Pápruka chichamprumak tímiayi “Wisha tunaan penké túrachuitjai. Israera uuntri áarmaríncha umirkaruitjai. Tura Yusa Uunt Jeecha yajauch awajsachuitjai. Tura uunt kapitíanniasha yajauch penké chicharkachuitjai” tímiayi.

9 Jístuka Israer-aents péñker enentáimtursarat tusa wakerak, Páprun tímiayi “Wakerakminkia Jerusarénum wemí. Wisha nuí ame túramurmin nekaatjai” tímiayi.

10 Tutai Papru tímiayi “Amesha paant nékame, Israer-áentsnum tunaan penké túrachjai. Tuma asamtai Rúmanmaya uunt akupniun wisha winia túramurun ujaktiniaitjai, nekartuati tusan.

11 Wisha jakamnia tímianu tunáa túranka, jákatniuncha ashamatsjai. Tura antsu turutainia nu nekaschaitkiuinkia wíniaka Israer-shuarnum surunkachminiaitjai tajai. Tuma asamtai seajme, wíi túramun uunt akupin Sésar nekartuati” tímiayi.

12 Tutai, nuyá ni írutramurijjai chichasua amik, Jistu Páprun tímiayi “Uunt akupniui wétaj tusam seame. Tuma asamtai nuí wétatme” tímiayi.

Papru uunt akupniujai áujmatsamiania nu

13 Tura ishichik tsawant nankaamasmatai akupin Akripia ni nuwejai Pirinísejai Jístun áujstataj tusa Sesarianam wearmiayi.

14 Tura untsurí tsawant pujusarmiayi. Tura nuí pujuiniaí Jístuka Papru túrunamun akupniun ujaak tímiayi “Juí áishman pujawai. Píríks nin achik enkea ikiukmiayi, tímiayi.

15 Kame wikia Jerusarénum pujái Israer-patri uuntri tura Israer-aentsu úuntriísha, Papru yajauchin túraiti tusar káutrukarmiayi, tímiayi. Mantamnati tusam akupkata, tu seattiararmiayi.

16 Takui wi tímiajai “Iisha Rúmanmaya áentstikia chícham nékatsuk, mantamnati tusar akupeatsji. Tsanumpruinia nu, emka táartin áiniawai. Tura nuyá chichamprumatsain mantamnati tusar akupeatsji iisha” tímiajai.

17 Tiniu asan, táarmatai, wikia nákatsuk kashin tsawaran akupin puju-tainium pujusan, Papru itiatarum tusan akupkamjai.

18 Tura Páprun tsanumprurtai tusar taar chichainiaksha, wi enentáimmiajna núnaka tícharmiayi.

19 Antsu áyatik Yus umirkar túmatairín Papru nuna túrachai, tiarmiayi. Tura nuyasha áishman Jesus naartin nantaki iwiaakui tawai Pápruka, tiarmiayi. Nunak tiarmiayi.

20 Tura wikia nú chichaman túratniun nékachu asan, Páprun aniasmajai “¿Amesha Jerusarénum wétaj tusam wakeramek? Nuí nu chichaman nekar-tamawarti” tímiajai.

21 Túrasha “Atsá. Juín pujustajai. Rúmanmaya uunt akupin Akustu Sésar nekartuati” tímiayi Papru. Takui, “nuiñkia tuke sepunam pujustá. Tura wi ukunam uunt akupniun akuptuktatjame” tímiajai” tímiayi Jistu.

22 Nuyá Akripia chichaak “Wisha itiursanak nu áishman chichaamun anturkaj” tímiayi. Tutai Jistu tímiayi “Amesha kashinkia anturkattame”.

23 Tura kashin tsawar Akripia Pirinísejai taar, iwiaa-iwiarmamu ajas wayawarmiayi. Suntara úuntriíjai tura nú péprunmaya úuntriíjai wayawarmiayi. Tura nuí Jistu, “Papru itiatarum” tímiayi.

24 Tura Papru támatai Jistu tímiayi “Uunt Akripia, tura ashí áentstiram matsatrumna nu, pai, ju áishman íistarum. Ti untsurí Israer-aents

Jerusarénumsha tura juí Sesarianmasha ju áishmankan Páprun kajerainiak yajauch chichartuiniawai. Tura tuke iniaitsuk, mantamnatniuiti, turutainiawai.

²⁵ Túrasha wíjiainkia tunáa jakamnianka túrachuiti. Kame niisha “uunt akupin Akustu Sésar nekartuati” takui, wisha nin akupkataj tusan wakerajai.

²⁶ Tura wariniak uunt akupniun áatrataj nuna nékachu asan, Páprun atumin itiarjarme. Tura nekaska, Akripia, ame iniasta tusan itiarjarme. Túrawakmin wi wariniak áartaj nuna nekaatjai.

²⁷ Warí wisha, ni yajauch túramurín áattsuk, uunt akupniunam akupkash-tiniaitjai” tímiayi.

26

Papru Akripiaí chichamprumakmiania nu

¹ Jistu nuna tutai Akripia Páprun tímiayi “Wats, amesha tu timi chichamprumakta” tímiayi. Tutai Papru uweje takuí chichatan juarmiayi.

²⁻³ Chichaak tímiayi “Uunt Akripia, ii Israer-shuarti túrutai ainia nu amesha nékame. Tura ashí ii chicharnaiyajnia nusha nékame. Tuma asamtai yamáí wisha ámin chichamprumaktaj tau asan shiir enentáimjai. Israer-aents turutainia nuna mash ujaktatjame. Waitneasam péñker anturtukta’ tímiayi.

Papru ni yaunchu túrutairín ujakmiania nu

⁴ Wi úchichik winia nunkaruí tura Jerusarénumsha pujusan wi túramajna nuna ashí wíi aents Israer ainia nu nékainiawai.

⁵ Pariséu ajasan, ni akupeamurín itiurchat aín ashí takamtsuk tuke umirniuitjai. Nunasha nékainiawai tura wakeruiniakka etserkamnia aintui.

⁶ Túrasha wikia, jakamunmayá nantaktin átatui, tiniu asamtai wíniaka emetruawar itiararmiayi. Túrasha núnaka Yuska ii úntrín yaunchu tímiayi. Yus tímia nuna túrunattawai wisha tiniu asamtai itiararmiayi, tímiayi.

⁷ Tura ashí mash Israer-shuarti, tuse (12) aents matsatka ájinia nu, ju nantaktin chichaman Yus tímia nuna túrunati tusar nákainiaji. Tuma asar Yus áujkurⁱ, tsawajsha káshisha nú enentáimtuiniaji. Tura wisha nú chichamnak enentáimta asamtai wíniaka kajertuiniawai, uunt Akripia.

⁸ Warí, atumsha “Yus jakancha iniantkimniaiti” tátsurmek’ tímiayi.

⁹ Tura wisha yáunchuka Nasarénumiá Jesusnan umirkaruka kajerkatniuiti, tu enentáimniuyajai.

¹⁰ Tura Jerusarénum Yus-shuar ármia nuna kajerkarmiajai. Israer-patri uuntri chichamejai untsurí áentsun Jesusnan umirkarmia nuna sepunam enkeamiajai. Tura nú shuaran máiniakuisha wikia péñkeraiti tu wémiajai.

¹¹ Tura Israer-shuara iruntai jeen wayan ti asutiármiajai, Jesusnan umirkatniun iniaisarat tusan. Tura imiá kajerkaran chíkich nunkanmasha pataatu wearmiajai achiktaj tusan’ tímiayi.

Tamasku jintianam túrunamun ujakmiania nu

(Túramurí 9.1-19; 22.6-16)

¹² Tura Israer-patri uuntri tsankatrukmetai, papin ni surusarmia nujai, Tamasku péprunam wétaj tusan jíinkimiajai.

¹³ Tura, uunta, nantu tutupin ai, jintiá wéai newaat ajaki ti tsáapin, tsawái nantujai nankaamas etsantrutramiayi. Tura wijjai wearmia nunasha núnisaran etsantrurarmiayi.

¹⁴ Tura túrunamtai ashí nunká tepetar wáinkiaromiaji. Wiki Israer-chichamjai túrutun antukmajai “Sauru, Sauru, ¿urukamtai imiá pataaturam? Amek enentáimin yajauch awajmamsame, wáaka sankanmiak numin ijiuma núnismek. Wíi aents kajera asam túruname” turutmai.’

15 “Túrutkui wisha “¿Amesha yáitiam, Uunta?” tímiajai.

Tutai Uunt turutmai “Wisha Jesusaitjai, ame pataatamna núitjai.

16 Tura nantakim wajaktia. Winia takartusminiam tusan wantintiukjame. Tura ame wáinkiamna nusha etserkattame. Tura ukunam wantintiuktatjame. Wáinkiatamna nusha etserkamnium, turutmai.

17 Tura nuyasha turutmai, Wats yamaisha Israer-shuarchanum akupkatjame. Tura Israer-shuar kajertamainiakuisha, tura chíkich aents kajertamainiakuisha ayampruktatjame, turutmai.

18 Pénker jintintiata tusan akupeajme. Kame aencha kiritniumiá jíinkiar tsáapninium wekasarat tusan, tura iwianchin umirtsuk Yúsán umirkarat tusan akupeajme. Tura Winia enentáímtursarmatai Wisha ni tunaarín tsankurrattajai. Nuna túran Yusna ajasaru áiniana nujai apujsattajai.” Nuna Jesus turutmai’ tímiayi.

Papru mesekrampra umikman ujakmiania nu

19 “Tuma asamtai, uunt Akripia, Uunt Jesus nayaimpinmaya wantintiurak turutmia nuna umirkataj tusan pujajai.

20 Enentai yapajíawar Yus-shuar ajastinian, emka Tamaskunam pujuarmia nuna ujakarmiajai. Tura nuyasha Jerusarénumian, Jutía nunkanmayancha tura nútiksanak Israer-shuarchancha nuna ujakarmiajai. Tura ujainiakun “Yus-shuar ajasmarum paant ajasat tusarum, péñker túratarum” tímiajai ashí shuaran.

21 Tura wi Yusa Uunt Jeen pujái, Israer-shuar achirkar emetruawar mántuatai tukamá tujintrukarmiayi, Yus winia yaintiu asamtai.

22 Yus winia yaintiu asamtai, iniaitsuk tuke Yus-Chichaman ujainiajai. Uunt ainia nunasha, tura péejchach ainia nunasha ujainiajai. Tura Muisaissha, Yúsán etserniusha tiarmia nunak étsereajai. Nú arantka tátsujai.

23 Krístuka wáitsatniuyayi, tura jakasha émak nantaktiniuyayi, ii uuntri tiniu ármiai. Tura Krístuka nantaki Yusa chichamen í áentsun tura Israer-shuarchancha nútiksan ujaktiniuyayi. Nuna tu tiarmiayi. Tura núnaka wisha tu ujainiajai” tímiayi Papru.

Papru Akripian Yus-shuar awajsataj tusa wakerimiania nu

24 Tura nuna takui Jistu kakantar tímiayi “Maaj, Papru, wáurme. Imiá unuimiatu asam wáurkame” tímiayi.

25 Tutai Papru tímiayi “Atsá uunt Jistu, wáurtsujai. Antsu wi tájana nuka ti nekasaiti.

26 Wi tájana nuna, uunt Akripia jui pujana nuka nékawai. Tuma asamtai arantutsuk nin chichareajai. Kame ju túrunamu ti paant asamtai niisha nékawai, tajai” tímiayi.

27 Nuyá Akripian chicharuk “Yaunchu Yúsán etserin áarmari, nekasapitia tátsumek, uunt Akripia. Wikia nékajme. Nekasaiti, tame” tímiayi.

28 Takui Akripia chichaak “Maaj, ishichik awajtame Papru, Yus-shuar ajastin” tímiayi.

29 Tutai Papru tímiayi “Tura ishichik chichamjaisha untsurí chichamjaisha, amesha uunt Akripia, tura ashí winia anturtukurmena nu, wijjai métek ajasúk tusan wakerajai. Tura antsu wia núnisan jínkiámua núnaka wakeratsjai” tímiayi.

30 Papru nuna tuasua amikmatai akupniusha, uunt kapitíáncha, Pirínísesha, tura nuí ashí pujuarmia nu wajakiarmiayi.

31 Tura arant wear, túrunamun chichasarmiayi. Tura tiarmiayi “Ju áishman mantamnamnian tunaamkachuiti tura penkesha sepunmasha enkeachminiaiti” tiarmiayi.

32 Tura Akripia Jístun tímiayi “Ju áishman “uunt akupin nekarati” tíchaitkuĩkia akupmai makuitji” tímiayi.

27

Páprun Rúmanam akupkarmiania nu

1 Tura Páprun Ruma péprunam akupkatniun enentáimsarmiayi. Rúmaka tímiaj, Itiaria nunkanam pujawai. Wisha Páprujaj wémiajai. Pápruncha tura chikichnasha achikma ármia nunasha Akustunu tutai suntara kapitiántrijaj nenakar akupkarmiayi. Nú kapitiáni naari Júriuiti.

2 Tura Atramitiunmaya kanu Asia nunkanam pepu ármia nuj wétasa pujumia nu enkemprarmiaji. Tura Tisarúnikianmaya áishman, ni naari Aristárku, in páchitkiauyayi. Tisarúnikiasha Masetúnia nunkanmaiti.

3 Nu enkemprar kashin tsawarar Sitiun péprunam jeamiaji. Nu jeawakrin kapitián Juriu, Páprun waitnentak tímiayi “Ame amikrumiin wetá. Au írmasarti” tímiayi.

4 Tura Sitiunnumia jíinkir, kanujaj wesar nase tukumpramprakrin Chipri núnkaka menanmaani aa ikiukmiaji.

5 Tura nayaantsanam wesar Sirisia tura Pampiria nunkanam ayamchik nankamakir Mira péprunam jeamiaji. Nuka Risia nunkanmaiti.

6 Nu jear nú kanu ikiukmiaji tura chikich kanu Arijiántrianmaya taa Itiaria nunkanam wétasa pujumiayi. Nú kanunam suntara kapitiántri, enkempratarum, turammiaji.

7 Tura untsurí tsawant yáitmataik we-wémiaji tura ti wiántkar Nítiumam jeastatuk ajasmiaji. Tura nuisha nase tuke tukumkarta asamtai Sarmun nunkanam ayamchik nankaamakir, Kritia nunkanam áawinini ayamchik wémiaji.

8 Tura Kritia nunkanam ayamchik wesar itiurchat akui wáitsar weawéakuar “Shiir Pujutai” tutainium jeamiaji. Nusha Rasea péprunam tíjiuchiiti.

9 Yáitmataik wea asar ti táasmaji. Tura yumi yututai jeatema asa ti tsúumainiuyayi nayaantsanam wétin.

10 Tura Papru chicharuk “Amikru antukturum. Wi nékajaj, yamaí wéakrikia ti tsúumainti. Kanusha tura káarak kanunam enketainia nusha menkarattawai. Tura iisha núnisrik kajiñchatjiash” tímiayi.

11 Suntara kapitiántrin_kia Páprunka anturtsuk, kanú wianniurin kapitiántrincha tura kanú kapitiántrincha chichamen anturkarmiayi.

12 Tura nu Shiir Pujutai tutainium yumitin pujustin penkerchaitkui “Nuĩkia juyanka wéartai. Pinise péprunam jeamainchuashit” ashí tiarmiayi. Nú péprusha Kritia nunkanam nayaants ayamach pujawai. Nú péprunam yumitin pujustinian wakeriarmiayi, arakia nunkaani kakaram nase nú péprunam jeachu asamtai.

Tsúumainium wekasarmiania nu

13 Tuma asamtai ukunam nase nunkaaniá tápiriri jakui, ii wétin yamaikia penkeraiti, tu enentáimsarmiayi. Túmakui kanu emetai jiru júusar jíinkir Kritisianam ayamchik wearmiaji.

14 Túrasha árusan arakia kakaram nase, Nuristi tuinia nu tukumpramiayi.

15 Nase kanun tukumpra asamtai iisha atsantratin penké tujinkiamiaji. Túmakui, áankisha juramkitiai tusar iniaisamiaji.

16 Tura Kritia nunkanam áawinini nankaamakur nuĩkia nase ishichik mijiantmatai, uchich kanu japikir wémiaj nu ti takasar uunt kanunam enkermiaji.

17 Tura enkerar chapikjai uunt kanun jinikiáarmiayi wewe najanatai tusar. Tura náikim mukutniunam, Serti tutainium nase juramkishtajiash tusar, kanunam yakí tarach aan itiararmiayi. Nu tarach nase útsuktin tusar nenarma áarmiayi. Túrawar áyatik nase juramkitiai, tiarmiayi.

18 Tura kashin tsawarmatai nasesha chíchimisha tímiatrusan kakaram aa asamtai kanunmayan káarak irunmia nuna nayaantsanam ajapawarmiayi.

19 Menaintiú tsawant nankaamasmatai iisha ii uwejéjain kanunam káarak iruniarmia nusha entsá utsankarmiaji.

20 Tura untsurí tsawant tsawajisha etsantrachmiayi tura káshisha yaasha tsaparcharmiayi. Tura nasesha ti kakantar tukumpramkurin “Yamaikia uwempratin atsawai” tiarmiaji.

21 Tura iisha ti untsurí tsawant yurumtsuk matsatu asakrin, Papru ajapén wajaki tímiayi “Amikru winia nuik Krítianmayanka jíintsuk anturtukuitki-urmiñkia yamá jü itiurchatnum pujutsuk tura emenkatmatsuk pujaaji’ tímiayi.”

22-24 ‘Yamá kashi winia Yusrú suntari nayaimpinmaya wantinturkayi. Nú Yúsan umirkaitjiana nu akupturkayi. Tura nu taruti “Ashamkaipia Papru, turutui. Amesha Ruma péprunam uunt akupniunam jeattame. Tura chikichnasha ámijiai kanunam enketainia ásarmatai uwempratniun Yus tsankatkarai” turutui. Tuma asamtai, amikru, shiir enentáimsatarum. Atumsha mash uwemprattarme. Túrasha kánuka mesertatui.

25 Wisha winia Yúsrún nekas enentáimtajai. Yusa suntari turutainia nuna nekas tu túrunattawai, tajai. Tuma asamtai kakartarum.

26 Tura chíchimisha nunka uchich pújakmanum nuí patatmittiaji” tímiayi.

27 Ayu, katurse (14) tsawant nankaamasmatai nú kashi Atria nayaantsanam jeamiaji. Nuí nase nánkamas juram wémiaji. Nuyanka kashi ajapén wiantin armia nu nunka ámunam jeateman nekaawarmiayi.

28 Tura urutmá kúnakit tusa nekapmamiayi. Túram tráinta sais (36) mítruuyayi. Nuyasha ékemsan ataksha nekapmamiayi. Nuiñkia painti siati (27) mítru nekapmamiayi. Tuma asa nunká anumsatuk ajasun nekaawarmiayi.

29 Tura kayanam ijiukai tusar ashamainiak kuaru jirun kijinian chapikjai kanú senkarin jinikiáwar entsá ajunkarmiayi. Kijin asamtai, inít tepeámtai nase juramkichmi tusar túrawarmiayi. Tura wake mesekar, tsawarti tusar matsamarmiayi.

30 Tura matsatainiais wiantin armia nu, iikia uchich kanunam enkemprar pisarchatjiash tu enentáimsarmiayi. Túmainiak kanú nujinia chíkich jirun ajuntai tawa nútiksaran uchich kanun ajuntai tusar pujuarmiayi.

31 Tura tuma wáiniak Papru suntara kapitántrín tura ni suntarincha ujakmiayi. “Ausha uunt kanunman enketainiachkuñkia atumsha uwemprash-tatrume” tímiayi.

32 Tutai suntarsha uchich kanú chapikrin tsupirkar entsá ajunkarmiayi.

33 Tura kashin káshik Papru ikiakártasa wakerak tímiayi “Ishichkisha yurumátarum. Atumsha katurse (14) tsawant kánutsuk yurumtsuk pujarme.

34 Seajrume, ishichkisha yurumárum kakaram ajastarum, uwemprataj tusarum. Iimiata, nekaatarum, imiatkisha túmatsuk péemkattarme” tímiayi.

35 Nuna tuasua amik Papru apatkun achik Yúsan yuminsamiayi ashí íimmianuman. Tura puuk yuamiayi.

36 Tura apatkun yuan wáinkiar, ashí aents shiir enentáimsar yurumáwarmiayi.

³⁷ Nusha ashí aents irurmaka jimíará siáñ nuyá ataksha setenta sais (276) ármíayi.

³⁸ Yurumáwar ejemakar, yurumkanka entsá utsañkarmíayi, uunt kanu wampú ajasat tusar.

Kanu penké mesermiania nu

³⁹ Tura tsawarmatai wíantín armia nu, nunkan nekaacharmíayi. Túrasha éñkentamunam káanmatak aan wáinkiar “*Ai kanu anuntai*” tiarmíayi.

⁴⁰ Nuyá jiru entsá ajunman chapikrín tsupirkar entsá ikiukiarmíayi. Tura kanait jiníkiarma ármia nuna chapikrín tsupirkarmíayi. Tura tarach kanú nujiin amia nuna nenakarmíayi. Túram kanu káanmatkanam anumsatuk ajasmíayi.

⁴¹ Tura wainchi jímiar ámunam jeá kanu entsá wayá tepeamiayi. Tura kanú senkarinkia chíchimi yakí takuir ajíamu asa kupintramiayi.

⁴² Suntarsha, achik júamu armia nú shuaran máataj tusa wakeriarmíayi, yukuak pisararain tusar.

⁴³ Tura kapitíancha Páprun uwemtikrataj tau asa nuna túratniun tsankatkachmíayi. Antsu chichaak “Emka yukuaktin nékarmena nu yukuakrum péemkatarum, tímiayi.

⁴⁴ Nuyá chíkichkia kanunmayá numi, kame nánkamas numi achikrum awamkarum péemkatarum” tímiayi. Tu túrawar ashí iwíiaakuk jíintramiayi.

28

Marta nunkanam túrunamia nu

¹ Tura ashí iwíiaakuk jíintrar, nu nunka Marta naartin nekaamiaji.

² Tura nuí matsamin armia nu, shiir awajtamsarmíaji. Tuma asamtai iisha tsetsema asakrín, tura yumisha yútakui, uunt jinia ikiapárarmíayi. Tura “anamaitiarum” turammaji.

³ Pápruka jinia kukarun ikiaanank jinium pataamiayi. Túmawai napi tsuéran ashamak jíinki, Papru uwejeñ nemaramíayi.

⁴ Tura nú nunkanmayá aents, Papru uwejeñ napi nemaran wáinkiar “Ju áishmansha shuáran maichuashit, tiarmíayi. Nayaantsanmayá uwempraiti-atan ni yusrí iwíiaaku átínian suritiawai” tiarmíayi.

⁵ Páprusha ni uwejeñ pear napín jinium awañmíayi. Tura penkesha yajauch ajaschamiayi.

⁶ Tura niisha eáchatpiash tusar ii pujuarmíayi. “Túmatskesha jaka inianchatpiash” tiarmíayi. Túrasha ti núkap pujussha penké najaweachmíayi. Túrunamtai, nuinkia nusháa enentáimprar “Pápruka yúschashit” tiarmíayi.

⁷ Nú nunkanam aentsu penkerí ámiayi ni naarí Pupriu. Nú Pupriu ni jeen in itiaarmamiaji. Tura menaintiú tsawant yurumkancha suramsarmíaji.

⁸ Tura nuí pujarin Pupriu aparí tsuer, numpajai ijiarki jáamiayi. Túmakui Papru werí iyumiayi. Tura Yúsan áujtus amik uwejeñ nin awantkamiayi. Túram penker ajasmíayi.

⁹ Nu túramun nekaawar, nú nunkanmayá aents jaa armia nu tariar, niisha penker ajasarmíayi.

¹⁰ Túram incha ti shiir enentáimturmasar núkap ajampramsamiaji. Túram ukunam ii wétin jeamtai ashí ii atsumamun suramsarmíaji.

Rúmanam jeawarmiania nu

¹¹ Ii wétsuk nú nunkanam menaintiú nantu pujusmiaji. Tura nuyá chíkich kanunam enkempramiaji. Nu kanusha Arijiántrianmayá yaunchu tau

menaintiú nantu yumi yútakui nuí pujumiayi. Nú kanu nujiin numi-yus najankamu jímiar ekemiarmiayi, ni náarin_{nk}ia Kástur tura Púruks.

¹² Iisha nuí enkemprar weri Serakúsa péprunam jeamiaji. Nuí menaintiú tsawant pujusarmiaji.

¹³ Tura jíinkir nuyanka nayaantsa ayamach weri Riiu péprunam jeamiaji. Nuí kanarmiaji. Tura kashin anaria nase suut umpuunti támiayi. Tuma asamtai nú kashinkia Putiuri péprunam jeamiaji.

¹⁴ Nuí jeawakrin Yus-shuar pujuarmia nu, ni jeen juramkimiaji. Tuma asamtai nuin_{nk} chikichkí tumin_{nk} pujusmiaji. Tura nuyanka nunkan Rúmanmaani wémiaji.

¹⁵ Tura Rúmanmaya Yus-shuar, ii jeatniurin neka ásar jintiá inkiunmaktai tusar winiarmiayi. Chíkichkia Apiu pepru támanum táarmiayi, tura chíkichkia, Menaintiu Jeá tutainium táarmiayi. Nuna káunkan wáiniak Papru shiir enentáimias Yúsan yuminsamiayi.

¹⁶ Tura ii Rúmanam jeawakrin kapitián Juriu achikia yarumman Rúmanmaya uunt kapitiánin ejetimiayi. Túrasha, Pápruka jeá ikiamas niisháa pujustí, tiarmiayi. Tura Páprun ísat tusa chikichík suntarnak ni jeen apujtusarmiayi.

Rúmanam Papru Yus-Chichaman etserkamiania nu

¹⁷ Nuyá menaintiú tsawant nan_{nk}kaasmatai Pápruka Rúmanmaya Israer-áentsu penkerin untsuk ikiaanak “Yatsurtiram antuktarum. Wisha Israer-áentsun yajauchin penké túrachmiajai. Tura ii uuntri akupkarmia nunasha yajauch chicharkachmiajai. Tuma ain_{nk} Jerusarénum winia achirkar Rúmanmaya áentsnum surutkarmiayi.

¹⁸ Tura nu aencha winia anintsar, akupkatai, turutiarmiayi, wisha penké yajauchin, mantamnamnia tímianu túrachu asamtai.

¹⁹ Túrasha Israer-shuarka “Atsá, akupkairap” turutiarmiayi. Nu tuma asamtai, “antsu uunt akupin nekarati” tímiajai. Wikia wíi shuara tunaarin kapitiánin ujaktinian táchaitjai.

²⁰ Tuma asamtai, yatsurtirmin, atumin untsukjarme chichastaj tusan. Yusa anaikiamuri, Israer-shuarti nákaunia nu táwiti wi tu étserkui, juí achikiar jin_{nk}kiámu pujajai” tímiajai Papru.

²¹ Tutai niisha tiarmiayi “Iisha Jutiá nunkanmaya aentsti, ame yajauch túramu papí penké wáinkichuitji. Tura ii shuar nuyá táarainia nusha “au yajauch túraiti” tu uatmakcharmaji.

²² Túrasha ashí nunkanam yamaram chichaman jintinian yajauch chicharainiawai tama antukji. Tuma asamtai amesha nu warintia enentáimtam nekaatai tusar wakeraji” tiarmiayi.

²³ Nú tsawantaj iruntrami tiarmia nú tsawant jeamtai, ti untsuri aents Papru pujamunam iruntrarmiayi. Papru jintintiainiak Muisais yaunchu aar akupkarmia nujai tura chíkich Yúsnan etserniu aarmarijiaisha, Jesus nekas Yusa Anaikiamurinti tusa paant jintintiawarmiayi. Nuna tura káshik nan_{nk}kaama Yus akupeamunam pachiinkiatniun étse-étserkua kjaraj iniaisamiayi.

²⁴ Tura Papru táman antukarmia nu, chíkichkia, nekasaiti tusar umikiarmiayi. Tura antsu chíkichkia, nekaschaiti tusar umikcharmiaji.

²⁵ Chikichkí enentaikⁱ enentáimsatin atsá asamtai, jiinki weartasa pujuarmiayi. Túmainiakui Papru chichaak “Nékasen_{nk} Yusa Wakaní yaunchu Yúsnan etserniu, Isayas naartin áarmarijiaji ii úuntrin_{nk} chicharuk juna tímiajai:

²⁶ “Ame weme au aents ju titia:

“Ántutka ántakrumsha nekaashtatrome,

Íitkia iyakrumsha wáinkiashtatrome.

²⁷ Warí, au shuara enentái katsuarai;

Kuishijiai ántaksha ántichua núnin ániawai,

Jiisha epetkamua áanin ániawai,

Iyaksha wáinkia_{in} tusa, ántaksha antuk_{in} tusa

Enentáimkiusha nekaawa_{in} tusa,

Winí uwempra_{in} tusa, tura Winí tsuamar_{in} tusa túrunayi”.

Nuní áarmaiti.

²⁸ Tuma asamtai, nekaatarum. Yamaikia Yusaj uwempratin ana nuna Israer-shuarsha susamuiti. Tura ni_{nk}ia nekas umikiartatui” tímiayi.

²⁹ Tura Papru nuna t_i iniaisamtai Israer-shuar nuamtak núkap chicharnaiya-sua wearmiyai.

³⁰ Tura Pápruka nu_{in} je_a ikiamsamunam jimiará uwí pujusmiayi. Tura ashí aents nin iyutaj tusa wearmia nuna ni je_{en} itiaamiayi.

³¹ Tuma asamtai Papru arantutsuk urukuk Yus akupeamunam ati, Uunt Jesukrístu túramur_{in}cha ashí etserkamiayi. Nútiksa_n etserkatniuncha Páprun penké suritkiacharmiayi.

Papru RÚMANMAYA SHUARAN papí akuptukma

Papru Rúmanmaya Yus-shuaran áatramania nu

¹ Wi Papru Jesukrístu takarniuitjai. Núnisan Yus achirak ni Shiir Chichamen etserkat tusa akatar akuptukmiayi.

² Nu Chichamun Yus yaunchu “akupkattajai” tímiayi. Núnaka Yúsnan etserin Yus-Papinium paant ujakarmiayi.

³ Nu Chichamnum Yus ni Uchirín áujmatui. Ayashijjiainkia Tawit weeanum akiiniamiayi.

⁴ Tura ni tishiir wakanjjiainkia Yusa Uchirínti. Tura ti kakarmaiti. Jaka-munmaya nantakmiajai nekas Yusa Uchiría nu, paant nekanamiayi. Niisha ii Uuntri Jesukrístuiti.

⁵ Ni túramujai Yus shiir enentáimturuk nu Shiir Chichaman etserkat tusa akuptukmiayi. Núnisan ashí nunkanmaya shuar nu chichaman umirkar Jesusa náarin shiir awajrsarat tusa akuptukmiayi.

⁶ Atumsha nuyá shuaraitrume. Tura Jesukrístunu ajasarat tusa Yus achir-makuitrume.

⁷ Ashí Yus aneamutirmincha Rúmanam matsatrum nuna ju papin áateajrume. Yus ti péñker awajtamsatniun wakerutmarme. Ii Aparí Yussha ii Uuntri Jesukrístusha waitnentrainia ásar imiatkinchanum ti shiir pujustinian yainmakarti.

Papru Ruma péprunam irautinian wakerimiania nu

⁸ Émkasha, átum Yus nekas enentáimtamun ashí nunkanam áujmatenan nekaan Jesukrístun pachisan Yúsán ti shiir yumisajai.

⁹ Tuke enentáirjai Yusa Uchirín ashí shuarnum etsertajai. Túrakui wi atumin ti Yus aneamutirmincha Rúmanam matsatrum nuna ju papin áateajuke áujtamun Yus nékarui.

¹⁰ Ashí tsawant ni wakerutakuinkia íitjarum tusan Yúsán seajai.

¹¹ Nekas íitniun wakerajrume. Nuí jean wakanmin yainkian Yusjai kanakchamin ajasúk tusan wakerajrume.

¹² Kame atumsha tura wisha Yus nekas enentáimtuinia asar mai ikiakánai ajatai tusan wakerajai.

¹³ Yatsurú, tuke íitjarum tusan wakerimjiarme. Túrasha iyatsjarme. Kame Yus-Chichaman ujaakun chíkich shuarnuma áintsan atumíincha Yus kakaram takasman wáinkiatniun wakerajai.

¹⁴ Wikia Yus akuptuku asamtai ashí shuaran ujákártinaitjai. Unuimiaruncha tura unuimiarchancha, ti nékainia nunasha tura nékachuncha, métekrak ujakartinaitjai.

¹⁵ Tuma asan atumniasha Rúmanam pujarmena nunasha Uwempratin Chichaman ujaitjarum tusan pujajai.

Uwempratin Chicham kakarmaiti

¹⁶ Nu Shiir Chicham Yusa kakarmarjjai ti kakaram asa ashí shuaran uwemtikramniaiti. Tuma asamtai natsantatsjai. Nekas Israer-shuarnasha tura chíkich shuarnasha núnisan uwemtikramniaiti.

¹⁷ Nu chichamnum Yus enentáimsamia nu páantaiti. Júiti: Áyatik Yúsán nekas enentáimtuiniakui Yuska “péñkeraitme” tíminiaiti. Yus-Papiniumsha núnisan

tawai: “Yúsan nekas enentáimta nuna Yus “pénkeraitme” tutai tuke Yusjaj shiir wekasattawai.” Tu áarmaiti.

Aentsu tunaari

¹⁸ Shuar nekas chichaman nakitrar yajauchin túrataj tusar suriimiainiawai. Túrawar tuke tunaarintin áiniawai. Nu shuaran Yus ti kajerkar ti asutiátniun nayaimpinmaya paant awajsaiti.

¹⁹ Tura nu shuarka ashí Yusna nekaamnia nuna Yus paant awajsa asamtai pénker nékainiawai.

²⁰ Kame yámankamtaikniumia Yus wáinchataitiat ni najanamurijjai juka paant nekaamniaiti: Nekas Yus asa tuke kakarmaiti. Nusha ti paant asamtai nu shuar tsankurnarchartatui.

²¹ Yúsan nékainiyat shiir awajsacharmiayi tura yuminsacharmiayi. Tuma ásar aya ántra nunak enentáimtuiniak ni enentái tunaajaj piakai.

²² Tura ti nekajai tuíniyat enentáimcha núnin ajarai.

²³ Túmainiak jákachmin Yus imiá shiira nuna iniaisar shuar jakamnia nakumkamun shiir awajenawai. Tura nu arant nanamtinniasha napincha kuntinniasha yajasmáncha nakumkar nuna shiir awajenawai.

²⁴ Nu asamtai imiá yajauch enentáimiainiakui “ánik asati” tímiayi Yus. Túramtai ti natsanmainian túrunainiawai.

²⁵ Yusna imiá nekasa nuna nakitrar antsu wait-chichaman anturkar nuna túrin áiniawai. Tuke Yúsak shiir awajsatniun iniaisar antsu ni najanamun tikishmatainiak shiir awajenawai. “Antsu tuke Yúsak shiir awajnastí” tajai.

²⁶ Nuna túrin ásarmatai Yus natsanmainia nuna wakeruktinian tsankatkarmiayi. Túramtai nuwasha áishmanjai tsaniñtinian nakitrar nuamtak yajauch awajnainiawai.

²⁷ Núnisan áishmansha nuwajaj tsaniñtinian iniaisar nuamtak áishmankak tsanirmanainiawai. Ti wakerunainiak ti natsanmainia nuna yajauch túrunainiawai. Tura yajauch túruiniak ni ayashí wáitsatniunak sumamawarmiayi.

²⁸ Tura tuke Yúsan nakitiainia asamtai ti yajauch enentáimiainiak penké túrachminia nuna túrawarti tusa Yus tsankatkarmiayi.

²⁹ Nu shuar ti tunaajaj piaku áiniawai. Tsanirmausha aya kuítiniak wakerincha tura yajauch awajin áiniawai. Nu arantcha awakmakun kajerniusha mankartincha tuke máanaincha anankartincha pénkercha awajkartincha, tsanumniusha áiniawai.

³⁰ Nu arantcha chikichnasha yajauch áujmatin áiniawai. Yúsnasha naktiainiawai. Áimniusha áiniawai. Tura “pénkeraitjai” tiar nankaamantu enentáimtumainiawai. Tunáa túratniun eainiawai. Aparincha nukurincha umirainiatsui.

³¹ Enentáincha áiniawai. Tana nuna umichu áiniawai. Anenkartichu ásar waitnenkartichu áiniawai. Tsankurcha áiniawai.

³² Yuska “Shuar nuna túrinkia jákatniuiti” taman nékainiyat tuke túrukin wénawai. Tura nu arantcha chích yajauch túramtai ti shiir wararenawai.

2

Shuar tunáa túramun Yus paant nékawai

¹ Amesha enentáimtumastá. “Shuar nu yajauchin túrana nu imiá tunáa shuaraiti” tákumka amesha métek túrakum imiá nekas sumamame.

² Yuska nu tunaan túrin ainia nuna sumamtikiashtinkiait.

³ Amesha nuna túrin “imiá yajauchiiti” táyatam amesha métek túrakminkia Yus sumamtikiattana nuyá çitiurak uwemprattam?

⁴ Yus ti waitnentrama asa nu tunáa ikiukim Nin enentáimtustinian katsuntramuk nákarmawai. Tura péñker asa wárik asutiámchakui sumamashtiniaitjai ¿tu enentáimtumamek? Tu enentáimkium ni waitnentrammarí ántar awaj-saitme.

⁵ Tura tunaarum enentáimtutsuk tuke túrakmeka súmamtikiatin tsawantaj ti tunáa irutmampramujaj ti asutniáttame.

⁶ Nu tsawantaj ni túramujaj métek Yus ashí shuaran akirartatui.

⁷ Shuar tuke péñker túrak ashí shiira nunasha tura tuke amuukachmin ainia nunasha wakeruiniana nuna Yus tuke iwiaaku Nijijaj shiir pujustinian sústartatui.

⁸ Antsu péñkera nuna wakerutsuk antsu aya yajauchin wakeruiniak Yúsan nakitiainia nuna Yus ti kajerak asutiáwartatui.

⁹ Nekas Israer-shuarsha tura núnisan Israer-shuarchasha tunaan túrin áiniakka ti wáitsartatui.

¹⁰ Antsu nekas Israer-shuarnasha tura núnisan Israer-shuarchancha péñker túrin áinia núnaka Yus ti shiir imiatkinchanum apusartatui.

¹¹ Yus ashí shuaran akantsuk mai metek iyawai.

¹² Shuar Muisais akupkamun nékatsuk tunaan túraka aya júnisan sumamawartatui. Tura shuar Muisais akupkamun nékayat tunaan túranka nu akupkamujaj sumamawartatui.

¹³ Akupkamun aya antukarua nuka Yusaj péñker áiniatsui antsu antukar umirainia nuna Yuska “péñkeraiti” tawai.

¹⁴ Israer-shuarchaka Muisais akupkamun takakainiachkusha aya ni enentáijaj nu akupkamun umirainiak

¹⁵ nu umireamujaj Yus nu akupkamun ni enentáin ikiursarua nuka paant nekaamniaiti. Nujaj métek túruiniak shiir enentáimiainiawai. Tura métek túruiniachkunka péñkercha enentáimiainiawai.

¹⁶ Wi Uwempratin Chichaman étsereaj nuj ashí shuar uukrishasha túramun ashí paant awajsartatui. Tura nuna etserkatniun Jesukrístun anaitiukmiayi. Nu tsawantaj tunaan túrin sumamawartatui.

Israer-shuarsha Muisais akupkamun umircha áiniawai

¹⁷ Ámeke “Tura Israer-shuaraitjai. Muisais akupkamun takakkui winia Yúsruka ti shiir enentáimturui, tátsumeash.

¹⁸ Yus wakeramuncha nékajai. Tura akupkamun nekaan péñkera nuna wakerajai, tátsumeash.

¹⁹ Wakannium kusuraru áinia nunasha jintintiamniaitjai. Tura tsáapninian nekamtikiawarminiaitjai, tátsumeash.

²⁰ Akupkamu ti penker neka asan nekasa nuna unuimiaruitjai. Tuma asan nékachuncha ántuiniachuncha jintintiamniaitjai” tátsumeash.

²¹ Pai, chíkichka unuiniatimesha ¿urukamtai imia ámeke unuimiatsum? “Kasamkashtiniaiti” tu étsereatsmek. Táyatmesha ¿urukamtai ámeke kasamam?

²² “Tsanirmashtiniaiti” tátsumek. Enta, ¿urukamtai ámeke tsanirmam? “Ántar-yusan nakitiajai” tátsumek. ¿Urukamtai ámeke nu yusa jeeniã kasamam?

²³ Akupkamun takakjai tusam shiir enentáimtumayatam nu akupkamu umireachkum Yus yajauch awajeatsmek.

²⁴ Yus-Papiniumsha núnis áarmaiti: “Átum péñker umirchamujaj Israer-shuarcha Yúsan yajauch chicharainiawai.”

²⁵ Muisais akupkamia nu ashí umireakmeka nii timia núnismek tsupirnak-tin péñkeraiti. Tura takamtsuk umireachkumka tsupirnakcha núnisketme.

²⁶ Chíkich shuarsha tsupirnakchaitiat Muisais akupkamun umireakka tsupirnatskesha tsupirnakua áintsankete.

27 Nu shuar tsupirnakchaitiat akupkamun ashí umireak atumin tsupirnakutirmin akupkamu takakuitiatrum umircha asakrumin súmamtikramawartatui.

28-29 Kame nekas Israer-shuarka aya pátatkechu antsu tuke enentáijjai Yúsnan wakera núiti. Núnisan nekas tsupirnakinkia aya ayashíjainchuiti antsu enentáiniam shiir átinia núiti. Nekas akupkamu aya áarchamuiti antsu nekas enentáijjai umirkamua núiti. Nekas tú tura núnaka aents shiir enentáimtuiniachkuisha Yus shiir enentáimtawai.

3

1 Núnis aisha Israer-shuar ainia nu ¿warí péñkernak takakainia? Tura tsupirnaktincha ¿wariniak yayá?

2 Ti péñkeraiti. Warí, émkaka, Yus ni chichamen Israer-shuaran súsacharmakia.

3 Kame chíkich chíkich umichu áiniakui Yus tsan̄katkamia nuna nú shuaran súsachmatainkia nuikia “Yus umichuiti” ¿títinkiait?

4 Péñkea. Antsu Yuska nekas túratniua nujai métek ashí túriniaiti. Shuar umichu áiniakuisha ni támarin mash umiktatui. Ni tamajai shuáran wáitrin awajeakka nusha péñkeraiti. Núnisan atí. Yus-Papisha métek tawai:

“Támena nuna “imiá nekasaiti” tiartatui, tura súmamtikramataj tuíniakuisha nupetmaktatme” tawai.

5 Nu arantcha, “Wi tunaan túramujai Yus imiá péñkera nuna paant awajeakka ¿urukamtaí winia asutiua? ¿Nuka péñkerkait?” tíchatapash. (Kame aents chichainia núnisnak tajai.)

6 Warí, Yus péñkerchaitkiun̄ka ¿itiurak ashí shuara tunaarin súmamtikiawarat? Kame imiá péñkeraiti.

7 Núnisan, “Wi umirkachmajai Yus tuke umiiniana nuna paant awajeakna nuikia nujai in shiir awajsamtaí ¿urukamtaí “tunaitme” túruta?” tíchatapash.

8 Warí, “tunáa túramujai Yúsan péñker awajeajai,” tú nekas enentáimpramniaitkiuin̄kia shuar nuikia “Wats, ashí péñker áti tusar tunáa túratai” tímin ainti. Kame chíkich shuar in kajertamainiak “nuna jintintiniawai” túramji. Nu shuar sumamawartin áiniawai.

Ashí shuar tunáa túraitji

9 Nuikia Israer-shuartikia chikichjai nan̄kaamas ¿péñkerkaitiaj? Peñkesha. Warí, Israer-shuartisha Israer-shuarchajaisha ashí métekrak tunaan túrin áiniawai. Núnaka jú áarmajai paant awajsaitjai.

10 Yus-Papisha núnisan tawai:

“Péñkeran túrin chikichkisha atsawai.

11 Yúsnan nekaatniun nakitiainiawai. Yusnasha eainiatsui.

12 Yusnumia kanakiar men̄kakatniunam wénawai. Chikichkisha péñkeran túrin pen̄ké atsawai.

13 Ashí yajauch chichainiak iwiarsamu yama urainiua núnisan áiniawai. Ni chichamejai tuke anan̄kartin áiniawai. Chichame napía áintsan̄ najamin áiniawai.

14 Aya yajauchin kakaram áujmatin áiniawai.

15 Máataj tusa wárik yujarin áiniawai.

16 Aya ti itiurchat ti yajauch awajin áiniawai.

17 Shiir pujustinian nékainiatsui.

18 Ishichkisha Yúsan ashamenatsui.”

19 Yaunchu akupkamun umirkatin ainia nú shuar aya

tákamtak umirkatin áiniawai. Tuma asamtai ashí shuar umirkachu ásarmatai Yus nujají súmamtikiawartatui. Túrakui niisha pachischamin áiniawai.

²⁰ Akupkamuka aya ii tunaarín paant awajturmají. Tuma asamtai akupkamu péñker umirkatniujají Yus “péñkeraitme” turamchamniaitjii.

Aya Yus shiir enentáimtusar uwempramniaitjii

²¹ Yus-Chicham yaunchu áarmanum itiura Yus in “péñkeraitme” túramminiaitjaj nuna paant tawai. Kame akupkamujajinchuiti.

²² Antsu iisha ashí shuarsha núnisan aya Jesukrístu shiir enentáimtakrin Yus “péñkeraitme” túramminiaitjii.

²³ Kame ashí shuarti tunáa túraitjii. Tuma asar Yusjají métek péñker ajastin penké jeatsjii.

²⁴ Tura Yus in waitnentrana asa kuítchajají “péñkeraitme” túramjii. Jesukrístujají uwemtikrampra asa túramjii.

²⁵ Tura Krístun akupkamiayi ni jakamujají ashí tunaan asakátratniun. Túramtai shuar Nin nekas enentáimtuiniakui Yus tsañkuramniaitii. Yaunchu tunáa túramun katsunteak enentáimtuschiayi. Yamái tsañkuramnia nuna yaunchu nekáa, nuna túramniuyayi.

²⁶ Tura yamaiya tunaancha tsañkureak ashí shuar Jesusan nekas enentáimtuinia nuna “péñkeraitme” tuke tíminiaitii. Krístu jakamujají nuka paant ajasai.

²⁷ Nújajínia ii péñker ajasjinia nu “winia kakarmarjají túrunajají” tíchamnia asar ¿nañkaamantu enentáimtumarminkaitjají? Penkesha. Warí, akupkamu umitsuk aya Krístu nekas enentáimtakrin Yus “péñkeraitme” túramjii.

²⁸ Nujají páantaitii. Akupkamu umirtsuk aya Jesukrístu shiir enentáimtakrin Yus “péñkeraitme” túramminiaitjii.

²⁹ Warí, Yuska Israer-shuarnasha tura núnisan Israer-shuarchancha mai ni Yúsrinchukait.

³⁰ Kame aya chikichik Yúschakait. Tura tsupirnakuncha tsupirnakchancha mai metek aya Jesukrístun nekas enentáimtuiniakui “péñkeraitme” tíminiaitii.

³¹ Shuar Yúsan shiir enentáimtamujají péñker ajastin áiniakui nujají ¿akupkamu ántar awajsamukait? Atsá. Antsu nuna nañkaamas umirkatin awajsamuiti.

4

Apraámsha Yúsan shiir enentáimtamujají péñker ajasmania nu

¹ Ashí Israer-shuara uuntri Apraám enentáimtustai. Niisha ¿itiurak Yusjají péñker ajasma?

²⁻³ Ni péñker takasmajají Yusjají péñker ajasuitkiunka nañkaamantu enentáimtumaraintii. Antsu Yus-Papí tawai: “Apraám Yúsan shiir enentáimtakui Yus “péñkeraitme” tímiayi” tawai. Nu túramu asa Apraámsha Yus ímmianum nañkaamantu enentáimprachminiaitii.

⁴ Shuar íniamna nu takasmatai ¿aya tsañka asam akiktatmek? Warí, ni takasmanum páchitsuk akikchatniukait.

⁵ Antsu shuar ni péñker turamurjii enentaimtsuk áyatik “Yus tunáa shuaran péñker awajniuiti” tu enentáimtakui Yuska tsañka asa “péñkeraitme” tawai.

⁶ Tura péñker túrachunak Yus “péñkeraitme” takui nu shuar shiir warasminiaitii. Núnisan tawai uunt akupin Tawit:

⁷ “Shuar ashí ni tunaarín Yus asakátar tsañkuramu ana nuka shiir enentáimpramniaitii.

⁸ Uunt Yus ni tunaarín enentáimtachma asa ti warasminiaitii.” Tu tímiayi Tawit.

⁹ ¿Aya tsupirnakukeash warasminiait? Tura tsupirnakchasha waraschaminiait. Warí, Apraám Yúsan shiir enentáimtakui Yus “péñkeraitme” tímiayi.

10 Tura Apraám tuke tsupirnatsaïn Yus nuna tímiayi. Emka Yus “pénkeraitme” timia nú ukunam Apraám tsupirnakmiayi.

11 Apraám tsupirnatsuk Yúsan shiir enentáimtusmatai Yus “pénkeraitme” tusa “tsupirnaktiniaitme” tímiayi. Nújainkia ashí Yúsan shiir enentáimtuinia nú shuar tsupirnatskesha Apraám weeá ániawai. Tura nu shuaran Yus “pénkeraitme” tawai.

12 Tsupirnakusha aya tsupirnakusa Apraám weeá ániatsui antsu nu arant Apraámjai métek Yúsan shiir enentáimtuinia nuka Apraám weeá ániawai. Kame Apraám tuke tsupirnatsuk Yúsan shiir enentáimtusmiayi.

Yus shiir enentáimtamujaí Nii timia nu uminkiattawai

13 Yaunchu Apraáman Yus chicharuk “Amincha amée weeá shuarnasha jú nunkan susattajai” tímiayi. Nunasha Apraám Yus akupkamun umireakui tíchamiayi. Antsu Apraám Yúsan nekas enentáimtakui Yus “pénkeraitme” taku nuna tsan̄katkamiayi.

14 Kame aya akupkamun umirniun súatniuitkiuin̄kia nuikia Yus enentáimtustin ántrai. Tura Yus Apraáman timia nusha ántrai.

15 Akupkamu akui shuar umirkachka ti asutniáshtatuak. Tura atsakuin̄kia ¿asutniátniukait? ¿Itiurak umirtsuk ikiuktiñ?

16 Tuma asamtai Yus ti anen̄kartin asa Nin nekas enentáimtuinian ashí tsan̄katkai. Nújainkia Apraám weeasha Yus Apraáman timia nuna páchitsuk wáinkiártatui. Iisha Apraámjai métek Yus nekas enentáimtakur ní weeitji. Tuma asamtai Muisais akupkamun umirniuncha tura umirniuchuncha mai metek ashí in Yus ashí Apraáman timia nuna tsan̄katramkattaji.

17 Kame Yus-Papinium Apraám áatramuiti: “Untsurí shuarsha amée weeá ajasartatui.” Nu asamtai iisha Apraámjai métek Yus shiir enentáimtakrinkia Yus incha Apraám weeá áintsan̄ írmaji. Nú Yuska ti kakaram asa jakancha iwiaaku awajniuiti; tura atsana nunasha ana nútiksan̄ nájani.

18 Yus “ti pampañtatme” takui Apraám ti uuntach áyat Yus timian enentáimtak yajutmartinian nákasmiayi. Nujai untsurí shuar ní weeá ajasarmiayi, Yus timia áintsan̄.

19-20 Apraámsha sian̄ (100) uwí takakuiat tura ni nuwé Sarasha júretsuk uunt ajasmataisha tuke iniaitsuk Yus timia nuna nekas enentáimtusmiayi. “Yus nekasash ta” tútsuk shiir awajsamiayi. Nujaiisha nuna nan̄kaamas kakaram ajasmiayi.

21 Tuma asa “nekas Yus tana nuna páchitsuk umiktatui” tu enentáimpramiayi.

22 Nu asamtai Yus “pénkeraitme” tímiayi.

23 Tura Yus nekas enentáimtamunam Yus “pénkeraitme” tana nu aya Apraámnaak áatrachmaiti.

24-25 Antsu incha túramji. Iisha núnisrik ii Uuntrí Jesus nekas enentáimtakrinkia Yus incha “pénkeraitme” turamtatji. Jesuska ii tunaarín jarutramkatniun surunkamiayi. Tura nujai Yus in “pénkeraitrume” taku Jesusan ataksha iniantkimiayi.

5

Yus “pénkeraitme” túramkurin shíiraiti

1 Tuma asamtai Yus nekas enentáimtakrin Yus “pénkeraitme” túramji. Nujai iisha Yusjai shiir nawamnaikiar pujaji. Núnaka ii Uuntrí Jesukrístu ni jakamujai sumartamkamiaji.

2 Tura Nii shiir enentáimtakur Yusaj weankaitji. Tura Kristu jaru-tramkakin Yus ti anenmaji. Tura tuke anenma asakrin Niijaj métek shiir ajastin nákakur waraaji.

3 Nu arantcha yamá itirchat pujayatrik nu itirchatjaj unuimiartatji tusar waraaji. Katsuntratniuncha unuítiamji.

4 Tura nu unuimiarar ii katsuntramu paant átatui. Tura nuyá Yus ti shiir awajtamsattajnia nuka shiir enentáijaj nákastatji.

5 Nu ti shiir enentáimsar nákamujaj ananmamtsuji. Yuska ni Shiir Wakanin ii enentáin pujurtamuk ni anenkartutairin ti paant awajturmajj. Tuma asamtai Yus túratin nákaajnia nu imiá nekas wainkiattaji.

6 Iikka penké uwemprachmin asakrin tsawant jeamtai Kristu ashí shuara tunaarin jarukmiayi.

7 Shuar chíkich shuara uwemtikratniun ¿jaruktatuak? Pénker shuar ain jarukchattawai. Kame ti penkeraitkiuinikia jarukchaintiash.

8 Antsu ii tuke tunáa árinin Kristu jarutramkamiaji. Nujaj in ti anenmajnia nuna ti paant iniakturmaji.

9 Tura ni numpejaj tunaarinja awajsamu asar imiá nekas Yus asutiámatniua nuyá uwempraitji.

10 Yusa nemasri áyatar Yusa Uchiri jakamujaj yamaikia Yusjaj shiir nawamnaikar pujaji. Nu arant nuikia Kristu tuke iwiaaku asa iijaj tsaninkiu asa ashí yajauchinmaya uwemtikramar tuke shiir awajtamsattaji.

11 Ii Uuntri Jesukristu jakamujaj Yusjaj shiir nawamnaikia asar ti waraaji.

Atansha tura Krístusha túrawarma

12 Ayu. Yámankamtaik emka áishman Atan niniki tunaan túramtai nú tunaajaj ashí shuar tunaarintin ajasarmiayi. Tura ashí tunaarintin ajasar mash jákatin ániawai.

13 Akupkamu atsakuinikia umirkachma nekaachminiaiti. Tuma ain Muisais akupkamu atsajsha tuke tunaan túrin ármiai.

14 Atan pujumia nuyá Muisais tuke akupeatsain shuara tunaari paantcha ain ashí shuar tunaan túrawar jákarmiayi. Kame ni tunaari Atanna áintsachauyayi. Atanka Yus akupkamu paant ujakman umirkachmiayi. Antsu nu shuar Yus akupkamu paant nékainiachiatan tunaan túrin ániak jákarmiayi. Tura Atanka Krístujaj apatkar enentáimpratai.

15 Atan tunáa túramia nujaj apatka iisam, Yus in tsankatramaj nuka nankaamas penkeraiti. Kame Atan niniki tunaan túramujaj ashí aents untsurí armia nu, tunaarintin ániak, jákarmiayi. Tura Yus in ti anenma asa chikichik áishmanjaj nuna nankaamas tí shiiran tsankatramaji. Jesukristujajinikia untsurí shuara uwemtikrar ti shiiran tsankateawai.

16 Atanka tunaari imiá yajauch ain nuna nankaamas penkeran Yus tsankatramkaitji. Iis, aya chikichik tunaan túramujaj aents sumamawarmiayi. Antsu Yus uwempratniun tsankatramaj nújajinikia ti untsurí tunaan asakáruiti, tura “penkeraitme” túramji.

17 Chikichik áishman tunaan túramujaj aents jákatin ániawai. Tura nuna nankaamas chikichik áishman Jesukristu túramujaj ti shiir pujustatji. Kame Yus ti anenma asa ii penker túratsrinin “penkeraitrume” túramji. Nu asamtai yamaram iwiaakmanum kakaram ajaji.

18 Atan tunaan túramujaj ashí tunaarintin ajasar jákarmiayi. Núnisan Jesukristu penker túramujaj ashí shuar Yus “penkeraitme” timia nuka yamaram iwiaakmajaj tuke pujusartatui.

¹⁹ Núnisan chikichik áishman umirkachmajai untsurí tunaarintin ajasarmi-ayi. Tura chikichik áishman umirkamujai untsurí shuar péñker awaj-nasarmiayi.

²⁰ Wats, tunáa ti paant atí tusa Yus ni akupkamurin susamiayi. Túrasha ti tunáa pampaakui Yus nuna nankaamas waitnentramak nu tunaan asakátramji.

²¹ Shuar tunaan túrin ásar jákatin ármiai. Tura núnisan ii Uuntri Jesukrístu túramujai Yus in “pénkeraitrume” túramkurin iisha tuke iwiaaku pujustiniaitji.

6

Krístujai jaka asar tunáa túrachminiaitji tura Krístujai tsaniñkiu asar iwiaakuitji

¹ Núnisaitkiuinikia Yus nankaamas waitnentrampratai tusar ¿tunáa túrattajik?

² Péñkea. Warí, iikia tunáa túrashtin jákaitji. Jáka ¿itiurak tunaan túramniait?

³ Imianniutikia Krístujai tsaniñkiu asar imianir Niijjai métek jaka áintsar aji.

⁴ Tura imianir Krístujai jaka áintsar métek iwiarnasuitji. Tura Yus ti kakaram asa Krístun jakan iniantkimia núnisan incha nu kakarmajai yama-ram enentájjiai péñker wekasatniun iniantamkimiaji.

⁵ Krístujai tsaniñkiu asar Niijjai métek jaka áintsan ketji. Tura núnisan Niijjai métek nantaktiniaitji.

⁶ Yaunchu enentáimtainkia Krístujai métek jaka asantai ii yajauch wakerutain emenkatrutmakuitji. Tuma asantai yamaikia penké umirkashtiniaitji.

⁷ Kame ¿jáka ¿itiurak tunaan túrat? Yamaikia ankant ajasuitji.

⁸ Iisha nekas Krístujai jákaiťkiurkia Niijjai métek tuke iwiaaku pujustin enentáimji.

⁹ Kame Krístuka chikichkí jaka nantakin asa atakka jákashtatui. Túmaitkiui atakka ajakrachminiaiti.

¹⁰ Kristu chikichkí jaka asa ashí tunaajai itit awajsachmin ajasuíti. Tura yamaikia iwiaaku pujá asa Yúsan shiir awajsatniun pujawai.

¹¹ Atumsha núnisrumek jaka áintsarum tunáa túrachmin enentáimtumastarum. Antsu ii Uuntri Jesukrístujai tsaniñkiu asarum iwiaaku pujakrum Yus shiir awajsatarum.

¹² Nu asantai tunaaka ayashmijn akuptamkashtiniaitrume. Ayashí wakeramurj umirkashtiniaitrume. Ankantaitrume.

¹³ Atumi ayashí tunaan túrat tusarum ikiasairap. Antsu jakamunmaya nantakin asarum Yus wakeramu túratin surumaktarum. Tura ayashmisha aya péñkernak túratí tusarum Yus íktustarum.

¹⁴ Akupkamu umirkatniujai iwiaaku pujatsrume. Antsu atumin Yus ti anenma asa yamaram iwiaakman suramsaitrume. Tuma asantai yamaikia tunaaka nupettamkachminiaiti.

Tuke umireajnia nuna takarniurintji

¹⁵ Nuikia akupkamu umirtsuk antsu Yus ti anenma asakrin iwiaaku pu-jakur ¿“Páchitsuk tunaan túramniaitjai” títiatjik? Péñkea.

¹⁶ Tuke umireajnia nuna takarniurintji. Nuka nékatsrumek. Tura ni takarin ajasam umirkatniuitme. Tuma asantai tunáa umirkurkia ni takarniurintji tura umirkar jakattaji. Tura Yus umirkurkia péñker wekasattaji.

¹⁷ Atumsha yáunchuka tunáa umirniuitiatrum ikiukrum yamaikia nekas chicham antukurmena nu nekas atumí enentájjiai umirkaitrume. Tuma asantai Yus ti yuminsatniuiti.

¹⁸ Yamaikia tunaanumiã ankant ajasu asarum ti pênker wekasatniunam pachiinkiaitrumé.

¹⁹ Paant nekaak tusan takarniun pachisan tájarme. Wats, yaunchu atumí ayashí muǰmiainian tura ashí yajauchin túrat tusarum tsankamakmarme. Núnisrumek yamaikia atumí ayashí pênkeran túrat tusarum tura tuke Yusjají shiir wekasat tusarum tsankamaktarum.

²⁰ Atumsha tunáa umirniuyarme nuikia pênker wekaichauyarme.

²¹ Tura nújaisha ¿warí pênkerna yáinmakmarum? Iista, yamá natsanmainchakait. Nusha jákatniunam júawai.

²² Antsu yamaikia, tunaanumiã uwempra asarum Yus umirniuitrumé. Antsu júka Yusjají shiir wekasatniunam júawai tura nuyá tuke iwiaaku pujustatrumé.

²³ Tunáa takarkumka tuke jákatniun akirmaktatui. Antsu Yuska iikia takaatsriniñ penké ántar tuke iwiaaku pujustinian suramsattaji. Ii Uuntri Jesukrístujají tsaniñkia pujá asakrin nuna túrutmattaji.

7

Akupkamujají ankantaitji

¹ Enentáimpratarum yatsuru. Jákaaka akupkachminiaiti. Aya iwiaakna nu akupkamniaiti. Nu paant nékatsrumek.

² Wats, nuwá nuátkamu ni aishri iwiaakkui niijjají tsaniñ pujustiniaiti. Tura aishri jakamtaí ankant ajawai.

³ Tuma asamtaí aishri iwiaakañ chíkich áishmanjají tsaniákka tsanirmawai. Tura ni aishri jakamtaí chíkich áishmanjají páchitsuk nuatnakminiaiti tura nuikia tsanirmatsui.

⁴ Núnisrumek atumsha, yatsuru, Kristu ayashí muchitmarí ajasu asarum akupkamu emettachmin jaka áintsarum ajasuitrumé. Túrakrum Krístujají nuatnaikiatin áintsarum ankantaitrumé. Niisha jakamunmaya nantakniuiti. Yamaikia Krístunu ajasu asar Nijjají tsaniñkiar Yus wakeramu pênker túratniuitji.

⁵ Yaunchu wakerutai umirniuyaj nuí akupkamu enentáimtusar nuna nankaamas yajauchia nu wakerimji tura jákatniunam juramkimji.

⁶ Antsu yamaikia akupkamu emettachmin jaka asar ankant ajasuitji. Túrunar akupkamu yaunchu áarma nu iniaisar yamaikia Yusa Wakaníjjají tsaniákur yamaram iwiaakmajají pênker wekasamniaitji.

Winia enentáirui tunáa ana nu

⁷ Núnisaitkiuñkia “Akupkamu yajauchiiti” ¿titiajiash? Atsá. Warí, akupkamuka tunaan ti paant awajeawai. Akupkamu “Chikichna wakerukaip” táchakuñkia wakerukchaajai.

⁸ Tura nu akupkamun enentáimtakui winia enentáirui tunáa ana nu ashí yajauchin ti wakerumtikrimiayi. Kame akupkamu atsakui tunaan ti enentáimtichaintjai.

⁹ Yaunchu akupkamun nékachkun nánkamsanak enentáimniuyajai. Tura akupkamun nekaan tunaan nekaamjai tura jaka áintsanak ajasjai.

¹⁰ Tuma asamtaí akupkamujají pênker wekasatniuitiatan umirkatniun tujintiakui aya jákatniunam jurukni.

¹¹ Kame tunáa wakerutañkia nu akupkamujají anankrua pênker iwiaaku pujustinian surutsuk nu akupkamujají jákatniunam jurukmiayi.

¹² Tuma asamtaí akupkamuka Yusna asa ti penkeraiti. Yajauchichuiti.

¹³ Nuikia ¿pénkera nu jákatniunam júrawak? Atsá. Antsu tunáa wakeruktin jákatniunam jurukmiayi. Nuna tura asa tunáa imiá yajauchia nu nekaamniaiti. Tura tunáa wakerutai pé_nker akupkamujai jákatniunam jurukmiatai, nujai Yus “tunáa wakerutai imiá yajauchiiti” tusa paant awajsamiayi.

¹⁴ Akupkamuka Yúsnaiti. Nu paant nékaji. Antsu wikia ayashna nuna wakerakun tunaan umireajai.

¹⁵ Kame túrajna nuna itiurchat enentáimtajai. Pé_nker túratniun wakeraj nuna túratsjai. Antsu nakitiaj nuna nekaska túriniaitjai.

¹⁶ Akupkamu pé_nkeran nekaan umirkatniun wakerajai. Túrayatnak umirchaitjai.

¹⁷ Tuma asamtai wíchaitjai tunaan wakerakun túrajna nuka. Antsu winia enentáirui tunáa wakerutai pujá asa nu túrumtikriniaiti.

¹⁸ Yaunchu enentáimtai winia enentáirui pujana nu penké yajauchiiti. Nuna ti paant nékaji. Tuma asamtai pé_nker túratniun wakerayatnak penké tujintiajai.

¹⁹ Pé_nker túratniun wakerayatnak túratsjai. Antsu tunaan nakitiaj nuna túrajai.

²⁰ Nu asamtai nakitiaj nuna túrakun wíchaitjai antsu winia enentáirui tunáa wakerutai pujana nu túriniaiti.

²¹ Júnisaiti. Pé_nker túratniun wakerakun aya tunaan ínkiuajai.

²² Nekas enentáijjai Yusa akupkamurin wakerajai.

²³ Tumaj yaunchu enentáimtai winia enentáirui pujurtak nupettawai tura nekas wakeraj nuna akirturui.

²⁴ Maa, ti waitiajai. Jú ayash wakeramujai jákatniunmaya ¿yaki uwentikrurat?

²⁵ Yuska ii Uuntri Jesukristujai túrutmamniaitji. Tuma asamtai Yúsan ti yuminkiajai. Ayu. Winia enentáirjai Yus akupkamun umirniuitjai. Antsu winia ayashrujai tunaan umireajai.

8

Yusa Wakaníjiai pé_nker wekasatin

¹ Jesukristujai tsaninkiarun Yuska “tunaan túrawar jákatniunam wémin áiniawai” tatsui. Nu shuar ni ayashí wakerana nuna umirtsuk Yusa Wakaní wakerana nuna umirainiawai.

² Jesukristujai tsaninkiu asakrin Yusa Wakaní nekas iwiaaku awajtam-saitji. Tuma asamtai tunáa túratniunmaya tura jákatniunmayasha ankant ajasuitji.

³ Ayash wakerutainkia, wi akupkamun enentáimtakui, nuna nankaamas tunaan wakerumtikrimiayi. Tuma asamtai akupkamuka yáinkiachminiuyi. Antsu akupkamu tujinkiamia nuna Yus túraiti. Ni Uchirín ayashtin awajas tunaan jarukat tusa akupkamiayi. Tura nujai ayash tunáa wakeramun nupetkamiayi.

⁴ Túramtai ii yamaikia ayash wakerana nu umirtsuk tura Yusa Wakaní wakeramu túrar akupkamu tana nu umirniuitji.

⁵ Ayash wakeramun umirainia nu, ayashnia nunak enentáimtuiniawai. Antsu Yusa Wakaní wakeramun páchinia nuka Yúsnan enentáimtuiniawai.

⁶ Ayashnia nuna enentáimtuinia nú shuar jákatniunam wénawai. Antsu Yúsnan enentáimtuinia nuka Yusjai shiir nawamnaikiar tuke pujusartatui.

⁷ Aya ayash wakeramun enentáimtuinia nú shuar Yusa nemasri áiniawai. Yus akupeamun nakitiainia ásar ni taman umirkatniun penké jeainiatsui.

8 Tuma asamtai shuar ni ayashí wakeramurí warareakka Yúsan shiir awajsachminiaiiti.

9 Tura átumka ayash wakeramu umirtsuk tura Yusa Wakaní pujurtamkurmin ni wakeramu enentáimtiniaitrume. Ashí shuar Krísturtin ainia nu ni Wakanin takaku áiniawai. Takakchaitkiunka nuikia Krístunuchuiti.

10 Tura Kristu atumin pujurtamkurminkia atumí ayashí tunaajají jakamnia ain Yus “pénkeraitme” túramu asamtai atumí wakanínkia nekas tuke iwiaakuiti.

11 Yus Jesukrístun jakan iniantkimiayi. Tuma asamtai ni Wakaní atumí enentáin pujurtamkurminkia Jesusan iniantkimia núnisan nu Wakanjají yamaram iwiaakmajají iniantamkittiarne.

12 Tuma asamtai, yatsuru, ayash wakeramu penké umirkashtiniaitji.

13 Ayash wakeramu umirniuitkiurmeka jakattarme. Antsu Yusa Wakaní pujurtamkurmin ayash wakeramu nupetkarmeka péñker wekasarum nekas iwiaaku áatrume.

14 Ashí shuar Yusa Wakaní timiajají métek wekainia nu, nu shuar nekas Yusa uchirínti.

15 Yusa Wakaní in pujurtamkurin Yusa uchirí ajasar sapijmiatsuk Yusají weamkar “Aparú” tímimniaitji.

16 Nu Wakan “nekas Yusa uchirínme” ii enentáin túramji.

17 Tura ni uchirí ajasu asakrin Yus tímia núnisan ashí Níiniun suramsattají. Krístun ashí susattana núnisan incha suramsattají. Yamái Krístunu takaakur wáitiakrikia ukunam Krístujají métek ti shiir awajnastatjé.

18 Maa, yamá ti wáitiakrishá ukunmanka nayaimpiniam ti shiir pujakur nu wáitsamu kajinmatkittiajé.

19 Tsawant jeamtai Yus ashí ni shuarin Niijají métek ti shiir awajsartatui. Nuin nekas Yusa uchirí ainia nu ti paant nekanattawai. Nu tsawantan wáinkiatniun ashí Yus najanamu írúnna nu ti nákainiawai.

20 Ashí Yus najanamia nuna yámankamtaik ti péñker najanamiayi. Túrasha yajauch ajasmiayi. Nusha ní neaskeka túrunachmiayi. Antsu Yus ukunam ataksha iwiarnartin atí tusa tunáa wayamunam yajauch ajasat tusa tsankatkamiayi. Tuma asamtai iwiarnartin tsawantan nákawai.

21 Nu tsawantají ashí Yus najanamu emesnartinniumiá uwemprartatui. Tura ashí Yus najanamuka shuar Yusa uchirí ajasarua nujají métek shiir awajnasar ankant ajasartatui.

22 Yamaisha ashí Yus najanamu ainia nu, nuwá jatema wáitia nunis ti wáitiainiawai.

23 Yus najanamuka ashí wáitiainiawai. Iisha Yusa Wakaní takakiatar ti wáitiajé. Tura Yusa Wakaní takakkur ashí Yus suramsattajnia nu nékajé achiktin. Tuma asar nekas Yusa uchirí paant awajnastin tsawant nákajé. Nuisha ii ayashísha ankant awajnastatui.

24 Nu tuke enentáimtuki wéakur takamtsuk uwemprattajé. Yamái nu wáinchiatar tuke nákajé. Warí, ¿wáinjinia nu nákajé?

25 Tuma asar tuke waincha asar katsuntrar nákajé.

26 Nu arantcha ii kakarmachu nekapeakrin Yusa Wakaní yáinmaji. Kame Yus áujsatniusha nékachkurin in yáinmaji. ¿Warí seattají tura itíur seatjé? Nu nékatsjé. Tura itíurchat pujakur ti wáitiakrincha Yusa Wakaní in áujturmajé.

27 Tura Yus ii enentáin enentáimtaj nuna nékaiti. Tuma asa ni shuari asakrin ni Wakaní ni wakeramujají métek seatramkurin ántawai.

Ti nupetmakuitji

²⁸ Yus anea asakrin ashí nankaatamjinia nujaj Yus pujurtamji. Tura nujaj péñker awajtamji. Nu paant nékaji. Tura Ni wakerimia núnisañ Ní shuar awajtamsaitji.

²⁹ Yámankamtaiknumiá in nekarmak ni Uchirí Jesukrístujaj métek ajasat tusa achirmakmiaji. Nujaj Yusa uchirí untsurí ajasji. Tura Kristu ii iwiajrinti.

³⁰ Tura Yus achikmia nuna Niiniu awajsamiayi. Tura nu shuaran “pénkeraitrume” tímiayi. Tura ti shiir awajsamiayi.

³¹ Wats, nuikia Yus in yáinmakrin ¿yaki in nupettamkattaji?

³² Ni Uchiríncha suritramkachmiaji antsu in jarutramkat tusa akupturmakmiaji. Tura asa ni Uchiríjjaj métek ti shiira nuna ashí suramsashtatjik.

³³ Yus achikmia nú shuaran ¿yaki sumantikiat? Yus Ápaka “pénkeraitrume” tiniu asa penké túrashtatui.

³⁴ Tura ¿yaki “jinium apenáti” titi? Warí, Kristu penké túrashtatui. Antsu nu shuaran jarukmiayi. Tura nantaki Yusa untsuurinj ekemas in áujturmajj.

³⁵ Kristu ti anenma asakrin in akantamkitin atsawai. Wáitiakrishá, itiurchat ínkiuakrishá, shuar áinframkurnishá, tsukamakrishá, entsatai atsakuishá, tsúumainjaishá, tura mantamnakrishá, nujaj “Kristu anentsui” tíchamniaitji. Nuka Kristu anenkrattairiya akantamkitin jeatsui.

³⁶ Yus-Papniumsha júnis áarmaiti:

“Amée-shuar asar tuke mantamnatin pujaji. Murik máatniua áintsañ enentáimturmajj.”

Tu áarmaiti.

³⁷ Tuma ajñ Kristu in anenma asakrin Niijjaj ti nupetmakuitji.

³⁸ Kristu anenkrattairiya akantamkitin penké atsawai. Nuna ti paant nékajaj. Jákatniushá, iwiaakmashá, nayaimpinmayá suntarshá, ashí nayaimpinmashá tura nunkanmashá akupin ainia nushá, yamá írunna nushá, ukunam átatna nushá,

³⁹ yaki írunna nushá, nunká írunna nushá, kame ashí Yus najanmu írunna nushá Yusa anenkrattairiya penké akantamkichminiaitji. Yusa anenkrattaijáshá ii Uuntri Jesukrístu túrunamujaj paant wainji.

9

Yus Israer-shuaran ni shuari arti tusa achikiarmiania nu

¹ Yamái tájana nu Kristu shuari asan imiá nekasán wáitruksuk tájaj. Winia enentáirsha tura Yusa Wakanísha “nekas tawai” turutainiawai.

² Israer-shuaran waitnentakun ti kuntuts enentáimjai.

³ Wíshuar áiniakui Krístunmayá kanakin yuminnaraintjai nujaj wíshuaran yáimniaitkiunka.

⁴ Israer weeá shuar áiniawai. Tura ni uchiría áinis Yus achikiaruiti. Yusa wincharíshá niijjaj pujumiayi. Yaunchu Chicham ni weatrijjaj iwiamuncha tura Muisais akupkamuncha susamiayi. Tura Yusa Jeen Nin shiir awajsatniun jintintiamiayi. Tura ukunam shiir tsankatkattana nunasha ujakmiayi.

⁵ Ni weatrin Yúsan ti péñker enentáimtin irunmiayi. Krístusha aents ajas nú shuarum akiiniamiayi. Krístuka Uunt Yus asa tura ashí akupin asa Ninji tuke shiir awájnastí. Núnisañ atí.

⁶ Kame Yus ashí Nii timia nuna Israer-shuaran súsachmataisha nujaj “Yus timia nu uminkiachuiti” tíchamniaiti. Antsu júnis enentáimpratniuiti: ashí Israer weeá áiniayatan Yusjjaj íismaka ashí nekas Israer-shuar áiniatsui.

⁷ Núnisañ Apraám weeá shuarshá ashí nekas ni shuar áiniatsui. Iis, Yus Apraáman tímiayi “Aya Isak pampanma amee shuarum ártatui.”

8 Nujai páantaiti. Shuar aya Apraam weeá akiinia asa Yus timian wáinkiashtiniaiti. Antsu Yus timiajai métek akiinia nu nekas Apraám weeá shuar áiniak Yus timian wainkiattawai.

9 Kame Yus Apraáman tímia nu júiti: “Tsawant jeamtai jeartiatjame, tura ame nuwem Sara Sara uchin takustatui.” Tu tímiayi.

10 Nu arantcha, ii weatri Isaka nuwe Ripikia jimiampramiayi.

11-13 Nu uchisha akiiniainsain pénkernasha tura yajauchincha túruiniatsain Yus Ripikian tímiayi: “Iwiairia nu ni patain umirkattawai.” Ataksha núnisan Yus ni Papirijn chichak “Jakupan aneakun Esaun nakitramjai” tímiayi. Nujainkia páantaiti. Yus wakerak aya ni enentáijiaín shuaran achikminiaiti. Nu shuar túrunamu enentáimtutsuk túramniaiti.

14 Túriniaitkiui “Yus péñkerchaiti” ¿titiyajash? Atsá.

15 Yus Muisaisan júnis tímiayi:

“Wi wakerajna nunak waitnentrattajai.”

16 Tuma asamtai shuar ti wakerakuisha tura kakaram takaakuisha aya nujai Yus waitnentatsui. Antsu aya ní enentáijiaín wakerak waitnentawai.

17 Ataksha Yus-Papinium tawai “Yus Ejiptu nunka akupniurín tímiayi

“Ámijiai ashí nunkanam winia kakarmarun nekaawarat tusan uunt akupniun awajsamjame” tímiayi” tawai.

18 Tuma asamtai Yus Nii wakera nuna waitnentawai. Túrasha Ejiptu akupniurín túramia núnisan Nii wakera nú shuaran enentáin kátsuram awajtawai.

19 Tura “Núnisaitkiuinikia ¿urukamtai shuaran Yus súmamtikia? turutchatapash. Nii wakerakuinikia ¿itiurkattajak?” turutchatapash.

20 Warí, aents asam Yusjai ¿tunaiminkiaitiam? Nuwá piniñkian nájankui núweka “¿urukamtai júnis najatam?” tíminkiait.

21 Nuwá wakerakka nu nuwejai amamkuncha tura yukunnasha nusháa takakmastinian mai najanachminkait.

22 Yajauch shuar ti asutiátin áiniak emesnartinnium wétin áiniawai. Yus nu shuaran asutiá ni kakarmarín iniaktustaj tayat ti katsuntramiai.

23 Tura katsunteak ni anenkrattairín iniakmasmiayi. Nú arant nuikia in waitnentrakmak shír enentáijiaí péñker awajtamkur ni anenkrattairí ti paantchakait. Nekas shír enentáijiaí péñker ajasat tusa yaunchu iwiartampramiai.

24 Tura incha, Israer-shuarnumiasha Israer-shuarchanumiasha, ni shuari ajasat tusa achirmakmijai.

25 Núnisan yaunchu Yúsnan etserin Useas Yus-Papinium tawai:

“Wíishuarchan Wíishuar awajsattajai. Aneachmancha aneamu awajsattajai.

26 Tura Yus “Wíishuarchaitrume” tímia nú shuaran “Nekas iwiaaku Yusa uchiríniuitrume” ukunam títiatui.”

Tu áarmaiti.

27 Antsu Isayas Israer-shuaran páchis tímiayi:

“Israer weeá ti nankaamas untsurí áiniayat penké ishichik uwemprartatui.

28 Kame Yus yajauchin akupkataj timia nuna takamtsuk wárik umiktatui.”

29 Núnisan Isayas ataksha tawai:

“Ashí akupeana nú Yus in waitnentrakmachkurninikia Sutuma péprusha Kura péprusha takamtsuk jákarmia núnisan jákaaji.”

Israer-shuar uwempratin chichamjai tujinkiarmania nu

30 Wátsek, Israer-shuarcha, Yus iisam ni túramurijiaí “pénkeraitji” tu enentáimtumainiachunak, Yuska, Nii enentáimtusam, “pénkeraitrume” tímiayi.

31 Antsu Israer-shuarka péñker akupkamun umiktinian wakeruiniayatan tujintiainiakui nujai péñker ajastinian tujinkiarmai.

³² ¿Urukantai tujinkiarma? Yúsan enentáimtutsuk aya ni péñker túramujají péñker ajastinian enentáimtuiniak tujinkiarmai. Krístun enentáimtustinian nakitiainiak shuar kan_kapen awan_kemtuktinia núnisan iniararmai.

³³ Tura kaya tukumkar iniarchamniakait. Nu asamtai Yus-Papinium Krístun pachis tímiayi:

“Seun péprunam kayan ikiujai, tawai Yus. Nu kayanam Israer-shuar tukumkar iniarartatui. Antsu Nin shiir enentáimtuinia nú shuar natsaarchartatui” tawai.” Tu áarmaiti.

10

¹ Yatsuru, Israer-shuar uwemprarat tusan ti wakerakun Yúsan áujtajai.

² Maa, uwempratniun nékachiatañ Yúsan shiir awajsatniun ti wakeruini-awai.

³ Túmaitiat shuáran Yus péñker awajsatniun nékachu ásar aya ni péñker túramujají péñker ajastinian wakeruiniawai. Tuma ásar Yus péñker enentáimtamujají péñker ajastinian jecharai.

⁴ Aya Krístu enentáimtamujají péñker ajastin asamtai akupkamu umirkatni-ujají péñker ajastin ántrai.

⁵ Akupkamujají péñker ajastinian pachis Muisais tímiayi: “Nuna takamtsuk umirniuka nujají péñker pujustatui.” Tu áarmaiti.

⁶ Antsu Krístun enentáimtus péñker pujustinian pachis shuar juna tíminiaiti: “Ti itiurchata áinis “¿Yaki nayaimpiniam waka Krístun itiarat?” tiirap,” tawai.

⁷ Tura ¿Yaki jakamunam we Krístun iniantkit?” tiirap” tawai.

⁸ Tura junasha tawai: “Yus-Chicham yúpichuch umirkamniaiti. Aya enentáimjají enentáimtakum wenumjají ujaktiniaitme.” Nu Chicham “Yus enentáimtustiniaiti” tawai. Nu Chicham tuke étsereaj núiti.

⁹ Yus Jesusan jakan iniantkimia nu enentáimtakum tura wenumjají “Jesus winia Úntruiti” takum uwemprattame.

¹⁰ Kame Krístu enentáimtakmin Yus “péñkeraitme” turamtatui nuyá wenumjají “Jesukrístun enentáimtajai” tákum uwemprattame.

¹¹ Ataksha Yus-Papinium tawai: “Nin shiir enentáimtuinia nú shuar natsaarchartatui.”

¹² Tuma asamtai ashí shuar, Israertisha Israerchasha, mai metek Yúsan shiir enentáimtuinia nuna Yus ti aneak ashí péñkeran súawai. Tura ashí métek ni Úntrinti.

¹³ Nu arantcha “Ashí shuar Uuntan áujea nu uwemprattawai” yáunchu Krístunun tu áatramuiti.

¹⁴ Tura Krístun enentáimtuiniachusha ¿itiurak Nin áujsarar? Tura Krístun nékainiachusha ¿itiurak Nin enentáimtusarar? Tura Yus-Chicham ujaachmasha ¿itiurak nekaawarat? Shuar Yus-Chichaman ujaktiniaiti.

¹⁵ Tura akupkachmasha ¿itiurak Yus-Chichaman ujarakar? Tura shuar Yus-Chichaman etserkataj tusa wéana nuna Yus-Papinium tawai: “Shuar Yusa Shiir Chichamen etserki weana nu ti shírchakait.”

¹⁶ Tura ashí shuar uwempratin chichaman ántuiniayatañ umirainiatsui. Isayasha yaunchu aak tímiayi:

“Uuntá, ¿yaki ii étserman antukaruit?”

¹⁷ Paantchakáit. Krístu túramu ujakam antuktiniaiti. Tura antukar Krístun shiir enentáimtustiniaiti.

¹⁸ Tura ¿Israer-shuar Yus-Chichaman antukcharu ásarañ Yúsan enentáimtuscharma? Atsá. Warí, Yus-Papí tawai: “Ashí nunkanam ni chichame antunkaiti.”

19 Tura “Israer-shuar nu chichaman antukariat ¿paant nekaawarmaashi?” inintrusminiati. Tura nekas nekaawarmai. Tuma asamtai Muisais tawai: “Israer-shuarchan nékachu ainiana nuna shiir awajeakun akajkattajrume.”

20 Nuyá Isayas ashamtsuk áarmiayi:

“Eatkacharua nu wáitkiarmiayi. Inintruiniatsajin wantintiukmiajai.”

21 Tura Israer-shuaran áujmatuk tímiayi:

“Tuke iniaitsuk Winin winiarti tusan nu shuaran untsúajai. Tura nakitrurar umirtuiniatsui.”

11

Chíkich Israer-shuarsha uwemprartatui

1 Tura Israer-shuar Yúsan umiiniachkui ¿Yus nin iniaisaashit? Pénkea. Warí, wi Israer-shuarchakaitiaj. Wi Apraámsha tura Pinjamin weeá akiini-achukaitiaj.

2 Yámankamtaiknumia Yus Israer-shuaran ni shuar arti tusa achikiu asa yamaikia iniaiashtatui.

Ti yaunchu Yúsnan etserin Erías Israer-shuaran pachis Yúsan áujtak tímiayi:

3 “Uuntrú, naman awasar Yus sútaincha mash saakiarai. Áminiun etserni-uncha mash máawarai. Tura wiki juakjai. Tura winiasha “mantuatai” turutainiawai.” Tu áujsamiai.

4 Tura Yus ayak tímiayi “Siati mir (7000) áishmankan Israer-shuarnumia apujtumsaruitjai. Nu shuar ántar-yus Páaran tikishmatrachu áiniawai” tímiayi Yus.

5 Núnisan yamaisha Yus ti waitnentainia asa ashí Israer-shuarnumia ni shuarin achikiuiti.

6 Yus ni enentájjiajin waitnentak túraiti. Nú shuar péñker tura asamtai waitnentatsui. Yus aya péñkernak waitnentakka nuikia waitneñkratchainti.

7 Ayu. Nuikia ashí Israer-shuar péñkeran eakarua aijn aya Yus achikmia nú shuar wainkiarmiayi. Antsu ni achikchamuka nuna nankaamas nekaach-min ajasar kusurua núnin awajnasarmiayi.

8 Yus-Chichamsha núnisan tawai: “Yus enentáimchatai enentáin súsarmiayi. Wáinmashtai jijncha tura ántushtai kuíshniasha súsarmiayi. Yamaisha núniskete.”

9 Tawitcha yaunchu aak tímiayi:

“Tuke tunáa túrin ásar namperan najanainiaksha achinkiar ti asutniáwarti.

10 Ni enentáin kusurarti tura wainmakcharti. Itiurchat ana nusha, káarak kijinia áintsan, tuke áentskatá.” Tu áarmiayi.

Israer-shuarcha uwempramin áiniawai

11 Watsek, Israer-shuar kayá tukumkar ¿tuke iniaararuk áinia? Atsá. Antsu Israer-shuar umirkachmajai Israer-shuarcha yamaikia uwempratin jeaini-awai. Nujai Israer-shuarsha nujai métek uwempratniun enentáimsartatui.

12 Israer-shuar umirkachmajai ashí shuar, Israercha ainia nusha, uwempramnia ajasarmiayi. Nuna nankaamas Israer-shuar atak Yúsan enentáimtuiniak uwemprarmatai nujai ashí shuar ti peñker ajasartatui.

13 Israer-shuarchatirmea, atumin uwempratin chichaman etserkatniun Yus akupkamu asan nu takatan ti takaajai.

14 Nuna túrakun átum uwemprarmena núnisan niisha, wíshuar ainia nu, nuna íisar uwemprarat tusan wakerajai.

15 Kame Israer-shuaran iniaisamujai ashí shuar Yusjai shiir nawamnaikiarmatainkia nuikia atak nin achikmajai jakamunmaya nantaktinia áintsan ti shiir átatui.

16 Emka apatuk ana nu Yus súakur yuminsamuitkiunka nuikia ashí apatkunam Yus yuminsamuiti. Núnisaṅ numí kankapé péṅkeraitkiunka numi takamtsuk péṅkeraiti.

17 Yuska chíkich chíkich Israer-shuaran, numí kanawen tsupik ajapniua áinis, iniaisamiayi. Tura nuyá atumin niisháa numinmaya árumniṅ nu numiniam anujtamkamarme. Nujai péṅker numijiai tsanínkrum nu kakarmajai iwiaakrume.

18 Tura kanawē tsupikmajai nankaamantu enentáimtumasaip. Warí, ame kakarmarmijiai numi wajatsui antsu ni kakarmarijiai iwiaakme.

19 “Túrasha wi anujnaktinian kanawen tsupikchamka” tíchainmeash.

20 Nekasaiti, túmaitiat niisha Yúsan enentáimtuiniachu ásar tsupinkiarmaiayi. Atumsha aya Yus nekas enentáimta asam anujnakuitme. Tuma asamtai nankaamantu enentáimtumatsuk aya anearta.

21 Yus nekas kanawē péṅkercha túrawarun tsupikkia páchitsuk amincha tsupirmakchamniakait.

22 Iista, Yus atumjai ti tsánkaiti tura Israer-shuar umichua nuna ti wari asutiaiti. Tura péṅker wáinmankata. Yus tuke nekas enentáimtachkurminkia atumniasha páchitsuk tsupirmaktatrum.

23 Núnisaṅ Israer-shuar ataksha Yúsan enentáimtuiniakui páchitsuk ataksha anujkachminkait. Nekas túrattawai.

24 Túram Israer-shuarcha asam niisháa numinmaya tsupikiar penké numiniam anujnakuitrume. Nuna tura asa nekas ni kanawē tsupikia ajapamun páchitsuk atak anujkamniaiti.

Israer-shuarsha uwempratin áiniawai

25 Yatsurú, nankaamantu enentáimtumaraírurum tusan yaunchu nekaachman ujaajrume. Júiti: Israer-shuarnumiáṅka chíkich chíkich Yúsan nekas enentáimtustinian nakitiainiawai. Tura aya Israer-shuarchasha Yus-shuar ajasarat tusa túrunamiayi.

26 Tura Israer-shuarchasha ti untsurí Yus-shuar ajasarmatai nuyá Israer-shuarsha ashí uwemprartatui. Tuma asamtai Yus-Papí tawai:

“Seúṅnumiá Uwemtikkiartin tátatui. Israernumiá tunaan asakátrattawai.

27 Jú Chichamnasha niijiai najanattajai: ni tunaarṅin asakturtatjai.”

28 Uwempratin chicham atumsha nekaatarum tusa Israer-shuaran Yus ni nemasrṅ awajsaruiti. Tura yaunchu ni weatrṅin achikiu asa nincha tuke anenawai.

29 Kame Yus amáa nuna ataksha ataṅtsui. Shuáran achiksha atak iniaiyatsui.

30 Átumka yaunchu Yus umirchauyarme. Tura yamaikia Israer-shuar umirainiachkui Yus atumin waitnentrarmarme.

31 Núnisaṅ nii yamaikia Yúsan umirainiatsui. Tura atumin waitnentrampamarum núnisaṅ nincha waitnentrattawai.

32 Nujai ashí métek sumamtikiak métek waitnentrar uwemtikrattawai.

33 Maa, Yus imiá shiirchakait. Tí nekachukait. Ni túramu penké nekaachminiaitji.

34 “Uunt Yus enentáimmian ¿yaki neka? Tura ¿ya Nin unuiniaruit.

35 Yaki Nin péṅkeran susa shiira nujai yapajniuit?” Tu áarmaiti.

36 Ashí najanamu ainia nu Yus najanamu áiniak Niiniu áiniawai. Tura Nin shiir awajsatniun najanawarma áiniawai. Yus tuke iniaitsuk shiir awájnástí. Núnisaṅ atí.

12

Yusai surumaktarum

¹ Atumsha Yus-shuar árumna nu, atumek Yusai surumaktarum. Yus ti anenma asakrumin nuna seajrume. Yaunchu Israer-shuar ni waakarín maa Yúsan suu ármiai. Atumsha núnisrumek iwiaaku árumna nuñ Nii túrutataj taku túrutati tusarum tuke enentáijjai Yusai tsankamaktarum. Yusai ísam ti shiir atí tusarum túratarum. Nu túrakrumka pátatkechu antsu ti nekas enentáimjai Yus shiir awajin átatrume.

² Chíkich shuar aya jú nunkanmaya ana nuna enentáimtusar wekainiawai. Tura átumka nu túrawairap. Antsu Yus winia enentáimmiarun yapajtiurat tusarum tsankatkataram. Nu túrakrumka Yus wakera nu nekaattarme. Ni wakeramusha yajauchichuiti antsu imiá nekas péñkeraiti.

³ Yus winia waitnentrak akatar akuptuku asamtai juna tájarme. Atumek wíkitiajtai tu enentáimtumatsuk jeamna nujai métek enentáimtumasta. Yus enentáimta asakmin takastinian suramsana nujai apatkam nekaamata.

⁴ Ii ayashí chikichkiitiat ii muchitmarí untsuríinti. Tura métekrak muchi-tiániatsui.

⁵ Núnisrik iisha, Yus-shuarti, ayashí muchitmaríya áintsarik untsuríitiatar chikichik ayashtinia áintsar takaaji. Nusha Krístujai tsaniñkiu asar áitkiamuitji. Túramu asar nuamtak atsumnaiyaji.

⁶ Ii túratniun Yus nusháa nusháa súramji Nii wakera nujai métek. Wats, Yus ámin suramsamna nu túratniuitme. Yus ni chichamen etserkatniun suramsaitkiuñkia Yus enentáimtakum unuimiarmam nujai métek etserkata.

⁷ Chíkich shuar yáintinian Yus suramsaitkiuñkia nekas enentáimjai yáintá. Unuiniartiniaitkiumka yawetsuk unuiniarta.

⁸ Chíkich shuar ikiakártiniaitkiumka nekas péñker ikiakárta. Súsatniuitkiumka shiir enentáijjai ementutsuk súsarta. Shuaran wáinin atí tusa Yus apuj-tamsaitkiuñkia ti enentáimsam túratá. Tura shuar itiurchat pujuinia nu yáintinian Yus suramsaitkiuñkia shiir enentáimsam túratá.

Yus-shuar túratniua nu

⁹ Nekas enentáijjai mai anenai ajatarum. Yajauch nakitrarum péñkera nu túratarum.

¹⁰ Nuamtak yachi asarum núnisrum mai anenai ajatarum. Chíkich wijjai nankaamas úuntaiti tu enentáimtunaistarum.

¹¹ Nakittsuk kakaram ajasrum ashí enentáimjai ii Uuntri wakera nu túratarum.

¹² Ukunam Yus tsankatramkattajnia nu enentáimtusum warastarum. Wáitiakrumsha katsuntratarum. Tuke iniaitsuk ashí túrunamujai Yus áujstarum.

¹³ Yus-shuar atsumainia nujai yáintarum. Írarsha péñker itiaatarum.

¹⁴ Yajauch awajtamainia nu shiir awajstarum. Yus yajauch yumíntsuk nu shuaran péñker túrawarat tusarum seattiarum.

¹⁵ Warainia nujai warastarum. Kúntuts pujuinia nujajisha úuttiarum.

¹⁶ Chikichik enentáijjai métekrak shiir enentáimtunaitiarum. Nankaamantu enentáimtumasairap. Antsu péjchach ajastarum. “Ti nekajai” tu enentáimtumasairap.

¹⁷ Shuar ámin yajauch awajtamkuisha nincha yapajkiataj tu enentáimsáip. Aents ísam péñker áminia nu amesha tuke túratá.

¹⁸ Ame jeamna nujai ashí shuarjai nawamnaikiam wekasata.

¹⁹ Yuska ni Papiirín juna áamtikramiai: “Wítjai tunaan asutiátniun. Wisha yapajkiattajai” tawai Uunt Yus. Tuma asamtai yatsuru, kajertamkuisha

atumsha yapajkiairap. Antsu yajauch awajtamkana nuna Yus íistí. Yus asutiáti.

²⁰ Tura nu arantcha tawai: “Ame nemasrum tsukamakuisha ayurata. Kitiamakkuisha umartin susata. Nu túrakum péñker ajachua nu iniatsaartatme.”

²¹ Yajauch nupettamkain. Antsu péñker túrakum yajauchia nu nupetkata.

13

¹ Akupniunka ashí shuar umirkatniuiti. Akupniuka Yus apujsamuiti. Yus apujwachma akupin atsawai.

² Tuma asamtai shuar akupniun umirtsuna nu, Yus apujsamun umireachu asa nekas asutniátniuiti.

³ Kame akupniuka péñker shuar sapijmiakarat tusar apujwachma áiniawai. Antsu yajauch shuar ashamkarat tusar apujsamu áiniawai. Nii ashamsuk pujustin wakerakmeke péñker túratá. Túrakminkia akupin shiir enentáimturmartatui.

⁴ Yainmakat tusa Yus apujsamuiti. Antsu yajauch túrakmeke akupin nekas ashamkatniuitme. Warí, Yus ántar apujwachmaiti. Tunáa shuaran asutiátniun Yus apujsaiti.

⁵ Nu asamtai akupin tuke umirkatniuiti. Aya asutiáwain tusar umirkashiniaitji. Antsu shiir enentáijai wekasatin umirkatniuiti.

⁶ Tuma asamtai núnisan akupniun kuit súsatniua nu páchitsuk susatarum. Nu takatan pujursarat tusa Yus apujsaruiti.

⁷ Ashí túratniua nu túratarum. Akitiniaitkiumka páchitsuk akikta. Akupniusha uuntcha ashí núnisan írunna nusha shiir enentáimtikratarum.

⁸ Kuitjai tumashrintin airap. Antsu mai anenai tuke ajatarum. Chíkich shuar aneakum nin péñker túrattame. Túram ashí akupkamu páchitsuk umirkattame.

⁹ Akupkamusha tawai: “Tsanirmawaip, mankartuawaip, kasamkaip, chíkich shuar tsanumpruraip, chíkichna wakerutkaip” tawai. Tura nusha ashí chíkichik chichamjain tímniaiti: “Ame ayashim aneam núnismek ashí shuar aneata.”

¹⁰ Shuar chíkich shuaran aneakka yajauch awajsashtatui. Tuma asa akupkamun ti shiir umirkattawai.

¹¹ Ii yámankamtaik Yus nekas enentáimtusmiaj nuí “Ii ti shiir ajar tuke uwempratin ukunam átatui” tu enentáimprachmashiaji. Antsu yamaikia nu tsawant yuntumsamta ashí túrajnia nujai shintiarar enentáimpratniuitji.

¹² Tuke káshiitiat tsawaattemprai. Ii Uuntri Kristu jú tunáa nunkanam tátin ishichik ajasai. Tuma asamtai ii túrutairi kiritniua núnisan yajauch túrutai ana nuka túrutsuk tsáapninium péñker wekasatin kakaram ajastai.

¹³ Túratniua nujai métek wekasatai. Tsawai wekaakur kiritniunam uumkar tunáa túrutai túrashtai. Nampetsuk, yajauch warartsuk, tsanirmatsuk, jianait-suk, tura kajernaitsuk aya péñker túratái.

¹⁴ Ii Uuntri Jesukristu túramia núnisrik túratái. Tura ii ayashí wakeramu umikiat tusar tsankatkashtiniaitji.

14

Ame yatsum kakantraip

¹ Shuar Yúsán ishichik enentáimtana nu itiaatarum tura kakantrairap.

² Iis, chíkichka ashí yuamniaiti tuiniawai. Tura chíkichcha, Yúsnan awajirar, namañ yúashtiniaiti tuiniawai.

³ Tura ashí yúa nuka namanken yúatsna nuna wishikrashtiniaiti. Núnisan ashí yucha nu ashí yuun kakantrashtiniaiti. Warí, núnaka Yus ni shuarin awajsachukait.

⁴ ¿Ámeka timiataash péñkeraitiam chíkich shuar kakantina? Antsu ni úntrin ni péñker túramuncha tura yajauch túramuncha íschatniukait. Enentáimprató. Yus kakaram asa nin péñker awajsamniaiti.

⁵ Chikichcha enentáimpratai. Chíkich shuar tsawantan achikiar “Jú tsawantaj Yus nankaamas shiir awajsatniuiti” tuiniawai. Chikichcha ashí tsawantan métek enentáimtuiniawai. Ayu, tura ni enentáimtamun nekas paant nekaatniuiti.

⁶ Chikichik tsawantan enentáimtakka Yusan shiir awajsatniun túrawai. Tura ashí métekrak enentáimtakka Yúsan shiir awajsataj tusa túrawai. Yurumkajaisha ashí yúana nu Yúsan yuminkias shiir awajsataj tusa túrawai. Núnisan ashí yúatsna nusha Yúsan yuminkias shiir awajsataj tusa túrawai.

⁷ Iikkia ii enentáijjain iwiaaktsuji. Tura jáakrishá ii enentáijjain jaatsji.

⁸ Kame iwiaaku pujakrishá ii Uuntri Kristu shiir awajsataj tusar pujurji. Tura jáakrishá tuke Níniuitji. Nu asamtai iwiaaku pujakrishá tura jakarsha tuke Krístunuitji.

⁹ Kame jakancha iwiaakuncha ashí ni Uuntri ajastaj tusa Kristu jaka nantakmiayi.

¹⁰ Tura ¿urukamtaí ame yatsum “yajauchiiti” tame. Urukamtaí nakitiam? Warí, ashí iikkia ii túramu paant awajnasat tusar Kristui naka wajastatji.

¹¹ Nu asamtai Yus-Papinium tawai:

“Wi nekas iwiaaku pujá asan ashí Winí tikishmatrurartatui. Tura ashí “Yus asa tuke péñker túriniaiti” túrutartatui” tawai.” Tu áarmaiti.

¹² Tuma asamtai iisha chikichik chikichik ashí ii túramu Yus paant ujakartatji.

Ame yatsum tunaanum ajuraip

¹³ Nu asamtai “yajauch túriniaiti” tu áujmatnaisashtiniaitji. Antsu ii yachi tunaanum ajuarchatin ti enentáimturtniaitji.

¹⁴ Jesukrístu jintintiamu asan juna nékajai: Yus najanamuka péñkerchaka atsawai. Ashí túramniaitjai. Túrasha shuar chichaak “Nu túrushtainti” táyat nuna túrakka níjjai tunaiti.

¹⁵ Tuma asamtai shuar chichartamuk “Nu yúakminkia Yusjai péñkerchaiti” tai, ame yúakminkia nu shuar itiurchat enentáimsashtatuak. Tura níisha tunaanum iniaar menkakamniaiti. Nu shuar aneakum túratsme. Enentáimprató. Aya ame yuamna nujain ame yatsum Kristu jarukmia nu emenkákaip.

¹⁶ Tura “yuamniaitjai” táyatam wi yúakui yajauch áujmatrusarain tusam iniaisata.

¹⁷ Kame Yus umirkatin yurumátniujajisha umartinjajisha enentáimtuschatniuiti. Antsu Yusa Wakaníjjai shiir wekasar Yusjai tura shuarjai nawamnaikiar ti péñker wekasatniuitji.

¹⁸ Ashí shuar Krístun núnis umireakui Yussa tura chíkich shuarsha péñker enentáimtuiniawai.

¹⁹ Nu asamtai tuke shiir pujusminia nu túrakur Yusjai kakaram ajastin yáiniaiktai.

²⁰ Yus iisam ashí yuamniaitji. Antsu ame yuamna nujai chíkich shuar tunaanum ajuarartin tunaiti. Tuma asamtai ame yuam nujai Yus nu shuara enentáin takarsamu emesraip.

²¹ Nu túrashtin nuikia naman yúashtincha karía umarchatniusha péñkeraiti. Warí, túrushtaijjai ame yatsum itiurchat enentáimtikram tunaanum

ajuarchatapash. Tura nu shuar Yúsan nekas enentáimtuschamnia ajastatui. Nuka atsuti.

²² Ame Yus nekas enentáimtakum ashí túramniaitkiumka Yúsak wararsata. Shuar Yus ímmianum shiir enentáijjají mash túramnia nu nekas shíiraiti.

²³ Tura araantushim yua nuka Yúsan shiir enentáimtutsuk yua asa sumamattawai. Kame ashí Yus shiir enentáimtutsuk túramu tunaiti.

15

Chíkich shuar wakeramuk enentáimtustiniaiti

¹ Yusjají katsuáru ájinia nu iik enentáimtumatsuk kakarmachu ainia nu yáintiniaitji.

² Chíkich shuar wakeramu enentáimtustiniaitji. Tura Yusjají nu nankaamas shiir wekasatniun yáinminiaitkiui túratniuitji.

³ Krístusha ni wakeramun túrachmiayi. Antsu Yus-Chicham tana núnisan chikichnan enentáimtusmiayi. Nu asantai Yúsan umirin asa wáitiak timia nu áarmaiti: “Ámin katsekramainiak Winiaja katsekrukarmiayi.”

⁴ Núnisan ashí yaunchu Yus-Papinium aarma in jintinramatniun áararmiayi. Nujají atsañtamkurin shiir wáinikiattajnia nuka katsuntrar nákastatji.

⁵ Yus atsañtamar katsuntratniun jintinramji. Tuma asa Jesukrístu túramia áintsan atumniasha chikichik enentáijjají enentáimtunaisar pujustinian yáinmakartí.

⁶ Nujají ashí métekrak Yus shiir awajsattarme. Niisha ii Uuntri Jesukrístuncha Aparínti.

Israer-shuarchanmasha Uwempratin Chicham etserkamu

⁷ Tuma asantai chíkich shuarjajísha shiir awajnisatarum. Kristu núnisan Yúsan shiir awajsat tusa incha shiir awajtamsamají.

⁸ Juna tajai. Kristu Israer-shuaran yáintaj tusa támiayi. Tura Yus ti yaunchu nuna weátrin “túrataj” timia nu uminkiat tusa támiayi. Nujají Yus timia nuna umikmia nu nekaamniaiti.

⁹ Tura nu arantcha Israer-shuarhasha Yus waitnentrartin áarmatai nin shiir awajsarat tusa támiayi. Tura Yus-Papisha tawai:

“Ámin kantamprakun ashí shuarum shiir awajsattajme.”

¹⁰ Tura nu arantcha tawai: “Ashí nunkanmaya shuarteram ashí Israer-shuar Yúsna ainia nujají warastarum.”

¹¹ Tura ataksha tawai: “Ashí aents ii Úuntrin shiir awajsarti. Tura ashí shuarsha Nin “Ti úuntaiti” tiartí” tawai.

¹² Isayasha áarmiayi: “Tawitia aparí Isai weátriya akupin akiinkiat-tawai. Niisha ashí nunkan akupeakui ashí shuar niiniak shiir enentáimtusartatui.” Tu áarmaiti.

¹³ Yus ashí shíiran suramsattakrin nu shiir nákaji. Tuma asantai Nii nekas enentáimtakrumin warasa shiir pujustinian yamá suramsati. Nuyá Yusa Wakaní kakarmaríjjají ti shiir enentáijjají katsuntrarum, nu nákastarum.

¹⁴ Yatsurú, atumsha anenainiaitrume. Tura ashí Yusna nekaarum nuamtak chicharnaikiatin nékarme.

¹⁵ Tuma aín kajinmatkiirum tusan ataksha ti paant áakun jú enentáimticheajrume. Yus winia waitnentrak ni Chichamen etserkat tusa akuptakui nuna áatjarme.

¹⁶ Kame Jesukrístu Israer-shuarchanum Yusa shiir chichamen etserkat tusa akuptukuíti. Nuna túrakun Israer-shuarchan Yusa Wakaníjjají shiir awajsamu áarmatai Yusají juiniajají. Tura Yussa shiir enentáijjají itiainiawai.

¹⁷ Jesukrístu yaintiu asantai Yusna takarsamaj nuna wararsamniaitjai.

18 Tura chíkich shuarjaj Kristu túramun pachischattajai. Aya wi chichas-majajsha tura wi túramujajsha Israer-shuarchan Kristu umimtikiamia nunak áujmatsattajai.

19 Yusa Shiir Wakaní kakarmarijaj aents tujintiamun túran ashí shuaran Jerusarén péprunam nan̄kaman etserkin Iririkiu nun̄kanam ejekamjai. Kristu-chichaman ashí nu nun̄kanam etserkaitjai.

20 Nuna túrakun chíkich shuar etserkachmanum Krístunun ántichu áiniamunam Uwempratin Chichaman etserkaitjai. Nujaj chíkich takasmanum takarsachuitjai.

21 Yus-Papisha núnisan̄ tawai:
“Chichaman pen̄ké antukcharuka nekaawartatui. Nin áujmatman an-turkacharusha unuimiarartatui.”

Papru Rúmanam wétaj tawai

22 Nuna pujuru asan íitjarum táyatan íichmajrume.

23 Tura yamaikia juyá takatrun umikian tura yáunchusha tuke íitjarum tiniu asan

24 Ispania nukanam wéakun íistatjarme. Tura atum̄in shiir irasan Ispanianam wéaku atumsha yaintkiarum shiir akuptukchattarpash.

25 Tura yamaikia kuitjai Jerusarénnumia Yus-shuaran yáintaj tusan wéajai.

26 Masetúnianmaya shuarsha tura Akayanmaya shuarsha kuitian irurar Jerusarénnumia Yus-shuaran atsumainia nuna akuptuktai tuiniawai.

27 Ti wakeruiniak túrawarmiayi. Nu nekas túrashtinkiait. Israer-shuarnumia Yus-Chichaman antukaru ásar yamaikia ni kuítrijaj páchitsuk yáinchatniukait.

28 Tuma asamtai jú kuitian súsaran umiran nuikia Ispanianam wéakun íiktatjarme.

29 Tura nuí winiakun Kristu Shiir Chichamen nujaj shiir yáintajrum tusan ejeetittiajrume.

30 Yatsurú, ii Uuntrj Jesukrístunu asarum tura ni Wakaní pujurtamkurmin anenia asarum Yus áujtursatarum. Núnisrum wijaj métek Yusna takastin yaintkiattarme.

31 Jutia nun̄kanmaya Israer-shuarnumia uwentikrat tusarum Yus áujtursatarum. Tura jú kuitian júajna nunasha Jerusarénnumia Yus-shuar shiir achikiartí tusarum Yus áujtursatarum.

32 Nujaj, Yus wakerakuin̄kia, pen̄ker wampú enentáimsan warasan íittiajrume.

33 Yus ti shiir pujustinian súana nu atumjai tsaniñ pujurtamsati. Núnisan̄ atí.

16

Amikmaamun akupramiania nu

1 Ii umai Jépeka Sen̄krea péprunmaya Yus-shuaran yáiniaiti. Ti pen̄ker Yus-shuaraiti.

2 Kristu náariñ shiir wáinkiatarum. Nuamtak yachí wáinkiatniua núnisrum wáinkiatarum. Niisha chikichnasha tura winiasha ti pen̄ker wáitin asamtai atumsha ni atsumamusha yaintarum.

3 Pirisirasha Akirasha wijaj métek Jesukrístunun takasaru ásar amikmaatainajai.

4 Niisha winia uwentikrurtai tusar jánin̄kiarmiayi. Tuma asamtai yu-min̄kiniajai. Tura aya wíkichu antsu ashí Israer-shuarchanumia Yus-shuar áinia nusha yumin̄kiniawai.

⁵ Núnisan ashí Yus-shuar Pirisiran tura Akira jeen irunainia nusha amikmaatarum. Tura winia aneamu amikiur Epenetu amikmaatruatarum. Niisha Akaya nunkanam emka Krístun nekas enentámtusmiayi.

⁶ Marisha, atumjai ti takasua nu amikmaatruatarum.

⁷ Tura wíi shuarsha Antrunikiusha Júniassha amikmaatruatarum. Niisha wijiai sepunam pujusarmai. Wijiai emka Krístun shiir enentámtusar chíkich akatramujai nankaamas takasaru áiniawai.

⁸ Ámpriassha Krístunam winia aneamu amikiur asamtai amikmaatruatarum.

⁹ Urpanujai sha Jesukrístu takatrí tsaniñniuitji. Niisha tura aneamu Estakishsha amikmaatruatarum.

¹⁰ Apirishsha amikmaatruatarum. Niisha Krístun ti shiir enentámtamu ti páantaiti. Núnisan Aristúpuru shuarsha amikmaatruatarum.

¹¹ Wíishuar Erutiúnsha tura Narsisu shuarsha Kristu shuari ásarmatai amikmaatruawarta.

¹² Tripiniasha tura Tripiusasha Yúsnan takainia ásarmatai amikmaatruatarum. Núnisan ii umai Pírsitia Yúsnan ti takasu asamtai amikmaatruatarum.

¹³ Rúpusha, nusha ti penker Yus-shuar, tura nukurísha amikmaatruatarum. Niisha wijiai nekas winia nukurua núnisaiti.

¹⁴ Asinkritiusha, Pirikiuntisha, Érmassha, Patrupalsha, Érmessha, tura ashí niijiai Yús-shuar ainia nu amikmaatruatarum.

¹⁵ Núnisan Jirurukusha, Júriasha, Néreusha, ni umajjiaisha, Urimpiassha, tura ashí Yus-shuar niijiai pujuinia nu amikmaatruatarum.

¹⁶ Nuámtaksha shiir aujnaisatarum. Ashí juyá Kristu shuari amikmaatmainiawai.

¹⁷ Yatsurú, shuar nushaa enentámtuiniak Yus-shuaran akanainiak itiurchat awajenawai. Nu shuar wáinkiarum kanaktiarum. Ni yajauch túramu átum penker takastin unuimiarmena núnischaiti.

¹⁸ Nu shuar ii Uuntri Jesukrístunun takainiatsui. Antsu ni wakeramun uminiawai. Tura ti shiir chichasar nékachun anankenawai.

¹⁹ Átum umirma ashí shuar nékainiakur ti waraaji. Yajauch túrutsuk aya penker túratin enentáimsarum pujustarum.

²⁰ Yus tuke shiir pujustinian amawa nu ti wárik uunt iwianchin nupetturmaktatui. Tura ii Uuntri Jesukrístu shiir yainmakarti.

²¹ Timiutéusha, wijiai takau, amikmaatmarme. Núnisan Rúsiusha, Jasunsha, Susipatresha, mash wíishuar ainia nu amikmaatmarme.

²² Wi, Tersiu asan, Papru chichamen ju papinium áateakun Kristu náariin amikmaajrume.

²³ Káyusha amikmaatmarme. Ni jeen pujaji tura juisha ashí Yus-shuar irunainiawai. Erastusha ju pepru kuítrin wáinniuiti. Niisha ii yachi Kuártujai amikmaatmarme.

²⁴ Ii Uuntri Jesukrístu ti shiir yainmakarti. Núnisan atí.

Yus shiir awajsatai

²⁵ Watsek, Yus shiir awajsatai. Niñki nekas kakaram awajtamsamniaiti. Wi Uwempratin Chichamnum Jesukrístunun étsereaj nujai ikiantampratatawai. Nu chicham yámankamtaiknumia nekaachmanak Yus yamaikia paant awajsaiti.

²⁶ Yaunchu Yúsnan etserin ni áarmanum nu chichaman etserkarmiayi. Tura yamaikia Yus wakerak ashí nunkanmaya shuar Nii enentámtusar umirkarat tusa nu Chichaman yamaikia paant awajsaiti. Yus amuutsuk tuke pujuwiti.

²⁷ Yúsak Niṅki ti neka asa tura Jesukrístu ti penker tura asamtai Niṅki tuke shiir awájnástí. Nuke atí.

Papru KURINTIUNMAYA SHUARAN Emka papin aar akuptukma

Kurintiunmaya Yus-shuaran Papru áatramiania nu

¹ Wi Pápruitjai, Jesukrístu akatramu. Yus nuna wakerak, ni akatramurj atí tusa anaitiukmai. Wi, ii yachi Sústinisjai, ju papí akupeaji.

² Ashí Yus-shuar Kurintiu péprunam iruntrumna nu ju papí akupeaji. Átumka Jesukrístujai tsaniñkiu asarum Yusna árume. Atumsha tura ashí shuar Jesukrístun enentáimtuiniana nunasha Yus ti penker awajsatniun wakerawai. Nincha incha Jesukrístu mai metek Úuntriñti.

³ Yus ii Aparí tura ii Úuntri Jesukrístusha waitnentramainia ásar yainmakarti imiatkinchanum tuke shiir pujustinian.

Ii Uuntri Jesukrístujai tsaniñkia pujustin

⁴ Yusan áujkun yuminsan atumin shiir enentáimtajrume. Jesukrístujai tsaniñkia pujakrumin Yus shiir enentáimturmawai.

⁵ Jesukrístujai tsaniñkia pujakrumin Yus atumin ti yáinmawai ashí penker ana nu enentáimtakrum tuke shiir chichastinian.

⁶ Kristu juna túramniaiti tíchamkaji. Ashí yamaikia uminkiyai.

⁷ Tuma asantai ashí Yus súramna nu atsumatsrume. Nu túrakrum ii Uuntri Jesukrístu tatin tuke nákarne.

⁸ Tura iniaitsuk tuke emettamattawai ii Uuntri Jesukrístu támatai atumi tunaarin pachischatin.

⁹ Jesukrístu ii Uuntriñti. Niijjai tsaniñkia pujusúk tusa Yus achirmakmarne. Tura Nii tana nuna tuke umiktatui.

Yus-shuar akantramu

¹⁰ Yatsuru, ii Uuntri Jesukrístu naari pachisan, seajrume métek enentáimpratarum tusan. Níisháa níisháa enentáimprairap antsu chikichik enentáijjai métek enentáimsa pujustarum.

¹¹ Átum yajauch chicharnaisarum pujarme. Kruí shuari tu ujatkmatai tájarne.

¹² Kame júnis awai: Chíkich “Wi Páprunuitjai” tuiniawai. Chíkich “Apurusnaitjai” tuiniawai. Chikichcha “Wi Pítrunuitjai” tuiniawai. Chikichcha “Wi Kristu-shuaraitjai” tuiniawai.

¹³ ¿Warí, nuñkia, Kristu akantramukait. Páprusha krúsnum jarutramkamaashi. Tura Papru naari pachisa imiaimiukaitrum?

¹⁴ Atumin untsurí imiaichu asan shiir enentáimjai. Aya Krispu Káyujai jímiarchiniak imiaimjai.

¹⁵ Nújainkia shuar “Papru náariñ imiaimiuitjai” tíchamniaiti.

¹⁶ Maa, nekas, Estepanasa shuarincha imiaimjai tura chíkich wi imiaimiun nékatsjai.

¹⁷ Kristu imiakrattia tusa akuptukchamai antsu uwempratín chichaman etserkat tusa akuptukmai. Tura ti neka chichainia núnisan chichaatsjai shuar wi shiir chichaamun enentáimprarañ tusan. Antsu yúpichuch chichaajai Kristu krúsnum jakamuk paant atí tusan.

Kristu Yusa kakarmaríncha ni nekatairíncha paant iniakmasmiania nu

18 Kristu krúsnum jarutramkamu étseraeji. Antsu Yus-shuarchaka menkaakatniunam wéana nu, “ántrai ti nu chicham” tu enentáimainiawai. Antsu Yus-shuarti, uwempratniunam wéakur, “nu chichamjai Yusa kakarmari takusminiaiti” tu enentáimji.

19 Núnisan tawai Yus-Chicham yaunchu aarma: “Ju nunkanmayan ti neka áiniana nuna chichamen emesrattajai; ti unuimiararu áinianak ántar awajsat-tajai” tawai Yus ni chichamen.

20 Iis, ju nunkanam uwempratin chicham íruntsuk. Nu chichaman ashí mash Yus ántar awajsaiti. Ti neka áiniana nusha, jintinkiertin áiniana nusha, ashí ju nunkanmayan unuimiar ti chichastinian nékana nusha, nu shuar mash “wi tájana nujai pénger pujusam uwemprattame” tu enentáimiainiawai. Tura núnaka mash Yus penké ántar najanaiti.

21 Aya ni nékamujai aents Yúsán nekaacharmiayi. Núnisan atí tusa Yus túramiayi, timiá neka asa. Antsu ashí aentsun Yus ni chichamejai uwemtikratniun wakerimiayi. Chíkich “ántrai ti” tuiniana nu chichamjaiinkⁱ Yus Nin enentáimtuinia núnaka uwemtikratniun wakerak túramiayi.

22 Israer-shuar “aentsti túrachminian iniakmasta, wi nekaataj” tuiniawai. Kriaku shuarsha “ti enentáimsam, mash pénger júkim turuttia wisha métek enentáimprataj” tuiniawai.

23 Iikia antsu Kristu krúsnum jarutramkamuk étseraeji. Israer-shuarsha “ju chicham natsantaiti” tu enentáimiainiawai. Israer-shuarchasha “ju chicham ánttrai ti” tu enentáimiainiawai.

24 Tura Yus achikiarma, Niiniu ajasarat tusa, Israer-shuarsha Israer-shuarchasha mai metek “Kristu krúsnum jarutramak Yusa kakarmaríncha ni nekatairíncha paant iniakmasmiayi” tu enentáimji.

25 “Yusa nekatairi ánttrai ti” tuiniawai aents, túrasha imiá nekas péngeraiti. “Yusa kakarmarisha jeatsui” tuiniawai aents, túrasha imiá nekas kakarmaiti.

26 Enentáimtumastarum yatsuru. Yus achirmakmarme Niiniu ajastinian, tura ju nunkanam ti neka áinia núnisan atumúin ti neka íruntsui. Ti akupniusha ti nankaamakusha atumúin íruntsui.

27 Antsu ju nunkanam nékachua núnis ana nuna Yus achikiuuti ti neka nuna iniatsáartinian. Tura ju nunkanam kakarmachua núnis ana nunasha Yus achikiuuti kakarma nuna iniatsáartinian.

28 Péejchachincha, nakitsamuncha, ánttrachincha, Yus achikiuuti ashí nankaamantu írunna nuna amuktinian.

29 Nújaiinkia chikichkisha Yusjai waantu enentáimprachminiaiti.

30 Tura Yus atumin Kristujai tsanin apujtamsaiti. Tura Kristu enentáimtusar Yus nekas nekatainkia nekaattaji. Kristu enentáimtakin Yus shiir enentáimturmajai, pénger awajtamaji, tura uwemtikramaji.

31 Yus-Papiniun yaunchu aarma núniskete: “Shuar nankaamantu enentáimprataj tákunka ii Uuntri Yus túramun wararsati.”

2

Kristu krúsnum jakamu etserkamu

1 Wisha, yatsuru, atumúin jeamaj nui Yus-chichaman ti neka chichainia áintsan tura íwiasanak ujakchamajrume.

2 Tura atumjai pujakun aya chikichkiniak nekaatniun enentáimpramjai. Júiti: Jesukristu, tura Jesukristu krúsnum jakamu.

3 Nékatayan kakarmachu sapíjmiashím jearmiajrume.

⁴ Yus-Chichaman ujaakun ti neka chichainia áintsan nupetkataj tu enentáimturchamajrume. Antsu Yusa kakarmaríncha tura ni Wakaníncha paant iniakmasan Yus-Chichaman ujakmajrume.

⁵ Aentsu nekatairíjjai Yus enentáimtuschatniuiti antsu Yusa kakarmari paant nekaarum Yus enentáimtustiniaitrume. Nuní asantai Yus-Chichaman tu ujakmajrume.

Aya Yusa Wakaníjjai Yúsna nekaamniaiti

⁶ Túmaitiat Yusa nekatairí átsuk. Yúsna unuimiararujai Yus nekatairín áujmatji. Tura Yusa nekatairínkia aentsu nekatairí áintsachuiti. Ju nunkanam akupin ainia nuna nekatairínchuiti Yúsna. Ju nunkanam akupniuka ishichik pujus amuukachartatuak.

⁷ Yaunchu ju núnka atsaín Yus in uwentikrampratniun enentáimpramiayi ti shiir pujusarmi tusa. Ju Yusa enentáimmiari yaunchu nekanachmiayi, tura yamaikia nu nekaar áujmatji.

⁸ Ju nunkanam akupniuka nuna penké nekaacharmiayi. Nékainiakka ii Uuntri timiá shiira nuna, krúsnum máacharu aayi.

⁹ Yaunchu Yus-Papinium áarchamukait: “Shuar Yúsna aneana nuna Yus ti shíiran susattawai. Susattana nuka timiá péñker asantai shuar wáinkiachman, antukchamuncha, enentáimtachmancha Yus susattawai” tu áarmaiti.

¹⁰ Tura Yusa Wakaní ii enentáin pujurtamuk Yus suramsattajnia nuna yamá paant jintinramji. Nu Wakancha imia Yus enentáimmiancha mash nékawai.

¹¹ Shuar enentáimna nuna chíkich shuar nekaamniakait. Antsu aya ní enentájjai nékatsuk. Núnisa aya Yusa Wakaní Yúsna paant nékawai.

¹² Ju nunkanmaya aents enentáimiania nujai Yusna nekaachminiaiti. Antsu Yusa Wakanín in súramaj nujai Yus shiir tsankatramajnia nu nekaamniaitji.

¹³ Yusa Wakaní jintinramji Yúsna chichastinian Nii wakera áintsan. Ni chichamen súramji. Túramtai ii nékamujai Yúsna étsertsuji. Tuma asantai imia Yusna nuka Yusjai péñker wekainia nu jintíaji.

¹⁴ Yus-shuarcha Yusa Wakaníniun ántatsui ántrai tusa. Aya Yusa Wakaní jintintiamniaitkiui Yus-shuarcha nuna penké nekaachmin áiniawai.

¹⁵ Antsu Yusa Wakanín takaku ashí mash iis, péñkera nuna nekaamniaiti. Nii túrana nunasha chíkich shuar súmamtikiachminiaiti.

¹⁶ Yus-Papinium yaunchu áarmaiti: “¿Yusa enentáimmiari ya neka. Tura Yúsna ya jintintiamniait?” tu áarmaiti. Tuma aín iikia Yus-shuar ájina nu, Kristu enentáimna núnisrik enentáimji.

3

Páprusha Apurussha Yusa takatrin mai tsanínkiar takainiawai

¹ Tura wikia, yatsuru, nuik ai atumjai pujakun Yusa Wakanín umirniun chichastinia áintsanak atumjai chichastinian tujinkiamjai. Antsu ayash wak-eramu umirin asakrumin Krístunam katsuarcharujai chichastinia áintsanak atumjai chichasmajai.

² Uchi kuírach naman ayurachminiaiti antsu aya umuntsatniuiti. Núnisa aya yúpichuchin ujakmajrume, itiurchat ana nu tujintiakrumin. Tura yamaisha itiurchat ana nu tuke tujintiarne.

³ Tuke ayash wakeramu umirniuitrume. Yajauch enentáimtunaiyakrum tura katsumnaiyakrum akantramuitrume. Nujai páantaiti átum ayash wak-eramu umirniuitrume. Yúsna enentáimticharujai métek wekainiaitrume.

⁴ Atumfinkia shuar “wi Páprunuitjai” tuiniatsuk. Chikichcha “wi Apurusnaitjai” tuiniatsuk. Tu chichaakrum ayash wakeramu umirniuitrume.

⁵ Wátsek. Wi Papru ti pénkeraashitaj. Apurussha ti pénkeraashit. Antsu iisha aya Yusa takarniurintji. Yus-Chicham étserkurin ii Uuntrj enentáimtus chamkuram. Ii Uuntrj takatan chíkich chíkich suramsamajnia nuke takasmaji.

⁶ Wi Yus-Chichaman étserkun arakan araktinia áinis takasmajai. Apurussha entsan ukatramai. Tura Yus nu arakan tsakatmarmai.

⁷ Arakan araana nusha, entsan ukatna nusha ánrachukait. Antsu Yusak arakan tsakatmaru asa ashí túrachukait.

⁸ Arakan araana nusha, entsan ukatna nusha métek áiniawai. Túmaitkiuisha takasmajai métek Yus akiktatui. Péñker takasmatainkia péñker akiktatui.

⁹ Wisha Apurussha Yusa takatrj mai tsaninkiar takaaji. Tura Yus atumf enentáin takaakui atumsha Yusa núnkea áintsaitrume.

Jeasha enentáimpramniaiti. Yus atumjai takaak jeá jeamtinia áintsan takaawai.

¹⁰⁻¹¹ Jeá jeamainiak, emka uunt kaya nunká init ikiursar kaki awajsatin áiniawai. Tura nuyanka nu kayanam ekeniar júkitniuiti jeá wewe atí tusa. Wikia jeá jeammin ti unuiniamiarua áintsanak uunt kaya nunká emka ikiustinian nekaan, núnisnak Jesukristunun emka ujakmajrume. Tura Jesukristu uunt kaya kaki ikiusma áinis asa Nínkiti nu jeá ekenkatin. Iis, ashí enentáimtustinia nankaamas Jesukristu enentáimtustiniaiti. Nu asamtai Jesukristunun emka ujakmajrume. Yus nuna etserkatniun tsankatrukuiti. Wi emka, uunt kaya ikiursatniua áintsan, Jesukristunun ujakmajrume. Tura nuyanka chíkich shuar ekeniar jeammin áiniawai. Tura anearti péñker jeamtinian.

¹² Tura jeá jeamainiak nii wakerak péñker ana nujai jeamminiaiti. Nii péñker jeamtinian wakerak kurijajisha, kuítjajisha, shíirmach kayajajisha jeamminiaiti. Chíkich jeamkuka numijajisha, kenkuajajisha, nukajajisha jeamminiaiti. Núnisan shuar Yúsnan takaak péñker takasminiaiti túrasha nánkamas takasminiaiti.

¹³ Tura amuukatin tsawant jeakui ashí ni takatrj paant átatui. Nu tsawantajsha Yúsajya ji átatui tura nu jisha ni takatrj péñkera nunasha tura ya-jauchia nunasha nekapsattawai.

¹⁴ Tura shiir jeamuka tura nu jeasha esaachmatainkia shiir akinkiattawai.

¹⁵ Antsu nánkamas jeamuka imianinkia jiniumia uwemprattawai, tura ni jeamma esaa penké atsuttawai.

¹⁶ Enentáimpratarum. Yusa Wakaní atumín pujá asamtai Yusa Jee ajasuram nu nékatsrumek.

¹⁷ Shuar Yusa Jee émesekuinkia Yus nu shuaran emesrattawai. Yusa Jeeñka timiá shiir asamtai túrattawai. Nu Jeá atumketrume.

¹⁸ Ju nunkanmayan unuimiarua núnisrum “ti nekaitjai” tu enentáimtumasrum ananmamawairap. Antsu ju nunkanmayan nékachu áinis ajas Yúsnan ti shiir unuimiártiniaiti.

¹⁹ Ju nunkanmaya aents nékainia nuna Yus “ántrai” tawai. Yus-Papinium áarmaiti:

“Ju nunkanmayan unuimiarun ni enentáimmiajain Yus sumamtikiattawai.”

²⁰ Tura nu arantcha áarmaiti:

“Uunt Yuska “unuimiaru enentáimmiancha penké ántrai” tawai.”

²¹ Tuma asamtai “Páprunuitjai tárugna nusha, “Apurusnaitjai”, tura “Pítrunuitjai” tárugna nusha ántar enentáimprume, nii aya aents ásarmatai. Tu enentáimprarum warasairap. Antsu nekaatarum. Ashí írurna nu atumin yainmaktiniaiti.

22 Páprusha, Apurussha, Pítrusha, ju nunkanmayasha, iwiaakmasha, jákatniusha, yamáí írunna nusha, ukunam átatna nusha, mash atumniaiti shiir yainmaktin.

23 Atumsha Krístunuitrume, tura Krístusha Yúsnaiti.

4

Yus akatramu takatri

1 Júnisañ ashí shuar enentáimturmastiniaitji. Iikia aya Kristu yáintrintji. Kristu akatramurintji Yusna yaunchu nekaachma ana nu yamáí etserkatin.

2 Wátsek, akatramuka tána nujaj métek umiktiniaiti.

3-4 Wi umikmancha umikchamuncha ii Uuntri Kristu nékawai. Átum enentáimturarmena nusha tura chíkich aents enentáimturainia nusha wíjiañkia ántraití. Imia wíkisha nekamatsjai. Kame winia tunaarun penké wáintsujai tura aya nujaj “pénkeraitjai” tíchamniaitjai. Nínki Yus iirui.

5 Tsawant jeamtai ii Uuntri Kristu atak tátatui. Tura ashí yamáí kiritniunam uuñkma nuna tura shuar ashí enentáimprarma nunasha paant awajsattawai. Nu tsawant jeatsajñ shuar umikiuashit tusarum enentáimtusairap. Tura nu tsawantaj Yus ashí péñker umikiarun shiir awajsattawai. Péñker umikiuncha ishichik umikiuncha takasmajaj métek Yus shiir awajsattawai.

6 Átum “Ju shuar péñkeraiti tura chíkich péñkerchaiti” tu akannáirarum penké tíchatniuitrume, yatsuru. Nuka paant atí tusan “Átum “Wi Páprunuitjai” tura “Wi Apurusnaitjai” tírap” tajai. Antsu aya Yus-Papinium áarmajaj métek enentáimsatarum.

7 Ámeke chíkich shuarjaj méteketme. Tura ashí takakmena nusha Yus amasmaiti. Tura Yus amasu asamtai çitiurak áminiukea áintsam nujaj nankaamantu ajai tu enentáimtumam?

8 ÇTi kuítrinnia áintsañ tura ashí takakua áintsañ enentáimtsurmek. In nankaakarum uunt kapitíán ajasua áintsañ enentáimtsurmek? Nekas uunt kapitíán ajasrumka maak. Nuñkia iisha atumjaj akupkaintji.

9 Chíkich shuar mash nankaamantu áinis áiniakuisha Yus in ni akatramurinj ashí amúamunam apujtamsaitji. Tu enentáimpramniaiti. “Yajauch áiniawai, máatái” tu pujurtamji shuar. Tura Yusa suntarisha ashí juyá shuarsha in íistai tusar káutramkaitji.

10 Iikia atumjaj jeatsji. Kristu shuarj asakrin nékachua áinis enentáimturmajj shuar. Átum antsu Krístunam tí nékachushitrum. Iikia kakarmachuitji. Átum timiá kakarmaitrume. Átumka ti penkeraitrume. Antsu iikia muíjtiaitji.

11 Tuke yamaisha tsukamaji, kitiamaji, entsartin atsumaji. Katsumpramji. Jeasha atsumaji.

12 Ii ewejéjaj takaakur ti pimpíaji. Shuar katsekramainiaji túrasha iikia shiir chichamjaj aiyajj. Itiurchat awajtamainiakuisha katsunteaji.

13 Tsanumprutmakrincha tuke shiir chichaaji. Tsuata áintsarik tuke yamaisha ashí yajauchia núnisañ ajapramatniun enentáimturmainiaji.

14 Atumin aya iniatsaartajtsan juní áattsujrume. Antsu winia aneamu uchirua áintsan jintintjarne.

15 Atumin Yus-Chichaman ujaakun Yus-shuar ajastinian unuiniamjarne. Nujaj Jesukrístu enentáimtakrumin atumí aparía áintsan ajasmajaj. Chíkich shuar Krístunun jintinrámatin timiá untsurj ákuisha aya wiki atumí aparintjai.

16 Tuma asamtai wi wekaajna áintsañ wekasatarum atumsha.

17 Nu túratarum tusan winia aneamu uchirun Timiutéun akuptukmajrume. Niisha ii Uuntri Krístun enentáimtamunam winia uchiruiti tura Krístun

enentáimtak tuke shiir wekaawai. Túrasha wi Krístujai wekaamun ataksha enentáimtikramprattawai. Núiti ashí Yus-shuarnum wena jintíajna nuka.

¹⁸ Papru yamaikia iraishtatui enentáimturainiak chíkich chíkich nankaamantuitjai tu enentáimtumainiawai.

¹⁹ Antsu Yus wakerakuin̄kia wárik íitjam tusan wakerajai. Nuin̄kia nankaamantu chichamen̄ antukchattajai antsu wátskea, ni túramurisha íistái.

²⁰ Yus akupeana nú shuar aya chíchainiatsui antsu Yusa kakarmarin̄ iniak-tuiniawai.

²¹ Wátsek, ¿warí enentáimprum? Átum tuke núnisan̄ enentáimkiurminkia wi winin asutiátniuitjarme. Tura péñker enentáimkiurminkia, aneakun shiir chichasminiaitjarme. ¿Atumsha túa wakerarum?

5

Tsanirmamu ti tunaiti

¹ Atum̄in̄ shuar ti tunáa tura awai. Ju yamá ashí nekanaiti. Nu shuar ni aparí nuwé achikiuiti. Timia tunaaka nu tsanirmamu Yus-shuarchanumsha atsawai.

² ¿Nu tunaajaj̄isha tuke nankaamantu enentáimprumek? Antsu úttiniaitrum̄e. Nu shuar tunáa túraka atum̄inīa akankatniuiti.

³ Ayashur pujachkuisha wi nūi pujáa áintsan nuna tunaar̄in̄ paant nekaam-jai, tura asutiátniuiti tajai.

⁴ Tuma asamtai átum káunkakrumin̄ ii Uuntrī Jesukrístu kakarmarij̄ijai tura wi nūi pujáa áintsanak, ii Uuntrī Jesukrístu kakarmarij̄ijai

⁵ nu shuar uunt iwianchnum surunkatniuiti ni ayashi wakeramur̄i amukati tusa. Nujaī ni wakan̄i uwemprattawai ii Uuntrī Jesukrístu támatai.

⁶ “Iikia péñkeraitji” tárumna nu ántraīti, tunáa atum̄in̄ tuke akui. Iis, “Karía ishichik yuminnium en̄ketam mash karimtiktsuk” tiniu áiniawai. Núnis átatui ju tunaajaī.

⁷ Tuma asamtai nu karía ukartarum yajauch awajturmasaj̄j tusarum. Núnisrum ju tunaanumīa kanakrum péñker átatrum̄e. Yaunchu enentái karía núnis amuukatniuiti. Ashí yamarmak yuminia áintsan̄ ajasuitrum̄e. Tanta wakapruachusha enentáimpratai. Israer-shuar paskua nampernum aya wakapruachu tantan yuu áiniawai. Atumí tunaar̄i atsakui atumsha nu námper-tantaa áintsar péñker ajasuitrum̄e. Paskua nampertincha Israer-shuar murikiun main áiniawai. Núnisan̄ Kristu jaka ii murikrīa áinis ajasuiti.

⁸ Tuma asamtai iisha paskua námper nájanku pujakur tuke núnisan̄ shiir wekasatniuitji. Tuma asamtai ashí yajauch tunaasha írunka nuka karía yaunchu nawamua áintsan̄kete. Nuka atsutniuiti. Antsu nekas ana nuka shiir enentáimsar wekasatniuitji. Nuka yuminia áintsan̄kete.

⁹ Nuik papin áatramajrumna nūi “Tsanirma shuarjain̄kia íischatniuitrum̄e” tímiajrum̄e.

¹⁰ Ju nun̄kanam Yus-shuarchaka aya tsanirma, aya kuitniak ikiauwin, aya kasak, aya ántar-yusan tikishmatin̄ áiniatsuk. Nú shuarjain̄kia pen̄ké íischatniuitkiurmeka ju nun̄kanmayā j̄in̄kintrume. Núnaka tátsujai.

¹¹ Antsu wi tájana nu j̄úiti, Shuar “Yus-shuaraitjai” tákun̄ka tura tunáa túriniaitkuin̄kia niij̄ijaī íischatniuitrum̄e. Tsanirmasha, kuítian ikiauwincha, ántar-yusan tikishmatniusha, tsanumniusha, nampencha, kasasha “Yus-shuaraitjai” tákuin̄kia íischatniuitrum̄e. Pen̄ké niij̄ijaī yurumáshtiniaitrum̄e.

¹²⁻¹³ Yus-shuarcha tunaar̄i pachischatniuitjai. Yus núnaka íistatui. Átumka antsu atum̄in̄ Yus-shuar ainia nuna tunaar̄i íistiniaitrum̄e. Tuma asamtai nu shuar tunaar̄intin̄ atum̄īya akankatarum.

6

Yus-shuar nuámtak itiurchat awajnalisarka Yus-shuarchajai nuna iwiarashtin áiniawai

¹ Yus-shuarka chíkich Yus-shuarjai itiurchat pujakka kapitiánjai chichas iwiarashtiniaiti Yus-shuarcha asamtai. Antsu Yus-shuar íranna nujai iwiarati.

² Enentáimpratarum. Amuukatin tsawantai Yus-shuarka ashí ju nunkanmaya shuara tunaari mash nekaawartatui. Tura ashí tunáa nekaatniuitkiurmeka itiur yúpichuchia nu nekaashtatrum.

³ Nu arantcha Yusa suntari túramurisha nekaattaji péñkerashit tusari. Nayaimpiniam túrawarma nekaatniuitkiurkia itiura ju nunkanmaya nu tujinkiattaji.

⁴ Pai, itiurchat ákuinkia Yus-shuar penké tujintiainiana nujai iwiaratarum antsu.

⁵ Natsaruk tusan nuna tájarme. Warí, ¿atumíni chikichkisha atsawak ni yachi itiurchatri péñker iwiaramnia?

⁶ ¿Urukamtai Yus-shuar ni yachijjai itiurchat pujakka Yus-shuarchanum wea iwiaratniun?

⁷ Atumí itiurchatri kapitiannium jukirmeka nujainkia átum tujinkiamu páantaiti. Natsantchakait. Itiurchat ana nusha ¿urukamtai antsu katsuntram asakáatsum? Kasamkamusha ¿urukamtai katsuntram asakáatsum?

⁸ Antsu átumka nuámtak yachijjai itiurchat awajnáyarme tura kasárnáyarme.

⁹ Tunáa túrinkia Yus akupeamunam pachiinkiachmin ainia nu nékatsrumek. Anannawairap. Ashí tsanirma nusha, ántar-yusan tikishmatniusha, nuamtak áishmanjai tsanirmasha,

¹⁰ kasasha, ashí kuítian ikiauwincha, nampencha, tsanumniusha, yajauch chichainia nusha, chíkich shuaran anañkawar atantin ainia nusha Yus akupeamunma nuí penké wayashtin áiniawai.

¹¹ Atumíyasha chíkich chíkich nuna túrin armai. Tura yamaikia ii Uuntri Jesusa kakarmarjjaisha tura ii Yusri Wakani kakarmarjjai atumi enentái shiir ajasuiti, atumsha Yusna ajasurme, tura tuke péñker ajasurme.

Ii ayashi yajauch áchatniuiti

¹² “Ashí túramniaitjai” tiniu áiniawai tura nekasaiti. Tuma aijn mash yáinkiashtatui péñker wekasatniun. Nekas ashí túramniaitjai tura nánkamas túratniujai nupetnakchattajai.

¹³ Junasha tiniu áiniawai: “Apatuk wakejainchu tura wake apatkujainchu mai ántrai.” Apatkujai wakesha nekas mai metek enentáimpratin áiniawai tura Yus mai metek amuktatui. Núnisan ii ayashi ii Uuntri Krístunuiti tura Kristu ii ayashi nérenniuiti. Tuma asamtai ii ayashíjjai tsanirmashtiniaiti.

¹⁴ Tura Yus ii Uuntri Jesusan iniantkimia núnisan ii ayashíncha nu kakarmarjjai iniantkittiwai.

¹⁵ Ashí ii ayashiin Kristu ayashímkiaiti. ¿Nu átumka nékatsrumek? Winia ayashrusha Kristu ayashíyá asamtai ¿itiurak nuna tsaniri ayashín najanattaj? Penké túrachminiaitjai.

¹⁶ Kame ¿jusha nékatsrumek? Áishman tsanirijjai tsaninkiar chikichik ayashtinia áinis ajainiawai. Núnisan Yus-Papinium áarmaiti: Mai chikichik ayashtinia áinis ajasartatui.

¹⁷ Tura shuar ii Uuntri Krístujai tsaninkia mai chikichik wakantin ajainiawai.

¹⁸ Tuma asamtai tsanirmatniunmaya yajáyañ wainkiarum tsékentiarum. Chíkich tunáa írunka nu ii ayashínkia ti yajauch awajeatsui. Túrasha shuar tsanirmakka ní ayashiniak yajauch awajeawai.

¹⁹ Yusa Wakaní ame enentáimin pujurtamu asamtai, ame ayashim ni jeente. Nu Wakanínkia Yus amasuíti. ¿Nuka nékatsrumek? Tuma asamtai ame ayashmi nérenchaitme.

²⁰ Kristu numpejai sumakma asamtai, ayashmisha wakanmisha Yusna ániawai. Yusna asamtai ayashmijiai péñker túratniuitme, Yus shiir awájnásti tusam.

7

Nuatkatniusha péñkeraiti, nuatkashtincha péñkeraiti

¹ Ayu. Átum áatrurmarmena nuna yamaikia ujaktajrume. Shuar nuat-teachkusha péñkeraiti.

² Tura ti tsanirmatniun enentáimtuinia ásar ashí áishmañ ní nuwēnak nu-atkati tura ashí nuwā ní áishriñ iniumkati.

³ Áishmañsha ni áishri asa nuwēn túratniua nuna umiktiniaiti. Núnisañ nuwāsha ni nuwē asa ni áishriñ túratniua nuna umiktiniaiti.

⁴ Núwaka niñki ni ayashí nérenniuchuiti, antsu ni áishriñiuiti. Núnisañ áishmañsha niñki ni ayashí nérenniuchuiti, antsu ni nuwēnui.

⁵ Ni ayashí suritnaikiashtin ániawai. Tura mai itit awajnaitsuk Yus áujsatin wakeruiniak ishichik tsawant kanakmin ániawai. Tura nuñkia atak tsaniñ pujustin ániawai. Túracharmatañkia uunt iwianch, Satanás, tunaanum iniar-tinian útsutkattawai katsuntratniun tujintiaku.

⁶ Ayu. Tura nuna áarayatan nújainkia “ashí shuar páchitsuk nuatkatniuiti” tátsujai. Nuatkatniuitkiumka péñkeraiti.

⁷ Túramtai “ashí wijiñ métek nuatkachuitkiuñkia maak ainti” tajai. Tura Yus ashí shuaran imiá métek najanachuiti. Chikichan nuatkatniun súsaiti, tura chikichan yúpichuch katsuntratniun súsaiti.

⁸ Natsancha wajencha juna tájai, “Wijiñ métek nuattsuk pujusrumka péñkeraiti.”

⁹ Tura katsuntratniun tujinkiarka nuatkarti. Ti katsuntrachmin neka-peakum nuatkatin péñkeraiti.

¹⁰ Nuatnaikiarun antsu tájai, “Nuwā nuatkamuka ni áishriñ ikiukchat-niuiti” tajai. Núnaka ii Uuntri Kristu akupkaiti aya winia chichampruchuiti.

¹¹ Túramtai ni áishriñ ikiukkia niñki atak nuatnatsuk pujustí tura tsaniñ pujustinian wakerakka ataksha ni áishriñ waketkiti. Núnisañ áishmañsha ni nuwēn ajapashtiniaiti.

¹² Chíkich shuaran juna tájai wikia, ii Uuntri Kristu juna akupkachuiti. Yus-shuara nuwēnka Yus-shuarchaitkiuñka tura ni áishriñiai pujustinian wakerakka péñkeraiti; ajapashtiniaiti, tájai.

¹³ Núnisañ Yus-shuara aishri Yus-shuarchaitkiuñka tura ni nuwejai pujus-tinian wakerakka péñkeraiti; ikiukchatniuiti.

¹⁴ Nu nuwāka “Yus-shuarchajai tsaniñ pujakun Yusjai yajauch ajastatjai” tu enentáimprashiniaiti. Antsu nii Yus-shuar asamtai ni aishriñ niijiai pujá asa péñker ajasminiaiti Yusjai. Núnisañ núwāka Yus-shuarchaitiat ni aishriñ Yus-shuaraitkiuñkia niijiai tsaniñ pujá asa péñker ajasminiaiti Yusjai. Núnisañ ni uchirísha péñker ajasmin ániawai Yusjai. Núnischaitkiuñkia ni uchirí Yus-shuarcha uchiría áintsar ainti.

¹⁵ Tura áishmañsha nuwāsha Yus-shuarcha ana nu kanaktinian wakerakka túrati. Yus-shuar nujai añkantaiti. Núnisañ asati. Tuke máaniaktinian Yus nakitramaji.

16 ¿Núwaka ni aishri Yus-shuar ajastatna nuna nekas nékawak. Tura áishmansha ni nuwe Yus-shuar ajastatna nuna nekas nékawak? Yus-shuarcha nuka wétinia wakerakka wetí.

17 Wátsek. Shuarka Yus-shuar ajaska Yus nin najanama áintsan tuke átiniaiti. Pujumia áintsan pujusminiaiti. Núnaka ashí Yus-shuarnum akupeajai.

18 Iis, Yus-shuar ajasuka Israer-shuaraitkiunka tuke Israer-shuar atí. Tura Israer-shuarchaitkiunka Israer-shuar ajastin enentáimprashtiniaiti.

19 Israer-shuaraitkiumsha tura Israer-shuarchaitkiumsha nuka enentáimtuschatniuiti. Aya Yus tana nu umirkatin nekas enentáimtustiniaiti.

20 Yus-shuar ajasuka nuik pujumia áintsan pujusminiaiti.

21 Chíkich shuara takarniuri asam ti itiurchat pujakmesha itiurchat enentáimpráip. Tura ankant jíinkimniaitkiumka jíinkitiá.

22 Ankantchaitkiumka ankantaitkiumsha ju enentáimpratá. Takarniuka Yus-shuar ajas tuke chíkich shuara takarniurinkiusha shiir enentáimpratniuiti Kristu nin tunaanumiá ankant awajsamtaí. Tura shuar takarniuchua nu, Yus-shuar ajas Kristu takarin ajasuiti.

23 Ti wáitsamiayi Kristu in ankant awajtamtsatniun. Ni numpejai sumakma asarum shuar emetamu áirap.

24 Tuma asamtaí shuar Yus-shuar ajas nuik pujumia áintsan yamaisha pujústí tura Yusan enentáimtus wekasati.

25 Nuwá natsa túratniua nuna yamaikia áujmatjai. Kristu juna akupkachmai tura Kristu anenkratmari ti nekapsa asamtaí wi tájana nu antukminiaiti.

26 Tuma asamtaí juna tájai. Ti iturchatnum pujá asakrin shuar aya júnisan nuattsuk pujustin pénderaiti.

27 Nuatkaitkiumka núwem ikiukip. Nátsaitkiumka nuwá eakaip.

28 Tura nuatkumka tunáa túratsme. Nuwasha iniurtukka niisha tunáa túrachuiti. Túrasha nuatnaikiaru itiurchatan ti wáinkiertatui ju nunkanam. Nú itiurchatnumiá wi uwentikraintjai.

29 Yatsuru, juna tájarme. Ishichik tsawant taasai. Juyanka nuatkaru ainia nuka aya ni nuarin enentáimprashtiniaiti antsu Yúsna enentáimtustiniaiti.

30 Núnisan tuke Yúsna enentáimsar úutainia nusha uutcha áintsar pujustin áiniawai. Warainia nusha warascharua áintsar pujustin áiniawai. Súmainia nusha sumakcharua áintsar pujustin áiniawai. Ju nunkanmayajainkia itit awajmamsashtiniaitji.

31 Núnisan aya jú nunkanam pénder pujustin ti takaschatniuiti. Ashí jú nunkanmayanka amukatniuiti.

32 Jú nunkanmayajain itit ajaschak tusan wakerajrume. Nátsaka Yúsna enentáimtawai ni wakera nuna umiktinian.

33 Túrasha nuatkaka ju nunkanman enentáimtawai ni nuarin shiir enentáimtiksattsa.

34 Núnisan nuwá nátsasha nuatkamusha niisháa enentáimiainiawai. Nuwá natsa Yúsna enentáimtawai ni ayashísha ni wakanísha tuke Yúsjai shiir atí tusa. Tura nuátkamuka ju nunkanmayan enentáimtawai ni áishrin shiir enentáimtiksattsa.

35 Atumin yáintajtsan juna tájarme. Itiurchat awajsattsan wakeratsjai antsu shiir wekaakrum itit awajtsuk Yus shiir enentáimtustarum tusan wakerajai.

36 Tura shuar ni nawantri natsan nuatnaikiati tákunka pénderaiti. Nawantrin natsa tuke apujsatniun nakitiakka surukminiaiti. Nusha tunaachuiti.

³⁷ Tura chíkichka tuke natsan apujsataj tákuñka nekas péñkeraiti. Apujsatin itiurchatchaitkiuñka tura ni nawantri nuatnakchatniuitkiuñka apujsatniuiti. Apujsañka nekas péñker túrayi.

³⁸ Tuma asamtai nuatnamtikiañka péñker túrayi tura apujsañka nu nañkaamas péñker túrayi.

³⁹ Nuwa aishri iwiaaku pujakuñka tuke niiñjai tsaniñ pujustiniaiti. Tura ni aishri jakamtai añkant ajas ni wakera nujai Yus-shuaran iis nuatnaiki-amniaiti,

⁴⁰ tura tuke nuatnatskesha nu nañkaamas nekas shiir pujustatui. Tú enentáimñjai wikia tura Yusa Wakanñsha métek tátsuash.

8

Yurumkasha namañsha ántar-yusnum susamu

¹ Ayu. Yamaikia yurumkasha namañsha ántar-yusnum susamun áujmatsattajai. Juñjai túratniua nuka mash nékaji. Tura shuar “ti nékaitjai” enentáimkiuñka nuñjaiñka “neka asan nañkaamantuitjai” tu enentáimiui. Antsu shuar chíkich shuaran aneakka nin péñker atí tusa yayawai.

² Shuar “ti nékaitjai” tákuñka nekas nekaatniua núñka unuimiarchaiti.

³ Tura Yúsán aneana núñka Yus péñker nékawai.

⁴ Wátsek. Ántar-yus susamu yúatin juñnis enentáimpratniuiti. Yuska aya chikichkiiti. Tura chíkich Yus atsakui,

⁵ aentsu yusri nayaimpinmasha nuñkasha írunna nuka peñké ántar áiniawai. Kame aentsu yúsrisha tura úuntrisha ti írunui.

⁶ Tura iikia nékaji, aya chikichik Yus awai, nusha ii Aparñti. Ashí írunna nuna najanaiti tura ni wakera nuna umikiat tusa najatmamji in. Ii Úuntrisha chikichkiiti, Jesukrístu. Niiñjaiñka ashí najanamuiti. Tura iisha ni kakar-mariñjai iwiaaku pujaji.

⁷ Tuma asamtai ántar-yus susamu yuamniaiti tura Yus-shuar awai juña nékainiatsna nu. Nu shuar ántar-yusan yaunchu tikishmatraru ásar nú yusan susamun yuawarka itiurchat enentáimprar “enentáiruñ yajauch ajasjai” tiar-tatui.

⁸ Watsek, yuamujai Yus in shiir enentáimtikrampratniun jeatsui. Yuarkia nuñjai péñker áchattaji tura yúachrikia yajauch áchattaji.

⁹ Añkantaitme yúatin wakerakmeká. Tura anearta. Ame yúakmin chíkich shuar itiurchat enentáimna nusha ámin wáitmak yúñka ni enentáin tunáa ajastatui.

¹⁰ Ístá. Ámeká neka asam ántar-yusa jeñ wayam tura nuñ yúakminkia ame yatsum nuñ wáitmakchanpiash. Tura niisha itiurchat enentáimiat ántar-yus susamun yúashtimpiash.

¹¹ Núñjaiñka ame nékamujai ame yatsum Kristu jaka uwentikramia nu yajauch ajastatui.

¹² Túramtai ame yatsum itiurchat enentáimna nu yajauch awajeakum Krístunmasha tunáa túraitme.

¹³ Nu asamtai winia yatsurun wi yúajna nuñjai yajauch awajeaknaka namañnaka peñké yuashtatjai nii tunáa ajasñ tusan.

9

Kristu akatramu túramnia nu

¹ Ashí Kristu akatramuñ túratniua nuna wisha túramniaitjai ni akatramuñ asan. Iis, wisha ii Uuntri Jesusan wáinkiaitjai tura wisha Jesukrístu takatrin takaajai. Winia takatruñjai átuñka Yus-shuar ajasuitrume.

² Chíkich shuar “Kristu akatramurinchuiti” túrutainiakuisha átumka winia takatrujaj Yus-shuar ajasu asakrumin nujaj wi nekas Kristu akatramurintiaj nu paant nekaamniaiti. Tura tu enentáimtursatniuitrume.

³ Ashí shuar “Kristu akatramurinchuiti” túrutainia nuna juna tájai.

⁴ Wisha Yus-Chichaman etserkataj tusan shuárnum irakun ashí ajampru-
inia nuna yuamniaitjai tura umarminiaitjai.

⁵ Tura Pítrusha, Jesusa yachisha, tura chíkich akatramusha irainiak ni nuwen Yus-shuar ainia nuna jukimnia áiniawai. Wisha núnisnak túramniaitjai.

⁶ Chíkich akatramuka kuit susamujaj Yus-Chichaman etserainiawai. Wisha Pirnapísha núnisrik túramniaitji. Kame ¿aya íchikik takastiniaitaj?'

⁷ Suntarka ¿ní kuítrijaiimpiash takaa? ¿Tsanimpian aráa nu nuna neren yúatsuk. Wáakan wainiua nusha muntsurin úmatsuk? Núnisan Yus-Chichaman étsera nusha nú takasmanumia yurumámniaiti.

⁸ Aya aents enentáimmian chichaatsjai. Muisais akupkamunmasha métek tawai.

⁹ Muisais akupkamunam áarmaiti:

“Turu takaak jiníiaia saepen pakartaj tusa nájakui ni nují jiníiatáshtiniaiti. Antsu ni wakerak yuati.” Tu áarmaiti.

Tura Yus aya túrunak enentáimprachmiayi jujaj.

¹⁰ Antsu in jujaj nekaawarat tusa tímiayi. Jiníiain araana nusha tura júukmatai saepen pakaana nusha nuna jiníiain mai yurumátin áiniawai. Paant atí tusa Yus nuna áarmiayi.

¹¹ Tuma asamtai Yus-Chicham atumjin etserkakrin nuyá átum takakrumna nujaj in ajamsatniuitrume. ¿Nusha itiurchatkait?

¹² Chíkich akatramu atumjin irutainiak ajamsamun yuamniaitkuinkia iikia nekas túramniaitji ii etserkamujaj Yus-shuar ajasakrumin.

Tura wikia antsu túrachuitjai. Atsumaknasha ashí itiurchat ana nuna kat-suntramjai Kristu shiir chichamen étserkui shuar itiurchat enentáimturarain tusan.

¹³ Ashí shuar ni yúsriniun tuke pujurin ainia nu, ni yusrí jeen írunna nuyan yurumáiniawai. Tura yus-sutai namañken maawar nuyá yurumáiniawai.

¹⁴ Núnisan Yus-Chichaman etserniua nuka Yúsnan takasu asamtai péñker ajamsatniuiti. Nuna Kristu akupkamiayi.

¹⁵ Tura wisha ajamsamun yuamniaitiatan tuke winia kuítrujaj yurumámjai. Tura yamaisha surúsúk tusan áattsujrume. Antsu nuna túrutsuk jakañka maak aintjai.

¹⁶ Uwempratin chichaman wi étserkun aya nújain “ti peñkeraitjai” enentáimtumatsjai. Kame Yus nuna túratniun surusuncha itiurkatjak. Nuna túrachkunka ti itiurchat pujusaintjai.

¹⁷ Wakerakun étserkunka, warasminiaitjai. Tura nakitiaknasha tuke Yus surusmanka umiktiniaitjai.

¹⁸ Tura jujaj antsu nekas warasminiaitjai: Wi túramnian iniaisan chikich-nan takatsuk aya winia kuítrujain uwempratin chichaman étserjai. Nujaj waraakun akikma áintsankete.

¹⁹ Chíkich shuara takarniuchuitiatan ashí shuara takarniuriya áintsanketjai Kristu shuari untsurí ajasarat tusan.

²⁰ Israer-shuarjaj pujakun niisha Yus-shuar ajasarti tusan Israer-shuara áintsan ajai. Kame Muisaisa akupkamuri umirkatin áiniakui wisha aun umirkashtiniaitiatnak umirniuitjai.

²¹ Tura Israer-shuarchasha Yus-shuar ajasarti tusan, nu shuar Mui-saisa akupkamurin umirkashtin áiniakui, wisha nuna umirkashtinia áintsan

ajai. Tura Kristu akupeana nuna umirkatin asan nekas Yus akupkamun umirniuitjai.

²² Yusjaj katsuararchasha ti penker Yus-shuar ajasarti tusan wisha katsuararcha áintsan ajai. Chíkich chíkich shuarjaj métek ajajai ishichkisha Yus-shuar ajasarti tusan.

²³ Ashí wi túraj núnaka uwempratin chicham tuke shiir atí tusan túrajai. Tura nu chichamjaj wisha atsumtsuk shiir wekaajai.

²⁴ Shuar nekapnaisatniusha untsurí tsékeñtin átsuk tura aya chikichik awakmatsuk. Niñki, awakmakun súsatniua nú shiirmachin achiktatui. Núnisrum kakarum ajasrum awakmak shíirmachin achiktinia áintsarum Yusna takastarum.

²⁵ Shuar nakurak nekapnaisatin ainia nuka nupetmaktaj tákunka ashí itit awajea nuna ikiuniawai. Iisha núnisrik nu enentáijjaj Yusna nu takastini-aitji. Nakuruinia nu shuar awakmakun tawasap súsatniua nuna achikiarsha nú tawaspan wárik kajinmatkimniati. Antsu Yus in amastatjinia nú tawasap tuke amuukashtatui.

²⁶ Wikia aya nánkamsan tsékeatsjai. Nasejaj maania áintsan máaniatsjai.

²⁷ Antsu winia ayashrun awatinia áitkiasnak umimtikiajai. Túrachkunka chikichan unuiniariatan winiasha awakmakun súsatniua nú shiirmachin Yus surustinian nakitrurainti.

10

Ántar-Yus tikishmatrashtiniati

¹ Enentáimpratarum, yatsuru. Yus yaunchu ii úntrin ashí métek yáinmiayi. Nusháa yurañmijjaj jintian nekapruamiayi. Tura ashí ii untri nu yurañmin apapekar wearmiayi. Ashí núnisar Kapaaku Nayaantsan Yus akankamunam wekasar katitkiarmiayi.

² Tura Muisaisan umirkar yurañminiam tura nayaantsanam ashí imi-aimiu áintsan ajasarmiayi.

³ Núnisan ashí mash Yusnumia yurumkan yuawarmiayi.

⁴ Entsanha ashí mash Yus susamunak umararmiayi. Kame Yus kayan-maya entsan akupkamtai ashí umararmiayi. Kristusha, nú kaya áintsan, niijjaj tuke weakui ni wakaní atsumamurín Krístunmayan takusarmiayi.

⁵ Tuma aín Yus ti yáinmaitiat ni wakeramun umikcharmiayi. Tura ásar ni nunkeen jeatsuk atsamu nunkanam ti untsurí jákarmiayi.

⁶ Iisha nujaj unuimiartiniaitji. Iikia ni wakeriarmia áintsarⁱ yajauchia nu wakerukchatniuitji.

⁷ Nu asamtai ántar-yus ni túrawarmia áintsarum tikishmatrairap. Iis, jiru yusri shiir awajenakuí Yus-Papinium áarmaiti, “Nu shuar yurumáwar nampekar námper ti najanawarmiayi.” Tu áarmaiti.

⁸ Nii túrawarmia núnisrik iikia tsanirmashtiniaitji. Nuna túrawar paintitres mir (23.000) chikichik tsawantaj jákarmiayi.

⁹ Iisha tunáa túrar “Yus asutiuáshtatui” tu enentáimprashtiniaitji. Niisha nuna túrawar napijjaj esaim untsurí jákarmiayi.

¹⁰ Yussha yajauch áujmatsashtiniaiti. Nuna túrawarmatai Yus ni suntarín akupak untsurín maawarmiayi.

¹¹ Yaunchu ii úntrijjaj túrunamu in amúamu tsawantnum pujajnia nuna jintinramat tusa áarmaiti.

¹² Tuma asamtai shuar “Tunaanum iniaarchattajai” tákunka anearti. Anearchamka iniaarminiaitme.

¹³ Tura ame itiurchatrumka aya amek nekapeatsme. Chíkich shuarsha nu itiurchatjaj métek nekapsatin áiniawai. Jusha ti enentáimpramniati. Ame

katsuntratin tujintiamna nuna nan̄kaamas itiurchatan Yuska péñker asa tsan̄katramatsui. Antsu itiurchat tarutrammatai, nu itiurchatnum pujamin Yuska uwempratniun jintinramattawai. Nújain̄kia katsuntrattame.

¹⁴ Nu asamtai aneamu yatsuru pen̄ke ishichkisha ántar-yus enentaimtu-sairap.

¹⁵ Atumsha nékatsrumek. Wi tájana nu nekaschakait.

¹⁶ Kristu jakamu enentáimtustin námper najanar Yus áujeaji Kristu numpen nakumea nu shiir atí tusar. Tura métek umarar nujai Kristu numpé métek enentáimtaji taji. Tura apatkusha púurarⁱ tura métek yuarⁱ nujai Kristu ayashí in jarutramkamu métek enentáimtaji taji.

¹⁷ Apatkusha chikichkiitiat púuram untsurí ajatsuk. Iisha núnisrik untsuríitiatar nu apatuk métek yuarⁱ métek enentáimprar chikichik ayashtinia áintsar aji.

¹⁸ Israer-shuartisha enentáimpratai. Yus-sutai namañken yuinia nu, métek yuawar Yusan métek enentáimtuiniatsuk.

¹⁹⁻²⁰ Núnisañ Yus-shuarcha ántar-yus sutai namañken suiniak nekas-Yusan suiniatsui antsu yajauch wakanin suiniawai. Kame ántar-yus ániak pen̄ké ántar ániawai, iwiaakuchu ániawai. Nu namañsha sutai namañketiat péñker namañkete, yajauchichuiti. Aya junak tajai. Yus-shuarcha ántar-yus sutai namañken suiniakui amesha niijiai métek yuamka yajauch wakanniasha niijiai métek enentáimtajai tame. Nu antsu yajauchiiti.

²¹ Kristu numpen nakumea nu úmakrum íwianch susamua nuka umarchat-niuitrume. Kristu ayashin nakumea nu yúakrumka íwianch susamua nuka yúashtiniaitrume.

²² ¿Warí, Yus akajkatin wakeramek. Iisha nin nupetkamniashitiai'?

Aya aneakur takastiniaitji

²³ “Ashí túramniaitjai” tiniu ániawai. Ayu, tura mash yáintkiashtatui péñker wekasatniun. Nekas ashí túramniaitjai tura mash yáintkiashtatui wakaniur kakaram ajastin.

²⁴ Nú arantcha chíkich yáintincha enentáimpratniuitji. Aya íiniuk pachischat-niuitji.

²⁵ Namañ súmerum inintrutsuk sumakta. Tura ántar-yusan susamusha yajauchichuashit enentáimtsuk páchitsuk yuata.

²⁶ Ashí ju nun̄kasha tura ashí írúnna nusha Yúsnachuk ainia. Tuma asamtai péñker ániawai.

²⁷ Yus-shuarchasha yurumkan ajampramkuisha ashí mash yajauchichuashit tu enentáimtsuk páchitsuk yuamniaitme.

²⁸ Tura chíkich chichaak “Juka ántar-yus susamu namañkete” túramkuin̄kia nuikia yuawaip. Yúakminkia nu shuar itiurchat enentáimprattawai.

²⁹ Ame páchitsuk yuamniaitkiumnisha nii antsu yúachmin asa itiurchat enentáimprattawai.

Tura amesha tíchatameash “¿Urukamtia nii tujintiakui wi yúachminiaitjai.

³⁰ Wi Yusan yumñsan yúakuisha urukamtia itiurchat enentáimturainia. Yus yumñsachmakait?” tíchatameash.

³¹ Ayu, yúakmesha úmakmesha ashí túramna nusha ashí shuar Yusan shiir enentáimtusarti tusam túratá.

³² Tuma asamtai ii túramujai chíkich shuar tunaanum ajuashtiniaitji. Israer-shuarsha, Israer-shuarchasha, Yus-shuarsha ashí yáintiniaitji.

³³ Wisha ashí shuaran yáintinian tuke enentáimjai. Ashí shuar uwemprarti tusan wi wakeraj nuna enentáimtsuk nin yáintinian tuke pujurjai.

11

1 Kristu turamia áintsan takaajai wisha. Atumsha núnisrum wi takaajna áintsarum takastarum.

Nuwa Yusa jeen túratin

2 Yatsuru, átum winia tuke enentáimturarum wi tímiajrumna nu umirniuitrume. Tuma asakrumin shiir enentáimtajrume.

3 Nu arantcha ujaajrume. Yus Apa Kristun akupea áintsan Kristu ashí áishman kan akupeawai. Núnisan áishmansha ni nuwen akupeawai.

4-5 Íjjainkia shuar Yus áujenak tura núnisan Yus-Chichaman étserainiak áishman etsenkrukchatniuiti antsu nuwa múuknum nukumaktiniaiti. Tuma asamtai áishman nu etsenkkrakka natsantaiti. Tura nuwa múuknum nukumakchanka natsantaiti. Intiashin tsupimiarua áintsankete.

6 Nuwa múuknum nukumaktinian nakitiakka intiashin tsupirtí nuikia. Watsek, nuwa ni intiashin tsupirtinian nakitiakka, tura awampratniun natsamakka múuknum nukumakti nuikia.

7 Áishman kka Yúsan nakumeawai. Yusna shiir ana nuna nakúmkáttsa Yus áishman kan najanamiayi. Tuma asamtai áishman kka etsenkrukchatniuiti. Antsu nuwanka áishman na shiir ana nuna nakúmkáttsa Yus najanamiayi.

8 Iis, Yus áentsun najaneak nuwanmayan áishman kan najanachmiayi antsu áishman ka ukunchíjjai nuwan najanamiayi.

9 Nuwan yáinkíát tusa áishman kan najanachmiayi antsu áishman kan yáinkíát tusa nuwan najanamiayi.

10 Tuma asamtai núwaka múuknum nukumaktiniaiti, nayaimpinmaya aencha ísarti tusa.

11 Ayu, tura áishman nuwajainchu atsuinti tura nuwasha núnisan áishman jainchu atsuinti. Yus ju nun kan núnisan atí tusa najanaiti.

12 Iis, Yus nuwan áishman numia najanamiayi tura áishmansha nuwanmaya akiiniaiti. Tura Yus mai najanaiti.

13 Enentáimpratarum atumsha. Nuwa múuknum nukumatsuk Yus áujsatin ¿pénkerkait?

14 Ii shuartinkia áishman intiash ajakin natsantchakait.

15 Antsu núwaka intiash ajakin pénkerchakait. Múuknum nukumaktinian susamuiti.

16 Watsek, shuar tuke umiktinian nakitiakka juna nekaati, iisha tura ashí Yus-shuartisha aya tu enentáimji.

Kristu jakamu enentaimtustin nampernum yajauch túramu

17 Yamái áarattajrumna nujain shiir enentáimtatsjarme. Atum irunkuram yáiniaiktiniaitrume tuke pénker wekasatin. Átum antsu iruntrarum yajauch awajnaiyarme.

18 Wats, Yusa Jeen irunkuram atumsháa enentáimprarum kanakurme. Kame tu ujatkarmai. Nekaschashit.

19 Tuke tupartatrumek Yúsnan ti nekana nu shuar paant nekanat tusarme. Antsu kajernaikar kanaktin pénkerchaiti.

20 Kanakin asarum Kristu jakamu enentaimtustin nampernum atum iruntrarum yúarmena nu nekas Yúsnachuiti.

21 Iis, ashí ní yurumken itiaawai ai yurumáttsa tura chikichan nákatsuk niá niá wari yuattsa wakerawai. Chíkichkia ishichik itiaana nu tsukamawai tura chikichcha nampekarai.

22 Yurumkan ishichik itiaana nu iniatsáarchamek. Atum áitkiarum núnisan Yusa jeen yurumáshtiniaiti. Natsantaiti. Warí, chíkich jea átsuk ai yurumátin. ¿Warimpait. Jujai shíirash áujsatjarum? Atsá. Jujai shiir áujsachminiaitjarme.

Kristu jakamu enentaimtustin námper

²³ Ii Uuntri Kristu jintintruama núnaka ujakmajrume. Jútas tuke súratsain, nu kashi ii Uuntri Jesus apatkun jukí

²⁴ Yusan yuminsamiayi. Nuyá puur tímiayi “Yuatarum. Jusha winia ayashruti; atumin jarutramkatta núiti. Ju yúakrum Winia enentáimtursatarum” tímiayi.

²⁵ Núnisai yurumá umik piniñnasha achik tímiayi “Ju piniñ Yamaram Chichamaiti. Tura winia numpar puármatai Yamaram Chicham nekas uminkiattawai tawai. Ju tuke úmakrum Winia enentáimtursatarum’ tímiayi.

²⁶ Tuma asamtai ju apatuk yúakrum tura piniñsha úmakrum ii Uuntri Kristu jakamuri enentáimtarne. Kristu táatsain ju tuke túratniuitrume.

Shiir enentajijai Kristu jakamu enentaimtustin nampernum yuatniuiti

²⁷ Tuma asamtai shuar Yusan enentáimtutsuk ju apatkun yuawar tura ju piniñnumiñcha umarar Kristu ayashincha ni numpencha yajauch enentáimta asa tunáa túraiti.

²⁸ Nu asamtai ashí shuar ju apatkun yútsuk tura ju piniñnumiñcha úmutsuk ni enentáin iwiaratniuiti Yusjai.

²⁹ Kristu ayashí jakamu enentáimtutsuk yúakka tura úmakka nuna tura asa asutniáttawai.

³⁰ Atumsha tura asarum jaarne tura pimpiruitrume. Chikichcha jákaru áiniawai.

³¹ Ímia-iik ímiakrinkia Yus in asutiámachaintji.

³² Tura ii enentáin Yus yajauchia nuna wáiniuk asutiámji. Túrachkunka ashí Yus-shuarchajai súmantikramawaintji.

³³ Tuma asamtai, yatsuru, iruntrar yurumátsa matsatkurmeke nákastarum métek yurumáin.

³⁴ Shuar tsukamakka ni jéeniñkí yurumáti. Nújaiñkia yajauchijjai irunchakrumin Yus asutiámashtatrume. Ayu, chíkich áatrururmena núnaka wi ai jean iwiarattajai.

12

Yusa Wakaní ni shuarin susamu

¹ Yusa Wakaní ashí ni shuarin súana nuna yamá ujakatjarme. Nekaatarum, yatsuru. Yus-shuar shiir takasarti tusa Yusa Wakaní juna súsaiti.

² Yaunchu átum Yus-shuar tuke ajatsuk chíkich shuarjai métek ántar-yus tikishmatramarme. Niisha ántar-yus ásar áujmattramsachmin ármiai.

³ Tura jújain shuar Yusa Wakaní kakarmarijjai chichaana nu nekaamni-aiti. Yusa Wakaníjainkia shuar “Jesus yajauchiiti” tíchamniaiti. Núnisan aya Yusa Wakaníjain “Jesus winia Úuntur asa akuptuktiniaiti” tíminiaiti.

⁴⁻⁵ Yusa takatri íruntsuk. Tura Yusa Wakanínkí ashí nuna takastinian súsaiti. Tura shuar Yus-shuara Uuntri chikichik ain ashí Yusa takatrin métek takaatsui. Antsu chikichkin ashí nankaamas péñker takaawai. Yusa Wakanísha nuna shiir takasat tusa súawai. Tura Nii wakera nuna Niñki ni shuarin chikichik chikichik niisháa niisháa súawai.

⁶ Yúskete ashí ni shuarin niisháa takamtikeana nu. Niñki ashí ni shuari enentáin takaak takatnasha shiir takamtikeawai.

⁷ Yusak túratin súam Yusa Wakaní kakarmari paant átatui nu takasmanum. Tura ashí shuar ní takatrijjai yáiniaktin áiniawai.

⁸ Júnaka Yus takamtikeawai. Nékana nu shuarnasha, unuimiarua nunasha Yúsnan ujaktinian súawai. Tura mai shuaran Yusa Wakaní kakarmarijiaí nuna túratniun súsaiti.

⁹ Chikichnasha Yúsan áujenak Yúsan ti enentáimtusar nekas itiurchat ana nuna iwiaratniun súawai. Nincha Yusa Wakaní kakarmarijiaí nuna takastinian súsaiti. Chikichnasha jaan tsuártinian súawai.

¹⁰ Chikichnasha aents niñki túrachminian túratniun súawai. Chikichnasha Yúsnan etserkatniun súawai. Chikichnasha shuar wari yajauch wakan-
nia péñker wakanniasha apatka nekaatniun súawai. Chikichnasha ni-
isháa chichaman chichastinian súawai. Chikichnasha niisháa chichasman
jintíatniun súawai.

¹¹ Tura ashí shuara enentáin nu Wakanik takaawai. Tura Nii wakera nuna ankant ankant súawai takastinian.

Ashí Yus-shuar Kristu ayashía áintsan ajainiawai

¹² Iikia Kristu ayashía áintsarⁱ ayashímkiaitji. Kristu ayashí muchitmarísha írunui. Niisha túmaitiat chikichik ayashtiniaiti.

¹³ Tura imianiakrin Yusa Wakaní chikichik awajtamsamji, Kristu ayashía áintsan. Israer-shuarsha, Israer-shuarchasha, ti itiurchat takaana nusha, ankant ainia nusha, ashí yamá chikichik ajasuitji. Tura Yusa Wakaní pimiutkamuitji Nijiaí tsaniñkia pujakur.

¹⁴ Ayashi muchitmarí aya chikichkichuiti.

¹⁵ Tuma asamtai, winia nawer uwejruchuitiat tuke winia ayashrunuiti.

¹⁶ Winia kuíshrusha jíiruchuitiat tuke winia ayashrunuiti.

¹⁷ Wátsek winia ayashur aya jíikitkiuin^ñkia ¿itiurak antukaintiaj? Winia ayashrusha aya kuíshkitkiuin^ñkia ¿waríjiaín nekasaintiaj?

¹⁸ Nu asamtai Yus winia ayashru muchitmarí ni wakeramunam ikiusuiti.

¹⁹ Chikichik muchitmajain ¿ayash áminkiait?

²⁰ Antsu untsurí muchitma akuisha chikichik ayashkiiti. Iisha núnisrik chikich chikich iisháa takayatrik métek takasar Yus wakeramu takamtsuk umíaji.

²¹ Winia jíiru péñker ain winia uwejrúncha wakerishtatjak. Winia muukarsha péñker ain winia nawernasha wakerishtatjak. Núnisan Yus-shuar shiir enentáimtumak ni yachin “atsumatsjame” tíchamniaiti.

²² Antsu ii muchitmarí ishichik enentáimtajnia nu atsakuin^ñkia ti atsumawaintji.

²³⁻²⁴ Chikich muchitmasha, ímiancha nu, shiir iwiarmamtaji. Tura nu muchitmaka shiir ísminia nujai nankaamas péñker wainji. Iis, shiircha nu antsu péñker wainji. Yus ii ayashin núnisan atí tusa najanamiayi.

²⁵ Nujain^ñkia ayashí muchitmarí máanaitsuk métek yáiniainiawai.

²⁶ Chikichik muchitmaram najaimiakum ashí ayashnium wáitiatsmek. Núnisan chikichik muchitmaram ayap ajakum ashí ayashnium shiir átsumek.

²⁷ Núniskete Kristu ayashíjiaí ayashímkiaí nu. Tura chikich chikich ni muchitmarí aji.

²⁸ Ayashnium muchitma írunna áintsan Yus ni shuarin untsurí takatan súsaiti. Emka Yus akatramu, nuyá ni chichamen etserin, nuyá jintinkiatin, nuyá aents túrachminian túrin, nuyá tsuákratin, nuyá yáin^ñkratin, nuyá akupin, nuyá niisháa chichamjai chicharin, mash írunui.

²⁹ ¿Ashí Yus akatramuk ainia. Ashí Yus-Chichaman etserniuk ainia. Ashí jintinkratniuk ainia. Aents túrachminian ashí túriniak ainia.

³⁰ Ashí tsuákratniuk ainia. Ashí niisháa chichamjai chichamtiniak ainia. Ashí niisháa chichamjai chichasman jintin^ñkratniuk ainia? Atsá. Túmachuiti.

³¹ Túmaitkuĩkia péñkera nu takastin wakeruktarum. Tura imiá péñkera nuna juĩ jintintiatjarne.

13

Aneatin

¹ Ju nuñkanmaya aentsu chichamen untsurí chichayatnak tura nayaimp-inmaya aentsu chichamencha chichayatnak anenkratchaknaka tampur meserua áintsanak aya ten-ten ajajai. Peñké ántranak chichaajai.

² Yus-Chichamnasha ti shiir étseriatnak, túrasha ashí uukmancha tura ashí nekaamniancha nékayatnak, túrasha Yúsan ti enentáimtusan murá umuchiayatnak, anenkratchaknaka peñké ántraitjai.

³ Ashí wi takakjana nuna atsumainian súayatnak tura Yus shiir awajsattsan winia ayashrúncha áesawarti tusan surumayatnak tura anenkratchaknaka ántranak túraitjai.

⁴ Aneñkartaka wari kajeatsui, tsáñkaiti, chíkich shuaran shiir awajniuiti, péejchach asa waantu enentáimtumatsui.

⁵ Aneñkartaka natsanta nuna túrichuiti, níniunak enentáimchaiti, kajechuiti, páchichuiti.

⁶ Chikicha tunaarin wararchaiti antsu péñker shuaran wararniuiti.

⁷ Aneñkartaka aya katsunteawai. Tsanú chichamnasha nakitiawai antsu aya péñker ana nuna nákwai. Tunáa shuar shiir ajastí tusa tuke nákwai.

⁸ Aneñkrattainkia tuke amuukashtiniaiti. Antsu ju nuñka amuukmataisha Yus-Chicham etserkatin atsuttawai, tura niisháa chichamjai unuimiatsuk chichastincha amuukattawai, tura ashí nekanamtai unuimiartincha atsuttawai.

⁹ Kame yamaikia aya ishichik nékaji. Yus-Chichamsha amutsuk étseraeji.

¹⁰ Túra ukunam mash nekanamtai yámankamtaik nekaamuka ántar átatui.

¹¹ Yaunchu wi uchich asan uchichia áintsan enentáimkiun chichasmajai. Antsu yamaikia uunt ajasan uchiniun iniaisaitjai.

¹² Núnisrik yamá ju nuñkanam Yus paant wáintsuji. Íspik kusurunam íimsatniua áintsan ketete. Antsu ukunam mai métek paant wainniaikiattaji. Yamaikia aya ishichik nékajai. Nuĩ antsu Yus winia nékara áintsanak nekaattajai.

¹³ Watsek, menaintiu amuukashtin áiniawai. Ju áiniawai: Yus shiir enentáimtustin, shiir ana nu nákwastin, tura anenkrattai. Ju menaintiunmasha anenkrattainkia ashí nankaamakuiti.

14

Niisháa chicham unuimiatsuk chichastin

¹ Nu asantai, anenkratin atarum. Tura núnisrumek Yúsnan péñkera nu takastin wakeruktarum. Imiankaska Yus-Chicham etserkatin péñkeraiti.

² Nújainkia niisháa chichamjai unuimiatsuk chichastin péñkerchaiti. Iis, nu shuar chíkich shuarjai chichatsuk aya Yusjai chichaawai. Ni chichame peñké antukchamniaiti. Yusa Wakaní nin chichastinian súawai túrasha tana nu nekaachminiaiti.

³ Antsu Yus-Chichaman étserae nuka shuaran yayawai. Shuaran ikiatsuártasa, tura ikiakártasa, túrasha atsankrattsa yayawai.

⁴ Niisháa chichamjai unuimiatsuk chichaana nuka aya nin ki katsuartinian yáinmamui. Antsu Yus-Chichaman étserae nuka ashí Yus-shuaran ikiatsuáawai.

⁵ Atumsha ashí mash niisháa chichamjai chichastinian wakerajrume. Túrasha nuna nankaamas Yus-Chicham etserkatniun wakerajrume. Aya chichastinjainkia ju imiá péñkerchakait. Kame chichasma jintiákmeka maak. Nujai Yus-shuar tsakarartatui.

⁶ Enentaimpratarum, yatsuru. Nuj iraakun aya niisháa chichamjai chichaaknaka ¿itiura yáintatjarum? Antsu Yus winia jintintruamuncha tura wi nékajna nunasha étserkunka yáintatjarme. Yus-Chichamnasha tura ashí Yúsnancha jintinkiuuncha yáintatjarme.

⁷ Peemsha tura tumansha wi tájana áintsan áiniawai. Péñker tuntuíyamuka paant nekaamniaiti. Tura péñker tuntuíyachkuinkia, nu tuntuíyamu nekaachminiaiti.

⁸ Suntarsha mesetnum wéenkui ni kapitíantri ni wakeramun ujakinian kachun umpuawai. Paant umpuakuinkia suntarsha ni wakeramun nekaawartatui. Tura paant umpuachkuinkia suntarsha ¿itiurak mesetnum wétinian iwíarat?

⁹ Atumjaisha núniskete. Nekaachmin chichamjai chichaakminkia ¿támena nuna itiur nekaawartata? Nase chichartsumeash.

¹⁰ Ju nunkanmaya chichamka ti untsurí írunui. Nu chichaman nékaka ashí antukmin áiniawai.

¹¹ Tura chíkich shuara chichamen ántachkunka níjjainkia yajaya apachia áintsanak ajajai. Niisha wíjjainkia yajaya apachia áintsankete.

¹² Tuma asamtai, Yusa takatri ti wakera asarum ashí Yus-shuaran ikjarartatna nú takat nekas wakeruktarum.

¹³ Nu asamtai niisháa chichamjai chichaitkiumka chichasumna nu jintiartin Yus seata.

¹⁴ Niisháa chichamjai Yusan áujeaknaka nekas winia wakantrujai áujeajai tura áujsajna nuna nékatsjai.

¹⁵ Antsu wikia júnisan enentáimjai. Yúsan áujeakun winia wakantrujajisha áujsattajai tura enentáimtsuk áujsashtatjai. Kantamkuncha kantamaj nuna enentáimkiun winia wakantrujajisha kantamattajai.

¹⁶ Amesha shuar iruntramunam aya wakanmijjai niisháa chichamjai Yus shiir yuminsakmincha nekaachmin asamtai nékachuka ámijjai métek áujsatniun jeatsui.

¹⁷ Ti shiir Yus yuminsam áujeatsmeash tura chíkichka Yusjai ikiakáatsme.

¹⁸ Ashí átum nusháa chichamjai chicharmena nuna nankaamas wikia chichaajai. Nuna Yusan yuminsajai.

¹⁹ Túmaitiatnak untsurí chichamjai chichasan ántumtikiashtinjainkia nankaamas Yus-shuar iruntramunmanka aya senku chichamchijjain tiintjai, paant jintintiwartaj tusan.

²⁰ Yatsuru, uchía áintsarum enentáimprairap. Kuirchia áintsarum tunáa túrashtin enentáimpratarum tura chíkich írunna nujai uunt enentáimpratniua áintsarum enentáimpratarum.

²¹ Yus-Papinium áarmaiti:

““Yajaya shuaran akupkan niisháa chichamjai chichastatjai. Tura nújajisha anturtukchartatui” tawai Yus.” Tu áarmaiti.

²² Nújainkia páantaiti, nusháa chichamjai chichastinkia Yus-shuarchan ashamtikiar enentáimtikratniun Yus súsaiti. Yus-shuaran tu enentáimtikratniun súsachuiti. Antsu Yus-Chichaman etserkatniunka Yus-shuarchan enentáimtiktsuk Yus-shuaran yáintinian súsaiti.

²³ Tuma ain, nékachusha tura Yus-shuararchasha Yus-shuar iruntramunam wayanka tura ashí niisháa chichamjai chichainianak wáinkianka “mash waurka ajararai” enentáimturmarshartatuak.

²⁴ Tura Yus-Chicham étserkurminkia nékachusha tura Yus-shuararchasha nu wayanka ashí tárugna nujai ni tunaarín ímias enentáimturtatui.

²⁵ Nújainkia ni enentáin úmak ana nuna paant wáiniak tikishmatar Yusan shiir awajsattawai. Tura “nekas Yus atumjai pujawai” títiatui.

Ashí tuke shiir takastarum

²⁶ Ayu, júnisaiti, yatsuru. Átum irunkurmin shuar takastinian Yus nin susamu túratí. Kantamátniuncha, jintintiatniuncha, Yus iwiainiakman ujaktinniasha, nusháa chichamjai chichastinniasha, nusháa chichasman jintiatniuncha, ashí Yus-shuar Yusjai tsakararti tusar júna mash takasarti.

²⁷ Nusháa chichamjai chichainiakka chikichik chikichik chichasarti. Tura jímíarchik menaintiuchiksha chichasarti. Tura ni timianka jintiartiniaiti.

²⁸ Jintiartin atsakuinkia nusháa chichamjai iruntramunam chichaschatniuiti. Antsu nínki Yusjai chichasti.

²⁹ Núnisan jimiarchiksha menaintiuchiksha Yus-Chichaman etserkarti. Tura chikich shuar núj iruntrar ni etserkamun enentáimprarti péñkerashit tusar.

³⁰ Tura chikichik chichaakui Yus chikichan núj pujana nuna yamaram chichaman súakuinkia emka chichaa nu iniáisatí.

³¹ Núnisrum Yus-Chicham etserkatin wakerarmena nu chikichik chikichik chichasrum ashí jeattarme. Nújai sha Yus-shuar unuimiarar kakarartatui.

³² Yúsnan étserainia nuka tuke enentáimprar chichastin áiniawai. Enentáimtsuk nánkamsan chichasmin áiniatsui.

³³ Yuska pachimtak chichaman nakitiak shiir chichasmanak wakerawai. Chikich nunkanmasha ashí Yus-shuar iruntramunam túrainia áintsarum túratniuitrume atumsha.

³⁴ Yus-shuar iruntramunam nuwá chichastin surimkiamuiti. Yus akupea núnisan núwaka chichatsuk umin átin áiniawai.

³⁵ Inintrustinian wakerakka ni jeen waketkin ni aishrin núj aniasti. Ashí iruntramunam nuwá chichastin natsantaiti.

³⁶ Júsha enentáimpratarum. Yus-Chicham atumjai nan kamnachmai. Núnisan aya atumjini Yus-Chicham jeartamchaiti. Chikich nunkanmasha Yus-shuarti túrutai enentáimpratniuitrume atumsha.

³⁷ Atumjin shuar “Yus-Chichaman tuke etserniuitjai” enentáimtumatsuash. Tura chikich shuarsha “Yusa Wakaní tuke winia akuptaiti” enentáimtumatsuash. Nu shuarka wi áatjarmena nuna enentáimprar “nekas Yúsnan tíniuiti” tiartí.

³⁸ Tu táchakuinkia niisha ántrar áiniawai.

³⁹ Nu asamtai, yatsuru, Yus-Chicham etserkatin wakeruktarum. Nusháa chichamjai unuimiatsuk chichastincha surimkiairap.

⁴⁰ Túmaitiat antukchamin awajtsuk ashí shiir túratarum.

15*Kristu nantakmia*

¹ Ataksha, yatsuru, uwempratin chichaman wi etserkamaj nuna atumin enentáimtikrattsan wakerajrume. Nu chichamsha atumsha enentáimturarum tariarurme.

² Nu chichamsha átum ántar enentáimtachkurmeka uwempraitrume. Wi ujakmajrum nu tuke enentáimtaitkiurmeka nekas uwempraitrume.

³ Winia ujakmunak ujakmajrume. Nu chichamsha ashí nan kaamas úuntaiti. Júiti nu chicham: Íi tunaarin asakártasa Kristu jarutramkamiaji, Yus-Papinium tana núnisan.

⁴ Tura jakantai iwiarsarmiyai. Nuyá menaintiú tsawant tsawarmanum Yus Nin iniantkimiayi, Yus-Papinium tana núnisan.

⁵ Nantakisha Pítrun wantintiukmiayi, nuyá ni akatramurin wantintiukmiayi.

⁶ Nuyanka kiniantusa (500) nan kaamas Yus-shuaran wantintiukmiayi. Nú shuar numiasha ishichik jákaru áiniawai tura untsurí tuke pujuiniawai.

7 Nuyasha Sántiakun tura nuyá ashí ni akatramurin wantintiukmiayi.

8 Ashí amúamunmasha winiasha wantintiurkamiayi, wi yajauch wekaa ain.

9 Wisha Yus-shuaran ti yajauch awajsa asan chíkich Yus-akatramujai imianchaitjai. Nekas winia penkerujai ni akatramurintjai tíchamniaitjai.

10 Antsu Yus ti shiir anentak winia enentáirui pujurtus penker najataiti. Nu asamtai winia kakarmarjai takaschaitjai, antsu Yus, anenkartin asa, winia enentáirui takaakuí ashí ni akatramurin nankaamas takasuitjai.

11 Tura wi takaakuísha tura ni takainiakuísha mai penkerkete. Nu chichamka mash étsereaji tura nu chichamsha átum enentáimtusmarme.

Jákaru nantakiartatui

12 Iisha “Kristu jakamunmaya nantakniuiti” tu étsereaji. ¿Itiur nuikia shuar jakamunmaya nantakchatniuiti tuinia?

13 Jakamunmaya nantakchatniuitkiuinikia nuikia Krístusha nantakchaiti.

14 Tura Kristu nantakchaitkiuinikia ii ujajnia nu penké ántrai, atumsha Kristu enentáimtarmena nusha ántrai.

15 Núnisaitkiuinikia iisha “Yus Krístun iniantkimiayi” tákur waitruamji. Iis, nekas jakamunmaya nantakchamniaitkiuinikia nuikia nekas Yus Krístun iniantkichiuiti.

16 Jáka nantakchatniuitkiuinikia imia Krístusha iniantkichmaiti.

17 Tura Kristu iniantkichmaitkiuinikia átum Kristu enentáimtamusha penké ántrai. Tunaarmisha asakárchamu ániawai.

18 Núnisaitkiuinikia Yus-shuar jákaru ainia nu tuke menkaru ániawai.

19 Iikia Kristu enentáimtusar tuke Niiijai shiir pujustin nákaji. Tura aya jú nunkanam pujustinaitkiurkia Kristu ántar enentáimtakrin ashí nankaamas waitnentrampnatniuitji.

20 Antsu imiankas Kristu jakamunmaya nantakniuiti. Ashí ukunam jakamuya tuke jákashtinian nantakiartatna nuna Nii émtukuí.

21-22 Yaunchu Atan tunáa túramtai ashí shuar jákatin ániawai. Núnisan yamaikia Krístujain tuke atakka jákashtinian nantakiartiniaiti. Iis, chikichik áishmanjain jákatin nankamnamiayi. Nuka Atankauyayi. Núnisan chikichik áishmanjai nantaktin nankamnamiayi. Nuka Krístuíti.

23 Yus wakerana nuí Yusna nu mash nantakiartatui: Kristu emka-juukma áintsan émtukim nantakniuiti tura atak jú nunkanam tara ashí ni shuarin júuktinia áintsan iniantkittiwai.

24 Nuinkia mash amuukattawai. Nuí Kristu ashí kapitániasha, ashí akupniuncha, ashí núnisan jú nunkanam íranna nunasha nupetak emesrattawai. Krístusha ashí mash ni Aparin susattawai. Tura Yus Apa ashí akupin átatui nuikia.

25 Iis, júnisan átatui. Emka Yus Apa ashí ni nemasrin nupetak Krístun susattawai akupin atí tusa.

26 Tura ni nemasrin nupetak ashí amúamunam jákatniuncha nupetkattawai.

27 Yus Apa ashí Krístun súsaiti ashí akupin atí tusa. Yus-Papinium tu áarmaiti. Tura “ashí Krístun súsaiti” táyat Yus Apancha susamuiti tátsui. Antsu Yus Apa ashí Nin susa asa Niñki súsachmaiti.

28 Tura Yus Apa ashí mash ni Uchirin Krístun nekas susamtai Kristu nuikia ashí akupin ajas atak ni Aparin mash awantuki núnisan surumaktatui. Nuinkia Yuska tuke ashí nankaamantu átatui.

29 Ayu. Tura shuar jakan enentáimtusar imiantinniasha ¿urukamtia nuna túruinia? Jákaru nantakchatniuncha ¿urukamtai imianainia?

30 Iikia ¿urukamtai tuke jániñkiaruitiaji? Nantakchatniuitkiuinikia ántra wáitsaintji.

³¹ Atsá, penké áintsachuiti. Nu asamtai átum ii Uuntri Jesukrístu enentáimtakrumin wi shiir enentáimtajrume. Tura wisha tuke tsawantin ti itiurchat pujakun jákatniua áintsan pujajai.

³² Jakamunmaya nantakchatniuitkiuin_{nkia} wi ántranak kajen shuarjai Ipisi-unam máaniakuitjai. Maa, uunt yawáa áinis kajen áрмаi. Wats, núnisaitkiuin_{nkia} antsu “yurumár nampektai, kashin jákashtatjik” titiai nuikia.

³³ Anannawairap. “Pénkeraitiatam yajauch shuarjai tsanin_{nkia} wekak-meka yajauch máatrattame” tiniu áiniawai.

³⁴ Tunáa ikiuakrum pé_{nk}er wekasatin shiir enentáimpratarum. Iis, shuar Yúsan nékainiachu tuke awai. Atumin natsa_{aruk} tusan tájarme.

Iniantkimiu ayash átatna nu

³⁵ Shuarsha inintruschaimpiash çjákarusha itiurak nantakiarat. Nantakiarsha warí ayashniak takusarat?

³⁶ Enentáimtsuk inintra_{wai}. Jin_{nkia}íaí araamsha jaka áintsan_{nk} amúatsuk. Túrayat tsapaatsuk.

³⁷ Tsapaitniurisha araatsme antsu trikiu jin_{nkia}iaichisha chíkich árika jin_{nkia}iaichirisha araame.

³⁸ Nuyá tsapaakuisha Yus wakerana núnisan_{nk} ní tsapaitniur_{incha} súawai. Tura an_{nk}kant an_{nk}kant tsapaitniur_{incha} súsaiti.

³⁹ Núnisan_{nk} ashí ayash métekcha áiniawai. Áentsnaka niishaaiti. Kuntinniasha niishaaiti. Nanamtinniasha namaknasha niisháa áiniawai.

⁴⁰ Nayaimpiniam yaa írunui tura ju_{nk} nun_{nk}kanam írunna nujai nusháa íimtin áiniawai. Nayaimpinmayasha nun_{nk}kayasha shíirmari nushaiti.

⁴¹ Etsá wincharisha nantunusha yáanusha mash nushaaiti. Nuamtak yaaksha chikicha winchar_{incha} chikichnaja_{incha} nushaaiti.

⁴² Núniskete jaka nantaktincha. Káurtinnium iwiarsam jákashtinnium nantaawai.

⁴³ Antra nu iwiarnawai, shiira nu nantaawai. Kakarmachua nu iwiarnawai, kakarma nu nantaawai.

⁴⁴ Juyá ayash iwiarnawai, nayaimpinmaya ayash nantaawai. Juyá ayash átsuk. Núnisan_{nk} nayaimpinmaya ayashsha awai.

⁴⁵ Yus-Papinium nuní áarmaiti:

“Emka áishman_{nk} ni naari_{nk} Ata_{nk}, aents ajas iwiaaku ajasmiayi.” Tu áarmaiti. Ukunman_{ka}, yamaram Ata_{nk}ka áintsan_{nk}, Kristu, wakan asa, ashí áentsun nekas iwiaaku átinian susamniaiti.

⁴⁶ Nayaimpinmaya ayashkia émkachuiti antsu juyá ayash émkaiti tura nuyá nayaimpinmaya nu.

⁴⁷ Emka áishman_{nk} nun_{nk}kajai najanamu asa nun_{nk}kayaiti. Ukunmaya áishman_{nk}sha ii Uuntri Kristu asa nayaimpinmayaiti.

⁴⁸ Ata_{nk}ka áintsan_{nk} ainia nusha juyá ayashtin áiniawai. Kristu áintsan_{nk} ainia nusha nayaimpinmaya ayashtin áiniawai.

⁴⁹ Yamái juyá áiniakur ukunam nayaimpinmaya ayashtin ajastatji.

⁵⁰ Juna tájarme, yatsuru. Ayash númpentin asa nayaimpiniam, Yus aku-peana nu_{nk}, wayachmini_{ai}iti. Iis, káutain_{nkia} káurchatniunam wayachmini_{ai}iti.

⁵¹ Yaunchu u_{nk}kma nu yamáí nekaatarum. Ashí jákashtatji, túmaitiatar ashí yapajniáttaji.

⁵² Tura pusa_ri muíttsarni_{nk} ti wárik yapajniáttaji. Tura ashí amuukai tusa umpu_{ar}tatui. Nú umpúamunmasha Yus-shuar jákaru ainia nu atak jákashtinian nantakiartatui. Iisha nu_{nk}in yapajniáttaji.

⁵³⁻⁵⁴ Jú kautain_{nkia} yamáí jákatniuitiat káurchamnia ajastini_{ai}iti. Tú_rasha jákachmin átatui. Nu túrunamtaisha Yus-Papinium aarma uminkiattawai:

“Jákatniun Yus nupetak amukuíti.

⁵⁵ ¿Itiur jákatjik yamaikia. Jákatniusha itiur nupettamkan mantamataji?” Tu áarmaiti.

⁵⁶ Yaunchu Yus akupkamu tiniu asamtai shuar tunáa tura jákatniuiti.

⁵⁷ Yamái antsu ii Uuntri Jesukrístu túramujai jákatniunka Yus nupetkaiti. Tura incha nujai uwempratniun amaakui shiir yúminkiaji.

⁵⁸ Nu asamtai, aneamu yatsuru, kakaram ajasrum yawetsuk nankaamas Yusa takatri takastarum. Ii Uuntri Krístujai tsaninkia takaarum nuka penké ánrachuiti. Nu paant nékarme.

16

Yusa kuitri irurtin

¹ Yusa kuitri irurtinkia, Yus-shuaran Karasea nunkanam tímiaj núnisnak atumniasha tájarne.

² Ashí tumintin, Yus súramna áintsam akankam ikiusta. Nújainkia wi jeattaj nuí yaunchu akankamu mash irurmin átatui.

³ Nuí jeancha átum anaiyarmena nu shuaran papijiai Jerusarénum akupkattajai. Tura atumí kuítrumin aisha ii yachin sústartatui.

⁴ Wisha wéminiaitkiunkia wijiai wéartatui.

Papru irastatna nuí

⁵ Wi Masetúnia nunkanam wétiniaitjai tura nuyá Kurintiunam jeattajai.

⁶ Nuisha untsurí tsawant pujuschatjash. Ishichik nantusha wéchamnianum pujuschatjash. Tura wi atak wéakui atumsha yáintkiarum shiir akuptukchat-tarpash.

⁷ Aya wárik nankaamaktinian nakitiajai. Antsu Yus wakerakuinkia untsurí tsawant atumjai pujustaj tajai.

⁸ Tura juin Ipiasiunam pintikustís nampernum pujustajai.

⁹ Juinkia Yusa takatri tí shiir takastin awai. Tura untsurí shuar wi takaa-mun nakitiainiawai.

¹⁰ Timiutéu nuí jeamtainkia, shiir awajsatarum; sapijmiakain. Niisha wijiai métek Yusa takatrin takaawiti.

¹¹ Nu asamtai nakitraitrap. Antsu yáinkrum winí shiir akupkatarum. Chíkich yachijiai tatí tusan nákejai.

¹² Apurusnasha chíkich yachijiai winí írmasartí tusan ti seamjai tura penkesha nakiarmai. Kame nii ankant aku nuí winishtimpiash.

Áujmamsamu

¹³ Aneara tariarum Yus nekas enentáimtustarum. Áishmanchakaitrum, kakaram ajastarum.

¹⁴ Anenkartamujai mash túratarum.

¹⁵ Ayu, yatsuru. Estepanasa shuari ashí emka Akaya nunkanam Yus-shuar ajasarman nékarme. Niisha Yus-shuaran yáintajtsar tuke takainiawai.

¹⁶ Niisha tura ashí nijiai métek yáinkiar takainia nú shuar seatmana nu tuke túratarum.

¹⁷ Estepanassha Jurtunátusha Akaikiusha atumíiyá táarmatai shiir waraa-jai. Átum yajá pujakrum tujintiarmena nuna túrawarmai.

¹⁸ Niisha winia shiir enentáimtikrurari. Núnisan shiir enentáimtikramprattarme. Nuní aents tuke shiir enentáimtustiniaiti.

¹⁹ Asia nunkanmayá Yus-shuar amikmáatmainiawai. Akirasha ni nuwe Prisirajaisha ashí Yus-shuar ni jeen Yus-Chichaman irunturarusha Jesusa náariin amikmáatmainiawai.

²⁰ Ashí ii yachisha amikmáatmainiawai. Nuámtaksha shiir awajnaisrum amikmáaniatarum.

²¹ Wi Papru asan júchiniak winia uwejrujai áaran amikmaajrume.

²² Ii Uuntri Jesukristun aneachuka yajauchiniam yuminkramu atí. “Ii Úuntri, wari tatá.”

²³ Ii Uuntri Jesukristu yainmakarti.

²⁴ Jesukristunu asakrumin atumin ashí ti aneajrume. Nu atí.

Papru KURINTIUNMAYA SHUARAN Ataksha papin aar akuptukma

Kurintiunmaya Yus-shuaran Papru áatramiania nu

¹ Wi Pápruitjai Jesukrístu akatramu. Yus nuna wakerakui ni akatramuri anaikiamuitjai. Ii yachj Timiutéujai Yus-shuar Kurintiu péprunam íruntrumna nuna áatjarme. Kame ashí Akaya nunkanam Yusna ajasurmena nunasha áatjarme.

² Apa Yussha, ii Uuntri Jesukrístusha shiir enentáimturma ásar imiatkinchanum tuke shiir pujustinian yáinmakarat tusan wakerajrume.

Papru wáitsamuri

³ Ii Uuntri Jesukrístu Apari, ii Yusrí ana nuna naari uunt awajsatai. Niisha ii Aparínti. In waitnentramaji. Tura Niisha ii Yúsrínti. Tuma asa in tuke atsañtamji.

⁴ Ii wáitiajnia nu Yуска in atsañtamji. Tura in atsañtamjnia nútiksarik iisha chíkich shuar wáitiajnia nuna atsañkrarat tusa túrutmaji.

⁵ Warí, Kristu wáitsamuri núkap pachiinkiaitjnia núnisrik ni atsañkramurín núkap pachiinkiaitji.

⁶ Tuma asamtai, wáitiajnia nu, Yusa uwentikrampratniuri tura ni atsañkratniuri atumsha takustarum tusar wáitiaji. Tura Yus in atsañtampramjnia nu, Yusa uwentikrampratniuri tura ni atsañkratniuri átum takustarum tusar atsañkramuitji. Wats, átum uwentikramu tura atsañkramu asarum, ii wáitsajnia nútiksarmek wáitiayatrum shiir enentáimsarum katsuntramniaitrum.

⁷ Tura “túrattawai” tu enentáimtajrume. Warí, átum iijjai métek wáitsaitrum. Núnisan iijjai métek Yus atsañtamtsurmek.

⁸ Yatsurtiram, iikia Asia nunkanam ti itiurchat wáinkiamjnia nu nekaatarum tusar wakeraji. Imiá itiurchat wáinkiar iikia katsuntratin jeachmaji.

⁹ Nu itiurchatnumiá “iwiaaku jíinkishtatji” tu enentáimsamji. Túrasha “iikia tujinchaitji” tu enentáimtumatsuk, antsu jakamunmayan inianniuá nú Yúsan enentáimtusarat tusa nu túrunamji.

¹⁰⁻¹¹ Jakamnia itiurchatnumiá Yуска uwentikrampramji. Tura yamaisha uwentikrampratajtsa pujurtamji. Tura atumsha in Yus áujtakrumniñkia “Yuska tuke uwentikramprattaji” taji. Tura untsurí shuar Yus aujsa asakrumin, ii uwempra asakrin untsurí shuar Yúsan yumínsartatui.

Kurintiunam wau wéchatniun Papru ujakmiania nu

¹² Yatsurtiram, ju nekaatarum tusar wakeraji. Ju nunkanam pujusar tura nekaska atumjai pujusar anañtsuk tura Yus umirkar wekaimji. Aya ii nekatairijjai wekaichamji. Antsu Yus in waitnentrama asa péñker wekasatniun yainmakmaji. Nu nekaar shiir enentáimji.

¹³ Áatjarmena nu páantaiti. Átum áujsarum nekaatin jearmena nunak aarjai. Chikichan nekaachminian aatsjai. Péñker nekaatarum tusan wakerajrume.

¹⁴ Ishichik nékayatrumek nú núkap tuke nekaki wetarum tusan wakerajrume. Nuñkia Jesukrístu tátinia nú tsawantaj átum winia shiir enentáimtursattarme. Tura átum péñker wekasa asakrumin shiir enentáimtustatjarme.

15 Tura ii shiir enentaimtuniaj nuna nékakun ataksha Yusá waitnenkartu-tairi nekapsak tusan ataksha atumiin irastinian wakerimjai.

16 Masetúnia nunkanmaani wéakun írkuta nankaikitjiarum tusan enentáimmiajai. Tura wáketkuncha ataksha ístajrum tusan wakerimjai. Túramtai wi Jutía nunkanam weakui átum yáintkiatarum tusan atumin ístinian wakerimjai.

17 Nuinkia ¿urukamtai túrachmaj? ¿Pénker enentáimtsukek “wetajai” tímiaj? ¿Wi Yus-shuarcha nunisan, jimiara chichamtiniaiti, tú enentáimtursarumek?

18 Núchaiti. Yus tana nuna tímiatrusan umiana nútiksarik iikia ii chichame umiktai tusar wakeraji. Jú chichamaik, “Ee, atsá” tátsuji.

19 Wisha Serpanujai Timiutéujai Yusa Uchiri Jesukristunun ujakmajrume. Niisha jú chichamaik, “Ee, atsá” tíchaiti. Antsu nii tana nuna tuke umíawai.

20 Nijjaisha Yus tana nu tímiatrusan uminiui. Tuma asamtai Jesukristu enentáimtakur “nii tana nuna nekas túrattawai” tu enentáimji. Tu enentáimsar Yusa naari shiir awajeaji.

21 Atumniasha incha ikiakátmajnia nu Yúsaiti. Krístunu ajasu asakrin túrutmaji. Tura anaitiamak Niiniu awajtamji.

22 Tura ukunam ii achiktatjina nuna, nekas amastatjai tusa Yus ni Wakanin ii enentáin apujturmaji. Nujai Níniuitji tusar paant nékaji.

23 Atumiin itiurchatan wáinkiaij tusan nakitiakun atumí péprurin Kurintiu-nam jeachmajai. Wáitrakuinkia “Yus iirsati” tajai.

24 “Aya wi tájana nútiksarmek Yus enentáimtustarum” waantu enentáimtumasar nu titin nakitiaji. Yus nekas enentáimtusmaajai kakaarme. Antsu nekas warastarum tusar wakeraji.

2

1 Tuma asamtai, atak kúntuts awajsajrum tusan nakitiakun, “atumí tunaari íwiartsurminin jeashtatjai” tímiajai.

2 Wi atumin kúntuts awajkuncha, ¿yaki winia waramtikrusat? Aya atumek, wi nuik kúntuts awajsamjarmena nuke waramtikrusminiaitrume.

3 Wi jeakun atumí tunaari íwiartsurminin kúntuts enentáimsaj tusan nakitiakun, nu papin áarmaj nútiksarak áarmajai. Warí, atumketrume winia waramtikrustin.

4 Nekaatarum. Nu papin áarmiajai. Kúntuts awajsatjarum tusan áarchamjai; antsu ti aneajrumna nu nekaatarum tusan wakerakun áatramajrume.

Yajauchin túrana nu tsankuratin

5 Túrasha kúntuts awajtusmia nu, aya wíniak kúntuts awajtuschamai. Antsu atumniasha ishichik kúntuts awajtamsayi. Patasa chichasaj tusan “ishichik” tajai.

6 Kame nu áishmankan iruntra chicharkarum wáitkiasmarum nuke máakete.

7 Antsu yamaikia tsankuratniuitrume. Shiir enentáimtikratniuitrume. Niisha imiá kúntuts pujus nú arant ajasáin tusarum túratniuitrume.

8 Túrakrum nii nekas anearmena nu paant iniaktustarum tusan seajrume.

9 Kame “aajna nuna umirtukartimpiash” tímiajai. Kame nuna nekaataj tusan wakerakun nu papin nuik áatramjarume.

10 Átum tsankurearmena nú shuaran wisha núnisnak tsankureajai. Tura tsankuratin ákuinkia, wi tsankurajna nu ashí atumnian enentáimtusar, Kristu íimmianum túrajai.

11 Kame uunt iwianch Satanás in emestampratajtsa wakerana nusha nékaji. Tuma asamtai, túrawain tusar tsankuratniuitji.

Trúas péprunam Papru juákchamiania nu

¹² Krístunu shiir chichaman Trúas péprunam etserkatajtsan jean, ti pé_nker takastinian wáinkiamjai.

¹³ Túrasha ii yachi Titiun wáinkiachu asan, shiir enentáimsatniun tujinkiamjai. Tura asamtai Trúasnumiã aentsun áujsan ikiukiaran Masetúnia nuñkanam wémiakai.

Krístujai nupetkamniaitji

¹⁴ Kristu Jesusjai Yuska incha nupetmamtikramak ewekatmasuitji. Tuma asamtai Nincha ti shiir yúminsa pujajai. Tura kukuj kun_kúakui, ashí nékainia núnisan ii etserkamujai Kristu shiir chichamen Yuska ashí aentsun nekamtikiainiawai.

¹⁵ Kristu in pujurtamu asamtai Yusjai nekapsamka iikia kun_kúaji. Ii kun_kúajnia nuna uwentikramu ainia nusha tura uwentikrachma ainia nusha nekaprannia ainiawai.

¹⁶ Men_kakatniunam weena nuka ii kun_kúajnia nuna jakamnia mejea nekapramji. Tura iwiaaku átinnium weena nuka iwiaaku átin kun_kúa nekapramji. Maa, nu túratniuncha ¿yaki jeá?

¹⁷ Kame untsurí aents kuítian achiktaj tusar Yusa chichamen yapajinia núniskechuitji. Antsu Krístunu ajasu asar, Yus akupkamu asar, Yus íimmianum anantsuk esetsar étsereaji.

3

Yamaram chícham najanamu

¹ ¿Nu tákurni_nka, “ataksha ni_nki waantu enentáimtumainiawai,” tu enentáimsarmek? ¿Chíkich túruinia núnisrik, “Ju áishman nekas Yus-Chichaman etserin áiniawai” tusa papí aarma atumin iniaktustinkiaitaij? ¿Chíkich iniaktustin nú papí atumin seatniukaitaij?

² Atsá. Átumka ii papirja núniskechukaitrum. Ii enentáin nu papí áarmaiti. Tura nú papí áujsatniua núnisan ashí aents atumí túramurí wáinkiar ii etserkamaj nu, Papru nekas Yusa takatrín takaawai tusa nekaamnia áiniawai.

³ Iis, tátsujak. Papí aarma núnisketrume. Nu papí Kristu áarmaiti tura iisha nú papí atumin súaji. Tíntiajainchu antsu iwiaaku Yusa Wakanjijai áarmaiti. Kayanmasha áarchamuiti; antsu shuara enentáin, auka, áarmaiti.

⁴ Kame Krístunu asar, Yus enentáimta asar, nusha tíminiaitji, taji.

⁵ Ju nékaji; imia iik pen_ké tujinkiaitji. Antsu ii túrajnia nu Yus ni kakarmarín súramkurin túraji.

⁶ Yamaram chichaman Yus najanamia nuna, incha pé_nker etserkatniun suramsaitji. Yaunchu aarma chíchamnum, ashí takamtsuk umirkachrikiatuke jakamniuyaji. Antsu yamaram chíchamnum, Yuska ni Wakanjijai yamaram wekasatniun súramji. Yusa kakarmarijjai nu chícham étserji.

⁷ Yaunchu chíchamnaka kayanam aar Yus Muisaisan susamiayi. Susamianuj, Muisaisa yapi ti wincha ajasmiai. Túrunamtai Israer-shuar ni yapin íistinian tujinkiarmai. (Túrasha nu wincha mushatmaki wémiayi.) Túrasha nu chíchaman shuar umirkatniun tujintiakui, nu chíchamsha aya tuke jákatniunam shuáran ejemiayi. Túmayatan winchajai susamuyayi.

⁸ Tura yamaram chíchaman Yusa Wakaní súramna nu, nujai nan_kaamas shíiraiti.

⁹ Kame mesertinnium ejeana nú chícham winchajai susamuyayi. Tura nujai nan_kaamas Yúsnum ejeana nú chíchamka Yus íimmianum pé_nkeraiti.

¹⁰ Iista; yamaram ana nu imiá shiir asa, yaunchu wincha amia núnaka mushatmamtikiui.

11 Núkap arur pujuschamnia nu wincha áchamkia. Kame tuke átinia nuke nujaj nankaamas shíiraiti.

12 Nu nékakur ti paant étserji.

13 Muisais túramia nútiksarik túratsji. Ii uuntri Israer-shuar ni yapin wincha ajas menkaan wáinkiarain tusa tarachjai ni yapin Muisaiska nukumakmiayi.

14 Tura nu arantcha Muisaisan anturkarmia nuna enentáisha nukukmauyayi. Nekaatniun tujinkiarmiayi. Tura yamaisha núnisan yaunchu aarma chichaman áusam antukar nekaatniun tujintiainiawai. Kristu enentáimtuschatin ni enentáin nukukma nu yapajíáchmaiti. Aya Krístujaj nuka yapajíámniaiti.

15 Yamaisha Muisaisa áarmarin áusar nékainiatsui, ni enentáimmiari nukurkamu asa.

16 Tura aencha ni enentá yapajíá Uuntna ajasmataikia ni enentáimmiariya nukurkamu ana nu jusamuiti.

17 “Uunt” tájinia nu, Yusa Wakaníiti. Uunt Yusa Wakaní pujana nuj ankant ajastiniaiti.

18 Nuke asamtai, iisha ii yapí tarachjai nukukchamu asar íspikia núnisketji. Uunt Kristu péñkeri iniakmaji. Kristu péñkeri nú núkap takaki wéakur, Krístujaj métek ajastasa pujaji. Yusa Wakaníkia nuna túrawai.

4

1 Yus in waitnentrana asa ni chichamen etserkatniun ataktamsaitji. Tuma asamtai yawetsuk takaaji.

2 Uuka túratin ana nuyá tura natsanmaj ana nuyasha kanakmiayi. Anankatai tusar wekaatsuji. Tura Yus-Chichamjai nakuratsji. Étserkur aya Yus-Chicham tana núchik étserji. Ashí aents nuna antukar, “nekas núiti Yus-Chicham” tiarat tusar túraji. Wi tájana nuna Yus nékawai.

3 Uwempratin Chicham ii étserjinia nu páantaiti. Áyatik menkakatniunam weena nu “páantchaiti” tuíniawai.

4 Uunt iwianch, ju nunká uuntri ana nu, nu aentsu enentáin ukusturuiti. Uunt Krístunu shiir chichaman ii étsermajaj tsáapnin enentáimprarin tusa ukustawai. Nu Kristu Yúsan ímiatrusan nakumui.

5 Iisha étserkur, Jesukristu ii Úuntrinti tu étseraji. Iikia atumí úntrintji tátsuji. Antsu, Jesus ii uuntri asamtai, atumí yáintrintji, taji.

6 Yaunchu kiritin aan Yus tsáapin ati tusa tsáapnin awajsachmakia. Nú Yúsaiti ii enentáin tsaapnin awajtamsamia nu. Nu tsaapnijaj ni shiir-marín, Jesukristu iniakmia nuna, ashí aents nekaawarat tusar Jesukristunun étseraji.

Yusak enentáimtusar wekasatin

7 Nu tsáapin imiá péñker ana nuna ii ayashiin Yus ikiusuiti. Tura ii ayashj kakarmachu, nuwe najanamua áanin asamtai, warí, kakaram ájinia nu Yúsnumiáchukait. Ii aj nuna nekaawarat tusa Yuska ni tsáapnintrin ii ayashiin ikiusuiti.

8 Tuma asamtai ii itiurchatri árentmaku árinin tuke jiinkimniaitji. “Itiurkatjik” taji, túrasha Yus yáinmaji.

9 Aents pataaturmainiakrincha Yus ikiurmatsji. Emesrataj tukamá tujintiainiawai.

10 Kame Krístun máataj tusa tuke wakeriarmia núnisan incha tuke mantamataj turamainiaji. Túrasha jákachu asar Kristu kakarmari ii ayashiin iniakmaji.

¹¹ Iisha Jesusna ajasu asar wekaajnia nuĵi tuke tsawant tsúumainium jasat-tuk ajaji. Túrar ii ayashĵi jakamniaiat nu ayashnium Jesusa iwiaakmari paant iniakmaji.

¹² Iisha Yus-Chicham étserkur ii ayashiin jasattuk ajaji, tuma aĵn atumsha umikiu asarum nekas iwiaaku atin wáinkiarne.

¹³ Yus-Papinium yaunchu áarmanum: “Yúsan enentáimtusmajai, tuma asan etserkamjai” tátsuk. Iisha núnisrik Yus enentáimtusar wekaaji. Tuma asar étserĵi.

¹⁴ Yus kakarmaiti. Uunt Jesusan jakamunmayan iniantkimiayi. Incha núnisan Jesusjai iniantamkittiaĵi. Tura atumjai métek ni pujamunam ju-ramkittiaĵi. Nusha paant nékaji.

¹⁵ Atumsha untsurĵi aencha Yus-Chicham antukakrumin, Yus yáinmakurme. Tuma asamtai atumsha nútiksarmek Yus yumĵnsarum pujarme. Nujai Yusa naari uunt awajsamuiti. Nu nekaar wáitsatin ashamatsĵi.

¹⁶ Tura yaweatsĵi. Ii ayashĵi amuiki wéakuisha ii enentáinkia yamaram ajaki wéawai.

¹⁷ Warĵi, ukunam tuke shiir pujustatĵinia nu enentáimtakrikia, ju nunkanam wáitiaĵnia nu, ti itiurchataiat, aya yamaiya asa tiikia itiurchatchaĵiti, tura wárik nankaamawai. Túrasha ii itiurchatriĵiaĵi Yuska ti shiir ana nuna amuukachmin ana nuna núkap suramsattaji.

¹⁸ Tuma asamtai wáinjinia nu ti enentáimtatsĵi. Antsu wáintsujnia nu nekas enentáimtaji. Wáinjinia nusha aya yamaiyaĵiti. Antsu wáintsujnia nuka tuke amuukachminiaiti.

5

¹ Wats ju nékaji. Nayaimpiniam ii shiir pujustinian amuukachmin ayashin Yus najanamun ikiurtamsaitĵi. Aents najanachmaiti nu. Tuma asamtai ii ayashĵi emesnakuisha warĵi ikiurtamajia. Nuka aaka núnisan amuukamniaiti.

² Ju ayashnium pujusar wáitiaĵi, taji. Yamaram ayash nayaimpiniam pujana nu achiktai tusar wakeraji.

³ Ayashtichu ajasajĵi tusar, yamaram ayashtin ajastaitsar wakeraji. Pushía núnik yamaram ayash in nukurmaktai tusar wakeraji.

⁴ Tura juĵi ayashjai pujusar wáitsar pujakur shiir enentáimtsuji. Arut pushí áiktinia núnisrik ju ayash ikiuktiaitsar tátsuji. Antsu yamaram pushí entsar-tinia núnisrik yamaram ayashnium tuke pujusmĵi tusar taji. Iista, ju ayash amuukachminkiait. Yamaram ayashnium pujusar tuke iwiaaku pujustatĵi.

⁵ Yamaram ayashintin ajastinian iwiarturmaruitĵinia nu Yúsaiti. Tura nekas túrattajai tusa ni Wakanĵin suramsaitĵi.

⁶⁻⁷ Ju nékaji. Ju ayashnium pujajnia juĵinkia Uunt Jesusjai pujatsĵi. Tuma asamtai, wáinjinia nu ti enentáimtatsuk Yus enentáimtusar tuke shiir enentáimsar wekaaji.

⁸ Tura ju ayashniumĵi jíinkir Uunt Jesusjai tuke pujustaitsar wakeraji. Tura túrattajai tu nékaji.

⁹ Tuma asamtai ju ayashnium pujakrishna tura ju ayash ikiukrishna Uunt Jesus tuke waramtikсатаĵi taji.

¹⁰ Warĵi, ju ayashjai ii túramajnia nu ujakam, “pénkeraiti”, “yajauchiiti” Kristu turutit tusar, ashí iisha Uunt Kristuĵi jeatniuitĵi. Tura ii túramujai métek akirmaktatĵi.

Krístun waramtikсатаĵi taji

¹¹ Tuma asamtai ju nékaji: Uunt umirkashtin ti tsúumainti. Nu nekaar ashí shuar Yus-shuaran awajsataĵi tusar ti takaaji. Tura incha Yus nékarmaji. Tura ii túramurĵi átumka atumĵi enentáin paant nékarme, taji.

12 Ataksha, “wi p_{én}keraitjai” tusar nu tátsuji. Antsu, ii túramu nekáa asakrumin enentáiniam ana nuna enentáimtsuk aya pátatkea nujai warainia nú shuar tsanumprutmainiakui yaintkiatarum tusar taji.

13 “Wáurkaiti” turamainiajiash. Nusha warí, itiurtamajia. Ashí túrajnia nu, Yus aneakur tura atumin yáintai tusar túraji.

14 Kame ashí ii túrajnia nu Kristu anenkrattairijjai túraji. Kame ju nékaji: Kristu ashí shuaran jaruku asamtai, Yus ímmianum ashí iisha jaka núnisaitji.

15 Kristu ashí shuaran jaruk nantarkimiayi. Tuma asamtai Krístunam iisha iwiaaku pujajnia jui, iik wararmamtsuk, Kristu umirkatniuitji.

16 Tura yamaisha aya ni ayashí írsar, “nu shuar p_{én}keraiti” tura “nu shuar yajauchiiti,” titin tujintiaji. Kame yaunchu aya ni ayashí írsar “Kristu yajauchiiti” tu enentáimsamiaji. Tura yamaikia yapajjár, esetsar enentáimkiur “Kristu Yusa Uchirínti” taji.

Krístujai yamarmaitji

17 Tuma asamtai, Krístunu ajasúka yamaram najanamuiti. Yaunchu enentáimtai_ri menkakayi. Antsu núnaka íkias ni enentáimtai_ri nekas yarmaiti yamaikia.

18 Nunasha Yus túraiti. In nawampramkattsa Krístun akupturmakuitji. Tura nu etserkatniun incha ataktamsaitji.

19 Yuska in tunaarinniutin asutiámatniun nakitiak Krístujai nawampramkamiaji. Tura incha Yus-shuartin nu ujaktinian ataktamsaitji.

20 Krístunu ataksamu asar, Yuska “winia Uchirjai nawamnaikiatarum” tusa ii wenejai atumin seatmarme. Tuma asakrin, Kristu náariin “túratarum” tájarne.

21 Krístuka tunaan penké túrachmiayi. Túmanak ii tunaariin Yus Krístun makuumiayi. Nuna tura Krístunam makuuchmin awajtamsamiaji.

6

1-2 Ni Papiriin Yus yaunchu Isayasan juna tímiayi:

Tsawant jeamtai, ame seatmena nuna anturkamjame. Uwempratin tsawant jeamtaisha yainmajme.

Wats yamaikia Yus seatin jeayi. Yamái Yúsnum uwempratin jeayi. Tuma asamtai, iikia Yusa takatr_{ín} pachitkiajn_{ia} nu, Yusa anenkrattair_i p_{én}ker achiktarum tusar seajrume.

3 Tura “Papru etserkamur_i ántraiti” tíarain_i tusar chíkich yajauch enentáimtiktsuk p_{én}ker wekaaji.

4 Nekas Yusa takarniur_{int}ji nuna paant nekaawarat tusar wáit_{iy}atrik, atsumayatrik, itiurchatnum pujayatrik shiir katsunteaji.

5 Ju itiurchat wáinkiamji: katsumpramkarmaji; sepunam enketmáwarmiaji; charáa-charáa awajtamiarmiaji; takatcha ti itiurchat takasmiaji; kanutsuk pujumiaji; tura tsukasha ti tsukammiaji.

6 Tunáa nakitrar wekaaji; Yus-Chicham unuimiátraitji; shiir enentáijjai katsuntrar wekaaji. Chíkich shuar p_{én}ker awajeaji; Yusa Wakaní pujur-tamkurin shuar nekas aneaji;

7 nekas chicham ana nu étsereaji; tura Yusa kakarmar_{ish}a nú paant iniakmaji. Tura ni nemasr_{ín} nupettukain_i tusa suntar ni tantar_{ín} júana núnisrik iisha ii nemasr_i íwianch nupettamkaj_i tusar ii Yusr_i tuke umirkar wekaaji.

8 Shuar shiir enentáimturmainiakrincha, yajauch enentáimturmainiakrincha, p_{én}ker chichartamainiakrincha, yajauch chichartamainiakrincha tuke Yusjai shiir wekaaji. “Wáitruiniawai” turamainiakrincha tuke nekas chichaaji.

9 “Nu aents nékatsji” turamainiakrincha Yusnumka nékanji; jákatin tsúumainnium wekayatrik tuke iwiaaku pujaji; asutiámuitiatrik mantamnatsji. Yusa takarniurintiaj nu ashí nujai paant nekaamniaiti.

10 Kúntuts pujayatrik ii enentáinkia waraaji; kuítrinchaitiatrik chíkich shuar kuítrintin awajeaji; penké takakchiatrik ashí wáinji.

11 Yatsurtiram, Kurintiunam pujarmena nu, ashí paant ujakchamkajrum. Ti aneajrumna nu nékarme.

12 Wikia atumin paant chichastajtsan wakerajrume; antsu átumka anenttsuk paant chichastin nakitrarme.

13 Winia uchirua núnisnak chichajrume; wi tuke paant chichajarjarmena núnisrumek atumsha atumí enentáin ana nu, paant ujakatarum tusan seajrume.

Yusa jeentji

14 Yus-shuar Yus-shuarchajai tsaniñktinian enentáimsashtiniaiti. Warí, ¿Yusan umirna nú shuar, iwianchin umirna nú shuarjai métek enentáimiainiawak? ¿Tsáapnisha kiritjai máimtek áminkiait?

15 ¿Kóstuka uunt iwianchjai nawamnaikiamniakait? ¿Yus-shuar Yus-shuarchajai tsaniñ shiir pujusminkiait?

16 ¿Iwiaaku Yusa jeencha ántar-yus pujustinkiait? Tura atumsha iwiaaku Yusa jeentrume. Yus Niñki ni Papiriin juna tíchamka:

Niijiai tsaniñkia pujusan, niijiai wekasartatajai tura ni Yusri átatjai; tura niisha Wíi aents ajasartatui.

17 Tuma asamtai junasha tímiayi:

Nii matsatainia nuyá jíinkitiarum, tura niija kanaktiarum, tawai Uunt Yus; tura yajauch ana nu antinaiarap. Túrakrumninkia awayattajrume.

18 Tura atumí Apari átatjai; átumka winia uchir átrume. Nuna Wi imiá kakaram uunt Yus asan tajai. Tu áarmaiti.

7

1 Tuma asamtai aneamur yatsurtiram, nusha, Yus tímia nu, in túramji. Nu tuma asamtai ii ayashí tura ii enentáisha yajauch ajasañ tusar, ashí tunáa ana nuyá kanaktiniaitji. Túrar “Yusak nekas ii úntrinti” takur, ii ayashísha, ii enentáisha takamtsuk tuke tsawant Yus íktustiniaitji.

Kurintiunmayá shuar enentáimprarmatai Papru warasmiayi

2 Ataksha nawamnaikiatai. Iikia shuar yajauch awajsachmaji; yajauch jintinrachmaji; anañkachmaji.

3 Makuutai tusan nuna tátsujai. Antsu nuik tíchamkajrum, iwiaaku pujakrishá jakarsha átumka ii enentáin áchitkiarme.

4 Araantutsuk áatjarme; shiir enentáimjai. Itiurchatnum pujayatnak, atumin enentáimtusan enentairuí kakaram enentáimsan waraajai.

5 Jui Masetúnianum penké ayamprachmaji. Antsu ti wáitsamji. Áentsnumia itiurchat wáinkiamji, tura ii enentáijaiñkia ashamkamji.

6 Tura kúntuts pujakrincha Yus ikiakátmartinian nékawai. Tuma asamtai Titiún akupturkamai. Nujai winia enentáirun ikiakármai.

7 Tura átum nii ikiakármarmarna nuna Titiu ujakkamai. Nuna antukan ti warasmajai. Títiuka átum írsatin wakerarmena nuna ujakkamai; túrunamia nuna kúntuts enentáimmarumna nusha, tura winia anentu asarum enentáimturumna nuna ujakkamai. Nuna antukan nú nankaamas warasmajai.

⁸ Papí nuik akupkamaj nu áujsarum kúntuts enentáimprarme; núnaka nékajai. Túrasha ii akupmainchu túraitjai tátsujai. Eta, nuikkia tímiajai, túrasha yamaikia tátsujai. Papí áujsarum ishichik kúntuts enentáimprarumna nuna nekaan waraajai.

⁹ Kame kúntuts enentáimprakrumin waraatsjai. Antsu atumí tunaari nekaarum kúntuts enentáimprarum atumí enentái Yusjai yapajjá asakrumin nuna nekaan waraajai. Kame Yus wakerana nútiksarmek kúntutsrum katsuntearme; tuma asantai iikia nu papijjai yajauch awajsachji.

¹⁰ Nekaatarum. Yus wakerana nútiksar kúntuts katsunteakka ni enentái Yúsnum yapajjáwajai. Nuinkia ni tunaariya uwempraiti. Nuka “túrmainchu túraitjai” tíchamniaiti. Antsu Yusan enentáimtutsuk kúntuts pujakka ni enentái yapajjáshatui; yapajítsuk ni tunaariya uwemtsuk jakattawai.

¹¹ Tura iistarum; Yus wakerana nútiksarmek atumí kúntutsri katsuntearme. Tuma asarum wi áatjarmena nu esettsarum enentáimtusurme. Atumí túramuri ujakatajtsa wakerimiarme. Tura nu tunáa nakitramarme; tura ashamkarmarme. Tura yajauchin túramia nu asutiámarme. Tura winia anentu asarum wi timia tímiastrumek turatai tusarum ti wakerimiarme. Nu tura asakrumin péñker túrarmena nu, paant iniakmarme.

¹² Kame yajauchin túramia nuna ni tunaarin iniaisat tusan wakerakun, tura wáitias pujumia nu atak shiir enentáimsati tusan wakerakun nu papin áatramjarme. Tura nú nankaamas átum Yúsnum in anearmena nu nekaatarum tusan áatramjarme.

¹³ Atum umikiu asarum waraakrumin iisha shiir enentáimji. Tura shiir itiaamarumna nuna Titiu waraak ujakamtai nú nankaamas shiir waraaji.

¹⁴ Atumin shiir enentáimtajrumna nuna Titium ujakmajai. Tura nuna nekas aan Titiu nekaamai. Tuma asantai atumin natsantrachmajrume. Kame atumin tuke nekas ana nuna tímiajrume. Núnisán atumnian Titium tímiaj nusha nekasauyi.

¹⁵ Tura Títiuka atumin enentáimturmas ti waraawajai. “Jiatmaktajtsa winiat-suash” tusarum ti ashamkachurmek. Túmayatrum, nii péñker tati tusarum pachischarme. Tura nii taa seatmarmá nu umikiurme. Títiuka nuna enentáimias waraawajai.

¹⁶ Tura wikia, átum péñker túramurmin nekaan tura péñker túrawartatui tu enentáimsán waraajai.

8

Yus-shuarti ii kuitri súsatín

¹ Yatsurtiram, Masetúnia núñkanmaya Yus-shuaran Yus waitnentainia nuna yamá ujakatjarme.

² Ti itiurchatnum nekapsamu ainiawajai. Túmayatañ warainiawajai. Tura ti kuítrincha áiniayatañ emeentutsuk kuítrinnia núnisar suiniawajai.

³ Juna wi paant nekaan ujaajrume. Niisha wakeramujai súsatniun jeainia nuna súniawajai; tura nú nankaamassha súniawajai.

⁴ Yus-shuaran kuítrinchan súsartaitsa ti wakeruiniak, nu túratniun ti seatmarmaji.

⁵ Tura ii enentáimmiáj nú nankaamas túrawarmiayi. Emka Yúsnum níñki sumamawarmiayi. Tura Yusa wakeramuri túrattaji tusar incha “yáintajrume” turammiaji.

⁶ Tuma asantai, “Masetúnia nunkanam kuit júuktin nankamamamna nu, Kurintiu peprunmasha amukta” tusar Titium seamiaji.

⁷ Atumsha ashí péñker túratin ti nékarme. Yus enentáimtustincha, unuiniartincha, ju nunkanmaya nekaatniusha, in aneatniusha nuka ashí nékarme.

Wats, jusha túratarum. Yus-shuar kuítríncha ainia nu achikiarat tusarum Titu támatái núkap susatarum.

⁸ Kame atumí úuntria núnisnak akupeatsjarne, túratniuitrume tusan. Antsu chíkích shuar ní kuítrín susartasa ti wakeruinia nuna atumin ujakan, atumí anenkrattairi nekasplashi tusan nekapsatajtsa pujajai.

⁹ Ii uuntri Jesukrístu waitnenkartutairi nékarme. Ashí takakuyayi, tura atumin anenma asa kuítríncha núnisan ajasmiayi. Ju nunkanam kuítríncha núnis ajasmatai átum nayaimpiniam kuítriniak tusa túramiayi.

¹⁰ Juna enentáimjai. Nuik uwitin, “yáintatji” tíchamkarum. Tura nu túratin ti wakerimiarme.

¹¹ Nankamarmena nu yamaikia amuktarum. Nuik ti wakerimiarmena núnisrumek yamaisha súsatin jearmena nu susatarum.

¹² Iistarum. Ní kuítrín Yúsan nekas susatajtsa wakerakuinkia, níi jeana nuna susat tusa Yus wakerawai. “Jeana nú nankaamas susati” tátsui Yus.

¹³ Chíkích ti núkap susarum atumnia táasat tusan tátsujai.

¹⁴ Antsu ashí métek takusarat tusan tajai. Iis atumsha yamaikia ti nukap takakrume; nujai atsuma nu súsatniuitrume. Ukunam chíkích tsawantai átum atumashtarneash. Nuinkia niisha atumin suramsarti. Nu túratin ákuinkia ashí métek takústin átatui.

¹⁵ Yusa Papirín yaunchu áarman núnis tátsuk:

Núkap takusmia nu ampírchamiayi; tura ishichik takusmia nu atsumachmiayi.

Titu chíkích Yus-shuarjai Kurintiunam wetin ármiai

¹⁶ Tura wi aneajrumna núnisan atumin aneatniun Yus Tituun susamiayi. Tuma asamtai Yúsan yuminsan pujajai.

¹⁷ Iis, wi takui wétinian wakerimiayi. Tura nú nankaamas, atumin anenma asa, ní enentáijiaín wéawai.

¹⁸ Tura chíkích Yus-shuar Tituujai akupkatajtsa pujaji. Nu shuar Yusa Chichamen ti penker etserainakui, ashí Yus-shuar iruntramunam nin penker áujmatainiawai.

¹⁹ Tura nú shuarnaka ii tsaniakmarí atí tusar ashí Yus-shuar iruntramunam nuna anaikiarmiayi. Iijai kuítian jukiarti tusar anaikiarmiayi. Iis Yusa náarin ashí aents uunt najanawarat tusar tura ashí shuar atumí tsankarin nekaawarat tusar nu takat túratsjik.

²⁰ Iis, ju kuit ii jukittiajnía nu, núkap asamtai, aents tsanumprutmawaraj tusar, Tituujai tura ju shuarjaisha wéaji.

²¹ Yus íimmianumsha, aents íimmianumsha ii naka wekaajnia nuna nekaawarat tusar túraji.

²² Nu jimiará shuarjai chíkích Yus-shuar akupeaji. Yusa takatrín takastasa ti wakerana nu nekas nékaji. Tura átum yáintin ti wakerarmena nuna nekáa niisha atumiin jeataj tusa ti wakerawai. Nuna túmak Yusa takatrín takastinian wakerana nuna paant iniakmawai.

²³ Tura aisha chíkích shuar Tituun nekaataitsar anintruiniakuisha, “Titu Papru tsaniakmarinti. Incha yáinmaktajtsa Páprujai takaawai” titiarum. Chíkích Yus-shuaran nekaataitsar anintruiniakuisha, “Yus-shuar akupkamu áiniawai, tura Kristu náarin shiir awajin áiniawai” titiarum.

²⁴ Tura atumí anenkrattairi ashí Yus-shuar nekaawarat tusarum, nu shuar penker itiaatarum. Nu túrakrum, atumnia ii shiir tímiaj nu nekasaiti tu iniaktustatrume.

9

Yus-shuaran kuítrinchan súsarmia nu

¹⁻² Kame átum Yus-shuar kuítrincha súsatin wakerarme; nuna nékajai. Tuma asan núnaka áatrachminiaitjarne. Atumsha súsatin wakera asakrumin wi nunasha shiir enentáimsan, “Akaya nun_{kan}maya_{shuar} nuik uwitinia wakerusmatak yáin_{tinian} wakeruiniawai” tusan Masetúnianmaya_{shuáran} ujaajai.

³ Tura “kuítniasha súsatniun ti wakeruiniawai” tímiaj nuna, “wáitaiiti” tíara_{in} tusan nakitiajai. Tuma asan, kuit susatajtsa wakerarum nu iwiaratarum tusan nu menaintiu Yus-shuaran nuna yáinmakarat tusan emka akupenajai.

⁴ Wi ukunam Masetúnianmaya_{shuarjai} atumi_{in} jean, kuit súsatin tímiarmena nuna iwiarachman wáinkian natsar_{aj} tusan, tura atumsha natsar_{aj}rum tusan túrajai. Warí, “súsatniun ti wakeruiniawai” tuke tu wéatsjak.

⁵ Nu tuma asamtai, au takui súarme tu enentáimsar_{aj} tusan ju Yus-shuaran emka akupenajai. Niisha nu kuítian iwiaratniun yáinmakarti, tajai. Nuin_{kia} wisha Masetúnianmaya_{shuarjai} ukunam jeawakrin, nu kuit atumsha nekas atumí enentáij_{aj}in_k súsatin wakerarmena nu nekaamnia átatui.

⁶ Tura junasha paant tájarne: ishichik araana nu ishichik júuktatui. Núkap araana nusha núkap júuktatui. Kuit súsatniusha núniskete.

⁷ Tura ashí shuar ni enentáin enentáimsana nunak susati. “Nakitiayatnak susatjai” tíchamniaiti. “Turutainiakui susatjai” tíchamniaiti. Shiir enentáimias súana nuna Yuska shiir enentáimtawai.

⁸ Ashí pé_nker ana nuna suramsatniun Yus tujintiatsui. Nujai átum atsumashtatrume. Tura chikichan yáin_{tin} núkap takustatrume.

⁹ Yus-Papinium ju aarma awai:

Kuítrinchan núkap susayi;

nuna tura, tuke túratin átatui.

¹⁰ Arakmaun arakan súana nusha Yúsaiti. Tura yurumkan súana nusha Yúsaiti. Niisha átum pé_nker araatniun suramsattarme. Tura araarumna nujai pé_nker túratarum tusa araakrumin ipiampartatui.

¹¹ Tuma asamtai núkap juukma takaku asarum, núkap súsatin jeattarme. Nuin_{kia} súarmena nuna ii uweje_{yan} chíkich Yus-shuar achikiar Yúsan yu_{min}sartatui.

¹² Warí, ju kuit Yus-shuar kuítrincha súakrin ni atsumamur_{in}cha atsumachar_{at}atui. Tura nú nan_{ka}amas Yúsan ti yum_{in}sartatui.

¹³ Nu shuar yáin_{tai} tusarum tura ashí Yus-shuar yain_{tai} tusarum súatsrumek. Nujai Kristu shiir chichamen umiarmena nuna nékainiawai. Tura kuítrum emeentutsuk sua asakrumin niisha Yusa náar_{in} uunt awajsartatui.

¹⁴ Kame Yus atumin ti waitnentramainiakui kuítrum súatsrumek. Sua asakrumin nu shuar atumin ti anenmainiak Yúsan áujturmasartatui.

¹⁵ ¡Tura ashí iisha ii Yus_{ri} ti yum_{in}satniuitji! ¿In súramjinia nuna yaki jintíartinian jeá?

10

Papru nekas jintintiamniaiti

¹ Wats, “Papru iij_{aj} pujak pé_{ej}chach ajawai, tura yaja_{pujak} kakaram chichaawai” chíkich shuar turutainiatsuk. Kame imia wiki Papru Kristu anenkartutair_{ij}aj juna seatjarum tusan pujajai.

² Atumí weatkamuriya shuar chichainiak “Papru ni tsaniakmarijiai ju nunkanam akupin ajastai tusar wakeruiniak jintintiniawai” turutainia nuna kishumaktajtsan enentaimjai. Wisha atumijn jean kakaram chichaschataj tusan, nu antukairap tu seajrume.

³ Aentstanka nunkanmaya aentsuitji, turasha ju aents maania aintsar maniansji.

⁴ Ju nunkanmaya nan kijiai maniansji antsu ii nan kirij Yusa kakarmarinti. Nujai iwianchi kakarmari nupeteaji.

⁵ Ju nunkanmaya aentsu jintiamurinkia tura waantu enentaimtumamurinkia, Yus nekaatniun itit awajea nuka, nu nan kijiai nupeteaji. Tura ashí ju nunkanmaya enentaimsatini yapajniak, emetamu aintsan, Kristun umirkarat tusar nu nan kijiai nupeteaji.

⁶ Nekas umirkatin atum jeawakrumninkia nuinkia umirkatniun tuke naktainia nu, Yusa kakarmarijiai asutiattaji, tajai.

⁷ Atumsha aya patatek ana nu iiyarme. Wats, shuar nekas Kristunu ajasman nekamaka, nunisan winiasha Kristunuiti tu enentaimtursatniuiti.

⁸ Yusa kakarmarijiai akupeaji tuke takuncha natsaamatsjai. Nu kakarman atumin penker jintintitarum tusa Kristu suramsaitji. Kame atumin emesratniun suramsachuitji.

⁹ “Ni aarmarijiai awaktamkatajtsa wakerutmaji” tatsurpash. Nuchaiti.

¹⁰ “Papru aarmari ti kakaram ainiawai, tura ju pujak kakarmachuiti; tura etserkatniuncha nekatsui” turutainiawai.

¹¹ Wats, tuinia nuka junasha nekaawarti. Yaja pujakur kakaram aajinia nunisrik atumjai pujakrishia kakaram turattaji.

¹² “Wiki imia penkeraitjai” tuinia nujai meteketji tatsuji. Ni shuaraitji tatsuji. Warí, niisha imia ninki nekapmamainiawai. Tura ni ai isar “nu nan kaamas penkeraitjai” tu wenawai. Nuna turuiniak netse turuiniawai.

¹³ Antsu iikia, ii nekamatin jeajnia nu nan kaamas waantu ajaschattaji. Ii takastatjina nu Yus Ninki jintinramji. Nu arant weatsji. Kame atumijn takastinian Yus tsankatramkaitji.

¹⁴ Tuma asantai, tajinia nu Yus tsankatramka nu iniankas turatsji. Warí, iisha emka Kristu chichamejai atumijn jeachmakaji. “Emka jeamji” tajinia nu antrar tatsuji. Kame Yus tsankatramakrin jeamji.

¹⁵ Chikich takasmanum iikia waantu enentaimtumasar, “ii takatrinti” tatsuji. Antsu yamai enentaimtarmena nu nan kaamas Yus enentaimtustarum tusar wakeraji. Nu turakrumninkia atumijn tuke takasminiaitji.

¹⁶ Nuyasha chikich takaana nu takatsuk atum pujarmena nu arant pujuinia nusha Yus-Chicham ujaktaj tusar wakeraji. Nu turar chikich shuar takasma “iniuiti” tichattaji.

¹⁷ Tura penker enentaimtumastaj tusa wakerakka, Yunsnaitjai tusa penker enentaimtumasti.

¹⁸ Warí, ninki “penkeraitjai” tumamna nuka anturkachminiaiti. Antsu Uunt “penkeraiti” tana nu shuar nekas penkeraiti.

11

Antar etserniun Papru aumateawai

¹ Waurua nunisnak chichastatjana nu anturtukaintrumeash. Ee, anturtuktarum tusan seajrume.

² Atumniasha Kristunak anajmamtikrajrume. Tura nuwa chikich aishmankan nekatsuk ni aishrijaink nuatnaiya nunisrumek atum chikicha chichame umirtsuk aya ni chichamenk umiakrumin Kristui etejaj

tusan wakerajrume. Nuna túrataj tusan atumin akasmatajrume. Nu akasmaktinian Yus surusuiti.

³ Túrasha íwianch ni nekatairjijai emka nuwa Epan anañkama nútiksā atumniasha Yusa jintiya awajimtikramar Kristu aneashtinian enentáimtikramprarmatai anañkamu aṛum tusan tsuutajrume.

⁴ Warí, chíkich shuar Jesusnan nusháa étserkamujai táiniakuisha péñker ántarme. Tura nusháa wakan achikiam, nusháa chichamjai uwempramniaiti tu etserainiakuisha, nekasapitia tárume.

⁵ Kame “Yúsnumia akatramu asar etserkatin imiá nékaitji” tuinia nujai nañkaamas nékaitjai, tu enentáimjai.

⁶ Ti péñker chichastinian nékachiatnak winia nekaatairsha taamtsui. Núnaka ii túramurijjai tuke paant iniakmaji.

⁷ “Akirkata” tútsuk Yus-Chichaman atumin ujakmajrumna nuṛi ¿tunáa túrajak? Átum ankant ajastarum tusan wikia péjchach ajasu asan, “etserkamunam akirkata” tíchamjarme.

⁸ Antsu atumin yáñtaj tusan pujakun chíkich Yus-shuarnumia kuítian suruniakui achikmiajai. Nuna túran ni kuítrín emeentukmiajai.

⁹ Tura atumjai pujusan atsumaknasha atumniaka seachjarme. Masetúnianmaya Yus-shuar taar, wi atsummiajna nuna surusarmiayi. Nu tuma asamtai tájarme, seachjarme tura seashtatjarme.

¹⁰ Ashí Akaya nunkanam nuna ujaktinian suritrukchartatui. Nuna tákun Kristu nekasrijjai tajai.

¹¹ ¿Urukamtai nuna taja? ¿Atumin aneachu asanak taja? Atsá. Aneajrumna nuna Yus nékawai.

¹² Túrasha wi túrajna nuna tuke turu wétatjai. “Papru túrana núnisrik túraji” tuinia nuna tíarain tusan túrattajai.

¹³ Warí, niisha Yúsnumia akatrachma áiniawai. Anañkartin áiniawai. “Kristu akatramurintji” tumá átaj tusar wekainiawai.

¹⁴ Nusha urukaku túmait tíchamniaiti. Warí, imia Satanáskesha “nayaimpinmaya akatramuitjai” tumá átaj tusa wekaatsuk.

¹⁵ Nuñkia imia ni suntarisha péñkeran túrawai tumá atai tusar wekasachartinkiait; túrasha ni amuamurinkia tunáa túriarma nujai métek nekapmá asutiátin átatui.

Papru wáitsamia nu

¹⁶ Ataksha tájarme “wáurkaiti” tu enentáimtursacharti. Kame “wáurkaiti” tu enentáimturiatrumek, chichastin tsañkatruktarum. Ishichik waantu enentáimtumastaj tusan wakerajai.

¹⁷ Tura waantu enentáimtumastaj tájana nu, Uunta tsañkatramurijjai tátsujai. Antsu waurka núnisnak chichaajai.

¹⁸ Untsurí ju nunkanam uunt ajarar ti waantu enentáimtumainiakui wisha ishichik waantu enentáimtumastatjai.

¹⁹ Imiá nékayatrum waurka ainia nu shiir enentáimtusurum ánturearme.

²⁰ Niisha atumin takamtikramainiakuisha, kasartamainiakuisha, atumí nérenniurí ajainiakuisha, yajauch chichartamainiakuisha, yapimin awattamainiakuisha ashí nu katsuntearme.

²¹ Natsamayatnak tájarme jikia nu túratin kakarmachuuji! Wats, niisha araanainiatsna nuna wisha araantatsjai. (Waurka núnisnak chichaajai.)

²² Niisha Ipríu-shuar áiniakuisha wisha núnisnak Ipríu-shuaraitjai. Israer-shuar áiniakuisha wisha núnisnak Israer-shuaraitjai. Apráama weeatrí áiniakuisha pai, wisha núnisnak.

²³ Kristu takarniurintji, tuiniawai. Wikia aujaj nankaamasaitjai. Kame nuna takun waurka núnisnak chichaajai. Kame niijjai nankaamas takasuitjai; niijjai nankaamas asutiámuitjai; niijjai nankaamas sepunam enkeamuitjai; ti núkap jániñkiamjai.

²⁴ Israer-shuar chikichkí achirkacharmai. Antsu tímiajni senku jea achirkarmai. Tura emka achirkarmia nuí awa-awatatkua trainta nuiwi ejeyarmiayi. Tura nu tímiajni senku jea achirkarmia nuísha nútiksā nujai métek awatturarmiayi.

²⁵ Numijjai menaintiú awatturarmai. Kayajaisha mantuatai tusar chikichkí tukurarmai, kanusha menaintiú wayamai wi enkempran wekaimiaj nuí. Tura nayaantsanam ajapén chikichik kashi nuí pujusan tsawarmajai tura nu tsawantcha tuke pujusmajai.

²⁶ Ti nukap wekasaitjai. Tura entsá wekasan tsúumainian wáinkiaitjai. Tura kasa shuarjaisha, wí shuarjaisha tura yajaya shuarjaisha tsúumainian wáinkiaitjai. Péprunmasha, kampuniunmasha, nayaantsanmasha tsúumainian wáinkiaitjai. Wait Yus-shuarsha yajauch awajustaj tusar wakeriarmai.

²⁷ Itiurchatnasha ti wáinkiaitjai; takatnasha ti takasuitjai. Ti untsurí kánutsuk pujusuitjai. Tsukamaknasha, kitiamaknasha wáitsaitjai. Ti ijiar-maitjai. Pushir táasmatai tsetsekruí wáitsaitjai.

²⁸ Tura nuna nankaamas, kaarka kijin júkitniua núnisnak Yus-shuar péñker wekainiawash tusan ashí tsawant ti enentáimsan pujajai.

²⁹ Chikichik Yus-shuar kakarmachu pujakui wisha kakarmachu neka-peajai. Shuar chikichan tunaanum ajuawarmatainkia wisha natsamakun kajekan wáitiajai.

³⁰ Maa, waantu chichastin ákuñkia, antsu winia kakarmachu awajtuinia nuna ujakan waantu ajasaintjai.

³¹ Yus, ii Uuntri Jesukristu Apari ana nu (ni naari tuke shiir awajsamu atí) wi wáitratsjana nuna nékawai.

³² Tamasku péprunam pujaj nu nunkanmaya akupin winia jinkiá juruktiaj tusa wakerak pepru tanish téntakma wáitirijn suntaran apujsamiai. Aretas uunt kapitián pujaj túramiai.

³³ Túrasha uunt chankinnium enketawar pepru aa tanishri áankamunam jiiki itiararmiayi. Tu uwempramajai.

12

Papru wáinkiamia nu

¹ Kame wiki shiir chicharmamsatniun nakitiajai. Túmayatnak ímiarjana nuna tura uunt Yus iniaktursamia nuna ujaktiniaitjarne.

² Krístun umirin ana nú áishmankan nékajai. Nu áishman jimiara nayaimpin nankaikin menaintiú nayaimpiniam junakniuiti. Nusha katurse uwí nankaamasuiti. Kame ayashtiuk wakaashit, tura ayashtichu wakaashit. Núnaka nékatsjai; aya Yúsak nékawai.

³ Tura nekas junakniua núnaka nékajai. Ayashtiuk wakaashit, ayashtichu wakaashit, núnaka aya Yúsak nékawai.

⁴ Yus-shuara wakaní shiir pujutainium junakmiayi. Nuísha paant awajsachmin ana nuna antukmiayi. Nii antukmia nú chicham paant awajsatniun suritkiamuiti.

⁵ Nu áishmanka túrunamuri nankaamakuiti tajai. Tura wikia nankaamakuitjai túmamtsuk, kakarmachuitjiana nuna paant ujaajai.

⁶ Nankaamakuitjai túmantiaj tusan wakeraknaka nekas tíminiaitjai, ántran tíchaintjai. Túrasha túratsjai. Winia túramuruk wáinkiarum winia chichampruk

antukrum, waritia enentáimsarum nujai métek enentáimtursatarum tusan wakerajai.

⁷ Wi nayaimpiniam wáinkiamajna nu timiá péñker asamtai ántar waantu enentáimtumaschatniun, jan̄ki mesertinia núnisan winia ayashruj̄ najaimiatniun sunasmiajai. Nuka wi wáitsatin Satanásnumiã akupkamuiti.

⁸ Nuka jurutkitia tusan Úuntan menaintiú seamjai.

⁹ Tuma ain̄ Uunt winia turutmiayi “Atsá. Jaa pujayatmek winia waitnenkartutairjai shiir pujame. Shuar kakarmachun winia kakarmarun Wi suakui ashí aents nu shuara ayashjin̄ winia kakarmarun wáiniainiawai.” Tuma asamtai, Kristu kakarmari winia ayashruj̄ paant ati tusan kakarmachuitiatnak araantatsjai.

¹⁰ Tuma asamtai, wi Krístun anekui shuar katsekruiakuisha, kajertuiniakuisha, winia kuítrusha, kakarmarsha atsain̄ waraajai. Kame ashí itiurchat ana nūj kakarmachuitiatnak kakaram nekapeajai.

¹¹ Wi “péñkeraitjai” túmamkun waurua núnisnak chichajai. Tura atumsha winia péñker chichartusminiaitiatrumek, túrachu asakrumin tu chichajai. Warí, wi penké ántraiatnak, “ti péñker akatramuitji” tumamainia nú nunkaachichuitjai.

¹² Atumjai pujumiaj nūj, itiurchat ámanman̄ katsuntran takasmiajai. Yuska ni kakarmarin̄ iniakmastaj tusa ti uuntan aents tujintiamun túratniun surusmiayi. Nujai “Papru nekas winia akatramuruiti” tusa paant iniakmasmiayi.

¹³ Warí, chíkich Yus-shuaran yáin̄miaj núnisnak atumniasha yáin̄majrume. Áyatik atumin “kuit surusta” tíchamjarme. ¡Nu yajauchiitkiuin̄kia tsan̄kurturtarum!

Papru atak tátin̄rin̄ ujakmiania nu

¹⁴ Jújain̄kia menaintiú iwiarnarjai atumin ístaj tusan. Tura jeaknaka, “etserkamun akirkatarum” tíchattajrume. Atumí kuítrin̄ wakeratsjai. Antsu atumin wakerajrume. Warí, winia uchirchakaitrum. Úchisha aparín kuítian ikauntukchatniuiti. Antsu aparí ni uchirin̄ kuítian ikauntuktiniaiti.

¹⁵ Atumniasha yáin̄taj tusan ashí takakjana juna ajapawaintjai, tura winia kakarmarnasha ashí emen̄kákaintjai. Wi ti wakeramaitiatrum átumka ishichik wakerutarminin̄ túrawaintjai.

¹⁶ Túrasa chíkich shuar chichainiak “Nekasaiti; Papru nin̄ki ii kuítrin̄ jurutramkichmaji. Túrasa anañkartuatniun neka asa in anañkramachmiashia” turutainiatsuk.

¹⁷ ¿Nusha itiuura? ¿Shuaran wi akupkamaj nujai kuítrumin achikjak?

¹⁸ Atumin írmasat tusan Titiun “wetá” tímiajai. Tura nin̄ atampriit tusan chíkich Yus-shuaran akupkamjai. ¿Titiusha kuítrumin jurutramkimkiarum? ¿Wisha niisha mai metek enentáimsar métek takaschamkaj?

¹⁹ ¿Warí enentáimsarum? ¿Átum péñker ániawai turutik tusar nu tájik? Antsu, aneamu yatsurtiram, ii tájinia nu atumin Yúsnum ikiakártajrum tusar taji.

²⁰ Wi atumjin̄ jeaknasha, wi wáitkiataj tusan wakeraj nuna wáinkiashtatjai, tu enentáimsan itiurchat enentáimjai. Tura atumsha wakerarmena núnisrumek wáinkiashtatrumek, tu enentáimjai. Yajauch chicharnaikiatniuncha, yajauch enentáimtunaistinniasha, kajernaikiatniuncha, nin̄ki enentáimtumastinniasha, tsanumpratniuncha, mái-tunai ajatniuncha, waantu enentáimtumastinniasha, yajauch wekasatniuncha, ashí nuna wáinkiashtajash tusan itiurchat enentáimjai.

²¹ Tura wi jeaknasha, átum yajauch túratniusha, tsanirmatniusha tura yajauch ti wakerarmena nu, yaunchu túriniarmena nu, untsurí shuartiram iniaisachurmena nuna nekashtajash. Tura enentáim yapajitsuk tuke tura

asakrumin útchatjash tajai. Kame wi átum umikchamun nekaamtai Yus winia iniatsátrattawai tusan tsúumajai.

13

¹ Jujai menaintiú ístajrum tusan winiajai. Ashí iwiaratin ana nu, jimiará tura menaintiú shuara chichamejai iwiarnartatui.

² Wi atumjai pujachiatnak, atumjai pujaa núnisnak áatjarme. Yaunchu tunáa túrimiarmena nuna tura ashí shuártirmin wi nuik tímiajrumna nuna ataksha tájarme, wi atak tana tunaarum iwiareachkurminkia iniaiashtatjarme.

³ Nuinka wi Kristu kakarmarijiai chichaajana nu nekaattarme. Nu nekaataj tusarum wakeratsrumek. Tura Krístuka kakarmachuchuiti. Antsu atumí enentáin kakaram takaawai.

⁴ Kristu nekas kakarmachua nútiksan krúsnum máamuitiat, Yusa kakarmarijiai iwiaakuiti. Ayashnium Kristu kakarmachu nekapmia núnisrik iikia kakarmachuitji. Túrasha Yusa kakarmarijiai ni takatri takaaji. Nu atumin iniakmastatji.

⁵ “Nekas Yúsan umirniuashitiaj” tusarum nekamatarum. Ímiastarum. Ántar Yus-shuarchaitkiurmeka Jesukrístu atumí enentáin pujurtama nu nekaattarme.

⁶ Tura iikia ántar Yus-shuarchaitji nu nekaatarum tusan wakerajai.

⁷ Tura átum tunáa túrawáirum tusar Yus seaji. Aents in pénker enentáimtikramprat tusar tátsuji. “Ántar áiniawai” túramprinin, átum pénker wekasatarum tusar wakerajai.

⁸ Warí, Yusa nekas chichameje emesratin tujintiaji. Antsu ii túrajnia nu Yusa nekas chichamejai túraji.

⁹ Tuma asamtai, átum kakarmaitkiurminkia iikia kakarmachuitiatar shiir enentáimji. Atumsha nekas kakaram ajasúk tusar Yus tuke seaji.

¹⁰ Atumin emesratin Yuska winia akuptatsui. Antsu Yus akuptukuiti atumin ikiakártinian. Tuma asamtai, wi atumin jeaknaka kakaram chicharkaijrum tusan winitsuk ju papin áatjarme.

Amikmaawai

¹¹ Ayu, yatsurtiram, shiir pujustarum. Krístunam tuke kakaram ajastarum. Yus shiir enentáimtikramprarti. Chikichík enentáik enentáimsatarum. Shiir awajnaisarum pujustarum. Tura Yus anenmarmena nu, shiir enentáimtikramna nu atumjai pujurtamsattarme.

¹² Yúsnum shiir enentáimtunaisrum amikmaanaisatarum.

¹³ Ashí Yus-shuar ainia nu amikmaatmarme.

¹⁴ Uunt Jesukrístu waitnenkartutairi, Yusa anenkrattairisha atumin pujurtamsati. Tura Yusa Wakanisha tuke nemartamsarti. Nu atí.

Papru KARASEANMAYA SHUARAN Papí aar akuptukma

Karaseamaya Yus-shuaran Papru áatramiania nu

¹ Wi Pápruitjai, Yus akatramu. Yúsak winia akatturuiti. Shuarka akatturchamai. Yussha chíkich shuáran akupturak akatturchamai, antsu Nun_{ki}, Yus Apa, Jesusan jakamunmaya iniantkimia nu, tura Jesussha winia akatturamai Yusa shiir chichamen etserkatniun.

² Wisha, ashí Yus-shuar wijjaj pujui_{nia} nusha, ju papí akupeaji. Ashí Yus-shuar Karasea nun_{kanam} pujarmena nu áujsatarum tusan ju papin akuptajrume.

³ Yus Apa tura ii Uuntri Jesukristusha waitnentramainia ásar yainmakarti imiatkinchanum tuke shiir pujustinian.

⁴ Yus ii Aparí nuna wakera asamtai, Jesus ni ayashin surumak wáitsamiayi ii tunaari asakártinian. Nuna tura ashí tunáa ju nun_{kanam} ana nuyá ankant awajtamsatai tusa in yáinmaji.

⁵ Tuma asamtai tuke Yus shiir atí. Ayu.

Chíkich uwempratin chichamka atsawai

⁶ Maa, nekasaash timiá wárik Yus ikiukmiarum. Kristu in ti anenma asamtai Yus ni shuari ajastinian in anaitiamkamji. Urukamtaitasuk nuikia imiá wárik ni chichame inaisamarum nusháa chicham umikrum uwemprataj tusarum.

⁷ Wátsek, nekas chíkich chicham penké atsawai shuar umikiar uwempratin. Antsu yajaya shuar atumín taar pé_{nkercha} awajtamainiawai. Tura nusháa chichaman etserkar Yusa shiir chichamen yapajilatniun wakeruinaiwai.

⁸ Tuma asamtai Yus nin yajauchiniam yuminkrattawai. Wisha Yus-Chicham yapajiamun etserkamtainkia Yus winia yuminkrurtatui. Nayaimpinmaya suntarsha nusháa chichaman wi etserkachmaj nuna étserkuinkia nunsha yuminkrattawai.

⁹ Paant ujakjarme túmaitatnak ataksha ujaajrume: Nánkamas shuar ni-isháa uwempratin chichaman, wi etserkachmaj nuna étserkuinkia Yus yuminkrattawai.

¹⁰ Ti kakaram chichaatsjak. Nuna chichaakun shuar shiir enentáimtursati tusan chichaatsjai. Antsu Yus shiir enentáimtursati tusan nuna tajai. ¿Shuar wakeruinia nuna enentáimsan chichaajak? Nuna enentáimkiunka Kristu wakera nuna umirkachaintjai.

Papru júnis Yus akatramu ajasmiai

¹¹ Antsu nekaatarum, yatsuru. Uwempratin chichaman wi étserjana nuka áentsnumianchuiti.

¹² Aentska ujakkachmai. Unuitiutnasha unuitiurchamai. Antsu Jesukristuk winia paant jintintruamai.

¹³ Tura wi yáunchu ti yajauchin túramiaj nuka antukchakaitrum. Israer-shuar Yúsna takainia nútiksanak wisha takasmajai. Tuma asan Yus-shuaran ti kajerkan tuke pataatukmajai amuktaj tusan. Nusha nékarme.

¹⁴ Tura kakaram ajasan, ii uuntri yaunchu tiarmia nuna yawetsuk umiktinian ti enentáimpramjai. Tura untsurí shuaran wijjaj métek uunt

armia nuna nan̄kaamas Yúsnan takasmajai. Túmaitiatan aya winia únuntrun chichamen ti umirniuyajai.

¹⁵ Túrasha wikia akiintsain̄ Yus winia achirkamiayi, tura ti anen̄kratmarijjai winia anaitiukmiayi.

¹⁶ Nuikia shiir enentáimiuk ni Uchirín paant nekamtikruamai. Tura Israer-shuarchanum ni shiir chichamen etserkat tusa akuptukmiayi. Tuma asamtai chíkich shuaran aniaschamjai.

¹⁷ Uunt péprunmasha, Jerusarénn̄numka, wéchamjai winí emkaru Yus akatramujai chichastinian. Antsu wárik Arapia nun̄kanam wémajai. Tura nuí Yúsan enentáimtasuan atak Tamasku péprunam waketkimjai.

¹⁸ Tura menaintiú uwí nan̄kaasmatai, nuyá Pítrujai áujmattsataj tusan Jerusarénn̄num jeamjai. Tura jimiará semanachik pujusmajai Pítrujai.

¹⁹ Tura Jakupuncha, ii Uuntrī Jesusa yachia nuna, wáinkiamjai. Nú arantka chikichnaka Yus akatramunka wáinkiachmajai.

²⁰ Yus iirui. Wi tájana nu nekasaiti, wáitchaiti.

²¹ Nú ukunmasha Siria nun̄kanmasha, Sirisia nun̄kanmasha wémajai.

²² Tuma asamtai ashí Yus-shuar Jútía nun̄kanam pujuarmia nu winia nekaracharmai.

²³ Aya antukarmai. “Yaunchu in ti áintrammiyaj nu yamaikia Yus-Chichaman étseruk wekaawai. Yáunchuka in amutmaktinian wakeriniaitiat yamaikia iniaisaiti” tiarmai.

²⁴ Túrawar winia enentáimtursar Yúsan shiir yumĩnsarmai.

2

Chíkich Yus akatramu Paprun shiir enentáimtuiniawai

¹ Tura katurse uwí nan̄kaasmatai wisha Pírnapijiai Jerusarénn̄num wémaji. Titiuncha jukimjai wijjai.

² Yus akupta asamtai Jerusarénn̄num wémajai. Tura nuí jean aya Yus-shuara únuntrijjaīn̄ áujmattsamjai. “Júnisnak ashí Israer-shuarchan Yus-Chichaman ujainiajai” tímiajai. Takasmajna nusha tura tuke takastin enentáimjiana nusha ántar ain̄ tusan tu áujmattsamjai.

³ Niisha Yus-shuara únuntrīntiat itiurchat enentáimpracharmai. Antsu chíkich shuarka Titu Israer-shuarchaitiat wijjaī pujakui niisha Israer-shuar ajastí tusa tsupimiamtikiatniun wakeriarmai. Túrasha tujinkiarmai.

⁴ Tura nu shuar ántar yachi ániak antuktai tusar wayawarmai. Tura ii chichamen antukar itiurchat awájtámsatai tusar wakeriarmai. Iis, Kristu Jesus in uwentikrampra asamtai ti shiir iisha Yus yúpichuch umíaji. Tura nuna nekaawar, atakka, aya yáunchu akupkamu itiurchat ana nujaī uwentikrampratniun wakerutmakarmaji.

⁵ Túrasha pen̄ké ishichkisha umikchamji. Antsu atum̄jin̄ Yus-Chicham yapajniátsuk métek jeartamat tusar ni chichamē pen̄ké anturkachmajai.

⁶ Nu arantcha Yus akatramu uuntrīnkia yamaram túratniunka suruscharmai. Nincha ashí aents ti neka ainiawai tu enentáimtuiniawai. Kame nu shuar ti nékainiakuisha ti enentáimtatsjai. Yus ashí shuaran mash métek iyatsuk.

⁷ Yus akatramu uuntrīsha Yus winia Israer-shuarchan Yus-chicham ujaktinian akuptukma nuna nekarawarmai. Tura Pítruncha akupkamai Israer-shuaran Yus-Chicham ujaktinian.

⁸ Pítrun Israer-shuarum akupkama nú Yusak winiasha akuptukmai Israer-shuarchanum.

⁹ Tuma asamtai Jakupusha, Pítrusha, Juansha, Yus akatramu uuntrī ásar, Yus winia ti paant akuptan nekaawar, winiasha Pirnapínsha, “Ayu, átum,

Israer-shuarchanum Yus-Chicham etserkatarum, tiarmai. Iisha Israer-shuarnum Yus-Chicham etserkattaji” tiarmai. Túrawarmatai shiir áujnaisar ii uwejejai achirnaikiamji métek enentáimji tusarⁱ.

¹⁰ Áyatic “Kuítríncha enentáimtusrum tuke yáin̄tarum” tiarmai. Wisha núnaka ti wakerakun tuke túriniaitjai.

Papru Pítrun chicharkamai

¹¹ Tura nú ukunam wi Antiukía péprunam pujain̄ Pítiur tamai. Tura nui yajauch túramtai, Yus-shuara úuntrin̄iak chicharkamjai.

¹² Iis, Israer-shuar tuiniawai, “Israer-shuarcha Muisais timia núnisan̄ tsupirnakcha asamtai, nu shuarjaj̄i yurumáshtiniaiti” tuiniawai. Túmaitiat Pítiur yurumámnian nékak^u, emka Sántiak shuar táatsain̄ Israer-shuarchajaj̄i yurumámai. Tura nuyá Sántiak shuar Jerusarénnunim̄iá Antiukíanam jeawarmatai Pítiur ashamak tsupirnakcha shuarnumim̄iá kanakin yurumáchmai. “Tsupirnakhtiniaitme” tiniu ainia nuna ashamak túramai.

¹³ Tuma asamtai chíkich Yus-shuar, Israer-shuar armia nu, Pítrujaj̄i métek emka yurumáwaru áiniayat jimiará enentai takusar ukunam iniaisarmai. Pirnapísha neka áyat nútiksān̄ nupetnakmai.

¹⁴ Tura nuna íisan ashí íimiainiāin̄ Pítrun chicharkamjai. Yus Shiir Chicham tana nujaj̄i métek wekasachu ásarmatai tímiajai “Ame Israer-shuaraitiatam Israer-shuarti ikiukim tsupirnakchajaj̄i yurumám Israer-shuarcha áintsamek túrame, tímiajai. Nuikia “Israer-shuarcha Israer-shuartijaj̄i métek wekasatin̄ áiniawai” tiip” tímiajai.

Israer-shuarsha Israer-shuarchasha mai métek Yúsan enentáimtusar uwemprartatui

¹⁵ Iikia nekas Israer-shuaraitji. Israer-shuarcha, tunáa ainia áaniuchuitji.

¹⁶ Túmaitiatar jū nékaji. Akupkamu umíamujaj̄i uwemprachminiaitji antsu Jesukrístu nekas enentáimtakum uwemprattame. Nu nekaar iisha Jesukrístu nekas enentáimtusmaji tunaajain̄chu atai tusar. Aya Kristu nekas enentáimtusar péñker átatji. Akupkamu takasar umirkarsha tuke nujaj̄i péñker ajaschattaji. Akupkamunka shuar umiktaj̄i táyat, chikichkí shuarke-sha nujaj̄i péñker ajaschamniaiti. Nu nekaar antsu Jesukrístu nekas enentáimtusmaji péñker ajastai tusar.

¹⁷ Tura Israer-shuar enentáimprashtimpiash, “Wátsek, núnisaitkiuin̄kia wissha Krístun enentáimtustaj̄i tákunka, emka tunáa shuaraitjai tu enentáimtumastiniaitjai” tíchanpiash. Nuka nekasaiti tura nuyá “Nu asamtai Kristu winia tunáa shuaran najataiti” pen̄ké tu enentáimprashtiniaiti.

¹⁸ Antsu yaunchu, wi túrashtiniaitjai tímiaj̄i nuna awain̄kin túratniuitjai tákunka nuikia nekas tunaitjai.

¹⁹ Iista, akupeamun umiktaj̄i tukaman pen̄ké tujinkiamjai. Umiktinian tujinkian jaka áintsanak ajasmajaj̄i akupeamunam. Antsu Yusjaj̄i iwiaaku pujajaj̄i ni wakera nuna umiktinian.

²⁰ Wissha Krístujaj̄i krúsnum jákaitjai. Tuma asamtai yamaikia wikia iwiaaktsujaj̄i wi wakeraj̄i nuna túratniun antsu Kristu winí iwiaakui ni wakera nuna túratniun. Tura jū ayashnium pujayatan aya Kristu enentáimtakun iwiaakjai. Krístusha Yusa Uchir̄intiat winia ti anentuk jarutkamiayi.

²¹ Yus ti péñker asamtai itiurak “Kristu ántar jakamiayi” títiaj̄i. Iis, aya akupkamun umirkan péñker ajasminiaitkiuin̄kia, nuikia Kristu ántar jákaaȳi.

3

Yus akupkamu tura Yus enentáimtustin

¹ ¿Warin aa Karaseanmayatirmea. Waweamukaitrum netse enentáimprarum Yus tama umirkashtin. Kristu krúsnum máamun ti paant étserkun atumin iniaktuschamkajrum?

² Wátsek, aniastatjarme, enentáimpratarum. ¿Warijiaín Yusa Wakaní atumí enentáin achikmarum. Akupkamu umirkarmek enentáimin achikmarum, antsu Yus enentáimtusrum ni Wakaní achikchamkuram?

³ ¿Tuke nétsekaitrum. Yusa Wakaní emka atumí enentáin wayá takasmatai atumek yamaikia nu takat aya ayashí kakarmarijiaí umiktin enentáimprarmek.

⁴ Penké ánrarmek wáitsamarum tura antsu ishichkisha unuimiar-chamkarum?

⁵ Naka enentáimpratarum. Yus ni Wakanín súramtsuk tura aents túrachminian atumín ti takaatsuk. Átum aya akupkamun umirkurmin Yus nuna túrachuiti. Antsu ni chichame antukrum Yus enentáimtakrumin Yus nuna túraití.

⁶ Yaunchu ii uuntrí Apraám enentáimpratai. Yus-Chicham nin tawai: “Apraám Yúsan enentáimtusmatai Yus “Ayu, péñkeraitme” tímiayi” tawai.

⁷ Iis, nujai páantchakait. Ashí shuar Yúsan enentáimtuinia nuka Apraámjai métek enentáimpraru ásar, ni uchiría áintsan ajasaru ániawai.

⁸ Yamái páantaiti. Yus ashí Israer-shuarchancha tawai “Aya winia enentáimtursarum péñker átatrume”. Israer-shuarchasha nujai péñker ajastinia nuna ti yaunchu neka asa, Apraáman ujakmiayi, “Ámijiaí ashí aents ti shiir ajasartatui.”

Tu ujakmiayi.

⁹ Tuma asamtai ashí shuar Yúsan enentáimtuinia nuke Apraámjai métek péñker ajasar shiir warasartatui.

¹⁰ Antsu ashí shuar “akupkamun umirkan uwemprattajai” tuinia nuka yajauchiniam yumiñkramu ániawai. Yus-Papinium áarchamukait “Ashí shuar Yus akupkamun ashí aarma nuna takamtsuk umirkachka yajau-chiniam yumiñkramu ániawai.” Tu áarmaiti.

¹¹ Nújainkia páantaiti. Akupkamu umirkatniujai péñker ajaschamniaiti Yusjai, antsu aya Yus enentáimtusam péñker ajasam uwemprattame.

¹² Shuar akupkamu umirkatniun enentáimna nuka aya nujai péñker ajastinian enentáimiui; Yúsan enentáimtak péñker ajastinian enentáimtsui.

¹³ Tura Kristu yamaikia uwemtikrampramji. Akupkamun umirkachu yumiñkramuiti tana nuka in túramtsuji. Antsu Kristu in yainmaktin krúsnum jaka yumiñkramu ajasmiayi. Kame áarmaiti:

Shuar jakati tusa numiniam nenasma yumiñkramuiti.

¹⁴ Tuma asamtai Jesukristu jakamujai ashí Israer-shuarchasha Apraámjai métek péñker shiir warasartatui. Iisha núnisrik nu shuarjai Yusa Wakaní, Yus akupkataj timia nusha, achiktatji Yus enentáimtusar.

Yus akupkamu tura Yus túrattana nu anajmarma

¹⁵⁻¹⁶ Iis, yatsuru, Yus Apraáman Chichaman najana anajmatuk, “Ámijiaí tura amée weeá akiinkiattana nujaisha ashí aents ti shiir ajasartatui” tímiayi.

Kame ‘amée weeá akiinkiartatna nujai’ tíchamiayi, antsu ‘akiintiatta nujai’ tímiayi. Nuna taku chikichik átinia nuna enentáimpramiayi. Nusha Krístuítí. Aentstisha enentáimpratai. Shuar chichaman najana tura papinium aar nuyá ni naari apujas nuikia nekas yapajítsuk umiktiniaiti. Umitsuk iniaisachminiaiti. Patattasha patattsachminiaiti.

¹⁷ Wátsek, Yus núnisan Chichaman Apraámjai najana, ukunam umitsuk iniaisachminiaiti. Tura Chichaman najanamia nú ukunam, kuartru siañtu nuyá

trainta (430) uwí nankaasmatai, Yus ni akupkamurín Muisaisan susamiayi. Túramaitiat nujai Yusa yaunchu Chichamen yapajíáchmiayi iniaisatniun.

¹⁸ Tuma asamtai Yus timia nuka tuke uminkiatstawai, Yus yaunchu Apraámjai Chichaman najana asamtai. Nújainkia páantaiti, péñker ajastajtsar akupkamu umikrikia shiir pujuschartatji antsu Yus timia nujai iikia takatsuk shiir pujustatji. Nuna tsankatkamiayi Yus Apraámjai Chichaman najaneak.

¹⁹ “¿Nuikia Yus urukamtai akupkamun susamia?” tíchaintmeash. Ayu, Apraám weean, Kristu táatsain Yus tímía nu uminkiachminiuyayi. Tuma asamtai nii táatsain ashí tunaan túrawarmia nu timiá yajauchiiti tusa Yus akupkamun susamiayi. Tura Yusa suntari ju akupkamun ashí iwiarar Muisaisan susar akatrarmiayi Israer-shuaran susárti tusar.

²⁰ Antsu chikichik shuar niniki takastinian enentáimkiunka chikichan atsumatsui. Tura Yus aya chikichkiiti. Niniki chikichan akattsuk ashí aentsun Apraámjai péñker awajsatniun Apraáma anajmatar niijiai Chichaman nanamiamiyi.

Yus akupkamu itiúrkátiñ

²¹ “¿Tura Yus jimiará chichamjai chichaawak, tíchaintmeash. Emka Apraáman “Jujai uwemprattame” tíchamkia, nuyá Muisaisan ni akupkamurín súsachmakia?” tíchaintmeash. Tura áintsachuiti. Nekaata, akupkamu umirkatniujai Yúsjai tuke péñker pujusminiaitkiunka nuyá aya akupkamujai uwempram tunaajainchu ajasaintme.

²² Tura Yus-Chicham paant “Ashí tunáa áiniawai” tawai. Nu asamtai yamaikia ashí Jesukrístu enentáimtuinia nú shuar, aya Yus timiá asamtai, uwemprattatui.

²³ Tura Kristu táatsain Nin enentáimtuschaniauyayi. Tuma asamtai Nii táatsain akupkamuka in emettama pujurtamji aya akupkamu tana nu umirkatin. Tura ukunam ju nekanayi: Kristu enentáimtusar uwempratniuitji.

²⁴ Akupkamu, nuika, in waitmakmaji uchin kuírchin wainnia áintsan. Kristu tatí tusa waitmakmaji. Tura Kristu támatai ashí nekas Nin enentáimtuinia nuka Yúsjai péñker áiniawai.

²⁵ Yamái Kristu nekas enentáimtustiniaiti tuma asamtai yamaikia akupkamu kuirchia áintsan wáitmatsji.

²⁶ Antsu Jesukrístu enentáimtusar, nujai Yusa uchirí úuntmaru ajasuitji.

²⁷ Ashí Kristu náariñ imiaimiutirmeka Kristu áintsan ajasuitrume.

²⁸ Jesukrístujai tsaninkiu asarⁱ imiá métek aji. Israer-shuar, Israer-shuarcha, ankant ainia nu, ankantcha ainia nu, áishman, nuwá, ashí mash Jesukrístunuitkiunkia yamaikia “niishaaiti” tu enentáimprashtiniaiti. Ni shuari mash chikichik áinijai.

²⁹ Tura Krístunuitkiurmeka Apraám weeá áintsan ajasurme atumsha. Tuma asarum, Yus Apraáman anajmatramia nu atumsha jurumkitniuitrume.

4

¹ Kuítrinniu uchirí ashí ni aparí takakna nuna niiniu áchattawak ukunam. Tura uchichitkiunka ni aparí takarniuriya núkete.

² Tuke uunt ajatsuk ni wáinnia nuna umirkatniuiti. Tura uunt ajasmatai tura ni aparí “Ayu” takui nuyá nii antsu ni aparíniu ashí wáinkiatniuiti.

³ Núnisrik iisha úchichik asarkia ashí aentsu akupkamurí umirkatniuji.

⁴ Tura tsawant jeamtai, Yus ni Uchirín akupkamiayi ju nunkanam. Niisha Yúsaitiat nuwanam akiiniamiayi. Tura aents ajasmiai. Tura aents ajas yaunchu akupkamuncha umirkatniuyayi.

⁵ Nujaj ashí aents akupkamun umirkatin armia nuna uwemtikrataj tusa támiayi. Tura iisha yamaikia nujaj ni uchirí uunt ajasminiaitji.

⁶ Atumsha nekas ni uchirí ajasakrumin Yus ni Uchirí Wakanin atumi enentáin akupturmakuiti. Tura nu Wakan atumí enentáiyá Yúsan “Aparú” tawai.

⁷ Tuma asamtai yamaikia aya takarniuchuitme antsu Yus ni uchirin najatmaiti ámin. Tura ni uchirí asakmin ashí Yus takakna nuna amastatui Kristuiyan.

Papru nu Yus-shuaran yáintinian wakerawai

⁸ Yaunchu átum nekas Yus nékachkuram, ántar-yus írunna nu umirkarmarme nekascha yúsak.

⁹ Tura yamaikia nekas Yus nékarme, kame Yus atumin nekarmarme. Núnis asamtai itiurtsuk atak aentsu akupkamurí umirkatin enentáimprum. Nujaj kakaram ajaschamniaitme tura umikmesha yainmakchattawai uwempratin.

¹⁰ Átumka jísat ti najanearme. Yaunchu jisat najanatin amia nú tsawantcha, nantusha, uwisha, jísat tuke najanearme Yus shiir enentáimtursati tusarum.

¹¹ Ashamajai, atumín ántrankeash takasmaj tusan.

¹² Yatsuru, wi atumea áintsanak ajaschamkaj; atumsha yamaikia wi wekaa-jna áintsarmek wekasatarum. Wi nuí pujakui ishichkisha yajauch awaj-tuschamarme.

¹³ Antsu nekamarme ayashruí itiurchat pujayatan Yusa shiir chichamen emka ujakmajrume.

¹⁴ Tura winia sunkur ti yajauch awajtain atum winia nakitrurum muíjukchamarme, antsu Yusa suntaría áintsarmek itiararmarme. Jesukrístu anturkatniua áintsarum anturtukmarme.

¹⁵ Maa, wi nékajai, nuik atumí jimi ukuinkiarum surusaarme, túramniaitkiurmeka. Tura shiir enentáimprarmena nusha itiurtsukait yamaisha.

¹⁶ Yamaikia nekas chichaman étserkun ¿atumí nemasrí ajasjak?

¹⁷ Chíkich yajayá taaru ti shiir awajtamainiawai tura atumin yainmaktasa áitkiarmainiatsui. Aya winíyá akantamkitiai tusa wakerutmainiawai, winia antsu shiir enentáimtursat tusar.

¹⁸ Niisha nekas yainmaktinian wakerutmainiakka atumin shiir awajtam-satin tuke pénger ainti, wi atumjai pujainsha tura pujatsainsha.

¹⁹ Uchirú, nuwá jurertaj tana núnisnak ataksha wáitiajai Kristu atumín paant atí tusan.

²⁰ Atumjai pujaknaka maak aintjai. Yamái pujaknaka nekas nusháa chichasaintjarme. Itiurkatjarmetsuk nékatsjai.

Akarsha, Sarasha jimiará Chichaman nakumainiawai

²¹ Ayu, “akupkamu umirkatniuiti” támena nu nekaata; akupkamuka júnisaiti.

²²⁻²³ Aarma awai: Apraám jimiará uchirtiniuyayi. Emka ni takarniurí jurermiayi Ismaeran. Nuyá Apraáma nuwé jurermiayi Isakan. Ismaera nukurí Apraáma takarniuriyayi. Tura Apraám Yusan enentáimtutsuk ni-ijijai kanarmatai, ni takarniurí jurermiayi. Tura antsu Isaka nukurínkia takarniurinchuyayi, antsu nekas ni nuwé áuyayi. Niisha ti úuntchiniak, Yus “jurertatme’ tímiayi. Tuma asamtai Yus timiajai Isakan jurermiayi.

²⁴ Ayu. Yamái tájana nuka Yusa Chichamen jímiaran nakumui. Ismaera nukurí Akar chikichik Chichaman nakumui. Yaunchu Senái muranam Yus ni akupkamurín áarmiayi Israer-shuar, takarniua áintsan, umirkarti tusa.

²⁵ Senái murasha Akara nunke Arapianam wajaawai. Akarsha Senái muran nakumak, ashí Israer-shuaran “Akupkamujai uwempramniaiti” tulinia nuna nakumui. Yamaisha Israer-shuara uuntri Jerusarénum pujuinia nuka tu chichainiawai. Tuma asamtai Akarsha, ashí nu shuarsha núnisar, akupkamu umirkatin ásar, ti takarniu áintsan wáitsar takainiawai.

²⁶ Antsu ashí Yus-shuarti uwempra asar imiankas ankant pujaji. Nayaimp-inmaya Jerusarénumia áentsuitji. Nuyá áentsti tuke ankant pujuiniaji. Nuyá aents asakrin, nu yakiya Jerusárēka ii nukuría áintsan enentáimpramniaiti.

²⁷ Junis áarmaiti:

Warasta, misurma, uchi takakchiatmek;

Ti shiir warasta, uchi najawę nékachiatmek.

Nuwa ajapamu uchin jurertatui;

Nuwa áishrinnia núnaka nankaamas uchirtin átatui.

²⁸ Iisha, yatsuru, Isaka áintsarⁱ, Yus timiajai akiiniaitji.

²⁹ Yaunchu Ismaer Isakan kajerak itiurchat awajsamiayi. Núnisan yamaisha Ismaera áintsan aya ayashnumia ainia nú aents Yusa Wakaníya akiinia nuna yajauch awajenawai.

³⁰ Tura Yus-Papinium áarmaiti:

“Takarniusha, ni uchiríjiai, ajapam awemata. Nekas pénger nuwa uchiríjiai tsanin pujuschamniaiti. Apari kuítríncha achikchamniaiti,” tawai Yus-Papí.

³¹ Ayu, yatsuru, nekaatarum. Takarniu uchirínchuitji antsu ankant pujaji nekas pénger nuwa uchirí asarⁱ.

5

Yusjai tuke ankant atarum

¹ Kristu uwemtikrampramiai tuke ankant átinian. Tuma asamtai kakaram ajasam tuke ankant pujustá. Ataksha nu itiurchatnum waketkip.

² Wi Papru asan ujaajrume. Átum Muisais timia núnisrumek tsupirnakrumniñkia ¿Kristu nuikia warí itiurtamkamniait?

³ Ataksha tájarne, ashí tsupirnakua nu shuar ashí Muisais timia nuna takamtsuk umirkatniuiti.

⁴ Atum “Akupkamu umiakmin Yus shiir enentáimturmastatui” tárugna nu, nu shuartiram Krístuiya tupanniuitrume. Yusa anenkrattairiya kanakniurme.

⁵ Iikia, antsu, Yusa Wakaníjiai tura Yus enentáimtakin Yus shiir enentáimturmastatji, tu enentáimji.

⁶ Nekas Krístunuitkiurkia tsupirnaktin atsumatsji. Antsu aya Yus nekas enentáimtakur ashí anenaitniuitji.

⁷ Atumsha Krístujai pénger wekaimiarme. ¿Urukamtai nekas Yus timia nu iniaisatin enentáimprum ataksha akupkamunam waketkitin?

⁸ Nú enentai Yúsaiyanchuiti. Niijjai wekasatniunka Yus achirmakuitrume.

⁹ Ju enentáimpratarum: Karía ishichik yuminnium enketam mashⁱ karimtik-tsuk. Aneartarum atumsha.

¹⁰ Ayu, Yus yáinmakrumin wi tájana nu nusháa enentáimprashtatrume, nékajai. Tura atumin yajauch áujmatramainia nuna Yus asutiáttawai páchitsuk.

¹¹ Wíkie, yatsuru, yamaisha “tsupirnaktiniaiti” tuke tákuñkia Israer-shuar yajauch awajtuscharainti. Antsu Kristu jakamun étsereatnak “tsupirnaktiniaiti” tákuñkia kajertukcharainti.

¹² Atumin yajauch awajtamtsatin wakeruiniana nú shuar antsu niñki tsupimiakar yajauch awajmamsarti.

¹³ Atumniasha, yatsuru, Kristu tuke ankant awajtamsarme. Tura ankant ajasrum, “Aya wi wakerajna nuna túramniaitjai” tu enentáimprairap. Antsu nuámtak aneniakrum péñker yáiniáiktarum.

¹⁴ Ju chichamjai ashí akupkamu mash uminkiattawai: Ame ayashim aneamna áintsamek chíkich shuarsha aneata.

¹⁵ Tura aneartarum. Aneniachkurmeka, antsu esanairum mai yunai ajakrumka nuámtak amunaiktatrum.

Ayash wakeramu tura Yusa Wakaní wakeramu

¹⁶ Ju na tájarne: Atumí ayashí wakerana nu umikíaj tusarum Yusa Wakaní kakarmarijjai wekasatarum.

¹⁷ Yusa Wakaní wakera nuna ame ayashim nakitiawai. Tura ame ayashim wakerana núnaka Yusa Wakaní nakitiawai. Mai maanai ajainiawai. Túmaitkui péñker wekasataj tukamam tujintiame. Páantchakait.

¹⁸ Tura Yusa Wakaní jintinramkuíñkia, aentsu akupkamurijjai itit áchattame.

¹⁹ Wats, ayash túramu ti paant áiniawai. Ju áiniawai: tsanirmatin, wapik túratin, yajauch túratin,

²⁰ ántar-yus ainia nu tikishmatratin, wawekratatin, nemasnaikiatin, katsumnaikiatin, akasmaktin, wari kajektin, nankaamantu enentáimtumastin, aya niisháa niisháa enentáimsartin, níiniunak ístin,

²¹ yajauch enentáimtunaistin, mankartuatin, nampektin, nampernum aya ti yurumin, tura ti nampen átin. Chíkich nujai métek áiniawai. Nuik ujakmajrumna núnisnak ataksha tájarne: Shuar nuna túrakka Yusaj pujustinian penké tujinkiattawai.

²² Ayu, yamaikia Yusa Wakaní kakarmarijjai túratin enentáimsatai. Yusa Wakaní ii enentáin pujak, péñker túratniun nerektinia áintsan neremtikramji. Ju áiniawai: aneatin, shiir enentáimsatin, Yusjai tura shuarjai nawamnaikiar wekasatin, shiir enentáijjai katsuntratin, chíkich shuar shiir awajsatin, tsanka átin, tana nuna tímiatrusan umiktin,

²³ péjchach ajastin, iik ímiasar tunáa túrashtin. ¿Ju túratniuncha yaki surimia?

²⁴ Shuar Jesukristunu ainia nu, ni ayashí wakeramuríncha tura nunisan ni túramuríncha surimiak wekaawai. Ni ayashí krúsnum maatniua áintsan túraiti.

²⁵ Yusa Wakaní kakarmarijjai Yus-shuar ajasu asar, núnisrik Yusa Wakaní kakarmarijjaiñ wekasatai.

²⁶ “Wats, nekapnaisatai. Wi imiá péñkeraitjai” nuámtak túnaitasuk, yajauch enentáimtunáischatniuiti.

6

Yáinniaiktarum

¹ Túrasha, yatsuru, Yus-shuar tunáa túrashtimpiash. Atumsha nekas Yusjai wekaarumna nu, nu wáinkurmeka, yátsum Yusjai iwiarat tusarum yáintárum. Tura nankaamantu enentáimtumatsuk túratarum. Tura amesha nekamata. Tunaanum iniaraj tusam aneamam wekasata.

² Káarak kijin akui nuámtak yáiniaktin átsuk. Núnisrumek atumsha, itiurcha-
trí akui nuámtak yáiniáiktarum. Túrakrumka Kristu akupeamurí umíarme.

³ Shuar tujintiyat “nankaamantuitjai” tákuñka ananmamui.

⁴ Shuar ní túramuríniak enentáimtumastiniaiti. Níiniunak enentáimtumuñkia tura péñkeraitkiuñkia chikicha túramurí iirtsuk, antsu níiniun péñker iis wararsattawai.

⁵ Iis, ashí ní káarkariniak júkishtinkiait.

⁶ Shuar Yus-Chichaman unuimiatna nu, nu shuar nin jintíana nuna ashí takakna nujai yáinti.

⁷ Anañmamawairap. Shuar Yúsan anañkatniun tujintiawai. Ame araa nuna nereñ júuktatme. Chíkich nere áchattawai. Atumi enentáincha núniskete.

⁸ Iista. Shuar ni ayashí wakeramunak tuke enentáimtakka, jatai nereá áintsan araaíti. Nerekmatai jákatniun júuktatui. Tura Yusa Wakaní wakera nuna tuke enentáimtakka Yusjai tuke shiir pujustinian júuktatui.

⁹ Nu asantai péñker túratin yawetkishtiniaiti. Tura pimpitsuk takasar júuktin tsawant jeantai, páchitsuk júuktatji.

¹⁰ Tuma asantai yáinmin ákuinkia ii jeajnia nu túratniuitji nekaska ii yachi yáinkiartin, Yus-shuar ainia nu. Tura ashí shuarsha yáintinaiti.

Jesukristunu ajasar yamaram akiiniatin nekas péñkeraiti

¹¹ Íimsakua, winia uwejrui urutá uuntna áatjarum.

¹² “Nekas tuke tsupirnaktiniaitme” tuinia nuka áyatik shuar shiir enentáimtursartí tusa tuiniawai. Kristu krúsnum jakamun étsereakuinkia itiurchat awajtusarain tusar “tsupirnaktiniaitme” tuiniawai. Shuar “ashí akupkamun umiktajai” tusa, Muisais timia núnisan tsupirnaktiniaiti.

¹³ Pai. Tura nú shuar tsupirnaku ániayat ashí akupkamun umiiniatsui. Muisais timia nuna ajapén ikiuiniawai. Túmaitiat tsupirnaku tusa wakerutmainiawai. Áyatik atumin “Pai, niisha tsupimiakiji” titiai tusar wakerutmainiawai.

¹⁴ Wikia, antsu, aya ii uuntri Jesukristu krúsnum jakamunak wararsatniun enentáimjai. Tu enentáimkiun Kristu krúsnum jakamia áintsanak ju nunkanmaya ana nuna jaka áintsan páchiatsjai; tunaanum winia útsutkatin atsawai.

¹⁵ Krístunu ajasrikia tsupirnaktincha tsupirnakchaitkiursha mai ántrai antsu yamaram akiiniatin nekas péñkeraiti.

¹⁶ Ashí nekas Yus-shuaran, wi tájana nujai métek wekainia nuna, Yus shiir enentáimias yáinti tuke shiir pujustinian.

¹⁷ Yamaikia itiurchat najatawarain. Jesusa takatri takaakui asutiuawarma paant ayashruj chimikma írunui.

¹⁸ Yatsuru, ii uuntri Jesukristu atumin shiir yainmakarti. Nuke atí.

Papru IPISIUNMAYĀ SHUARAN papí akuptukma

Ipisiunmaya Yus-shuaran Papru áatramiania nu

¹ Yus nuna wakerakui Jesukrístu akatramuitjai. Jesukrístu nekas enentáimtusrum Yus-shuar ajasrum Ipisiunam pujarmena nuna ju papin áatjarne.

² Yus ii Aparísha tura ii Uuntri Jesukrístusha waitnentramainia ásar imiatk-inchanum shiir pujustinian yainmakarti.

Krístujai tsanínkiu asakrin Yus ti shiira nuna tsan̄katramji

³ Ii Uuntri Jesukrístu Apari Yus nekas shiir awajtustiniaiti. Iisha Krístujai tsanínkiu asar ii enentáin ashí nayaimpinmaya ana nujai warasminiaitji. Túmaitkiui Yus nu waratain ashí suramsaitji.

⁴ Krístujai uwemprar ti shiir tunaajainchu Nijjai pujusarat tusa Yus, ju nun̄ka atsajsha, anaitiamkamiaji.

⁵ Yámankamtaiksha incha ti anenmak Jesukrístu túrunamujai ni uchiri ajasat tusa wakerutmakmiaji.

⁶ Ni aneamu Uchirijai tsanínkiu asakrin nekas ti anenmaji. Nu enentáimsar ti shiir awajsatniuitji.

⁷ Yus ti anenmakrin ni aneamu Uchiri numpé puarmatai, nu jakamujai ii tunaarin akikmatramak uwentikrampraitji.

⁸ Tura ti anenmak ni enentáimtairin tura nekatairincha suramsamiaji.

⁹ Nujai shiir enentáimturmak in uwentikrampratniun wakerutmakmiaj nuna, yaunchu nekaachman, yamá paant awajturmajai.

¹⁰ Ashí jú nun̄kanam íranna nunasha tura nayaimpiniam íranna nunasha Kristu ashí akupin ati tusa Yus tsan̄katkattawai. Nunasha Yus yaunchu enentáimturú asamtai tsawant jeamtai ashí uminkíáttawai.

¹¹ Iisha Krístujai tsanínkiu asakrin Yus yaunchu achirmakmiaji ashí Niiniu ana nuna tsan̄katramkatniun. Nunasha, ashí Nii túrana núnisan, aya Nii wakera asa túramiayi.

¹² Iikia Israer-shuar asar Kristu emka umirkakrin in imiá péñker túrutmamun nekaawar ashí shuar Yúsan ti shiir awajsamín áiniawai.

¹³ Núnisan atumsha nekas uwempratin chicham antukrum Kristu nekas enentáimtusurme. Túrarum Kristu-shuar ajasakrumin Yus ni shiir Wakanin akuptuktaj timia nuna akupturmakmai. Nuna tura “nekas Wíi shuaraitrume” tawai.

¹⁴ Yamái Yusa Wakaní ii enentáin pujuruk tuke uwentikramji. Tura takas umik nu tsawantaj ashí tsan̄katramkattaji. Tura ii enentáin pujá asamtai Yus ukunam Nijjaisha ashí tsan̄katramkattaj nu paant nékaji. Maa, Yus ti penker asamtai Nin ashí ti shiir awajsarti.

Papru Yus-shuaran áujtusmiania nu

¹⁵ Átum ii Uuntri Jesukrístu nekas enentáimtamuncha tura ashí Yus-shuarjai shiir awajnaiyamuncha antukjai.

¹⁶ Túran shiir enentáimkiun Yúsan áujkun tuke yúmin̄kiajai.

¹⁷ Ii Uuntri Jesukrístu Apari Yus ti shiir asamtai Nin áujeakun ni Wakaní ni nekatairin suramas ashí jintinramawarti tusan seajai. Nujai nuna nan̄kaamas Yus nekaattarme.

¹⁸ Tura enentáimincha paant enentáimtikramprarti tusan seajai. Nujaj shiir túrutmataj tusa achirmakuitrum nu nekaattarme. Nu arantcha imiá shíira nu, Yus ni shuarin ashí tsankatkattana nusha nekaattarme.

¹⁹ Nu arantcha Yus umirkurin ti kakaram tujincha asa in yáinmaj nu nekaattarme. Tura nu kakaram ti kakaram asamtai

²⁰ nujaj Krístun jakamunmaya iniantkimiayi. Tura nayaimpiniam jukí ni untsuuriní akupin pujutainium apujamsiayi.

²¹ Tura ashí ju nunkanam akupin ainia nujajsha tura ukunam nunka átatna nu akupin áminia nujajsha tura ashí akupin ainia nujajsha tura ashí naari nékamu ainia nujajsha Yus Krístun ashí nankaamas akupin najanamiayi.

²² Tura ashí írunna nu, Krístun umirkartin áiniawai. Tura Yuska Krístunak ashí Yus-shuara Akupniuri awajamsiayi. Túramtai Krístu ni shuari muuké áintsankete.

²³ Tura ashí nunkanam Yus-shuar ainia nu Krístu ayashí najanainiawai. Tura Krístu ashí ni ayashin pimiutkaiti tura nu arantcha ashí írunna nunasha pimiutkaiti.

2

Yus anenma asa uwentikramji

¹ Átum yajauch túrakrum tunaanum tuke wekaakrum Yúsnumiá kanakin asarum jakauyarme.

² Nu tunaanum jú nunkanam pujuinia nujaj métek tuke wekainiuyarme. Túrarum uunt iwianchi wakeramuri umirniuyarme. Uunt iwianch ashí Yúsan umirainiatsna nuna akatenawai.

³ Ashí iisha núnisrik yaunchu nu shuarjai métek ii ayashí wakerakmu umirniuyaji. Tura í enentái wakeramusha umirniuyaji. Tuma asar tura tunaajai akiinia asar chíkich shuarjai métek ti kajernakmiaji.

⁴ Antsu Yus ti waitnenkartin asa in ti anenmamiayi.

⁵ Tuma asa ii tunaanum tuke jaka pujarnin Krístujai métek iwiaaku awaj-tamsamiayi. Aya ti anenkartin asa uwentikrampramiayi.

⁶ Tura Krístujai métek iniantamkimiayi. Nuyá Jesukrístujai métek, akupin pujutainium yamaisha apujtamas tuke nupetkatniun tsankatramkaiti.

⁷ Nujaj ni ti anenkratmarincha tura Krístu túrunamujai waitnentrampramuncha tuke iniaktusmin átatui.

⁸ Jesukrístu nekas enentáimta asakrumin Yus waitnentramar uwentikrampraiti. Juka átumkeka túrunachuitrume. Antsu Yuska Niñki kuitchajai suramsaitrume.

⁹ Shuar ni takatríjiai uwempratniuitkiunka nankaamantu enentáimsainti winia kakarmarjai uwemprajai tusa. Nu enentáimsatniuka atsutí tusa Yuska átumka takaatsrumnin uwempratniun suramsamiarme.

¹⁰ Yus najanamuitji. Kame Jesukrístujai tsaniakrin yamaram iwiaakman suramas tuke penker túratniun najatmamji. Yáunchuk nuna enentáimturmasmiayi.

Krístujai tsaninñkiu asar shiir nawamnaikiar pujaji

¹¹ Nuik ámarum nu enentáimpratarum. Ashí Israer-shuar ni ayashin tsupir-naku ásar ashí Israer-shuarchan, tsupirnakcha áiniakui, penké Yúsnachua núnis enentáimtuiniawai. Tura atumsha Israer-shuarcha asakrumin “tsupirnakcha” turamniuyarme.

¹² Nuik Krísturtinchauyarme. Israer-shuarcha asarum ashí ni túrutairisha tura ashí Yus nin tsankatkarmasha nekaachuyarme. Tura jú nunkanmaya

asarum nekas Yusa nu enentáimtichuyarme tura shiir pujustin nánkamsarum enentáimpramarme.

¹³ Antsu yamaikia Krístujai tsanin̄kiu asarum, yaunchu Yusaíya yaja pujuwitiatrum, yamaikia Kristu numpé puármatai ni jarutramkamujai tántaitrume.

¹⁴ Israer-shuarjai Israer-shuarchajai nemasmanaikiar ajapén péenkramu ámiaji. Tura Kristu nuna sáaki nawamnaimtikramkamiaji. Tura chikichik shuar najatmamiaji.

¹⁵ Nuik aya Israer-shuar Muisais akupkamu untsurí armia nuna umirkatin áiniak nujai chíkich shuarjai nemasmanainiarmiayi. Tura Kristu jaka nu akupkamun ántar awajas chikichik shuar yamaram awajtamsamiaji.

¹⁶ Núnisan̄ ámiaji. Kristu krúsnum jaka nemasjai mai apattamak chikichik awajtamás Yusjaisha nawamnaimtikramkamiaji.

¹⁷ Kristu taa nawamnaikiatniun chichaman Israer-shuaran ujakmiayi. Tura nu chichamnak atumin Yus nékachuyarmena nunasha ujaktinian akupkamiayi.

¹⁸ Yamaikia Israer-shuartisha tura Israer-shuarchasha mai metek Kristu túrunamujai tura Yusa Wakan̄ takaku asar Yusai jeatniuitji.

¹⁹ Tuma asamtai yamaikia chíkich shuarchaitrume, antsu ashí Yus-shuarjai métek ajasuitrume. Nekas Yusa shuarin̄trume.

²⁰ Átum uunt jea jeamma núnisaitrume. Uunt jea jeamtin, emka kaya apujtuktiniaiti jea ti wewe atí tusa. Núnisan̄ yaunchu Yúsna etserniusha tura Kristu akatramurisha Yus-Chichaman etserainiak imiá nekas enentáimtustinia nuna apujtukarmiayi. Tura ashí nujai nan̄kaamas Jesukristu enentáimtustiniaiti.

²¹ Jea apujtukmar̄i Kristu asamtai Nij̄ ti pen̄ker ekeniar jea jeamnaki wéawai. Tura ii Uuntri Krístujai Yusa Jee ti shiir átatui.

²² Núnisrumek atumsha Krístujai tsanin̄kiu asarum átum ashí Yus-shuarjai Yusa Jeeya áintsan̄ ajasuitrume. Tura Yusa Wakan̄ ashí Yus-shuara enentáin̄ pujú asamtai nekas Yusa Jeēnte.

3

Papru Israer-shuarchanum Yus-chichaman etserkatniuya nu

¹ Nu asamtai atumin Israer-shuarchatirmin yáintaj tusan Jesukristunu étserkun sepunam pujajai.

² Yus anentak Yus-Chichaman atumin etserkatniun akatar akuptukuiti. Nu nékatsrumek.

³ Yus nuna túrutak yaunchu nekaachmancha paant awajtursamiayi. Núnaka ishichik áatraitjar̄me.

⁴ Nu áujsarum Krístunu yaunchu nekaachman yamaikia paant nékajna nu nekaattarme.

⁵ Nú chichaman yáunchusha chikichkinkesha ujankachmiayi. Túrasha yamaikia Yusa Wakan̄ Kristu akatramur̄incha etserniur̄incha nu chichaman paant awajtusarai.

⁶ Nu chicham j̄uiti: Uwempratin chichaman umirkar Israer-shuarcha Israer-shuarjai métek Krístujai tsanin̄kiaru ásar chikichik shuar ajasartatui. Tura nu arantcha Yus ni shuarin̄ ashí shíran tsan̄katkatniun anajmatrama nūj métek pachiinkiertatui.

⁷ Yus ni kakarmar̄ij̄iaj̄ winia yáintiuk tura ti anentu asa nu uwempratin chichaman etserkat tusa akatturmiayi.

⁸ Ashí Yus-shuarjai nan̄kaamas wi pé̄nkercha ain̄ Israer-shuarchanum shiir chichaman etserkat tusa Yus tsan̄katrukmiayi. Krístujain̄kia kuitjai

nan̄kaamas pé_nker, enentáimtustin jeatsjinia nu, takakji. Nusha ti shiir chichamaiti.

⁹ Yuska, ashí najana nu, nu enentáimmian yáunchusha etsertsuk yamaikia ashí shuar nu chichaman nekaawarat tusa winia akatturmiayi.

¹⁰ Yamaikia ashí nayaimpiniam pujuinia nuka Yus ni shuariin túrunamun ísar Yuska imiá neka asa ashí enentáimniua nuna paant nékainiawai.

¹¹ Yus júnis túratniun yáunchuk enentáimpramiayi. Tura ii Uuntri Jesukristujai mash uminkiamiayi.

¹² Tura Krístujai Yusai yúpichuch jeaji. Tura Nin nekas enentáimtusar sapijmiatsuk Niin tantamniaitji.

¹³ Tuma asamtai tájarme, atumin yáintaj tusan sepunam pujakui kúntuts enentáimprairap. Antsu nujai Yus atumin ti shiir awajtamkurmin átum warasuk tusan wakerajrume.

Kristu ti anenkratniuiti

¹⁴ Nu asamtai ii Uuntri Jesukristu Aparín tikishmatran áujtajrume.

¹⁵ Ashí nayaimpinmasha tura nun̄kasha Yus-shuar ájnia nu nekas ni shuari áiniaji.

¹⁶ Yus ti kakaram asa ni Wakanjijai atumí enentáin pujureak ashí ni kakarmariyan atumin suramsarat tusan áujtajrume.

¹⁷ Yus nekas enentáimtakrumin Kristu atumí enentáin pujusat tusan áujtajrume. Tuke yapajítsuk anenkratin átarum tusan áujtajrume.

¹⁸ Túrakrum ashí Yus-shuarjai Kristu anenkrattairi nekaattarme. Imiá uunt asa nan̄kantsuk tuke amuukachminiati.

¹⁹ Nu anenkrattai ashí takamtsuk nekaachmin aḡn nekaatarum tusan áujtajrume. Nujai Yus takamtsuk pimiutramkattarme.

²⁰ Nekas Yus shiir awajnasti. Ni ti kakaram asa ii seajnia nuna nan̄kaamas tura enentáimprachminia nunasha nan̄kaamas iin pujurtamuk ashí túramniaiti.

²¹ Ashí Yus-shuarjaisha tura Krístujajisha Yusa pé_nkeri tuke paant wantinin atí. Yus tuke iniaitsuk shiir awajnasti. Núnisaḡ atí.

4

Yusa Wakanjijai tsaniḡkiar pujakur túratin

¹ Atumsha ni shuari ajastin Yus achikma asarum pé_nker wekasatarum tájarme. Ii Úuntriiniun étserkun sepunam pujakun seajrume.

² Nekasmiancha ajasrum aneniakrum katsunnairatarum.

³ Yusa Wakanj chikichik shuar awajtamkurmin shiir awajnisarum pujusatarum.

⁴ Yusa Wakaninkia chikichkiiti. Tura ashí métek Yus achikma asar métek Nijjai shiir pujustin enentáimji. Iisha Kristu ayashí ayashímkia asar chikichik ayashkiitji.

⁵ Ii Uuntri chikichkiiti. Niḡki nekas enentáimtusar métek imiantiniaitji.

⁶ Chikichkiiti Yus, ashí Yus-shuarti ii Aparínti. Ashí akuptamniuitji. Ashí ni shuariin pujak ii enentáin pujurtamji. Ti nekas ashí mash, Israer-shuartisha Israer-shuarchasha, imiá chikichik ajasuitji.

⁷ Tura chikichik chikichik niisháa shiir takastinian suramsaitji. Tura Kristu wakerimia núnisaḡ suramsaji.

⁸ Nu asamtai Yus-Papiniumsha tawai:

“Achikman jukí nayaimpiniam wakamiayi. Tura shuáran shíiran susamiayi.” Tu áarmaiti.

⁹ Tura “wakamiayi” tana nu ¿warintia? Kristu nayaimpiniam pujá asa yakí wákaṅka emka tárashinkiait. Nekas nunká tamiayi.

¹⁰ Niṅki ataksha nekas nayaimpiniam wakamiayi. Nuna tura asa ashí ni shuarin pimiutkarmiayi.

¹¹ Tura nujai chikichan akatramun awajsamiayi. Chikichnasha Yúsnan etserniun awajsamiayi. Chikichnasha uwempratin chichaman etserniun awajsamiayi. Chikichnasha Yus-shuara wáinniun awajsamiayi. Tura chikichnasha unuikiartinian awajsamiayi.

¹² Túramtai ashí Yus-shuar ni takatrijiai yáiniaikar ti penker shuar ajainiakui Kristu ayashí takamtsuk katsuarartatui.

¹³ Nujai Yus nekas enentáimtamunam Yusa Uchiri ashí métekrak penker nekaattaji. Nu túrakur katsukir Krístujai métek penker ajastatji.

¹⁴ Tura uchía áintsar áhattaji. Úchikia ashí yamaram chichaman antukar wari yapajiniawai. Tura anankartinia chichamen antukar waaku ániawai. Kame nu anankartin shuar ti paant chichayatan ni shiir chichamejai anankatniun pujurenawai.

¹⁵ Antsu nekas aneniakur nekas chicham ujanaiktinaijti. Túrar Krístujai tsaninkiar tuke tsakakir ashí penker túratniujai Niijiai métek ajastatji. Krístuka ashí ni shuari muuké áintsankete.

¹⁶ Tuma asa ni ayashin wáinkui ashí nuna muchitmarí penker yáiniaikar ashí ni túratniurin shiir takasartatui. Nujai nu ayashnium muchitmarí chikich chikich penker takainiak métekrak shiir tsakartatui. Tura anenainiakui nu ayashsha penker úuntmartatui.

Krístujai tsaninkiu asar yamaram iwiaakmanum wekaaji

¹⁷ Ii Uuntri Kristu ímmianum juna akatjarme: Chikich aents Yúsan nékachu ásar ántar ni enentáimmiajain wekainia núnisrum wekasairap.

¹⁸ Ni enentáin kusuru ániak Yusna nuna nekaatniun wakeruiniatsui. Tuma ásar shiir wekasatniun, Yus amaana nuna, nékainiatsui.

¹⁹ Nu arantcha, ni túramurijiai natsamtichu ásar ti yajauchiniam surumakar ashí tunaan wararainiak túrin ániawai.

²⁰ Antsu átumka núnisrum enentáimtustin unuimiarchamarme.

²¹ Nekas Nii anturkaitkiurmeka tura Jesus nekas tama Kristu unuiniarmaitkiurmeka Nin shiir enentáimtustin unuimiarmarme.

²² Yaunchu enentáimtairmeka ayash wakeramu anankramin ainia nujai piaku asa imiá yajauchiiti. Nu enentáimtairmesha yaunchu túrutairmesha ajapa iniaisatarum.

²³ Túrarum penker enentáimsarum wakannium yapajiátarum.

²⁴ Tura yamaram enentáimtairam emetatarum. Nuka Yusjai métek nanjanamu asa nekas penker tura shiira nuna tuke túriniaiti.

²⁵ Nu asamtai chikichik ayashi muchitmarí asarum wáitrutsuk nekas chicham chicharnaisatarum.

²⁶ Kajeakrum tunáa túrawairap. Tura nu kajeakmasha tsawant takamtsuk áchatniuiti.

²⁷ Uunt iwianch yajauch awajtamsatin tsankatkaip.

²⁸ Kasasha kasamtsuk kakaram takakmasti. Tura ni uwejéjai penker takaak atsumainia nú shuarnasha susati.

²⁹ Muijmiai chicham chichasairap. Antsu chichastin akui penker chicham, chikich shuar penker awajsamnia nu chichastarum. Anturtuinia nuna yáintaj tusarum nu chicham ujaktarum.

³⁰ Yusa Shiir Wakaní kúntuts awajsairap. Warí, Yúsnaiti tusa pujurtamji. Tura pujurtamuk takamtsuk uwentikramprattaji.

³¹ Ashí yajauch ana nuyá kanaktiarum. Nakitratniusha, kajernaiki-atniusha, tura kakantrar charáa charáa ajatniusha, katsekmaktincha, tsanumpratniusha mash atsutí.

³² Antsu shiir awajkartin ajasrum waitnennairarum, Kristu jakamujaj Yus atumí tunaarın tsanıkurtampra nütiksarmek tsanıkurnairatarum.

5

Yus-shuar túratin

¹ Nekas Yusa Uchirí aneamu asarum Nii tura núnis túratin wakeruktarum.

² Kristu in anenmaj núnisrum anenaitiarum. Kame ii tunaarın akikmaktaj tusa jákatniunam surumakmiayi. Túramtai Yus shiir enentáimtusmiayi.

³ Yusna asarum tsanirmatniusha yajauch túratniusha tura jú nunkanmayan ikiaunıkatniusha ishichkisha enentáimtuschatniuitrume.

⁴ Natsanmaincha, ántar chichamsha yainmakchamnia asamtai chichaschatniuitrume. Antsu Yus shiir yumınsatniuiti.

⁵ Shuar chíkich nuwajaj tsanirmakka tura ashí yajauchin wakerakka tura jú nunkanmayan ikiaunıkatniun wakerakka Yusaj Kristu akupea nuı penıe pachiinkiachminiaiti. Kame ju nunkanmayan ikiaunıkatın ántar-yus tikish-matratniua nujaj méteketete.

⁶ Nu túramniaiti tusar ántar chichamjaj anaıkracharti. Warı, nuna túruiniakui Yúsan umirainiachun Yus ti asutiáwartatui.

⁷ Tuma asamtai nu shuar penıe pachischatniuitrume.

⁸ Yáunchuka atumsha kiritniunam wekainiuyarme. Tura yamaikia Krıstujaj tsanıkiu asarum penıer tsáapninium wekaarme. Shuar tsáapninium wekainia nujaj métek wekasatarum.

⁹ Tsáapninium wekainiaka shiir awajkartincha tura nekas chichamtincha tura penıer túrin ániawai.

¹⁰ İi Uunrı Kristu wakeramu nekaatin wakeruktarum.

¹¹ Kiritniunam wekainia nu túramu pachisairap. Antsu nu shuar tsáapninium enıkeatarum.

¹² Ni uık túruinia nu áujmatsatin natsanmainiaiti.

¹³ Tura ashí tsáapninium itiamu ashí paant ajawai. Tsáapnikia ashí paant awajeatsuk.

¹⁴ Nu asamtai Yus-Papinium tawai:

“Kanáruitme nu shintiártá. Jakamunmayá nantáktiá. Tura Kristu tsáapın awajturmastatui.”

Tu áarmaiti.

¹⁵ Nu asamtai átum túramu ímiastarum. Nékachu áintsarum pujusairap. Antsu penıer enentáimprarum wekasatarum.

¹⁶ Penıer túratın tsawant wasúrkáip. Tunáa ti pampaatsuk.

¹⁷ Enentáıncha áirap. İi Uunrı Kristu warinia wakera nu enentáimtustarum.

¹⁸ Nampekairap. Nampeakmeka aya yajauch ajame. Antsu Yusa Wakanı winia enentáıruı takamtsuk pujurtusti, tu enentáimsatarum.

¹⁹ Túrarum Yus shiir enentáimtakrum Yus-kanta kantamkirum shiir áujnaisatarum.

²⁰ İi Uunrı Jesukrıstu náarıjjaj ashí irunna nu Yus Apa tuke yumınsatarum.

Yus-shuar túratin

²¹ Yus-shuar asarum nuámtak umirnaikiatarum. Túrakrum Kristu shiir awajsattarme.

²² Núwaka Krıstun umirna núnisaı ni áishrııncha umirkatniuiti.

²³ Kristu ni shuarin akupeana núnisan áishmansha ni nuwen akupkatniuiti. Kristu ni shuarin ayashimiak ni muuké áintsankete. Tura nin uwemtikiar-tiniaiti.

²⁴ Nu asamtai Yus-shuar Krístun umirin áiniawai. Núnisan ashí ana nujai nuwa ni áishrin umirkatniuiti.

²⁵ Kristu ni shuarin ti aneak nin yáintaj tusa jákatniun surumakmiayi. Núnisrumek áishmantirmesha atumi nuwé aneatniuitrume.

²⁶ Kristu ashí ni shuarin ni Chichamejai tura entsajai nijjar ní shuar pénger árat tusa jakamiayi.

²⁷ Nujai ashí ni shuarin tunaarinniuchu tura yajauch máatrachu antsu ti pénger shiir awajas Niini ejetaj tusa túramiayi.

²⁸ Núnisan áishman ni ayashin anea núnisan ni nuwen aneatniuiti. Shuar ni nuwen aneak nujai ni ayashincha aneawai.

²⁹ ¿Yaki ni ayashin nakitniuit? Antsu pénger wáiniuk áyureatsuk. Kristu núnisan ni shuarin wainiui

³⁰ ni ayashí asamtai. Kame ni ayashí muchitmarintji.

³¹ “Tuma asamtai áishman ni aparincha nukurincha ikiukin ni nuwejai tsaninkiar chikichik ayashtin ajainiawai.” Tu áarmaiti.

³² Nusha Kristu ni shuarijjai tsaninmán tawai. Nuka yaunchu nekaachma yamaikia nekanaiti, tura ti enentáimturtniaiti.

³³ Tura núnisan ashí áishmantiram atumí nuwé atumí ayashía nútiksarmek aneatniuitrume. Nuwasha ni áishrin umirkatniuiti.

6

¹ Uchitirmesha, Yus-shuar asarum apasha nukusha umirkatarum. Nuka ti péngeraiti.

² Emka akupkamu “umirkam nekas shiir átatme” tana nu júiti: “Apasha nukusha umirkata.

³ Túrakmeka shiir átatme tura jú nunkanam untsurí tsawant pujustatme” tawai.

⁴ Atumsha, uchirtintirmesha, atumí uchiri ántrarum akajkairap. Antsu Yúsan shiir enentáimtusarat tusarum ti pénger jintinkirum tsakatmartarum.

⁵ Takakmautirmesha, atumí uuntri ju nunkanam pujuinia nu ti pénger umirkatarum. Kristu umirkatniua áintsarum wishiktsuk ashamakrum tuke enentáijjai takarsatarum.

⁶ Aya wáitmakui shiir enentáimtursat tusarum pénger takarsairap. Antsu Kristu takarniurja núnisrum ashí ame enentáimjai Yus wakera nu túratarum.

⁷ Aya shuárnak yayá nútiksarum takasairap. Antsu ii Uuntri Kristu takarsatniua nútiksarmek ásump enentáijjai takastarum.

⁸ Kame chíkich chíkich ni takasmajai métek akinkiertatui. Ii Uuntri Kristu nu shuar pénger túramujai métek akiktatui.

⁹ Tura atumsha, iniamniutirmesha, atumí takartamu wakaní mántutsuk shiir enentáijjai iniartarum. Nekas enentáimpratarum. Ii Uuntri nayaimpiniam pujana nuna niisha atumjai métek umirainiawai. Tura Yuska ashí shuaran akantsuk métek iyawai.

Yusa kakarmarijjai íwianch taritratarum

¹⁰ Wátsek, yatsuru, ii Uuntri Yusjai tsaninkiu asarum ni ti kakarmarijjai iwianchjai máanaiktin kakaram ajastarum.

¹¹ Apach máanainiak jiru entsarua núnisrum Yus susamujai entsartarum. Nujai íwianch nupettamkui tariartatme.

¹² Kame Yusna takáa asar penké áentsjai máaniatsji antsu yajauch wakan kakaram írúnna nujai máaniaji. Niisha ju nunkanam, kiritniumma áintsan, tunaanum wekainia nuna akupin áiniawai.

¹³ Jiru entsartinia áintsarum Yus súramna nu entsartarum. Nu entsarmajai itiurchat tsawant taritra nupetkarum tuke tariarum wajastatrume.

¹⁴ Wats, nekas tariartin nekas chicham emenmamatarum. Tura péñker túratniujai jatairum ajaktarum.

¹⁵ Suntar iwiarnak sapatán aweá áintsarum Yusa shiir chichame etserkatin iwiarnartarum.

¹⁶ Nuyasha ashí nankaamas, tantar takustinia áintsan, Yus tuke nekas enentáimtustarum. Nujai íwianch ekestrámkamusha uwemturtatme.

¹⁷ Múukem ajaktincha Kristu uwemtikrampramu múukmijn etsenkruktarum. Tura Yus-Chicham puniáa áintsan achiktarum. Nuka nekas Yusa Wakaní puniarinti.

¹⁸ Yusa Wakaníjjai Yus áujeakrum tuke seatniuitrume. Tura tuke aneara pujustarum wake mesetsuk, tura ashí Yus-shuar ainia nusha Yus áujtustarum.

¹⁹ Núnisan winiasha áujtursatarum. Wi sepunam pujayatan Yus winia chichastinian surusat tusarum seatritiarum. Tura wi chichaakun sapijmiatsuk Shiir-chichaman yaunchu nekaachma paant awajsat tusarum áujtursatarum.

²⁰ Yus nu chichaman etserkatniun akuptukuiti. Nuna túrakun sepunam pujajai. Sapijmiatsuk etserkat tusarum Yus áujtursatarum.

Amikmaamu

²¹ Ii aneamu yachi, Tíkikiu, ashí wi túramun ujatmaktatui. Niisha Ii Uuntri Krístunu etserkatniun ti penker yáinniuiti.

²² Tuma asamtai ii juí pujamun ujatmak ikiantamprarat tusan akuptajrume.

²³ Yus Apasha tura ii Uuntri Jesukrístusha ashí Yus-shuartirmin anenmak shiir imiatkinchanum pujustinian suramsarti. Tura Nin tuke nekas enentáimtustinian suramsarti.

²⁴ Ashí ii Uuntri Jesukrístun tuke enentáijjai aneana nuna Yus shiir yáinti. Nuke atí.

Papru JIRIPIUSNUMIA SHUARAN papí akuptukma

Papru sepunam pujus Jiripiusnumia Yus-shuaran áatramiania nu

¹ Wi Papru Timiutéujai Jesuskrístu takarín asar ashí Yus-shuar Jiripius péprunam pujarmena nu ju papí akuptaji. Yus-shuaran wainin árumna nusha tura Yus-shuaran yain árumna nusha ashí Yus-shuarsha nunisañ Yusna asarum tura Jesukrístujai tsanínkiu asakrumin ju papí áateajrume.

² Yus ii Aparísha Jesukrístu ii Úuntrísha atumin waitnentrainiania ásar imiatkinchanum tuke shiir pujustinian yainmakarti.

Papru Yus-shuaran Yúsan áujtawai

³ Ashí tsawant atumin enentáimtakun Yúsan tuke shiir yúmiñkiajai.

⁴ Yúsan áujeaknasha ti warasan seatjarme.

⁵ Kame iikia yámankamtaiknumia Yus-Chicham métek yáiniáikiar iniaitsuk takasuitji.

⁶ Yus atumíin ti péñker awajsatniun nan̄kama asa núnisañ Jesuskrístu táatsaiñ tuke shiir awájtámki nekas péñker najatmattarme. Nuka ti nekasaiti.

⁷ Atumin ashí ti aneajrume. Kame wi sepunam pujakun Yus-Chichaman akasmatkun tura Yus-shuar kakararti tusan takaakui átum yáintiarme. Yus ti anenkartin asa nu túratniun mai metek tsañkatrámkaitji. Tuma asamtai atumin júnisan enentáimtustin ti penkeraiti.

⁸ Jesukrístu anenkrattairijiai wi atumin aneamun Yussha paant nékarui.

⁹ Yúsan áujeakun anearmena nú nan̄kaamas aneak tusan seatjarme. Tura nújaisha ti neka ajasrum

¹⁰ ashí péñkera nu achikiuk tusan Yúsan áujtajrume. Atumin nu túrunamtañkia yamaisha tunáajainchu pujustatrume tura Kristu támatai sumamashtatrume.

¹¹ Núnisañ Jesukrístu kakarmarijjai ashí péñker túrin áatrume. Tura nújai ashí shuar Yúsan ti shiir enentáimturartatui.

Wi ju nunkanam aya Krístunak enentáimtakun pujajai

¹² Winin túrunamu itiurchat aijn nujai uwempratin chicham nekas pam-pawai. Nu nekaatarum tusan wakerajrume, yatsuru.

¹³ Iis, uunt akupniu suntarisha tura ashí shuarsha wi Krístunun etseru asan sepunam pujamun paant nékainiawai.

¹⁴ Ti untsurí Yus-shuar wi sepunam enketman nekaawar ii Uuntrí Jesusan nekas enentáimtusar sapijmiatsuk Yus-Chichaman etserainiawai.

¹⁵ Kame shuar awai winia kajertuiniak tura nan̄kaamantu enentáimtumainiak Krístun páchiniawai. Antsu chíkich shuarka nekas enentáijjai Krístun etserainiawai.

¹⁶ Yajauch shuarka Krístun shiir enentáimtutsuk antsu ashí shuar ní chichamenak anturkar wíi shuar ajasarat tusar etserainiawai. Túruiniak wisha sepunam pujakui nu arant itit awajtustinian wakerutainiawai.

¹⁷ Antsu péñker shuar Krístun nekas aneenak etserainiawai. Nu uwempratin chicham imiá penkeraiti wi titin asamtai winiasha anentainiak shiir etserainiawai.

¹⁸ Wats, mai metek chíkich yajauch enentáijjai tura chíkich shiir enentáijjai Krístun etserainiakui shiir enentáimjai.

Tura nuna nan̄kaamas shiir enentáimprattajai.

¹⁹ Kame Yus áujtursa asakrumin tura Jesukrístu Wakan̄sha yaintiu asamtai ti pé_nker uwempran jiinkittiajai.

²⁰ Nekas juna wakerajai: Natsamtsuk uunt akupniun Jesukrístun paant ujakartinian wakerajai. Nujai winí Kristu kakarmari pujamu ti paant nekanattawai. Mántuiniakuisha tura mántuiniachkuisha ashamatsjai. Aya Kristu kakarmarin winí nan̄kaamas nekaawarat tusan wakerajai.

²¹ Wíjiainkia ju nun̄kanam iwiaaku pujakun aya Krístunak enentáimtakun pujajai. Tura jákatniusha juí pujajnia nuna nan̄kaamas pé_nkeraiti.

²² Ju nun̄kanam pujakun Uunt Jesusnan takasminiaitjai. Nu asamtai tunatsuk achiktaj nékatsjai.

²³ Wíjiainkia itiurchataiti mai achiktin. Jákatniuncha wakerajai Krístujai tsaninkian pujustaj tusan. Wíjiainkia nu imiá pé_nkeraiti.

²⁴ Túrasha atumin yáintaj tusan tuke ju nun̄kanam iwiaaku pujusminiaitjai.

²⁵ Kame tuke pujustajai nékajai. Núnisnak atumjai pujakun Yus nekas enentáimtakrum nan̄kaamas waraakrum tuke katsuaruk tusan yáintatjarme.

²⁶ Nu asamtai wi atumjai pujakui Jesukrístu yuminsarum shiir warastatrume.

²⁷ Kristu chichame ti penker asamtai atumsha aya pé_nkera nuke túratarum. Wi atumjai pujaknasha tura yajá pujaknasha átum ti shiir túrarmena nuna antuktinian wakerajai. Ashí shuar uwempratin chichaman nekaawar umirkarat tusarum chikichik enentáijjai kakaram ajastarum.

²⁸ Atumí nemasrisha ishichkisha sapijmiamtikramkarain. Nu túrakrumin nu shuar emesratniunam weena nusha tura átum uwempratniusha paant nekanattawai. Núnisan atí tusa Yus túraiti.

²⁹ Krístunu asarum Nii nekas enentáimtustinniasha tura Niiniu asarum wáitsatniusha Yus anenma asa tsan̄katramkairume.

³⁰ Yus-Chicham pamparat tusar maimetek ti takáa asar wáitiaji. Wi nuik ti takasmaj nu nekarmarme. Tura yamá tuke takaaj nusha ántarme.

2

Kristu péjchach ajasmatai Yus ti uunt awajsamiayi

¹ Kristu ikiantamkuisha, ni anenkrattairi atsantamkuisha, ni Wakan̄i atumjai pujakuisha, anenkratniuitkiurmeha, waitnenkratniuitkiurmeha

² waramtikrustarum. Métekrak takastarum. Mai metek anenaitiarum. Yusa Wakan̄i atumí enentáin pujá asamtai chikichik enentáim enentáimsatarum.

³ Átum wakeramuk túrawairap. Nan̄kaamantu ajastaj tírap. Antsu péjchach ajasrum chíkich shuar atumjai nan̄kaamas pé_nker enentáimtusta.

⁴ Aya níniak pé_nker átatna nunak shuar túrashti. Antsu chíkich shuar yáinminia nuna túrati.

⁵ Kristu Jesus enentáimpramia núnisrum enentáimpratarum.

⁶ Niisha Yúsaitiat ju nun̄kanam winiak tuke Yusjai métek átinian emettsuk

⁷⁻⁸ antsu nuna ikiuak aents ajas péjchach asa ashí aentsu takarin ajasmiayi. Tura aentsu ayashin ayashimiak tura Yúsan umireak jákatniuncha surimiakchamiayi. Maa, imiá tunaarinnia áintsan̄ krúsnum natsanmainium jakamiayi.

⁹ Túramtai Yus nekas nan̄kaamantu awajsamiayi. Ni náarincha ashí paant awajsamiayi.

¹⁰ Tuma asamtai ashí nayaimpiniam íranna nusha, nun̄ká íranna nusha, tura iwiarsamusha Jesusa náarin antukar tikishmatrartatui.

11 Tura ashí shuar Jesukrístu ashí akupin ajasman paant nekaawartatui. Nújainkia Yus Apá kakarmarisha paant nekanattawai.

Yus-shuar kiritniunam keeák tsáapin awajeana áintsan áiniawai

12-13 Nu asamtai, aneamu yatsuru, wi atumjai pujaku umirtukmarmena nuna nankaamas yamaikia arant pujakuisha umirtuktarum. Iis, Yus atumí enentáin takaak ni shiir wakeramu wakeruktinniasha tura umiktinniasha pujurtamprume. Nu asamtai atumsha kakaram ajastarum Yus ti penker awajtamsatniun wakera nu túrunati tusarum. Tura péechach enentáimprarum awajirminiaitjai tusarum aneara wekasatarum.

14 Ashí yajauch tunaitsuk tura jianaitsuk wekasatarum.

15 Túrakrum makuumatsuk tunaajainchu átatrume. Antsu Yusa uchirí átatrume. Ju nunkanmasha shuar imiá tunaan túrinjajisha máatrachu asarum kiritniunam ji keeá áintsan ketrume

16 iwiaaku pujustin chicham paant awajeakrum. Nújai Kristu támatai atumíin ántran takascha asan ti shiir wararsattajrume.

17 Winia takatrujai Yus-shuar ajasakrumin wi jákatniuitkiuncha nújajisha warasaintjai. Atumsha wi waraajna jui núnisrumek warastarum tusan wakerajrume.

18 Atumsha waraakrumin métek wararnaisatai.

Timiutéuncha Epaprutíiuncha Papru ujakmiania nu

19 Ii Uuntri Jesus wakerakuinkia Timiutéun írmainiarat tusan ti warik akuptuktatjarme. Tura átum shiir pujamu ujateakui warastatjai.

20 Kame Timiutéu wijiai métek enentáimna áinis chíkich shuar atsawai. Niisha átum shiir pujusuk tusa ti nekas enentáimturmarume.

21 Chíkichka Kristu wakeramun iniaisar ní wakeramunak páchiniawai.

22 Túrasha átumka Timiutéu tuke penker túramu nékarme. Uchi ni aparíjjai takaana áinis Yusa shiir chichame etserkatniun yáintkiaiti.

23 Winia itiurtukartiñ nuna nekaan Timiutéu írmainiarat tusan akuptuktatjarme.

24 Kame Kristu yáintkiui wíkisha wárik ímniaitjarme.

25 Wi atumaj nuna írsati tusarum Epaprutítiu akupturkamarme. Wijiai métek tsaniñ takasuiti. Tura métek wáitsaitji. Áunkesha akupkamnia enentáimjai.

26 Nii jaawai taman átum antukman nekáa, írmaitniun ti wakerutmarme.

27 Maa, nekas ti janinkiamai. Túrasha Yus nin waitnentramai. Kame winiasha wi jui wáitiakun nii jakamtai nu arant ti kuntuts pujuschatniun waitnentrurmai.

28 Tuma asamtai akuptuktinian wakerajrume. Tura atumsha ataksha wáinkiarum waraakrumin wisha ti kuntuts enentáimchakun akuptuktatjarme.

29 Kristu yumĩsarum ti shiir warasrum wáinkiatarum. Chíkich shuar níjjai métek penker Yus-shuar ainia nusha shiir enentáimtustarum.

30 Kristu takatrin takaak ti janinkiamai. Átum yáintkiachminia nuna winia yáintkiataj tusa pujus janinkiamai.

3

Kristu nekaatin ashí nankaamas penkeraiti

1 Ayu. Warastarum, yatsurtiram, ii Uuntri Kristu ti penker asamtai nuik áatramajrum nuna ataksha títiatjarme. Ataksha ujam yainmakminiaitkiuinikia wíjjainkia itiurchatchaiti atak enentáimtikratin.

² Yajauch shuarjaj aneartarum. Nu shuar Muisais timia núnis tuke ya-maisha tsupirnaktiniaitrum tuiniawai.

³ Antsu iikia ayash tsupirnakmajaj péñker átiniatji tu enentáimtatsji. Iikia antsu ii wakanjijaj Yus shiir awajeaji tura Jesukristunu asar Niñki shiir wararji. Nu túrakur Muisais timia nu umintikia iitji.

⁴ Ju nunkanam íranna nujaj waantu enentáimpramniaitkiuinikia ashí shuarjaj nankaamas wikia waantu enentáimtumaraintjai.

⁵⁻⁶ Israer-shuar asan Muisais timia núnisan wi akiiniamtai uchu (8) tsawant nankaasmatai tsupirtukarmiayi. Israer-shuarnum Pinjamín weeitjai. Winia aparsha nukursha mai Israer-shuar ániakui wi imiá Israer-shuaraitjai. Wisha Pariséu tuinia núnisan Muisais akupkamun ti umirin asamtai chikichka winia sumamtikiatniun tujintrin ármiai. Tura Pariséu asan Kristu-shuarin ti kajerkan áintramjai.

⁷ Ashí nujajinikia waantu enentáimtumauyajaj. Antsu yamaikia Krístujajinikia penké ántar ániawai tajaj.

⁸ Ashí enentáimpramnia ákuisha winia Úuntur Jesukristu shiir enentáimtustin nekas péñkeraiti. Nu asamtai Krístunu ajakun wi takusmaj nu muijmiai ajasmatai núnaka iniaisamjai.

⁹ Nuna túran Nijjaj tsaninkian pujajaj. Tura akupkamu umirkatniujaj péñker ajaschaitjai antsu Krístun enentáimtakui Yus “péñkeraitme” túrutui.

¹⁰ Tuma asamtai ashí nankaamas wakeraj nu júiti: Krístun péñker nekaan nekas enentáimtustinniasha tura ni iniantkimiu kakarman takustinniasha wakerajaj. Tura Nijjaj métek ajastinian wakerakun ni wáitkiamunam tsanintinniasha tura Nii jakamia núnisan jákatniuncha wakerajaj.

¹¹ Túraknaka Krístujaj métek jakamunmayaj nantaktiaj tusan wakerajaj.

Papru kakaram ajasmiai Kristu wakeramun umiktinian

¹² Kame wakerukuitjia nuna mash umirkachuitjai. Krístujaj métek nekas péñker shuar ajaschaitjai. Túrasha Kristu Jesus “nuj ejetajam” emka túrutkui, wisha nuj jeataj tusan kakaram ajasan pimpitsuk takaajaj.

¹³ Yatsuru, wisha nuj jeajaj tátsujaj. Antsu yaunchu túrutain kajinmatkin kakaram ajasan Kristu wakeramunam jeatniun takaajaj.

¹⁴ Tura nuna umikmatai nayaimpiniam Jesukristujaj tsaninkian shiir pu-justinian Yus surustatui.

¹⁵ Ashí shuar Yusjaj katsuaru ájinja nu wi tájana núnis “jeachuitjai” tu enentáimpratniuitji. Tura “jeaitjai” enentáimkiurminkia Yus nunasha atak enentáimtikramprattarme.

¹⁶ Tura aneartarum. Naki pujutsuk jeajnia nujaj métek umirkatin pimpitsuk takastiniaitji.

¹⁷ Yatsuru, wisha tura chikichcha wijjaj métek péñker túrajnia nu wáinkiuaram atumsha núnisrumek túratarum.

¹⁸ Tura yajauch shuarsha írannui. Wi nuiksha ti ujakmajrume tura ataksha úutkun ujaajrume, nu shuar Kristu krúsnum jakamun mujjainiawai.

¹⁹ Tuma ásar emesratniunam akupnakartatui. Ni ayashí wakeramun, ni yusria áintsan, tuke umirainiawai. Natsanmainian túruiniayat wararaini-awai. Tura ju nunkanmayanak enentáimtuiniawai.

²⁰ Antsu iikia nayaimpinmayaj shuar asar ii Uuntri Jesukristu in uwemtikrampra asamtai nayaimpinmayaj tatí tusar nákaajaj.

²¹ Nii taa, ii yajauch ayashin yapajjá ni ayashíjaj métek ti shiir awajsat-tawai. Ashí uunt akupin ajas nu kakarmajaj túrutmattajaj.

4

Krístujaj tsaninkia wekáa asarum warastarum

¹ Nu asantai, aneamu yatsuru, ii Uuntri Krístujaj tsaninkiu asarum kakaram ajastarum. Maa, ti aneakun atumin enentáimtakun ti waraajai tura ístajrum tusan wakerajrume. Tawasap achikiar shiir enentáimsatniua núnisnak shiir enentáimtajrume.

² Ewautiancha tura Séntikincha, ii Uuntri Kristu shuari ásar, mai metek enentáimsarat tusan seajai.

³ Amincha, winia airú, nu nuwá yáinkta tusan seajme. Niisha wi iwiaaku chichaman étsereakui wijjaj métek takasarmai. Tura Krimintisha tura chikichcha wijjaj métek takasarmai. Nuna náarín iwaaku átinnium Yus áatraiti.

⁴ Nu asantai Uunt Jesusjaj tsaninkia pujá asarum warastarum. Ataksha “warastarum” tájarne.

⁵ Uunt Jesus tátin ishichik ajasai. Tuma asantai tsangka enentái takakrum nu paant nekanati.

⁶ Itiurchat enentáimsatin atumjaj penké atsutí. Antsu tuke Yus áujkum ashí itiurchatrum ujakta. Atsumamuram Yus seata. Túram Yus yumínsata.

⁷ Nuinkia atumí enentái ankant átinian, áentstikia penké nekaachminia nuna, Yus amastatui. Yus atumin ankant awajtamsa asa atumí enentáin tura atumí enentáimsamuríncha yajauch wayawain tusa shiir waitmaktatrume Jesukrístujaj tsaninkiu asakrumin.

Ashí péñker ana nu enentáimsatarum

⁸ Yamaisha yatsuru, júchiniak títiatjai. Yus-shuarti enentáimsatniun chichastatjai yamaikia. Ashí nekas ana nu enentáimsatarum. Tura ashí anturkamnia ana nusha, naka chicham ana nusha enentáimsatarum. Tura yajauch chichamsha enentáimsairap. Tura antsu ashí shiir ana nusha, chikich shuarnasha péñker enentáimtusminia nusha, kame ashí péñker ana nu enentáimsatarum. Nuyásha chikich shiir anturkamnia ana nusha enentáimsatarum.

⁹ Wi unuiniarmajrumna nu umiktarum. Tura wi túramur ísurmena nu tura antukurmena nusha umiktarum. Túrakrumnínkia Yuska ankant átinian amastaj tusa pujurtamsattarme.

Jiripiusnumiá Yus-shuar Páprun kuítian akuptukarmiania nu

¹⁰ Ii Uuntri Kristu anea asarum winiasha ataksha enentáimturum asakrumin ti waraajai. Kame kajinmatrukmiarme tátsujaj antsu kuítium atsakui yáintkiatin tujinkiamarme.

¹¹ Tura kuítian atsumakun tátsujaj. Antsu wi takakjana nujain warastinian unuimiáruitjai.

¹² Kuítrinchatí pujustinia nuna nékajai tura ti nukap takustinia nunasha nékajai. Tsukamaknasha jéemarnasha, itiarar takustinniasha tura penké takatsuk pujustinniasha unuimiáruitjai.

¹³ Kristu ni kakarmarín surakui ashí túramniaitjai.

¹⁴ Tuma ain atumsha wi atsumamu akupturkarum ti péñker túramarme.

¹⁵ Jiripiusnumiá shuartiram, ju ti péñker nékarme. Masetunia nunkanam Yus-Chichaman etserumtai aya atumek kuit akupturkamiarme. Wi etserkamujaj atumí wakanín yáinma asantai yumínsarum akupturkamiarme.

¹⁶ Atumek wi Tisarúnikia nunkanam atsumakun pujaisha kuit akupturkamiarme.

¹⁷ Aya kuit akupturkakrumin tu enentáimtsujaj. Antsu nu kuit Yusai kawentramkaku tusan wakerajrume.

¹⁸ Epaprutítíujaj akupturkamarum nujajsha atsumamaj nuna nan̄kaamas tiaruncha wáinkiajai. Akupturkamarum nusha ti kun̄kuin Yus susamua áinis ti shiir auyi.

¹⁹ Winia Yúsrusha ti péñkeran núkap takakui. Atumsha Jesukrístunu ajasu asarum Yus seamniaitrome. Tura Yuska ti takakna nujaj ashí atsumarmena nuna suramsattarme.

²⁰ Ii Aparí Yus tuke shiir atí. Nuke atí.

Amikmaamu

²¹ Winia náaruisha tura Jesukrístu náaríncha ashí Yus-shuar ainia nu chícham ujatruktarum. Niisha shiir pujusarti. Wi írutramusha núnisañ shiir pujusarti tusa akupturmainiawai.

²² Tura ashí akupin Sésaraj pujuinia nuyá Yusna ajasaruka tura chíkich Yus-shuarsha shiir pujusarti tusa chichaman akupturmainiawai.

²³ Ii Uuntri Jesukrístu atumniasha ti shiir yainmakarti. Nuke atí.

Papru KURUSENMAYA SHUARAN papí akuptukma

Kurusenmaya Yus-shuaran Papru áatramiania nu

¹ Wi Pápruitjai. Yus wakerutak Jesukrístunun etserkat tusa akatra akupka-muitjai. Wisha ii yachí Timiutéujai

² ju papí áarar nuí Kuruse péprunam Kristu péñker umirkarum Yusna ajasuitrumna nu akuptaji. Yus ii Aparí atumin wáitnentaimturma asa yain-makarti imiatkinchanum tuke shiir pujustinian.

Papru Yus-shuaran Yúsan áujtusmianis nu

³ Iisha atumin Yus áujtakur ii Uuntrí Jesukrístu Aparí Yus ashí tsawant yúminkiaji.

⁴ Atumsha Jesukrístu ti shiir enentáimtamusha tura ashí Yus-shuar aneamusha antukji.

⁵ Uwempratin chicham nekasa nu antukrum atumsha nayaimpiniam atumnian Yus ti shiir ikiusman wáinkiatai tusarum nákarme.

⁶ Nu chicham ashí nunkanam pampaakui shuara enentáin nereá áinis nusháa ajarar yamaikia péñker túrin áiniawai. Núnisan atumíncha túrunaiti. Yus ti nekas anenkartiniaiti tu etserkamu ántakrumin nu chicham atumí enentáincha nerekmiaji.

⁷ Nu chichaman Épapras ujatmakmarme. Niisha iijjai métek takasu asamtai ti aneamuiti. Atumniasha Kristu takatrín ti shiir takartamsaiti.

⁸ Niisha átum Yus-shuar asarum mai anenai ajamun ujatmakmaji.

⁹ Iisha nu antukar Yus ashí tsawant áujtajrume. Yus ni wakeramun ti paant nekaprutmawarat tusar seaji. Ashí Yúsnan ni enentáimtaiirijjai ashí Níiniun paant nekaatniun Yus jintintramat tusar seaji.

¹⁰ Atumsha Krístunu ainia núnisrum péñker túrutak tusar seaji. Tura ashí ni wakerana nu umiakrum ashí péñker ana nu, nerektinia áintsarmek, túrattarme. Núnis túrarum Yus unuimiatki wéakrum Nin ti penker nekaak tusar seaji.

¹¹ Yus ti kakaram asa ikiantamprat tusar seaji. Nujai ashí itiurchat ákuisha páchitsuk ti shiir warasrum katsuintrattarme.

¹² Yus ni shuarín tsáapninia nuí ashí péñkeran susattawai. Tura incha nuí pachiinkiatniun tsankatramka asakrin Yus Apa yuminsamniaitrum.

¹³ Yus iwianchin nupetak íwianch akupeana nú kiritniunmayá uwentikramar ni aneamu Uchirí akupeana nuí wearmakmaji.

¹⁴ Ni Uchirí krúsnum jaka ii tunaarín nijiar tsankurtamar uwentikrampramiaji.

Kristu jakamujai Yusjai nawamnaikiar shiir pujustin

¹⁵ Yus wáinkiachminiaiat ni Uchirí akiiniamai tura ayashimkiamiaji. Túmaitiat ashí najanamua nuna yaunchu pujú asa ashí akupniuiti.

¹⁶ Niiijai Yus ashí nayaimpiniam írunna nunasha nunká írunna nunasha, ashí wáiniaj nunasha núnisan wáintsuj nunasha mashí najanamiaji. Nu arantcha ashí akupin ju nunkanam írunna nusha, nayaimpiniam írunna nusha, iwianchnium írunna nusha, ashí Niiijai najanamua áiniak Nin umirkarti tusa najanamua áiniawai.

¹⁷ Ashí najanamua nuna yaunchu, Krístuka tuke pujuwiti. Ashí najanamua írunna nuna emestsuk wáinniuiti.

¹⁸ Ashí Yus-shuar métekrak chikichik ayashtinia áinis enentáimkiumka nuna muuke Krístuítu. Tura nu ayashín ni iwiaakmarijjaj*í* iwiaaku átinian súsaiti. Niisha ashí jakamunmaya nantakniujaj*í* imiá nan_{ka}amantuiti. Nújaink*ia* ashí enentáimpramnia írúnna nunasha akupniuiti.

¹⁹ Yus ashí takamtsuk Kristuj*í* shiir pujumiayi.

²⁰ Núnisan Yus Kristu krúsnum jakamujaj*í* ashí nayaimpinmasha tura ju nun_{kan}masha írúnna nuna Nijjaj*í* nawamnaikiar shiir pujusarat tusa wakerukmiayi.

²¹⁻²² Atumsha nuik tunáa túrin asarum atumí enentáin Yusa nemasrj ámar*me*. Tuma asarum yajá wekaimiarme. Antsu Kristu, aentsu ayashín ayashimiak, krúsnum wáitias jakamujaj*í* ii tunaarj asakármatai yamaikia Yujaj*í* nawamnaikiar shiir pujaj*í*. Nujaj*í* Kristu in pé*n*ker ajasuncha tunaan máatrachmancha tura sumamachuncha Yúsaj*í* ejetamtatj*í*.

²³ Tuma asamtai Jesukrístu shiir enentáimtusrum kakaram ajasrum kat-suartiniaitrum*e*. Tura uwempratin chicham antukuitrum nuyá kanakchat-niuitrum*e*. Ju uwempratin chichaman ashí nun_{kan}am etsernakuiti. Wisha, Papru asan, etserkatniun yaimjaj*í*.

Papru ashí Yus-shuaran yáin_{krat}niuiti

²⁴ Atumin wáitiaknasha ti shiir waraajaj*í*. Kristu ni shuarin nekas pé*n*ker awajsat tusa wáitiana nuj*í* pachii*nkia* asan waraajaj*í*. Ashí Yus-shuar Kristu ayashí áintsan áiniakui Yus-shuaran yáin_{taj}tsan ayashrujaj*í* wáitiakun shiir enentáimjaj*í*.

²⁵ Atumin yáin_{ki}ai tusa Yus akattur Yus-Chichaman takamtsuk ujakai tusa akuptukmai. Nuna takaakun ashí Yus-shuara yáin_{trint}jaj*í*.

²⁶ Yámankamtaiknumiá nekaachman Yus yamaikia ni shuarin paant awaj-saiti. Nu chichamnasha ujakarai tusa winia akatar akuptukuítu.

²⁷ Nu chichamsha júiti: Kristu atumí enentáin pujak Nijjaj*í* métek ti shíram awajtamsattawai. Nu imiá shiir chichamnum Israer-shuarchasha pachii*niainian* Yus ashí ni shuarj nekawaarat tusa wakerimiayi.

²⁸ Iisha Kristu étserieaji. Túrar ashí enentáimtikrar pé*n*ker nekaawarat tusar jintintiaini*ají*. Nujaj*í* Krístujaj*í* tsanin_{ki}ar ashí pé*n*ker tsakarartatui.

²⁹ Tuma asamtai Kristu ni kakarmarin tí surakui nekas kakaram takaajaj*í*.

2

¹ Nekaatarum, yatsuru. Yus-shuaran yáin_{taj} tusan ti takaajaj*í*. Tura atumín*cha*, Rautiséanmaya shuarnasha, tura ashí winia waitcha ainia nunasha yáin_{taj} tusan ti takaitjaj*í*.

² Ashí shiir enentáimtikratniun ti takaajaj*í*. Núnisan aneniarum chikichik enentáijjaj*í* métekrak wekasatarum tusan wakerajrume. Nu arantcha, ashí Yusna ti pé*n*ker nekaarum tuke katsuaruk tusan takaajaj*í*. Nujaj*í* Kristu ti pé*n*ker nekaattarme. Tura yaunchu nekaachman Yus yamá paant awaj-saiti. Nuka Krístuítu. Tura Nii nekaatin nekas shíraiti.

³ Tura kakaram ajasam Kristu pé*n*ker nekaam ashí shiir enentáimpramnia nusha tura ashí Yusna nekaamnia nusha nekaattarme.

⁴ Atumin chíkich shuar niisháa chichamjaj*í* shiir chichartamas anankramawarain tusan nuna tájarme.

⁵ Wi nuj*í* atumjaj*í* pujachkuncha nuj*í* pujajna áintsanak enentáimtajrume. Tuma asan á*tu*m métek enentáimprarum tura kakaram ajasrum Kristu nekas enentáimtururmena nuna ísnaka shiir enentáimjaj*í*.

⁶⁻⁷ Nu asamtai á*tu*m ii Uuntri Jesukrístu nekas enentáimtusrum Yus-shuar ajasmarmena núnisrum yamaisha Nii nekas enentáimtusrum Nijjaj*í*

tsaniṅkrum ashí túratarum. Nu túrakrum Nii enentáimtakrum tuke tsakaki wétatrume. Tura te tariara wajasrum Yusjaj kanakchattarme. Yus-Chicham núnisaṅ etsernakmatai nekamarme. Tuma asarum Yus tuke yuminsarum, núnisaṅ péṅker wekasatarum.

Krístujaj yamaram iwiaakma takakji

⁸ Aneartarum atumsha. Shuar aentsti enentáimmiyajaj ashí ju nunṅkanmayan enentáimprar tura Krístun enentáimtutsuk niisháa chichaman áujtamainiak nekaschajaj ananṅkramataj tusa wakerutmainiawai.

⁹ Krístunam Yus ashí takamtsuk pujuwiti.

¹⁰ Túmakui atumsha Krístujaj tsaniṅkiu asarum ni iwiaakmarj takamtsuk takakuitrume. Krístusha ashí akupniun akupniuiti. Áentsnumsha iwianchniumsha tura nayaimpinmasha ashí akupin írúnna nuna akupniuiti.

¹¹ Nu arant átum ayashnium tsupirnatskesha Kristu shuarj ajasakrumin ashí ayash wakeramun, tsupirkatniua áintsan, Kristu ajapamiayi.

¹² Tura atumsha Yus ni kakarmarijjaj Kristu jakan iniantkimia nu enentáimtusrum imianmiarme. Túrarum Krístujaj métek iwiarnasmarme. Tura núnisrumek Krístujaj métek nantakmiarme.

¹³ Nuikkia átumsha tsupirnatsuk atumí tunaarij tuke akui atumí wakanjín jákauyarme. Tura yamaikia Jesukrístujaj tsaniṅkiu asakrumin Yuska atumí tunaarij tsanṅkur yamaram iwiaakman suramsaitrume.

¹⁴ Tura ashí ii tumashrin sumantikramatin amia nuna japiruiti. Kristu krúsnum jakamtai ashí akupkamujaj sumantikramamun tsanṅkurtampramijaj.

¹⁵ Núnisaṅ Kristu krúsnum jaka, iwianchnium ashí akupin ainia nuna nupetak ashí íimiainaj iniatсарarmiayi.

Nayaimpiniam írúnna nu enentáimtustarum

¹⁶ Akupkamunmaya Yus anṅkant awajtamsamtaí chíkich shuar ame túramujaj yajauch enentáimturmaraj. Yúamna nujaj, úmamna nujaj, uwitinha, nantutinha, tura tsawantinha nampermam nujaj chíkich shuar yajauch áujmatramkuisha ¿warí urukatj?

¹⁷ Nu nampernum Israer-shuar Kristu túrattana nuna nakumainiak túrin ármiai. Tura Kristu taa imia Niṅki pujá asamtaí nakumkamuka ántrai.

¹⁸ Tura shuar “Péejchach ajasam Yus áujtsuk aya Yusa suntarij shiir awajsatniuiti” túramkuinṅkia anturkairap. Nu shuar mesekranam wáinkiamun áujmatenak ántar nanṅkaamantu enentáimtumainiawai. Aya aentsti enentáimian chichainiawai.

¹⁹ Tuma ásar Krístujaj tsaniṅkiar wekainiatsui. Kristu ashí akupin asa ni shuarin Yúsnan jintintiá shiir tsakarat tusa péṅker wáiniui. Nu arantcha ashí ápateak Yus wakerana áintsan chikichik awajeawai.

²⁰ Atumsha Krístujaj jaka asarum aya aentsti enentáimtai ikiukniuitrume. Nuikia ¿urukamtaí ju nunṅkanmaya ana nu tuke páchiarum? Nii tuinia nu umirkashtiniaiti.

²¹ “Ju antinchatniuiti, tuiniawai. Ju yúashtiniaiti. Tura ju achikchatniuiti” tuiniawai.

²² Nusha ¿warí, takasam amuukashtatuak? Kame áyatik aents akupkamu áiniawai.

²³ Shuar nu akupkamu umiiniak Yúsnan ti nékaitjai tura Yus shiir enentáimturui tu enentáimtumainiawai. Nu arantcha péejchach ajasan winia ayashrun ti asutiájaj tu enentáimtumainiawai. Túrasha ayash wakeramunka nupeteatsui.

3

¹ Nuikia Krístujai nantakin asarum nayaimpinmaya írunna nu wakeruktarum. Nui Kristu pujawai Yusa untsuuríni.

² Ju nunkanam ana nu enentáimtsuk aya nayaimpinmaya ana nu enentáimtustarum.

³ Atumsha Krístujai tsaninkrum jakarmeme. Tuma asarum Krístujai tsaninkrum Yusjai iwiaaku pujarme.

⁴ Krístukete ii iwiaakmari. Nii nayaimpinmaya wantinkiuisha atumsha Niijjai métek wantinkiattarme. Tura Niijjai métek ti penker átatrume.

Yaunchu iwiaakmasha tura yamaram iwiaakmasha

⁵ Tuma asamtai ju nunkanmaya ana nu ajakratniua áintsarum iniaisatarum. Tsanirmatniusha, tunáa wakeruktincha, tura takakna nujai nankaamas wakeruktincha ántar-yus tikishmatratniua áintsan asamtai iniaisatarum.

⁶ Shuar Yúsan umirtsuk aya nuna túrin ásarmatai Yus nin kajerak ti asutiáttawai.

⁷ Atumsha núnisrumek túriniuyarme.

⁸ Tura yamaikia jusha iniaisatarum: kajektincha, yajauch wakeruktincha, yajauch túratniusha, katsekmaktincha, yajauch chicham chichastincha, mash iniaisatarum.

⁹ Yus-shuar ajasrum yaunchu enentáimtairam iniaisarmeme. Tura yaunchu túrutairmesha iniaisaitrume. Tuma asarum nuamtak tsanumprunairairap tura wáitruawairap.

¹⁰ Yaunchu enentai, pushí mamuru áiktinia áintsarum, iniaisaitrume. Núnisrum yamaram enentái, shiir pushí entsartinia áintsarmek, weksaitrume. Tura Yus nu yamaram enentáin najana asa ashí tsawant pujurtawai nuna nankaamas Niijjai métek shiir atí tusa. Túramtai Yus ti penker nekaki wéaji.

¹¹ Krístuka ashí írunna nujai nankaamas ashiyaiti. Niiniun pujurui. Tuma asamtai ashí ni shuari enentáin pujá asamtai nusháa enentáimtuairchatin áiniawai. Kriaku-shuarsha tura Israer-shuarsha, tsupirnakusha tura tsupirnakchasha, apachcha tura yajaya shuarsha, takarin ainia nusha tura ankant ainia nusha, Kristu ashí ni enentáin pujakui nusháa enentáimtuairchatniuiti.

¹² Yus atumin anenmak Niiniu arti tusa achirmakmarme. Túrutma asamtai jujai shiir iwiamampratniua áintsarum tuke túrin atarum: waitnenkartin, shiir awajkartin, péjchach átin, émtin áchatin, tura katsuntin átin.

¹³ Kristu atumí tunaarin tsankuramia núnisrumek nuamtak tsankurnáiratarum. Chíkich yajauch awajtamkuisha shiir katsuntram yapajniaitsuk tsankurnáiratarum.

¹⁴ Tura ashí nankaamas anenaitiarum. Túrakrumka chikichik ajasrum mash penker túrattarme.

¹⁵ Kame chikichik ayashtinia áintsarum ajastarum tusa Yus ni shuari ajasat tusa achirmakmarme. Tuma asamtai Yusa shiiri atumí enentáin pujurtamsati. Nujai Yus yuminsatarum.

¹⁶ Kristu shiir chichame atumí enentáin piakti. Nekas naka enentáimprarum jintinniaiyarum mai ikiakánai ajatarum. Yus kanta kantamárum tuke enentáijjai Yus yuminsarum shiir awajsatarum.

¹⁷ Tura takaakmesha, chichaakmesha, kame ashí túramna nuka Jesukristu shiir awajsataj tusam ni kakarmarijiajin túrata. Túrakum Krístujai Yus Apa yuminsata.

Yus-shuar túratniua nu

¹⁸ Nuwatiram, atumí aishri umirkatarum Uunt Yus nuna wakerakui.

19 Áishmantiram, atumí nuwé aneatarum. Atumí nuwejai kajernaikiairap.

20 Uchitiram, ame apa nukusha tuke umirkatarum. Nu túrakrum Yus shiir enentáimtikstarmame.

21 Uchirtintiram, atumí uchiri ti kakantrairap. Ti kakanteamka uchisha ti kuntuts pujus péñker wekasatniun nakitchanpiash. Nu túrunawain tusarum ánrarum atumí uchiri kakantrairap.

22 Takarniutiram, atumí uuntri shiir umirkatarum. Ju nunkanmaya uuntri ain aya nii iimkiui shiir enentáimturati tusarum takaschatniuitrume. Antsu Yus enentáimtakrum tuke péñker takastiniaitrume.

23 Ashí túramna nu asump enentáijiai takakmasta. Aya aentsuk yáintinia áintsachu antsu nayaimpinmaya Úntrum yayá áitkiasrum takastarum.

24 Ame Úntrum Kristu asa nayaimpiniam ashí shiir takustinian tsankatramkattawai.

25 Antsu tunáa túrin ni yajauch túramujai métek akinkiáttawai. Yus ashí áentsun métek iyawai.

4

1 Úunttirmesha, atumí Uuntri atumin wáiniuk nayaimpiniam pujatsuk. Tuma asamtai atumí yáinma jiatsuk péñker iniartiniaitrume.

2 Yus áujkuram Nii yumĩsarum asummiarum iniaitsuk áujstatarum.

3 Incha Yus áujtustarum. Kristu-chicham yaunchu nekaachman yamáí étserkun sepunam pujajai. Tuma asamtai nuna shiir ankant etserkat tusarum áujtursatarum.

4 Tura wi paant etserkatniuitiaj núnisan etserkat tusarum áujtursatarum.

5 Yus-shuarchajai shiir túratarum Yus-Chichaman yajauch enentáimturain. Kakaram ajasrum tsawant ánrarum iniankasairap.

6 Ti shiir chichamtin átiniaitrume tura anturújamin átiniaitrume. Núnisrum chíkich chíkich Yus-chicham paant ujaktin nekaattarme.

Amikmaamu

7 Ii aneamu yachi Tikikiu ashí wínian ujatmaktatrume. Niisha wijiai métek Yúsnan pimpitsuk ti peñker takasuiti.

8 Nu asamtai ii jui pujajnia nuna ujatmak ikiantamprarat tusan akuptajrume.

9 Núnisan ii aneamu yachi Unisemu niijiai winiawai. Niisha atum wéeaite, tura Yusjai shiir wekaawai. Nu shuar ashí jui túrunamun ujatmaktatrume.

10 Aristarku wi sepunam tsaniñkia pujamur amikmaatmarme. Núnisan Markus, Pirnapí kaná yachia nu, amikmaatmawai. Niisha nu jeamtai antukmarum núnisrum péñker wáinkiatarum.

11 Justu Jesus náartin amikmaatmarme. Júchik áiniawai Rúmanmaya Israershuar winia Yúsnan etserkatin atutkaru ainia nu. Túmainiak ti shiir ayantikruiniawai.

12 Épaprasha, atum weeá, Krístunun etserin asa atumin amikmaatmarme. Niisha ashí tsawant Yúsán áujeak Yusjai kakaarum tuke shiir Yus wakera nu túrak tusa seatramprume.

13 Wisha Épapas atumin ti enentáimturman nékajai. Núnisan Rautiséanmaya shuarnasha tura Irapurismia shuarnasha ti páchiniawai.

14 Rukas, aneamu tsuákratin, núnisan Témassha amikmaatmarme.

15 Tura Rautiséanam pujuinia nú Yus-shuarsha amikmaatruatarum. Núnisan Nímpiassha tura ni jeen irunainia nú Yus-shuarsha amikmaatruatarum.

¹⁶ Átum jū papí áujsarum umikrum Rautiséanmasha nuyá Yus-shuar áujsarti tusarum akupkatarum. Tura atumsha núnisañ Rautiséanmaya papí támatai atumsha áujsatarum.

¹⁷ Tura jū Arkipiu titiarum: “Ii Uuntri Jesus ni takatrīn suramsa nu péñker umikta” tawai, titiarum.

¹⁸ Wi, Papru, winia uwejrujai júchiniak áatkun amikmaajrume. Sepunam pujajna jū enentáimturatarum. Yus shiir yainmakarti.

Nuke atí.

Papru

TISARÚNIKIANMAYA SHUARAN

Emka papín aar akuptukma

Papru ni tsaniakmarijjai Yus-shuaran áatramiania nu

¹ Wikia Pápruitjai. Wisha Serpanujai tura Timiutéujai Tisarúnikianmaya Yus-shuar ajasuitrumna nuna áatjarme. Atumsha Yus-shuar asarum Apa Yúsnaitrume, tura Uunt Jesukrístunuitrume. Ii Apari Yus, tura ii Uuntri Jesukrístu waitnentrama ásarmatai, ti shiir imiatkinchanum pujustarum, tu wakerajrume.

Tisarúnikianmaya shuar Yus nekas enentáimtusar umirkatniun jintintiarmanianu

² Iisha Yus áujkurkia atumniasha tuke enentáimtusar Yus shiir yumiñsaji.

³ Atumsha Yus nekas enentáimtakrum umirkarumna nu nékaji. Núnisrumek, Yus aneakrum takaarme. Tura Jesukrístu tatí tusarum tuke tsawant nákarne. Nu neka asar, ii Apari Yus áujkur, nusha ashí enentáimsar áujtajrume.

⁴ Yatsurú, Yus anenmarme. Anenma asa Winia arti tusa achirmakurmena nusha nékaji.

⁵ Enentáimpratarum. Iisha Yúsaj Uwempratin Chicham atumin ujakmajnia nusha aya chíchamjain tíchamji. Antsu nú arant, nu chicham nekasaiti tusar Yusa Wakaní kakarmarijjai tímiaji. Tura átum péñker matsamsarat tusar atumjai pujusar shiir iruntrar wekasarmiaji. Nusha paant nékarne.

⁶ Atumsha yamaikia íksarmek ii túramiaj nu, tura ii Uuntri Jesukrístu túramia nu túrarme. Itiurchat aijn Yus-Chicham umikiurme. Tura wáitiatrumek Yusa Wakaní shiir enentáimtikramkui warasrum pujarme.

⁷ Nu túrakrum ashí Masetúnia tura Akaya nunkanmaya Yus-shuarsha shiir wekasatin jintintiarne.

⁸ Tuma asarum Uunt Yusa chichame ti ipiamparurme. Tuma asamtai Masetúnia tura Akaya nunkanmaya shuar nuna nékainiawai. Tura nú nankaamas Yus nekas umirkarmena nuna ashí aents nékainiawai. Nuna nékainia ásar ii étserman atsumainiatsui.

⁹ Antsu átum in péñker itiaamun nii íksan ujatmainiaji. Tura nuyasha ántar-yus enentáimtustin iniaisarum nekas iwiaaku Yus nekas enentáimtusarum umirkarumna nunasha ujatmainiaji.

¹⁰ Tura nuyasha Yusa Uchiri Jesus jakamunmayan Yus iniantkimia nu, nayaimpinimaya tatí tusarum átum nákamuncha ujatmainiaji. Iis, Jesus Nínkiti Yusa kajetáiri tsawantri jeattana nuyá uwemtikrampratin.

2

Yus-chichaman paant ujakarmiania nu

¹ Atumsha nékarne, yatsurú, iisha ántrar atumín jeachmaji.

² Antsu itiurchat wáinkiaitiatar arantutsuk shiir Uwempratin Chichaman ujakmajrume. Iis, nuik Jiripius péprunam incha katsekramkarmiaji. Tura nú arant, ti itiurchat wáinkiamiajai. Túmaitiatan Yus yáintkiui Yusa chichamen ujakmajrume. Nuka atumsha ti péñker nékarne.

³ Warí, iisha Yus-Chicham atumin ujakmiaj nu nekasauyi. Tura yajauch enentáimsan, anañkatjarum tusan tíchamjarme.

4 Antsu Yus in pé_ñker enentaimturmas Uwempratin Chicham etserkatarum tusa akatrampramiaji. Tuma asamtai núnisrik étsereaji. Tú_rasha aya aents waramtik_satai tusar étsertsuji. Antsu Ni_ñki Yúsak ii enentáin nekartamin asamtai, shiir enentáimtik_sataitsar tú_raji.

5 Átumka nékarme, pen_kesha shíirmach chichasan anan_kachjarme. Nuyasha, kuit achik_tai tusar án_rrar chichaschamji. Núnaka Yus nékawai.

6 Iisha Kristu akatramurintji. Tuma asar ni kakarmar_ijia_i akupkatin takakuji. Páchitsuk túramniauji. Tú_rasha waantu ajastaj tíchamji. Nuyá atumsha tura chikichcha in waantu awaj_tamsataj tákuisha iikia nakitmiaji.

7 Antsu uchi kuír_{ch}in ni nukur_j pé_ñker iis tsakatmana áintsarik iikia atumniaka shiir ísmajrume.

8 Iisha ti shiir aneajrume. Tuma asar Yus-Chicham ujaktai tusar ti wakerukmaji. Tura aya ujakar iniaisatin wakerukchamji. Antsu ii jákatniuitkiursha iniaisach_aaji, atumín ti anea asarⁱ.

9 Yatsurú, ii atsumaj nu sumarmaktai tusar kakaram takakmasmaj nu ¿kajinmatkintrumek? Atsá. Né_karme. Iis, Yus-Chicham étserkur, tsawa_isha káshisha takasmiaji. Nusha, akirkata, tíj tusar takakmasmiaji.

10 Yatsurú, atumj_ai pujumiaj nu_i iisha Yus wakerana nu túrimiaji, tura ya-jauch túrutsuk shiir wekasamiaji. Nuj_ai incha chikichkisha yajauch chichartamkatniusha atsumiayi. Nuka atumsha nékarme tura nú arant Yus nékawai.

11 Tura atumniasha an_kant an_kant Yúsnum ikiakármajrumna nu nékarme. Tura uchin ni apar_i átsan_keana nútiksarik shiir enentáimtikramajrumna nusha nékarme.

12 Tura Yús_ja_i shiir wekasatarum tímiajrume. Yus nan_kaamas uunt asa ashí akupeawai. Tura Yus-shuaraitrumna nuna, Winin pachiinkiarat tusa, Yus untsurmarme. Yus untsurma asamtai Níniuitrume. Niiniu asarum Yusa uchir_ia núnisrumek wekasatniuitrume.

13 Yus-Chicham ii étserma antukrum, aya áentsnumia_nchaiti tímiarme. Yúsnumia_iti tímiarme. Nu tiniu asarum umirkarmarme. Kame nekas tárume. Ii étserjinia nu nekas Yusa chicham_ente. Átum nu chicham umirka asakrumin, atumí enentáin kakaram ajastinian amaawai, Yus-Chicham asa. Átum Yus-Chicham umirkaru asakrumin iisha tuke tsawant Yus yúmi_nkiaji.

14 Yatsurú, ju nekaatarum. Aya atumek wáitiatsrume. Ashí Jutía nun_kanam Israer-shuar, ni shuar_ink_et_iat, Yus-shuaran wáitkiascharmakia. Iis, Yus-shuaran Kristu Jesusan umirkaru ásarmatai wáitkiasarmiayi. Yamaikia atumniasha atumí shuár_in wáitkiarmainiawai. Nuj_ai Jutía nun_kanmaya_u Yus-shuarj_ai métekrak ajasurme.

15 Niisha Israer-shuaraitiatan_u Yus-Chichaman etserin armia nuna nuamtaketiat máawarmiayi. Tura nú weeák Uunt Jesusnasha máawarmiayi. Tura incha aa_u j_iiki akuptamkarmiaji. Maaj, niisha Yús_an shiir enentáimtik_iainiatsui. Tura núnis_an ashí áentsun kajerainiawai.

16 Warí, Israer-shuarcha Uwempratin Chicham ujaktaj tákurnisha niisha suritramainiaji. Nuna túruiniak yaunchu tunaan túriarmia núj_ai_nkia nan_kaamas yamaikia túrawarai. Pai, tú_rasha yamaikia Yusa kajetair_ij imiá tsuum_ai ana nu_i pujusarai.

Papru ataksha Tisarúnikianam irautajtsa wakerimiania nu

17 Iisha, yatsuru, ishichik tsawant atum_jiya_u kanakir jeachat pujayatrik, atumj_aisha wáinniaiyachiatrik tuke ii enentáinkia enentáimtimjarme. Tuma asar ataksha atumin iistai tusar ti wakerimji.

18 Nekas winitiaitsar wakerimji. Imia wíkisha winitniun ti nukap enentáimsamjai. Tura iwianchi uuntri Satanás tuke nuna suritrammiaji.

19-20 Atumsha shiir wekasa asakrumin iisha ti shiir enentáimsar waraaji. Nu tuma asar Uunt Jesukrístu tátintri shiir enentáimsar náka*ji*. Nii támat*ai* imiá warastat*ji*. Atumin Yus-shuar awajsa asar, Nii támat*ai* atumsha iij*ia*i Jesu shiir inkiun*ta*t*ji*. Tuma asamt*ai* nu enentáimsar tawasap achiktin*ia* áintsar waraaji.

3

1-2 Iisha ataksha atumin ístait*sa*r ti wakerim*ji*. Tura tujint*ia*kur iikia Atenas péprunam juákur ii yachi Timiutéu atumin írmainiarat tusar akupk*ta*i, timia*ji*. Iisha Kristu*í* Uwempratin Chicham etsermia*ji* nui, Timiutéuka iij*ia*i métek takasuit*i*. Tuma asa niisha Yusa takatrin takáa asa atumniasha Yus*ai* kakartarum turamarti tusar akupkam*ji*.

3 Tura nú arant, itiurchatan wáiniuk iniaisar*ai*n tusa ikiakátmararti tusar Timiutéu akupkam*ji*. Yatsurú, átumka nékarme, ashí Yus-shuaraitjin*ia* nuka páchitsuk wáitsatniuit*ji*. Iis, tuma asamt*ai* atumsha ti nekas itiurchatnum pujarme, Yus-Chicham umirka asarum.

4 Iimiatarum, atumj*ai* nuik tuke pujumjin*ia* nui “iisha wáitsartat*ji*” tíchamkajrum. Iis, túrunachaik. Nuka nékarme.

5 Tura atumin íwianch tunaanum ajunmarchariash tusan, wisha kúntuts enentáimsam*ia*j*ai*. Tura ántrar takaschajiash tu enentáimsam*ia*j*ai*. Tuma asamt*ai* nekaataj tusan ti wakerakun, wisha ti nukap tsawant nákascham*ia*j*ai*. Antsu wárik Timiutéun akupkam*ia*j*ai*. Yús*ai* péñkerash wekain*ia* tusan, “nu inintrusam ikiuuta” timia*ji*.

6 Tura yamaikia Timiutéu Tisarúnikianmaya waketki tayi. Niisha taa, átum Yus aneakrum shiir enentáimtamuncha ujatm*ai*. Tura átum in anenma asarum tuke enentáimsar pujamuncha tura ii atumin ístait*sa*r wakerajnia núnisrumek atumsha incha írmait*ai* tusarum wakeramuncha Timiutéu ujatm*ai*.

7 Tuma asamt*ai*, yatsuru, ashí itiurchat tura wáitsatin wáiniatrik átum Yus shiir enentáim*ta* asakrumin iisha shiir enentáim*ji*.

8 Atumsha Yús*ai* tariara weká asakrumin, shuar jaa péñker ajas enentá*í* chinkiana áintsarik enentáim*ji*.

9 Yus péñker umirka asakrumin, iisha shiir waraaji. Warasu asar ii Yus*ri* ti yúmink*ia*j*ai*.

10 Incha Yus akuptamkurnin*ka* atum*in* tímiaj*ai* jeart*ai* tusar wakeraj*i*. Túrar Yusna nekaatin mash nékatsrum nu jintintiatai tusar tuke ti seaj*i*.

11 Atum*in* weri íistinian ii Apar*í* Yussha tura ii Uuntri Jesukrístusha in yáinmakt*ai* tusar wakeraj*i*.

12 Atumin ii aneajnia núnisa*n* Yus atumniasha mai anenai ajatniun tura chikichcha aneastinian enentáimtikramprart*í*. Tura nú nukap anenkrattain Yus amasart*í* tusar wakeraj*i*.

13 Yus ikiakátmakui átum tunáa túrutsuk Yus umirkarum wekasatarum tusar ii Apar*í* Yus seaj*i*. Ii Uuntri Jesus Níiniurij*ia*i winiak péñker wekaarmin tati tusar taji.

4

Péñker túratniun Yus wakerana nu

1 Iikia Uunt Jesus akupkamuit*ji*. Tuma asar nu kakarmaj*ai* atumniasha ju túratarum tusan akupeajrume. Atumsha iwiaaku pujarmena nui Yus shiir waramtiksataram tura tuke péñker túrukum wetarum tusar seajrume. Iisha nuik atumin unuiniarmajrumna nútiksarmek túratarum.

² Uunt Jesusa akupeamurijjaj tura nu kakarmajaj atumniasha nuik uniniarmajrumna nu átumka nékarme.

³ Atumin Yus wakerutmarmena nu júiti: “Shuar aya Winin sumama pujusat tusan chikichkinkesha shuar tsanirmaashti”.

⁴⁻⁵ Yus-shuarcha ainia nu, Yúsan nékainiachu ásar, aya niniki enentáimtumasar aya ni ayashi wakeramunak umiktinian wakeruiniak nuwan enentáimtuiniawai. Atumsha núnisrumek túrawairap. Antsu atumsha atumí nuarj pénger enentáimtusum shiir aneasrum ayastarum.

⁶ Nú arant, amesha ame yatsum anankam ni nuarj yajauch awajtusaip. Nu túrakrumniñkia ii tímiajrumna nútiksañ Uunt Yus ti kakaram asutiámawartatui.

⁷ Warí, Yus incha péngercha yajauch túratarum turamchaitji. Antsu aya péngerak túratarum turamji.

⁸ Tuma asamtai shuar ju chichaman nakitiakka áentsun nakitiatsui, antsu Yúsan nakitrait. Tura nu Yussha ni Wakanin amaawiti tunaan túrashtinian.

⁹ Tura yamaikia nuamtak Yus-shuar aneniastin ana nuna ti neka asakrumin áatrashtatjarme. Warí, imia Niniki Yus atumin mai anenai ajatniun jintinramawarmatai nékarme.

¹⁰ Iis nútiksarmek aneniatsrumek ashí Masetúnianam matsatainia nujaj. Túrasha, yatsuru, atumí anenkrattairi nú nukap ajasti tusan, seajrume.

¹¹ Yamaikia tímiaj nútiksarmek, yayauchin túruinia nuj wekatsuk, chikich shuarna pachittsuk, atumí takatriin shiir ankant pujusrum atumí uwejejain takakmá pujutarum.

¹² Átum táasairum tusan tájarme. Túrakrumniñkia atumniasha chikich shuar pénger enentáimturmasartatui.

Kristu tátintri

¹³ Yatsuru, Yus-shuarcha ni shuarj jakamtaí “atakká wáinkiashtatjai” tusa ti kuntuts enentáimainiawai. Tuma asamtai atumsha nútiksarmek kúntuts enentáimsairum tusan juna tájarme. Jákaru ainia nu urukawartinkit paant nekaatarum.

¹⁴ Jesus jákayat nantakchamkia. Núnisañ Yus Jesusan iniantkin Nin umirkar jákaru áiniana nunasha iniantkittiawai. Paant nékaji nusha.

¹⁵ Tuma asamtai Yus-Chicham nekaprutamnia nuna atumniasha jintintiajrume. Iisha tuke iwiaaku pujarin Kristu táakuisha jákaru ainia nuka ikiuakur émkishtatji.

¹⁶ Antsu Yus akupeakui, Yusa suntarj uuntri untsumkui tura Yusa kachurin umpuarmatai Uunt Jesukristu untsumuk Yus pujamunmaya taratawai. Nuñkia Krístunu ajarar jákaru áiniana nu iwiarsumunmaya nantakiartatui emka.

¹⁷ Tura nuyá iisha Yus-shuar tuke iwiaaku pujajnia nu Krístujaj yuranminiam ajapén inkiunaikiartatji. Nuní ashí nayaimpiniam ii Uuntri Jesukristujaj tuke iwiaaku pujusartatji.

¹⁸ Tuma asamtai ju shiir chicham atumin ujakjana jujaj mai ikiakánai ajatarum.

5

¹ Túrasha, yatsuru, ni tátintri waritin tura warí tsawantaj, nuka áatratin atsumatsrume.

² Ni tátintri júnis átin nékarme. Kiritniunam kasá shuar kasamkataj tusa tátatna nu nekaachminiaiti. Núnisañ nákatsuk pujuiniaj Uunt Kristu tsawantri jeattawai.

³ Ashí shuar “Pai, yamaikia ti nekas shiir pénger pujuiniaj” tu matsatainiaj, aya aneachma nuñka mesertin tsawant jeattawai. Nuwá ajamtin

aya aneachma jatema áintsan, nékachmanum átatui. Túmakui pisartin penké atsuttawai.

⁴ Túrasha, yatsuru, átumka ujakmaitrume. Nu tsawant atumsha aneara pujarmin jeattawai. Atumsha aneara pujá asakrumin kasá áintsan tarutrámashatui.

⁵ Enta, átumka tsáapninium wekáa asarum Yus-shuartirmeka nékaitrume. Iikia kiritniumianchuitji.

⁶ Nu tuma asar, chíkich uruka núnisrik, ii enentáin kanartinia núnisrik “Warí, winia itiurtawa” tíchami. Antsu naka enentáimsar anearmi.

⁷ Iis, kashi kanarchatniukait. Tura nampeena nu kashi nampeenawai.

⁸ Túrasha iikia shiir tsáapninium wekainiaj nuka naka enentáimprar tuke nampetsuk pujustiniaitji. Suntar ni nemasri anañkruawain tusa anear wekasatniuiti. Tura iisha núnisrik íwianch yajauch awajtamsajj tusar anearmi. Yus enentáimtusar aneetniuitji. Tura núnisrik iisha, ju nunkanmaya uwemprar Yúsaj tuke pujustatji, tu enentáimprar wetái.

⁹ Páantchakait. “Jinium wéchatniuitrume” Yus incha túramji. Antsu ii Uuntri Jesukrístujaj uwempratniun tsañkatramkaitji.

¹⁰ Niijjaj métekrak iwiaaku ami tusa Jesukrístu in jarutramkamiaji. Nu tuma asamtai iisha ii ayashijjaj iwiaaku pujakrishá Niijjaj iwiaakji, tura ii ayashijjaj jáakrishá Niijjaj tuke iwiaakji.

¹¹ Tuma asamtai tuke túrarmena núnisrumek, shiir enentáimtiknaisarum mai ikiakánai ajatarum.

Papru Yus-shuaran jintintiamiania nu

¹² Yatsurú, juna seajrume. Atumjaj pujuinia nú shuar Yúsnan takakmainiakui shiir enentáimtustarum. Jintintramuk chichartamainiakui umirkatarum.

¹³ Yúsnan takainia ásarmatai ti péñker enentáimtusrum aneestarum. Tura yajauch awajnaitsuk ti shiir nawamnaikiarum matsamsatarum.

¹⁴ Tura junasha seajrume, yatsuru. Takastinian nakitiana nusha chicharkatarum. Tura yaweena nusha ataksha enentáimtikrarum ikiakártarum. Kakarmachu ana nusha yáintarum. Tura ashí shuarjaj kajetsuk katsuntrarum wekasatarum.

¹⁵ Aneartarum, yatsuru. Chíkich yajauch túrutmamtai amesha nútiksamek yapajkiaip. Antsu nuka túrutsuk átumka mai péñker awajnai ajatarum. Tura nú arant, ashí nunkanmasha ashí shuarsha nútiksarmek túratarum.

¹⁶ Tuke shiir warasrum pujustarum.

¹⁷ Tuke tsawant iniaitsuk Yus áujstarum.

¹⁸ Péñker pujakmesha, itiurchat pujakmesha ashí warí wáiniam nuisha Yus shiir yumiñsatarum. Kristu Jesusaj Yus-shuar ajasutiram nu túratniun Yus wakerawai.

¹⁹ Ji ikiajniaktinia núnisan Yusa Wakaní enentáimin keana nuka tunaajaj ténmamtikiarum ikiajniakairap.

²⁰ Yus jintintrar akupkamu asa péñker chichaman etserainia nu naki-trairap.

²¹ Ashí etserkamu ana nu nekasashit tusarum nekaatarum. Túrarum aya péñker ana nuke achiktatum.

²² Ashí yajauch ana nuyanka kanaktiarum.

²³ Yuska, imiatkinchanum wekasatin amaana nu, atumin takamtsuk shiir awajtamsartí. Tura ii Uuntri Jesukrístu táatsain, atumí wakaní atumí enentaj tura atumí ayashisha mash métek tunaajainchu awajtamsati.

²⁴ Yus atumin untsurmakmarumna nu tímianak uminiaiti. Nii tana nuna yawetsuk túrattawai.

Amuamunam amikmaatin

²⁵ Ashí yatsurtiram winiasha Yus áujtursatarum.

²⁶ Ashí Yus-shuar árum nu, amikmaaniatarum.

²⁷ Winia Uuntru Jesukrístu chichamejai juna tájarne. Ju papí ashí Yus-shuar antukarti tusarum ashí iruntramunam áujstarum.

²⁸ Ii Uuntri Jesukrístu atumin yáinmákartí. Nu atí.

Papru

TISARÚNIKIANMAYA SHUARAN

Ataksha papin aar akuptukma

Papru ni tsaniakmarijiai Yus-shuaran áatramiania nu

¹ Wikia Pápruitjai. Wisha Serpanujai tura Timiutéujai iruntran atumin Tisarúnikianmaya Yus-shuar árumna nuna ju papin áatjarne. Atumsha ii Apari Yusna tura Uunt Jesukrístunu ajasuitrume.

² Tuma asakrumin ii Apari Yus tura ii Uuntri Jesukrístusha waitnentrama ásarmatai yáinmakar péñker awajtamsarat tusan wakerajrume.

Kristu támatai tunáa shuáran Yus asutiáttawai

³ Yatsurú, átum péñker matsatu asakrumin iisha Yus tuke yúmiñkijai. Átumka Yus nekas enentáimtustin nú núkap nekaakrum wéarme. Tura nuamtak aneniastincha nú núkap nékarme. Nu tuma asamtai Yus yumĩnsatniuitji.

⁴ Átum Yus-shuar asakrumin chíkich shuar atumin yajauch awajtamaini-awai. Tura itiurchat wainiu asarum ti wáitiarme. Nu tuma aijn átumka katsuntearme, tuke Yus enentáimta asarum. Nu tuma asakrumin, iisha Yus-shuar matsatainia nuka warasar ujainiaji.

⁵ “Yusa akupeamurin pachiinkiamniaitrume” Yus túramprume. Nui pachiinkiatat tau asarum ju nunkanam wáitiarme. Tura wáitiakrumsha nuna nankaamas iwiarnaruitrume nui pachiinkiatin. Kame nújainkia Yus atumin achirmak péñker túraití, nuka páantaiti.

⁶ Núnisan atumin wáitkiarmainia nunasha Yus tímiatrusan wáitkiasartincha nekas péñkeraiti.

⁷ Tura wáitiarmena nusha Yus íjiaisha ayantikramprartin péñkeraiti. Ii Uuntri Jesukrístu ji keana ímianisan kakaram suntarijiaí nayaimpinmaya tara wantinkiamtai, nu tsawantaj Yus ayampratniun suramsartatji.

⁸ Tura nú tsawantaisha Yúsan nékainiatsna núnaka ii Uuntri Jesukrístu ti asutiátajtsa tátatui.

⁹ Taa, nincha menkakatniunam akupkartatui. Chichaak “Wi pujajna juyá akupeajrume” títiatui. Tura winia ti kakarmar atsana nui akupeajrume, átum winia umirtukcha asakrumin” nin tiartatui.

¹⁰ Kame Uunt Jesukrístu tátin tsawantri jeamtai, ni shuari, ni enentái péñker awajrsaru áinia nu, ni náarin shiir pachisartatui. Tura Yúsan umikiaru ásar, ti shiir enentáimsar Jesukrístun ísartatui. Ii ujakmajrumna nu antukrum umirka asarum atumsha nui pachiinkiatarme.

¹¹ Nu tuma asamtai ii Yusrin atumin tuke áujtajrume. Yus atumin achirmakuitrume. Nuñkia Yuska atumí enentáin takas Nii wakera nujai métek awajtamsati, taji. Yus umirka asarum péñker wekasataj tusarum wakerarme. Túrarum Yus enentáimtusum péñker túratin wakerarme. Tura wakerarmena nu umiktin Yuska ni kakarmarijiaí yáintí, tu áujtaji.

¹² Átum péñker wekasa asakrumin chíkich shuarsha ii Uuntri Jesukrístu náarin nankaamantu enentáimtusartatui. Nusha auka ii Yusrin tura ii Uuntri Jesukrístu waitnentáimturmasar péñker wekasatniun yáinmakui túrarme. Túramtai chíkich shuar shiir enentáimturmasartatui.

2

Tuke Tunaarintin wantinkiattana nu

¹ Tura, yatsuru, ii Uuntri Jesukrístu tátatna nuna tura Niijiai inkiunaiktatjinia nunasha ujaktinian wakerajrume.

² Chíkich shuar anan̄kramawar “Uunt Jesukrístu tsawantri jeayi” tu ujat-maktaj tusar wakeruiniawai. “Imiarmaj nujai nékajai” turamainiakuisha, “chícham étserman antukmaj nujai nékajai” turamainiakuisha, tura “Papru papí áarmari nuna takui nékajai” turamainiakuisha, páchim enentáimprairap. Tura sapijmiakairap tusan seajrume.

³ Penké anan̄nawairap. Nekaatarum. Nu tsawant jeatsain Yúsnumia kanaktin átatui. Tura nú arant, Tuke Tunaarintin, emesnartatna nu wantinkiattawai.

⁴ Niisha aya wíniak enentáimtursarat tusa wakerak, ántar-yusnasha tura nekas Yúsasha shuar tikishmatrarain tusa ti nakitrattawai. Niñki ti nan̄kaamantu enentáimtumas, Yusa nuke ajas, Uunt Yusa Jēen wayáa pujus-tatui. “Júiti Yus” shuar turutiarat tusa mash túrittawai.

⁵ Yatsurtiram, wi atumjai pujakun nuna ashí ujakmajrume. ¿Nuka kajin-makniurmek?

⁶ Yámaikikia, ni tsawantri jeatsain, Tuke Tunaarintin wantinkiajn tusa surimia nu nékarme.

⁷ Tunaasha yamaisha awai, tura paantcha. Túrasha tunaan surimia nu juramkitniuk taasai nu tunaaka paant átin.

⁸ Nuñkia nu Tuke Tunaarintin wantinkiattawai. Tura Uunt Jesus ni wenejai umpuí aun máattawai. Tara ni wincharijiai nuna amuktatui.

⁹ Nu Tuke Tunaarintin, iwianchi uuntri Satanás akupkam tátatui. Ni kakarmari iniakmastaj tusa, aentsti túrachminian túrak anan̄kawartatui.

¹⁰ Jinium wémin ainia nú shuaran ashí tunáa ana nujai anan̄kawartatui. Nu shuar Yus-Chichaman nekas ana núnaka nakitraru ásar uwemprachmin ániawai.

¹¹ Iis, nekas ana nuna nakitia ásarmatai, ti anan̄mamawar wait-chichaman umirkarat tusa Yuska tsan̄katkattawai.

¹² Warí, niisha ni tunaarjn wararainiak, nekas ana nuna nakitraru ásarmatai, Yuska “jinium wétatrume” tiartatui nuna.

Uwempramin ainia nu

¹³ Tura, yatsuru, Uunt Jesus aneamu árumna nu, iisha atumin enentáimtusar ii Yusri yumisaji. Átum nekas ana nuka umikiurme. Tuma asakrumin Yusa Wakaní atumí enentáin péñker awajtamsaitrume. Nu tuma asamtai yámankamtaikniumiā Yuska “átum uwempramniaitrume” túramprume.

¹⁴ Nu túrunat tusa Yus wakerutmarme. Krístujai Uwempratin Chicham ii ujakjinia nujai Yus untsurmakmarme. II Uuntri Jesukrístu ti penker pujana nuj pachiinkiamniuram tusan ujakmajrume, nú chichaman.

¹⁵ Wátsek, yatsuru, Yusjai katsuartarum. Yus-Chicham etserkamu an-tukurmena nu, tura wisha áaran akuptukjarmena nusha kajinmatkiirap.

¹⁶ II Uuntri Jesukrístusha tura ii Apari Yussha ti penker ásar incha anen-matsjik. Tura waitnentrana ásar incha shiir enentáimtikramji. Tura nú nan̄kaamas ii tuke péñker pujustinian ikiurtamsaitji.

¹⁷ Nu tuma asamtai, péñker chichastarum tusa, tura péñker takastarum tusa Jesukrístuka shiir enentáimtikramar ikiakátmarartí.

3

Papru “áujtursatarum” tímiania nu

¹ Nuyá, yatsurú, Yusa chichame shiir pampartí tusarum Yus áujtursatarum. Átum Yus-Chicham wakerukmarmena áintsan ashí nunkanam wakerukartí tusarum Yus seatarum.

² Tura yajauch shuar, pé_nker ana nuna ti nakitiainia nu, incha yajauch awajtamsachartí tusarum Yus áujkartustarum. Kame chíkich aents Yúsán umirkacharu áiniawai.

³ Tú_rasha Uunt Jesusak atumin iniaitsuk wáitmaktatrume. Tura atumin ikiakátmartatrume. Tura íwianch anan_kramataj takui kíshturmaktatrume.

⁴ Kame Yus atumin yainmaktatrume, taji. Ii táj_inia nu yamá_i umíarme. Tura tuke umirkattarme. Nusha nekaar shiir enentáim_ji.

⁵ Uunt Yus yainmakartí ni anen_krattairin nekaatniun. Kristu itiurchatan katsuntramia núnisa_n atumniasha katsuntratniun Yus yainmaktí.

Takastiniaitji

⁶ Yatsurtiram, antuktarum. Ii Uuntr_i Jesukrístu chichamej_ai ju taji: “Nuyá Yus-shuar wi jintinramun nakitiak aya wékana nu ikiuktiarum.”

⁷⁻⁸ Ii túraj_nia núnisrumek túratin nékarme. Jú_iti: atumj_ai pujusmaj nu_i tuke takakmasmiaji. Atumí yurumkar_i iisha akikmakar yurummiaji. Atumj_ai itiurchat áchatí tusar tsawajsha káshisha tuke takakmasmiaji.

⁹ Kame iisha, Kristu akatramu asar “yáintkiatarum” tíminiuj_i; tú_rasha nu tútsuk, ii túraj_nia núnisrumek túratin nekaatarum tusar, iisha tuke tsawant takaamiaji.

¹⁰ Warí, atumj_ai pujumiaj nu_i “Takastinian nakitiana nuka yurumáshti” tíchamkaj_i.

¹¹ Iis, atumi_inia weeá, nán_kkamas enentáimiainiak tura nán_kkamas túruiniak penké takatsuk pujuiniawai, túramainiaji.

¹² Nú shuáran ii Uuntr_i Jesukrístu chichamej_ai “Tákamtak shiir takakmasartí” tajai.

¹³ Yatsurtiram, yawętsuk shiir túratarum.

¹⁴ Ju papinium ii táj_inia nuna, shuar umiktinian nakitiakuin_kia “umichuiti” tákuram, ni natsarat tusarum ikiuktiarum.

¹⁵ Tú_rasha “Yus-shuara nemasr_inti” tiip. Áyatik jintintrata, tura Yúsaj enentáimtikrata, ame nekas yatsumeá áitkiasmek.

Papru aujsua ikuamu

¹⁶ Uunt Yuska, imiatkichu enentái susamniaiti. Jú Yus, itiurchatnum pujarminin atumin tuke imiatkichu enentáimtikramsarti. Uunt Yuska atumin pujurtamsarti, tajai.

¹⁷ Ju_i wi Papru ju_na aajai. Wi papin akupeaj nu_i júnisnak winia náarun áaran apujeajai, wíniaiti tusan.

¹⁸ Ii Uuntr_i Jesukrístu atumin ashí yainmakarat tusan wakerajrume. Nu atí.

Papru TIMIUTÉUN Emka papin aar akuptukma

¹ Wi Papru Jesukristu akatramurintjai. In uwemtikiartin Yussha tura ii Uuntri Jesukristusha winia akuptuku áiniawai. Jesukristujai métek ti shiir ajastai tusar nákaji.

² Timiutéu, ju papin áateajme. Wi ujakam Yus-shuar ajasu asam nekas winia uchirua áinkiaitme. Tuma asakmin Yus Apasha tura ii Uuntri Jesukristusha ti anenma ásar waitnentrainiak imiatkinchanum ti shiir pu-justinian yainmakarti.

Wait chichamjai anearta

³ Masetúnia nunkanam wéakun “Ipisiu péprunam pujuuta” timiaj núnisnak tájame. Shuar nuju wait-chichaman jintin ainia nu suritkiarta.

⁴ Niisha Israer-shuara weatrin áujmatsamunak tura ni weatri naari ti untsurí irurtinniak Yus-Chichamjai nankaamas enentáimtuiniawai. Nunak áujmatsar tuke ántar tuiniawai. Nu túramuka Yus enentáimtusar Nin shiir umirkatniun yáinmatsji. Tuma asamtai nusha suritkiatá.

⁵ Yus-shuar tuke enentáijjai Yúsán shiir enentáimtusar tura tunáa túrutsuk aya péñkera nuna wakerukar anenkartin ajastin áiniawai. Núnisan péñker ajasat tusar Yus-Chicham étsereaji.

⁶ Chíkich shuar juna iniaisar ántar chichaman áujmatainiawai.

⁷ Yúsán nékachiat “jintinniuitjai” tuiniawai. Tura unuiniainia nuna nékainiatsui.

⁸ Yus wakeramun nekaatin tura tunaan suritkiatin akupkamuka nekas péñkeraiti. Nu paant nékaji.

⁹ Kame akupniuka péñker shuaran itit awajsatniun akupenatsui. Antsu yajauch shuar juna túrin ainia nuna itit awajsatniun akupenawai: Tunáa shuarnasha, umichuncha, Yúsnasha tura ashí Yúsnanacha nakitiainia nunasha, aparín máinniasha, nukurín máinniasha, kame mankartinniasha,

¹⁰ nuwancha tura áishmannasha tsanirma áinia nunasha, shuaran kasamak juu ainia nunasha, wáitrinniasha, tsanumniuncha, ashí nuna itit awajsatniun akupenawai. Kame ashí péñkercha nuna iwiaratniun akupenawai.

¹¹ Núnisan tawai ti shiir uwempratin chicham Yus suramsamajnia nu. Nu chichamnaka etserkatniun Yus péñker asa tsankatrukuiti.

Yus waitnenkartin asamtai Papru yuminsamiayi

¹² Ii Uuntri Jesukristu shiir enentáimturu asa Níiniun etserturkat tusa kakarman surusuiti. Túruta asamtai yúminkiyajai.

¹³ Wi Yúsán imiá yajauch chicharniuyajai. Yus-shuarnasha áintrarmiajai. Yusnasha katsekniuyajai. Túrin aju Yus winia waitnentrurmiayi. Kame Jesuska Yus Anaikiamun nékachu asan wi túramu yajauchiiti tu enentáimchayajai.

¹⁴ Tura ii Uuntri Jesukristu ti nekas waitnentrurmiayi. Tura Jesukristujai tsaninka pujakui Yus nekas enentáimtustinniasha tura anenkartin ajastinni-asha surusuiti.

¹⁵ Ju chicham ti nekasaiti. Tunáa shuaran uwemtikrataj tusa Jesukristu ju nunkanam taramiayi. Nunasha ashí shuar nekaatin áiniawai. Tura wikia ashí shuarjai nankaamas tunáan túriniaitjai.

¹⁶ Ti tunáa aín Jesukrístu ti anenkartin ana nu paant nekanati tusa Yus winia waitnentrurmiayi Tuma asamtai chíkich shuar, wijíai métek, Yúsan nekas enentáimtusar Nííjiai tuke iwiaaku pujusartatui.

¹⁷ Yus tuke jacha asa tuke iniaitsuk akupniuiti. Wáinchataitiat imiá nankaamas nékaiti. imia Niñki Yúsaiti. Tuma asamtai imia Niñki tuke iniaitsuk ti shiir awajsatniuiti. Núnisañ tuke atí.

¹⁸ Uchiru, Timiutéu, yáunchuya Yus-shuar ámin “Ju shuar péñkeran túrattawai” túramarmia nútksam yamaikia kakaram ajástá. Nii timia enentáimsam suntara áintsam Yúsna kakaram takastin asumprurta. Nuna tájame. Tura Yus tuke nekas enentáimtusam tura tunaan túrawaj tusam anearam túrata.

¹⁹ Chíkich shuar tunaajai anearcharu ásar Yúsan ikiukiarmai.

²⁰ Iminíusha tura Arejántrusha núnisañ Yúsan ikiukiarmatai uunt iwianch-nium surukarmajai. Nujai Yúsan ti yajauch chicharsacharat tusan túraitjai.

2

Yus áujsatin

¹ Wátsek, emka seajrume Yus áujeakum Yus yuminsam ashí shuar yainkiat tusam áujtusarta.

² Imiatkinchanum pujusar Yusjajisha tura áentsjajisha shiir túratai tusar tura ashí akupin ainia nusha péñker akupkarat tusar Yus áujtustiniaitji.

³ Áitkiasar seatin péñker asamtai, uwemtikramajnia nú Yus wakerawai.

⁴ Ashí shuar nekas chichaman nekaawar uwemprarat tusar wakerawai Yus.

⁵ Aya chikichik Yus awai. Tura Jesukrístu aents ajas Yusjai áentsun nawamnaimtikiartiniaiti.

⁶ Ashí shuara tunaarín akikmatkataj tusa jákatniunam Jesukrístu surumakmiayi. Tura tsawant jeamtai nu chicham ashí shuarnum etsernaktiniuyi.

⁷ Nuna túratniun Yus winia akatar akuptukuiti. Israer-shuarcha nekas chichaman enentáimtusarti tusa Yus akuptukmiayi. Krístunu asan wáitruitsuk nekas tajai.

⁸ Nu asamtai áishman̄kka kajetsuk yajauch tunaitsuk antsu péñker enentáijjai uweje takuiniar Yúsan áujsarti.

⁹⁻¹⁰ Núnisañ núwaka iwiarmamuk nekasmiancha péñker enentáijjai entsararti. Chíkich shuar nu nuwan̄ iis temashmarmar̄incha, sháukr̄incha, kurimkiamuncha, iwiarmampramur̄incha núnaka enentáimtutsuk antsu ni péñker túrunamun enentáimtusarti. Núnisañ áchatniukait nuwá Yús-shuar ainia nujai. Ni péñker túramujai nekas shiir awajmamsashtinkiait.

¹¹ Núwaka takamtak pujusar umiiniak unuimiararti.

¹² Nuwan̄ka ashí iruntramunam unuiniartinniasha tura ni áishr̄in akupkatniuncha suritiajai. Antsu takamtak pujustiniaiti.

¹³ Yus emka áishman̄kan Atan̄kan najanamiayi. Nuyá nuwan̄ Épan najanamiayi.

¹⁴ Tura Yus timian umirkach Atan̄ka anañnachmiayi. Antsu Épa ananna asa tunaan túramiayi.

¹⁵ Túmaitiat jurertin asa, emesnartinniumiá uwempraiti. Tura Yúsan nekas enentáimtak anenkartiniaitiuk tura esetar enentáimiuk péñker wekasatniuiti.

3

Yus-shuaran wáinin

1 Shuar Yus-shuaran wáinkiatniun wakerakka pé_ñker takatan achikiuiti. Nuka nekasaiti.

2 Tura Yus-shuaran wáinin ajastinian wakerakka chíkich shuar nin ya-jauch áujmattsachmin átiniaiti. Nuwá apatka áchatniuiti. Niisha pé_ñker esetar enentáimin naka wekasatniuiti. Íraran ni je_ñ ti shiir itiaatniuiti. Pé_ñker jintinkratin átiniaiti.

3 Nampechusha tura suiir enentáimtichusha átiniaiti. Aya kuítian iki-aun_ñkatniun enentáimtuschatniuiti. Antsu tsan_ñka átiniaiti. Kajechusha átiniaiti. Chíkichnancha wakerutkashtiniaiti.

4 Ni shuar_ñ shiir akupeakui ni uchir_ñsha umin tura shiir awajkartin ártiniaiti.

5 Kame ni shuar_ñ akupkachminiaitkiun_ñka ¿itiurak Yus-shuaran wáinkiat?

6 Yus-shuaran wáinniuka yama Yus-shuar ajasu áchatniuiti. Túmaitkiun_ñka ti nan_ñkaamantu enentáimtumak iwianch_ñjaí métek tunaan túrak sumamattawai.

7 Yus-shuarchasha nin shiir enentáimtustin ániawai. Núnischaitkiu_ñkia nin yajauch chicharainiakui íwianch wárik tunaanum ajuartatui.

Yus-shuaran yain

8 Núnisan_ñ Yus-shuaran yaincha pé_ñker asamtai ashí shuar nin shiir enentáimtustin ániawai. Nii tana nuna tímatrusan_ñ umin átiniaiti. Nampechu átiniaiti. Aya kuítian ikiaun_ñkatniun enentáimtuschatniuiti.

9 Yús_ñnan ti pé_ñker nekaatniuiti. Tura esetar enentáimsatniuiti.

10 Emka pé_ñker ístiniaiti nuyá pé_ñker wekaakka Yus-shuaran yain átiniaiti.

11 Nuwasha pé_ñker asamtai ashí shuarsha nin shiir enentáimtustin ániawai. Tsanumniuchu antsu esetar enentáimiar nii chichaa ímiatrusan_ñ umin átiniaiti.

12 Yus-shuaran yainkia nuwan apatkachu átiniaiti. Tura ni uchir_ñcha ni shuar_ñincha ashí shiir akup_ñin átiniaiti.

13 Yus-shuaran yayak nekas pé_ñker takaakka shiir enentáimtusmin asa páchitsuk Kristu Jesus enentáimtusun arantsuk etserkamniaiti.

Yusna ana nu imiá nan_ñkaamas pé_ñkeraiti

14-15 Wárik íitniun wakerajme. Túmaitiatnak sétaknasha Yus-shuar_ñjaí takastin nekaak tusan ju_ñna áatjame. Ashí Yus-shuar, iwiaaku Yusna ainia nu, nekas chichaman tuke emetawar akasmatainiawai.

16 Maa, imiá nekasaiti, Yus iwiainturmakma ashí nan_ñkaamas ti pé_ñkeraiti. Tura júiti:

Yuska aents ajas jú_ñ nun_ñkanam paant wantinkiamiayi.

Yus Wakancha “ti shiiraiti” Nin tímiayi.

Yusa suntar_ñsha Nin wáinkiar_ñmiayi.

Ashí nun_ñkanam nu etsernakmiayi.

Túramtai ashí nun_ñkanmaya shuar umirkarmiayi.

Tura nayaimpiniam waketkimiayi.

4

Amuukatin tsawantin

1 Yusa Wakan_ñ ti paant tawai, amuukatin tsawant jeaakui untsur_ñ aents Yus enentáimtustinian iniaisar antsu yajauch wakanin nemarsar íwianch jintíamun anturkartatui.

2 Yajauch shuaran anturkartatui. Nu shuar ni enentáí nar_ñúa áinin ásar ni tunáa túramun pé_ñké enentáimtichu ániawai. Tuma asa shiir chichainiayatan wáitrin ániawai.

3 Nu shuar nuatnaikiatniun suritiainiawai. Núnisan_ñ chíkich chíkich yurumak yúatniuncha suritiainiawai. Warí, Yus ashí yurumkan najana asamtai

Yus-shuar nekas chichaman nékainia ásar Yúsan yumı̄nsar páchitsuk yuámin ániawai.

⁴ Ashí Yus najanamu péñker asamtai nakittsuk antsu Yusan yumı̄nsar yúatniuiti.

⁵ Yus-Chicham tana nújaisha tura yuuniak Yúsan yumı̄nkias áujsamujai ashí péñker ajasuiti.

Jesukrístu péñker takarın

⁶ Wi tájamna nu chíkich Yus-shuar jintintiakmeka Jesukrístu péñker takarın átatme. Tura ashí Yus-Chicham péñker jintíamu unuimiaru asam nujai kakaram ajastatme.

⁷ Antar chichamsha tura netse chichamsha enentáimtutsuk nekas Yusna ana nu túratin kakaram ajasta.

⁸ Kame ayash kakaram awajsatniusha ishichik péñkeraiti. Antsu Yusna nu túratin kakaram ajastinkia imiá péñkeraiti. Yamái ju nunkanmasha yáinmaji tura ukunmasha Yusjai pujustin asakrin nankaamas péñkeraiti.

⁹ Nu imiá nekas asamtai ashí shuar nuna enentáimtustiniaiti.

¹⁰ Nekas iwiaaku Yus ashí shuaran uwemtikramniaiti, tura ashí Nin enentáimtuinia nú shuaran nekas uwemtikratniuiti. Nu chicham imiá neka-saiti tu enentáimtakur katsekramainiakrincha kakaram takaaji.

¹¹ Nuka ashí ame jintíakum akupkatniuitme.

¹² Ti úuntchaitkiumnisha nakitramprarain. Antsu péñker túrakum Yus-shuar unuiniarta. Chichammijiaisha, túramurmijiaisha, anenkratmarmijiaisha, nekas Yus enentáimtamujiaisha, tura esetra enentáimsam Yusna péñker túramujiaisha niisha túrawarat tusam iniaktusarta.

¹³ Wi jeatsain Yus-Chicham áujeakum shuar jintintiata. Túram Yus-shuar ikiakárarta.

¹⁴ Yus-shuara uuntri Yúsnan takastin anaitiamak uwején awantramsar-mai. Nuna túramainiak “Ju shuar kakarman Yúsnumı̄an takustatui” túramarmia nu, kakaram ajasam tímiatrusam túratá.

¹⁵ Tuke enentáimjai wi tájamna nu enentáimtakmin ame péñker túruki wéamun nekaawartatui.

¹⁶ Túramna nusha tura unuiniamna nusha péñker wáinmamkata. Nu túratin pimpikiip. Nu túrakmeka uwemprattame amesha tura ujainiam nusha uwemtikrattame.

5

Yus-shuarjai itiur túratniuit

¹ Uunta nu kakantraip. Antsu nekas ame apa nútiksamek chicharkata. Nátsasha nekas ame yátsumea nútiksamek shiir awajsarta.

² Nuwá úuntchisha nekas ame núkua nútiksamek shiir awajsarta. Nuwá nátsasha nekas ame umaimia nútiksam shiir enentáimjai péñker awajsarta.

³ Waje nekas atsumin ainia nusha yáinkiarta.

⁴ Tura waje uchirtiniaitkiuin̄kia tura tiran̄krinniuitkiuin̄kia, nu shuar wajen wáinkarti. Emka ni shuarin péñker wáinkiatniun unuimiararti. Ni aparı̄ anemia núnis awantuiniak shiir wáinkarti. Núnaka Yus ti shiir enentáimtawai.

⁵ Nekas waje niñki pujana nu Yúsan enentáimtak tsawajisha káshisha iniait-suk Yúsan áujeawai.

⁶ Antsu aya wárastiniak wakera nuka iwiaakiat jaka áintsan̄kete.

⁷ Tura wajenka ni shuari wáinkartı̄. Yus-shuaran yajauch chicharnaktin atsutı̄ tusam wi tájamna nu ashí Yus-shuar ujakarta.

⁸ Shuar ni jeen pujuinia nuna nekaska wáinkiatniuiti. Tura nuyá chíkich shuárnasha yáintiniaiti. Túrachkunka Yus tana nuna umíatsui, tura Yus-shuarcha nujai nankaamas yajauchiiti.

⁹ Yusa kuítrijiai yáinniaiktiniaitkiunka waje sesenta (60) uwí nankaamas takustiniaiti. Tura chikichik aishriniak takusu átiniaiti.

¹⁰ Ti paant péñker túrin átiniaiti. Ni uchirín péñker tsakatmaashit, íraran péñker táata tíniuashit, nekasmiancha enentáimtumar Yus-shuaran yáiniaashit, wáitiainia nuna waitnenniuashit, tura chikichnasha péñker túriniaitkiunka maak.

¹¹ Tura sesenta (60) uwí takakchaka chíkich wajejai iruraip. Ni ayashi wakeramuri Krístuiya kanamtikiainiawai tura ataksha nuatnaikiatniun wakeruiniawai.

¹² Tura emka enentáimtiarmia nuna iniaisar sumamainiawai.

¹³ Nu arantcha nakimiainiak ántar irauwear chikicha itiurchatrín áujmatsachminia nunasha áujmatin áiniawai.

¹⁴ Nu asamtai waje úchipiak ainia nuka uyurtukar uchin takusarti. Tura nuwá nuatkamu takastinia nuna túrawartí. Tura ni túrunamurijiai in kajertamainiaj nú shuar yajauch enentáimturmarcharti.

¹⁵ Kame nuik chíkich chíkich waje Krístuiya kanakiar iwianchin nemarsaru ásarmatai nuna tájai.

¹⁶ Áishmansha nuwasha Yus-shuar ainia nu ni shuariin waje ákuinkia Yusa kuítrín seatsuk nii yaíntí. Nujai chíkich wajeñ nekas atsumainia nuna Yusa kuitri yáintatui.

¹⁷ Yus-shuara uuntri Yus-shuaran péñker wáinkiarua nu, nekas shiir enentáimtustin áiniawai. Tura akinkiamniasha áiniawai. Nekaska Yus-Chichaman etserkatniuncha tura unuiniartinniasha tuke takaaka imiá shiir enentáimtustinaiti.

¹⁸ Yus-Papiniumsha núnisan áarmaiti:

Jiñkiaia saepen pakartaj tusa turu takaak nájakui ni nují jinkiatáshtiniaiti. Antsu ni wakerak yuati. Tu áarmaiti.

Tura nu arantcha áarmaiti:

Takakmasua nu nekas akinkiatniuiti. Tu áarmaiti.

¹⁹ Chikichik shuarak Yus-shuara uuntri tunaarín etsertukmatainkia anturkaip. Antsu jímiarsha menaintiusha tsanumtsuk métek tuiniakui anturkata.

²⁰ Chíkich shuarsha ni tunaarín ikiuktinian nakitiainia nu, ashí iruntramunam chicharkarta. Chikichcha, nuna ísar, ashamkarti.

²¹ Yussha ii Uuntri Jesukrístusha tura nayaimpinmaya suntarsha ímiainiamunam “túrata” tájame. Ashí shuarjai niisháa enentáimtutsuk métekrak túrata.

²² Yus-shuara uuntri atí tusam wárik anaikiaip. Wárik túramka chikicha tunaarín sumamattame. Ashí tunaanum péñké pachiinkiaip.

²³ Wakemjai jau asam aya éntsak úmutsuk karía ishichik pachimpram umarta.

²⁴ Chíkich shuara tunaari wáitsatin imiá paant áiniawai wáitsatin tsawant jeatsain. Tura chíkich shuara tunaarínkia paantcha áiniawai antsu ukunam paant nekanawartatui.

²⁵ Núnisan péñker túramusha ti paant áiniawai. Tura yamá páantchaitiat tuke paantcha áchamniaiti. Páchitsuk nekanattawai.

6

¹ Takarniutirmesha, atumí uuntri ti shiir umirkatarum. Túrachkumniñkia chíkich shuar Yushasha ii unuiniamuncha yajauch áujmattsartatui.

² Atumí uuntri Yus-shuar áiniakka aya Yusjaj yatsum asamtai nakiarchat-niuitrume. Antsu nuna nankaamas péñker takarsatniuitrume. Warí, ame yayamna nu Yus-shuarchak ainia, tura ame aneamu yatsumchak ainia. Ame, Timiutéu, tu jintintiata.

Yusna wakeruktincha tura kuit wakeruktincha

³ Shuar ti shiir naka chichaman ii Uuntri Jesukristunu ana nuna nakitiak antsu niisháa chichaman étserkunka

⁴ nu shuar nankaamantu enentáimtumayat ántrai. Ni enentáimmianak chichaak aya ántar chichaman antumtiknaikiatniun chichaawai. Tura nu chichamjai nupetmaktaj tusar nankaamas áujmatainiak kajernaikiar tura katseknaikiar péñker enentáimtunaisuk

⁵ tuke kakannainiawai. Tura tu aujmatnaisatniun wakeruiniana nú shuar nekas-chichaman nékachu ásar aya tunaan enentáimtin ániawai. “Yusna ana nujaj kuítrintin ajasminiaiti” tuiniawai. Nu shuar pachisaip.

⁶ Shuar takakna nujajin waraakka Yusna ana nujajisha waraak ju nunkanmasha tura nayaimpinmasha nekas kuítrinniuiti.

⁷ Iis, ju nunkanam misuk támaji; núnisar misuk jiinkittiaji.

⁸ Tuma asamtai yurumkasha tura entsataisha takakkurkia nujajin warasa pujustiniaitji.

⁹ Antsu kuítrintin ajastaj tuinia nu, tunaanum awankemkar iniainiawai. Tura antra nuna wakerukar itiurchatan wáiniainiawai. Nujaj emesratniun-masha jeainiawai.

¹⁰ Kame kuit aneatniuka ashí tunáanum útsutmakminiaitji. Chíkich shuar nuna wakerukar Yus enentáimtustinian iniaisar ti itiurchatjai yajauch awajmamsarai.

Yusna nu túrunat tusam kakaram ajástá

¹¹ Antsu ame Yus-shuar asam nuyá pisarta. Yus nekas enentáimtakum péñker túrata. Waantu enentáimtsuk Yus péñker umirkata. Aneakum katsun-trata.

¹² Yusna nu túrunat tusam kakaram ajástá. Tuke amuicha iwiaakma emetata. Nu túratniun Yus anaitiamkaiti, tura ame Yus nekas enentáimtamun untsurí shuar iruntramunam etserkaitme.

¹³ Yuska ashí iwiaaku átinian súwiti. Jesukristusha Punsu Piratui nekasa nuna ti paant ujakmiayi. Tuma asamtai Yussha Jesukristusha írainiamunam nuna tájame.

¹⁴ Ii Uuntri Jesukristu táatsajin wi tájamna nu yapajítsuk tura yajauch chicharnakchamnia péñker umiktá, tájame.

¹⁵ Tsawant jeamtaí Jesukristu tatí tusa Uunt Yus, imiá péñker asa, akupkat-tawai. Nínkiti Yus. Akupniuncha Akupniuiti. Uuntjai nankaamas Úuntaiti.

¹⁶ Iwiaaku átinia nérenniurj Nínkiti. Ti tsáapninnium pujakui nuntumtuach-miniaiti. Wáinchataí asamtai shuar péñké wáinkiacharu ániawai. Nínki ashí shiir awajsatniuiti tura Nínki tuke ashí akupin atí. Núnisaj atí.

¹⁷ Jú nunkanam kuítrintin ainia nusha nankaamantu enentáimtumacharti. Kuitcha yúpichuch menkakamnia asamtai kuítniak enentáimtusar pujuscharti. Antsu iwiaaku Yus ashí in ti péñkeran núkap súramaj nuna nekas enentáimtusarti.

¹⁸ “Péñker túratarum” tiarta. Táku min niisha shiir enentáijjai ni takakman ajamsarti. Nuyá nú péñker túramujai Yusaj ikiáunkartí.

¹⁹ Nuna túruiniak kuítriniawartatui. Núnisaj tuke iwiaaku átinian wáinkiaartatui.

Amuak Timiutéun akatramu

²⁰ Timiutéu, ashí ame túratniua nu tuke enentáimturta. Jú nun^ukanmaya ántar chichainia nu anturkaip. Tura wáitruiniak “wi imiá nékajai” tuinia nusha anturkaip.

²¹ Chíkich shuar nuna umirkar Yusajya kanakiarai.

Wátsek, Timiutéu, Yus shiir yainmakti.

Nuke atí.

Papru TIMIUTÉUN Ataksha papin aar akuptukma

Papru Timiutéun áatramiania nu

¹ Wi Pápruitjai. Yus wakerakui Jesukrístu akatramurj ajasuitjai. Ashí Jesukrístujaj tsaniñkiarun “Nekas iwiaaku átinian susattajai” tíniuiti Yus. Tuma asa nuna etserkat tusa akuptukuiti.

² Aneamu uchiru, Timiutéu, ju papín áateajme. Yus Apasha tura ii Uuntri Jesukrístusha ti anenma ásar waitnentrainiak imiatkinchanum shiir pujustinian yainmakarti.

Krístunu takastiniaitjinia nu

³ Tsawajisha káshisha Yúsan áujeakun ámin tuke enentáimtusan ti shiir Yúsan yúminñkijaj. Winia weatur túrawarmia nútiksanak Yúsan enentáimtakun ti shiir awajeajai.

⁴ Kanakmiaj nuj eantramiam nuna tuke enentáimtajme. Ataksha warar-naisatai tusan lítniun wakerajme.

⁵ Yus nekas shiir enentáimtiniaitmena nuna nékajai. Nukuchrum Ruítiasha tura ame nuku Eunisiasha emka Yúsan nekas enentáimtin ármiai. Amesha núnisketme.

⁶ Tuma asakmin tájame: Yusna takasái tusan winia uwejrún ámin awanteakui Yus kakarman suramsamia nujaj atak kakaram takasta.

⁷ Yus sápij enentáin suramsachuitji. Antsu kakaram ajastinniasha anenaitniuncha péñker wekasatniuncha suramsaitji.

⁸ Ii Uuntri Jesukrístunu etserkatin natsantraip. Níiniun étserkun sepunam pujamusha étserkum natsantruraip. Antsu Yus kakaram awajtamkui ame étseream nujaj shuar yajauch túramainiakui surimiamtsuk wáitsatin enentáimtumarta.

⁹ Ii péñker túrichu árinin Yus in anenma asa uwemtikramar péñker túratniunam apujtamsaitji. Iisha Jesukrístujaj tsaniñkiaru asakrin tura Yus nuna túratniun wakerak túramiai. Yaunchu ju nunka atsaisha in tuke waitnentrampriamaji.

¹⁰ Turá yamá in Uwemtikkiartin Jesukrístu támatai nu anenmamu paant ajasuiti. Niisha jákatniun nupetak emesramiai. Tura uwempratin chichamjaj jáchatai iwiaakman paant awajturmaj.

¹¹ Nuna etserkat tusa Yus anaitiukmiayi. Tura akattur Israer-shuarchanum akuptukmiayi.

¹² Túruta asamtai ti wáitiajai. Túrasha Yúsan nekas enentáimta asan natsamatsjai. Imiá kakaram asa amuukatin tsawant jeatsain ashí wínian susamaj nuna ti péñker waitruktatui.

¹³ Shiir chichaman jintintiamajmena nuke emetata. Jesukrístujaj tsaniñkiu asar Yus nekas enentáimtaji tura nujaj anenkratniuitji. Tuke núnismek túrata.

¹⁴ Yus ámin takasat tusa suramsamu shiir takasta. Tura Yusa Wakanj in pujurtamaj nuna kakarmarijjaj túrata.

¹⁵ Asia nunkanmaya shuar mash iniaitiusarmai. Nu nekaachmaashum. Nu shuarnumiá Pijirusha Ermujenessha armái.

¹⁶ Antsu Unisépuru niisháa shuar amai. Ti nukap shiir enentáimtikrurmai. Tura wi sepunam pujamuncha natsantrurchamai. Ii Uuntri Kristu ni shuarincha waitnentrarti.

¹⁷ Rúmanam taasha natsantrutsuk eatak wáittsuk iniaitiúschamiayi.

¹⁸ Ipisiu péprunam pujarin ti yainmakmiaj nu paant nékame. Tuma asamtai amuukatin tsawant jeamtai nincha Uunt Yus waitnentrati.

2

Kakaram ajasta

¹ Amesha, uchirú, Jesukrístujaj tsanin_kiu asam nu kakarmajaj kakaram ajasta.

² Untsurí ántuiniamunam wi etserkamaj nu, shuar umikmin ainia nu jintintiwaram chikichnasha jintintiwarat tusam akupkarta.

³ Ame ti penker Jesukrístu suntari asam wáitsatin katsuntrata.

⁴ Suntarka ni uuntri tana nunak umiktin asa chikich takatan pachintiukchatniuiti.

⁵ Núnisan nakurincha nakurustinia nujaj métek nakurachkuṅka nekas péṅkeran awakmakun súsatniua nuna achikchamniaiti.

⁶ Ataksha núnisan shuar ajan takaana nu, ashí shuara nankaamas nuyān yúashtinkiait.

⁷ Wats, ju menaintiu métek-taku chicham ániawai. Péṅker enentáimtakmin ii Uuntri Kristu paant awajturmastatui.

⁸ Jesukrístu jaka nantakmia nu enentáimprata. Tura Uunt akupin Tawit ni weatri asamtai Jesussha uunt akupin átiniaiti. Núiti wi uwempratin chichaman étsereaj nu.

⁹ Nuna étsereakun sepunam jirujaj jin_kiamu pujakun wáitiajai. Túrasha Yus-Chicham jin_kiachminiaiti.

¹⁰ Ashí shuar ni shuari arti tusa Yus achikiarua nuna yáintajtsan ashí itiurchatan katsunteajaj. Nujaj Jesukrístujaj tsanin_kiaru ásar uwemprar tuke shiir pujusartatui Yusjaj.

¹¹ Ju imiá nekasaiti:

Jesukrístujaj jákaitkiurkia Níjiajsha tuke iwiaaku pujustatji.

¹² Wáitiakrishā Níjiaj akupkattaji.

Natsantakrinkia Niisha natsantramprattaji.

¹³ Umichuitkiurniisha Nin_kia tuke uminiaiti. Warí, Yuska ni enentáimmiājaj yapajniátsuk tuke umiktiniaiti.

Yusaj natsaaraqaj tusam ashi túrata

¹⁴ Shuar jintintiakum ju enentáimtikrata. Ii Uuntri Yus ímmianum chichamjaj yajauch tunaiyarajin tusam chicharkarta. Nu tunaitin penké ántraiti antsu ántuiniana nuna yajauch awajenawai.

¹⁵ Yus-Chicham tuke enentáimjaj péṅker unuimiátram shiir jintintiwarta. Túrakum Yus péṅker írsat tusam péṅker takarin atá. Túramka Yusaj natsaarchattame.

¹⁶ Jú nunkanmayanak ántar áujmatin ainia nujaj kanaktia. Shuar nuna áujmatainiak tunaanum nuna nankaamas wáiniawai.

¹⁷ Ni jintiniamusha sunkurjaj métek pampaawai. Iminíusha tura Piritiusha nu shuar ániawai.

¹⁸ Niisha nekas chichaman iniaisar tura ashí Yus-shuar nantaktincha nankaamasai tuiniakui chikich chikich shuar Yusan naka enentáimtuiniatsui yamaikia.

¹⁹ Túrasha Yus ashí nan̄kaamas enentáimtustinia nuna paant awajsaiti. Júnisaiti: “Uunt Yus ni shuarin̄ nékainiawai,” tura nuyá “Ashí Kristu shuari ainia nu tunaanumiá kanakiarti.”

²⁰ Kuítrinniu jeen̄ kurijiaí najanamusha kuitjaí najanamusha írunui. Nújain̄kia ti shiira nu takastin̄ áiniawai. Tura numijiaí najanamusha nuwejaí najanamusha írunui. Antsu nújain̄kia nekasmiancha ainia nu takastin̄ áiniawai.

²¹ Núniskete Yusa takatríjiaí. Ashí tunaanumiá kanakir péñker wekasar shiira nu takasmin̄ átatji. Kame ashí péñkera nu takasmin̄ asakrin̄ ii Uuntri Jesukristu wakerak péñker takata nuí apujtamsamniaitji.

²² Natsá wakerutai iniaisam esetram péñker wekasata. Amesha ashí shuar shiir enentáijiaí Yúsan áujena nujai Yus nekas enentáimtakum aneniakum ti shiir pujustá.

²³ Enentáimtsuk chichainiak aya ántar tunaitinian chichainia nu pachisárap. Nusha aya némasmanainiawai.

²⁴ Ii uuntri Jesukristu takarniuka chíkich shuarjaí nemasmanaikiashtin̄aiti, antsu ashí shuarjaí péñker nawamnaikiatniuiti. Tura waitnentáimturar péñker jintintiatniuiti.

²⁵ Tura umircha shuarnasha Yus ni enentáin̄ yapajtiakui nekas chichaman shiir enentáimturarat tusa péñker enentáijiaí jintintiatniuiti.

²⁶ Nujai íwianch ni wakeramu túrawarat tusa achikmaitiatan̄ uwemprarta-tui.

3

Amuukatin tsawant jeatemamtai aents ti tunaan túrawartatui

¹ Amuukatin tsawant jeakui ti itiurchat átatui.

² Shuar aya niñki enentáimtumasartatui. Kuítian ti wakeriartatui. Nan̄kaamantu enentáimtumartatui. Yúsnasha yajauch chicharsartatui. Aparin̄cha umirkachartatui. Yumiñsatniuncha nékachu ártatui. Ashí Yúsnan̄cha enentáimtuschartatui.

³ Aneetsuk waitnenkartichu ártatui. Tsanumin̄ ártatui. Ni ayashí wakera-mun katsuncha ártatui. Aya kajen̄ ártatui. Ashí péñker túrinia nuna nemasri ártatui.

⁴ Amikrin̄cha surukartatui. Arantsuk tunaan túrawartatui. Waantu enentáimin̄ ártatui. Yúsan nakitrar aya ni wakeramunak enentáimtusartatui.

⁵ Yusa kakarmari “ántrai” tuíniak péñker umirkachartatui. Túrasha Yúsan umirua núnisar túrawartatui.

Nu shuar pen̄ké pachisáip.

⁶ Nu shuarsha shiir chichayatan̄ anan̄kawar jeá wáiniawai. Tura nuwá esetar enentáimchan nekas tunaarinniun anan̄kainiawai. Nu nuwá ashí yajauch wakeramujai anannainiawai.

⁷ Tuma ásar ashí shuara chichamen̄ tuke ántuiniayatan̄ nekas-chichaman nekaatniun tujintiainiawai.

⁸ Yaunchu Ejiptu nun̄kanam Muisais uunt akupniujai chichaakui jimiará iwishin̄, Jánissha Jámprissha, Muisaisan kajerainiak “ántar tawai” tiarmiayi. Núnisan̄ ju shuar nekas-chichaman nakitiainiawai. Naka enentáimiainiachu ásar Yúsnan̄ naka jintiatniun pen̄ké tujintiainiawai.

⁹ Túrasha nuna nan̄kaamas kuakchartatui. Shuar ti paant ni netse túruiniamurin̄ nekarawartatui. Núnisan̄ nu jimiará iwishniujai túrunamiayi.

Amúak Papru Timiutéun akatramiania nu

¹⁰⁻¹¹ Tura ámeká wi tímiaj nu umireame. Wi Yusjai shiir wekaamusha métek túriniaitme. Wi enentáimmiasha nékaitme. Áintruiniakui wáitsamaj nu nékame.

Tura Yúsan enentáimtakun tura anenkratkun shiir enentáijiaj katsuntramjai. Antiukía péprunmasha, Ikiuniu péprunmasha, Ristra péprunmasha ashí yajauch túrutawarmatai wáitsamaj nu paant nékame. Túrasha ii Uuntri uwentikrurmi-ayi.

¹² Nekasaiti, shuar Jesukrístujaj shiir túrataj tákuṅka ni nemasrj áintiam ti wáitsatniuiti.

¹³ Tura ashí anaṅkartin ainia nusha kame ashí yajauch shuarsha nú yajauch túrukia wétatui. Iwianchjaj anaṅkamu ásar chikichnasha anaṅkiar weartatui.

¹⁴ Antsu ámeke unuimiam nu imiá nekasaiti tu enentáimtakum tuke emetata. Jintinramawarmia nú shuarsha wáitrichua nu nékame.

¹⁵ Úchichinmayan Yus-Chicham nékame. Yus-Chichamka uwempratniun jintinramamniaiti. Nusha “Jesukrístu nekas enentáimtakum uwemprat-tame” tawai.

¹⁶⁻¹⁷ Ni Papirin áarat tusa Yus ni shuarin áamtikramiayi. Ashí shuar ni Chichamen nekaawar péṅker túrawarat tusa túramiayi. Tuma asamtai Yus-Papí shuartin unuiniakartin asa imiá peṅkeraiti. Tunáa túrajnia nu Yus-Papijaj nekamatniuitji. Tura awajiakrincha Yus-Papí núnaka paant jintin-tramji. Nuyá naka wekasatniun jintintramji.

4

¹ Ii Uuntri Jesukrístu amuukatin tsawantaj Uunt Akupin ajas iwiaakuncha tura jákaruncha ashí péṅker túramuncha tura yajauch túramuncha nekaattawai. Tuma asamtai Niisha tura Yus Apasha íimiainiamunam juna akateajme.

² Uwempratini chicham etserkata. Yúpichuchia nuisha tura itiurchata nuisha tuke etserkata. Yus-Chicham nekas enentáimtikrarta. Tura shiir enentáimtusam chicharkam yáintaj tusam unuiniararta.

³ Ukunmaṅka péṅker chichaman nakitrar ii wakeraj núchik nekaatai tusar, shuar teremak péṅker pujuschamnia nekapea áintsan, naṅkaamas unuimiaru atai tusar, náṅkamas unuikiartinian ti untsurj eakartatui.

⁴ Nekas shiir chichaman iniaisar ikiuiniak ántar áujmatsamun enentáimtusartatui.

⁵ Antsu ámeke tuke péṅker túratin wakerakum ashí itiurchat katsuntrata. Uwempratini chicham étserkum takatrum péṅker umikta.

⁶ Ishichik ajasai winia iwiaakmar Yusaj surumaktin. Mantamnan nayimpiniam wétin jeatimiai.

⁷ Shuar kakaram maanainia núnisnak tuke kakaram takasmajai. Tséken péṅker tsekea áintsanak yawetsuk takasmajai. Tura Yus-Chichaman nekas akasmatkun péṅker wáinkiaitjai.

⁸ Tuma asamtai tawasap nukajaj najanam tsékena susamua áintsan wisha péṅker túramunam akinkiattajai. Tura aya wíniak akirkashtatui. Antsu ashí ni tátinian shiir enentáijiaj nákania nunasha nekas péṅkera nuna akikiartatui.

Timiutéu túratin akatmamturma

⁹ Wárik iiraitin enentáimturata.

¹⁰ Témas aya jú nunkanmayanak wakerak ajapa ikiuruk Tisarúnikia péprunam weyi. Tura Kresentisha Karasea nunkanam weyi. Núnisan Títiusha Tarmasia nunkanam weyi.

¹¹ Túrawarmatai aya Rúkas wijaj pujawai. Márkus eaka wáinkiam ameitiartitia. Jui ti peṅker yainkiamniaiti.

¹² Tura Tíkikiunka Ipisiu péprunam akupkamjai.

¹³ Tura winiakum nuparam pushí Trúas péprunam Karpu jeen ikiukmiaj nu takurtuktia. Núnisan nuparam papísha tura nekaska peṅké papí takurtuktia.

¹⁴ Arejántruka jirujai takawa nu ti yajauch awajtusuiti. Túrutaitkiuisha ni túramujai métek Yus akiktí.

¹⁵ Nu amesha péñker wáinkiatá. Ii étsereamun penké nakitiawai.

¹⁶ Emka akupniunam ayamprumaktaj tusan chichaakui chikichkisha yáintkiacharmiayi. Antsu sapijmiainiak ikiurkiarmiayi. Yus nu shuaran yajauch enentáimturcharka maak.

¹⁷ Tura ii Uuntri Jesukrístu ni kakarmarin surus yaintkiamiayi. Nujai uwempratin chichaman ashí nunkanam Israer-shuarcha antukarti tusan etserkamjai. Tura núnisañ akupniunmayasha ii Uuntri uwemtikrurmiayi.

¹⁸ Tura núnisañ ashí yajauchia nuyá uwemtikrurmatai Nii akupeana nuj nayaimpiniam jeattajai. Nínki tuke shiir awajnasti. Núnisañ atí.

Amikmaamiania nu

¹⁹ Piriskancha ni áishri Akirancha amikmainiajai. Núnisnak Unisépuru shuarincha amikmainiajai.

²⁰ Erastu Kurintiu péprunam juakmai. Tura Trúpimiunka Miritiu péprunam jaan ikiukmiajai.

²¹ Michá nantu jeatsain iiraitin enentáimturata. Tura Eupurusha Putentesha Ríniusha Kráutiasha tura ashí Yus-shuarsha amikmaatmainiawai.

²² Ii Uuntri Jesukrístu amijiai tsaniñ pujustí. Tura Yus ashí penker waitmakarti.

Nuke atí.

Papru TITIUN papí áatramu

Papru Titiun áatramiania nu

¹ Wikia Pápruitjai Yusa takarniuri. Tura Jesukrístu akatramurintjai. Yus achikma ainia nú shuar niisha antukar Yúsan umirkarat tusan akatramuitjai. Shuar nuna nekaawar péñker wekasartatui.

² Tura nú arant, nú shuarsha tuke iwiaaku pujusarat tusan étsereajai. Nú shuarnasha, nunñan najantsuk, “uwemtikrattajai” Yus tímiayi. Tura Niisha wáitruatniun tujintiawai.

³ Tura yamaikia, tsawant jeamtai, nuna nekaawarat tusa ii Yusri uwemtikkiartinia nu, winia chichamur ujakarta tusa, winia akatturmiayi.

⁴ Titiu, wi Yusna étserma umikiu asakmin winia uchirua áitkiasnak papin áateajme. Iis, iijjai métek Yus nekas enentáimtatsjik. Yus waitnentrama asa shiir awajtamsati tusan wakerajme. Tura ii Apari Yussha, ii Uuntri Jesukrístusha, Uwemtikkiartin ana nu, enentáimin imiatkincha awajtamsati, tajai.

⁵ Wats, wi iwiarachmajna nu ame iwiarata tusan Kreta nunñanam ik-iukchamkajam. Tura “ashí péprunam Yus-shuar írunmanum, Yus-shuaran wáinkiarat tusam shuar anaikiarta” tíchamkajam.

Yus-shuaran wáinin

⁶ Yus-shuaran wáinin júnis atí. Niisha makuuchmin ti péñker wekasati. Tura chikichík nuwentin átiniaiti. Tura ni uchirisha Yusna ártiniaiti. Tura shuar yajauch chicharsachmin niisha tutupnisañ wekain ártiniaiti.

⁷ Enentáimprata. Yus-shuaran wáinin Yusna ana nuna wáinkiat tusa anaikiamuiti. Tuma asamtai nekas makuuchmin wekasatniuiti. Waantu enentáimtumatsuk, kajetsuk, tura nampechu átiniaiti. Chikichan waitkiauí áchatniuiti. Tura anañma kuítrintin ajastaj tusa wakerukchatniuiti.

⁸ Antsu shuar ni jeen írar winiana nuna itiaatniuiti. Tura ashí péñker ana nuna wakerin, esetas enentáimin átiniaiti. Tura ju nunñanmaya akupeamuncha, núnisañ Yús akupeamuncha umirkatniuiti. Tura niñki ímiastiniaiti.

⁹ Tura nú arantcha, chíkich shuáran péñker jintintrataj tusa tura Yus-Chichaman nakitin áinia nuna nupetkataj tusa, Yúsnumia nekas chichaman, nii unuimiátramiania nuyá kanakchatniuiti.

¹⁰ Nekaata. Umichu ti irunui. Niisha ántar chichau ásar anañmauí áiniawai. Israer-shuar weenam ti irunui nú shuar.

¹¹ Niisha kuítian achiktaj tusar wakeruuniak, yajauch unuiniarchatniua nuna unuiniainiawai. Nuna túruuniak untsurí shuáran, ni írutkamurijjai yajauch enentáimtikiainiawai. Tuma asamtai auka, ni wene epetkatniuiti, ántar chichainiakui.

¹² Wari, imia Krétanmaya chichaman etserin juna tíchamka: “Krétanmaya aentska tuke wáittrin áiniawai. Tura nákitiat ti yurumin áiniawai. Yajasma núnisañ áiniawai.” Nuna tíchamka.

¹³⁻¹⁴ Maa, niisha nékasan tímiayi. Nu tuma asamtai, Titiu, Israer-shuar ántar tuinia nuna, Yus-shuar anturkachartí tusam, tura nekas chichaman nakitiana nuna akupeamurin umirkachartí tusam, antsu Yúsan nekas umirkarat tusam, umichu shuar kakaram chicharkarta.

¹⁵ Enentáimprata. Yus-shuarka, ni enentái chamir ajasu ana nuka, ashí ni wainnia nuna péñkernak enentáimtawai. Tura chíkich shuar, Yúsan

umirkachu asa, ni enentá*̄*i wapik asa, pé*̄*nker ana nuna enentáimustinian tujintiawai. Achapai enentáimiuk, pé*̄*nkercha ana nuna “pé*̄*nkeraiti” tawai.

¹⁶ Tura niisha “Yus-shuaraitjai” tu*̄*niyata*̄*n, Yúsan umirtsuk niisháa túruiniawai. Tuma ásar mujmia*̄*i áiniawai niisha. Umichu ásar pé*̄*nkeran túratniun pé*̄*nké tujintiainiawai.

2

Pé̄*nker jintintiatin*

¹ Tura amesha, Titiu, pé*̄*nker chicham etserkata. Yus-Chicham tátsuna nu etserkaip.

² Antsu áishman*̄* katsunt Yusna ainia nu, ju jintintrata. Nampechu, ná*̄*nkamas enentáimcha, esetas enentáimin arti. Yus tana nuna umirin tura anenain arti. Ni itiurchatr*̄*i*̄*n Yúsan enentáimtusar katsuntin arti.

³ Tura nú*̄*nismek nuwá*̄* katsunt Yusna ainia nusha ju jintintrata. Niisha nú*̄*nisan*̄* Yus-shuarti túramnia nuna pé*̄*nker túrawartí. Tsanumin tura nampen áchartí. Antsu pé*̄*nker wekasatniun unuinin arti.

⁴ Niisha yama nuatnakua nuna ni áishr*̄*i*̄*n ni uchir*̄*i*̄*ncha nekas aneetniun unuiniartí.

⁵ Junasha jintintrartí. Esetas enentáimin, pé*̄*nker wekain ártiniaiti. Ni takatr*̄*i*̄*n pé*̄*nker takastin áiniawai. Ni áishr*̄*i*̄*n umirin ártiniaiti. Tura waitnentin ártiniaiti. Yus-shuarcha Yus-Chichaman yajauch chicharkar*̄*i*̄*n tusar túrawartiniaiti. “Tu jintintrarta” titiá.

⁶ Nuyá, Titiu, natsa áinia nu “ná*̄*nkamsar enentáimsarum wekasairap” titiá.

⁷⁻⁸ Tura amesha, Titiu, ashí tsawant pé*̄*nker wekasatá. Nu natsa wi túramun jú*̄*kiar nunak túrawarmi tusam, nu túrata. Tura anturtamna nu “nekaschapitia” t*̄*i*̄*n tusam, esetsam enentáimsam, Yus-Chicham tana nu ímiatrusmek jintintiata. Nú túrakmi*̄*nkia, Yus-Chichaman nakitiana nu shuar “Titiu ná*̄*nkamas chichaawai” títia*̄*j tukamá, natsa*̄*amak tujintramkattawai.

⁹ Takarin ainia nu, ni takartair*̄*i*̄*n umirkarat tusam jintintrarta. “Shiir enentáimsarum, yajauch áimtsuk shiir umirkatarum” titiá.

¹⁰ “Kasamkairap, tura ana*̄*nkawairap. Iis, pé*̄*nker túrakrumka, takarniuiti-atrum, shiir tura asarum ii Uwemtikramin Yusr*̄*i chichamen shí*̄*iraiti, tu enentáimtikrattarme” titiá.

¹¹ Yus in waitnentrama asa ashí áentstin uwemtikramprataj tusa wakerutmaji.

¹² Kame Yus waitnentrama asamtai, tunáa ana nu iniaisatniuitji, nu nékaji. Tura ju nunkanmaya yajauch ana nu wakerukchatniuitji. Tura antsu ju nunkanam pujayatrik esetsar enentáimsar ana*̄*nma wekatsuk tuke tsawant Yus anear wekasatniuitji.

¹³ Túrar ii Yusr*̄*i Jesukrístu, uwemtikramajnia nu, imiá shiir iwiarnar tatí tusar nákastiniaitji.

¹⁴ Jesukrístuka in jarutramkamiaji, ii tunaar*̄*ni*̄*a uwemtikrampratajtsa. Tura, Winia ajaras tuke enentá*̄*i*̄*ia*̄*i pé*̄*nker túrawarat tusa, ii tunaar*̄*i*̄*n japir-tampramajji.

¹⁵ Titiu, anaikiamu asam arantutsuk nu jintintrata. Yajauch ana nuna túrawar*̄*i*̄*n tusam chicharkarta. Pé*̄*nkeran túruinia nu ikiakárta. Tura yajauch chichartukar*̄*i*̄*n tusam tuke pé*̄*nker wekasata.

3

Yus-shuarti túratin

¹ Titíu, shuar enentáimtikrarta. “Ashí akupin ainia nusha tura chikich uunt akupena nusha antukrum umirkatarum” titiá. ““Pénkeran túratin ana nuna páchitsuk túrattajai” títiniaitrume” titiá.

² “Tsanumprairap, kajernaikiairap, antsu shiir enentáimtunaistarum” titiá. Nankaamantu enentáimtumatsuk ashí shuar péñker awajsatarum tusam tu jintinrarta.

³ Warí, iisha núnisrik Yus-shuar ajatsuk náñkamsar wekaimji, Yuska umirt-suk. Tura íwianch emetamu pempée wekaimji. Tura ii ayashi wakeramu tuke túriniuyaji. Tunaasha túriniuyaji. Chíkich atankittsar wakeriniuyaji. Chíkich shuar kajerkar tura nuamtaksha kajernainiuyaji.

⁴ Túrasha Yus in uwemtikkiartin ana nu, anenkratin asa, ni anenkrattairin ashí áentsun iniaktus in uwemtikrampramijai.

⁵ Yus in waitnentrana asa, iikia júkesha péñker túrachma aín uwemtikrampramijai. ¿Itiurak uwemtikrampramijai? Íi tunaarin asakátrampramijai, niji-aktinia áintsan. Tura Yusa Wakanj pujurtamkurin, ii iwiaakmarin yamarman amasmaji.

⁶ Jesukristu jakamujaj Yus in emeenturmatsuk ni Wakanin suramsamijai.

⁷ In anenma asa nuna túramiyai. Nuñkia iisha yamaram awajsamu asar tuke iwiaaku átin, ti wakerimij nu íiniuiti.

⁸ Nuka ti nekasaiti. Tuma asamtai Yúsan umirkarmia nu, péñker túratniun tuke wakerukat tusam tuke jintinki wetá. Wi tímiajna nu, péñker asamtai, ashí aents nuna nekaatniun atsumainiawai.

⁹ Shuar netse áujmatainiakui ameja pachisaip. Tura “aya winia úuntruk péñker áiniawai” tu chichasaip. Tura Israer-shuara akupkamurj ititurkit tusa shuar ti áujmatainiakui nusha pachisaip. Ántraiti nuka. Péñker wekasatniun yayatsui.

¹⁰ Shuar tsanumprur yajauch enentáimtunaimtikiana nu chicharkata. Ántachkuinikia ataksha chicharkata. Tura penké tujinkiamka jiki akupkata.

¹¹ Nujaj juna nekaamniaitme: nuna tura asa awajiruiti. Tura ni tunaarinin jakattui.

Papru wakerana nu

¹² Wisha Artemasan akatran akuptukchatjameash. Nin akupeachkunka Tíkikiun akuptuktatjame. Nii jeamtai amesha wari winitritia Nekapuris péprunam. Juí Nekapurisnum yumí nantu asamtai seturan pujuttajai.

¹³ Senas, chichaman ti unuimiaru pujana nu, amikiur Apurusjaj jeamtai, nii atsumtsuk shiir weartí tusam, ame túratin jeamna nu yainta.

¹⁴ Iiní Yus-shuar ainia nusha péñker túratniun tura atsumainia nunasha yáintinian nekaawartí. Antar pujusarain tusan nuna tajai.

¹⁵ Ashí wijjaj pujuinia nu amikmaatmainiawai. Tura ii amikri Yus-shuar ainia nu amikmaatruata. Atumniasha Yus shiir yainmakat tusan wakera-jrume. Nuke atí.

Papru JIRIMIÚÑKAN papí áatramu

Papru Jirimiúñkan papin áatramiania nu

¹ Wi Papru ju papin áaran akuptajme ámin, Jirimiunká. Ii yachi Timiutéusha juna akupturmawai. Wi Jesukrístu takaru asan sepunam pujajai. Ame iijjai tsaninkia takáa asakmin ju papin akuptajme.

² Núnisan ame jeemiin Yus-shuar irunainia nunasha tura ii umai Apiancha tura Arkipiuncha iijjai ti kakaram takasu asamtai ju papin akuptajrume.

³ Yus ii Apari tura ii Uuntri Jesukrístu shiir enentáimturma ásar yainmakarti imiatkinchanum tuke shiir pujustinian.

Jirimiún péñker Yus-shuar ámiayi

⁴⁻⁵ Ame Uunt Jesus shiir enentáimtakum ashí Yus-shuar ainia nusha aneamun antukjai. Nuna antukan ámin ti shiir enentáimtakun Yúsan áujeakun yúminkiajai.

⁶ Áujeakun chíkich shuarsha ámijjai métek Yúsan nekas enentáimtuiniak ashí péñker ana nuna ti paant nekaawarat tusan seajai. Ashí péñker ana nuka Jesukrístu shiir awajsamujai takakji.

⁷ Wisha ame anekratmajai ti shiir enentáimtakun waraajai. Yatsurú, ámijjai ashí Yus-shuarsha shiir enentáimiainiawai.

Papru Unisemun waitnentratniun Jirimiúñkan seamiani nu

⁸ Nu asamtai kakaram tátsujme. Kame wakeraknaka Kristu akatramu asan “Ju túrata” tíminiaitjiame.

⁹ Antsu aneakun aya júnisan tájame. Wi Papru úuntach asan tura Krístun takarkun sepunam pujakun

¹⁰ Unisemu waitnentrai tusan seajme. Niisha wi ujakmajai Yus-shuar ajasu asa winia uchirua áintsankete. Sepunam pujayatan ni aparíya áintsanak ajasjai.

¹¹ Nuikkia Unisemu ántrauyi antsu yamaikia aminiisha winiisha yáimniuiti.

¹² Ataksha awantajme. Wi ti penker aneamu asamtai péñker itiaata.

¹³ Wi Yus-Chichaman étserkun sepunam pujajai. Túmakun ame yajá pujakun yáintkiatin tujintiakmin nii antsu wijjai pujus yáintkiat tusan wakerimjai.

¹⁴ Túrasha ámin ujatsuk túrachmin enentáimpramjai. Kame ame wakerakum útsukchamujai “pujustí” tákumninkia maak.

¹⁵ Júnissha enentáimpramniaiti. Unisemu ishichik tsawant menkakamai tura yamaikia waketki ámijjai tuke pujustatui.

¹⁶ Kame yamaikia emetachma antsu ame aneamu yátsumeá áinis átatui. Nuka ti péñkerchakait. Wisha nin ti aneajai. Tura yainmakmin asamtai tura Krístunam ame yatsum ajasu asamtai winia iniankattsam aneashtapash.

¹⁷ Wisha ti penker amikrumchakaitiaj. Tuma asam winia itiaarua nútiksam shiir awayáta.

¹⁸ Yajauch awajtamkaitkiuinia tura ámijjai tumashitkiuisha wi akiktatjai.

¹⁹ Wi Papru nekas winia uwejrujai juna áaran ti nekas akiktatjame tájame. Túrasha winia tumashitmena nuna páchittsujme. Kame wi ujakam Yus-shuar ajaschamkun.

²⁰ Wátsek, yatsurú, amesha Yus-shuar asam wi seajme jú túrutata. Kristu enentáimtakum shiir enentáimtikurta.

²¹ Ti penker uminiaitme nuna nékakun júnisan áatjame. Tura wi seajmena nuna nankaamas túrattamna nuna nékajai.

²² Ayu. Átum Yus áujturkurmin Yus winia tsan̄katruktatui atum̄ijn iiraitniun. Tuma asamtai wi nūj jean pujustin iwiarturata.

Amikmaamiania nu

²³ Épaprassha niisha Jesukristunu étseruk sepunam wijiai pujus amikmaatmarme.

²⁴ Núnisañ Márkussha Aristárkusha Témassha tura Rúkassha Yus-Chichaman etserkatniun yáintiainia nusha amikmaatmainiawai.

²⁵ Ii Uuntri Jesukristu atumniasha ti shiir yainmakarti.
Nuke atí.

ISRAER-SHUARAN papí akuptukma

Yus ni Uchirijjai ni chichamen ujamakji

¹ Yáunchuka Yúsnan etserniujai chichas Yus ni enentáimmian ii úuntrin ujamaiyi. Tura untsurí nunkanmasha tura untsurí uwitíncha niisháa niisháa chichas ujamaiyi.

² Antsu ju amúamu tsawantaikia ni Uchirí Jesukristujain ashí Niiniu ana nuna ujamakji. Yus Niijjai ashí írúnna nuna najana asa mash Nin súsaiti.

³ Níyaiti Yúsan imiá métek nakumeana nu. Tura Níyaiti Yus nankaamas shiira nuna paant awajeana nu. Niisha aya ni chichamejai kakarma nujai ashí írúnna nuna wáiniuk emeta pujurui. Tura ii tunaarín nijiatramak akupin pujutainium, Yusa untsuurini, pujusmiayi.

Nayaimpinmaya suntarjai Kristu nankaamantuiti

⁴ Yusa Uchirí nayaimpinmaya suntarjai imiá nankaamantu awajnasuiti. Tura ti nankaamantu asamtai Yus nayaimpinmaya suntar nankaamas Nin ti shiir awajtawai.

⁵ Wátsek, nayaimpinmaya suntaran chikichkinkesha juna tútsuk Krístun tímiayi:

“Ame winia Uchiruitme. Túmaitkiui yamáikia winia kakarmarun átakeajme.”

Tura núnisan tímiayi:

“Wi ni aparí átatjai, tura Nii winia uchir átatui.”

⁶ Tura jú nunkanam ni Iwiairín akupeak tímiayi:

“Ashí Yusa suntarí tikishmatrarti.”

⁷ Nayaimpinmaya suntarnan júnis chicharui:

“Nayaimpinmaya suntarín takartursarat tusa nasea áintsan awajsaiti. Ni suntarín chárpia áinis akupeawai.”

⁸ Antsu ni Uchiríniun tímiayi:

“Ame, Yusá, tuke akupniuitme. Ame akuptairmesha aya péñkeraiti.

⁹ Péñkera nu anenaitme, tura yajauchia nu muíjniuitme. Tuma asamtai ashí shuar shiir warartamu asamtai Yus, ame Yúsrum, ashí akupniujai nankaa-mas uunt awajtamsaiti.”

¹⁰ Nu arantcha tawai:

“Uuntá, yámankamtaik Ame ju nunka najanamiame. Túram ame uwejmijjai nayaimpisha najanaitme.

¹¹ Nusha mai amuukarmataisha Ame tuke pujuttame. Tarachjai métek mamurartatui.

¹² Tura ipijram ikiustatme. Pushiya áintsam yapajiáttame. Túrasha Ámeká núnismek átatme. Játsuk tuke pujuttame.”

¹³ Ataksha tímiayi:

“Akupin pujutainium, winia untsuuruini, pujusam nákarsatá. Ame nemasru-min nupetkan Ámin umirtamkarti tusan amastatjai.”

Núnisan nayaimpinmaya suntaran penké tíchamiayi.

¹⁴ Antsu Yusa suntarí wakan áiniak ashí shuar uwemprartatna nuna yáinkiarat tusar Yus akupkamu áiniawai.

2

Anearta. Uwempratin Chicham nakitrashtiniaiti.

¹ Nuikia Kristu ti uunt asamtai ashí Niiniu antukajnia nujaj kanakchatin ti enentáimtustiniaitji.

² Yaunchu nayaimpinmaya suntar Muisaisan súsarmia nú akupkamu nekas uminkiatniuyayi. Shuar umitsuk tunaan túramtai ti kakaram asutniáwarmiayi.

³ Antsu ii Uuntri Krístuka Uwempratin Chichaman emka itiamiayi. Tura imiá nekas tuíniak Nin anturkaru in ujatmakarmaji. Tuma asamtai Uwempratin Chicham nakitiakrikia nuna nankaamas uwemtsuk asutniáttaji.

⁴ Kame nu arantcha, Uwempratin Chicham ujatmainiakrin imiá nekas tuíniawai tusa aents túrachminian kakarman Yus iniakmasmiayi. Núnisan ni Shiir Wakanj ni wakerana núnisan niisháa niisháa kakermajaj takamtikeawai. Nujaj Yus-Chichama nu paant nekanamniaiti.

Jesukrístu aents ajasmania nu

⁵ Ayu. Nuik áujmatkur “jú nuńka amuukattawai” taji. Tura yamaram nunkanam nayaimpinmaya suntar akupkachartatui.

⁶ Antsu ii akupkattajnia nu, Yus-Papinium áarmaiti:
“¿Shuarti warimpiaitaj ame imiá enentáimtitniusha? Kame, ¿shuar warí asamtai pujursataj tamea?”

⁷ Ishichik tsawant nayaimpinmaya suntarjaj péejchach awajsamiame. Túram ti shiir nankaamas uunt awajsattame. Ame najanamun ashí akupkati tusam tsankatkattame.

⁸ Ashí nin umirkarti tusam susattame.” Tu áarmaiti.
Yus “ashí nin umirkarti” takui nin umirkashtinkia atsawai. Túrasha yamaikia ashí umirainiaka wáintsuji.

⁹ Tura wáinjinia nu Krístuiti. Niisha aents ajas ishichik tsawant nayaimpinmaya suntarjaj péejchach ajasmiayi. Yus ni shuarin ti aneak jarukarti tusa wakerimiayi. Tura ni wáitias jakamujaj yamaikia ti shiir nankaamas Uunt awajsamuiti.

¹⁰ Ashí írúnna nu Yus najanamun ásar ni wakeramun umiktin ainiawai. Tura ashí ni uchirjsha ni shíirmarj pachiinkiarat tusa wakerawai. Tuma asa Yuska Jesukrístun, nu shuaran Uwemtiknia nuna, ni waitsmujaj nekas Uwemtikiartin awajsamiayi.

¹¹ Yusna atí tusa shiir awajsamuncha tura Kristu nin shiir awajea nunasha Yuska mai metek ni Aparinti. Nu asamtai Yusa Uchirj nu shuaran “yatsur” títinian natsantatsui.

¹² Yus-Papinium núnisan tawai:
“Ame náarmin winia yatsurun ujakartatjai. Ashí iruntramunam kantampruattajme.”

¹³ Ataksha ni shuarijjaj métek enentáimtamun tawai:

“Yúsan ti shiir enentáimtustatjai.”

Tura ataksha:

“Yus surusmia nú uchirjaj Yúsan umirkun pujajaj” tawai.

¹⁴ Tura nu uchi aents ásarmatai núnisan Jesussha aents ajasmiayi. Tura aents ajas jaka, iwianchin, jatai nérenniurj, ashí emesramiayi.

¹⁵ Tura ti untsurj shuaran uwemtikrarmiayi. Nu shuar yaunchu jákatniun ashamainiak tuke wáitin ármiai. Antsu ni jakamujaj yamá ankant ániawai.

¹⁶ Maa, imiá nekasaiti, nayaimpinmaya suntaran yáintaj tusa táchamiayi. Antsu ashí Apraám weean, ashí Yus-shuar ainia nuna yáintajtsa támiayi.

¹⁷ Túratin asa penké métek ni yachía áinis ajasmiayi. Nujaj in tuke waitnentrampnamniaitji. Tuma asa Yúsnan pujurniu uuntri ajas Yúsan tuke

pénker chichartamsamniaitji. Núnisañ murikiun maa Yus súsatniua áintsañ ni jakamujai ashí shuara tunaarín tsañkurniuiti.

¹⁸ Tura imia nin̄ki waitsa asa tura íwianch nekapsamu asa yamaikia iisha wáitiakrincha tura íwianch nekapramkurnisha yainmakminiaitji.

3

Jesus Muisaisjaisha nan̄kaamantuiti

¹ Tuma asamtai, pénker yatsuru, atumniasha Niiniu atí tusa Yus achir-makuitrume. Tuma asarum Kristu Jesus pénker enentáimtustarum. Niisha Yus nekas Akatramuyayi. Tura ashí Yus-shuar ajararua nujai Yúsnañ pu-jurniu uuntria núnisaiti.

² Nu atí tusa Yus anaikiamiayi. Túramtai Kristu nuna ti pen̄ker takasuiti. Núnisañ Muisais ashí Yusa aentsrín, Israer-shuar armia nuna ti shiir wainki-amiayi.

³ Túrasha Muisaisjai nan̄kaamas Kristu ti shiir awajnasuiti. Jeajai nan̄kaamas jea jeamniuka nekas pénkerchakait. Núnisañ Kristu Muisaisjai nan̄kaamas pénkeraiti.

⁴ Kame ashí jeañ shuar jeamtsuk. Tura Yus ashí írúnna nuna najanaiti.

⁵ Wats. Muisais Israer-shuaran wáiniuk Yusa Jeen takastinia áintsañ pénker takarniuyayi. Tura ni takaak ukunam Yus títiatna nuna etserkatniuyayi.

⁶ Túrasha Kristu Yusa Jeen takarniuchu asa antsu Yusa Uchiri asa nui ashí akupeawai. Nu jeasha iitji. Tura tuke iniaitsuk kakaram ajarar Yus suramsattaj nu wararsar nákastiniaitji.

Yusa shuari shiir pujustin

⁷ Nu asamtai, Yusa Shiir Wakanj Yus-Papinium tawai:

“Yamaikia, Yus tana nu ántakrumka

⁸ nakittsuk shiir anturkatarum. Israer-shuar yaunchu aents atsamunam wekainiak Yus taman nakitrar Yúsnañ nekapsar akajkarmiaiyi.

⁹ Túramtai Yus tímiayi “Nui atumí uuntri nekaprutar akajtukarmiaiyi. Kuarenta (40) uwitin wi kakaram túramun ísarsha nakitrurarmiaiyi.

¹⁰ Tuma ásarmatai nu shuaran kajerkan tiarmajai “Nu shuar ni enentáin tuke awajiniawai. Tura Wi taman umirkatniun nakitiainiawai” tímiajai.

¹¹ Tura kajerkan nekas tákun “Wijjai shiir pujustinian penké tsañkatchartatjai” tímiajai” tímiayi Yús.”

Tu áarmaiti.

¹² Anearta, yatsuru. Yajauch enentáimsarum tuke iwiaaku Yus enentáimtutsuk kanakiirap.

¹³ Kame kashinkia tunaajai anannam enentáimin Yúsnañ nakitrashtapash. Tuma asamtai yamaik tura ashí tsawant ikiakánairatarum.

¹⁴ Yámankamtaik Kristu shiir enentáimtusmaj núnisrik tuke iniaitsuk émeteakrikia Krístujai shiir tsan̄nkjar pujustatji.

¹⁵ Nu asamtai Yus-Papí tawai:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman nakitrarua núnisrum ajarairap.”

¹⁶ Muisais Ejiptu nun̄kanmaya jiīkmia nú shuar Yusa chichamen anturkariat nakitrarmiaiyi.

¹⁷ Tura umiiniachkui kuarenta uwí kajerarmiaiyi. Tunaan túrawaru ásar untsurj shuar aents atsamunam kajin̄kiarmiaiyi.

¹⁸ Kame umirkacharunka Yus “Wijjai shiir pujustinian penké tsañkatchartatjai” tímiayi.

19 Iis, Yúsan enentáimtachu ásar Nijjaj shiir pujustinnium wayatniun tujinkiarmaiya.

4

1 Nu asantai, ii wayatin tsankatkamu áyatar Yusjaj shiir pujustinnium páchitkiachu aij tusar aneartiniaitji.

2 Yaunchu nu shuaran ujakarmia núnisañ incha Uwempratin Chichaman ujamakuitji. Nu shuar Yúsan enentáimtutsuk antukaru ásarmatai nu chicham yáincharmaiya.

3 Antsu iikia ni chichame enentáimta asar Yusjaj shiir pujustinnium nekas wayaji. Tura chikichan Yus tímiayi:

“Nu asantai kakerkan nekas takun “Wijjaj shiir pujustinian penké tsankatkachartatjai” tímiajai” tímiayi. Kame Yus jú nuñkan najana umik nuyá shiir pujus ayampramiayi.

4 Yus-Chichamnum ayampramun júnis tawai.

“Yus sais tsawant takakmas nuyá tsawantaj ayampramiayi.”

5 Tura ataksha tawai:

“Wijjaj shiir pujustinnium wayá ayamprashtatui.”

6 Shuar nuj wayawar ayampratin tuke awai. Tura emka Uwempratin Chichaman antukarmia nuka umichu ásar wayacharmiayi.

7 Nu asantai ataksha Yus wayatin tsawantan áanturmaitji. Nusha yamá tsawantaiti. Wats, Israer-shuar ni nuñké Yus susamunam wayáwarmiayi. Tura nuna ukunam Uunt Tawit timiajai Yus ni chichamen ujamaj:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman nakitrarua núnisrum ajasairap” tímiayi.

8 Kame ni kapitiantri Jusué Israer-shuaran ni nuñkeñ awayá ayamtikraitkiuinkia Yus ukunam ataksha tsawantan áanturmachajji.

9 Nujaj páantaiti, ashí Yus-shuar Yusjaj shiir pujusar ayampratin tuke awai.

10 Yusjaj ayampra nu, ni kakarmarijjaj takastinian ayampraiti Yus ni takatrijjaj ayampramia núnisan.

11 Nu asantai iisha Yusjaj shiir pujustinnium pachiinkiachaj tusar Yus shiir enentáimtusar kakaram ajastiniaitji. Israer-shuar yaunchu Yus taman nakitrarua núnis ajaschatniuitji.

12 Yusa chichame iwiaaku chichamaiti, imiá kakarmaiti. Puniá mai érea núniniaiti. Tuma asa shuara enentáin inít wayá ashí ni enentáimmian tura wakeramurin ti paant awajtai.

13 Yus najanamuka penké Nin umprukchamniaiti. Ashí írunna nu Yus íimmianum misúa áintsañ paant áiniawai. Tura ii túramu ashí paant ujakartatji.

Jesus nekas Yúsnan pujurniu úuntriinti

14 Jesus Yusa Uchirj nekas Yúsnan pujurniu uuntri ajas Yusaj wayá iiniun chichartamji. Nu asantai iniaitsuk tuke nekas enentáimtustiniaitji.

15 Niisha iijjaj métek ashí tunaanum nekapsamuiti. Túrasha tunaan túrachmaiya. Tuma asa ii tujintiaj nuna paant nékak ii itiurchatrin waitnentramniuitji. Tura Yúsnan pujurniu uuntri asantai

16 Yús-akuptainium shiir enentáijjaj sapijmiatsuk jeamniaitji. Tura Yus in anenma asa waitnentramak itiurchat pujajnia nuj yainmaktatji.

5

1 Tura Yúsnan pujurniu úuntriikia shuar anaikiamuiti tura ni takatrijjiamaraiti. Yusaj shuaránan chicharsatniuiti. Nuyasha Yus suíniamun súsatniuiti tura núnisañ namañken maa Yúsan súsatniuiti shuara tunaarín asakátratniun.

² Tura Yúsnan pujurniu uuntri niisha shuar asa ni tujintiamun nékak shuar nékachuncha tura waak yujainia nunasha waitnentrarniaiti.

³ Tura niisha tujintia asa ni tunaaríncha chíkichnajai métek tsan̄kurnarat namañken maa Yúsna súsatniuiti.

⁴ Shuar ni enentájjiaínkia Yúsna pujurniu uuntri ajaschamniaiti. Antsu Yus nu shuaran anaikiatniuiti. Núnisan Arun̄kan anaikiamiayi.

⁵ Núniskete Krístujai. Niisha ni enentájjiai Yúsna pujurniu uuntri ajaschamiayi. Antsu Yus Nin anaik nujai shiir awajsamiayi. Tura tímiayi: “Ame winia Uchiruitme. Túmaitkui yamaikia winia kakarmarun átakeajme.”

⁶ Tura ataksha Yus-Papinium júnis tawai:

“Mirkisetékka Yúsna pujurin amia núnismek Amesha tuke Yúsna pujurin átatme.”

⁷ Kristu jú nun̄kanam pujak kakantar útuk Yúsna ti seamiayi. Nin jákatniunmaya uwentikramnia asamtai seamiayi. Tura Yusa wakeramurín tuke enentájjiai enentáimtakui Yus anturak ti yáin̄miayi.

⁸ Nujai Kristu Yusa Uchiríntiat ni wáitsatniujai umirkatniun unuimiarmiayi.

⁹ Nujai ti nekas Uwemtikin ajasmiayi. Tura shuar umirainia nuna tuke uwem ataksha Yus-Papinium júnis tawai:

“Mirkisetékka Yúsnantikrarminiaiti.

¹⁰ Túramtai Yus Nin Yúsna pujurniu uuntri Mirkisetékjai métek awajsamiayi.

Anearta. Yusjai kanakchatniuiti.

¹¹ Ju ti nukap áujmatsatin awai. Túrasha ántichu asakrumin mashi ujakchamniaitjiarme.

¹² Átumka yaunchu mash nekaamaintrume. Túmaitiatrum ataksha yaitiás Yúsna jintintruat tusarum atsumarme. Warí, kuirchia núniniaitrume. Kátsuram yútsuk muntsu muntsúatniuitrume.

¹³ Kuírchikia Uwempratin Chichaman áujenak péñker unuimiainiatsui. Tinkiamnumiá ásar tujintiainiawai.

¹⁴ Apatuk kátsurman aya uunt yuámniaiti. Uunt ainia nuka péñkernasha tura yajauchincha apatkar paant nékainiawai.

6

¹ Uunt ajastai. Krístunu ana nuyá aya yúpichuchia nuke enentáimtutsuk nu arantcha unuimiartai. Kame emka unuimiartinia nu ju áiniawai: shuar ni tunaarín jákatniunam júana nuna kúntuts enentáimtur Yúsna shiir enentáimtustincha,

² imiantinnium nekaatniuswai:

“Mirkisetékka Yúsna, Yus-shuar yain̄manum uweje awantsatniusha, jakamunmaya nantaktincha, tura sumamtikiatin tsawanta nu nekaatniusha.

³ Tura Yus yáinmakrin nuna nan̄kaamas nekaattaji.

⁴ Shuar Yusna nuna nekaan̄ka tura Yus susamun takakkun̄ka tura Yusa Shiir Wakan̄ kakarmarín nekapsaitkiun̄ka

⁵ tura Yusa chichamen̄cha péñkeraiti nekaan̄ka tura Yusa kakarmarī ukunam nun̄ka yamarmanum takastatna nuna yamá nekapeakka,

⁶ nu shuar nuna nakitiak kanakniaka atak ni tunaarín enentáimtak ikiuktinian wakerachuk tujinkiattawai. Warí, ní enentájjiai Yusa Uchirín krúsnum máiniaiti túrak ashí íimiainiai natsanmain awajeawai.

⁷ Nu shuar yajauch nun̄ka áintsan̄ áiniawai. Yumi yútakui péñker nun̄ka arakan péñker tsapatmakka arakmaun yayawai. Túramtai Yus shiir enentáimiui.

⁸ Antsu jaṅkí nupan tsapatmakka nu nuṅka yajauchiiti. Yus áeseak emes-rattawai.

Yus tsan̄katramkattajnia nu enentáimtakur kakaram ajaji

⁹ Aneamu yatsurú, tu chicharkursha, nú shuarchaitrum nu nékaji. Antsu uwempra asarum nú péṅker túrattarme.

¹⁰ Yus ti péṅker asa átum takasmancha tura ni aneakrum Yus-shuar yainmancha kajinmatkishtatui. Tura yamaisha tuke túrarme.

¹¹ Tura nuik túrarmena núnisrumek tuke iniaitsuk kakaram takasrum ashí Yus tsan̄katramkatta nu wáinkiatarme. Núnisaṅ atí tusar wakeraji.

¹² Nakimtsuk kakaram ajastarum. Niiniua nuna Yus ni shuarin susat-tawai. Tura shuar Yúsan enentáimtak shiir enentáijjai nákakka nuna wainki-attawai. Tu takastarum tusar wakeraji.

¹³⁻¹⁴ Yus yaunchu Apraámjai chichaak “Ti nekas shiir awajsattajme tura ti nukap pampamtikrattajme” tímiayi. Nuna taku imiá nekas tajai tusa tura chíkich Niijjai nan̄kaamas uunt atsakui imia Niṅki pachiiimas tumammiayi.

¹⁵ Tutai Apraám yáitmataik nákas Yus timia nuna wáinkiamiayi.

¹⁶ Shuar “nekas tajai Yus írui” tákuṅka chíkich niijjai nan̄kaamas úuntan páchiawai. Tura tu chichasmataiṅkia nuyáṅka imiá nekas tana nu nekaam-niaiti.

¹⁷ Tuma asamtai Yuska “ti nekas yapájítsuk túrattajai” tusa imia Niṅki pachiiimas tumammiayi. Nujai ni tsan̄katkamun júkiartatna nu shuar Yus ti nekas umiktatna nuna nékainiawai.

¹⁸ Yus penké wáitruachmin asa áyatik ni tamajai nekasaiti. Nuna arant nuikia imia Niṅki pachiiimas ti ikiakátmaji in. Nujai iisha uwempratai tusar Niini weamkatikia tsan̄katramkattajnia nu ti shiir enentáimsar wáinkiatin nákaji.

¹⁹ Nu enentáimsar kakaram ajaji. Yusaiya in umuchtiamkamnia penké atsawai. Yusai áchitkia asakrin ti kakaram emettamji.

²⁰ Jesussha emka Yusai wayá mash iwiarturmaji. Tura Mirkiseték amia núnisaṅ Niisha yamá tuke amuukashtinian Yúsnan pujurniu uuntri ajasuiti.

7

Mirkiseték amia núnisaṅ Jesussha Yúsnan pujurniu uuntri ajasuiti

¹ Nu Mirkisetéksha Sarem nuṅkanam akupniuyayi. Tura ashí nan̄kamas kakaram Yúsnan pujurniuyayi. Apraám chíkich akupniun mesetjai awakak támatai Mirkiseték jiintiuki in̄kiun ti shiir awájsámiayi.

² Túramtai Apraám nupetmakar kuit jukimiun tias (10) akantuk susamiayi. Mirkisetéka naarj tana júka “ti penker uunt akupin” tawai. Tura Saremka “ti shiir imiatkincha” tawai. Tura Mirkiseték Sarema akupniuri asa “ti shiir imiatkinchanum akupín” tawai.

³ Nukurisha aparisha Yus-Chichamnum atsawai. Núnisaṅ ni uuntri sha atsawai. Ni akiiniamurincha ni jakamurincha ujaatsui. Tuma asamtai Yusa Uchirjá áintsan tuke iniannakchatniun Yúsnan pujurniu uuntri ajasuiti.

⁴ Mirkiseték timiá uuntauya nu enentáimprata. Ii uuntri Apraámsha nupet-makar kuit jukimiun tias akantuk susamiayi.

⁵ Tuma asamtai Apraám nan̄kaamas úuntaiti. Muisais akupkamujai Riwi weeáka Yúsnan pujurin áiniawai. Niisha ashí Israer-shuarjai métek Apraám weeá áiniawai. Túmaitiat penké Israer-shuar ni waririn tias akantuk Riwi shuaran suu ármiayi. Muisais tu akupkamiayi.

⁶ Túrasha Mirkiseték Riwí weeachunak Apraám tiásan akantuk nin susamiayi. Apraám Yus shiira nuna tsan̄katkamuitiat Mirkisetékan niijai uunt asamtai susamiayi. Túram Mirkiseték Apraáman shiir awajsamiayi.

⁷ Imiá nekas Mirkiseték Apraáma nan̄kaamas páantin asa Apraáman shiir awajsamiayi.

⁸ Israer-shuarti tias akankamun súajnia nú shuar aya aents ásar tuke pujuschamin ániawai. Antsu Mirkiseték jakamun Yus-Chicham pen̄ké ujaatsui.

⁹ Yamái Riwí weeá shuar kuit akankamun achiktin ániawai. Túrasha Apraám Mirkisetékan súakui Riwí weeá nujai susa ániawai.

¹⁰ Apraám weeá ániak ni ayashía ánis enentáimtusmin ániawai.

¹¹ Muisais akupkamunam Riwí-shuarnumiá aya Arun̄ weeá shuar Yúsnan pujurin ármiayi. Niisha Muisais akupkamu timia nujai métek pen̄ké shuarjai takasarmiayi. Tura Riwí-shuarnumiá Yúsnan pujurniu takatrijiai tunáa nekas asakárminiaitkiuin̄kia Yúsnan pujurin yamarmak, Arun̄ weeachu, anaiki-ashtin ainti. Túrasha Yus Jesusan, Mirkiseték amia ánis, Yúsnan pujurniun anaikiaiti. Nusha Arun̄ weeachuiti.

¹² Tura Yúsnan pujurin yapajniámtai Muisais akupkamusha yapajniátniuiti.

¹³⁻¹⁴ Nu arantcha, ii Uuntr̄i Jesukrístu Riwí-shuarcha antsu Jutá-shuarauyayi. Tura Muisais akupkamujai Jutá-shuarnumiá Yúsnan pujurin atsutniuiti. Antsu nuna takatr̄in pen̄ké túrashtiniuyi. Tuma asamtai nújaiisha Muisais akupkamu yapajniátniuiti.

¹⁵ Nú páantcha awajsamniaiti. Wats, Yúsnan pujurin yamarma nuka Mirkisetékjai méteketete.

¹⁶ Niñkia Riwí shuar asa Yúsnan pujurin ajaschamiayi, antsu jákashtin asa nu kakarmajai Yúsnan pujurin ajasmiayi.

¹⁷ Tuma asamtai juna Yus Jesusan áujmatui:

“Mirkisetékka Yúsnan pujurin amia núnismek Amesha iniañnatsuk Yúsnan tuke pujurin átatme.”

¹⁸ Nujai yaunchu akupkamu pen̄kercha ajasmatai japirmaiti.

¹⁹ Muisais akupkamuka shuáran pen̄ker awajsachminiuyayi. Antsu Yus in ti shiir awajtamsattajnia nu nákaji. Nujai Yusaj̄ ti shiir jeeáit̄ji.

²⁰ Nunasha Yus “nekas tajai” tusa Niñki pachiimias tumammiayi.

²¹ Riwí-shuarnumiá Yúsnan pujurin Yusa naarī pachitsuk anaikiamu ármiayi. Antsu jú̄ Yúsnan pujurniunka Yus imia Niñki pachiimias anaikiamiayi. Tura Nin jú̄nis tímiayi:

“Uuntka imia Niñki pachiimias tiniu asa pen̄ké yapajjáshtatui. Niisha “Mirkisetékka Yúsnan pujurin amia núnismek Amesha tuke Yúsnan pujurin átatme” tímiayi.”

²² Tuma asamtai Jesuska nekas uwemtikrattajai tusa yaunchu amia nujai nan̄kaamas pen̄ker Chichaman iwiarturuiti.

²³ Yaunchu Yúsnan pujurin untsurí ármiayi. Chíkich jakamtai chíkich tuke takaarmiayi.

²⁴ Antsu Jesus tuke jákashtin asa chikichan ikiurkishtatui.

²⁵ Tuma asa tuke iwiaaku pujak ni shuar̄in tuke Yúsan áujtusminiaiti. Tuma asa shuar Nin enentáimtusar Yusaj̄ weankarun tuke uwemtikramniaiti.

²⁶ Tuma asa Jesus Yúsnan pen̄ker pujurin asa ii atsumajnia núkete niisha. Niisha ti shiir asa pen̄ké tunaarinchaiti. Ashí tunaariniunmayá kanakniuiti. Tura Yusjai métek Uunt ajasuiti.

27 Niisha yaunchu Yúsnan pujurniu uuntri armia núnikchaiti. Yaunchua nuka murikiun máawar ashí tsawant Yúsan suu ármiayi. Nujai emka ni tunaarin nuyá ashí shuara tunaarin asakátin ármiayi. Tura Jesuska jákatniunam chikichki surumak ashí shuara tunaarin asakátramiayi.

28 Muisais akupkamuka penké shuarnak tuke penkercha aın Yúsnan pujurniu úuntrin anaikiaiti. Tura nu ukunmanka Yus, nekas nınki pachiimias, ni Uchirın, tuke penkera nuna, Yúsnan pujurniu úuntrin anaikiaiti.

8

Nankaamas penker Chichaman Jesus takartamji

1 Nekas juna tájame: Yúsnan pujurniu uuntri Jesus in ti shiir yainma asa akupin pujutainium Yusa untsuurini nayaimpiniam pujusuiti.

2 Nekas Yusa Jee nayaimpinma nu aents najanachma antsu Yus najanamuiti. Nui Jesus Yúsnan pujurui.

3 Ashí Yúsnan pujurniu uuntri ainia nu, shuar Yúsnan susamuncha tura naman maar Yus sútaincha Yúsan ashí súsatın ániawai. Núnisan Jesukrístusha Yúsan súsatniuiti.

4 Juyá Yúsnan pujurin Muisais timia nuna Yúsan yamaisha susamin akui Jesus ju nunkanam pujakka Yúsnan pujurin áchainti. Antsu nayaimpiniam takaawai.

5 Yus yaunchu Muisaisan nayaimpiniam írúnna nuna iniaktus tímiayi “Ame wáinkiamna nujai métek ashí najanata.” Túramu asamtai ashí yaunchu Yúsnan pujurin Muisais najanamujai takainia nu aya nayaimpiniam ana nuna nakumkamujain takainiawai.

6 Antsu Jesus ti nekasa nujai nayaimpiniam takaawai. Muisais akupkamuka shúaran penker awajsachminiaiti. Antsu Yus in ti penker awajtam-sattaji. Kame Yamaram Chichamnum Yus ashí túrutmattajnia nu Muisais akupkamunam ana nuna nankaamas ti penker ániawai. Tuma asamtai nankaamas penker Chichaman Jesus takartamji.

7 Kame Emka Chicham, Yus Muisaisjai yaunchu najanamia nu, nekas penkeraitkiuinıkia Yamaram Chichaman najanachayai.

8 Antsu penkercha aınıakui Israer-shuaran tímiayi:
“Uunt Yus tawai: “Tsawant jeamtai ashí Israer-shuarjai Yamaram Chichaman najanattajai.

9 Yaunchu ju shuara uuntrin Ejiptunmayá yaruakmiaj nui Emka Chichaman najanamjai. Tura Yamaram Chichaman najanattaj nu núnischa átatui. Emka nuna uminiachkui ajapan iniaisarmajai.” Núnis tawai Uunt Yus.

10 Tura nu arantcha tawai: “Tsawant jeamtai Israer-shuarjai Yamaram Chichaman najanattaj nuka júnis átatui. Wi akupeajna nuna enentáın paant enentáımtikrartatjai. Nuyá ni Yusrı ártatjai tura niisha Wıi shuar ártatui.

11 Nujısha Yúsan nekaat tusa jintinnaiyachartatui. Kame ni aısha ni yachısha kame ashı shuar, uchısha uuntcha, ashı nekarawartatui.

12 Tura ashı ni tunaarıncha tsankuraran ni yajauchırın atak penké enentáımtuschartatjai” tímiayi.” Tu áarmaiti.

13 Wats, Emka Chicham yajauch ajakui Yus Yamaram Chichaman nájaneak pujurui. Tura yajauch ajasua nuka wárik ajapnattawai.

9

Yusa Jee nayaimpinmasha tura ju nunkanmasha

1 Ayu. Yus shiir awajsatniuka Emka Chicham timia nujai métek túratniuyayi. Tura ju nunkanmayá Yusa Jeeın weriar Yús shiir awajsatniuyayi.

² Nu Jeasha júnis tesakmauyayi. Nékatka Shiir Tesaamu tutainti. Nui asuitin ekeemakar tsáapin awajtaisha tura misasha Yus iniaktusma tantajai pujuyayi.

³ Nuyá-tesaamuka Imiá Shiir Tesaamu tutainti.

⁴ Nui kunkuin ekeemataisha kurijiai kuerma tura Chícham Aarma Chumpitiaisha pujuyayi. Nusha ashí kurijiai kuérmauyayi. Tura init kurijiai najanamu ichinkian maná yurumak enkemniuyayi. Nuyá Yúsnan pujurniu uuntri Arunka ushukrutairi yaunchu tsapaak janukmia nusha enkemniuyayi. Nuyá Yus najanamu Chícham Muisais kayanam aarmasha enkemniuyayi.

⁵ Nuna úkurin Kirupín, nayaimpinmaya suntara nu, kurijiai nakumkamu wajarmiayi. Nusha Yusa shírmairin nakumkarmiayi. Tura ni nanapėjai shuara tunaarin ayamprutain nukúakuyayi. Nuna arantka yamá etserkatin atsumatsji.

⁶ Núnis aa asantai Shiir Tesaamunam ashí Yúsnan pujurin tuke wáiniak Yúsnan takasarmiayi.

⁷ Tura Imiá Shiir Tesaamunmanka aya ni uuntrin wáiniauyayi. Tura niisha ashí uwitin aya chikichik tsawant wayamiayi. Wayak ni tunaarisha tura ashí shuara tunaari tsankurnarat tusa Yus súsatniu namanke numpen juu ámiayi.

⁸ Yusa Wakaní núnis atí tusa nuna mash iwiamiamiayi. Tura asa juna paant awajturmají. Jú nunkanmaya Yusa Jee pujakui tura aya nuiñ Yus shiir awajsamniaitkiuinikia nekas Imiá Shiira nui Yus pujamunam wayatin tuke itiurchat ainti.

⁹ Nusha yamá pujuiniaj nuna enentáimtikrampratniuitji. Shuar Yus shiir enentáimtikratniun namanken maa suíniaksha nu shuar ni tunaarijiai tuke itit enentáimtumainiawai.

¹⁰ Warí, aya yurumatniusha umartincha nijartincha tura ashí núnisan túratniujai aya pátatek asantai enentáiniam ana nuna iwiarachmin áiniawai. Antsu Yus nú túratniunka yapajiatniuyayi. Tuma asantai yapajniátsain túratin áiniawai.

¹¹ Tura yamaikia Kristu táwiti tura Yúsnan pujurniu uuntri ajas Yamaram Chichamnum Yus ti penkeran túrutmatniua nuna pujurturmaji. Niisha ti shiir Yus Jeá aents najanachmanum takaawai. Nu Jeá ju nunkanmayanchuiti.

¹² Tura Kristu Imiá Shiir Tesaamunam namanke numpėjai wayachuiti antsu ni numpejaink' wayaiti. Tura aya chikichkí wayá ii tunaarin asakturmar tuke uwemtikrampramijai.

¹³ Nekas namanke numpesha tura áisamu yunkunmirisha tunáa shuarnum pátatek ukatkamu aya pátatek shiir awajsamniuyi.

¹⁴ Túrasha Kristu numpé ii tunaarin penké asakáruiti. Túramtai yamaikia tunáa jákatniunam júana nujai itit enentáimtumatsuk nekas iwaaku Yus shiir umirkamniaitji. Kristu penké tunaarincha asa tuke jákashtin Wakaní kakarmarijiai jákatniunam Yusai surumakmiayi.

¹⁵ Nu asantai Jesukrístu Yamaram Chichaman shiir takarniuiti. Yaunchu Chichamjai tunáa nekas tsankurachma asantai Kristu jaka nu tunaancha tsankurarmiayi. Nujai ashí Yus-shuarti Yus achikma asar Yus tsankatramajnia nu wáinkiar tuke wararsattaji.

¹⁶⁻¹⁷ Shuar ni kuítrin akantrattak chichaman najanatniuiti. Tura jáatsain nu kuit akantrashtiniaiti. Aya nii jakamtai nu chicham najanamu uminkiatniuiti.

¹⁸ Nu asantai Emka Chicham Muisaisjai najanamusha maamu numpé ukatramujai akupkamuyayi. Nujaisha namān máatniuyayi.

¹⁹ Muisais nu akupkamun ashí shuáran ujakarmiayi. Nuyá ure kapaakujai tura nupajajisha namanké numpé entsajai pachimpramujai ayak akupkamu papincha ashí shuarnasha ukatkarmiayi.

²⁰ Tura tiarmiayi “Ju numpajai “Chícham Yus akupturmarmena nu nekas umiktiniaiti” tawai.”

²¹ Nuyá nu numpajai Yusa Jeencha ashí nu takastin irunmia nunasha ukatkarmiayi.

²² Nu akupkamujai penké ishichik numpajainchu shiir awajsamniaiti. Túrasha numpajainchu tunáa penké asakárchamniaiti.

Kristu jakamujai tunáa asakárminiaiti

²³ Tuma asamtai Muisais najanamunayaimpiniam ana nuna aya nakumkamu ásar namanké numpejai shiir awajsamu ármiai. Antsu nayampiniam nekas írunna nu, nankaamas kakaram numpajai shiir awajsatin ániawai.

²⁴ Kristuka yaunchu Yusa Jeen aents najanamunam takastaj tusa wayachmiayi. Nuka nayaimpinmayan aya nakumkamuiti. Antsu nekas nayaimpiniam Yus pujamunam wayá asa in áujturmajai.

²⁵ Yaunchu Yúsnan pujurniu uuntri ni numpejainchu ashí uwitin Imiá Shiir Tesaamunam wajin ármiai. Tura Kristuka untsurí wayachuiti.

²⁶ Kame untsurí wayatniuitkiuinkia ni numpejainkⁱ wayá asa yámankamtaiknumia untsurí jákaayi. Antsu yamaikia ju nunka amúamunam Kristu chikichkí jákatniunam surumak tunaan ashí asakáruiti.

²⁷ Ashí shuar chikichkí jakar nuyá ni túramun Yusai nekamatniun nantaktin ániawai.

²⁸ Núnisan Kristu chikichkí jákatniunam surumak shuara tunaarin asakáruiti. Tura atakka tunaan asakártinian wantinkiashtatui. Antsu ni tátintriñ nákania nuna uwentikkraatsa wantinkiattawai.

10

¹ Muisais akupkamuka ukunam ti penker átatna núchaiti. Antsu nuna aya nakumeawai. Tuma asa ashí uwitin naman maar Yus sútajjajisha shuara tunaarin asakátrachminiaiti.

² Kame asakátraka shuar nekas shiir awajsamniaitkiuinkia Yus naman maar súsatniun atsumachuk iniaisaraayi. Iis, mash tsankuramuitkiunka ni tunaarijjai itit enentáimtumascharainti. Túrawar naman maar Yus súsatniun iniaisarainti.

³ Antsu namanken maar ashí uwitin tuke suúniak nujai ni tunaarin tuke enentáimtuiniawai.

⁴ Warí, namanké numpejai ii tunaari penké asakárchamniaiti.

⁵ Nu asamtai Kristu jú nunkanam taa Yúsan chicharuk tímiayi:

“Naman maar sútajjaisha penké nakitráme. Antsu ayash iwiamur surusuitme.

⁶ Naman áesamusha tura tunaan asakártin naman susamusha wakeratsme.

⁷ Tuma asamtai “Yusrú, tímiajai. Winia áaturma núnisnak ame wakeramurmin umiktajtsan táwitjai” tímiajai” tímiayi.

⁸ Emka, Muisais akupkamu ain, naman susamuncha, tunaan asakárat tusa naman maar susamuncha, naman áesamuncha Yus ashí nakitraititawai Kristu.

⁹ Nuyá “Yusrú, ame wakeramurmín umiktajtsan táwitjai” tawai. Nuna taku naman maar sútain “Asakáiniaiti” tawai. Tura chikichan ikuawai.

¹⁰ Jesukristu Yúsan umiruk jákatniun chikichkí surumakmatai Yus in tunaarincha shiir awajtamsaitji.

11 Tura Israer-shuarnumiá Yúsnan pujurin ashí tsawantaj nú namannak máawar tunaan asakáchunak Yúsan ti suu ániawai.

12 Antsu Jesukrístuka jákatniunam chikichkí surumak ashí shuara tunaarin asakár atakka penké jákashtiniaiti. Nuna tura Yusa untsuurini nekas akupin pujutainium pujusuiti.

13 Tura Yus ni nemasrin nupetak nin umirkarti tusa sústartatna nuna nákawai.

14 Chikichkí jakamujai ni shuarin tuke tunaarinja awajsaruiti.

15 Yusa Wakanisha núnisan tawai. Emka tímiayi:

16 “Yamaram Chichaman najanattaj nuka júnisan átatui: Wi akupeaj nuna ni enentáin paant enentáimtikrartajai.”

17 Nuyásha tawai: “Ni yajauch tunáa túramurin penké enentáimtuschatvajai.”

18 Tuma asamtai, ii tunaari tsankuramu asamtai atak in jarutramkatin atsumatsji.

Yus tuke shiir enentáimtusar Yusaj jeartai

19 Tuma asamtai, yatsurú, Jesukrístu numpejai pénger awajsamu asar sapijmiatsuk shiir enentáijiai Imiá Shiira nuí, nekas Yus pujamunam wayamniaitji.

20 Nuí wayatniuka Kristu jaka Yusa Jeen tesaamun júsatniua áintsan ánturmamiaji. Yamaisha tura tuke wayamnia átatui.

21 Jesus Yúsnan pujurniu uuntri asa ashí Yus-shuartin wáitmak pujurtamji.

22 Tuma asamtai, tuke enentáijiai Yus imiá nekas enentáimtusar Yusaj jeartai. Ii enentái Kristu numpejai nijiarma asamtai nekas enentáimtakur ii tunaarijai itit enentáimtumachatniuitji. Tura ii ayashisha pénger entsajai imianniuitji.

23 Yus tsankatramkattajnia nu shiir enentáimtamun iniaitsuk kakaram ajasar tuke emetatniuitji. Yus tsankatramkaitji nuna umiktatui.

24 Pénger anenain tura pénger túrin ajasartai tusar mai yainiaikiartiniuitji.

25 Yusa Jeen Yus-shuarjai tuke iruntratiniuitji. Chíkich iniaini-akuisha iikia tuke iruntratniuitji. Nuí irunkurkia ikiakánairtiniuitji. Tura Kristu tátin tsawantri ishichik ajasu asamtai nú nukap túratniuitji.

Anearta. Ti tsúumainti iwiaaku Yusa kakarmarijiai asutniátin.

26 Túrasha shuar nekas chichaman nékayat wakeramurijiaín tunaanum wekaakka Kristu jakamun nakitia asamtai chíkich atsawai ni tunaarin asakátratniun.

27 Áyatik ashamak ti tsumai sumamatin tsawantan nákasminiaiti. Nu tsawantaj Yus ni nemasrin ti kakerak asutiák mash emesrattawai.

28 Shuar Muisais akupkamun umikchamtai tura jímiar shuar menaintiusha etserkarmatai waitnentsuk máatniuyayi.

29 Núnisaitkiuinikia shuar Yusa Uchirin wishikiainiakka ni numpencha nakitiainiakka tura Yus nin anea nuna Wakanincha katsekainiakka nuna nankaamas asutniáchartatuak. Warí, nii nakitiana nu numpajai Yamaram Chicham nekas umirkatin awajsamuyayi. Tura nújaisha nii ti pénger awaj-nastiniuyayi.

30 Ii Uuntri Yus júnis tímiayi “Wi asutiátniuitjai. Wi yapajkiattajai.” Nuyásha tímiayi “Wíi shuara tunaarin ti paant nekarattajai.”

31 Ti tsúumainti iwiaaku Yusa kakarmarijiai asutniátin.

32 Tura atumsha yámankamtaik Yusna nekaarum Yus-shuar ajasmarum nu enentáimsatarum. Kakaram ajasrum ashí itiurchat katsuntramarme.

33 Chíkichtirmeka katseknakmarme tura ashí íimiainiamunam yajauch awaj-nasmarme. Chikichcha nu shuarnum pachitkia asarum itit awaj-nasmarme.

³⁴ Atumsha sepunam pujuinia nusha waitnentrarmame. Tura shiir warasrum kuítrumin atantramainiakusha katsuntramarme. Nayaimpiniam tuke amuukashtin kuit pachiktin asarum túramarme.

³⁵ Tuma asarum yawetsuk Yus tuke enentáimtusrum kakaram ajastarum. Túrakrum nan̄kaamas akinkiattarme.

³⁶ Atumsha esetra enentáimsarum Yus wakera nu túrakrum Yus atumin amastinia nu wainkiattarme.

³⁷ Kame Yus-Chichamnum áarmaiti:
“Tátinia nu ishichik ajasai. Wárik tátatui.

³⁸ Shuar Yúsan nekas enentáimtak pé_nker wekaak uwemprattawai. Tura iniaiyakuinkia nin wararsashtatjai.”

³⁹ Tura iikia iniaisar mesena nú shuarchaitji. Antsu Yus shiir enentáimtusar uwempraitji.

11

Yus nekas enentáimtustin

¹ Yus nekas enentáimtakur “nákajnia nuna, Yus nekas suramsattaji” taji. Tura wáinchaitiatar “nekas wainkiattaji” taji.

² Yaunchu ii uuntri Yúsan nekas enentáimtuiniakui Yus “pé_nkeraitme” tiarmiayi.

³ Aya Yus enentáimtakur ju nékaji: Yus aya ni chichamejain ashí nun̄kan najanamiayi. Túramtai ashí wáiniainiaj nu wáinchataijiai najanamu áiniawai.

⁴ Apir Yúsan nekas enentáimtak Kaínjai nan̄kaamas pé_nkera nuna Yúsan susamiayi. Túramtai Yus “pé_nkeraitme” taku shiir yumiñsamiayi. Tuma asamtai Apir jákaiiat tuke enentáimtikramji.

⁵ Euksha Yúsan nekas enentáimtak iwiaakuk nayaimpiniam junakmiayi. Yus jukimiu asamtai wáinkiacharmiayi. Tura Yus-Chichamnum aarma “Euk júnatsuk Yúsan ti shiir enentáimtikniuyayi” tawai.

⁶ Tura Yus nekas enentáimtachkumka žitiurak Nii shiir enentáimtiksatom? Nekas enentáimjai Yúsan weantuktaj tusam wakerakmeka, emka, Yus iwiaaku pujawai, tu enentáimpratniuitme. Nuyásha, Wi Yúsan eakuinkia Yuska winia yáintkiattawai, tu enentáimsatniuitme.

⁷ Yus, ‘amaarkatniun akupkattajai” tiniu asamtai, Nuaisha Yúsan nekas enentáimtak, amaarun wáinchaitiat, “túrunattawai” tímiayi. Túrak Yus timiajai métek uunt kanun najana ni shuarincha uwemtikramiayi. Tura Yúsan nekas enentáimta asamtai Yus “pé_nkeraitme” tímiayi. Tura ni umirkamujai chíkich shuar Yúsan enentáimtachun súmamtikiawarmiayi.

⁸ Tura Apraámsha Yúsan nekas enentáimtak Yus “nú_nkem ikiukim wetá” tutai shiir umikmiayi. Yus tuke nin súsatniua nú nun̄kanam wémiayi. Turasha ni nun̄ken ikiuak ni jeatniun nékatsuk jiinkimiayi.

⁹ Yúsan shiir enentáimtak nú nun̄kanam Yus nin tsan̄katkamuitiat írara áinis pujusmiayi. Nuap jeanam pujuyayi. Núnisan̄ ni uchirí Isaksha tura ni tiran̄kí Jakupsha nuñ̄ tsan̄katkamuitiatan̄ írara núnisar pujuarmiayi.

¹⁰ Kame Apraámka nayaimpinmaya ashirchamin péprunam pujustinian nákasmiayi. Yus nu pepru pé_nker iwiar jeamka asamtai umuchkiachminiati.

¹¹ Apraáma nuwé Sarasha Yúsan shiir enentáimta asa úuntach áyat ajaprukmiayi. Yus timia nuna umiktatui tau asa uchin takusmiayi.

¹² Tura nujai Apraám ti úuntchitiat ti pampanmiayi. Nii chikichkitiat ni pampanmarí ti untsurí ajasar yaajai métek tura náikmijiai métek nekapmarchamnia ajasarmiayi.

13 Ashí nu shuar Yus tsan̄katkamun wáintsuk jákarmiayi. Túrasha Yúsan nekas enentáimtuiniak arantia wáinkiar warasar shiir enentáimtiarmiayi. Túrawar “ju nun̄kanam nekas aya íraraitji” tiarmiayi.

14 ‘Íraraitji’ tu chichainiak chíkich nun̄ka eamun páant awajainiawai.

15 Niisha matsatu winíarmia nuí atak waketkitniun wakeruiniakka páchitsuk waketkiaraayi.

16 Tura antsu niisha nuna nan̄kaamas péñker nun̄kan nayaimpinmaya nuna enentáimtiarmiayi. Túmainiakui Yuska péprun iwiartur susa asa “wi ní Yusr̄intjai” títinian natsantatsui.

17 Ataksha Apraám Yúsan nekas enentáimtak “chikichik uchi amasmaj nu, naman̄kea áitkiasmek maam surusta” takui Apraám Isakan ni uchir̄in Yus susatniun pen̄ké suritkiachmiayi.

18 Kame Yus “Isakjai ti pampan̄tatme” tau asamtai

19 Apraám “máamtaisha Yus iniantkittiawai” tu enentáimpramiayi. Tura Yus ukunam máatiun suritkiamtai Isakan máachiat nekas jákatniunmaya uwempran nantakniua áintsan̄ wáinkiamiayi.

20 Isaksha Yúsan nekas enentáimtak ni uchir̄in Jakupnasha Esauncha ukunam ní túrunattana nuna ujakarmiayi.

21 Núnisan̄ Jakup Yúsan nekas enentáimtak jatsuk ni tiran̄kin, Jusé uchir̄in, shiir túrunattana nuna ujakarmiayi. Tura ti uuntach asa máshtun̄kr̄in ushukruma Yúsan shiir awajsamiayi.

22 Tura Jusesha jákatniuri ishichik ajatesmatai Yúsan nekas enentáimtak Yus ukunam Israer-shuaran Ejiptu nun̄kanmaya júkiartatna nuna ujakarmiayi. Tura jíiniainiak ní ukunch̄in júkiar Yus tsan̄katkamu nun̄kanam iwiarsarat tusa akupkamiayi.

23 Muisaisa apar̄isha nukur̄isha Yúsan nekas enentáimtuiniak Muisais ti shírmach asamtai suntar máawar̄in̄ tusa akiiniamunmaya menaintiu nantu úukarmiayi. Tura uunt akupin akupkamun ashamkacharmiayi.

24 Muisaissha Yúsan shiir enentáimtak uunt ajas Ejiptunmaya uunt akupniun nawantr̄i uchir̄i ajastinian nakitramiayi.

25 Antsu Ejiptu nun̄kanam ishichkisha tunaan warartsuk Yusa shuar̄ij̄ij̄i métek wáitsatniun nan̄kaamas wakerukmiayi.

26 Nujai Kristun yajauch awajsarmia núnisan̄ niisha wáitsatniuuui. Túrasha ashí Ejiptu nun̄kanam péñker irunmia nuna nan̄kaamas Yus nin ukunam tsan̄katkatta nuna shiir enentáimtusmiayi.

27 Niisha Yúsan shiir enentáimtak uunt akupin kajeramu ain̄ ashamtsuk Ejiptu nun̄kanmaya j̄iinki wémiayi. Yúsan wáinchiat shiir enentáimtamuj̄ai wainiua áinis kakaram ajas ashí katsuntramiai.

28 Muisais Yúsan shiir enentáimtak yámankamtaik paskua namperan najaneak ashí Israer-shuaran numpaj̄ai ní wáitir̄in kuérat tusa akupkarmiayi. Nujai Yus timia núnisan̄ nayaimpinmaya suntar nuna iis nu jeanam iwiar̄in̄ máatsuk nan̄kaikit tusa tímiayi.

29 Israer-shuarsha Yúsan shiir enentáimtuinia ásar Kapaantin Entsa nakaakamtai ajapén ti pen̄ker kukarnum kat̄in̄kiarmiayi. Ejiptunmaya suntarsha núnisan̄ kat̄in̄tai tukamá jakerarmiayi.

30 Israer-shuarsha Yúsan shiir enentáimtuinia ásar Yus timian umirkar siati tsawant Jerikiú péprun téntakarmatai aa tanish sáanákmiayi. Nujai ti yúpichuch nupetkarmiayi.

31 Raapsha nu péprunam pujak, Yúsan nekas enentáimtak tsanirmatai áyat Israera suntar̄in mamikmak wekaan ti pen̄ker itiáa asa chíkich shuar Jerikiúnam matsatua nujai jákachmiayi.

³² Nu arantcha Yúsan shiir enentáimtin ti írunui. Jeteúnsha, Paraksha, Sansunsha, Jiptísha, Tawitsha, Samuersha, Yúsnan etserniusha nu shuar ármiayi. Mash ujaktinian jeatsjai.

³³ Niisha ashí Yúsan nekas enentáimtuinia ásar Yusa kakarmarín niisháa niisháa iniaktusarmiyai. Nuna túruiniak chíkich chíkich nunkanmaya aentsun nupetkarmiyai, nuisha péñker akupkarmiyai, tura Yussha ni timia núnisan yainkiarmiyai. Uunt yawancha kajechu awajsarmiyai,

³⁴ uunt jiniasha ikiajniakarmiyai, puniajai mantamnatniuncha uwemprarmiyai. Kakarmachusha kakaram ajasar mesetnumsha ni nemasrincha nupetkarmiyai.

³⁵ Nuwasha ni uchirí jakan iniantkimiun wáinkarmiyai.

Chikichcha wáitias mantamnowarmiyai. Ti shiir pujustinnium nantaktiai tusar nú tsawantaj uwempratniun nakitrarmiyai.

³⁶ Chikichcha katseknakarmiyai, asutniáwarmiyai, jirujai jinkiawar sepunam enkenawarmiyai.

³⁷ Kayajai tukú mantamnowarmiyai, jímiapetek tsupinkarmiyai, Yúsan iniaisarat tusa nekapnasarmiyai, puniajai mantamnowarmiyai. Aya wékainarmiyai, kuítrincha ásar nuapen entsararmiyai, shuar nincha áintrar wáitnenmai awajarmiyai.

³⁸ Atsamunmasha, naincha, waanmasha, ashí nunkanam wekain ármiayi. Nu shuarjainkia ju nunkanmaya shuar imiá yajauch ásar niijjai pujumainchu áiniawai.

³⁹ Nu shuar Yúsan shiir enentáimtuiniakui Yus “pénkeraitrume” tiarmiyai. Túmaitiat ni tsankatkamun wáinkiacharmiyai.

⁴⁰ Yuska nuna nankaamas péñkeran iwiarturaru asa tura in yamá pu-jajnia juna enentáimturma asa niisha iisha mai metek tsaninkiar ti penker ajasarti tu enentáimsamiayi.

12

Jesus tuke enentáimtusar tsékeñtiaí

¹ Ashí ju nunkanam túrajnia nuka shuar nakuruiniak tsékena nujai nakumkamniaiti. Ashí shuar yaunchu Yúsan shiir enentáimtusaruka téntakar írmainiaji. Tuma asamtai ashí kijin ana nusha tura ashí tunaaka itit awajtamaj nusha ajapa iniaisar tura katsuntrar tsékeñkir jeatai.

² Túmakur Jesus tuke enentáimtusar tsékeñtiaí. Ashí shuarjai nankaamas Jesus Yúsan ti nekas enentáimtak aya péñkernak túramiyai. Tuke nekas awakmakmiayi. Imiá tunáa shuáran krusnum máatin ajn núnisan natsanmainium jákatniun surimiakchamiayi. Antsu ukunam ti shiir warastin átatna nuna enentáimtak nuna ashí katsuntramiayi tura nuyá Yusa untsuurini akupin pujutainium pujusuiti.

³ Tunáa shuar Jesusan wáitkiasarmia nu enentáimpratarum. Túrarum pimpit-suk katsuntratarum.

⁴ Átum tunaajai máaniakrum Jesus túramia áintsarum numpemsha puárchaitrume tura jákachuitrume. Nuisha katsuntrarum jeatniuitrume.

⁵⁻⁶ Yus nekas ni uchirín chicharkatniua áinis túramprum nu kajinmatkich-mashuram. Júnis tawai:

“Uchirú, wi jintinramajmena nu kajinmatkip. Asutiámkuisha kúntuts pujusaip. Kame Uuntka Nii aneana nuna jintintiwai. Tura ni uchirí ajasat tusa achiana nuna asutiawai.”

⁷ Tuma asamtai Yus ni uchiría áinis asutiámkuisha katsuntratarum. Warí, ashí apa ni uchirín chicharkashtatuak.

8 Tura ashí uchin chicharkatniua núnis Yus atumin chichartam-chakrumniñkia nekas ni uchirinchuitrume. Antsu chikichnaitrume.

9 Nu arantcha ii aparí uchich áriñ chichartamkurin umirniuyaji. Nu arant nuikia nekas ii Aparí nayaimpiniam pujana nu shiir umirkar tuke shiir pujustin wakerishtatjik.

10 Ii aparí ishichik ni enentájjai wakeramu chichartamniuyaji. Antsu Yuska ti penker awajtamsataj tusa nekas atsumajnia nujai métek chichartamji.

11 Kame nekasaiti, ashí asutiámu yamaikikia waraschamniaiti, antsu kúntuts enentáimtikramji. Túrasha ukunam nu asutiámujai unuimij nuka penker túratniun tura shiir pujustinian yáinmaji.

Anearta. Yus tana nu nekas antuktiniaiti.

12 Nujai pimpirarusha tura kakarmachu ainia nusha ikiakárтарum.

13 Túrarum penker esettsa enentáimsarum wekasatarum. Túrarum tujinti-ainia nusha shiir wekasatin yáintarum.

14 Ashí penker túrakrum ashí shuarjai nawamnaikiarum penker wekasatarum. Tunaan túrínkia Yusaj penké jeashtatui.

15 Aneartarum. Shuar nakitiakuñkia Yus nu shuáran shiir yáintinian tujinkiattawai. Nu shuar yajauch enentáimiuk chikich shuárnasha itit awajas tunaanum útsukartatui.

16 Tsanirmawairap.

Yusna nusha nakitraitrap. Isaka uchirí Esau penkera nuna nakitramiayi. Yus “iwiairín núkap súsatniuiti” timia nuna enentáimtuschamiayi. Tura asa aya ishichik yurumkajai yapajjámiayi.

17 Tura nuyá ni aparí ukunam túrunattana nuna takui Esau ti penkeran wakerimiayi. Tura ti úutkuisha ni aparí nin nakitramiayi tura ni chichasman yapajjátniun tujinkiamiayi.

18 Atumjainkia Yusna enentáimtusminia nuka yaunchu Israer-shuarjai ashammain amia núnischaiti. Yáunchuka Yus ni akupkamurín Israer-shuaran súakui Senai muranam jeeármiai. Muranam uunt jisha kiritniusha teesha nashesha ajamiayi.

19 Tura kachu kakaram umpúamusha ámiayi. Tura Yus kakaram nin chichaream antukar ashamkar atakka chichaschati tu searmiayi.

20 Kame Yus chichaak “Shuarsha tañkusha ishichkisha nú muranam narmatai nuka kayajai tukurar tura nankijjaisha máatniuiti” tímiayi. Nu akupkamu ti ashammai asamtai “chichaschati” tiarmiayi.

21 Wáinkiarminia nu ti tsumai asamtai imia Muisaisha “Ashamakun kuraajai” tímiayi.

22 Antsu atumjainkia Yusna enentáimtustin nujai nankaamas penkeraiti. Átumka nayaimpinmaya Seun náinnium, Jerusarén iwiaaku Yus pujutai péprun nakumeana nu jeeáitrume. Nuisha ti untsurí nayaimpinmaya sun-tarsha

23 ashí Yus-shuarsha shiir iruntrarú áiniawai. Yus-shuarka ashí nayaimpiniam ni naari anujtukma ásar ni uchirí áiniawai. Nuisha Yus, ashí shuaran ti nékana nu, pujawai. Niisha shuáran ti penker awajsamtaí nu shuar jákar ni wakaní nu shiir pujuiniawai.

24 Nuisha Yamaram Chichaman in takartamajnia nu, Jesus, pujawai. Nuna numpe ukatramujai ashí shiir awajsaiti. Nu numpasha Apira numpejai nankaamas penkeraiti. Kame Apir ántar máamu asamtai yapajmiatrukta titinia áintsan enentáimtaji. Antsu Jesus tunáa shuáran penker awajsartaj tusa jakamiayi.

25 Nuka ti penker asamtai Yus chichartamprumna nu nekas anturkatniuitrume. Yaunchu Yus jú nunkanam murá chichaamun anturkachar

asutniátniunam uwempracharmiayi. Nujkia Yus nayaimpinmaya chichar-tamkurin ántachkurkia ishichkisha uwemprashtatji.

²⁶ Yaunchu Yus chichamejai nunkan úrmantikiarmiayi. Tura yamaisha tawai “Ataksha aya núkankechu antsu nayaimpinmasha úrmantikiattajai.”

²⁷ “Ataksha” tana nujai “ashí muchitrámnia nu amuukartatui” tawai. Tura muchitrachminia nu juakartatui.

²⁸ Yus in akupkatniun tsankatramaj nuka umuchnakchattawai. Tuma asamtai Yus yuminsatniuitji. Yus wakerana núnisrik wishiktsuk shiir enentámtusar Yus shiir awajsatniuitji.

²⁹ Maa, ii Yúsriñkia kajerkañka uunt jía nuke áesaa mash emesramniaiti.

13

Yus shiir enentámtiksatin

¹ Nuamtak yachia núnisrum tuke mai anenai ajatarum.

² Tuke írar shiir itiaatarum. Nuna túruiniak shuar nékachminiak nayaimpin-maya suntaran itiaawaruiti.

³ Sepunam pujuinia nusha atumsha niijiai pujáa núnisrumek waitnen-trarta. Wáitkiasarma nusha wisha núnisnak wáitsamniapitjia tusarum waitnen-tratarum.

⁴ Nuatnaikiatin péñkeraiti. Shuar ni nuwejai tsaniñ pujustin péñkeraiti. Tura nuatkamu ainia nusha chikichan eakchatniuiti. Tsanirmana núnaka Yus asutiáttawai.

⁵ Aya kuítia enentámtusam pujusaip. Yuska “Kanakchattajai tura penké ikiukchattajme” túramui. Tuma asamtai ame takakmena nujai shiir enentámsam “maakete” titiá.

⁶ Tiniu asamtai arantutsuk ju tíminiaitji: “Winia yainnia nuka Uunt Yúsaiti. Nu asamtai shuar túrutamnia nuna ashamkashtatjai.”

⁷ Atumin Yus-Chichaman jintintramawarmia nu enentámtustarum. Yúsan shiir enentámtuiniak péñker wekasarmia núnisrumek atumsha túratarum.

⁸ Jesukrístuka tuke yapajítsuk nuikiya núnisañ yamaisha tura ukunmasha tuke núnisañ átatui.

⁹ Chíkich chicham niisháa írunna nu anturkairap. Yus in anenma asakrin kakaram ajasartai. Shuar niisháa yurumkajai enentáiruñ kakaram ajastaj táyat penké yáinçhaiti. Yurumeaj nújainchu antsu Yusa aneñkrattairijiai ii enentáin kakaram ajasminiaitji.

¹⁰ Yáunchu Yúsnan pujurin naman maar Yus susamunmayaan yuu ármiayi. Tura iikia Yus-sutaj nusháa ana nu súaji. Nusha Kristu jakamu asamtai yaunchua nu Yúsnan pujurin nuñ pachiinkiachmin áiniawai.

¹¹ Israer-shuarnumiá Yúsnan pujurniu uuntri tunaan asakártaj tusa namaké numpen júkiar Imiá Shiir Tesaamunam wain ármiayi. Tura nu naman arant áesatniuyayi.

¹² Núnisañ Jesussha péprunam arant wáitkianas mantamnamiai. Nujai ashí shuara tunaarñ ni numpejai nijiatkaiti.

¹³ Núnisrik iisha péprunmaya arant wétinia núnisrik Jesusai weri Niijiai métek wishikmain katsuntutai.

¹⁴ Kame ju nunkanam amuukachmin pepru atsawai. Antsu ukunam ti shiir pepru átatna nu nákaji.

¹⁵ Tuma asar naman maar Yus sútsuk antsu shiir chicham súakur tuke Yus shiir yúminçkijai. Tuke núnisar túratai.

¹⁶ Péñker túrakrum takakrum nu ajamnaisatin kajinmatnaikiirap. Nusha ti shiir Yus sútainti.

¹⁷ Yus-shuaran akupin ainia nu umirkarum shiir enentáimtikratarum. Ni takatr_{in} Yúsan ujaktin ásar atumí wakan_{in} shiir wainiainiawai. Niisha itiurchatcha antsu wakerumainian túrawarat tusarum shiir yáintarum. Nu túrachkumka ħitiurak yainmakarat?

¹⁸ Incha Yus áuksatarum. Iisha ashí pé_nker túratin wakeraji. Túraji enentáimji.

¹⁹ Tura Yus áujk_{ur}am Yus ataksha atumjai wainniaikiatniun wari tsankatruk_{at} tusarum seatritiarum.

Amúak shiir chichaawai

²⁰⁻²¹ Imiatkinchanum apujkartinia nú Yus, Jesukrístun jakamunmaya iniantkimia nuka, ni numpé kakarmarij_{ia} ashí pé_nker ana nuna suramsarti. Nujai ni wakeramu túrattarme. Tura Jesukrístu kakarmarij_{ia} ashí ni wakeramun in pujurtamas takasti. Ii Uuntri_i Jesukrístu ashí Yus-shuaran ti penker Wáinniuiti. Tura ni numpej_{ai} Yamaram Chichaman kakaram awajsamiayi. Nu Chichamsha tuke menkakashtatui. Aya Kristu tuke shiir awajnasti. Núnisa_n atí.

²² Yatsurú, kakaram chicharkajrumna ju shiir enentáimjai anturkatarum. Kame ti wárik áatrajrume.

²³ Yamaikia ii yachi Timiutéu sepunmaya jiinki ankant ajasai. Nuna ujaajrume. Wárik támatain_{ki}a atumin íitiaj tusan winiakun niij_{ia} winittiajai.

²⁴ Atumí úuntri_{sha} tura ashí Yus-shuarsha amikmaatarum. Itiaria nunkanmaya shuarsha amikmatmainiawai.

²⁵ Ashí Yus ti shiir yainmakarti. Nuke atí.

SÁNTIAK papin áarar akuptukma

Sántiak aarmiania nu

¹ Wi Sántiak Uunt Yúsan tura núnisan ii Uuntrj Jesukrístun umirin asan ju papin aajai. Ashí Yus-shuartirmin ashí nuñkanam tsakinmakarum matsatrumna nuna amikmaajrume.

Nekataĩkia Yúsnumiĩiti

² Yatsuru, ashí itiurchat wáinkiuermesha tuke warastarum.

³ Iis, itiurchatnum pujakrum nekas Yus enentáimtaitkiurmeka katsuntratin unuimiartatrum.

⁴ Tura tuke páchiachkuram, tuke katsunteakrum, nuikia Yúsjaĩ ti penker katsuartatrum. Penké atsumashtatrum.

⁵ Átum nánkamsarmek nekaatin tujintiakrumka Yusa nekatairi seata. Shuar seakuĩ Yuska kajetsuk tura ementutsuk antsu patatas súawai. Tuma asamtai seakminkia suramsattawai.

⁶ Túrasha Yus nekas enentáimtusam, “túratpiash” tútsuk seata. “Cha, nékatsjai surustimpiash” tu seakmeka ántram seame. Nayaantsa tsukaturi juní taa, atúu waketki ajatsuk. Amesha áintsamek túmame.

⁷ Enentáimiĩn núnisketkuĩkia, seamna nuna Yus penké suramsashtatui.

⁸ Shuar jimiará enentáimna nuka shiir wekasatniun tujintiawai.

⁹ Yus-shuar, ju nuñkanam kuĩtrinha ainia nu, Yus shiir awajsamu nujai warasti.

¹⁰⁻¹¹ Tura Yus-shuar kuĩtrinniuĩtkuisha péejchach enentáimtikramsha warasti. Iis, nupa kuánkam tura nantu ti sukuam kaar miniatsuk. Kuĩtrinniuka ántska ántram seame. Nayaantsa tsukaturi juní taa, atúu waketki ajatsuk. Amesha áintsamek tánkete. Tuke súrutnak pujurkusha itiurchat wáiniuk wárik amuukattawai.

Ii itiurchatri ana nu

¹² Shíiraiti shuar ni itiurchatriĩn nekas katsunteana nuka. Nekapsam jíinkiuĩka akinkiatniun wáinkiatatawai. Iwiaaku átinian, tawasap achiktinia núnisan, wáinkiatatawai Yus ni aneam tsankatka nuna.

¹³ Shuar tunáa túramnia nekapeakka “Yus nuna útsutrutui” tu enentáimprashtiniaiti. Yuska yajauch túramnia enentáimtsui túrasha Niisha penké chikichkinkesha tunaanum útsuchuiti.

¹⁴ Antsu ni wakeramurijjain aents tunaan niĩki ikiatmamkaiti yajauch túratniun. Nújainkia tunaanum útsukmaiti.

¹⁵ Nu yajauch wakeramunmaya tunáa akiiniui. Tura nu tunáa mash amuukamtai jákatin akiiniui.

¹⁶ Yatsuru, aneakun tájarne, ananmamawairap.

¹⁷ Ashí penker ana nu, ashí shiir ana nusha nayaimpinmaya Yusak ama-suiti. Yus ashí tsáapninia nuna najanaiti. Tura Niin kiritin atsain yapajítsuk tuke tsáapniiti.

¹⁸ Nii wakera asa ni nekas chichamea nujai ni uchiri najatmamji. Tura ashí ukunam átatna nujai ii émkaitji.

Yus nekas shiir awajsatin

¹⁹ Tuma asamtai aneamu yatsuru, wárik chichastin enentáimprairap antsu antuktin emka enentáimprata. Núnisan wárik kajekaip.

²⁰ Kajena nuka Yus penker wakeramun túratsui.

²¹ Nu asamtai, ashí péñkercha nu tura ashí yajauch írúnna nusha iniaisata. Tura tuke enentáijjaj Yus-Chicham ame enentáimin araamu anturkata. Tura nu Chicham kakarmaiti uwemtikrampratniun.

²² Yus-Chicham umikta. Aya ántukaip. Aya ántakmeka amek ananmamattame.

²³⁻²⁴ Shuar íspikia ímiak ni yapin wapikian wáiniak tura nuyá jáupmitsuk we, ni urukuit nuna wárik kajinmatkishtimpiash. Shuar Yus-Chicham umitsuk aya ántana nuka nujaj méteketete.

²⁵ Yus tana nujaj ankant ajasminiaiti. Shuar íspikia iimia áintsan nekas Yus péñker táman tuke iniaitsuk enentáimtus, nu shuar kajinmattsuk aya antukchattawai antsu tuke umiktatui. Tura ti shiir waras pujustatui.

²⁶ “Nekas Yúsan shiir umirjai” tana nu tura eseer chichaachkunka imia niñki ananmamui tura “Yúsan shiir umirjai” tana nuna ántar tawai.

²⁷ Nekas Yus Apa awajitsuk shiir umirkatin júiti: mitiaikiasha wajesha itiurchatnum pujuiniakuisha yáintiniaiti tura ju nunkanam ashí tunáa ana nújajsha máatrashtiniaiti.

2

Shuar antra akantrashtin

¹ Yatsuru, ii Uuntri Jesukrístu ti shiir nankaamantua nu enentaimtatirmeka shuar akantratin enentáimsairap. Shuara enentáij enentáimtsuk antsu aya pátatke wáinmena nujaj aents akantram niisháa enentáimturairap.

² Iis, iruntrumna nuj shuar kuítrintin kurí aniyu aweera tura péñker iwiarmampra wayashtimpiash. Tura núnisan chíkich kuítrincha aruta entsaru wayashtimpiash.

³ Tura kuítrinnia nu “Péñkera juj pujusta” tíchatameash. Tura kuítrincha “Atu wajauta, túrachkumsha juj nunkansha pujusta” tíchatameash.

⁴ Nu tákumka yajauch enentáimpram jimiará enentáijjaj aents enentáimtame.

⁵ Aneamu yatsuru, antuktarum. Ju nunkanam kuítrincha ainia nuna Yus achikiuiti Ní shuar ajar Nin nekas enentaimtin ajasartinian. Tura ashí nayaimpiniam írúnna nunasha Yus nin tsankatkattawai. Ashí shuar Yúsan aneena nuna anajmatra asa nin tsankatkattawai.

⁶ Átum antsu kuítrincha natsant awajearme. Iista, kuítrinnia nuka timiá itiurchat awajtamainiatsuk. ¿Nuikia níchuk ainia achirmak kapitáannium japiki júramprumna nu?

⁷ ¿Nínkichuk ainia Kristu naari shiira nuna ántar pachikiar penké yajauch áujmatainia nu? Tura átumka nuna naari tuke shiir awajkurmin, ashí shuar “Kíristu shuari” túramainiawai.

⁸ Yus-Chichamnum ju akupeamu nekas péñkeraiti:

“Ame ayashim aneamna núnismek ame írutramuram aneeta.”

Nu nekas umirniuitkiurmeka maak.

⁹ Nú enentáijjaj kuítrinnijaj chichasminiaiti. Tura nuyá kuítrinchojaj shiir chichaachkumka, niisháa enentáimta asam, nu akupkamu umirkachuitme. Tunáa túrame. Núnismek Yusa akupeamurijjaj amek sumamame.

¹⁰ Chíkich akupkamu írúnna nu ashí umikiam tura aya chikichik akupkamu umikchamka nuikia ashí akupkamu umircha ajasume.

¹¹ Iis, Niñki Yúsak chichaak tíchamka “tsanirmawaip.” Tura chikich-nasha “mankartuawaip” tímiayi. Nu asamtai, shuar tsanirmatsuk túrasha mankartakka ni wakeramun umirtsui.

¹² Kristu ankant awajtamamtai ii yamá ni akupeamuri yúpichuch umirkamniaitji. Nu asamtai nu akupkamujaj métek wekakurniñkia Yus “péñker

túraime” turamtatji. Tura umikchakrínkia “pénker umikchaitme” turamtatji. Tura nu enentáimsar pénker chichasar takasar wekasatniuitji.

¹³ Chikichan waitnentachkunka waitnennatsuk asutniáttawai. Tura waitnenkratniuitkiurnínkia tsawant jeamtai Yus in waitnentramprattaji.

Yus enentáimtustin tura umirkatniusha

¹⁴ Yatsuru, shuar “Yusan shiir enentáimtajai” táyat tura pénker túrachkuínkia pénkerashit. Nujai uwemprattawak.

¹⁵ Wátskea, Yus-shuar, áishmaṅsha nuwasha, entsátáirín tura yurumken atsumashtimpiash.

¹⁶ Tura ame nékayatmek ayashí atsumana nu sútsuk tíchatapash “Pénker wetá, entsatai entsaram túram pénker yurumáta.” ¿Nu sútsuk tákum pénkerkait?

¹⁷ Núnisaṅ takatsuk Yus enentáimtustin ántrai.

¹⁸ Tura shuar tíchanpiash, “Chíkich takaawai tura chikichcha Yusan shiir enentáimtawai. Mai pénkerchakait” tichanpiash. Wats, ame Yus enentáimtamun takatsuk paant inaktusminiashitiam. Tura wi antsu pénker takatrujai Yus enentáimtamun paant inaktustatjai.

¹⁹ Nekas Yus chikichkiiti tu enentáimtame. Nuka pénker túrame. Túrasa iwianchcha nunasha nékainiawai. Tura umircha ásar ashamainiawai.

²⁰ Netse enentáimpraip. Ashí Yus wakera nu takaachkumka, Yus enentáimtustin ántrai. ¿Nu nekaatin wakeramek? Iista.

²¹ Apraáman Yus chicharuk “Winia ti shiir awajtusat tusam ame uchiram Isak maam surusta” tutai suritkiachmiayi. Máachiat suritkiachmiayi. Tura suritkiacham Yus “Pénkeraitme” tímiayi Apraáman.

²² Páantchakait. Apraám Yusa shiir enentáimtak umirkamiayi. Umirt-suk Yusan enentáimtakka nuikia ántar enentáimtiaayi. Tura umirak Yus enentáimtamun umikmiayi.

²³ Nujai Yus-Chicham aarma nu uminkiamiayi. Juiti: Apraám Yusan shiir enentáimtusmiayi tura Yus chicharuk tímiayi “Máakete.

Nújainkia tuke pénker túraitme Wijjai” tímiayi. Apraámsha nekas “Yusa Amikri” tu náamkamiayi.

²⁴ Páantchakait. Shuar aya Yusan shiir enentáimtamujainchuk tura pénker takasmajaisha Yus nin shiir enentáimtawai.

²⁵ Núnisaṅ Raap tsanirmataiyayi. Túmaitiat Israeran suntarín mamikmauta tusar akupkamun ni jeen itiaawar tura úukar chíkich jántianam akupak uwemtikrarmiayi. Nuna túramtai Yus “pénkeraitme” tímiayi nincha.

²⁶ Ayash wakantichuka jákachukait. Núnisaṅ Yus enentáimtustin tura ni wakeramu takaachkurkia, jaka ántsaṅ ántrai.

3

Ii iniaí

¹ Atum untsurí jintínkiartin ajastin wakerukairap. Yus in, jintínkiartin ájinia núnaka, naṅkaamas neka asar, awajiakrin naṅkaamas Yus asu-tiámattaji.

² Iis, ashí mash ti awajiatsjik. Tura shuar chichaak, aya pénkernak chichaakka, nu shuar tuke eseer enentáimniuiti. Tura ayashíisha tuke pénker ana nuna túriniaiti.

³ Kawaisha enentáimpratai. Jiru wenuchiniam ikiursam ni ayashí ashí ayantaatsuk.

⁴ Kanusha ti úuntaitiat tura kakaram wéayat ishitiapach wiantaijai shuar wakera nuí ayantarminiaiti.

⁵ Núniskete ii iniaj. Timiá ishitiapchitiat awakmaktinia tímianu chichaat-suk. Ji ishichik kapāajaj ashí numi tsaruaku ekeemakchamniakait.

⁶ Ii iniaisha jijiaj méteketete. Ashí tunáa piákuiti. Tura ii ayashíin tunáa túratniun útsutmaji. Túnkuruanmaya jijiaj ikiapármaiti tura ashí ii wekajnia nuj émesewai.

⁷ Shuar ashí yajasman nawamkamin áiniawai. Ashí kajen írruna nunasha, nanamtincha, napincha, tura entsayancha ashí nawamkaruiti.

⁸ Tura iniaikia penké nawamkachminiaiti. Ti yajauch asa penké nu-petkachminiaiti. Iniaikia ti taráa tseasaiti.

⁹ Nu iniaijiaj Yus Apa shiir awajeaji tura nu iniaijiajin aentsti yajauch chichárnaiyaji. Áentsun Yus Nijiaj métek-taku najanamaitiatar yajauch chicharnaiyaji.

¹⁰ Nu iniaijiajin péñkersha tura yajauchisha chichaaji. Yatsuru, nuka penké atsutniuiti.

¹¹ ¿Púkununmaya entsa sáawijiaj kusuku jíinkimniakait?

¹² Yatsuru, ¿Kushin̄kiap shuinian nereawak. Munchisha kushin̄kiapen nerektatuak? Núnisan̄ púkununmaya entsa sáawijiaj kusuku jíinkichminiaiti. Ii iniaijiaj núnisan̄ aya péñkera nu chichastiniaitji.

Yusa nekatairi

¹³ Shuar ti neka enentái takakna nu, péñker túrattawai. Nekas nékaitkiun̄ka péjchachia núnis tuke péñker ana nuna túrattawai.

¹⁴ Antsu atumí enentáijiaj penké yajauch enentáimtunairum tura atumek péñker pujustin enentáimtumarum, nékaitiatam péñker túrachiatam “péñkeraitjai” tiip. Nuka wáitrume. Nekaska núchaiti.

¹⁵ Nú enentaikia Yúsaiyanchuiti. Antsu ju nun̄kanmayaiti, shuara enentáiyaiti, núnisan̄ iwianchnumiaiti nú enentaikia.

¹⁶ Shuarsha yajauch enentáimtunairar tura niñki enentáimtumainiakui, nujaj ashí meseawai tura ashí yajauch ti awai.

¹⁷ Antsu Yusaiya enentái takakua nu júnisaiti: ashí nankaamas emka eseeratin, nuyá nawamkartin, shiir ajá, péñker anturnain, waitnen̄kratin, ashí péñker takáa tura anantsuk naka chichamtin.

¹⁸ Eseera enentáimsatniusha shiir takawai ashí shuar péñker ana nuna túrawarti tusa.

4

Ju nun̄kanam írruna nu aneashtin

¹ ¿Urukamtaitsuk tuke kajernaikiarum ti máanaisrum pujarum. Meset-numsha urukamtaí wéarum? Júnisaiti: Atumin yajauch enentái katsuontra-chmin útsutmakrumin tuke máaniarme.

² Wakerarmena nu takustin wakerarme tura nu wakeramu takustin jeachkuram nérentin maarme juruktiaj tusam. Chíkich takakna nujaj itit enentáimtuniarme tura atajtin tujinkiam máanaitrume. Wakerarmena nusha Yus seachu asarum wáintsurme.

³ Tura seakrumsha yajauch searme. Atumí péñkerijiaj warastin enentáimiu asarum searmena nusha wáintsurme.

⁴ Jú nun̄kanmaya wakerakum Yusa nemasrijiaj tsanirma áintsan̄ketrume. Nékatsumek atumsha. Ju nun̄kanmaya wakerakrikia Yusa nemasrintji. Shuar ju nun̄kanmaya wakerakka Yusa nemasri ajawai.

⁵ Yus-Chicham juna tawai:

Yus ni Wakaní ii enentáin apujturmasuitji. Nu Wakan in anenma asa ti akasmatramaji, táwai.

Tura nuna ¿ántran̄keash ta?

⁶ Tura anenma asa ti yáinmaji. Tuma asantai Yus-Chicham tawai: Kajemtinian Yus íistatui tura péejchachin Yus nin aneak ti shiir yáintatui, tawai.

⁷ Yusají ikiumastarum, tura íwianch taritratarum. Túrakrumin íwianch ikiur-maktiatui.

⁸ Yúsainí weamkata tura Nii atumin wearmaktatrume. Tunáa shuartiram Kristu numpejají nijiamartarum. Tura átum, Yussha tura ju nunkanmayasha mai métek wakerarmena nu, atumí enentájí naka eseratarum.

⁹ Atumí tunaarí enentáimsarum kúntuts enentáimpratarum. Nu kúntutsjají ti úuttiarum. Nuik shiir enentáimprarum wishikmiarumna nuka iniaisarum kúntuts enentáimprarum úuttiarum.

¹⁰ Yusjají péejchach ajasta, túrakmin shiir awajtamsattawai.

“Yajauchiitme” tunaichatin

¹¹ Yatsuru, yajauch áujmatnaisairap. Yus-shuar ni yachin yajauch áujmatas tura yachí tunaarí tuke áujmatuk Yus “aneniatarum” tana nuna umichuiti. Antsu umichu asa “nu akupkamu ántrai, umirkashtiniaiti” tawai nu shuar. Nujají nu shuar umirtsuk Yus akupkamu nankaamas enentáimtumawai.

¹² Yus Niñki akupkamu najana asa Niñki nu akupkamu umirkamun nekas nekaamniaiti tunaashit tusa. Niñkiti uwentikratniun tura emesratniunam akupkatin jea nu. Amesha yáitiam chikicha tunaarí íistincha.

Kashin átatna nuna Yusak nékawai

¹³ Watsek, átum áujmateakrum “Arumsha kashincha nu péprunam weri nui chikichik uwí takasar kuit achiktatji” tíchattarpash.

¹⁴ Ishichkisha penké nékatsrume kashin átatna nu. Ju nunkanam ii iwiaak-mari wárik amúatsuk. Yurankim utsanar tura nantu sukuam mash wárik menkaatsuk. Núnisketji.

¹⁵ Antsu júnis tíminiaitrume: “Yus wakerakuin_kia iwiaaku pujakrikia nusha túrattaji” titiarum.

¹⁶ Túrachkurmeka átumka Yusjají nankaamantu enentáimprume. Tura ashí nu enentáikia yajauchiiti.

¹⁷ Shuar penker túratniun nékayat, túrachkuin_kia, nuka tunaiti.

5

Kuítrintin enentáimpratniua nu

¹ Kuítrinniutiram ju antuktarum. Ti úuttiarum. Ti wáitsatin asarum ti kakantra úuttiarum.

² Kuítrum mash mamukarai tura iwiamampramurmesha mash tin_kishap yúkayi.

³ Kurirmesha tura kuítrumsha ashí ijiakmamkarai. Ijiakmampramur_isha ame penkercha túram nuna paant iniakmawai. Tura jinium áesamua áintsan ame kuítrum yajauch awajtamsattawai ayashmjín. Amuukatin tsawant jeamunam anearchamame antsu ame kuítrum ikiaun_kamame.

⁴ Ame takat iniararam ementushim akirarmamna nu “akirkati” tura-mainiawai. Aneara. Yakiyá Yus, nayaimpinmaya suntara uuntri, nu takartamniu chichamen antukai.

⁵ Ashí ju nunkanam írunka nu wararsaruitrume. Tuma asarum kapunka nuke machararme tura yamaikia máatin tsawant jeayi.

⁶ “Nu shuar tunaiti” tírum tunaachu tsanumprurum máamar-me, tura nin_kia surimiakcharmai.

Yawetsuk takastin tura Yus áujsatin

⁷ Nu asamtai, yatsuru, nu páchitsuk ii Uuntr̄i Kristu tatin nákastarum. Arakmausha ni arakr̄i p̄nker tsapaiti tusa yumi yutuktinian shiir enentáij̄i nákatsuk. Yútasua umirmatai esatrurmatai júuktat̄jai tusa nákatsuk. Tura júurmaksha ti waraatsuk.

⁸ Núnisan̄ atumsha katsuntsatarum tura yawēkiirap. Kristu tatin yuntumtemayi.

⁹ Yatsuru, nuámtak “ju yajauch túrutui” tunainirap. Tákurminkia Yus írmastatrum. Nín̄kichukait nuna íistin tura anearta nu Yúsak tíjiuch wajatra-mui.

¹⁰ Yatsuru, yaunchu Yúsnan etserin enentáimpratarum. Tuke ii Uuntr̄i Yus timia nuna shiir etserkarmiayi. Túmaitiat wáitsarmiayi túrasha pachischarmiayi. Núnisrumek enentáimsatarum.

¹¹ Itiurchatan katsuntainia nuka nekas shíiraiti, tu enentáimji. Shuar itiurchatan ti katsuntin ámiayi, ni naar̄i Jup. Tura ni itiurchatr̄i nan̄kaasmatai Yus ti núkap kuítr̄in susamiayi. Nu nékatsrumek. Ii Uuntr̄i Yus ti waitnenkratchakait.

¹² Ju ashí nan̄kaamas enentáimtustiniaiti, yatsuru. Ame “ee” tákumka nekas titiá. Tura “atsá” tákumka nusha nekas titiá. Nekas chicham chichaachkumñ̄kia Yus írmastatui. Nu asamtai nayaimsha nun̄kasha ashí írunna nusha páchitsuk, aya támena nu tuke nekas atí.

¹³ Wáitakmeke Yus áuj̄sata. Waraakmeke, warasam kantamám Yus shiir awajsata.

¹⁴ Yus-shuartiram, shuar jáakka, Yus-shuara úuntr̄in untsukti. Tura niisha taarti. Tura Jesusa naar̄i pachikiar asuitij̄i jaa shuaran ishichik kuerarti. Túrawar Yús̄an áuj̄tusarti nu shuaran.

¹⁵ Tura “Yus nuna nekas anturtamkattaji” tu enentáimsar áuj̄sarti. Túrawarmatai jaa shuar p̄nker ajastatui. Yus nin tsuártatui. Tura tunaan tura asa jáakuñ̄kia Yus nu tunaan tsan̄kurattawai.

¹⁶ Nu asamtai, atumí tunaar̄i paant etsertunaiktarum. Túrarum Yus áuj̄tunaistarum atumí tunaar̄i tsan̄kurnarat tusarum. P̄nker shuar Yús̄an tuke enentáij̄i áujeamur̄ñ̄kia ti kakarmaiti.

¹⁷ Yaunchu Yus-Chichaman etserin ámiayi, ni naar̄i Erías. Niisha iij̄i méteketiat yumi yutukaj̄ tusa Yusa áuj̄samtai menaintiu uwí nuyá nan̄kaamas yutukchamiayi.

¹⁸ Ataksha yutukti tu áuj̄samtai ataksha yutukmiayi tura araksha ataksha tsapainiarmiayi.

¹⁹ Yatsuru, shuar eseera wekatinmaya kanaakuñ̄kia chíkich nin waketiitniun yaiñ̄ti.

²⁰ Shuar tunáa shuaran yajauch wekaan awakeakka jákatniunmaya uwemtikrattawai tura ti untsur̄i tunaar̄i tsan̄kurnartatui.

PÍTIUR Emka papin aar akupkamu

Pítiur Yus-shuaran áatramiania nu

¹ Wisha ju papin aajna nu Pítruitjai. Wisha Jesukrístu akatramurintjai. Israer-shuar Yus-shuar árum nuna atumin ankant ankant tsakinmakarum chíkich chíkich nunkanam matsatrumna nuna áatjarme. Puntu nunkanmasha, Karasea nunkanmasha, Kapatúsea nunkanmasha, Asia nunkanmasha, Pitinia nunkanmasha pujarmena nuna áatjarme.

² Yaunchu Apa Yus, “uwentikrataj” tímia núnisan achikmaitrume. Tura, Winia ajasat tusa ni Wakanijjai akantamkamiarme. Umirtukat tusa nuna túramiayi. Tura Jesukrístu numpejaisha atumí enentáin atsajkir chamir awajturmasmiarme. Wats, Yus tuke waitnentramar ti shiir awajtamsarat tusan wakerajrume.

Shiir enentáimsar pujustin

³ Wats, Yus, ii Uuntri Jesukrístu Apari ana nuna naari shiir awajsatai. Yussha ti waitnentrama asa, atak akiiniatniun suramsaitji. Jesukrístu jakamunmaya nantakin asantai, iikia atak akiiniar tuke iwiaaku pujustiniatiajnia nu arutramji.

⁴ Tura nayaimpiniam ikiurtamsamu ana nuna achikmintrum tusa Yus wakerawai. Nu ikiurtamsamu meserchamnia amuukachminiaiti. Tura nusha yajauchichuiti.

⁵ Yus nekas enentáimta asakrumin ni kakarmarijjai wearmarme. Tura tuke uwentikrampratniun, nunka amuuamunam paant iniakmastatna nu achikmintrum tusa tuke tsawant ni kakarmarijjai wáitmarme.

⁶ Nu enentáimsarum wararme. Kame ju nunkanam pujakrum itiurchat wáinkiashtarmeash. Tura ju nunkanam pujustin ishichkichukait. Ukunam pénger pujustaj tu enentáimsarum wararme.

⁷ Enentáimsatarum. Shuar kurin wakerana núnisan atumniasha umirtukat tusa Yus wakerutmarme. Aents kurin jinium áesainiawai, aya kurik juakat tusar. Kurin ti wakeruinia ásar, amuukamnia aijn túruiniawai. Atumsha, itiurchat wáinkiarmenta nujai, Yusan nekas enentáimtusartimpiash tusa nekasamuitrume. Nu enentáimtamur kurijjai nankaamas péngeraiti. Ukunam, Jesukrístu támatai, Yuska atumin “penger túraitrume” turamtajtsa wakerittiawai. Tura “Ashí shuar nuna nekaawar winia naarun uunt awajsarat” tusa túrutmattarme. Nu tuma asantai ju nunkanam nekapsamuitrume, itiurchat wáintrumna nujai.

⁸ Jesukrístu wáinchaiatrum anearme. Tura yamá wáinchiatrumek nekas enentáimtarume. Tuma asarum ti wararme. Nu warastin nayaimpiniam warastatjinia núniskete; nuka paant titin jeatsji.

⁹ Iimiatarum. Uwentikrurat tusarum Yus umirkachurmek. Nu uwempratin wainiu asarum waraarme.

Krístujai ii uwempratniun yaunchu etserkarmiayi

¹⁰⁻¹¹ Yus áentsun waitnenta asa, uwentikrataj tusa tuke wakerimiayi. Núnaka Yúsnan etserin etseriarmiayi. Kristu Wakanj ni enentáin pujuriarmia nu, túruntsain Kristu wáitsatniurijn jintiarmiayi. Tura ukunam ni ti shiir pujustintrinha etseriarmiayi. Túrasha “tuu áishmankait Kristu tutai, tura urutiák túrunat” tusar nu etserin émamkesar anintrusarmiayi.

12 Tura nii pujuiniaĩnkia túrunashtinian, antsu ti ukunam, ii pujajnia juĩ túrunatniun Yus nekaamtikiamiayi. Núnaka Yusa shiir chichamen ujatmakarmia nú shuar nekaprutmarime. Nú shuar Yusa Wakani, nayaimpinmaya akupkamu ana nuna nekatairijiai ujatmakurme. Maa, nu uwempratniun tájana nuna, nayaimpinmaya suntar nekaatai tusar wakeruiniawai, túrasha tujintiainiawai.

Pénker wekasatin

13 Tuma asamtai, péñker enentáimsarum tura péñker íimiasrum wekasatarum. Tura Jesukrístu ukunam wantiniak waitnentramprattana nu yawetsuk nákastarum.

14 Umin uchi áintsarmek yaunchu nékachu asarum wakerimiarmena nu iniaisarum Yus umirin atarum.

15 Ashí túramurmijiai timiá penker wekasatarum. Yus, untsurmakuana nu, péñker asamtai, átumka ni shuari asarum péñker wekasatarum.

16 “Wi péñker asamtai atumsha péñker wekasatarum” Yus tana nu ni Papiriin áarchamukait.

17 “Yus winia Aparuiti” tárugna nu aneartarum. Ashí aentsu túrutairin métek Yus nekaattawai. Nu neka asarum, ju nuñkanam pujarmena juĩ Yus ashamkatarum.

18 Warí, ánta wekasatniun atumí uuntri jintinramarmena nuyá Yus uwemtikramprarme. Túrasha kurisha kuitcha amuukamnia ainia nujai uwemtikrachmaitrume.

19 Antsu Kristu numpe ti shiira nujai uwemtikramuitrume. Nu nékarme. Yaunchu, shuar tunáa túrakui, Yus tímiayi, “murik yajauchichu tunamarcha maarum, Yus sútainiam ikiustarum. Nuna numpen wáinkian, atumí tunaarin tsankurattajai” tíniuyayi. Núnisañ Kristu in jarutramka asa ii tunaaríniã uwemtikrampraitji.

20 Nuñkan nájantsuk áentsun jaruktinian Krístun anaikiamiayi Yus. Tura wárik akupkachmiayi. Antsu yamá tsawantin, átum pujarmin, péñker pujusúk tusa wakerak, atumin jarutramkat tusa Krístun akupkamiayi.

21 Niiijai átumka Yus umiirume. Yuska Krístun jakamunmayan iniantki nankaamantu awajsamiayi. Yus nekas enentáimtakrum, aya péñkernak túrawai titiarum tusa túrait.

22 Yus nekas tana nuna, Yusa Wakani yainmakui, umirka asarum atumí wakaniin péñker ajasuitrume. Yus-shuarjai yajauch enentáimtunaisuk mai anenai ajatai tusarum tura asarum, nekas shiir enentáimtunaisrum mai anenai ajatarum.

23 Nekaatarum. Yusa chichame umirka asarum atak akiiniaitrum nuka ju nuñkanmayanchuiti. Antsu Yusa chichame iwiaaku tuke amuukachmin ana nú chichamjai tuke iwiaaku átiniaitrum.

24 Ju ayash tuke pujuschamniaiti. Yusa Papiriin junis áarmaiti: Ashí aentsti nupáa áaniuitji. Ii péñkerisha kukujia áaniuiti. Nupa wárik kaawai. Kukujsha núnisañ wárik iniaawai.

25 Tura Yusa chichamesha tuke amuukachminiati. Nu Chichamjai uwempramnia asamtai atumin etsernakuiti.

2

1 Tuma asamtai, ashí yajauch ana nu iniaisatarum. Anañkatin, ántar-chichamtin átin, chikichna wakeruktin, ashí tsanumpratniusha iniaisatarum.

2-3 Antsu, Uunt Jesukrístu waitnenkartutairi nekapsa asarum, uchi yama akiinia muntsun ti wakeruinia áintsarmek, Yusa chichame aya penkerkea nu

ti wakeruktarum. Yusa chichamejaj tuke tsawant tsakakrum tuke uwemprami tusarum túratarum.

Iwiaaku kaya

⁴ Ii Uuntri Kristu kayáa áantsankete. Tura shuar kayan yajauchin nakitainia núnisan Jesukristun nakitrarmiayi. Tura kayan ti penkeran wakeruinia núnisan, Yuska, “winia Uchir ti penkeraiti” tusa Jesukristun achikmiayi. Atumsha Jesukristu weantuktarum. Nii iwiaaku kayaiti.

⁵ Atumsha iwiaaku kaya áantsanketrume. Tuma asarum Yus wijjaj ni jeen jeamti tusarum tsankamaktarum. Tura nútiksarmek Jesukristuj atumí iwiaakmarj tsankamaktarum, Yus wakera nuna túrutati tusarum. Jesukristujaj tura asarum Yus shiir enentáimtikrume.

⁶ Jesukristunun Yusa Papiriin júnis áarmaiti:
“Iistarum. Kayan ti penkeran achikjai” Yus tímiayi. Jeen emka apujtuamurj atí tusan Seuñnum apujejai.

Nin enentáimtana nu ántar enentáimtatsui. Aarma ana nu penké kayan chichaatsui. Antsu Jesukristun tawai.

⁷ Yus umirkaitrumna nu, “kaya ti penkeraiti” tarume. Tura Yúsan umirainiatsna nuka Yusa Papiriin tana nujaj métek ániawai. Ju áarmaiti:
Jeen jeamin nakitrarmia nú kaya jeen emka apujtuamurj atí tusa apujamuiti.

⁸ Tura jusha aarma awai:

Tukumak iniaartin kayaiti.

Kame shuar Jesukristunun etserkamun nakitiakka, ¿enentáinium itiur penker wekasat?

Wats, nú shuar, Kristun umirainiachu ásar, tuke túrunatin asamtai tukumainiawai.

Yusna ajasaru ainia nu

⁹ Tura átumka Yus achikmaitrume. Tura, wínian pujurtursarat tusa yajauchinmayaj Uunt Yus akantamkaitrume. Yusna asarum penker enentáimin ajasurme. Tura Yus sumakmaitrume. Niisha winia penkerun etserturkarat tusa túrait. Kame kiritniunmayaj jíinkirum ni tsáapnintrin wekasatniun achirmakurme.

¹⁰ Yaunchu nusháa shuar áuyarme. Tura antsu yamaikia Yus-shuar ajasurum, Niiniu ajasurme. Yus-shuar ajatsrumnin, ¿ya waitnentrampria? Antsu yamaikia Yus waitnentrामuitrume.

“Yúsnaitjai” tu enentáimsatin

¹¹ Yatsurtirmin tájarme, Yusna ajasrum, ju nunkanam írar matsatu asarum, atumí ayashj wakerana nu tsankatkairap. Ayashim wakerana nu túrakminkia ame enentáim nujaj yajauch ajastatui.

¹² Yus-shuarchanum penker wekasatarum. Túrakrumninkia niisha yamá “Yus-shuar yajauch túruiniawai” ántar tuíniayatan, ukunmanka, Yusjaj inkiunaiktin tsawant jeamtai, penker wekarmena nuna enentáimturmasar, nú shuarsha Yúsan shiir awajsartatui.

¹³ Kristu atumí Uuntri asamtai, ju nunkanam akupin áiniana nusha umirkatniuitrume. Uunt akupin ashí akupin asamtai umirkatarum.

¹⁴ Tura ni akupeamurj ainia nusha tunaan túruinia núnaka asutiáti tura penkeran túruinia núnaka shiir awajsati tusa uunt akupin akupkamu ásarmatai umirkatarum.

¹⁵ Nekas penker wekaamurmijjai enentáimcha ainia nu netse chichaamurj itiatmamtikiatarum tusa Yus wakerawai.

¹⁶ Tunaanumia ankant ajasu asarum penker wekasatarum. Túrasha wi ankant ajaschajak tusarum nánkamsarum yajauch túrawairap. Antsu Yusna asarum, ni wakera nuna umirkatjai tusarum anearum wekasatarum.

¹⁷ Chíkichcha shiir enentáimtustarum. Yus-shuar ainia nusha aneetarum. Yus penker asamtai ashankatarum. Uunt akupin shiir awajsatarum.

Yus-shuarti katsuntratin

¹⁸ Takarniutirmesha ame úuntrum penker shiir enentáimturmakeisha tura yajauchiitkuisha umirkatarum.

¹⁹ Nekaatarum. Antar wáitkiarmainia nu, “Yus iirui” tu enentáimsa katsunteakrumka, ti penkeraiti.

²⁰ Yajauch túrawakmin asutiámamta katsunteakmekka nuisha warin ati. Antsu penker túrawakmin asutiámamta katsunteakmekka júka ti penker túrame Yusaj.

²¹ Núnisan túrunatin achikmaitrume. Kristu waitrutmasmiarme nu, Wi túraj núnisan túrawarmi tusar wáitsamiayi.

²² Krístuka tunaan penké túrachmiayi. Tura chikichkinkesha penké anankachmiayi.

²³ Kátsekeamsha Ninikia katsekachmiayi. Wáitkiamsha “yapajmiaktaj” tíchamiayi. Antsu “winia Apar Yus iisti’ tímiayi, Yus penker túrin asamtai.

²⁴ Kristu Nínki ni ayashin ii tunaarin entsaki krúsnum jarutramkamiaji. Tunáa enentáimtusairum tusa, antsu Yusaj penker wekasamniuram tusa jarutramkamiaji. Atumí enentáin tsuártaj tusa Kristu asutniámiayi.

²⁵ Murik ni pujutairin waketitniun nékatsna ántsarmek atumsha menkaka wekaimiarme. Tura yamaikia atumí wáitmaurin waketitnirume. Atumí wáitmau Krístuiti, atumí enentáin wáinnia nu.

3

Nuatnaikiaru itiur túratniuit

¹⁻² Tuma asamtai, nuwatiram atumí áishri umirkatarum. Amesha penker, Yus umirka weká asakmin, áishrum Yus-Chichaman umirchaitiat, ame túramurmin nekáa, ámekka chichaatsminin, niisha Yus-shuar ajastinian wakerittiwai.

³ Nu asamtai aya pátatek iwiarmampratniusha ti enentáimtusairap. Intiash ti penker iwiaratniusha, kurijjai iwiarmampratniusha, pushí ti kuitjai entsartincha ti enentáimtusairap.

⁴ Antsu, “nekas shíirmach ajastaj” tákumka, enentáimin “shiir kajeche átajai” tu enentáimsatarum. Nuka sakarchattawai. Tura nuka Yúsnumka ti penkeraiti.

⁵ Yaunchu núnisaran nuwa Yúsan enentáimtusarmia nu, tura Yúsan shiir enentáimtikratniun wakeriarmia nu, ni áishrin umirkar nujai ni enentáin shíirmach ajarar pujuarmiayi.

⁶ Atumí weatri Sara ni áishrin Apraáman umirmiayi. Umirin asa, “winia uuntru” tíniuyayi nin. Atumsha penker túrakrumka tura sapijmiatsuk wekaakrumka, Sarajai métek átatrume.

⁷ Tura áishmanfirmesha Yus wakerana nu nekaarum atumí nuwe shiir enentáimtusrum tsanintarum. Nuwemsha, nuwa asa, áishmanjai métek katsuntrachminiaiti. Tura niisha, ámijjai métek Yusa waitnenkartutairijjai tuke iwiaaku átinian takusminiaiti. Tu enentáimta asam ame núwem shiir enentáimtustá. Yus áujukuram iturchat atsuti tusarum túratarum.

Yúsnum penker wekasatin

⁸ Nuyasha ashí Yús-shuartirmin tájarme, aya chikichík enentaik atí. Waitnen-nairatarum. Nekas yatsum aneam núnisrumek anenaitiarum. Aya áminiuk enentáimtutsuk chikichan yáintaj tu enentáimsatarum.

⁹ Yajauch turamainiakuisha “yapajkiataj” tiirap. Katsekramainiakuisha “iikkiataj” tiirap. Antsu “Yus winia shiir awajtusuiti” tu enentáimsarum, yajauch turamainiana nu péñker awajsatarum.

¹⁰⁻¹² Yus-Chichamnum júnis aarma asamtai nu túratarum:

Uunt Yus péñker wekaana nuna wainiui, tura ni áujmancha ántawai. Tura yajauchin túrana nuna nakitrawai. Tuma asamtai, shiir pujustaj tákunka tura tuke tsawant warastinian wakerana nu, péñker ímiastí, yajauch chichakaj tusa tura wáitruawaj tusa. Tunaanumiá kanaki péñkeran túratí. Tuke enentáijiai shiir átinian eakti.

Tu áarmaiti.

Itiurchat aij péñker túratin

¹³ ¿Yaki yajauch túrutmat péñker turamnisha?

¹⁴ Túrasha péñker túrayatmek wáitiakminkia Yus shiir enentáimtikramprattarme. Tuma asamtai ashamkartutsuk, sapijmiatsuk wekasatniuitrume.

¹⁵ Tura “Kristu winia Úntruiti” tu enentáimtustarum. Tura “¿urukamtia Yus-shuar ajasuitiam?” turamainiakuisha, péñker áimkiamnium iwiarnarum pujustarum. Waantu enentáimtumsatuk, nin péñker enentáimtikrataj tusam túrata.

¹⁶ “Yúsjai péñker wekasataj” tu enentáimsarum wekasatarum. Yus-shuar asakrumin chíkich shuar ántar áujmatramainia nu ni ántar áujmatramsamun nekaawar natsaararat tusarum Yusjai péñker wekasatarum.

¹⁷ Yajauch túrakur wáitsatniujajinkia nankaamas, Yus wakerakuinkia péñker túrakur wáitsatniuka ti penkeraiti.

¹⁸ Kristu ii tunaarín asakártaj tusa jarutramkamiaji. Ashí asakárma asamtai atak tunaan jarukchatniuiti. Niisha tunaan penké túrichuitiat, ii tunáa asakrin wáitrutmasmiaji, Yúsnum ejetamtai tusa. Ayashijinkia jakayat ni wakaníjjiai ni ayashj ataksha iwiaaku ajasmiai.

¹⁹ Ni wakaníjjiai jakáa wakanin emetamu armia nuna etserkataj tusa wémiayi.

²⁰ Nusha yaunchu Nuai uunt kanun nájanuk sian্তু painti (120) uwi pujurmia nuj Yuska umirtukarat tusa ti nákamaitiat Nuai étserman umikcharmiayi. Nú kanunmasha ishichik, uchu, aents kanunam pujuinian yumijjiai uwemtikrarmiai.

²¹ Nu yumi Yus-shuarti imiantinian nakumui. Ii ayashj chamir awajsataj tusar imiantsuji. Antsu ii enentáij péñker atí tusar Yus sear imianji. Nujai iisha uwemji. Jesukristu nantakin asamtai, nujaj uwempraitji.

²² Tura Niisha nayaimpiniam we akupin pujutajinium Yusa untsuurjini apujsamuiti. Túramtai nayaimpinmaya suntarsha, tura ashí kakaram akupin áiniana nusha Jesukristun umirainiawai.

4

Ju nunkanam wáitsatin

¹ Kristu ni ayashijn wáitsa asamtai atumsha núnisrumek wáitsatin ákuisha, katsuntratjai titiarum. Ni ayashijn wáitiana nú shuar yajauchin páchiatsui.

² Antsu “iwiaakjana nuikia Yusa wakeramurín tuke umirkatjai” tu enentáimiui. Ni ayashj wakerana nuna yamaikia páchiatsui.

3 Warí, Yúsan nékainiatsna nú shuar túruiniana nu atumsha núkap túrichmakuram. Yus-shuar ajatsuk tsanirmatin wakerimiarme. Yajauch túratniusha, nampernum nampekrum ti yurumárum, enentáincha ajasrum charaatum ajatniusha, ántar-yusa namperiin yajauch ana nu najanatniusha nusha ashí wakerimiarme.

4 Tura surimiatsuk yajauch túrimiarmena nu iniaisa asakrumin, yaunchu atumjai nuna túrin armia nu, “urukantai iniaisara?” tusar yajauch áujmatramprume.

5 Túrasha ukunam nu aents ni túramurin etserkartatui. Iwiaaku ainia nunasha tura jákaru ainia nunasha Neka awai. Nii nu aentsun sumamtiki-awartatui.

6 Túrasha jaka armia nu Yusa shiir chichame ujankarmiayi. Ni ayashiin ashí shuarjai métek jakamniaitiatan Yus iwiaaku pujana núnisan ni wakaní iwiaaku pujusarat tusa ujankarmiayi.

Shuar yáintiniaitji

7 Ashí amuukatin jeatemayi. Tuma asamtai péñker enentáimsatarum; túrarum anearum Yus auju pujatarum.

8 Aneniamujai untsurí tunaasha tsankuratin awai. Tuma asamtai ashí nankaamas nuamtak anenaistarum.

9 Kajé-kajejainchu atumí jeen itiaaniátarum.

10 In ankant ankant shiir awajtamsatniun Yus ti núkap takakui. Tura in shiir awajtamsamujai chíkich shuarsha shiir awajsatarum tusa chíkich chíkich túratniun suramsaitji. Tuma asamtai péñker takaawa áintsarmek Yus amasmania nujai ame írutramuram yaiñtá.

11 Etserkatniun Yus amasuitkiuinikia ame tamena nu, Yus tana nujai métek atí. Chíkich shuar yáintiniaitkiumka Yus amaana nú kakarmajai túrata. Ashí túramna nu Yusa naari shiir atí tusam Jesukrístu náarijiaí túrata. Jesukrístun ashí aents shiir enentáimtusartí. Tura ashí áentsnum ni kakarmari take atí. Nuna tajai.

Yus-shuarti wáitsatin

12 Aneamu yatsurtiram, ti waitsatin nekapramsartin jeartampramna nu nusháa enentáimprairap. Wáitsatin támatai, “¿urukantai waitsa pujaj?” tu enentáimsairap. Kame túrunamniaiti.

13 Tuma aijn shiir enentáimsatarum. “Kristu wáitsamurin métek-taku wáitiakun péñkeraiti” tu enentáimsatarum. Ukunam Kristu winchari wáinkiarum timiá warasmi tusarum túratarum.

14 Krístunu asakrumin katsekkramkachartimpiash. Túmaitkiuisha Yusa Wakaní shiir ana nu atumiin pujurtamkui shiir awajsamuitrume. Katsekkramainia nú shuar imia Yusa Wakanin yajauch áujmatainiawai. Tura átumka Yusa Wakaní shiir awajearme.

15 Túra atumsha yajauch túrawairum aneartarum. Mankartana nu, kasamkana nu, tunáa túrana nu, tura chikichna páchiana nusha ni wáitsatniurinkete. Atumjaiinkia nu wáitsatniuka atsutí.

16 Tura antsu Krístunuiti tusar wishikramuk wáitkiarmainiakui natsaarairap. Krístunu asam wáitiayatmek, natsamtsuk Kristu naari shiir awajsata.

17 Yuska ni shuarin nekapsatajtsa nanamatniuiti. Tura nu tsawantcha jeayi. Yus imia in nekapramkuisha Yus-Chichaman umirainiatsna nú shuarsha urukawartin. Ti asutniáwartatui.

18 Imia Yus umirjinia nu uwempratniuri itiurchataitkiuisha tunaan túruiniana nusha urukawartin.

19 Tuma asamtai Yus wakeramujai wáitiainia nu, niisha Yus najanamu asa Yus iirsatí tusa take péñker túratí. Warí, Yuska take péñker túrichukait.

5

Yus-shuara uuntri túratin

¹ Yamaikia Yus-shuara úuntri^tiram, jintintjiarme. Wisha núnisnak Yus-shuara úuntriⁿtjai. Kristu wáitsamurⁱn wáinkiaitjai wisha. Tura ukunam ti shiir átatna nuⁱ chíkich Yus-shuara uuntri^a núnisnak wisha pachiinkiat^tajai.

² Yus-shuar ame ístiniaitmena nu, péⁿker iistá, murikiu wáinin ni murikriⁿ wainnia áintsamek. Nakittsuk, shiir enentáimsam túrata, Yus wakerana nuke. “Chíkich akupta asamtai túrat^tajai” tútsuk tura nu^jai kuítrintin ajastin enentáimsuk nekas wakeritia, Yusa takatri^t asamtai.

³ Turasha, “Yús-shuara uuntri^t ajasan, Yus-shuaran akuptia^t” tu enentáimsaip. Antsu shiir túramurmij^tai Yusa murikri^t jintintiata.

⁴ Nuⁿkia murikiu wainniu Uuntri^t taa wantiniak iwiarmamtai tawasap ti shíirmachia núninian suramsattawai. Aents súana nú shíirmach wari mamur^tiniaiti. Tura Úuntrum ámin suramsattana nuka pen^ké mamurchattawai.

Yus-shuarti umirnaikiatin

⁵ Tura natsatirmesha atumí uuntri^t umirkatarum. Kame yaunchu Yús-Papinium aarma asamtai ashí Yus-shuartiram nan^kaamantu enentáimtumatsuk umirnaikiatarum.

Waantu enentáimtuma núnaka Yus nakittiwai. Antsu nan^kaamantuchu enentáimtuma nuna Yus waitnentak yay^wawai. Tu aarmaiti.

⁶ Wats, Yus timiá kakaram asamtai, amek nekamam, pé^ejchach enentáij^tai enentáimtumasta. Nuⁿkia tsawant jeamtai ni wakerak Yus ámin pen^keri^t awajtamsattawai.

⁷ Yus ámin ti enentáimturmakui ame itiurchatrum ainia nu Yus ashí iiktusta.

⁸ Aneartarum tura ímiastarum. Íwianch atumí nemasri^t ana nu, uunt yawáa nuke, yanak emesrantia^t tusa e^eak tentaa wekaawai.

⁹ Tura tuke Yus nekas enentáimtusrum surimiaktarum. Ashí nun^kanam Yusnum atumí yach^t ainia nu átum wáitiarmena núnisaraⁿ wáitiainiwai. Nusha kajinmakchatniuitrume.

¹⁰ Wats, ishichik tsawant wáitsarmena nu nan^kaasmatai Yus ataksha péⁿker awajtamsattarme. Tura numi wewe wajana núnisaⁿ ikiakátmartatrume. Tura Yus ikiakárma asarum ni jintiⁿin tuke péⁿker wekasattarme. Ju Yus tuke in waitnentramtsujik. Tura iisha Jesukrístunu asakrin Nii^jai métek Yus ni shiir pujutanium tuke shiir pujusmintrum tusa achir^tmakuitji.

¹¹ Nú Yúsnasha ashí aents shiir enentáimtusartí. Tura ashí áentsnum ni kakarmari^t tuke atí. Nuke ati.

Amiak áujmamsamu

¹² Serpanuj^tai ju papin ishichik áarmaj nuna akupeajai. Serpanu Yus^tai péⁿker wekaak Yusnum winia yatsur ajasuiti; núnaka nékajai. Yus waitnentrama asa ti yainmakmania nuna enentáimtikeajrume ju papi^jai. Tura tuke ni waitnenkartutairiⁿin wekasatarum tájarne.

¹³ Papirúnianmaya^t atum^tai métek Yus achikma áinia nu amikmaatmarme. Winia uchir Markus núnisaⁿ amikmaatmawai.

¹⁴ Yus^tai yach^t ajasu asarum anenaisrum shiir awajnaisatarum. Jesukrístunu ajasuitrumna nuna Yus imiatkinchanum pujustinian suramsarat tusan wakerajai.

Nu atí.

PÍTIUR Ataksha papin áarar akupkamu

Pitiur Yus-shuaran áatramiania nu

¹ Wikia ju papin aajna ju Semun Pítruitjai. Jesukrístu akatramu asan ni takarniurintjai. Ii Yusri tura in Uwemtikramin Jesukrístu umirumna nuna atumniasha juna áatjarme. Niisha ashí áentsun métekrak enentáimtin asamtai atumsha iijiai métek Niiniu ajasurme. Nuka ti penkeraiti.

² Yus, tura ii Uuntri Jesussha nékarmena nú núkap nekaki wéakrumin, Yuska atumin ti nukap yáinmaktatrum tura ti nekas imiatkinchanum pujustinian suramsattarme. Nuna nekaan tuke núnisan atí tusan wakerajrume.

Yusai páchitkia atin

³ Yus uunt asa tura ashí túramnia asa, umirtukat tusa achirmakuitji. Nii neka asar atsumajnia nu wáinkiaitji. Yus-shuarti wekasatniusha, tura Nin aneatniusha ii atsumajnia nuna Yuska kakaram asa suramsaitji.

⁴ Niisha uunt asa tura tujinkiachu asa ni chichamen suramsaitji. Nu chichamsha ti kakarmaiti tura ti penkeraiti. Nu chichamjai atumsha atumí ayashj yajauch wakerana nuyá uwemprarum, Yusai páchitkia átinian suramsaitrume.

⁵ Yus umirkarme. Yamaikia juna túrataj tusarum kakartiniaitrum. Ti penker wekasatniuitrum. Nuyá Yusna nekaatniuitrum.

⁶ Nuyá yayauch túrashtin ímiastiniaitrum. Nuyá katsuntratniuitrum. Nuyá Yus shiir enentáimtusrum wekasatniuitrum.

⁷ Tura nuyá ashí shuar shiir enentáimtustiniaitrum. Tura nu nankaamas ashí shuar aneatniuitrum.

⁸ Ashí nu túrakrumka, tura tuke túrukum wéakrumka, nakiarchattarme. Túrarum ni takatri émamkesrum takastatrum. Tura ii Uuntri Jesukrístu nekas nekaattarme.

⁹ Tura nuna túruiniatsna nuka, kusurua áanin áiniawai. Jesukrístu wakera-murin enentáimtuiniatsui. Ni tunaariya uwemprarmia nuna kajinmataini-awai.

¹⁰ Tuma asamtai yatsurtiram, Yus atumin anaitiamak achirmakurmena nu tuke enentáimsarum wetarum. Túrakrumka penké iniarchattarme.

¹¹ Tura ii Uuntri Jesukrístu uwemtikramprajnia nu, Nii tuke akupeana nui, nakittsuk shiir awaintiamattarme.

¹² Tuma asamtai nékarminiñ tura Yusna nekas ana nuyá kanaatsrumniñ tuke enentáimtikratjarme.

¹³⁻¹⁴ Nekaatarum. Winia jákatniurun jeatema nuna ii Uuntri Jesukrístu ujakkayi. Tuma asamtai iwiaaku pujajna juik atumin tuke enentáimpratarum tusan jintinratniuitjarme, tu enentáimsajai.

¹⁵ Tura wi jakamtai, wi aajna juna tuke kajinmatkiirum tusan, wi jeajna nuna túrattajai.

Kristu waantu ajasun wáinkiamia nu

¹⁶ Ii Uuntri Jesukrístu kakarmari tura ni táratniuri etserkamajnia nu, aya áentsnumia ántar chichamchauyi. Antsu imia ii jiiijai Uunt Jesukrístu waantu ajasu wáinkia asar ujakmajrume.

¹⁷ Tura Apa Yus Jesukrístun shiir waantu awajsamia nui, ni imiá shiir pu-jutairiya chichaak tímiayi, “Ju ka winia ti aneamur Uchiruiti. Nin ti wararjai.”

¹⁸ Iisha naint “Yusna” tájinia nuí Niijjai pujá asar nu nayaimpinmaya chichaamu paant antukmaji.

¹⁹ Tura nuna nankaamas ti nekasa nu, Yúsna etserin yaunchu etserkarmia nusha nékaji. Ju étserma jusha, tsawant tsawaatsain kiritniunam ji keak tsáapin awajeana áintsan asantai, péñker enentáimta asarum péñker túrarme. Tura Kristu taa, yáñkuam etsantea núnisan atumí enentáin ashí paant awajsattawai. Tura nu tsawant jeatsain nu étserma tuke péñker enentáimtustarum.

²⁰ Tura ju emka nekaatarum. Shuar aya ni enentáimmarijjain, Yusa Wakaníjjainchu, Yus-Chicham urukamtai tu chicháa nuna nekaatniun jeatsui.

²¹ Warí, Yúsna etserin yaunchu etserkarmia nu, aya ni wakeramurijjain tícharmiayi. Nu áishman kan enentáin Yus pujursarmiayi. Tuma asa ni tiarmia nuna Yusa Wakaní jintintiam tiarmiayi.

2

Wait chichaman unuiniainia nu (Jútas 4-13)

¹ Tura Israer-shuarnum wait chichaman etserniusha páchitkiarmiayi. Atumíincha wait chichaman unuiniiau páchitkia ártatui. Niisha awajimtikrampratniun wakeruiniak wáitian ti yajauchin uukar unuiniartatui. Tura “Uunt Jesus uwentikrurmia nusha ántrai” tiartatui. Nuna takui ni amuukatniurisha wárik jeartiatui.

² Tura untsurí shuar ni yajauch túruiniamurín írsar métek túrawartatui. Iis, “Yus-Chichaman unuiniaitjai” tuíniayatan imiá yajauch túruiniakui untsurí aents “Yus-Chicham ántrai” tiartatui.

³ Kuítian ti wakeruinia ásar, wait chichaman unuitiamprar akíam kuítriniawartatui. Tura nú shuar yaunchu Yus jákatniunam sumamtikiawarma ásar, ni amuukatin tsawantri jeatemayi.

⁴ ¿Warí? Yuska ni suntari nayaimpiniam pujuarmia nunasha penké tsankurachmiayi. Antsu nayaimpinmaya jinium akupkarmiayi. Tura nekapsatin tsawant jeatsain kiritniunam jinkiamu emetamu pujuiniawai.

⁵ Yáunchuya shuarnasha Yus tsankurachmiayi. Antsu amuukarat tusa amaarkatniun akuptukarmiayi. Antsu aya Nuain, Yusjai wekasatniun etserin asantai ni shuari siati armia nujai uwentikramiayi.

⁶ Enentáimpratarum. Sutuma pépruncha tura Kumura pépruncha nayaimpinmaya jin akuptuk Yus mash amukmiayi. Aya yúnkunmik awajsamiayi. Úkunam nu túrunamun nekaawar, shuar tunáa túratin tsúumainian nekaawarat tusa túramiayi.

⁷ Tura Yus Ráutan uwentikramiayi. Péñker shuar asa, Sutumanmaya shuar imiá yajauch ásar tunáa túruiniakui, Raut kúntuts enentáimsamiayi.

⁸ Péñker áishman asa, nuyá shuara yajauchirín wáitiainiak, ni enentái péñker asantai tuke tsawant kúntuts enentáimiuk wáitmiayi.

⁹ Tura incha tunaan iniakturmakin, nu tunaanum nupetnakchati tusa Uunt Yus uwentikrampramniaitji, ni umirka asakrin. Túrasha yajauch shuárnaka nekapsatin tsawant jeakui ti asutniáwarat tusa Yus yámaikikia apujeawai.

¹⁰ Tura Yus akupeana nuna umirkatniun nakitrar ni yajauch wakeramurín túruinia nunasha Yuska nekas asutiáttawai. Enentáimcha áiniawai. Tura ni wakeramuriniak wakeruiniawai. Niijjai nankaamas akupin ainia nuna yajauch áujmatainiawai.

11 Warí, imia Yusa suntari Yusaj matsatainia nu, nuna túratniun tsúumainiawai. Nan̄kaamas kakaram tura nan̄kaamas uunt áiniayat nu akupniun katsekainiatsui.

12 Nu áishmaṅsha enentáincha yajasma núnin áiniawai. Achikiar mantamnatniuk akiinia áiniawai. Enentáimtsuk náṅkamsar yajauchin chichainiawai. Tuma ásar yajasma núnisaṅ jákartatui.

13 Chikichan wáitkiamia áintsan wáitsartatui. Tuke tsawant ni wakeramunak túruiniak “waraajai” tuiniawai. Tura atumjai irunar yurumáiniayataṅ atumin anaṅkramawar warainiawai. Nuka natsantaiti.

14 Nuwan wakerutskeka íniatsui. Tunaan yawetainiatsui. Yúpichuch ainia nú shuaran netse túratniun wakerumtikiainiawai. Kuítian wakeruktinniasha ti nékainiawai. Jákatniunam sumamawaru áiniawai.

15 Yúsnumaani naka wétsuk awajirarai. Peura uchiri Paraam Yúsnan etserniuitiat yaunchu awajimia núnisaṅ awajiniawai ju shuar. Paraamka tunaan tura, kuítian achiktinian ti wakerukmiayi.

16 Tura niisha tunáa túratajtsa weaj Yuska umpuurun chichachun aents chichaana nujaj métek chichamtikiamiayi. Nuṅkia umpuuru timia nujaj Yúsnan etserin ni netse túratniurin enentáimiar iniaisamiayi.

17 Nu áishmaṅsha yumirmat kuyua núnis áiniawai. Tura núnisaṅ yuraṅmisha kíariat nase umpuim meṅkaana nu, yumi ajuarcha ásar, penké ántar áiniawai. Warí, Yus-Chichamjai áentsun yainiainiatsui. Niisha imiá kirit ámanum tuke pujustin áiniawai.

18 Niisha ti chichainiayat ántar chichainiawai. Yajauch túratniujaj tura ayash wakera nújajsha páchim túriarmia nuyá kanakiarua nú shuaran ataksha tunaanum ajuartajtsa wakeruiniawai.

19 “Iiya núnis túrakrumka aṅkant átatrume” tu wénawai. Túrasha imia niṅki ni tunaariin emetamu áiniawai. Páantchakait. Shuar warí tunaajaim nupetnaka, nuna emetamurinti.

20 Kame shuar, uunt Jesukrístu uwemtikiartin ana nuna chichamen nékainiak ju nunkanam yajauch ainia nuyá uwempra ainia nu, tunáa nupetkam atak yajauchiniam iniainiakka, nuik pujumia nújajinkia nan̄kaamas yamá imiá yajauch pujuiniawai.

21 Yusa akupkamurin imiá péṅkera nuna Yus nú shuarnasha súsarmiayi. Túrasha nékainiayat tunaanum waketkiaru ásar ti asutniáwartatui. Tuma asamtai, nekas jintia nekaachuitkiun̄ka maak árainti.

22 Tíchamukait, “yawá iyak ataksha yúawai,” tura, “kuchisha imiaimiuitiat ataksha tsakusnum maajkimui.” Nu áishmaṅsha núnisaṅ yajauchiniam ataksha wáketainiawai.

3

Uunta tátintri

1 Aneamu yatsurtiram ju papin jimiará áatjarme. Mai papinium winia jintintiamurjai atumí chamir enentáin enentáimtikratjarum tusan wakerajrume.

2 Yúsnan etserin, péṅker wekain armia nuna etserkamuri enentáimturtarum. Tura ii Uuntri akupkamurin ni akatramurijijaj ujatmakarmia nusha enentáimpratarum. Jesukrístu uwentikrampramaj nuna chichamen tajai.

3 Jusha emka nekaatarum. Amuamu tsawantin Yúsnan wishikin wantinkiertatui. Tura niisha ni yajauch wakeramurin túrusar wekasartatui.

⁴Tura juna tiartatui. “¿Křístuka “wi atak tátatjai” timia nusha urukuit? Warí, ii uuntri yaunchu kajin_{ki}armia nuyá yapajiá_{ch}maiti. Yus yaunchu ju nun_{kan} najanamia nuyá yamaisha tuke núniskete” tiartatui.

⁵Túrasha nun_{kan}cha nayaimpincha Yus yaunchu najanamia nuna nekaatniun nakitiainiawai. Yusa chichamejai nun_{ka} entsaya jiinkimiayi tura nun_{ka}sha entsá nanatrawai, Yus timia nujai métek.

⁶Tura ukunam nu nun_{kan} amaarkamujai Yus emesramiayi. Ashí nuna nekaatniun nakitiainiawai.

⁷Tura Yus tiniu asamtai nayaimpisha nun_{ka}sha yamáiya nuka jijiai emesnarat tusa ikiusma áiniawai. Yus áentsun nekapsattana nu tsawantai ya-jauch aents emesnartatui; tura jisha nu tsawantai nun_{kan}cha nayaimpincha áesattawai.

⁸Tura jusha, aneamu yatsurtiram, enentáimsatarum. Uunt Křístujain_{ki} chikichík tsawant mir uwiya núniskete; mir uwisha chikichík tsawanta núniskete.

⁹Uunt Kristu, “atak tátatjai” tana nuna umitsuk men_{ka}kashtatui. Áyatik áentsti “wau taatsui” taji. ¿Urukamtai wau taatsua? In áentstin ná_{ka}rmaji. Shuar chikichíkisha men_{ka}kain_{in} tusa nakitiawai. Antsu ashí shuar enentáin yapajiá_{wa}rat tusa wakerawai.

¹⁰Túrasha Uunta tsawantri aya aneachma jeattawai. Kasa aya aneachma kiritniunam taana núnisan_{in} tátatui. Nu tsawantin nayaimpisha ipiamta núnis charáa timiatai men_{ka}kattawai. Tura nu_{in} ashí ír_{un}na nú_{ur}tiuk esaawartatui. Tura nun_{ka}sha tura ashí ír_{un}na nusha esaawartatui.

¹¹Ashí nu emesnartin neka asarum atumsha imiá nekas Yus tuke enentáimtusrum, takamtsuk umirkarum wekasatniuitrome.

¹²Yusa tsawantri wárik tati tusar, jintiá ímprusar ná_{ka}stiniaitji. Nu tsawantai nayaimpisha esáa emesnartatui, tura ashí ír_{un}na nú_{ur}tiuk ti tsuer ajas entsamnattawai.

¹³Tura iikia yamaram nayaimpisha, yamaram nun_{ka}sha ati tusar ná_{ka}jai. Nu átatui, tímiayi Yus. Tura nu_{in}sha aya pen_{ke}rerak átatui.

¹⁴Nu tuma asamtai, aneamu yatsurtiram, ju túrunati tusarum ná_{ka}rmena nu_{in}, imiatkinchanum wekasam chamir enentáimjai makuuchmin Yus wáitkiati tusarum wekasatarum.

¹⁵Ju nekaatarum. In uwentikramprataj tusa Yus ti ná_{ka}rmaji. Ii aneamu yachi Páprusha núnisan_{in} Yus ni nekatair_{in} susamia tímiatrusan_{in} áatramprarmene.

¹⁶Ashí papí aarmia nu_{in} Pápruka wi tajana nuna chichaawai. Kame ni áarmari_{in} chíkichka ishichik nekaachminiusha áiniawai. Né_{ka}chu ainia nú shuarsha, tura Yúsnum tariarcha ainia nusha Papru áarman yapajiá_{wa}rat nusháa jintintiainiawai. Tura chíkich chichamsha Yus-Chichamnumiá ana nuna núnisan_{in} túruiniawai. Túmainiakka nin_{ki} emesmamainiawai.

¹⁷Wátsek, aneamu yatsurtiram, túruntsain_{in} ujakjarmena nu neka asarum, yajauch shuar ana_{nk}ramatssa wakerutmainiak awajimtikrurain_{in} tusarum, tura Yusai tariarurmena nuyá iniaraij tusarum anearum wekasatarum.

¹⁸Tura ii Uuntri Jesukřistu in Uwentikkiartin ana nu, yamáí né_{ka}rmena nú nan_{ka}amas nekaatarum. Tura enentáimin nú nan_{ka}amas tariarum wetarum. Yamaisha tura tuke, ii Uuntri Jesukřistu ná_{ar}in uunt awájsartí. Nu atí.

JUAN

Emka papin árar akupkamu

Tuke iwaaku átinia nérentin Chicham ana nu

¹ Ashí nan̄kamamia nú yaunchu Yusa Uchirī tuke pujuuyayi. Nusha iisha anturkaitji. Nekas ii jiījiāi wáinkiaitji. Wáinkiarsha ii uwejējaisha antin̄kiuitji. Niisha Yúsán ti paant awajeak, Chícham tíminiaiti. Tura tuke iwiaaku átinia nérennuiti. Nuna áateajrume.

² Iwiaaku átinia nérenniusha paant nekanamiayi, nusha Jesukristuiti. Iisha Nii wáinkia asar nu étsereaji. Tura tuke iwiaaku átinia nérenniurī asa tuke Yus Apajāi pujuyayi. Tura yamaikia iinī paant ajatramsakrin atumniasha ujaajrume.

³ Ii Yus Apajāisha ni Uchirī Jesukristujāisha tsan̄inkiar nekas chikichík ajaji. Tura atumsha núnisrumek iij̄jiāi chikichík ajasuk tusar wáinkiamajnia nuna anturkamajnia nunasha ujaajrume.

⁴ Ti shiir warastarum tusan jūna áatjarne.

Yus tsáapniniaiti

⁵ Yus imiá tsáapnin asantai kiritin Nj̄inkia pen̄ké atsawai. Nu chichaman Jesukristu in unuitiamprakrin nuna atumniasha ujaajrume.

⁶ “Niījiāi tsan̄inkia pujaji” táyatar kiritniunam pujustinia áintsar tunaanum pujakrikia wáitraji tura nekas pen̄ker ana nu túratsji.

⁷ Yuska tuke tsáapninium pujuwiti. Iisha núnisrik tuke tsáapninium pu-jakrikia nuámtak nawamnaikiar pujuiniaji. Túrakrin Yus ni Uchirī Jesukristu numpéjāi ashí ii tunaarī japirtamji.

⁸ “Wí tunaan túrichuitjai” tákurkia ímia iik anan̄mamaji. Nekas ana nu nékatsji.

⁹ Antsu ii tunáarī Yus paant ujakrinkia Yuska tsan̄kurtamprattaji. Tura ii tunaar̄in asakátramprattaji. Yuska ti pen̄ker asa Niī tana nuna tímiatrusan̄ umikmin asa túrattawai.

¹⁰ Kame “Tunaan túrichuitjai” tákurkia nujaī “Yus wáitriniaiti” taji. Ni chichamesha ii enentáin pujurtamtsuji.

2

Jesukristu in Yúsán áujturmaidji

¹ Yus-shuartiram, tunaanum iniaarairum tusan jū papí áateajrume. Túrasha Yus-shuar tunáa túramtain̄kia Apa Yusan ii áujturmau awai. Nuka Jesukristuiti. Niisha ti pen̄keraiti. Niisha Yúsán áujturmakui Yusjāi ataksha iwiaarar pujus-tatji.

² Jesukristu ii tunaar̄in asakártaj tusa jarutramkamiaji. Túrasha aya íiniunkechu antsu ashí shuara tunaar̄in asakártaj tusa jarukmiayi.

³ Yus tana nu umirkurkia nuikia Yus nekas nékaitji.

⁴ Tura shuar “Yúsán nékaitjai” tayat Yus tana nuna umirchakka wáitrawai. Nekasa nuka ni enentáin atsawai.

⁵ Antsu shuar Yus tana nuna umireakka Yúsán ti shiir aneawai. Túrakur Niījiāi tsan̄inkiar pujamu nékaji.

⁶ “Yusjāi tsan̄inkia wekaajai” tana nú shuar Jesukristu wekasamia núnisan̄ wekasatniuiti.

Yamaram akupkamu

⁷ Yatsuru, yamaram akupkamun áattsujrume. Áyatik yámankamtaiknumiá antukmiarum nunak tájarme. Ashí atumin jintintiamu yaunchu akupkamuiti.

⁸ Túmaitiat nekas yamarma áitkiasnak áateajrume. Nu akupkamun Kristusha nekas iniakmasmai. Atumiincha nu akupkamu nekas paant awajsamuiti. Nujai kiritin menkaatemka asamtai tura nekas tsaapniñkia paant tsaapnirtasa pujakui nu akupkamun ataksháa aateajrume.

⁹ Shuar “tsáapninium pujajai” táyat chíkich Yus-shuaran nakitiakka tuke kiritniunam wekaawai.

¹⁰ Yus-shuaran aneana nu nekas tsáapninium pujawai. Niisha iniaatsuk chikichnasha tunaanum ajuarchamniaiti.

¹¹ Tura shuar chíkich Yus-shuaran nakitiakka kiritniunam tuke wekaawai. Tura kiritniunam iimiu asa itiuraani wea nuna nékatsui.

¹² Uchitirmincha, Jesukrístu jakamujai atumí tunaari tsankurnaru asakrumin juna áateajrume.

¹³ Úuntirmincha yámankamtaiknumiá tuke pujuuya nu nekáa asakrumin juna áateajrume. Úunmarutirmincha uunt iwianch nupetka asakrumin juna áateajrume.

Uchitirmincha, Yus Apa nekáa asakrumin áateajrume.

¹⁴ Úuntirmincha yámankamtaiknumiá tuke pujuuya nu nekáa asakrumin juna áatjarme. Úunmarutirmincha atumí enentáijiai Yus-Chicham umirkarum kakaram asarum íwianch nupetka asakrumin juna áatjarme.

¹⁵⁻¹⁷ Aya áentsnumiá ana nu yakiyanchuiti. Apa Yus súsachuiti. ¿Warimpiait nu? Júiti: ame ayashim wakerana nusha, ame ísam takustaj támena nusha, tura nankaamantu ajastin. Nuka ju nunkanmaya áiniawai. Shuar aya nunak wakerak Yúsnaka aneatsui. Kame ju nunkasha amuukattawai. Ashí nu wakeruktincha ti nekas amuukattawai. Túrasha shuar Yusa wakeramurin umiana nu tuke iwiaaku pujustatui Yusjai. Nu asamtai atumsha ju nunkanam ana nu pachikiairap. Tura aya juyá ana nu aya tákustin enentáimsáip.

Nekas chicham tura wait chicham

¹⁸ Uchirú, amuukatin tsawant jeatemayi. Atumsha Kristu nemasri tátin antukuitrume. Yamaikia untsurí Kristu nemasri wantinkarmatai amuukatin tsawant jeatemayi.

¹⁹ Nusha ii weeak ármayi. Túmaitiat nekas Yus-shuar ácharmayi. Nekas Yus-shuar ániakka tuke iijiai irunar pujaraayi. Tura jíinkarmatai nekas Yus-shuarcha ainia nu paant nekanamniaiti.

²⁰ Antsu atumniaka Yusa Shiir Wakanin Kristu suramsamtai ashí paant nékarme.

²¹ Nékachuitrume tu enentáimkiun áattsujrume. Antsu nekas chicham ana nu neka asakrumin paant áatjarme. Wáit-chichamsha nekas-chichamsha penké nushaachuk ainia.

²² Wáitrin júiti: Jesusan “Yus anaikiamuka Krístuchuiti” tana núiti. Núiti nekas Kristu nemasri. Yus Apancha ni Uchirincha nakitia asa Kristu nemasrinti.

²³ Yusa Uchirin nakitiainia nu Yus Apajaisha tsanin pujatsui. Tura Yusa Uchirin shiir awajea nu, Yus Apajaisha tsanin pujawai.

²⁴ Yámankamtaiknumiá antukmiarum nu atumí enentáin pujurtamsati. Nu túrakrum atumsha Yusa Uchirijiaisha Yus Apajaisha tuke tsaninkrum pujustatrume.

²⁵ Jesukrístusha Niijiai tuke iwiaaku pujustinian tsankatramkaitji.

²⁶ Anankartin írunkui juna áatjarme.

²⁷ Atumniasha Jesukrístu Yusa Shiir Wakanin suramsakrumin, nu Wakan tuke pujurtamkurmin shuar jintintramatin atsumatsrume. Antsu Yusa Wakaní ashí jintintramprume. Ni jintintrammasha imiá nekas asa wáitchaiti. Tuma asamtai Nii jintintramna áintsarum Krístujai tuke tsaninkrum pujus-tarum.

²⁸ Yamaikia, uchiru, Krístujai tuke tsaninkrum wekasatarum. Nu túrakrikia Nii támatai natsamtsuk ti shiir inkiunaikatjii.

²⁹ Atumsha Jesukrístu ti penkera nu nékarme. Núnisan ashí shuar péñkeran túruinia nuka Yusa uchiri áiniawai. Nusha nekaatarum.

3

Yusa uchiri áiniana nu

¹ Maa, shiir enentáimpratarum. Yus Apa ti anenma asa “winia uchir” tu anaitiamkaitji. Kame nekas ni uchirintji. Tuma asakrin jú nunkanmaya Yús-shuarcha nekarmainiatsji. Kame Yusnasha nékainiatsui.

² Aneamu yatsurtirmea, júna tájarme: nekas Yusa uchiri ajasuitji. Kame ukunam urukuk átaj' nusha nékatsji. Túrashajú paant nékaji: Jesukrístu támatai imia Nii paant wáinkiar Niijjai métek ajastatji.

³ Tura shuar shiir enentájjai nuna nákakka imia niñki shiir awajmamui Jesukristujai métek shiir atajai tusa.

⁴ Shuar tunáa túrakka Yus akupkamu umirkachuiti. Kame núiti tunaaka Yus akupkamu umirkashtin.

⁵ Jesukristu ii tunaari asakártaj tusa jú nunkanam támia nu nékarme. Tura Niñkia tunaan túrichuyayi.

⁶ Tuma asamtai shuar Niijjai tsanin wekaa nuka tunaanum wekaatsui. Antsu shuar tunaanum wekaakka nu shuar Krístun wáinchaiti, núnisan nékachuiti.

⁷ Uchiru, shuar anankramawairap. Péñker túrinkia Kristu ti penker asamtai niisha péñkeraiti.

⁸ Antsu shuar tunaanum wekaana nu iwianchnaiti íwianch tuke tunaan túrin asamtai. Yusa Uchiri jú nunkanam táwiti ashí íwianch túramun emesrataj tusa.

⁹ Shuar nekas Yusjai akiinia nu tunaanum wekaatsui. Yusa uchiri asa Yusa iwiaakmarijjai wekaawai. Tuma asa tunaanum tuke wekaatsui.

¹⁰ Shuar péñker túratsna nuka tura Yus-shuaran kajera nuka Yus-shuarchaiti. Nujai Yusa uchiri ainia nusha tura iwianchi uchiri ainia nusha paant nekaamniaiti.

Mai anenai ajatin

¹¹ Atumsha yámankamtaikniumia chicham antukmiarum nu júiti: mai anenai ajartin.

¹² Iisha Kaíñkia áanin áchatniuitji. Íwianch-shuar asa ni yachin máamiayi. Tura ¿urukamtai maamia? Enentaimprata. Nii yajauch asa tura ni yachi péñker asamtai máamiayi.

¹³ Yatsurtiram, jú nunkanmaya shuar nakitramainiakui ti enentáimsairap.

¹⁴ Iikia jákatniunmaya uwempra asar' nekas iwiaaku pujaji. Túmakur Yus-shuar ainia nu aneaji. Nujai yamaram iwiaakma takakjinia nu imiá páantaiti. Shuar Yus-shuaran aneachkunka tuke jákatniunam wekaawai.

¹⁵ Shuar Yus-shuaran nakitiakka mankartinia núnisaiti. Tura mankartinkia tuke amuicha iwiaakmanum pujuiniatsui. Nuka nékaji.

¹⁶ Jesukrístu in jarutramka asakrin nujai nekas in anenmaj nu nékaji. Iisha núnisrik Yus-shuar ainia nu ti aneakur ni yaintai tusar jarukmin átinaaitji.

17 Túrasha shuar chíkich Yus-shuar atsumana nuna takakiat waitnentachkunka nekas ni enentájjai Yúsan aneawash.

18 Uchiru, aya chíchamjain anenain áchatniuitji antsu nekas aneniakur péñker túrar yáiniaiktiniaitji.

Yusaj natsamtsuk jeamniaitji

19 Jujai ii Yúsai sapijmiatsuk jeatniusha tura nekas Yus-shuaraitji nu nekaatniusha nekapmampramniaitji.

20 Ii enentái yajauch túramun enentáimtikramkurnisha Yus iijjai nankaamas ashí mash nékatsuk.

21 Tura, aneamu yatsurtiram, ii enentái yajauch túramun enentáimtikramchakrinkia Yúsai sapijmiatsuk jeamniaitji.

22 Tura ni wakeramu túrakrikia tura ni chichamesha umiru asakrin ashí ii seaj nuna suramsattaji.

23 Júiti Yus akupkamu: ni Uchiri Jesukrístu nekas enentáimtustin tura Kristu timia áintsarik shuartisha mai anenai ajartin.

24 Shuar ni chichamen umía nuka Yusjai tsaniñ wekaawai tura Yus niijjai tsaniñ wekaawai. Mai chikichik ajasu áiniawai. Tura Yusa Wakanj ii enentáin pujá asamtai nujai Yus iijjai tsaniñ wekaana nu nékaji.

4

Yusa Wakanisha tura Kristu nemasri wakancha

1 Aneamu yatsuru, untsurí shuar wáitruiniak “wi Yúsnan etserniuitjai” tuiniawai. Tuma asamtai ashí shuar “wi Yusa Wakanin takakkun chichaajai” tuinia nu péñker nekapsuk enentáimtusairap. Antsu ísrum nekas Yusa Wakanimpiashit tura chíkich wakaniashit nu nekaatarum.

2 Jujai nekapsarum ya nekas Yusa Wakanin takaka nu nekaattarme: Shuar “Jesus Yusa Uchiri Krístuítat nekas aents ajas ayashimkiamiayi” tana nu Yusa Wakanin nekas takakui.

3 Tura Jesusan tu enentáimtatsna nuka Yusa Wakanin takaktsui antsu Kristu nemasri wakanin takakui. Kame Kristu nemasri wakanin tatin tama ántichukaitrum. Nu wakan yamaikia ju nunkanam táwiti.

4 Uchiru, átumka Yusna asarum Yus atumí enentáin pujawai. Tura ju nunkanmaya shuara enentáin íwianch pujawai. Atumiin pujana nuka niijjai nankaamas kakaram asamtai wáitrin ainia nu nupetkaitrume.

5 Niisha ju nunkanmaya ásar aya ju nunkanmayan áujmatainiawai. Túmainiakui ju nunkanmaya shuar ti penker anturainiawai.

6 Antsu iikia Yúsnaitji. Tuma asakrin Yúsan nékainia nu anturtamainiaji. Tura Yúsnachu ainia nu anturtamainiatsji. Nujai nekas Wakanin takakusha tura wáitrin wakanin takakusha nekaamniaiti.

Yus tuke anenkratniuiti

7 Aneamu yatsuru, anenaitin Yúsnumia asamtai mai anenai ajartai. Shuar anenkratniua nuka Yusa uchiri asa Yúsnancha nékawai.

8 Shuar anenkratcha nuka Yúsnanka nékatsui. Kame Yuska tuke anenkratniuiti.

9 Tuma asa ni Uchiri chikichkiniak ju nunkanam akupturmakmiaji. Iisha ni túrunamujai nekas iwiaaku pujaji. Nujai Yus in yáinmak ni anenkrattain paant iniakturmasmiaji.

10 Jujai nekas anenkrattainkia paant nekanamniaiti: ii Yus aneaj núchaiti. Antsu ii ti tunáa árinin Nii aneachmaitatan Yuska ti anenma asa ni Uchirin ii tunaarin asakarat tusa akupturmakmiaj nujai nekas nekanamniaiti.

¹¹ Aneamu yatsuru, Yus núnis anenma asakrin iisha núnisrik mai anenai ajartai.

¹² Chikichkisha Yúsan wáinkiachuiti. Túmaitiat mai anenai ajakrikia Yus ii enentáin pujurtamkui Niijjai métek anenkratin ajaji.

¹³ Yus ni Wakanin suramsa asakrin Yus iijjai tsaniñ wekaana nusha tura ii Niijjai tsaniñkia wekaajnia nusha, nujai nékaji.

¹⁴ Yus Apa ni Uchirin ashí shuaran uwemtikrarat tusa ju nunkanam akupkamia nu wáinkia asarⁱ étsereaji.

¹⁵ “Jesus Yusa Uchirinti” tana nu shuarjai Yus tsaniñ wekaawai tura niisha Yusjai tsaniñ wekaawai. Mai chikichik ajasu ániawai.

¹⁶ Yus in anenmajnia nu ti nekas nékaji. Yus tuke anenkratniuiti. Tuma asamtai shuar anenkartakka Yusjai tsaniñ wekaawai tura Yusha niijjai tsaniñ wekaawai. Mai chikichik ajasu ániawai.

¹⁷ Núnisar ti penker anenkartin ajaji. Túrarⁱ súmamtikiatin tsawantaji natsamtsuk wajastatji. Kame ju nunkanam pujayatrik Jesukristujai méteketji.

¹⁸ Nekas anenaiyamunam sápij atsawai. Antsu nekas anenaiyamunam sápij menkaawai. Aya asutiáin akui sapijmiaktinaiti. Tuma asamtai ántar sapijmiana nu nekas anenkratchaiti.

¹⁹ Yus emka in anenma asakrin iisha Nii aneaji.

²⁰ Tura shuar “wi Yúsan aneajai” táyat chíkich Yus-shuaran nakitiakka nuka wáitriniaiti. Kame Yus-shuaran tuke wainnia nuna aneachkunka çitiurak Yusan wáinchasha aneat?

²¹ Yus incha juna turammiaji: Yúsan anea nu shuar chíkich Yus-shuarnasha aneatniuiti.

5

Ju nunkanmaja íranna nu núpeteaji

¹ Ashí “Jesus Yusa Uchiri Krístuiti” tu enentáimtana nú shuar Yusa uchirinti. Tura aparí aneakrikia ni uchirísha aneattaji.

² Yus Apa aneakur tura Nii wakera nu umirkur Yusa uchirísha ashí aneattaji.

³⁻⁴ Yus aneakur Nii tana nu umiktatji. Ashí Yusa uchiríya nu Yúsan nekas enentáimta asa, ashí ju nunkanmaja íranna nuna núpeteawai. Nu asamtai Yus tana nu umirkatin itiurchatchaiti.

⁵ Aya “Jesus Yusa Uchirinti” tu enentáimtana nú shuar ju nunkanmaja ana nuna awakamniaiti.

Jesukristu “Yusa Uchirinti” tu etserainia nu

⁶ Jesukristu jú nunkanam taa entsajai imiankui Yus nayaimpinmaja chichaak “Juka winia aneamu Uchiruiti” tímiayi. Tura nuyá Jesus jakamtai ni numpé puarmiayi. Entsajai imianin ni takatrin nankamamiayi túrasha in jarutramak ni takatrin amukmiayi ju nunkanam. Chikichkinkia túrutsuk mai metek túra asamtai Yusa Uchiríya nu paant nekanamniaiti. Yusa Wakanísha tuke nekas tiniua nu métek tawai.

⁷⁻⁸ Nu asamtai menaint “Yusa Uchirinti” Jesusan tuiniawai: Nayaimpiniam Yus Apa tura Jesukristu, Chícham aa nu, tura Yus Wakancha; nunkanmasha Yus Wakancha, entsasha tura numpasha. Mash métekrak tuiniawai.

⁹ Aents étserainiakui ántureaji. Nuna nankaamas Yus ni Uchirin tana nu nekas anturkatniuitji.

¹⁰ Yusa Uchirin enentáimtana nú shuar ni enentáincha nékawai. Antsu Yus ni Uchirin timian enentáimtatsna nú shuar Yúsan enentáimtachu asa Yúsan “wáitriniaiti” tawai.

¹¹ Yus ni Uchirín timia júiti: Tuke iwiaaku pujutai nérenniuiti tura nu iwiaakmancha in suramsaitji.

¹² Yusa Uchirijjai tsaniñ wekaana nú shuar, nu iwiaakmajai iwiaaku pujuiniawai. Tura Yusa Uchirijjai tsaniñ wekaatsna nú shuar, nu iwiaaku átinnium pujatsui.

Amuak Yus nekas enentáimtustinian áarmiania nu

¹³ Yusa Uchirí nekas enentáimtakrum tuke amuicha iwiaakmajai iwiaaku pujarme. Nu nekaatarum tusan júna áatjarne.

¹⁴⁻¹⁵ Yus wakeramujai métek seakrinkia anturtamji. Tura anturtamkurin ii seamaj nu nekas takusua nu enentáimpramniaitji. Nu neka asar Yus ti shiir enentáimtaji.

¹⁶ Tunáa awai jákatniunam júana nu. Shuar nu tunaan túramtainkia Yus áujtustin ántrai. Tura shuar chíkich tunaan túraquiñkia nuka nekas Yus áujtustiniaiti. Nekas jákatniunam júatsna nú tunaan túraitkiuñkia iwiaaku átinian Yus susattawai.

¹⁷ Ashí yajauchⁱ ana nuka tunaiti. Tura jákatniunam júatsna nú tunaasha awai.

¹⁸ Nekas Yusjai akiinia nú shuar tunaanum tuke wekaatsui. Antsu Yusa Uchirí nin ti penker wainkiui íwianch antinchiachminiaiti.

¹⁹ Iikia nekas Yúsnaítji tura ashí jú nunkanmaya shuar iwianchnia áiniawai.

²⁰ Yusa Uchirí jú nunkanam taa nekas-Yus aa nuna paant jintinramji. Yusa Uchirí Jesukristujai tsaniñkia wekaakur nekas-Yusa nujajsha tsaniñkiar wekaaji. Nekas-Yus asa tuke iwiaaku átinia nuna nérenniuiti.

²¹ Uchirú, ántar-yus írunna nuí pachiinkiairap. Antsu nujaj aneartarum.

Nuke atí.

JUAN

Ataksha papin aar akupkamu

Nekasa nunasha tura anenaitniuncha ujaawai

¹ Wi Juan Yus-shuara uuntri asan ii umai Yus achikma nuna tura ni uchirincha ju papin áateajai. Wisha nekasan atumin aneajrume. Tura aya wíkichu antsu ashí Yus-shuar ainia nusha nekas chichaman nekaawaru ásar atumin anenmarme.

² Nekas-chicham tuke amuutsuk ii enentáin pujá asamtai aneajrume.

³ Yus ii Aparisha tura ii Uuntri Jesukristusha, Yus Apa Uchiri asa, atumin anenmak imiatkinchanum shiir pujustinian waitnentramak yainmakarti. Nujai nekas-chicham nekaarum anenaittiarme.

⁴ Ame uchiram Yus Apa akupkamujai métek umiiniakui nuna nekaan ti shiir enentáimprajai. Nekas-chichaman umin áiniawai.

⁵ Yamaikia, umaru, tájame: mai anenai ajartai. Yamaram akupkamun áattsujme antsu yámankamtaik antukmiaj nunak tájame.

⁶ Nekas anenkartinia nú shuar Yus akupkamun uminiaiti. Tura Yus akupkamuka “anenkartin tuke atarum” tawai. Nusha yámankamtaiknumia antukuitrume.

Anankartincha írunui

⁷ Ju nunkanam anankartincha ti írunui. Jesukristu nekas aents ajas aki-iniamia nuna enentáimtuiniatsui. Nu shuar anankartin ásar Kristu nemasri áiniawai.

⁸ Nu shuarjai aneartarum. Yajauch shuar ántar yayakrumin Yus átum takasman métek akirmakchamniaiti. Antsu aneara takasakrumin Yus métek akirmakarmi.

⁹ Ashí shuar Kristu jintíamun iniais “nankaamas nékajai” tana nu, Yúsnachuiti. Antsu Kristu jintíamun umiana nu shuar Yus Apajajisha tura ni Uchirijjaisha mai tsaniñ pujawai.

¹⁰ Shuar Kristu chichamen jintíachu atumí jeen írmástaj tusa jeakui awayáwairap tura “shiir taume” tiirap.

¹¹ Kame nu shuar “shiir taume” tákumka nu shuar yajauch jintíamu jímiareame.

Umíamu chicham

¹² Ti nukap atumjai áujmatsatniun wakerajai. Túrasha ju papinium mashi áatrashtatjarne. Antsu imia wiki atumin iyakun jeátjai. Nuyá naka chichasar ti shiir warastatji.

¹³ Ame kaim Yus achikma nuna uchiri amikmaatmainiawai.

Nuke atí.

JUAN

Nuyá Ukunam papin aar akupkamu

Kayu ti penker shuaraiti

¹ Wi Juan Yus-shuara uuntri asan winia amikrun Kayun ju papin áateajai. Wissha ti nekas aneajme.

² Aneamu yatsurú, Yusjai penker wekaakum ame wakanim penker pujana núnisan ame ayashmisha penker atí tusan Yúsan áujtajme.

³ Ame nekas chicham umirman shuar ju taar ujatarmayi. Tura nuna antukan ti warasmajai.

⁴ Yus-shuar nekas chichaman umiiniakui imiá shiir enentáimtuinijai.

⁵ Aneamu yatsurú, chíkich Yus-shuar ti penker yayame. Kame yajaya yujainia nusha nekas yayame. Nu penkeraiti.

⁶ Nu shuar ame nekas anenamun ju taar Yus-shuar iruntramunam et-serkarai. Ataksha irauwenakui atsumainiana nu súsam shiir akupkarta. Penker wáinkiumka Yus shiir enentáimtikrattame.

⁷ Nu shuar Jesukristun takarsatai tusar wekainiawai. Túrawar Yus-shuarcha ainia nuna kuítrijiai yurumátniun nakitrarmatai

⁸ ii Yus-shuartikia nii atsumainia nu ajamsatniuitji. Nekas chichaman etserainia nu, yainkiartai tusar túratniuitji.

Tiútrepes yajauch túriniaiti

⁹ Ashí Yus-shuar árumna nuna papin akuptukmajrume. Kame nékajai, Tiútrepes nankaamantu enentáimtumak ii tájinia nuna umiktinian nakitiawai.

¹⁰ Nu asantai nuí jean ni yajauch túramun etsertuktatjai. Nii ántar ti áujmatuk tsanumprutmaji. Tura nu arantcha Yúsnan takainia nu irainiakui awayáiniatsui. Tura chíkich awayátaj tákuisha suritiawai. Tura nuyá Yus-shuarjai iruntratniun surimiawai.

¹¹ Aneamu yatsurú, nu yajauch túramu jumamkiirap antsu penker túratarum. Penker túrinia nuka Yúsnaiti. Antsu tunáa túrinia nuka Yúsan nékachuiti.

Timitriu penker túriniaiti

¹² Imiá nekas penker shuar asantai ashí shuar Timitriun penker áujmatainiawai. Iisha núnisrik penker shuaraiti tákurin nekas tájinia nusha nékarne.

Umíamu chicham

¹³ Wi ti nukap titinian wakerajme. Túrasha ju papinium mashi áatrashtatjame

¹⁴ wárik ítin asan. Nuí jean chichasmi.

¹⁵ Shiir pujustá. Juyá amikrum amikmaatmainiawai. Ii amikrishá chikichik chikichik amikmaatruata.

JÚTAS papin áarar akuptukma

Jútas Yus-shuaran papin áateawai

¹ Wi Jútas Jakupu yachintjai. Jesukrístu takarin asan ashí Yus Apa ni shuari átinian achikma ainia nuna ju papin áateajai. Jesukrístujai tsaniñkiaru áarmatai Yus nin wainiainiawai niñjiai kanakchatniun.

² Yus ti waitnentramak imiatkinchanum tuke shiir pujustinian yainmakarti. Ti anenma asa túrati.

Ti tunáa shuar írunui (2 Pítíur 2.1-17)

³⁻⁴ Aneamu yatsurú, iikia mai metek Yus-shuar asar ju uwempratin chichaman áatratniun wakerukjarme. Túrasha ti yajauch shuar anankramawar atumín pachiinkiarmai. Niisha “Yus ti anenkartin asamtai páchitsuk tunáa túramnaitji” tuiniawai. Nu arantcha Yus in Akuptamniuncha tura ii Uuntri Jesukrístuncha nakitin ániawai. Nu asamtai nu shuaran “yaunchu sumamawaruiti” tímiayi Yus. Tuma asamtai tájarme “Tuke Yus-Chicham yapajíashtinian ashí Yus-shuar akasmatkarat tusar susamuiti. Wátsek, kakaram ajastarum” tájarme.

⁵ Yaunchu Uunt Yus Israer-shuaran túramia nu nékarme. Nuna atak enentáimtikratjarme. Ejiptu nunkanmaya júkiar Nin umirkacharua nuna máawarmiayi.

⁶ Nayaimpinmaya suntarsha ni pujutairin ajapa ikiukiar Yus susamun umitsuk iniaisarmiayi. Túrawarmatai Yus kiritniunam jirujai tuke jiníkiá sepunam apujas pujurainiawai. Tura Uunt Tsawant jeamtai súmamtikiawartatui.

⁷ Núnisan Sutuma péprusha Kumura péprusha tura tíjiuch péprusha áishmanjaisha nuwajaisha ti yajauch nuamtak tsanirmanainiakui ti tunaan penké túrachmin ana nunasha túrin ármiai. Túmainiakui ashí shuar ashamkarat tusa Yus amuicha jinium asutiáwarmiai.

⁸ Ayu. Atumín yajauch shuar ainia nu, yaunchu túrunamun enentáimtsuk tuke yajauch enentáimiainiak ni ayashin yajauch awajmamainiawai, Yusnasha nakitiainiawai, tura ashí akupin ainia nunasha yajauch áujmatainiawai.

⁹ Antsu Mikiar, nayaimpinmaya suntara kapitántrintiat, iwianchjai máaniak Muisaisa ayashin akasmatak “áaniumsha” tu chicharkachmiayi. Antsu áyatik “Yus írmastí” tímiayi.

¹⁰ Túrasha ju shuarka nékainiatsna nuna nánkamsar yajauch chicharainiawai. Tura nékainiana nuka yawá áinis enentáimtsuk áyatik nékainiawai. Tura nújaisha imia niñki yajauch emesmamainiawai.

¹¹ Maa, anearartí. Kaín yajauchin túramia núnis tura ásar jákartatui. Tura Parama áinis kuítian ti wakeruuniak imia niñki tunaanum tsankamakaru ániawai. Tura Kurea áinis ashí akupniun nakitin ániak kajiníkiartatui.

¹² Átum nuamtak anenaitiai-jisat nájankurmin nu shuar chikichan enentáimtutsuk Yusnasha ashamtsuk imia niñki enentáimtumainiawai. Penké ántar ániak yumi kíar tee ajasua núnin ániawai. Tura nase umpuim yútutsuk nankamainiawai. Árak nerektin nantutin nerechua áanin ániawai. Tuma ásar uwemu penké jaka áanin ániawai.

¹³ Entsa nujan^{krak} saurⁱⁿ ajekeawai. Nu shuarsha núnisar ni natsantrⁱⁿ natsamtsuk ajekenawai. Tura yaa waakua áanin áiniawai. Tuma ásar nekas kiritniunam tuke men^{kakatin} áiniawai.

¹⁴ Atan^{ka} tiran^{kiyayi} Eruk. Ti pen^{ker} Yús^{nan} etserin asa jun^a tímiayi “Uunt Yus ti untsur^í ni shuar^{ijjai} winittiawai.

¹⁵ Nuyá ashí shuar túrawarman nekaattawai. Tura ashí yajauch shuar-nasha ti tunáa túrawarua nuj^{ai} tura Yús^{an} yajauch áujmatsarua núj^aisha súmam^{tikiawartatui}” tímiayi Eruk.

¹⁶ Nu shuarka p^{en}ker^a nuj^{ai} waratsuk “yajauchiiti” tuiniawai. Aya ni ay^ashí wakeramunak wakeruiniawai. Nan^{ka}amantu enentáimtumainiak chichainiawai. Tura chikich shuaran shiir chicharainiaksha aya nii wakera nuna túrutati tusa p^{en}ker^a chichainiawai.

Yus-shuar enentáimtikratin

¹⁷ Tura atumsha, aneamu yatsurú, ii Uuntri ^{Jesukrístu} akatramurⁱ yáunchu “aneartarum” tiarmiania nusha enentáimtustarum.

¹⁸ “Amúamu tsawant ishichik ajatesmatai shuar Yús^{nan} wishikrar nakitrartatui. Tura ni yajauch wakeramurⁱⁿiak umí pujuartatui” tiarmiayi.

¹⁹ Nu yajauch shuar atumín akantamenawai. Ju nun^{kan}mayanak pách^{iniak} Yusa Wakanⁱⁿ takakainiatsui.

²⁰ Tura átumka, aneamu yatsurú, tuke Yus nekas enentáimtusrum kakaram ajastarum. Yusa Wakanⁱ kakarmari^{ijjai} ashí Yus seatarum.

²¹ Yus ti anenmakui nii wakera nu wakeruktarum atumsha. Túrarum ni anenmamu shiir nekaattarme. Tsawant winiawai, ii Uuntri ^{Jesukrístu} in waitnentrama asa tuke shiir Nii^{jjai} pujustinian amastatji. Nu tsawant naká pujutarum.

²² Mai yapaji ajá ainia nu naka enentáimtikratarum.

²³ Chí^{kich} shuarsha jiniumi^a júsatniua áitkiasrum uwemtikratarum. Tura chikichcha ti yajauch ásarmatai anearum waitnentratarum. Tura ni pushir^{isha} ni tunaari^{jjai} maatra asamtai muí^{kiatniuiti}.

Yús^{an} shiir awajeawai

²⁴⁻²⁵ Yus chikichkiiti. Ti nekaiti. In uwemtikkiartin asa ni kakarmari^{ijjai} yainmakminiaiti tunaanum iniarchatniun. Tuma asa tunaaj^{ai} máatrachu awajtamas ni ti shí^{ir}marⁱⁿ ejetamtatrume. Túrutma ti waramtikramsattarme. Ii Uuntri ^{Jesukrístu} túrunamuj^{ai} Yuska Niⁿki shiir awajsatniuiti tura nan^{ka}amantu enentáimtustiniaiti. Yáunchusha, yamaisha, tura tuke ashí akupin atí.

Nú^{kete}.

APUKARÍPSIS Jesukrístu Juánkan paant iniaktusma

Jesukristu paant awajsamu

¹ Jú áarman Jesukrístun Yus ujakmiayi. Wárik túrunatta nuna ni shuarin ujakarat tusa ujakmiayi. Tuma asamtai Jesukrístu ni suntarin akupak ashí winia paant awajtursamai. Wisha Juánkaitjai.

² Yus timia nunasha tura Jesukrístu ujakamia nunasha tura wi íismaj nunasha ti paant aya nekasa nuna tájai. Penké wáitratsjai.

³ Jú papin áujea nu shuarsha tura núnisan juna ántana nusha nekas enentáimtuiniakka shiir ártatui. Ukunam átatna nuna ujaawai tura jeatemayi.

Juan siati péprunam Yus-shuar írunun juna áateawai

⁴ Wi, Juan, Asia nunkanam siati (7) péprunam Yus-shuar írunun ju papin áateajai. Yus anenma asa imiatkinchanum shiir pujustinian yainmakarti. Nu Yus tuke yaunchu pujuyayi. Núnisan yamaisha pujawai. Tura nuke winittiwai. Akupin pujutainium Yusa Wakanj siati naka pujurainia nusha shiir yainmakarti.

⁵ Núnisan Jesukrístu shiir yainmakarti. Nii tana nu imiá nekasaiti. Ni-isha emka jakamunmaya yamaram iwiaakmajai nantakniuiti. Tura ju nunkanmaya akupniu Uuntrinti. In anenma asa ni numpejai ii tunaarin nijiatramkaitji.

⁶ Túrutma akupin awajtamsaitji. Tura ni Aparj Yúsnan pujursarat tusa anaitiamkaitji. Nii ti kakaram asa tuke shiir awajnasti. Núnisan atí.

⁷ Wats, Krístuka yuranmijjai winittiwai. Tura íjuarmia nusha tura ashí shuarsha nuna wáinkiertatui. Túrawar ashí sapijmiainiak útiartatui. Maa, nekas nunis átatui.

⁸ Krístuka “yámankamtaiknumia amúamunmasha ashí nérenniuitjai, tawai. Wisha A rétranmaya Y rétranam ashí retra áintsaitjai” tawai ti kakaram Uunt Kristu. Tuke yaunchu pujuyayi. Núnisan yamaisha pujawai. Tura nuke ataksha winittiwai.

Kristu ti shiir wincha ajasun Juan wainkiamiania nu

⁹ Wi Juan atumjai métek waitia asan atumí yachintjai. Núnisan nayaimpiniam, Yus akupeana nuj, métek jeattaji. Tura katsuntrar nákastinian Jesukrístu mái métek súramji. Yus-Chichamnasha tura Jesukrístu timiancha étsereakun nayaantsa ajapén atentramunam Pátmus nunkanam sepunam apujsamua núnisan pujumjai.

¹⁰ Tumai tumin tsawantai Yusa Wakanj pujurtakui winia úkuruiní kakantar untsumman antukmajai. Kachu umpúamua núnis ti kakarmauyayi.

¹¹ Tura turutmiai “Wiitjai. Yámankamtaiknumia amúamunam ashí nérenniuitjai. Wisha A rétranmaya Y rétranam ashí retra áintsaitjai, tímiai. Tuma asamtai wáinmena ju, papinium áaram Asia nunkanam siati péprunam Yus-shuar írunna nuj akuptukarta. Ju peprunam akupkarta: Ipisiusha, Ismirnasha, Pírkamusha, Tiatirasha, Sártissha, Piratírpiasha, tura Rautiséasha.” Tu turutmiai.

¹² Túrutkui yaki túruta tusan apajasan íkman siati shirikip ikiutain kurijjai najanamun wainkiamjai.

13 Tura nuí ajapén Aents Ajasua núninan wajan wáinkiamjai. Tura pushirísha naweá timiai nuntuaru entsaruyi. Emenmamkesha kúriniak netsepnum emenmamauyi.

14 Tura ni muuke intiashísha murikiu uré nijiamua núnisan tura micha núnisan ti puju chírauyi. Tura ni jjiisha jiya núniskeyi.

15 Ni nawesha ti wincha asa jiru yanikutaku jiamua áinis néwar ajarmiyai. Ni chichamesha ti kakaram asa uunt entsa téter ajá áintsauyi.

16 Ni untsuurini siati yaan takakuyi. Tura ni weneniasha puniá áinis tsakatskat mai ere awajsamu jínmiyai. Ni yapisha etsa ti etsantuk íischamnia núnisauyi.

17 Nuna wáinkian jaka áintsanak naween iniaarmajai. Túrasha ni untsuurí uwejen awaantrus turutmiyai, “Ashamkaip. Wiitjai. Yámankamtaiknumiá amúamunmasha tuke pujuwitjai, timiai.

18 Wikia tuke iwiaakuitjai. Jakamiajai tura nantakin jákashtinian tuke iwiaaku pujajai. Jákatniuncha tura jaka pujuinia nuna yawirin takakkun nérenniuitjai, timiai.

19 Tuma asamtai wáinkiamna jusha, yamá wáinmena nusha, tura ukunam átatna nusha aartá, timiai.

20 Wáinmena nu júnisaiti. Siati shirikip-ikiutai kúrik wainkiam nu, siati péprunam Yus-shuar írunun nakumeawai. Tura winia untsuuruini siati yaa wainkiam nu, siati péprunmayá Yus-shuaran wáinniun nakumenawai, turutmiyai.

2

Ipisiunam chícham áatramu

1 Nuyá turutmiyai ‘Ipisiunmayá Yus-shuaran wáinin ju áatratá: Siati yaan untsuurnum takakna nu tura núnisan siati shirikip-ikiutai kúrinman ajapén atenta wekáa nu, tawai:

2 “Ashí ame túram nuna nékajai. Ti kakaram takaakum katsunteamuncha nékajai. Yajauch shuar nawamtsuk awemaitrume. Shuar “Yus akatramuitjai” ántar tuinia nu nekaamarme. Wáitrinia nusha nékaitme.

3 Ti wáitiatmek katsuntram yawetsuk Winia ti takartusuitme.

4 Túrin áminin júna títiatjame. Yus aneakum yámankamtaik ti penker wekainiuyam núnisam túratsme.

5 Tuma asam ikiuknium nu enentáimpram yaunchu túriniuyam núnismek ataksha túrata. Túrachakminkia ame shiripkirmin wari jurustajame.

6 Tura ju pénger túriniaitme. Nikiurás shuar nakitniuitrume. Nu shuar “ayash wakeramu páchitsuk túramniati” tuiniakui Wisha núnisnak nakitiajai.

7 Kuíshtinia nu shuar Yusa Wakaní ashí Yus-shuaran timian antukti: Nupetmakunka tuke iwiaaku pujutai numi nerén yúatniun tsanekatkatjai. Nu numi Yus pujana nuí wajaawai.” Tu áartá’ turutmiyai.

Ismirnanam chícham áatramu

8 Nuyá turutmiyai ‘Ismirnanmayá Yus-shuaran wáinin ju áatratá: Yámankamtaiknumiá amúamunam tuke pujuwa nu tura núnisan jaka nantakmia nu, tawai:

9 “Ashí ame túram nuna nékajai. Ti wáitiam nunasha tura kuítrinchaitmena nunasha nékajai. Antsu Yusainkia ti kuítrinniuitme. Tura shuar uunt iwianch Satanása shuari áiniyat “Israer-shuaraitjai” tuiniak yajauch áujmatramena nuna nékajai.

10 Ti wáitsattamna nu ashamkaip. Íwianch ashí nekapramsataj tusa atumiñian sepunam enkeattawai. Nuí tias tsawant wáitsattarme. Jáakmesha tuke

Yus shiir enentáimtusakminkia tawaspan nakurin susatniua nútiksanak nekas iwiaakman tuke shiir pujustinian amastatjai.

¹¹ Kuíshtinia nu shuar Yusa Wakanj ashí Yus-shuaran timian antukti: Nupetmakuka jimiará jákatniuka waitsashtatui.” Tu aartá’ turutmiai.

Pírkamunam chícham áatramu

¹² Nuyá turutmiai ‘Pírkamunmayá Yus-shuaran wáinin ju áatratá: Puniá áinis tsakatskat mai ere awajsamun takakna nu, tawai:

¹³ “Ashí ame túram nuna nékajai. Uunt iwianch Satanás akupea nuj pujayatmek tuke shiir enentáimturmena nuna nékajai. Winia shiir umirtínian Ántipasan máawarmataisha Winia enentáimtursatin ishichkisha iniaitiuschamame. Nusha íwianch pujutainium pujakrumin túrunamai.

¹⁴ Túrin áminin juna títiatjame. Atumijinjá shuar yaunchu Yúsnan etserin Param yajauch jintíamun tuke emetainiawai. Niisha Israer-shuaran tunáa awajsat tusa kapitían Parakan unuiniarmiayi. Nuyá Parak Yus-sutai namanken maar yúatniun Israer-shuaran jintintiamiayi. Núnisan ti tsanirmatniun jintintiamiayi.

¹⁵ Atumijinjá shuarsha Nikiurás jintíamuncha, Wi nakitiaj nuna, iniaisatniun nakitiainiawai.

¹⁶ Wats, enentáimpram iniaisata. Túrachakminkia Wi wari winin winia wenuruiya puniá jiinia nujai máaniaktajai.

¹⁷ Kuíshtinia nu shuar Yusa Wakanj ashí Yus-shuaran timian antukti: Nupetmakunka maná yurumkan uukma nuna ayurattajai. Nuyá kaya pújun susattajai. Nu kayanam yamaram naari aarma átatui. Nunasha chíkich shuarka penké nékatsain aya achía nuke nekaattawai.” Tu aartá’ turutmiai.

Tiatiranam chícham áatramu

¹⁸ Nuyá turutmiai ‘Tiatiranmayá Yus-shuaran wáinin ju áatratá: Yusa Uchirí jii jijiai métek keena nu tura núnisan nawe jiru yanikutaku jiamua núnis néwar ajawa nu, tawai:

¹⁹ “Ashí ame túram nuna nékajai. Yus shiir enentáimtakum aneam nuna nékajai. Tura katsuntram penker takaamna nuna nékajai. Yáunchujai nankaamas penker túrame yamaikia.

²⁰ Túrin áminin juna títiatjame. Nu nuwá Jesapír awematsme. “Yúsnan unuiniajai” tinia Wíi shuaran ti anankenawai. Tura ti tsanirmatniuncha tura ántar-yus-sutai namanken maar yúatniun jintintiniawai.

²¹ Niisha ni tunaarin enentáimiar iniaisat tusan nákasuitjai. Tura nakitiawai.

²² Wátsek, sunkurmatkiakan peaknum áepsattajai. Tura chíkichcha nijijai tsanirma ainia nunasha nijijai métek ti wáitkiastatjai. Ni tunaarin enentáimiar iniaisacharmatainkia túrattajai.

²³ Ni uchirincha mantúattajai. Nujai ashí Yus-shuar Wi nekas shuara enentáin nékaitjia nuna nekaawartatui. Atumniasha chikichik chikichik takasmajai métek akiktatjarne.

²⁴ Tura chíkich shuar Tiatiranmayatiram, nú chicham enentáimtuscharmema nu, “nekas iwianchnia uukma” tútajya nu nékachu asakrumin atakka túratniun patatkashtatjarne.

²⁵ Tura Wi jeatsain takakrum nu emetatarum.

²⁶ Nupetmakunka Wi wakeraj nunak tuke initsuk túrana nuna untsurí nunkanam akupkatniun tsankatkattajai.

²⁷ Winia Apar tsankatrukma núnisnak akupkatniun tsankatkattajai. Tura nuwe najanam jirujai awati ijiakratniua áinis ti kakarmajai akupkattawai.

²⁸ Yankuam káshik jiinia nuna susattajai.

²⁹ Kuíshtinia nu shuar Yusa Wakanj ashí Yus-shuaran timian antukti.” Tu aartá’ turutmiai.

3

Sártisnum chícham áatramu

¹ Nuyá turutmiai ‘Sártisnumiá Yus-shuaran wáinin ju áatratá: Siati Yusa Wakanj takakna nu tura núnisan siati yaan takakna nu, tawai: “Ashí ame túram nuna nékajai. Iwiaakua áintsan wekayatmek Wijiainkia jákaitme.

² Shintiarta. Kajinia nu umpuim ekeemakta. Kame Yusjai ísam penker túrichuitme.

³ Yus-Chicham ti shiir enentáijjai emka antukmam nu ataksha enentáimpram emetata. Tura tunaarumsha enentáimpram iniaisata. Tura iniaiyachkumniñkia kasa núnisnak nékatsmin jeartiatjame.

⁴ Tura Sártisnum shuar ishichik pushiri wapik máacharu pujuiniawai. Nusha ti penker ániak pushí pújun entsarar Wijiai wekasartatui.

⁵ Nupetmakuka pushí pújun entsartatui. Tura iwiaaku átinia nu papiniumiá ni naari áarman japirashtatjai. Antsu winia Apar tura ashí nayaimpinmaya suntar ímmianum shiir áujmattsattajai.

⁶ Kuíshtinia nu shuar Yusa Wakanj ashí Yus-shuaran timian antukti.” Tu aartá,” turutmiai.

Piratírpianam chícham áatramu

⁷ Nuyá turutmiai ‘Piratírpianmaya Yus-shuaran wáinin ju áatratá: Ti shiir túrin tuke nekasan tana nu, uunt akupin Tawitia yawiri takaku asa uraimtai chíkich penké epenchamniati. Tura epenmiatai chíkich penké uraichminiati. Juna tawai:

⁸ “Ashí ame túram nuna nékajai. Kakarmachuitiatmek winia chichamur shiir enentáimtakum Winia initieschaitme. Tuma asakmin wáitin uratjame. Nuna chíkich penké epenchamniati.

⁹ Wátsek. Shuar wáitruiniak “Israer-shuaraitjai” tuíniayat uunt iwianch Satanás-shuar ániawai. Nu shuáran, nekas ámin aneajna nuna nekaawarat tusan amijini tikishmatkiarartatjai.

¹⁰ Katsuntrata tímiaj nu, shiir umirka asakmin Wissha ti wáitsatin ashí nunkanam átatna nuyá uwemtikrattajme. Nu wáitsatniujai ashí nunkanmaya shuar nekarnasartatui.

¹¹ Wárik winittijai. Takakmena nu emetata. Akinkiatniuitmena nuna chíkich shuar atantramkiarain.

¹² Nupetmakunka winia Yusru jee tankirin awajsattajai. Tura nuyá penké júnkichartatui. Tura njin winia Yusru náarin áatrattajai. Tura winia Yusru pépruri náarincha áatrattajai. Nu pépruka nayaimpinmaya yamaram Jerusarenka Yúsnumiá tára núiti. Núnisan winia yamaram náarun njin áatrattajai.

¹³ Kuíshtinia nu shuar Yusa Wakanj ashí Yus-shuaran timian antukti.” Tu aartá,” turutmiai.

Rautiséanam chícham áatramu

¹⁴ Nuyá turutmiai ‘Rautiséanamaya Yus-shuaran wáinin ju áatratá: Wáitruitsuk nekasa nunak tiniua nu tura núnisan ashí Yus najanamun Úntriya nu, tawai:

¹⁵ “Ashí ame túram nuna nékajai. Tura michaash míchachuitme. Núnisan tsuersha tsuérchaitme. Míchaitkiumsha tura tsuéraitkiumsha maak.

¹⁶ Kame míchachu tsuercha antsu aya tsuésuetak asakmin imiutkattajme.

¹⁷ Iis, “Kuítrinniuitjai, ti irumpraitjai, warinkisha atsumatsjai” tame. Túrasha ashí yajauch, wáitnenmai, kuítrincha, kusuru, tura misú iyajme.

¹⁸ Tuma asam Winí ti shiir kuri sumakam nekas kuítrintin ajasta. Turam puju pushí Winí sumakam misú ajasma shiir entsarta. Pénker ímprataj tusam j̄in̄ium en̄ketai en̄keeta.

¹⁹ Aneajna nuna chichareajai. Nu asantai kakaram ajasam tunaarum enentáimpram iniaisata.

²⁰ Enentáimprata. Shuar wáitiniam wajas untsumna áintsanak Wi ámin untsúajme. Winia anturtukam ame enentáimin awaintiakminkia Wi wáintiuattajme. Tura wayan ámijiaj yurumáttajai. Tura amesha Wijiaj yurumáttame.

²¹ Nupetmakuka akupin pujutainium Wijiaj pujustatui. Wisha núnisnak nupetmaku asan winia Aparjaj akupin pujutainium pujusuitjai.

²² Kuísh̄tinia nu shuar Yusa Wakanj ashí Yus-shuaran timian antukti.” Tu áartá,” turutmiai.

4

Nayaimpiniam Yúsan shiir awajenawai

¹ Nu nan̄kaasmatai nayaimpiniam waiti uranniun wainkiamjai. Tura nuyá kakaram untsumman antukmajai. Nuik kachujaj métek kakaram chichartukma nu turutmiai “Juí yakí wakatá. Ukunam átatna nuna iniaktus-tatjame” turutmiai.

² Nu chichamaik Yusa Wakanj akantukmiai. Túrutamtai nayaimpiniam akupin pujutainium pujan wainkiamjai.

³ Niisha jasp̄i kayasha tura kurnarínia kayasha nujaj métek ti wínchayui. Akupin pujutain̄ tuntiak téntakuyi. Nusha ismirarta kayajaj métekeyi.

⁴ Chíkich̄ paintikuatru (24) akupin pujutain̄ nu pujutain̄ téntakarun wainkiamjai. Tura paintikuatru uunt púju entsarainian tura kurin etsen̄krakainian, nuj̄ pujuinian wainkiamjai.

⁵ Akuptainiumiã peemsha ipiamtasha untsummasha jíiniarmai. Tura nu pujutainium naka siati shirikip kearmai. Nusha siati Yusa Wakanj̄inti.

⁶ Núnisan̄ nu pujutainium naka nayaantsa áanin̄ ti saar amai. Nu pujutainium wakenmaan̄isha niisháa tan̄ku kuatru téntakar ármiai. Ukur̄in̄isha tura eemsha j̄ij̄ irunmiai.

⁷ Emka tan̄ku úunt yawãa áanniuyi. Chíkichka turu uchichia áanniuyi. Tura chikichcha shuara yapia áanniuyi. Tura chíkichka churuwia nanamua áanniuyi.

⁸ Nusha sais nanamtin̄ ármiai. Tura j̄ij̄isha ti irunainiak ashí wainmarmai. Káshisha tsawaisha tuke iniaitsuk̄ junā tiniu armai:

“Ti nekas pénkeraiti Uunt Yus. Ashí nan̄kaamas kakarmaiti. Tuke yaunchu pujuyayi. Núnisan̄ yamaisha pujawai. Tura ataksha juke winittiwai” tiniu armai.

⁹ Tura uunt pujutainium pujana nu tuke iwiaaku pujú asantai nu tanku ti shiir awajsar yúmin̄kiak pujuriarmai.

¹⁰ Túruiniakui paintikuatru uunt tuke iwiaaku pujun tikishmatainiak ni etsen̄krutair̄in̄ naka áepuiniak tuiniawai:

¹¹ “Úuntá, ii Yús̄rin̄me. Tuke shiir awajmainme. Ashí nankaamas kakarmaitme. Amek ashí írunna nu najanaitme. Tura aya wakerakum najanamame. Ame wakerakmin̄ irunainiwai” tuiniawai.

5

Murikkia papin urakminiaiiti

¹ Nuyá akupin pujutainium pujuya nuna untsuurín papí penuarma áanniun wainkiamjai. Nu papisha initiaanísha tura pátatkesha áarmauyi. Tura urakchamnia atí tusa siati anujtukmajai kaki peekmauyi.

² Tura nayaimpinmaya suntar ti kakarma nu, ti kakantar inintran wainkiamjai. Niisha tímiai “¿Ya akupniuk ju papin kaki anujkamun jaak urakminiait?”

³ Tura nayaimpinmayasha nunkanmayasha tura jakamunmayasha chikichisha nu papin urakmin atsumiayi. Áujtsuk íistiníasha tujinkiarmai. Tímianu akupin atsumai.

⁴ Nu papin uraktincha tura áujtsatniusha, kame íistincha atsakui ti úutmiajai.

⁵ Nuyá chikichik uunt turutmiai “Ti úutíp. Israer-shuarnumiá Úunt-yawa, Jutá weeá awai. Niisha uunt akupin Tawit weeaiti. Nupetmaku asa nu papí siati anujtukman jaak urakminiaiti.”

⁶ Nuyá uunt pujutaiya nui tura kuaru tan̄kunam ajapén tura úuntnum ajapén Murik wajan wainkiamjai. Maamua áintsan̄ketiat iwiaakuyi. Kachurísha siátayi. Ni jiīsha siátayi. Nusha Yusa Wakanī siati ashí nunkanam akupramua nuuyi.

⁷ Nu Murik we nekas uunt Akupniun untsuurínian nu papin achikmiayi.

⁸ Tura papin achikmatai kuaru tan̄kusha tura paintikuatru uunt arma nusha Murikiun tikishmatrarmiayi. Ashí uunt arpa tuntuítaiin takaku armai. Tura ashí kun̄kuin en̄ketain kuri najanamun takaku armai. Nu kun̄kuin Yus-shuar áujsamuiti.

⁹ Ju yamaram kantancha kantampriarmai:

“Amek imiá nan̄kaamas akupniuitme. Amek papí achikiam anujtukmarí jaakminiaitme. Yus-sutai naman̄kea áinis mantamna asam túramniaitme. Ashí nunkanmaya shuarnumiásha Yusna árat tusam ame numpemjai in sumakmiame.

¹⁰ Turam akupin awajkartusuitme tura núnisan̄ ii Yúsr̄iniun pujurin awajkartusuitme. Tuma asakmin akupin ajarar ju nunkanam akupkattaji.” Tu kantamainiawai.

¹¹ Tura untsurí nayaimpinmaya suntar uunt pujutaincha tan̄kuncha tura úuntnasha en̄kekawarun wainkiamjai. Nusha nekapmarchamnia ti untsurí armia nu

¹² kakantar tiarmai:

“Murik mantamnamiá nu akupin ajarar ashí kakarmancha, kuítniasha, nekaatniuncha Nīnki achikminiaiti. Tura nupetmaku asantai yuminsar Nin ti shiir awajsatin áiniawai.” Tu tiarmai.

¹³ Núnisan̄ ashí Yus najanamu, nayaimpiniam írunna nusha, nunkanam írunna nusha, nunká init írunna nusha, nayaantsanam írunna nusha, tuínian antukmajai:

“Muriksha tura akuptainium pujana nusha ti shiir tura ti kakaram ásar tuke iniaitsuk shiir awajnasarti.” Tu tuiniawai.

¹⁴ Tura kuaru tan̄kusha “Tuke núnisan̄ atí” tiarmai. Tura paintikuatru uuntka nekas tuke iwiaaku pujá nuna tikishmatar shiir awajsarmai.

6

Murikkia siati anujtukman jaakmai

¹ Wi iyakui Murikkia chikichík anujtukman jaakmai. Túramtai chikichík tan̄ku ipiamtajai métek kakantar untsunmun antukmajai. “Winim iitiá” turutmiai.

² Túrutkui kaway pújun wainkiamjai. Nui ekeemia nu tíshimkiun takakuyi. Akuptai tawaspasha susamuyi. Tura tuke nupetmaktinian jíinkimiai.

³ Nuyá Murik anujtukma jímiaran jáakmatai taṅku jímiara nu “Winim iitiá” turutmiai.

⁴ Túrutkui chíkich kawai kapaakun wainkiamjai. Nui ekeemia nuna puniá úuntan susamuyi. Nusha shiir pujuscharat tusa ashí jú nuṅkanmaya shuaran máanaimtikiatniun akupkamuyi.

⁵ Nuyá Murik anujtukma menaintiun jáakmatai taṅku menaintiua nu “Winim íitiá” turutmiai. Túrutkui kaway mukusan wainkiamjai. Nui ekeemia nusha kijin nekapmatain takakuyi.

⁶ Tura kuaru taṅku ajapénia chichaamun antukmajai. “Tsawant takamt-suk takaakmesha apatkuka penké ishichik sumakmin átatme. Tura núnisan machasha nijiamchisha amuukacharat tusam penker wáinkiaata.” Tu timiai.

⁷ Nuyá Murik anujtukma kuátrun jáakmatai taṅku kuarua nu “Winim iitiá” turutmiai.

⁸ Túrutkui kaway yaṅkun wainkiamjai. Nui ekeemia nusha Jákatín náartiniuyi. Tura nuna úkurin Jatai nemark winimiai. Nusha ashí nuṅkanmaya shuar kuaru akankamunmaya chikichkin máatniun akup-karmauyi. Nusha mesetjaisha tsukajaisha sunkurjaisha tura yajasmajai máawarmai.

⁹ Nuyá Murik anujtukma sénkun jáakmatai Yus-sutai kunkuin ekem-tai wakenmaaní íismajai. Túran Yus-Chichaman etserainiakui máawarma wakanin wainkiamjai.

¹⁰ Nusha kakantar unsumainiak tiarmai “Uuntá, ti penker asam támena nu umiátsmek. ¿Urutiak nuṅká pujuinia nú shuar ii mantamnamunam yapa-jmiátruktam?” tiarmai.

¹¹ Tuíniakui pushí pújun susar tiarmai “Chikichcha Krístunun etserainiakui mantamnatin áiniawai. Nu náakrum ishichik ayampratarum” tiarmai.

¹² Nuyásha Murik anujtukma sáisan jáakmatai ti úurun wainkiamjai. Tsawai-nantusha itiurchat ajasua áintsan mukusa ajasmai. Kashí-nantusha numpá áintsan ajasmai.

¹³ Tura yaasha wampú nere nase umpuim ti majuwa áintsan kákekarmai.

¹⁴ Nayaimpisha papí penuara júamua áintsan menkakamai. Tura naintcha yajá apujnasarmai. Tura nuṅkasha nayaantsanam ajapén atentrainia nusha yajá apujnasarmai.

¹⁵ Tura jú nuṅkanam akupin ainia nusha náinnium wear kayá wáanam uumkarmai. Nijiaisha ashí shuar, uuntcha, kuítriniusha, suntara kapi-tiántrisha, ashí kakaram ainia nusha, tura takarniusha ankant ainia nujai náinnium wearmai.

¹⁶⁻¹⁷ Túrawar náinniasha kayancha tiarmai “Asutniátin tsawant jeayi. ¿Yaki aun katsuntrat? Nu asamtai saanakim in yutukratata. Túrarum Murik ti asutiámataj nuyásha tura akupin pujana nuyásha uukratkatá” tiarmai.

7

Israer-shuarnumiá anujturma armia nu

¹ Nu nankaasmatai kuaru nayaimpinmaya suntar, nunkaa kuaru yantamén wajan wainkiamjai. Nusha kuaru nase kukarsha, nayaantsan-masha tura kampunniunmasha nasenkacharat tusar wajatiarmai.

² Kame kukarsha tura nayaantsanmasha yajauch awajsatniun akupkamu armai. Tura chíkich suntarnasha nantu tátainmaania winian wainkiamjai. Tuke iwiaaku Yusa anujtutairin takakauyi. Nusha kuaru suntaran kakantar untsuak tímiai,

³ “Ii Yusri takarin ainia nu nijiainium áarar anujtatsriniṅ kukarsha, nayaantsasha, tura kampunniusha nasejai yajauch awajsairap” timiai.

⁴ Tura tímiajni untsurí aara anujtukman antukmajai. Ashí Israer-shuar tuse (12) shuar weeá ainia nuyá chikichik siantu kuarenta kuatru mir (144.000) armai.

⁵ Jutá weeanmaya tuse mir (12.000) anujtukma armai. Rupin weeanmayasha tuse mir anujtukma armai. Kat weeanmayasha tuse mir anujtukma armai.

⁶ Aser weeanmayasha tuse mir anujtukma armai. Niptarí weeanmayasha tuse mir anujtukma armai. Manasés weeanmayasha tuse mir anujtukma armai.

⁷ Semeun weeanmayasha tuse mir anujtukma armai. Riwí weeanmayasha tuse mir anujtukma armai. Ísakar weeanmayasha tuse mir anujtukma armai.

⁸ Sapurún weeanmayasha tuse mir anujtukma armai. Jusé weeanmayasha tuse mir anujtukma armai. Pinjamín weeanmayasha tuse mir anujtukma armai.

Ti untsurí shuar pújun entsararu

⁹ Nuyá ti untsurí shuaran wainkiamjai. Ashí nunkanmaya nusháa shuaraim iruntraru ásar nekapmarchamnia armai. Tura nusha uunt akupin pujutainium tura Muriknium naka wajaarmai. Tintiuki nukéa áaniun takaku armai. Tura ashí pújun entsaru armai.

¹⁰ Ashí kakantar untsurímia tiarmai:
“Ti Yusrj uunt akupin pujutainium eketna au tura Muriksha imia Niñki Uwemtikin áiniawai” tiarmai.

¹¹ Tura nayaimpinmaya suntarsha uunt akupin pujutaincha, kuatru tanuncha, tura úuntnasha téntatkar armia nu piniakum nunká tepersar Yúsan shiir awajsar

¹² tiarmai

“Nekasaiti. Tuke iniaitsuk ii Yusrj ti shiir awajsatniuiti. Niñki ti neka, ti kakaram, ti akupin, tura ti penker asamtai tuke yuminsatniuiti. Núnisan atí.”

¹³ Nuyá chikichik uunt inintsamai “Pújun entsaru ainia jusha ¿ya ainia tura tuyá ainia?”

¹⁴ Túrutkui “Uuntá, amek nékame” tímiajai.

Tutai nii túrutmiai “Ju shuar ti waitsaru áiniawai. Túrawar Murikiu numpéjai ni pushirj nijiamawar puju awajsaru áiniawai.

¹⁵ Nuna túrawaru ásar yamaikia Yusaj naka pujusar tsawaisha káshisha Yúsnan ni Jeen takainiawai. Tura akupin pujutainium eketna au tuke wainkiartatui.

¹⁶ Yamaikia tsukajaisha kitiakjaisha wáitsachartatui. Tura etsasha sukuiniak yajauch awajsachartatui.

¹⁷ Murik, akupin pujutainium naka wajana au, ni murikrin wáiniuk áyureak ti penker púkuni entsa waana nuí apujsartatui. Tura Yus ni neajkincha ukujtiurartatui.” Tu túrutmiai.

8

Anujtukma siatia nu jaakma tura kunkuin ekeemataijai túrunamu

¹ Nuyá Murik anujtukma siatin jaakmatai nayaimpiniam chikichik ura jeastatuk ajapén mitia ajasmai.

² Nuyá siati suntar Yusaj naka wajainia nuna wainkiamjai. Nusha siati kachun susamu armai.

³ Nuyá chikich suntar kunkuin enketain kurijjai najanamun itiamai. Tura Yus-sútainium ayamas wajasmatai núkap kunkuin sunasmai. Nu kunkuin ashí Yus-shuar áujsamujai métek kunkuin ekeematainiam ekeemaktiniuyi.

Nu ekeematai kurijjai najanamuyi tura uunt akupin pujutainium naka pujumai.

⁴ Tura suntar ekeemakmatai kunkuinia mukuintiuri Yus-shuar áuj samujai métek Yúsan amainkiamai.

⁵ Nuyá nu kunkuin enketain suntar achik ekeematainmaya ji kapaan káirin áimiak ju nunkanam ukaamai. Túramtai ipiamtasha untsummasha, peemsha, tura uusha armai.

Kachu umpuarma

⁶ Nuyá siati suntar kachun takakainia nu umpuarta tusar iwiarnararmai.

⁷ Emka suntar kachun umpuarmatai micha kákekamai. Nunasha ji numpajai pachimpramuncha nunkanam ajapawarmai. Túmakui menaintiu nakakma jeeán numincha tura ashí íranna nuji ekeemakmai. Tura ashí nunkanam chírichrin takamtsuk ekeemakmai.

⁸ Nuyá suntar jímiara nu kachun umpuarmatai uunt naintia áanin kean nayaantsanam ajunmai. Túramtai menaintiu nakakma jeeá nayaants numpa ajasmái.

⁹ Núnisañ menaint jeeá nayaantsanam matsatainia jákarmai. Tura menaint jeeá uunt kanua nu emesnararmai.

¹⁰ Nuyá suntar menaintiua nu kachun umpuarmatai ti uunt yaa nayaimpinmaya kapaá kákekamai. Tura entsasha tura púkuninmasha menaint nakakam jeeánnum kákekamai.

¹¹ Nu yaasha Yapá-numi náartiniuyi. Tura menaintiu nakakam jeeá entsa yapá ajasarmai. Túrunamtai ti untsuríshuar nu entsa yapá ajasmájai jákarmai.

¹² Nuyá suntar kuatrua nu kachun umpuarmatai menaintiu nakakam jeeá tsawai-nantusha kashí-nantusha tura yaasha emesnarar ajapén tee ajasarmai. Túrunawar tsawajsha káshisha menaintiu nakakam jeeánnum tsáapnircharmai.

¹³ Nuyá chíkich suntar nayaimpiniam nanamun wainkiamjai. Nusha kakantar untsukum timiai “Maa, chíkich menaintiu suntar umpuiniakui nunkanam pujuinia nu ti wáitsartatui.” Tu timiai.

9

¹ Nuyá suntar senkua nu, kachun umpuarmatai yaan nayaimpinmaya nunká kákeran wainkiamjai. Tura nu yaan tunáa shuar jákaru matsamtai yawirín susamuyi.

² Tura uraimtai nu nánkatchu wáanmaya ti mukuint jiiinmiais uunt jiniumiá áintsañ. Tura etsancha tee awajsamai, yuranmincha tee awajsamai.

³ Nuyá nu mukuintiummaya manchi jíintrar nunká ti yujaarmai. Tura ju nunkanmaya titinkia áinis najamin ajastinian susamu armai.

⁴ Chírichrincha ashí arakmancha ashí numincha yajauch awajsatin suritki-amuyi. Antsu áyatik shuar nijaiiniam Yusa naari áarar anujtukchamunak yajauch awajsatin armai.

⁵ Túrasa ajaktsuk senku (5) nántutin wáitkiastin susamu armai. Kame titin, shuaran ijiú, najawea núnis najawéatin susamu armai.

⁶ Nuji shuar wari jakataj tuñiayatan jákachartatui. Ti wakeruiniayatan jákatniun tujinkartatui.

⁷ Manchisha ísam mesetnum weena nu kawaiya áinis armai. Kurí tawaspa áinis etsenkraku armai. Yapisha shuarna áinis armai.

⁸ Intiashísha nuwanua núnis armai. Najisha úunt yawá najiya núnis armai.

⁹ Netsepén namaka saepea áinis jiru péeramuyi armai. Tura nanamenaksha kaway karu japiiniak mesetnum tsékeena núnisañ téter ajarmai.

¹⁰ Ujukésha titin̄ki ujukea áinis asa jan̄ki ajakin armai. Nujai tuke sen̄ku nantu yujarsar shuaran íjiuar wáitkiastin armai.

¹¹ Ni uuntrisha nán̄katchu waa uraimia nuyaiti. Nusha Israer-chichamjai Apatún̄ tutainti. Tura Kriaku-chichamjain̄kia Apuriún̄ tutainti. Nuka Yajauch Awajkartin tawai.

¹² Jujai emka wáitsatin nan̄kaamasai. Túrasha tuke jímiar taasai.

¹³ Nuyá suntar saisa nu kachun umpuarmatai chichaman antukmajai. Yusai naka kun̄kuin ekeemaka Yus-sutai kurimpramu amai. Tura ni kuartru yantamē kachu jiinmiai. Tura nuyá chichaak

¹⁴ suntar kachu takakun saisa nuna timiai “Kuartru suntar Eupratis kanusá pujuinia nu atiram akupkarta.”

¹⁵ Túramtai nu kuartru suntar wear menaintiu nakakam untsurí shuaran maatai tusar weriarmiayi. Kame nuna túrawarat tusar ikiusma armai. Tura nu uwitin, nu nantutin, nu tsawantin, tura nu úratin atíatin ikiusma armai.

¹⁶ Tura suntarnasha kawainium eketainian wainkiamjai. Tura timiá untsurí nekapmarchamnia asamtai aya númirur̄in antukmajai. Nusha jimíará sian̄tu miyun̄ (200.000.000) armai.

¹⁷ Tura ímiamunam suntarnasha kawaincha júnisan wainkiamjai: Eketainiaka netsepnum jirun entsaru armai. Nusha kapaaku win̄kia tura yan̄kú armai. Tura kawaisha úunt yawáa muuke áinin armai. Tura ni weneýasha jisha, mukuintiusha, asuprisha ti tsuer keá nu jíiniarmai.

¹⁸ Nu menaintiu ti yajauch wáitsamujai menaintiu nakakam shuar untsurí jákarmai. Jijiaisha, mukuintiujai, asuprijaisha jákarmai.

¹⁹ Nujai nu kaway ni wenejai shuáran wáitkiasarmai. Tura ni ujuké napí múukeya áinin áрмаi. Nújaisha shuaran wáitkiasarmai.

²⁰ Tura nujaiisha jákacharmia nú shuar tuke tunáa túratniun iniaisacharmai. Tura yajauch wakanniasha tura ántar-yusnasha tikishmatratniun ini-aisacharmai. Nu ántar-yus kurijaiisha, kuítjaiisha, jiru yan̄kutakujaisha, kayajaiisha, numijaiisha najanamú ásar wainmaktinniasha, antuktinniasha, tura wekasatniuncha tujintiiniawai.

²¹ Núnisan man̄kartuatniuncha, wawekratatniuncha, tsanirmatniuncha, tura kasamkatniuncha iniaisacharmai.

10

Papichin suntar takusmia nu

¹ Nuyá chíkich kakaram suntar nayaimpinmaya táarun wainkiamjai. Nusha yuran̄kim amuámu tura múuknum tuntíak téntakmauyi. Yapisha etsajai métek win̄chayui. Tura kujapésa ji keá áintsan̄keyi.

² Nusha papin urak takakauyi. Tura imiá uunt asamtai ni nawé untsuur-numan̄i nayaantsanam tura menar̄in̄i kukar tarimias wajasmai.

³ Tura úunt yawá kakar shiniak chicháa áinis ti kakaram untsumkamai. Nujai siati (7) ípiamtasha chichasarmai.

⁴ Nii chichasarmatai ni chichamen áartiniujai tura nayaimpinmaya chichartak “Áaráip, túrutmiai. Juka nekanashti” túrutmiai.

⁵ Tura nuyá, suntar nayaantsanmasha tura kukarsha tarimias wajama nu ni uwejē untsuur̄in̄i nayaimpinmaan̄i takuimiai.

⁶⁻⁷ Tura timiai “Peñké ishichik ajasai. Suntar siatia nu umpúakuin̄kia Yus ashí yaunchu enentáimpramia nu uminkiattawai. Emka ujatsuk ukunam ni shuar̄in̄ Yúsnan etserniua nuna ujakmiayi.” Tu timiai. Nuyá chichaak:

“Yus tuke iwiaaku pujawai. Tura imiá kakaram asa nayaimpincha, nunkancha, nayaantsancha, tura ashí nui írunna nunasha najanaiti” timiai.

⁸ Nayaimpinmaya “áaráip” túrutmia nu ataksha chichartak turutmiai “Suntar nayaantsanam tura kukar tarimias wajana nu weritiá. Turam ni untsurini papin urak takakna nu achiktá” turutmiai.

⁹ Nuyá túrutkui werin papichin seamjai.

Tura surak turutmiai “Papái. Yuátá. Tura yúamka ti yumin átatui. Tura antsu wakeminkia yapamprattame” túrutmiai.

¹⁰ Nuyá papichin suntarnumiá jukin yuamjai. Tura nii turutmia núnisan wenuruinkia ti yumin nekapramjai. Tura antsu yuan wakeruinkia yapampramjai.

¹¹ Tura nuyá turutiarmai “Waketkim ataksha ashí nunkanmaya shuaran tura ni kapitíántríncha Yus tana nu ujakartiniaitme.” Tu túrutmiai.

11

Jimiará shuar Yusaíya akupkamu

¹ Nuyá karisun nekapmatia áaniun surus turutiarmai “Weme Yusa Uunt Jee nekapmartá. Túram namañ-maa-Yus-sutaisha nekapmartá. Tura nui Yusan shiir awajeena nusha nekapmartá.

² Antsu jea áarínkia yajaya shuar susamu asamtai nekapmatsuk ikiuktiá. Nu shuar ti shiir péprun Jerusarénkan kuarentitús (42) nantu nui akupeenak mash yajauch awajsartatui.

³ Túruiniakui Wikia Wii-shuaran jímiaran akatran akupkattajai. Nusha chikichik mir jimiará sianu sesenta (1.260) tsawant pujasar Winian etserkartatui. Nuka menaintiu uwí nankaamasaiti. Úutkur-entsatai pushin entsaru ártatui.” Tu turutiarmai.

⁴ Nu jímiar shuarsha nayaimpiniam nakumkamu áiniawai. Uriwiu numisha jímiar tura shirikip ekeemataisha jímiar nayaimpiniam awai. Nusha ju nunká Uuntri Yusaí wajainiak, jímiar akatramua nú shuaran nakumainiawai.

⁵ Shuar nin yajauch awajsataj tutai ni weneniá jinia jiki nemasri ashí áesatniuiti. Núnisan nin yajauch awajsatniun wakera nuka jákartatui.

⁶ Nu aentska Yúsnan áujmatainiak yumi yutukaip titinian kakarman takakainiawai. Núnisan entsancha numpa awajsatniun kakarman takakainiawai. Tura ashí yajauchia nujai aentsun wáitkiastinian takakainiawai. Nuna ashí ni wakeruinia nui páchitsuk túramin áiniawai.

⁷ Tura ni takatrín umikiarmatai Ti Kajen Yajasma nánkatkachu waanmaya jiiinia nu mesetan najata nupetak máawartatui.

⁸ Tura iwiarnatsuk ni ayashi uunt pepru jintiin ajapén tepeartatui. Nu péprunmasha ii Uuntri Jesukristuncha máawarmiayi. Nu péprunmaya shuar tuke tunaan túrin áarmatai Ejiptu tuíniak tura núnisan Sutuma tuíniak nu péprun páchiiniawai.

⁹ Tura menaintiu tsawant nuyá nankaamas ashí nunkanmaya shuar jaka tepan ísar iwiarnascharti tiártatui.

¹⁰ Nu jákarmatai ashí nunkanam pujuinia nú shuar ni jakamun ti wararainiak mai sunai ajartatui. Kame nu jimiará aents Yúsnan áujmatenak ashí shuaran wáitkiasaru áarmatai ti warasarmai.

¹¹ Nuyá menaintiú tsawant nuyá nankaamas jaka tepesarmatai Yus ataksha iwiaaku awajsarmai. Tura nantakiarmatai nuyá shuar nin wainkiar ti ashankarmai.

¹² Nuyá nu nantakiaru nayaimpinmaya kakaram unsumman antukar-mai: “Jui yakí wakatarum.” Tu unsummiai. Tutai ashí ni nemasri íimiainiaín yurañkim amuam nayaimpiniam wákarmai.

¹³ Túmainiai ti úurkamtai tias nakakam jeeá pepru saanakmiai. Tura siati mir (7.000) shuar jákarmai nu uujai. Chíkichkia sapijmiainiak Yus nayaimpiniam pujana nuna shiir awajsarmai.

¹⁴ Jímiar wáitsatin nankaamasai. Chikichik ajasua nu túrunatin ishichik ajasai.

Suntar siatia nu kachun umpuarmai

¹⁵ Nuyá suntar siatia nu, kachun umpuarmatai chícham kakaram chichainian nayaimpinmayan antunkamai. Juna tímiayi:

“Yamaikia ii Uuntri Yus tura ni Anaikiamu Kristu ashí shuaran akupin ajasarai. Niisha tuke amutsuk akupkartatui.”

¹⁶ Nuyá paintikuatru uuntka akupin pujutainium Yusai naka pujuarmia nu piniakum tepersar Yúsan shiir awajenak tiarmai:

¹⁷ “Uunt Yusá, ti kakaram asam Ámijiai tujinkiatin atsawai. Yáunchusha, yamaisha, tura tuke amuutsuk iwiaaku pujuwitme. Ame ti kakarmarmijiai nekas akupkatin juarme yamaikia. Tuma asakmin yu-minsajme, tiarmai.

¹⁸ Ashí shuar kajertamkaru aín yamaikia amesha kajerkatin tsawant jeayi. Jákarusha iniantkim ni túramuri íisartatme. Turam amée shuarka shiir etser-turmakua nusha, tura Aminiak enentáimturmasarua nusha, tura Ámin shiir awajtamsarua nusha ashí mash ti shiira nuna súakum akiktatme. Antsu ju nunkan emesniuka ashí emesratniunam akupkattame.” Tu tiarmai.

¹⁹ Tuíniakui Yusa Uunt Jee nayaimpiniam ana nu uranmiatai wakenmaaní Chícham Aarma Chumpitiai paant amai. Túrunamtai peemsha, ipiamtasha, cháarpisha, uusha amai tura michasha ti kakekamai.

12

Nuwasha tura Ti Kajen Yajasmasha

¹ Nuyá nakumkamu ti enentáimpramnia nayaimpiniam wantinkiamai. Nuwa etsajai penuarma wantinkiamai. Nawesha nantunam ekeemai. Tura múuknum tuse yaan etsenkrakuyi.

² Nu nuwa ajamtin asa jurertaj tusa wáitaiak ti kakantar uutmiai.

³ Tumaj ataksha ti enentáimpramnia nayaimpiniam wantinkiamai. Ti Kajen Yajasma kapaaku wantinkiamai. Muukesha siati asa siati akuptai tawaspan etsenkraku áрмаi. Tura kachurisha tiásauyi.

⁴ Menaintiu nakakam jeeán yaan ni ujukéjai japiki akakermai. Tura nunká utsamai. Nu Ti Kajen Yajasma nu nuwa jatema nuí wajasmai. Júrermetaik yuruataj tusa wajattsamai.

⁵ Tura nuwasha áishmankan jurermai. Nu uchi uunt ajas ashí nunkanam ti kakaram akupkatin asa, nu uchi akupin pujutainium Yus pujana nuí junakmiai.

⁶ Tura núwaka atsamunam pisarmai. Nuí pujustinian Yus iwiarturmai. Tura chikichik mir jimiará siantu sesenta (1.260) tsawant ayurnat tusa akupkamai. Nuka menaintiu uwí nankaamasaiti.

⁷ Nuyá nayaimpiniam meset amai. Nayaimpinmaya suntara kapitiántri Mikiar ni suntarijiai Ti Kajen Yajasmajai máanaikiarmai. Ti Kajen Yajasmasha ni suntarijiai ti máanaikiarsha

⁸ nupetmakcharmai. Túramtai nayaimpinmaya jiki akupkamuyi.

⁹ Núnisan Ti Kajen Yajasma ashí ni suntarijijai nunká akupnakmai. Nu Yajasmasha iwianchi kapitiántri Satanás tutaínti. Yáunchuya-napiiti niisha. Ashí nunkanmaya shuáran anañniuiti.

¹⁰ Nuyá nayaimpinmaya kakaram unsumman antukmajai. Tura timiai: “Unt iwianch ii yachin yajauch áujmatin jiki akupkamu asamtai yamaikia ii Yusri uwentikratniusha tura ni kakarmarin iniakmastincha tura akupkatniusha jeayi. Anaikiamu Krístusha ashí akupin ajastincha jeayi. Tura uunt iwianch ii yachin tsawaisha káshisha iniaitsuk Yusaj yajauch áujmatniua nuna

¹¹ íksan ii yachi nupetmakarai. Yus-susamu murikiu numpea áinis Jesukrístu numpejai nupetmakarai. Niisha jákatniuitkiusha surimiatsuk nekaschichaman páchitsuk etserkarmai. Nujajisha uunt iwianchin nupetkarmai.

¹² Tuma asamtai nayaimpiniam pujarmena nusha warastarum. Antsu nunká tura entsá pujarmena nusha uunt iwianch atumin tarutmarmatai, maa, waitnentajrume. Ni tsawantri ishichik ajatesman nekáa ti kajekuiti.” Tu timiai.

¹³ Nuyá Ti Kajen Yajasma nunká ajapna nuwa áishmankan jurerma nuna áinramai.

¹⁴ Turakui nuwan uunt nanapen churuwia nanapea áinis sunasmai. Nujai nanamuk yáunchuya-napiya pisar atsamunam wemai. Tura ni ayuratniunam menaintiu uwí nuyá sais nantu pujusmai.

¹⁵ Nuyá nu napi ni weneya entsá jiki nujantrumamai nuwan ajekrataj tusa.

¹⁶ Túrasha nunka nuwan yayak nakaak nu entsan mash ukuyamai.

¹⁷⁻¹⁸ Túramtai nuwan ti kakerak ni weeá chikich írunna nujai máaniaktaj tusa wemai. Nu shuarsha Yus akupkamun umirainiak Jesusan ti shiir áujmaténakui, niijjai máaniaktaj tawai.

13

Nuyá Yajasma jímiara nu

¹ Nuyá nayaantsa káanmatkariin wajasan nayaantsanmaya Yajasman jiniun wainkiamjai. Muukésha siátitiat kachuri tias tura akuptai tawaspasha tias armai. Ashí muuken Yúsan yajauch chicharin tu áarmauyi.

² Nui wáinkiamaj nu Yajasma nekas uunt yawáa áinniuitiat nawenka chai nawea áinniuyi. Wenésha nekas kajen yawáa áinniuyi. Tura Ti Kajen Yajasma Entsaya Yajasman ni kakarmarincha tura ni akupkatniurinchá susamai nujai ti kakaram akupkati tusa.

³ Entsaya Yajasma muuké chikichkin jakamnia awatmian wainkiamjai. Túrasha pénger awajnasmai. Túramtai ashí nunkanmaya shuar nuna ísar ti enentáimturar nemarsarmai.

⁴ Túrawar nin tikishmatrar shiir awajsar “¿Yaki jujaisha jeá. Imiá kakaram asamtai yaki niijjai máanaikminiait?” tiarmai. Tura Ti Kajen Yajasma ni kakarmarin Entsaya Yajasman susa asamtai ashí shuar nincha tikishmatrar-mai.

⁵ Núnisan nu Entsaya Yajasma waantu enentáimtumak Yúsan yajauch chicharkatniusha tsankatnakmai. Tura kuarentitús (42) nantutin kakaram akupkatniun sunasmai.

⁶ Núnisan túrak Yúsan yajauch áujmatuk ni náarincha ni Jeeincha tura ashí ni shuari nayaimpiniam pujuinia nunasha katsekkarmai.

⁷ Tura Yusna ainia nujai mesetan najana nupetkatniun tsankatnakmai. Tura ashí nunkanmaya shuaran akupkatniun tsankatnakmai.

⁸ Túramtai ashí shuar tuke iwiaaku átinia nu papinium ni naari yámankamtaiknumiá anujkamu atsúarma nuka nu Yajasman tikishmatrarmai. Nu papincha Murik jaka nantakmia nu takakui.

⁹ Shuar juna ántakka enentáimpratí:

¹⁰ “Shuaran emetá juinia nusha emetnattawai.

Núnisañ shuaran nan̄kijiai mainia nusha nan̄kijiai mantamnattawai.”

Tuma asamtai Yajasma mesetan najanamtai Yus-shuar Yus iistí tusar tuke enentáimtusar katsuntsar pujustin áiniawai.

¹¹ Nuyá chíkich Yajasman kukariá wáakun wainkiamjai. Nusha murikiu áanin jimiará kachurtiniuyi. Tura Ti Kajen Yajasma áinis kakaram chichaakuyi.

¹² Niisha Entsayá Yajasma kakarmarín súam akupniuyi. Tura ashí nun̄kanmaya shuaran “Entsayá Yajasma pen̄ké jaa tsuarma nu, shiir awaj-nasti” tímiai.

¹³ Núnisañ shuarti túrachminian ti turin asa ashí shuar íimiainain̄ nayaimpin-maya jinia nun̄ká ajuarmai.

¹⁴ Tura Entsayá Yajasma súam aents túrachminian ti turak ashí nun̄kanmaya shuaran anan̄kawarmai. Túrak Entsayá Yajasma nakumkamurín najanawarat tusa akupkamai. Túramtai puniajai pen̄ké jakamnia awatmia pen̄ker ajasma nuna nakumkamurín najanawarmai.

¹⁵ Kukariá Yajasma kakaram sunasmai. Nujai Entsayá Yajasma najana-mun iwiaaku awajsatniua áintsan̄ ichachkiamai. Túram ashí níniak shiir awajeacham máatniun susamai.

¹⁶ Nu arantcha ashí shuar anujmamprarat tusa akupkamai. Uuntcha uchisha kuítrinniusha kuítrinchasha an̄kantcha an̄kantchasha ashí ni ni-jain̄cha tura wakerakka untsuurin̄cha anujtuktiniuyi.

¹⁷ Entsayá Yajasma náarin̄ tura wakerakka ni náari númirurín anujtuktini-uyi. Túrachuka sumatnasha sumakchamniuyi, surutnasha surukchamniuyi.

¹⁸ Wats, wi tájana ju nekaatniuka ti nekas enentáimtustiniaiti: Entsayá Yajasma númirurí áishman̄ka númirurí asa sais sian̄tu seséntisáisaiti (666). Ashí ti neka ainia nú shuar Entsayá Yajasma númirurín nekapmar nin nekaati.

14

144.000 shuar Yúsan kantampruawarma

¹ Nuyá Murikiun Seun̄ náinnium wajan wainkiamjai. Níjiaisha sian̄tu kuaréntikuátru mir (144.000) shuar wajaarmai. Nusha níjiaí Murikiu náarin̄cha tura ni Aparí náarin̄cha anujtukma aarmai.

² Ti untsurí árpan nayaimpiniam túntuiniak teer awajenak kanusa uuntri nujan̄krak téter ajá núnisañ antukmajai. Ti kakaram ipiamta núnis amai.

³ Nu tuntuiyamujai sian̄tu kuaréntikuátru mir shuar akupin pujutainium naka wajasar yamaram kántan kantamáwarmai. Niisha kuation tan̄kunmasha tura paintikuatru uuntnumsha naka wajasar kantamáwarmai. Nu kántanka chíkichka nekaachmin armai. Aya nu sian̄tu kuaréntikuátru mir shuarka jú nun̄kanmaya shuarnumiá uwempraru ásar nu kántan kantamiarmai.

⁴ Nu shuarsha nuwajai yajauch ajascharu ásar ti shiir áiniawai. Túrawar Murik weana nui nemarainiawai. Ju nun̄kanmaya shuarnumiá uwempraru ásarmatai Yussha tura Muriksha ti shiir enentáimtiarmai. Niisha emka juukma ti shiira núnisañ armai.

⁵ Nu shuar pen̄ké wáitruachu ásar Yúsaiisha ti shiir tunáa máatrachu armai.

Menaintiu suntar chichaman etserainiawai

⁶ Nuyá nayaimpiniam suntar nanamun wainkiamjai. Nusha uwempratin chicham tuke amuukashtinia nuna ashí nunkanam pujuinia nú shuaran ujakartiniuyi.

⁷ Nusha ti kakantar untsumuk timiai: “Yus ashamkatarum. Niniki shiir awajsatarum. Yamaikia ashí shuaran súmamtikiawartin tsawant jeayi. Nayaimpincha nunkancha nayaantsancha ashí entsancha najana asamtai shiir awajsatarum.”

⁸ Nuyá chíkich suntar, jímiara nu, taa timiai: “Pai, Uunt Papirúnia pépruka penké meserai. Niisha tuke tsanirmaua núnisan ashí shuaran anampratniua núnisan utsurmai. Tuma asa niisha nú shuarjai nupetnak tuke emesnarai.”

⁹ Nuyá chíkich suntar, menaintiua nu, taa timiai: “Shuar Entsaya Yajasmancha tura ni nakumkamuríncha shiir awajeakuínkia tura nijiaíniumsha uwejnumsha ni naari anujtukmaitkuínkia

¹⁰ Yus nin kajerak ti asutiáttawai. Yapá pachimprachman áartinia áintsan ti kajerkattawai. Túramtai asupri ti tsúer keá nujai jinium wáitsartatui. Yusa suntari tura Murik ímmianum apenáwar jinium wáitsartatui.

¹¹ Ni wáitsatniuri ji esaak kajintsuk tuke mukuintia nuniskete. Entsaya yajasman tura ni nakumkamurin shiir awajeenak ni naari anujmamainia nuka tsawaisha káshisha ayamtsuk wáitsartatui.

¹² Nu asamtai ni chichamen umirainiak Yusna ainia nuka Krístun ti shiir nemarainia ásar nu tsawantai itiurchatnum pujuiniak katsuntratin ániawai.”

¹³ Nuyá nayaimpinmaya chichaman antukmajai. Nusha turutmiai “Ju áatratá: “Uunt Jesusan umirainia nu yamá jakarusha tura ukunam jakarusha ti shiir pujusartatui.” Tu aartá” timiai.

‘Núnisan Yusa Wakaní tawai. “Eta, ti takasaru ásar jakar yawerman ayamprartatui. Tura ti penker túrawar akinkiertatui” tawai” turutmiai.

Jú nunkanam arakma juukma

¹⁴ Nuyá yuran kim pújun wainkiamjai. Tura yuranminiam Aents Aja-sua nuna eketun wainkiamjai. Auptai tawaspan kurijiai najanamu et-senkrakuyi. Tura machitian éren takakuyi.

¹⁵ Tura chíkich suntar Yusa Uunt Jeeñia jiinki yuranminiam eketun kakantar chicharuk tímiai “Árak júuktin tsawant jeayi. Machitrumjai tsupiram juuktá.”

¹⁶ Tutai yuranminiam eketu ni machitrijiai nunká arakman tsupir juukmai.

¹⁷ Nuyá chíkich suntar Yusa Uunt Jee nayaimpiniam ana nuyá jíinkimiai. Niisha ni machitri éren takakuyi.

¹⁸ Tura chíkich suntar naman maar Yus-sútainmaya jíinkimiai. Niisha jinia wáinniuyi. Tura máchit ti éren takakun kakantar chicharuk timiai “Machitrum ti érea nujai uwa nunká arakma nu tsupiram juuktá. Mash tsamakarai.”

¹⁹ Tutai suntar ni machitrijiai ashí nunkanmaya uwa neren tsupir juukmai. Tura neketainiam chumpiamai. Nu neketai Yus ti kajerak shuaran ti asutiátta nuna nakumeawai.

²⁰ Tura uunt péprunmaya arantach ijiurarmai. Tura neketainmaya numpa jíinkimiai. Nu numpa tres sian tu (300) kirumitrua nu pajamar kawayu nujjiai métek ajasmai.

15

Nayaimpinmaya suntar amúamunam wáitkiastinia nuna pininnumian ukaini-awai

¹ Nuyá ashammain ti enentáimpramnian nayaimpiniam wainkiamjai. Siati suntar amúamunam wáitkiastinia nuna takusarmai. Nujai ju nunkanam yajauch shuáran ti wáitkiasar Yus kajeamun umirtatui.

² Nuyá antumianka áiv 20 Tura uunt péprunmaya aranntsau ti saar jijjai pachimpramun wainkiamjai. Ni káanmatkarincha Entsayá Yajasman tura ni nakumkamurincha nupetkarma nu nuí wajaarmai. Tura nin arpa tuntuitiain Yus súsarmai.

³ Túramtai kantamáwarmai. Yusa yaintri Muisaisa kantarincha tura Murikiu kantarincha kantamainiak tiarmai:

“Uuntá, ashí tujinchaitme. Ti penker tura ti enentáimturmin ashí najanaitme.

Ashí Uunt Akupin asam ashí nekasa nu túrasha pénkera nu túriniaitme.

⁴ Uuntá, ¿yaki ashampromkachat? Tura yaki ti shiir awajtamsachat? Aya Amek ti shiir tunaarinchaitme. Ashí nunkanmaya shuar ame ti shiir túramun wáinkiár Aminiak jeartamar ti shiir awajtamsartatui.”

Tu kantamáwarmai.

⁵ Nuyá atak Yusa Uunt Jeeñ íisan, Ti Shiir Tesaamun uranniun wainkiamjai.

⁶ Tura Ti Shiir Tesaamunmaya siati suntar siati wáitkiastinjai jíinkiarmai. Niisha ti shiir pújun entsaru armai. Netsepnumsha kurin emenmama armai.

⁷ Nuyá kuaru tankunmaya chikichik kurí piniñkian súsarmai. Nu piniñ tuke iwiaaku Yusa kajetairijjai piaku armai.

⁸ Tura Yusa kakarmari ti ashammai Ti Shiir Tesaamunam mukuintiua núnis piakmai. Túramtai nu siati suntar wáitkiastinian ukarar amuiniatsaiñ Yusa Jeeñ wayachminiuyi.

16

Wáitkiastin piniñ ukararma

¹ Nuyá Imiá Shiir Tesaamunmaya ti kakaram chichaamun antukmajai. Nusha siati suntaran tiarmai “Nunká werum Yusa kajetairi siati piniñnum ana nu ashí ukartarum.”

² Tutai emka suntar we, piniñnumia kukar ukarmai. Túramtai ashí shuar Entsayá Yajasma náarin anujmamprar ni nakumkamurin shiir awajiarma nuna ti najamin kuchap jiintiurarmai.

³ Nuyá chikich suntar jímiara nu, we Yusa kajetairin nayaantsanam ukarmai. Túramtai nayaants jakáa numpéa áinis ajasmai. Tura ashí nuí pujuinia nu kajinjiarmai.

⁴ Nuyá suntar menaintiua nu, entsanam tura púkuninmasha ukarmai. Túramtai ashí numpa ajasarmai.

⁵ Nuyá suntar entsá wáinniua nuna chichamen antukmajai. “Uuntá, amek ti penker Yus asam jútikiame. Yáunchusha tuke pujú asam ti shíiraitme.

⁶ Iis, nu shuar amée shuárumincha tura ame chichammin etserniuncha máawar ni numpen ukatraru ásarmatai Amesha núnismek numpa áarume. Maa, páchitsuk áitkianatin áiniawai.”

⁷ Tutai naman-maa-Yus-sútainmaya chichaman antukmajai. “Eta, Uuntá. Nekas kakaram asam ashí ti tujinchaitme, Nekas túratniua nu ti penker túrin asam nu shuar túramujai métek akiruitme, timiai.”

⁸ Nuyá suntar kuarua nu, tsawaj nantunam ukarmai. Túramtai jijjai shuáran esaamujai wáitkiastin kakaram sunasmai.

⁹ Tura shuar ti sukuám wáitarmia nu, nu wáitkiastinian nérenniun Yusan yajauch chicharkarmai. Tura ni tunaarin enentáimtsuk Nin shiir awajsatniuncha penké nakitrarmai.

¹⁰ Nuyá suntar senkua nu, Entsaya Yajasma akupin pujutairin ukarmai. Túramtai ni nunkeen ashí kashi ajasmai. Tura shuar ti najaimiainiak iniaíncha esamiarmai.

¹¹ Tura nújaisha yajauch túratniuncha iniaisacharmai. Antsu kuchaprijaisha tura ti najaimiainiak wáitiainiak nayaimpinmaya Yúsan ti yajauch chicharkarmai.

¹² Nuyá suntar saisa nu, Eupratis entsanam ukarmai. Túramtai kuyuámai. Nujai nantu tátainmaania akupin taarti tusa jintiamnamai.

¹³ Tura nuyá juna wainkiamjai. Ti Kajen Yajasma weneyasha, Entsaya Yajasma weneyasha tura núnisan penké Kukaria Yajasma ántar yúsnan etserniua nuna weneyasha puachia núnin yajauch wakan menaint jiniarmai.

¹⁴ Íwianch ániak aents tujintiamun túruiniak ashí nunkanmaya akupniun irurarmai. Ti Tujincha-Yusai ni uunt tsawantri jeamtai mesetan najanatai tusar weriarmai.

¹⁵ (Yamá Kristu “Aneara pujustarum, tawai. Nékachmanum kasa núnisnak jeattajai. Kánutsuk tuke iwiarnar pujak ni entsatairin penker wáinia nú shuar ti shiir átatui. Misuchu asa natsaarchattawai.” Tu tawai.)

¹⁶ Tura yajauch wakan uunt akupin ánian Armajetún nunkanam irurarmai. Israer-chichamnum nu nunka tu anaikiamuiti.

¹⁷ Nuyá suntar siatia nu, nasenam ukarmai. Túramtai nayaimpinmaya Yusa Uunt Jeenia ti kakaram chicham Yus akupin pujutainmaya chichaak “Mash uminkiai” timiai.

¹⁸ Tura nuyanka peemsha, chárpisha, ipiamtasha ajamai. Tura nunkasha ti kakaram úrkamai. Maa, aents jú nunkanam yámankamtaik pujuarmia nuyá júnis úrkamuka atsuwiti.

¹⁹ Ti Uunt Péprusha menaint nakantrama. Ashí nunkanmaya péprusha saanakiarmai. Nuisha Yus ti kajerak Papirúnia pépruncha kajinmattsuk ni kajetairin yapá umutaia áintsan aarmai.

²⁰ Entsá ajapén atentrasha tura murasha menkaramai.

²¹ Núnisan nayaimpinmaya uunt kaya núnisan micha kákeramai. Ti uunt ániak kintiarjai métek kijin armai. Shuarsha nujai ti wáitiainiyatan áyatik Yúsan yajauch chicharkarmai.

17

Tsanirmatai nuwá asutiámu

¹ Nuyá siati suntarnumiá chikichik taruti turutmiai “Winitiá. Tsanirmatai nuwá ti asutiátniun iniaktustatjame. Nu nuwá nayaantsanam uku eketui.

² Ashí ju nunkanmaya akupin nijiai tsanirmawaru ániawai. Núnisan ashí ju nunkanmaya shuar, nu nuwá tsanirmatniun tsankateam, nijiamanch umartinia áintsar nijiai ti yajauch túrawar nampekarmai.” Nuna taku Yusnumiá kanaktinian nakumkamai.

³ Nuyá mesekranam kampuntin atsamunam jurukmiai. Tura nuj Yajasma kapaakunam nuwá eketun wainkiamjai. Nu Yajasma nasha ashí Yúsan yajauch chichareamu áatramuyi. Muuke siátitiat kachuri tiásauyi.

⁴ Nu nuwasha tarachin yamakai kapaakujajisha ti shiir iwiarmamar entsaruyi. Kurijajisha, shírmach kayajajisha, ti shiir sháukjajisha iwiarmamprauyi. Kurí pininkian mujmiainnisha tura ashí ni tsanirmatairi imiá yajauch armia nunasha piakun ajaamak takakauyi.

⁵ Nijianiumsha ni naarja áintsan yúpichuch nekaachminia nu júnis áarmuyi: UUNT PAPIRÚNIA, Ashí Tsanirmauncha tura Ashí Ju Nunkanam Mujmiainian Túrinia Nunasha Nukurinti.

⁶ Nu nuwasha Yus-shuar Krístunun etserkar máawarma ainia nuna numpen nampekuyi.

Nuna wáinkian ti enentáimturmajai.

⁷ Túrunamtai nayaimpinmaya suntar túrutmiai “¿Urukamtai imiá enentáimtam? Wats, ashí nuwanun paant ujaktatjame. Núnisan yajasma ekenak júana nunasha paant ujaktatjame. Muuksha siátichukait tura kachurisha tiáschak áinia.

⁸ Nu yajasma wáinkiam nuka yaunchu pujuwiti tura yamaikia jui pujachiat amúamunam tuke játsuk nánkatkachu wáanmaya jíinkíttiawai. Shuar nuna wáinkiar ni naari tuke iwiaaku pujutai papinium yámankamtaiknumiá anujtukchamua nuka nu yajasman ashamkartatui. Nu yajasma yaunchu pujú yamaikia atsayat atak wantinkiattawai’ turutmiai.

⁹ ‘Nekas neka ainia nu juna enentáimturarti: Siati muukenka siati náintian nakumui. Nu nuwá nui eketui.

¹⁰ Núnisan ni siati muuke siati akupniun nakumui. Kame senku akupniuka nankaamasaru ainiawai. Chikichik tuke akupniuiti tura chikichka tuke taatsui. Nii taasha núkap tsawant akupkashtatui.

¹¹ Nuyá ashí ukunmanka yaunchu amia nú yajasma wantiniak nujai uchu akupin ajastatui. Túmaitiat chikich siati akupniujai iruram métek enentáimpramniaiti. Tura nu yajasma yamaikia atsayat wantiniak akupak umik tuke emesnartinnium wétatui’ turutmiai.

¹² ‘Tias kachurj wáinkiam nuka tias akupin tuke akupeenatsna núiti. Niisha nu yajasmajai métek penké ishichik tsawant akupin ajasartatui.

¹³ Ju tias akupniusha métekrak enentáimiainiak ni kakarmarin yajasman sústartatui nújaisha akupkat tuser.

¹⁴ Murikjaisha mesetan najanawartatui. Túrasha Murik nupetkartatui. Niisha uuntjai nankaamas Uunt asa tura núnisan akupniujai nankaamas Akupin asa nupetmaktatui. Tura Nijjai írutraa nu, Yus Winia atí tusa achikma ásar tura Nin tuke umirin ásar Nijjai nupetmakartatui.’

¹⁵ Suntar tuke chichartak turutmiai ‘Tsanirmatai nuwá nayaantsanam uku eketu wáinkiachumek. Nu nayaantsaka ashí nunkanmaya shuaran nakumeawai.

¹⁶ Tura tias káchuka yajasmanum wáinkiam nu, tsanirmatai nuwan nakitrar ajapawar misú ikiukiartatui. Ni ayashíncha yuawartatui tura áesawartatui.

¹⁷ Nu akupniu enentáin Yuska ni wakeramurin apujsaiti. Nii timia nu umintsain akupniusha métekrak enentáimprar ni kakarmarin takamtsuk yajasman súsatniun enentáimtikramai.

¹⁸ Nuwá wáinkiam nuka ashí nunkanmaya akupniun akupeana nu pépruiti.”

18

Papirúnia emesramuiti

¹ Nuyá nayaimpinmaya suntar táarun wainkiamjai. Ti kakaram akupin asa nunkancha tsáapin awajsamai.

² Tura ti kakantar chichaak timiai “Pai, Uunt Papirúnia penké meserai. Tura yamaikia íwianch matsamtaisha ashí yajauch wakaní pujutairisha ajasai. Mujjmiai nanamtincha tura ashí yajauch nanamtin ainia nusha nui pasunmainiawai.

³ Nu péprunmaya shuar tuke tsanirmaua núnisan ashí nunkanmaya shuaran anampratniua núnisan ni ti yajauch turamujai utsuurmai. Núnisan ashí jú nunkanmaya akupin Yúsan iniaisar nijjai tsanirmawarua áinis áiniawai. Tura shuarsha ni yajauch wararmajai ti kuítrintin ajasaruiti.” Tu timiai.

⁴ Nuyá nayaimpinmaya ti kakantar chichaman antukmajai. “Wíi shuaraitrumna nuka nú peprunmaya jíinkitiarum. Túrachkurmeka ni tunaari jumamkirum ni wáitsatniuríncha pachiinkiatarme.

⁵ Ni tunaarisha ti piak nayaimpiniam jeastatuk ajasai. Tuma asamtai Yus ni tunaarín kajinmatkichiiti.

⁶ Ni tunáa túramujai métek akikiam ataksha nuna nankaamas métek patattsata. Ni yajauch túramu nijiamchin ashí áararma núnisan nuna nankaamas ti wáitsatin nijiamanch pachimpruram susata.

⁷ Waantu enentáimtumak yajauchin wararsama nujai métek ti wáitkiastá yamaikia. Tunáan ti túriniaitiat ni enentáinkia enentáimias “Uunt Akupniuitjai. Wajechu asan penké wáitsashtiniaitjai” tu enentáimtumawai.

⁸ Tuma asamtai ti wárik chikichik tsawantai ni wáitsatniuri tarittiwai. Jákatniusha ti wáitsatniusha tura tsukasha tarí ashí jijiai ekeemankattawai. Uunt Yus ashí Tujincha nu kajer kamu asa nujai asutniáttawai.” Tu timiai.

⁹ Ashí nunkanmaya akupin niijiai tsanirmawaru ainia nu ashí yajauchin niijiai wararsaru ásar nu pepru esaak múkuint ajakuí eáarmai.

¹⁰ Ti esaak wáitiakui nu pachiinkiar wáitsatniun ashamainiak arant wajasar tiartatui “Maa, Papirúnia ti uunt pépruítat nekas wáitnenmai ajawai. Imiá wárik ni wáitsatniuri tarini.”

¹¹ Núnisan ashí nunkanam súrin ainia nusha nu péprun ti kuntuts enentáimturar eáartatui. Ni surutain itiamun zyaki sumarkat?

¹² Kame júna itiaru ániawai: kurincha, kuítniasha, kaya shíirmachincha, ti shiir sháuknasha, ti pénker tarachniasha, akupin entsatai shiirmachin yamakaincha kapaaniuncha, sétancha, itiaru ániawai. Núnisan ashí kunkuin numincha, ti shiir awara najanamuncha, ti shíiram numincha, yanjú jiruncha, penké jiruncha, mármur kayancha itiaru ániawai.

¹³ Núnisan ishpinnasha, nusháa kunkuinniasha, mira kunkuinniasha, umutaincha, asuítincha, trikiu neréncha, tura trikiu ti pénker nekenmancha itiaru ániawai. Núnisan áintstai tankuncha, murikniasha, kawaincha ni kárurijiai, tura nú arantka shuárnasha suruktinian itiaru ániawai.

¹⁴ Tura nu péprun tiarmai “Numí nerén ti wakeruk súmauya nu yamaikia nu atsawai. Ashí ni kuítrisha tura ashí ni pénkerisha tuke penké amuukayi.” Tu tiarmai.

¹⁵ Ashí nuna súrin armia nu, nuna surukar kuítrintin ajasaru ásar, ti wáitsamun ashamkar arant wajasar eáartatui.

¹⁶ Túrawar tiartatui “Maa, uunt pépruítat ti wáitnenmai ajakai. Nuwa ti pénker iwiarmampra áinis nuyá shuar akuptai tarachin yamakaiijiai kapaaku entsarmai. Kurijiaisha kaya ti shíirmachijiaisha tura ti pénker sháukjaisha ti shiir iwiarmampraruyi.

¹⁷ Ti wárik ashí jú kuit amukaiti.” Tu tiarmai.

Ashí uunt kanú kapitíántrisha, ashí nayaantsanam katiinia nusha, ashí kanú wiánniusha, tura ashí kanú nérennurisha árantak wajasarmai.

¹⁸ Tura pepru esaak múkuint ajan wáinkiar ti kakantar úutainiak tiarmai “Timiá shiir pepru atsuwiti.”

¹⁹ Tiar ti kuntuts pujuiniak awatmamar kakantar úutainiak tiarmai “Maa, ti uunt pépruítat ti wáitnenmai ajakai. Ashí uunt kanu nérentin nayaantsanam niijiai takasar kuítrintin ajasarmai. Tura ti wárik mash emesnarai.” Tu tiarmai.

²⁰ Antsu nayaimpiniam pujarumna nu, ashí Yus akatramutirmesha, ashí Yusna etserniutirmesha, tura ashí Yus-shuar árumna nu ni wáitsamujai warastarum. Nu wáitsamujai atumin yajauch awajtamsamarmena nuna yapajtiurmakurme.

²¹ Nuyá ti kakaram nayaimpinmaya suntar ti uunt neketai kayan jukí nayaantsanam ajun timiai “Júnisañ uunt pepru Papirúnia emesnar atakka wainniakchatin tuke menkakattawai.

²² Tura atakka jantsemma pin̄kiuisha tampursha shakapsha antunkashtatui. Nu arantcha nuñkia shuar pen̄ké takakmaschartatui. Túramtai nekeamusha antunkashtatui. Ashí mitia átatui.

²³ Shiripkincha ekeemakchartatui. Nuatma nampersha antunkashtatui. Nuikkia ni shuari súr̄in arma nu ashí nuñkanam nan̄kaamantu armai. Tura ashí nuñkanmaya shuaran waweatniua ántsañ níya núnis ajasarat tusa anan̄kawarmai. Túrasha núnisañ ti kakarmaitiat ju mash túrunayi.” Tu timiai.

²⁴ Kame ni akupkamujai pen̄ker shuar ti mantamnawaru asamtai nu péprunam ashí yaunchu Yusna etserniu numpesha, ashí Yus-shuara numpesha tura pen̄ker shuar ashí nuñkanam maamu ainia nuna numpesha nu paant wáinkiamniati.

19

¹ Nuyá nayaimpinmaya ti untsurí aents kakantar untsumainian antukmajai.

“Ju ti shiir enentáimtumainti. Yuska uwempratniuncha, nekas shiir átinniasha, nan̄kaamaku átinniasha, tura ashí kakarmancha nekas nérenniuiti.

² Niisha aya nekas pen̄ker túratniua nuna túrin asa ti nukap tsanirmaun ashí shuaran tsanirijjai utsuun ti asutiáyi. Nin ti wáitkias ashí ni shuari máawarman yapájmiátkaiti” tiarmai.

³ Ataksha kakantar untsumainiak tiarmai:

“Ti shiiraiti. Nii wáitsatin ji esaak tuke kajintsuk múkuint ajawai.” Tu tiarmai.

⁴ Tuíniakui paintikuatru uunta nu tura kuatru tan̄kusha nuñká piniakumawar akupin pujutainium Yus pujana nuna shiir awajsarmai. Túrawar “Imiá nekasaiti. Ti shiir túriniaitme” tiarmai.

⁵ Akupin pujutainmaya chícham jíinkimiai.

“Yusna takarniutirmesha tura ni umirniutirmesha, úuntaitkiurmesha úchitkiurmesha kapitíánitkiurmesha péejchachitkiurmesha, ii Yusr̄i tuke shiir awajsatarum.” Tu timiai.

Murik nuatnaikiatin namperi

⁶ Nuyá ti untsurí aents chichainiak kanusa uuntri nujan̄krak téter ajá núnisañ antukmajai. Ti kakaram ipiamta núnis amai.

“Tí shiiraiti, tiarmai. Ii Uuntri Yus ashí tujincha asa ashí akupkatniun nan̄kaamayi.

⁷ Tuma asamtai shiir enentáimsartai. Murikiu anajmarmari shiir iwiarnar-matai ni nuatnaikiatin tsawantri jeayi. Tuma asamtai ti shiir warasar nincha shiir awajsatai.

⁸ Murikiu anajmarmariñkia iwiarnarti tusa ti shiir pushí sunasmai. Nusha yamaram máatrachu asa ti pújuiti.” Tu tiarmai.

Nu pushí Yus-shuar pen̄ker túramun nakumeawai.

⁹ Nuyá nayaimpinmaya suntar turutmiais “Ju átrarta: “Murik nuatma námpernam ipiaamu ainia nuka ti shiir warasarti.” Tu aartá, turutmiais. Juka Yus timia asa imiá nekasaiti.”

¹⁰ Takui nu suntaran shiir awajsataj tusan tikishmatramjai. Túramtai turutmiais “Pen̄ke áinkiaip. Wisha Yusa yáintrintjai ámijjai métek tura yatsumjai métek Kristu nekas chíchamen tuke umirin ainia nu. Yúsak shiir awajsatniuiti.” Tu turutmiais.

Kame Kristu imiá nekas timia nuna ashí Yúsna etserainia nú shuar paant awajkartin áiniawai.

Kaway pújunam eketna nu

¹¹ Nuyá nayaimp uranniun wainkiamjai. Nuí kaway puju wantinkiamai. Nu kawaynium ekeema nuna naari Ti Penker Umin tutajyi. Núnisan Ti Nekas Turin tutajyi. Ti penker Akupin asa aya nekas penker túrak mesetan najanaiti.

¹²⁻¹³ Ni jiiisha jijjai métek keearmai. Múuknumsha akuptai tawaspan untsurí etsenkrakuyi. Nuí ni naari Yus Chicham áarmauyi. Túrasha tana nuna Nínki takamtsuk nekaamai. Numpajai enkerman entsaruyi.

¹⁴ Ti untsurí nayaimpinmaya suntar mesetnum weena áintsar kawainium ekemkar ti shiir pújun entsaru Nin nemariarmai.

¹⁵ Nu suntara Uuntri weneeya, ashí nunkanmaya yajauch shuaran máatin, puniá mai ere tsakatskatin jínmiai. Tura jirujai asutiátniua áintsan ti kakaram akupkattawai. Túrak Ashí Tujincha Yusa kajetairi ti kakarma nujai shuáran asutiáttawai. Uwa nekenkar ijiuratniua áitkiasan wáitkiasartatui.

¹⁶ Ni pushirincha makuincha ni naari áarmauyi: Ashí Akupniun Akupin tura Ashí Uunta Uuntri.

¹⁷ Nuyá tsawái-nantunam suntaran eketun wainkiamjai. Nusha nayaimpiniam nanamtin nanamainian kakantar untsuak timiai “Yusa uunt namperin yurumáitiarum.

¹⁸ Akupniu namañkéssha yuítiarum. Suntara kapitántri namañkéssha, kakaram suntara namañkéssha, kaway namañkéssha tura eketainia nuna namañkéssha, kame ashí shuara namañkéssha nankaamantu ainia núnasha tura penké shuar ainia núnasha yuítiarum.” Tu untsukmai.

¹⁹ Tura nuyá Entsaya Yajasmacha tura jú nunkanam akupin ainia nunasha ashí ni suntarjijjai wainkiamjai. Niisha kawainium eketka nujai tura nuna suntarjijjai mesetan najanatai tusar iruntrarmai.

²⁰ Tura nu mesetnum Yajasmasha tura Kukariá Yajasmasha, penké ántar yúsnan etserniua nu, mai achinkiarmai. Nuikkia Entsaya Yajasma ni kakarmarin súam nu Kukariá Yajasmaka aents tujintiamun ti turak shuáran anañkawarmai. Túramtai nu shuar Entsaya Yajasma náarin apujmamsar ni nakumkamurin shiir awajsarmai. Tuma asamtai Entsaya Yajasmacha tura Kukariá Yajasmacha íwiakuk asuprijjai ti kea nu ji-antumiannum apeáwarmai.

²¹ Chíkichka kawainium eketkanumiá puniá tsakatskatin weneya jijnmia nujai mantamnawarmai. Túramtai nanamtin ni ayashin yuawar ejemakarmai.

20

Kristu mir uwí jú nunkanam akupkattawai

¹ Nuyá nayaimpinmaya suntar táarun wainkiamjai. Nusha náñkatchu waa yawirin tura jinkiatai jirun kampurman takakuyi.

² Nu suntarsha Ti Kajen Yajasma jiru kampurmajai jinkiamai. Nu Yajasma iwianchi kapitántri Satanas tuinti. Yáunchuya-napiti niisha. Tura nu iwianchin jinkiá mir uwí pujusat tusa

³ náñkatchu waa nam epenmiai. Tura waiti uraichminian anujtukmai. Mir uwí nankaamatsain ashí nunkanmaya shuaran anañkawarain tusa túramai. Antsu mir uwí nankaamasmatai ishichik tsawant ankant akupnaktiniaiti.

⁴⁻⁵ Nuyá akupin pujutainium pujuinian wainkiamjai. Tura shuara túramurin írsarat tusa kakaram sunasarmai. Tura núnisan muuke tsupirka maamu wakanincha wainkiamjai. Nusha Yusa chichamen etserainiak tura

Kristu chichamencha etserin ásar maamu armai. Niisha Entsaya Yajasmáncha ni nakumkamuríncha tikishmatracharu armai. Núnisan náarincha ni jianiumsha tura uwejnusha anujmampracharu armai. Nu shuar ataksha nantakiar emka nantaktin tsawantnum pachiinkiarmai. Túmainiak Krístujai métek mir uwí akupeamun wainkiamjai. Antsu chíkich jákaruka mir uwí nankaamatsain nantakcharmai.

⁶ Antsu emka nantaktin tsawantnum pachiinkiarua nú shuar, ti penker áimak, ti shiir warasmin áiniawai. Nu shuarka jimiará jákatniunam pachiintsuk Yusna tuke takarin tura núnisan Krístunu tuke takarin ártatui. Tura Krístujai métek mir uwí akupkartatui.

⁷ Tura mir uwí nankaasmatai uunt iwianch urani akupnaktatui.

⁸ Túram ashí nunkanmaya shuáran anankawartaj tusa jínkittiawai. Kuk nunkanmasha tura Makuk nunkanmasha ashí pujuinia nuna anankawartatui. Tura mesetan najanataj tusa ni suntarin nekapmarchamnia ti untsurí irurtatui.

⁹ Tura ashí nunkan enetak Yus-shuar matsamtaincha tura Yus ti aneamu pépruncha mash éñkekarmai. Túramtai Yus nayaimpinmaya jinia akuptuk mash áesawarmai.

¹⁰ Tura iwianchi kapitiantri, nin anankawarmia nu, asuprijjai keá jiantumiannum apenámai. Nu yaunchusha Entsaya Yajasmasha tura Kukariá Yajasmasha, penké ántar yusnan etserniua nu, nuj apenáwarmai. Nuisha tsawaisha káshisha iniannatsuk ti wáitsartatui.

Ashí amúamunam súmamtikiatin tsawant

¹¹ Nuyá akupin pujutain úntan tura ti pújun wainkiamjai. Tura nuj pujancha wainkiamjai. Niisha ti kakaram asamtai nunkasha nayaimpisha aya menkarar tuke atsúarmai.

¹²⁻¹³ Tura túrunatsain nayaantsanam jákarua nusha jínkiarmai. Núnisan iwiansamunam jaka pujuinia nusha jínkiarmai. Tura jákaruncha, nankaamantu arma nunasha tura penké shuar arma nunasha, ashí wainkiamjai. Tura Yusaj naka wajaarmai. Nuyá ashí shuar túramu aakma papí urantrarmai. Tura nu papinium aarma nujai métek ashí ni turamurí paant nékaneakui súmamtiknawarmai. Tura chíkich papisha tuke iwiaaku pujustin papí urankamai.

¹⁴ Nuyá jákatin amuukati tusa jiantumiannum apenámai. Nu jiantumiannum wétin jimiará jákatin tútainti.

¹⁵ Tura ashí shuar ni naari tuke iwiaaku pujustin papinium atsúarma nusha nuj apenáwarmai.

21

Nayaim yamaram tura yamá nunka

¹ Nuyá nayaimpisha tura nunkasha menkaramtai nayaim yamarman tura yamá nunkancha wainkiamjai. Tura nayaantsasha atsumai.

² Wi, Juan, ti shiir péprun, Yusnumia yamaram Jerusarénkan nayaimpinmaya táarun, wainkiamjai. Anajmarna ni áishrin inkiuntaj tusa ti shiir iwiamampra áintsan ti penker iwiamamuyi.

³ Nayaimpinmaya ti kakantar chichaamun antukmajai. “Iisiá, Yus yamaikia aentsjai pujawai. Tuke nijjai pujakui ashí ni shuari ártatui. Tura nijjai tuke pujak nekas tuke ni Yusri ártatui.

⁴ Yus ni neajkin ujurturartatui. Tura nuik amia nuka ashí amuukarmatai jákatniusha, úttincha, wáitsatniusha, tura najaimiatniusha atsuttawai.”

⁵ Tura akupin pujutainium ekema nu “Iistá, Wi ashí penké yamarman nájanjai” timiai. Nuyá nu arantcha turutmiai “Juka imiá nekas asamtai aartá. Nekas enentáimtustiniaiti.”

⁶ Ataksha turutmiai “Yamaikia mash uminkiaiyi. Wiitjai. Yámankamtaiknumiá amúanmasha tuke pujuwitjai. Wisha A rétranmaya Y rétranam ashí retra áintsaitjai. Ashí kitiana núnaka tuke iwiaaku pujutai entsan penké kuitchajai áartatjai.

⁷ Nupetmakunka ashí yamarma juna mash susattajai. Wisha ni Yusri átatjai. Núnisan niisha winia uchir átatui.

⁸ Antsu sápijka, Yúsan enentáimtichusha, yajauchin máatrasha, mankartincha, tsanirmatan pujurniusha, wawekratniusha, ántar-yusan tikishmatniusha, tura ashí wáitrincha asuprijjai keá ji-antumiannum apenáwartatui. Nuka jimiará jákatin tútainti.”

Yamaram Jerusaréñ

⁹ Nuyá siati suntar pinin amúamunam wáitkiastinjai piakun takakua nuyá chikichik taruti túrutmiais “Winitia. Murikiu anajmarmarin iniaktustatjame.”

¹⁰ Taku mesekranam naint yakí juruki Yusnumiá ti shiir Jerusaréñ pepru nayaimpinmaya táarun iniaktursamai.

¹¹ Nu péprusha Yusa wincharijjai tsáapniniuyi. Nu tsáapnincha kaya ti shíirmachia núnis jaspi kaya nuní saar asa ti tsáapniniuyi.

¹² Pepru yantamesha ti yakí pénkramuyi tura wáitiri tuse amai. Tura nu wáitinium suntar wajatiarmai. Nu wáitinmasha Israer-shuara uuntri tuse armia nuna naari áarmauyi.

¹³ Nantu tátainmaani menaintiu waiti amai. Nantu akatainmaanisha menaintiu waiti amai. Nunkaanisha menaintiu waiti amai. Arakaanisha menaintiu waiti amai.

¹⁴ Ti uunt kaya tuse apujsamu armai. Tura nu ekenir pénkramuyi. Nu tuse kayanam Murikiu akatramuri tuse armia nuna naari áarmauyi.

¹⁵ Suntar wijjai chichaua nu, nekapmatain kurin takakuyi. Nujai pépruncha, wáitirincha, tura pénkramurincha nekapmartiniuyi.

¹⁶ Pepru esantisha wan kantisha yakirisha mash métekrak armai. Suntarsha péprun nekapmataijjai nekapmaram esantisha wan kantisha tura núnisan jeamkamu yakirisha jimiará mir jimiará siantu (2.200) kirúmitru amai.

¹⁷ Nuyá pénkriincha nekapmarmai. Suntar aents nekapmataijjai nekapmaram sesentikuatru (64) mitru amai.

¹⁸ Nu pénkramusha jaspi kayajai najanamuyi. Péprusha aya kúrikiyi. Nu kuri ti penker sáaraui.

¹⁹ Pen apujtukma kayasha ti shiir kaya ainia nujai najanamu asa ti shiir iwiamuyi. Emka nu jaspi káyauyi. Jímiara nusha sapiru káyauyi. Menaintiua nusha ákata káyauyi. Kuatrua nusha ismirártauyi.

²⁰ Senkua nusha únise káyauyi. Saisa nusha kurnarinia káyauyi. Siatia nusha krisuritiu káyauyi. Uchua nusha periru káyauyi. Nuiwia nusha tupasiu káyauyi. Tiasa nusha krisuprasa káyauyi. Áuntsea nusha jasentu káyauyi. Tusea nusha amatista káyauyi. Ti kayaim apujsamu asamtai ti shíirmachiui.

²¹ Pepru wáitiri tuse ainia nu, ti shiir nayaantsanmaya shaukjai chikichik najanamu armai. Pepru jintisha aya kúrikiyi. Nu kuri ti penker sáaraui.

²² Yusa Uunt Jeencha wainkiachmajai. Antsu nu peprunam Uunt Yus ashí tujincha nu tura núnisan Muriksha nu péprun pímiutkui takamtsuk Níiniuyi.

²³ Nu péprunmasha tsawai-nantusha kashí-nantusha atsumchamai. Antsu Yusa winchari tsáapin awajmiais. Núnisan Muriksha tsáapin awajmiais.

²⁴ Nu tsáapnijaisha ashí nunkanmaya shuar wekasartatui. Tura ashí nunkanam akupin ainia nusha nui yujainiak ni péñkerijiai nuna shiir awajtuiniawai.

²⁵ Tura kashi atsá asamtai tuke tsawaiti. Tuma asamtai wáitiri tuke epenchamu ártatui.

²⁶ Tura ashí nunkanam péñker ana nuna nui itiaartatui.

²⁷ Tura yajauchikia penké wayashatatu. Muíjmiainian túrincha tura anankartincha penké wayachartatui. Antsu áyatik shuar tuke iwiaaku pujutai papinium naari aarma ainia nuke wayawartatui. Nu papincha Murik takakui.

22

¹ Nuyá suntar tuke iwiaaku pujutai entsan ti sáaran iniaktursamai. Nusha uunt akupin pujutainmaya ti saawi jijnmiais. Nu pujutaisha Yusna tura Muriknauyi.

² Pepru jintincha tura entsá mai paen tuke iwiaaku pujutai numi wajamai. Nusha ashí tuse nantutin neremai. Ni nuksha ashí nunkanmaya shuar tsuámatainti.

³⁻⁴ Ashí yajauchia nuka atsuttawai. Uunt akupin pujutai, Yúsnasha Murikniasha, nuiñ aa asamtai ni shuari ti paant wainiainiak tikishmatrartatui. Tura nijiaíncha ni naari anujmankartatui.

⁵ Tura káshisha atsuttawai. Nui pujuinia nuka shiripkincha etsancha atsumchartatui. Uunt Yúsak tuke tsáapin awajtiatui. Tura ni shuari tuke iniannatsuk akupkartatui.

Jesukrístu tátrinri penké nuntumsai

⁶ Nuyá suntar turutmiai “Ju chicham ti nekas asa nekas enentáimtusminiaiti. Uunt Yus yaunchu níniun etserniun ni chichamen enentáimtikramia núnisan yamaikia ni suntarin akuptuk wárik túrunatta nuna ashí ni shuarin ujakuíti.”

⁷ “Ti wárik winittiajai” tawai Murikkia.

Shuar ju papinium Yusa Chichame áarman umirna nuka shiir warasmini-aiti.

⁸ Wi, Juan, juna mash ísan mash antukmajai. Tura mash ísan antukan nayaimpinmaya suntar iniaktursama nuna shiir awajsataj tusan tikishmatramjai.

⁹ Túram turutmiai “Penke áinkiaip. Wisha Yusa yáintrintjai ámijiai métek tura yatsumijiai métek. Yúsnan etserin ásar tura ju papinium áarma nuna umirainiak Yusa yáintrí áiniawai niisha. Yúsak shiir awajsatniuiti.”

¹⁰ Nuyá ataksha turutmiai “Ju papinium aarma Yusna asamtai úukam ikiusaip. Ashí túrunatin tsawant ishichik ajatesai.

¹¹ Nu jeatsainkia yajauch shuarka tuke yajauch túruki wetí. Núnisan muíjmiainian túraka tuke túruki wetí. Antsu péñkeran túraka péñkeran túruki wetí. Núnisan esetar enentáimniusha tuke esetar Yusjai wekasati.”

¹² Muriksha tawai “Eta, ti wárik winittiajai. Túran ti shírmachin ashí péñker túramujai métek súsatniua nuna takukin winittiajai.

¹³ Wiitjai. Yámankamtaiknumia amúanmasha tuke pjuwitjai. Wisha A rétranmaya Y rétranam ashí retra áintsaitjai.” Tu tawai.

¹⁴ Ni pushiri péñker nijiamatniua núnisan péñker túrinia nú shuar shiir warasminiaiti. Nu shuar nu pepru wáitirincha wayamniaiti. Túrar tuke iwiaaku pujutai numinmaya yuamniaiti.

¹⁵ Tura antsu Yúsan enentáimtachuka, wawekratniuka, tsanirmatan pujurainia nuka, mankartinkia, ántar-yus tikishmatniuka, tura ashí shuar

wáitian wararainiak tuke túrin ainia nuka aa matsatainiak penké wayachmin áiniawai.

¹⁶ “Wi, Jesus, ashí Yus-shuaran ujakarat tusan winia suntarun akupkajai. Wikia Tawit Weeitjai. Túrasha Tawitia Úuntrintjai. Wikia ti tsáapin yaa, yánkuamia áintsanketjai.” Tu tawai.

¹⁷ Yusa Shiir Wakanisha tura Murik anajmarmasha “Winitiarum” tuiniawai.

Tura juna ántana nusha “Winitiarum” tití. Tura ashí kitiamana nuka winití. Wakerakka tuke iwiaaku pujutai entsan penké kuítchajai umartí.

¹⁸ Ashí shuar ju papinium Yus-Chicham aarma nuna antukarun juna ujaajai: Shuar juí áarman chikichan pataakka Yus nin ti wáitsatin juí aarma nuna patattsattawai.

¹⁹ Núnisan shuar juí aarman emeneakuinkia Yus ni naarin iwiaaku pujutai papiniumia jampirattawai. Tura ti shiir péprunam wayatniun suritkiattawai. Nu péprusha tura nu papisha juí paant ujakma áiniawai.

²⁰ Jú papí áantratniun ujakua nu tawai “Eta, ti wari winittiajai.” Pai, núnisan atí. Wari winitia, Uunt Jesúsá.

²¹ Ii Uuntrí Jesukrístu atumniasha shiir yainmakarti. Nuke atí.